

D. ALBERTI MAGNI,

RATISBONENSIS EPISCOPI, ORDINIS PRÆDICATORUM,

OPERA OMNIA.

In hoc volumine continentur :

- De Sensu et Sensato, liber I.**
- De Memoria et Remiscentia, liber I.**
- De Somno et Vigilia, libri III.**
- De Spiritu et Respiratione, libri II.**
- De Motibus Animalium. libri II.**
- De Ætate, sive de Juventute et Senectute, liber I.**
- De Nutrimento et Nutribili, liber I.**
- De Morte et Vita, liber I.**
- De Natura et Origine Animæ, liber I.**
- Libellus de Unitate Intellectus contra Averroem.**
- De Intellectu et Intelligibili, libri II.**
- De Natura Locorum, liber I.**
- De Causis et Proprietatibus Elementorum, libri II.**
- Liber de Passionibus aeris, sive de vaporum impressionibus.**

B. ALBERTI MAGNI

RATISBONENSIS EPISCOPI, ORDINIS PRÆDICATORUM,

OPERA OMNIA,

EX EDITIONE LUGDUNENSI RELIGIOSE CASTIGATA, ET PRO AUCTORITATIBUS
AD FIDEM VULGATÆ VERSIONIS ACCURATORUMQUE
PATROLOGIÆ TEXTUUM REVOCATA, AUCTAQUE B. ALBERTI VITA AC BIBLIOGRAPHIA SUORUM
OPERUM A PP. QUÉTIF ET ECHARD EXARATIS, ETIAM REVISA ET LOCUPLETATA

CURA AC LABORE


AUGUSTI BORGNET,

Sacerdotis diœcesis Remensis.

ANNUENTE FAVENTEQUE PONT. MAX. LEONE XIII.

VOLUMEN NONUM

PARVORUM NATURALIUM PARS PRIMA.



PARISIIS

APUD LUDOVICUM VIVÈS, BIBLIOPOLAM EDITOREM

13, VIA VULGO DICTA DELAMBRE, 13

—
MDCCCXC

D. ALBERTI MAGNI,

RATISBONENSIS EPISCOPI,

ORDINIS PRÆDICATORUM

PARVA NATURALIA

LIBER

DE SENSU ET SENSATO

TRACTATUS I

CAPUT I.

De ordine et modo dicendorum.

Quoniam autem de anima secundum seipsam considerata jam in libro de Ani-

ma determinatum est, in quo etiam libro de qualibet virtute diximus quæ secundum partem potentialem animæ principaliter esse dicitur : et determinata sunt opera propria vegetabilis et objectum, quæ sunt magis corporalia inter opera animæ : consequens erit facere considerationem de animalium naturis, quorum ipsa anima est principium et causa et ratio et substantia : et similiter tractandum est de omnibus vitam habentibus propter easdem causas.

Quæremus autem primo quæ sunt operationes propriæ animatis, et quæ communes eis et aliis, antequam descendamus ad scientias de corporibus animato-

rum. Et quia istæ operationes aliquando sunt incipientes ab anima et terminatæ in corpore, ut memoria et reminiscentia : aliquando autem sunt incipientes in corpore et terminatæ in anima, ut sensus, et somnus, et vigilia : ideo multum ad cognitionem istorum hæc quærenda sunt, ut supponantur nobis omnia quæ de anima dicta sunt. De reliquis autem quæ sequentur illa et probantur per ea quæ sunt animatorum in quantum animata sunt, dicendum erit in libris qui post scientiam de anima inducendi sunt.

Communia
magis nota
quoad nos.

Primum autem de primis est dicendum secundum ordinem scientiæ naturalis, in qua communia sunt prius nota quoad nos quam particularia : et ideo ab illis debet incipere speculatio. Ea autem quæ maxime sunt animalium in quantum sunt animalia tam communia quam propria, sunt illi animali attributa tam ratione animæ quam corporis communiter, quemadmodum sensus, ita memoria, desiderium, et omnino appetitus, et cum his gaudium et tristitia : de quibus omnibus in diversis libris est agendum antequam consideremus naturam corporum animalium : hæc enim quæ dicta sunt, omnibus insunt animalibus : sensus enim et appetitus insunt omnibus, sed non omnibus inest memoria. Cum autem his quæ dicta sunt, sunt quædam quæ insunt omnibus animalibus, sed non solis : eo quod insunt omnibus vita participantibus communiter. Quædam vero insunt non omnibus animalibus, sed insunt solis animalibus. Et quædam insunt omnibus animalibus et solis.

Quæ autem tribus dictis modis sunt proprie animalibus, maxime sunt quatuor conjugationes oppositorum, quæ sunt sigillatim octo, ita quod in qualibet conjugatione sunt duo opposita. Et illa quidem quæ conveniunt omni et soli, sunt *vigilia et somnus*. Quæ autem conveniunt omni, sed non soli, sunt *juven-tus et senectus* : et quæ soli et non omni, sunt *inspiratio et respiratio* : et hæc quidem conveniunt ut passiones conve-

niunt : sed opponuntur ut habitus et privatio circa omne animatum tam vegetabile quam sensibile *vita et mors* : de quibus omnibus suis locis erit determinandum quid sit unumquodque eorum, et quibus de causis accidant.

Sunt autem adhuc duo quæ sunt sanitas et infirmitas : sed de sanitate et infirmitate non est physici considerare, sed tantum prima principia et causas. Sunt etenim eadem principia vitæ et sanitatis et mortis et infirmitatis. Quod autem physici sit considerare de primis principiis et causis istorum, patet ex eo quod sanitas et infirmitas non accidunt carentibus vita : et ideo considerans principia vitæ, considerare habet principia sanitatis : et considerans principia mortis, considerare habet principia infirmitatis prima, et de ipsis causis ægritudinis. Et ideo plurimi physicorum et peritiores eorum medicorum qui maxime philosophica arte utuntur, terminantur ad invicem. Physici enim venientes a primis in posteriora, et ab universalibus in particularia, terminant considerationes suas de animatis ad ea quæ sunt medicinæ, quæ sunt causæ sanitatis et infirmitatis particulares. Medici autem physicæ arte utentes a particularibus ægritudinibus in signa et causas et accidentia communia ascendunt : eo quod morbum non sanant nisi remota causa morbi, et inducta causa sanitatis.

Quod autem omnia quæ inducta sunt, communia sint animæ et corpori, non est immanifestum considerare volenti causas et accidentia eorum et eorum quæ comitantur cum ipsis. Quædam autem superius enumeratorum accidunt cum sensu concomitantia sensus. Quædam autem eorum accidunt per sensum. Quædam autem sunt passiones sensuum. Quædam autem habitudines et conservationes sunt sentientium. Quædam autem salutaria sunt eis quæ sentiunt et sensibus : et quædam sunt corruptiones et privationes ipsorum. Cum sensu enim accidit inspiratio et respiratio : per sen-

sum autem memoria et reminiscentia : passiones vero sensuum sunt somnus et vigilia : habitudines autem sensibilibus et sensuum sunt diversæ harmoniæ sanitatum. Conservationes enim sunt appetitus et desiderium. Corruptiones autem sunt senectutis diversæ differentiæ. Salutaria autem sunt juvenus, et privationes sunt mortis animatorum.

Si igitur sensus sit communiter animæ et corporis, necesse est unumquodque istorum animæ et corporis communiter existere. Quod autem sensus per corpus inest animæ, et ita communiter inest animæ et corpori, manifestum est et per sermonem diffinitum sensus, et absque sermone diffinito per operationem ipsius et syllogismum. Si enim diffiniatur quilibet sensus, diffinitur ut virtus in organo sita et operans. Similiter autem et si opus ipsius attendatur, manifestum est, quoniam sine instrumentali corpore non perficitur. Convenit igitur sensus communiter animæ et corpori : necesse est igitur alia omnia communiter animæ et corpori convenire. Sed de sensu et sentire quid sit utrumque ipsorum, et quare accidit animalibus hæc passio, in libro de *Anima* dictum est¹. Repetere autem hic propter doctrinæ bonitatem non erit superfluum.

Dictum est autem ibi, quod unumquodque animal secundum quod est animal, habet sensum, per sensum enim discernimus animal a non animali². Sensum autem qui proprie insequitur animal secundum unumquodque animal in specie et numero, et convenit omni et soli, est tactus, et gustus secundum quod est quidam tactuum. Tactus quidem propter causam quæ in libro de *Anima* dicta est³. Gustus vero per escam et alimentum : per gustum enim sapidum secundum necessariam convenientiam, et

insipidum secundum contrarietatem ad naturam animalis discernit in esca : licet esca non nutriat, neque esca sit nisi per ea quæ sunt tactus : eo quod omne quod nutritur, ex eisdem nutritur ex quibus generatur, sicut in libro de *Nutrimeto* dictum est⁴. Et ideo sibi sapidum persequitur animal, insipidum autem fugit : non enim vocamus hic insipidum nullum omnino habens saporem, sed hoc quod privatum est sapore convenientis nutrimenti secundum naturam. Aliter sapor non quærunt vel fugiunt bestiæ, et præcipue immobilia secundum locum. Fuga etiam qua fugit inconveniens, et persecutio qua sequitur conveniens, non est nisi per motum dilatationis et constrictionis : quia hunc motum habet omne animal, ut sæpius diximus. Universaliter enim loquendo sapor est passio omnis nutrimenti : quæ passio sequela est complexionis ejus, sicut inferius ostendemus. Et ideo omne quidem quod nutritur, leve quidem et dulce trahit : sed grossum grave et falsum et amarum rejicit.

Insipidum
quid?

Tres autem sensus qui fiunt per media exteriora, insunt illis animalibus quæ proficiscuntur in loco et habent motum processivum : et sine eis non salvatur animal mobile : quia salvantia et nociva illius animalis non sunt in loco uno : et ideo non habebunt salutem nisi moveantur ad diversa loca : sed non possunt moveri nisi præcedat apprehensio sensibilis loci et eorum quæ sunt in loco. Et ideo tres sensus exteriores non necessarii sunt motibus animalium, qui sunt odoratus, auditus, et visus : hi enim sensus omnibus animalibus quæ habent eos, insunt causa salutis, ut scilicet præsentia et convenientia prosequantur, et mala et corrumpentia fugiant.

¹ II de Anima, tract. I, cap. 6.

² I de Anima, tex. et com. 19.

³ III de Anima, tract. V, cap. 1.

⁴ Lib. de Nutrimeto et Nutribili, trac. I, cap. 1.

CAPUT II.

Qualiter auditus et visus hominibus dantur ad utilitatem ?

Licet autem omnes sensus sint dati a natura omnibus animalibus causa necessitatis, tamen quidam et præcipue duo quibusdam animalibus dantur causa utilitatis, ut his animalibus quæ prudentiam habent et distincte naturaliter sunt susceptibilia, sicut genus humanum. Visus autem et auditus præcipue sunt hujusmodi, eo quod multas annuntiant differentias rerum, ex quibus inest hominibus tam discretio contemplativorum secundum intellectum speculativum, quam operabilium secundum praticum.

Sed quia omne quod quis scit, aut ad discens, aut inveniens novit : et sic duo sunt modi acquirendi scientiam : ideo horum ipsorum quos diximus duorum sensuum ad notitiam quæ est per inventionem, melior est visus per seipsum solum sumptus : sed discenti per doctrinam sumentem scientiam, secundum accidens melior est auditus. Quod autem visus sit melior ad notitiam quæ est per inventionem, patet¹ : multas enim et multimodas rerum ostendit differentias virtus visiva. Multas autem voco differentias multorum : omnia enim corpora colore participant, eo quod, sicut inferius osten-

demus, lumen colorum est hypostasis : et unumquodque corporum in tantum participat colore, in quantum participat lumine : participatio autem luminis aliqualiter in omni corpore simplici et mixto invenitur. Multimodas autem voco differentias, quod sensibile per se, et sensibile per accidens, proprium, et commune, maxime accipimus per istum sensum, ex quibus venimus in cognitionem substantiarum sensibilium et separatarum : propter quod etiam formalissimus sensuum est visus. Communia autem sensata voco magnitudinem, figuram, et motum cujus privatio est quies, sicut in libro de *Anima* diximus².

Sensatum commune quid ?

Auditus autem non nuntiat nisi differentias strepitus et sonorum, et in paucis animalibus annuntiat differentias vocis quæ cum imaginatione profertur : et ideo non nisi per accidens annuntians est ea universaliter de quibus accipitur scientia universalis de omnibus. Secundum accidens enim proficit ad sapientiam multum auditus. Hoc autem accidens est quod vox significat res. Et ideo per hoc quod sermo auditur, intentio sermonis intelligitur : et sic efficitur causa disciplinæ, non secundum se, sed secundum accidens : ex eo scilicet quod constat ex nominibus notam facientibus : nominum enim quodlibet notam facit de re ex eo quod symbolum est. Symbolum autem est dupliciter, scilicet rei, et loquentis. Rei autem symbolum est ab institutione : instituentes enim nomina afficiuntur aliqua rei proprietate quando instituunt. Loquentis autem symbolum est, quia cum intentione et imaginatione profertur. Et ideo sermo est instrumentum quo scientia docentis transfertur in animam discipuli : propter quod etiam viva vox efficacior est ad docendum quam scriptura librorum : quia licet scriptura ostendat res et habitudines earum in scripto, tamen modum rerum per gestus et nutus

¹ Ut patet ab Aristotele hic et I Metaphys.

² II de Anima, tract. III, cap. 3 et 6.

Auditus.

et affectum non ostendit : quæ omnia loquens ostendit. Auditus etiam per accidens melior est ad prudentiam quam visus : quia non solum exprimit res per signa, sed etiam rerum habitudines ad seinvicem per convenientiam ipsarum et differentiam, quod non facit visus. Ideo quando aliqui sunt cæci a nativitate, et alii surdi a nativitate, quod necesse est esse mutos, quia voces non audiunt : sapientiores sunt cæci quam muti et surdi propter dictam causam : quia plus confert ad scientiam auditus quam visus, licet per accidens id operetur. Dilectio tamen visus, eo quod ipse res in seipsis ostendit et non signa rerum, signum est naturalis appetitus scientiæ¹ : quia

Segnius irritant animum dimissa per aures,
Quam quæ sunt oculis subjecta fidelibus.

Et hoc est verum quando auditus secum non haberet probationem.

Notandum.

Est autem sciendum, quod cum dicimus aliquem sensuum esse ad necessitatem, et aliquem ad utilitatem, est necessitas dupliciter attendenda : quarum una est, quod aliquid dicit necessarium ad esse sine quo res non est id quod est, et propter quod est id quod est : et sic solus tactus et gustus secundum quod est quidam tactus, necessarius est animali. Alio modo dicitur necessitas secundum quod dicitur necessarium ad esse per quod quidem res non constituitur ante esse, sed sine ipso in esse non salvatur : et sic omnes sensus sunt necessarii secundum quod dirigunt adjuvantia, et docent fugere nociva, sicut dictum est superius. Insuper autem duo sunt præ cæteris ad disciplinæ utilitatem. Alii enim omnes sunt disciplinabiles etiam suorum sensibilium : propter quod destructo uno sensu, necessarium est unam scientiam perire. Visus tamen et auditus faciunt

hæc universaliter de omnibus, sed alii particulariter de quodam scibili.

CAPUT III.

De falsa opinione Antiquorum qui visum igni adaptaverunt.

In his autem quæ de anima sensimus, diximus in antehabitis de virtute quam unusquisque sensuum habet respectu sui sensibilis : ubi etiam diximus aliquid de eorum instrumentis, quæ elementa in quibus dominantur : licet enim ex omnibus elementis sint omnia sensuum instrumenta secundum proportionem geometricam commixta, tamen secundum medietatem et proportionem arithmeticam considerata non inveniuntur mixta ad causalitatem, sed in quolibet eorum unum dominatur elementum : et hoc quidem breviter tetigimus in libro de *Anima*². Sed quia super hoc multi Antiquorum speciales fundaverunt causas visus et auditus et cæterorum sensuum, ideo oportet nos hic subtilius considerare ad opiniones istas.

Antiqui enim et maxime Platonici quærun quibus et qualiter commixtis corporeis instrumentis habeant fieri sensuum operationes circa sensibilia. Quærun autem hæc secundum naturam eorum quæ sunt omnium corporum prima

¹ Patet ab Aristotele, ubi supra.

² II de Anima, tract. III, cap. 9.

elementa, quæ dicunt instrumentis sensuum dominari, et secundum naturam eorum sensuum fieri operationes. Cum autem sensus sint quinque, et elementa non sint nisi quatuor, non inveniunt quod in quolibet diverso sensu aliquod diversum elementum ab alio dominetur : et ideo cupiunt quintum sensum captare, hoc est, simul cum alio aptare ad unum elementum : et ideo suos sensus igni aptaverunt. Omnes autem Antiqui faciunt visum esse ignis secundum dominium : cujus causa fuit, quod quamdam passionem experimento acceperunt in visu, et causam illius ignoraverunt. Passio autem visus hæc est : quia constricto et celeriter moto oculo vel percusso desuper vehementer, videtur oculis ignem lucentem emittere : et aliquando etiam quando subito movetur, videtur ignem lucentem effundere super nasum. Habet autem hoc fieri in tenebris vel quando palpebræ supervelantur oculis : eo quod tunc etiam fiunt tenebræ quando palpebræ velantes tenent visum : et ideo nemo, ut inquirunt, potest dicere quod lumen lucens ex visu ingrediatur tunc in oculum ab extrinseco, sicut quidam dixerunt volentes solvere. Inducunt autem et hoc quod videtur in oculis luporum et gattorum : illi enim lucent in tenebris sicut candelæ vel carbones ardentes.

Hoc autem ita dicentes Antiqui supponebant, quod nihil lucet nisi ignis. Et ideo etiam cælum igneum esse affirmabant, et solem, et lunam, et omnes stellas. Hujus autem adhuc afferebant fortio-rem rationem : dicebant enim, quod verissimum est, quod talis est visus in potentia formali, quale est visibile quando est in actu, sicut in auditu, videtur expresse in quo est aer : eo quod sonus secundum actum factus sit in aere : nullum autem visibilium est sine lumine, sicut ex his que in scientia de *Anima*¹ tradita sunt, probatur. Oportet igitur lu-

mine abundare visum in compositione sui instrumenti. Lumen autem commiscibile in compositione corporum non est nisi lumen ignis : et ideo visum igneum esse dixerunt. Hæc igitur et hujusmodi Antiquos ad istam induxerunt opinionem.

Est autem quædam objectio mox ex dictis eorum contra eos accepta. Cum enim visibile quid objiciatur sensui quod videtur per seipsum non indigens alio ad hoc quod videatur, hoc non contingit aliquatenus latere aliquando sentientem et videntem. Ignis autem qui est in ipsa oculi compositione secundum istos, semper objicitur sibi in oculo. Ergo semper necesse est se videre sic lucentem. Quæramus igitur ab eis, quare oculus quiescens et non percussus hæc non videat? Tunc enim causam hujus convenientem assignare non possunt. Si autem ignis in eo dominaretur, semper emitteret luces visibiles : et quiescens et motus in eo dominaretur. Patet igitur quod causa objectionis inductæ contra Antiquos, quæ oritur ex falso dicto eorum, quam etiam causam opinionis Antiquorum qua putant visum esse ignem secundum dominium compositionis sui instrumenti, sumitur ex prædictis : et super istam falsam suppositionem inducunt super modum videndi per emissionem radiorum et luminis ex oculis, et multas subtiles scientias et contemplationes invenerunt : quæ omnia super illud sunt, de quibus in sequentibus veram assignabimus rationem.

¹ II de Anima, tract. III, cap. 7.

CAPUT IV.

De vera causa quare in tenebris aliquando videtur ignis micare ex oculis.

Nos autem passionis inductæ veram causam assignare volentes, dicimus quod omnia lenia habent aliquid lucis, licet ^{quid?} non omnia faciant lucem. *Lene* autem vocamus planum et politum, cujus una pars non obumbrat aliquo modo aliam, neque impedit a lucis perceptione et lucis reflexione, quæ maxime fit super *lene* politum. Tale autem *lene* maxime est humidum vel in humido terminatum : humidum enim talis naturæ est, quod ejus una pars fluit ad aliam, et nulla alii supereminet. Et ideo omne actu humidum et spissum politum est. Similiter autem si sit ex humido, sicut vitrum et metalla, quæ frequenter splendent propter eandem causam. Similiter autem fit quando cum terrestre aliquid, quod tamen non nisi in humido terminatur et coagularur, sicut sunt capita piscium et squamæ et ossa : hæc enim cum sint perspicua, sunt de natura lucentium : quoniam omne perspicuum inspissatum lucet, cum lux non sit nisi actus et perfectio perspicui, et omnis actus in propria materia habeat fieri. Hæc autem omnia probantur per ea quæ tam in *Cælo et Mundo*,¹

quam in secundo de *Anima*² dixi de *lucentibus*.

Cum igitur hæc ita constant, dicimus quod hoc quod vocatur nigrum oculi, *lene* quoddam est : similiter autem idem vocatur medium oculi, et est ubi foramen uveæ venit usque ad humorem crystallinum. Locus enim ille lenissimus est et spissus : et ideo partim ex natura diaphani constantis in ipso, cujus proprius actus est lux, partim ex lumine quod intrat in ipsum ab extrinseco, quod non perit, sed servatur et tenetur sicut cætera visibilia, sicut dicit Averroes³, aliquid hujus luminis est in oculo, non ex componentibus oculum, quia componentia ipsum sunt humores aquei et tunicæ et telæ ipsum oculum involventes : sed post ex duobus accidentibus introductis. Hoc igitur *lene* aliquid luminis habens apparet et visibile fit, quando celeriter movetur oculus. Et hujus causa est, quia tunc oculus efficitur subito in duobus sitibus : et ideo ignis micans ex ipso in situ primo subito videtur ab eodem in sit secundo antequam dispareat. Refractio autem oculi subito de situ in situm excutit lucem : sicut enim continue et celeriter idem quod fertur unum existens, est quasi duo in omni intermedio motus quo movetur oculus : ita etiam oculus unus quando subito movetur, efficitur unus quasi duo. Et ideo ut in diversis sitibus existens potest esse in duplici ratione visum et videns : tamen est idem in subjecto. Et hujusmodi exemplum est : quoniam si quis candelam in manibus teneat super aquam, quæ est in vase nigro in tenebris, et non in luce diei, apparebit speculum candelaris luminis in aqua : quam eandem aquam si moveat subito et celeriter percutiens eam nihil aliter dispargens, divaricabitur forma candelæ in tota aquæ superficie : et paulatim quiescente aqua, quiescit

¹ II de Cælo et Mundo, tract. 1, cap. 2 ad tex. 3.

² II de Anima, tract. III, cap. 12.

³ AVERROES, In III de Anima, tex. et cum. 69.

candelæ speculum in loco uno in superficie aquæ. Et omni eodem modo est de lumine, quod duplici de causa superius dictum est in oculo. Quando enim celeriter percutitur oculus, aut aliter movetur oculus, divaricatur subito humor qui est in oculo, et divaricatur lumine quod est in humore. Et quia oculus speculum vivum est, et suæ vitæ operatio est videre, ideo tunc lumen ejus restringitur super seipsum : sicut nos etiam in aqua diceremus, si aqua esset videns : tunc enim una pars aquæ videret aliam, et lumen quod est in aqua : totum autem hoc facit celeritas motus propter quem aliquid æstimatur esse videns et ad visum, cum tamen sit idem secundum subjectum.

Quod autem lenè in tenebris luceat propter causam quam superius diximus, probant capita piscium et humor turbidus quem emittit piscis, qui *sepia* Latine, et *σῆπια* Græce vocatur. Illa enim superius lucet propter dictas superius causas. De *noctilucis* autem diximus in libro de *Anima*¹, de quibus etiam inferiori faciemus mentionem. Et quod motus faciat ista sic visibilia, probatur ex hoc, quod si lente moveatur oculus, non accidit sic ignem lucentem ex visu videre : propter motum enim æstimatur id quod est unum, sit simul duo, visum scilicet, et videns : et ille in veritate seipsum videt modo prædicto : sicut contingit in refractione quando idem in uno fit et subito restringitur super seipsum secundum quod est in alio situ.

Quod autem dicunt aliquando super nasum effundi visum, non contingit nisi humore in oculo abundante qui in se habet lumen. Et ideo cum inundat versus conum nasi per foramen uveæ et diaphaneitatem tunicæ quæ vocatur *cornea*, aliquid luminis micat super nasum.

Quod autem inducunt de connaturalitate visus ad visibile, potius ostendit oppositum suæ intentionis : quia cum visus po-

tentia sit talis, quale est visibile secundum actum, et potentia luminis sit ipsum perspicuum, oportet quod in oculo dominetur natura alicujus elementorum perspicuorum : et nos hæc infra aquam esse ostendemus.

Hæc igitur vera causa est inductæ superius passionis. Ista enim opinio Platonis est : ac si nos diceremus sistulam plenam aqua esse materiæ igneæ propter luces ignis, quæ micant in ipsa aliquando.

CAPUT V.

Et est DIGRESSIO declarans quatuor opiniones Antiquorum de natura oculi vel visus.

Ante autem quam disputemus contra positionem eorum qui visum naturæ igneæ esse dixerunt, visum est nobis ponere probabiliores opiniones Antiquorum de visu, ut post melius appareat sententia veritatis, illis improbatis. Sic autem referunt Averroes et Avicenna et Algazel in *Prospectiva* sua.

Quatuor fuerunt Antiquorum opiniones de visu, quarum tres in libro de *Sensu et sensato* tangit Aristoteles. Quarta autem fuit sua propria opinio, quam tradidit tam in libro de *Sensu et sensato*, quam etiam in libro de *Anima*. Hæ autem quatuor opiniones sic erant divisæ, quod duæ asserebant, quod videmus ex-

¹ II de Anima, tract. III, cap. 14.

tra mittentes radios, et nihil omnino intus suscipientes, et nihil extra mittentes. Sed duarum opinionum quæ nos extra mittentes videre voluerunt, una fuit Empedoclis antiquissima : altera Platonis quæ scribitur in *Timæo*, et explanatur a Calcidio.

Opinio Empedoclis de visu.

Et opinio quidem Empedoclis fuit hæc, quod dixit visum esse ignis naturæ a quo continue emittitur lumen sufficiens ad omnium visibilium discretionem. Cum autem ab omni luminoso egrediatur lumen ad modum pyramidis formatum, dicebat quod ab oculis egrediuntur tot pyramides, quot visibilia videntur. Basis autem illius pyramidis, ut dixit, est res visa, et conus est in puncto oculi : et concessit quod cum omni habitanti in terra simul appareant sex signa cæli, quæ sunt sub se habentia totum hemisphærium, quod a visu egreditur pyramidis luminis quæ implet totum hemisphærium, et sufficit ad omnia visibilia contuenda. Quia vero pyramidalis figura non potest describi nisi in corpore, concessit quod lumen egrediens ab oculo, est corpus, et quod lineæ extensæ in retitudine hujus corporis sunt radii visuales, et sunt partes corporis pyramidalis, et per consequens sunt corpora. Amplius autem dixit, quod in medio pyramidis visualis est radius unus mobilis qui a puncto circuli venit per centrum basis pyramidis, et vocatur a Philosophis *sagitta* : qui radius mobilis est secundum motum oculi, et in illo radio perfectior est visus : et inde dixit esse, quod omnia conclusa sub base pyramidis æqualiter videntur : sed certitudinaliter videtur id cui incidit sagitta, alia autem confuse videntur. Et in hanc opinionem directe consentit Euclides, et post longo tempore Jacob Alchindi, qui multas demonstrationes de visu super hanc opinionem fundaverunt. Sunt etiam nonnulli Latinorum modernorum qui in eadem ce-

liderunt sententiam. Omnes autem isti conveniunt in hoc quod sensibilium formarum nihil est omnino in anima, sed potius sicut spiritus luminosi in corpore discurrentes fiunt vehicula vehentia animæ virtutes per totum, ita radii visuales pyramidaliter protensi usque ad visibile, vehunt virtutem visivam usque ad rem visam, ut discernat eam per radios accipiendo formas eorum et non per immutationem radii, sicut traditum est in libro de *Anima* ¹ a nobis secundum Aristotelicam doctrinam. Hæc igitur opinio est Empedoclis et sequentium eum.

Plato autem secundum quod in *Timæo* scribitur, et Calcidius explanat, convenit cum Empedocle in hoc quod dixit igneum esse visum, et visionem fieri per emissionem radiorum : sed dixit non esse lumen oculi sufficiens ad omnium pyramidum impletionem quæ ad omnia visibilia diriguntur et producantur : sed emitti dicit unum simplicem radium ex lumine oculi, et illum conjungi lumini obvianti sibi in aere et misceri : et tunc auctum dixit posse disgregari in figuram pyramidalem, et tunc per adjutorium luminis exterioris ad totum hemisphærium contuendum posse sufficere : et hanc causam dixit esse quare non videamus in tenebris, quia radius egrediens ab oculo exstinguitur et deficit quando non invenit alium radium sui generis, qui mixtus sibi adjuvet eum ad perficiendum visum. Dicit autem omnia sensibilia esse in anima, et per radios pyramidales tangentes visibilia, et vehentes virtutem visibilem usque ad ipsam excitari animam, ut convertatur ad ea quæ sunt apud eam recondita per naturam, et inspiciat ea. Sagitta autem mediante qua melior perficitur visus, ponitur in pyramide visiva ab eo sicut ab Empedocle. Propter descriptionem autem pyramidis perfectam et non propter necessitatem medii suscipientis formam sensibilem, dixit non fie-

Platonis opinio de visu.

¹ II de Anima, tract. III, cap. 12.

ri visionem nisi per medium distans ab oculo vidente : quia scilicet pyramis illa non nisi in spatio aliquo distantiam mensuratam habente describi potest. Hoc autem lumen et radium dixit esse corpus, propter eandem rationem quam diximus in Empedoclis opinione. Hi ambo dixerunt, quod secundum omnem veritatem verticationem oculorum egrediuntur pyramides multæ, ut posterior sit visus, et quod egreditur lumen a spiritu lucido visivo qui est in anteriori parte cerebri per aereum opticum ad oculum, qui est quasi lampas luminis, et ex oculo sicut ex lampade effunditur per tunicas oculi, quæ perviæ sunt, sicut egreditur lumen lampadis per vitrum vel pellem. Ambæ autem istæ sententiæ conveniunt, quod virtus visiva est devectora per radium usque ad visibile et ibi sentiens aut simplex, sicut placuit Empedocli, aut secundum excitationem, sicut placuit Platoni.

Galixius autem et Orpheus, sicut dixit Alfarabius, in tantum consensit errori eorum, quod dixit aerem esse sentientem. Duarum autem opinionum quæ dixerunt nos intus sustinendo videre, una fuit Democriti, et alia Aristotelis. Et Democriti quidem opinio fuit, quod forma visibilis esset decursus quidam rei visibilis ad oculum, ita quod quiddam materiale resolveretur a re visa, et veniret ad oculum, et pingeretur in oculo. Et ideo visum dicebat quemdam tactum, ac si nos diceremus quod superficies continens colorem et figuram a re visa solveretur, et ad oculos veniret. Hanc autem resolutionem nihil omnino de re minuere dicebat, eo quod superficies nihil haberet spissitudinis : et ideo ablata superficie a corpore nihil deperditum esse videtur esse ab ipso. Dixit etiam iste nihil amplius exigi ad visum, nisi quod imago superficialis a re discurrens, pingatur super

exteriorem tunicam oculi, quæ *cornea* vocatur, et est polita sicut speculum. In qua pelle dixit esse virtutem visivam oculi, eo quod oculum dixit esse speculum animatum : speculum enim dixit videre si esset vis vitæ in superficie speculi.

Aristoteles autem omnes has opiniones destruit, dicens visibile secundum esse spirituale et intentionale prius effici in aere, post in oculo, et moveri-speciem rei visæ ad interius oculi, ubi in humido crystallino est vis visiva, et ulterius procedere per continuitatem nervi optici in spiritu deductam tandem speciem usque ad locum primi sensitivi, quod est spiritus communis sensus, sicut patuit in libro de *Anima* ¹, et in sequentibus adhuc erit magis manifestum. Fuit etiam sententia ejus, sicut dicit Averroes ², lumen quod est in oculo, aliquando apparens ab exteriori intus egredi, sicut superius diximus : et ideo emitti ipsum lumen aliquo modo.

Quædam autem novella et fatua invenit, non opinio, sed insania quorundam dicentium nos videre, et intus suscipientes et extra mittentes : quia dicunt nos radios emittere, et formas suscipere. Sed quia isti dicta sua non adaptant ad causas naturales, ideo contemnenda sunt dicta eorum. Hæc igitur sint dicta de natura visus Antiquorum sapientium.

Antiquorum
opinio de
visu destruitur.

¹ II de Anima, tract. III, cap. 7.

² AVERROES, In II de Anima, tex. et com. 74.

CAPUT VI.

Et est DIGRESSIO declarans rationes dictarum opinionum quæ dicunt extra mittendo fieri visum.

Cogit autem nos exercitii delectatio, ut rationes istarum opinionum fortiores adducamus, ut postea solutis illis magis constet de veritate quartæ opinionis, quam cum Aristotele defendimus.

Et quia duæ primæ opiniones valde sunt vicinæ sibi ad invicem, ideo etiam sunt et easdem habentes rationes. Testantibus igitur Alfarabio et Averroë, duas habent isti rationes tangentes, ut sibi videbatur, ad hoc ut videremus extra mittentes radios. Quarum una est : quia si non esset visio nisi intus suscipiendo, quando homo subtiliter et acute vellet videre, non indigeret nisi ut fortiter aperiat oculum suum : et hoc non fit, quinimo constringit palpebras et arctat palpebris oculos : et ille conatus designat aliquid a se ejicere visum, ut melius perficiatur visio secundum actum. Alia etiam ratio eorum : quia viderunt, quod color non est qualitas activa et immutativa per seipsam alicujus corporis, nec aliqua alia natura agit in visibile ad hoc quod per colorem immutet corpora se tangentia : quia si aliqua alia natura ageret in res visibiles, tunc transmutarentur

ab esse suo, sicut faciunt ea quæ transmutant calidum vel frigidum. Color igitur secundum quod est color, non agit in aliquid : nec medium igitur patitur ab eo, neque organum visus. Non ergo fit visus intus suscipiendo actionem colorati visibilis, sed potius extra mittendo radios : necesse est enim ut fiat aut intus suscipiendo aut extra mittendo : et cum hoc destructivum est, quod non fiat intus suscipiendo, relinquatur extra mittendo. Quod autem activum aliquod quod defert sensibilia ad organa sensuum, sit in omnibus aliis, probant per inductionem : quoniam in auditu est motus qui defert sonum, et in odoribus est calidum siccum diffusivum odoris. In saporibus autem et tangibilibus sensibilia per essentiam suam veniunt ad organa sensuum. Cum in visibilibus nihil sit hujusmodi, oportet aliter visum fieri quam alios sensus : et ideo cum omnes fiant alii intus suscipiendo, solus visus fit, ut inquit, extra mittendo : propter quod etiam dignior et formabilior est aliis sensibus, sicut activum dignius est passivo et materiali.

His autem rationibus quas insolubiles reputant, quædam signa adjunxerunt intentionem ipsorum ex probabilibus persuadentia, quod visus extra mitteret lumen radiale pyramidaliter formatum. Et hæc signa Averroës enumerat in VI de *Naturalibus*¹ : quorum unum est, quod supra diximus, quod de oculo emittat aliquando lumen super nasum suum. Secundum autem est, quod homo in mane subito expergefactus, antequam totum humidum recedat ab oculis suis, quas videt dirigi ab oculis suis quasi radios igneos. Illi autem radii non sunt nisi in corpore aliquo. Cum igitur res ita se habeat, oportet quod sint aut in corpore quod est aer, aut in corpore quod est lumen emissum ab oculo : non autem sunt in aere, quia tunc ubique essent et viderentur in aere : ergo sunt in lumine

Rationes
Platonis et
Empedoclis.

¹ AVERROËS, In VI de Naturalibus, Parte III, cap. 3.

egrediente ab oculo. Lineæ autem radiales, ut supra habitum est, non describuntur nisi in corpore : quia lumen egressum ab oculis est corpus.

Habent autem adhuc isti duas rationes quas solvere difficile est : quarum una est de facie oculi unius, in qua frequenter describit imago, sicut in speculo, quam videns alius considerat in oculo suo sicut in speculo : et tamen ille in cujus describitur oculo, non videt eam. Si autem fieret visus intus suscipiendo, videret imaginem illam ille in cujus oculo depingitur. Cum igitur hoc verum non sit, inquirunt quod apparet visum intus suscipiendo non fieri, sed extra mittendo. Et ideo ille a cujus oculo radius emittitur, et in cujus oculo non apparet imago, videt imaginem.

Aliam autem rationem adducunt de speculo in quo apparet forma, quæ aut est in speculo, aut non. Quod autem non sit in speculo sicut in subjecto, duabus probant rationibus : quarum una est, quia si esset in speculo sicut in subjecto, tunc motu speculi moveretur : nunc autem non movetur motu speculi, sed potius motu ejus cujus est ipsa imago : in speculo igitur non est, sed potius in vultu ejus cujus est imago.

Amplius hæc figura videtur in tanta profunditate sub superficie speculi, quanta est distantia ejus cujus est imago a superficie speculi. Constat autem, quod si esset in speculo, in superficie speculi appareret : igitur non est in speculo, sed est ipsa facies intuentis : et ideo oportet quod radius egrediatur ab oculo intuentis in speculo, qui reperiatur a plana et polita superficie speculi ad faciem ejus cujus est imago, ita quod linea incidens in speculum cum linea reflexa a speculo ad faciem ejus cujus est imago, faciat angulum in superficie speculi : et tunc sub duabus illis lineis completur visio, ita quod per lineam radialem incidentem ac-

cipitur speculum, et per lineam reflexam accipitur facies intuentis : quia istæ duæ lineæ in superficie speculi conjunguntur, ideo facies in speculo apparet : et tanta apparet in profundo positio imaginis, quanta est longitudo secundæ lineæ quæ reflectitur a superficie speculi ad faciem intuentis. Ut autem hoc expressius appareat, dicamus quod imago sive facies intuentis sit A, et speculum sit B, et linea incidens speculum sit A B, linea autem reflexa sit B A, ad cujus longitudinem sumitur imago profundari sub superficie speculi, sicut describere est facile. Istæ igitur sunt rationes communes ponentium radios.

Plato autem specialiter objicit contra Empedoclem, dicens quod cum Empedocles consentiat radios pyramidales corpora esse, quod non potest esse, quod tot pyramides quot omni die egrediuntur ab oculis, quod totum implent hemisphærium, in parvo oculo concludantur : et ideo oportet quod lumen egrediens ab oculis et lumen extrinsecum adunentur, ut simul adunata duo lumina dilatari et extendi possint per hemisphærium.

Objicitur autem his objectio non magis valoris quæ est adducta ab adversa parte, quæ dicit non intus suscipiendo videre. Et hæc est : quia constat quod omne corpus quod movetur, in tempore movetur, sicut demonstratum est in VI *Physicorum*¹. Omne autem corpus æqualiter velox citius pertransit spatium majus. Si igitur in aliquo tempore transit radius visivus per spatium decem cubitorum, in tempore incomparabiliter majori transit spatium quod est inter videntem et stellas. Cum igitur prius tempus sit insensibile, secundum sensibile esse videtur : est autem insensibile : ergo non pertransit in tempore : et sic non est corpus. Hæc enim objectio, ut dicunt, non est inconveniens : quoniam velocitas radii tanta est, quod movetur per totum

¹ VI *Physic.* tract. 1, cap. 4.

spatium quod est inter videntem stellas cum tempore insensibili : et cum hoc tempus sit divisibile in infinitum, per quoddam spatium minus movetur in tempore breviori, quod tamen etiam erit insensibile : et sic non tenet inducta obiectio. Ratio autem quæ movit Democritum, fuit hæc, quod non fit notitia rei nisi per aliquid rei. Visus autem notitia quædam est rei quæ videtur. Ergo oportet quod aliquid rei veniat ad oculum videntem. Color igitur est in vidente secundum quod est aliquid rei : oportet igitur quod aliquid rei quod secundum tempus ipsius rei est, ad videntem veniat. Hæc sunt rationes Antiquorum de visu.

CAPUT VII.

Et est digressio declarans improbationem opinionum, quæ dicunt extra mittendo fieri visum.

Nos autem antequam inductas solvamus rationes, volumus improbare istas opiniones fortibus rationibus : et tunc deinde inducere harum rationum solutionem.

Improbatio
prima.

Dicamus igitur primo, quod lumen egrediens est de visu secundum ambas opiniones quæ ponunt nos extra mittendo videre illuminatum aerem qui est inter videntem et visibile. Lumen autem quo illuminatur aer, non est relatio quæ sit respectu unius, et non respectu alterius : quoniam sicut album non respectu unius est album, sed compara-

tum ad omnes : ita lumen deferens et illuminans aerem, facit aerem luminosum respectu omnium. Constat autem quod a pluribus lucentibus congregatis tantummodo majus lumen egreditur, sicut patet in conjunctione plurium candelarum. Sequitur autem ex hoc, quod pluribus hominibus simul stantibus et dirigentibus visum in aerem ad unam partem, aer plus illuminaretur quam si staret ibi unus solus : et sic quilibet homo melius videt stans cum alio, quam stans solus. Adhuc autem cum multi debiles in oculis simul stabunt, melius videbunt quam unus stans per seipsum, et limpidum habens visum : quia in multis debilibus oculis plus est de lumine quam in uno vel duobus limpidis oculis : quæ omnia absurda sunt valde. Falsum est igitur visum emittere pyramidales radios.

Amplius autem cum dicitur quod visus emittit pyramidale lumen, per quod fit sensus visivus quando miscetur medio quod est inter videntem et rem visam, tunc quærimus utrum hoc lumen per seipsum facit sensus, aut secundum quod est unitum diaphano quod est intermedium ? et sive hoc, sive illo modo dicatur, inquirimus utrum medium illud sive lumen solum, sive diaphanum illuminatum perficit videre et sentire secundum visum, ita quod sit instrumentum sentiens et reddens sensibile animæ sine primo sensitivo, aut sit non instrumentum sentiens, sed sit medium sensibile deferens et reddens tantum ?

Et si dicatur quod lumen radiale est medium sicut instrumentum, et sentiens et reddens, sicut in veritate Antiqui dixerunt : tunc oportet ut cum sit corpus, ut dicebant, et non possit unum corpus per aliquid penetrare nisi aliquid, et concedat quod pori et foramina sint per aerem quæ transeunt corpora radialia : et quia non videtur in aere tantum, sed etiam stellæ per spatium quinti corporis, oportet quod ipsum etiam sit plenum poris, et præcipue quando multi sunt simul aspicientes stellas : quod est absurdum :

nihilominus oportet ut totum lumen quod pyramidaliter radiat implens hemisphærium, efficiatur sentiens : quod est adhuc absurdum. Oportet etiam, quod cum hoc lumen uniatur exteriori lumini stellarum et solis et lunæ et ignis, ut totum lumen omnium lucentium sentiens efficiatur : quod est absurdissimum.

Si autem dicatur, quod diaphanum illuminatum est medium sicut instrumentum sentiens et reddens sensibile primo sensitivo, tunc sequitur quod totus aer sensibilem virtutem sæpe a nobis accipiat et sæpe perdat : et non solum aer, sed etiam cælum totum : et sic cæli natura magna transmutatione transmutatur si toties accipit sensum, et toties privatur eo, quoties convertitur et advertitur intuitus oculorum diversorum ad ipsum : quæ omnia sunt absurdissima.

Si autem dicatur, quod medium sive sit lumen sive sit diaphanum illuminatum, est quidem sentiens : sed ad hoc quod nos videamus, non exigitur nisi recta oppositio videntis et visi : tunc non oportet dicere, quod medium sit sentiens et non sentiens : quia nihil confert ad visum nisi recta oppositio, in cuius medio spatio intercidit medium. Sine causa igitur dicitur, quod virtus sensibilis egreditur in radiis et contingit rem visam. Si autem medium quod est inter videntem et visum, est medium tantum, et non instrumentum sentiens : et hoc est dicere, quod sit deferens tantum visum et reddens eum rei visæ : secundum istos tunc oportet quod medium illud aliquid patiat a visu oculorum, sive medium illud sit corpus pyramidale, sive sit diaphanum.

Quæramus igitur, quæ sit illa passio quam medium recipit a visu ? illa enim non est sensus visus : quia hoc jam improbatum est : quia secundum hoc medium instrumentum sentiens efficeretur. Et si dicatur quod id quod suscipit medium, illud est lumen, hoc idem est dictum : quia jam concessum est, quod lumen est ipsum medium quo perficitur visus. Dicatur igitur quid sit, utrum sit calor, vel

frigus, vel aliquid aliorum. Et si quidem est calor, tunc quidem in frigore non esset visus : et si in frigore, tunc in calore non esset, et sic de aliis oppositionibus contrariorum. Si autem est qualitas aliqua innominata, tunc mirum est qualiter scita est hæc ab auctoribus istius scientiæ : quia quod contingit fieri, contingit aliquo nomine significari. Si autem dicant quod medium est diaphanum, et quod emittitur in medium a visu, est lumen : tunc illud medium esset aliqua natura medium : et oportet quod sit medians sic quod deferat visum : et tunc rationem quæremus quare deferat virtutem visivam, sicut prius fecimus.

Amplius autem si lux corporea pyramidalis egreditur a visu, oportet quod uno vel pluribus perficiat de modis quatuor videre. Aut enim erit ita perficiens visum, quod sit conjuncta cum tota re visa et non separata a vidente, sed continuata usque ad ipsum : aut ita conjungitur cum tota re visa, quod derelinquit et separatur a vidente : aut non est conjuncta cum tota re visa, sed cum aliqua parte ejus etiam quocumque modo, sive separata, sive conjuncta se habeat ad videntem : aut ita perficit visum, quod separatur ab utroque, scilicet a vidente et a re visa. Si autem dicatur quod ita perficit visum, quod continuatur cum toto vidente et cum tota re visa : res autem visa est medietas spheræ mundi : oportet igitur egredi ab oculo lucem corpoream, quæ impleat hemisphærium : cum clauditur oculus, non iterum egreditur alia lux corporea similis primæ : et hoc fit multoties : et hoc mirum est valde si tanta corpora toties generari possunt a parvo lucido oculi : hæc generatio fit in arbitrio claudentis oculum et aperientis.

Si vero huic absurditati Plato velit subvenire, dicens parvum radium emitti ab oculo, qui post miscetur lumini exteriori, et disgregatur : et cum disgregatur, extenditur a vidente usque ad rem visam, et ita continuatur utrumque. Tunc quæramus, quare res visa eminens apparet non

videtur in tota sua quantitate? Si enim visus est per contactum radii cum tota magnitudine visi, tota ejus magnitudo deberet reddi primo sentienti: et posset quidem esse, quod disgregatio et divaricatio radii confusum faceret visum, sicut confusos et incertos videmus colores eorum qui eminus apparent: sed non tollet aliquid de magnitudine. Visa igitur eminus et visa prope ejusdem quantitatis videri debent: quod est contra experta demonstrata.

Huic autem objectioni nullo modo subvenit id quod invenit Euclides de quantitate anguli sub quo perficitur visus, qui minor est cum lineæ radiales extenduntur longe, et major quando extenduntur prope: hoc enim subvenit his qui ponunt simulacra rerum devenire ad visum non per lineas radiales, sed sub lineis radialibus. Secundum illos enim simulacrum est in oculo depictum in cono pyramidalis sub lineis radialibus concluso: de qua opinione nos infra faciemus mentionem. Isti autem de quibus hic est sermo, Empedocles scilicet et Plato, tactu radiorum dixerunt perfici visionem.

Amplius autem quale est dicere radium emissum ex oculo disgregari? Cum enim non sit aliquid agens disgregationem ejus, et sit corpus diversum habens motum ab omnibus corporibus simplicibus, quia motus ejus est a vidente ad rem visam ubicumque fuerit, oportet quod disgregatio ejus fiat ex hoc quod ingreditur inter partes ejus aliquid de non corpore vel de nihilo, quod est stultum omnino. Ex his igitur patet primum præinductæ divisionis membrum esse falsum.

Improbatio
secunda

Si autem dicant secundo modo perfici visionem, scilicet quod lux corporea pyramidaliter egrediens ex oculo conjungitur cum tota re visa, et separatur tota a vidente: tunc id quod non contingit videntem, nihil omnino reddit videnti. Sic igitur perfici visum simile aliquid est dicere ac si aliquis sentiendo tangat manu abscissa: vel ac si serpenti reddatur sensus ejus quod tangit cauda ejus abscissa, propter vitam et motum quæ permanent in cau-

da postquam abscissa est. Si autem dicant ad hoc quod ubi deficit radius, ibi immutat diaphanum quod est inter videntem et rem visam ad perfectionem visionis: nos jam in præcedentibus ostendimus esse impossibile.

Si vero tertio modo velint dicere, quod scilicet radius non tangit nisi in parte rem visam, sequitur statim ex hoc quod nulla res videatur secundum totum, sed secundum partem quæ tangitur a radio. Sed forte diceret quod quando radius tangit partem rei visæ, tunc permutatur totum visum in radium et unit se ei, et sic percipitur totum et non pars: hoc absurdissimum est, quoniam magnitudinem quæ est unum communius sensibile, maxime accipimus per visum: et quis audiet hoc ab eis quod totum hemisphærium vel tota stella Jovis vel Saturni vel aliorum corporum magnitudo unitur magnitudini radii. Oporteret enim quod magna corpora æquarentur indivisibili: quia radius in puncto in quo tangit rem visam, indivisibilis est ad minus secundum sensum. Si autem dicat, quod quando punctum radii tangit partem rei visæ, tunc immutatur quantitas diaphani tota quæ concluditur sub base pyramidis: et illam speciem rei visæ acceptam reddit radio, qui venit ad oculum et nuntiat de re visa et quantitate ejus: hæc enim in veritate fuit sententia multorum Philosophorum qui radios instrumenta quibus perficitur visus, esse dixerunt. Dicimus contra hæc, quod lineæ corporeæ pyramidis figuram describentes in diaphano, sic immutantur a natura diaphani inter se conclusi, quod debet quælibet linearum nuntium facere de sensibili: et cum multæ sint valde, tunc quidquid videtur, debet multoties videri et quasi infinitis, quod est absurdum. Adhuc autem quæramus, qua immutatione immutatur diaphanum et radius, ex quo supponitur quod videamus emittendo et non suscipiendo, et non redditorum ad superius inductam absurditatem?

Amplius si consentimus his quæ dicta

sunt in *Physicis* ¹, quod nihil est inane, et quod duo corpora in eodem loco esse non possunt : si cum hoc diceremus egredi pyramidalia corpora et radialia ab oculis, oporteret nos ponere perforatum totum aerem et totum cœlum, et non esse cœlum continuum et solidum. Adhuc autem cum videamus ea quæ sunt in fundo aquæ limpida, oporteret nos dicere aquam perforatam et plenam vacuo : et hoc omnino mirum est. Dicendo enim aquam gravem et humidam, dicemus eam impræceps descendere in omne foramen : et si cum hoc dicimus foramina manere in ipsa omnia, in quibus ponebat et discurrit lux pyramidalis in ipsa diffusa, est difficile vel impossibile intelligere.

Si autem quis dicat, quod lux ab oculis emissa, parva est : et sæpe contingit quod id quod est parvæ quantitatis, valde inficit et immutat id quod est maximæ quantitatis, sicut videmus quod parum de croco secundum colorem inficit multam aquam : et sic lux parva egrediens totum alterat hemisphærium. Dicemus in contrarium hujus, quod quando parum inficit ad multum, oportet quod illud quod est parvum, sit multæ virtutis et subtilis substantiæ : et id quod multum inficitur, erit parvæ virtutis et grossæ substantiæ, sicut se habent ad invicem aqua et crocus. Et ideo dupliciter potest commisceri crocus cum aqua. Unus enim modus est, quo commiscetur substantia croci cum substantia aquæ, ita quod plurimum unius sit cum plurimo alterius, et minimum unius cum minimo alterius : et sic parum croci inficere potest plurimam aquam : quia cum omne corpus sit divisibile, minimum croci minus est quam minimum aquæ : et ideo parum croci multiplicatur tantum quantum multum aquæ : quod sicut diximus contingit ideo quia subtilis substantiæ est crocus et aqua

grossæ. Alius autem est modus, quo crocus per solam alterationem inficit aquam, ita quod substantia manet impermixta, sicut est in omnibus sensibilibus quæ qualitates suas generant in corporibus circumstantibus se. Et hoc contingit dupliciter : forma enim sensibilis in corpore vicino rei sensatæ dupliciter generatur, sicut in medio scilicet et in subjecto, cujus extremum est, quod quando album vel croceum aliquid jacet in fundo aquæ, apparet forma illius in superficie : cum tamen aqua retineat colorem naturalem : et hoc vocatur a physicis *medium reddens tantum*, et non habet sicut subjectum habet passionem. Vocatur autem a quibusdam *esse spirituale ipsius sensibilis secundum quod est in medio*. Utroque autem istorum modorum parum croci inficit multam aquam : sed primo modo efficitur aqua crocea, sed secundo modo reddit colorem cereum ex hoc quod supernatat partibus croceis in se natantibus. Quæramus igitur, quo istorum modorum parum lucis egreditur de oculo, et inficit perspicuum aquæ vel aeris? Si enim dividitur substantia ipsius per minima et ita immiscetur substantiæ perspicui, tunc non salvatur in eo figura pyramidalis, nec salvatur in eo vis visiva. Si autem secundo modo miscetur per alterationem solam, quæ efficitur qualitas perspicui, tunc reditur ad ipsam absurditatem, quia multi habentes debiles visus, melius videbunt simul quam aliquis per se solus habent bonum visum. Idem autem sequitur si tertio modo misceatur : quia plurima alba jacentia in fundo aquæ quasi lucidam faciunt aquam, cum præcipue dictum sit in libro de *Anima* ², quod lux et lumen sint intentio rei luminosæ. Ex omnibus autem modis planum est videre, quod tertium supra inductæ divisionis membrum sciri non potest, quod est, quod lumen egrediens de visu

¹ IV *Physic.* tract. ii, cap. 2.

² II de *Anima*, tract. iii, cap. 12 et 13.

cadat in partem rei visæ qualitercumque se habeat ad oculum videntem ex quo egreditur.

Improbatio
quarta.

Si autem quarto modo, scilicet quod lumen egrediens non continuatur cum vidente neque cum re visa : hoc non potest aliter esse nisi quod egrediens non perveniat ad rem visam : et tunc si mediante ipso fit visio, hoc non potest esse nisi altero duorum modorum : quorum unus est, quod lumen recedens a visu a loco ubi deficit, immutat aerem ad sensibile percipiendum et sibi reddendum : et postquam habuerit ipsum, immutat post se aerem ad idem sensibile reddendum visui. Sensus autem est, quod illuminet lumine suo perspicuum, et per illud reddat sensibile visui : et si priori modo fiat immutatio ad sensum vehendum, diximus superius quid sequitur impossibile. Si autem secundo modo dicatur fieri, tunc quæramus quare non statim perspicuum actu illuminatum immutatur ad sensibile percipiendum et reddendum sensui? Si enim potest recipere sensibilis formam perspicuum illuminatum ab oculo et reddere oculo, tunc etiam sine illo potest recipere, si illuminetur ab alio oculo. Hæc igitur sunt quæ inducere volumus contra eos qui dicunt quod visus fit ab oculis pyramidaliter emissis radiis.

CAPUT VIII.

Et est DIGRESSIO de destructione hujus erroris per ea quæ sequuntur ex dictis eorum.

Ut autem perfectius hujus erroris qui a multis hodie defenditur, falsitas destruat, volumus nunc disputare non tantum contra, id quod dicunt, sed videre quid sequitur ex ipsis dictis ipsorum : et ut liquidius constet, resumamus dicta ab ipsis in quibus conveniunt tam Empedocles quam Plato. Dicunt autem ambo hi radios ab oculis egredi, qui procedentes ab oculis plus et plus divaricantur et dilatantur, et a quolibet corpore uno reperiuntur in aliud : et secundum extremitates eorum quæ tangunt visibilia, fit visibilium perceptio : tamen quando reperiuntur ab uno in aliud, tunc unum videtur quasi duo : quia unum in quo ultimo offendit radius, videtur non ut in seipso, sed in eo a quo radius reflectitur. Verbi gratia : radius enim oculi incidens in speculum, reflectitur in faciem intuentis speculum ad quantitatem anguli determinati : et tunc facies intuentis videtur quasi sit in speculo, et non in corpore ejus qui speculum intuetur.

Ex hoc autem dicto plurima sequuntur inconvenientia. Repercussio enim aut reflexio radii, aut fit duro et leni quod non est durum : quod falsum est : quia fit ex leni quod est aqua : et constat quod aqua non est dura. Si autem fit

ex leni secundum quod est lene, aut fit ex leni continuarum partium ubique, aut ex leni quod non in toto est continuum. Si autem fit ex leni quod ubique est continuum : tunc falsum dicunt quod ex aqua reverberetur radius : quia ipsi dicunt, quod aqua est porosa sicut et omne perspicuum : et hanc porositatem dicunt esse causam quod bene videtur per ipsam, quod scilicet ubique potest penetrari corporibus radialibus emissis ex oculo. Si autem dicunt quod fit a quolibet leni, sive sit ubique continuum, sive non continuum : tunc etiam debet fieri reflexio ab aspero : quia quod in poroso facit dissocietas inæqualitatem superficiei, hoc et non aliud in aspero facit multitudo angulorum : et cum anguli non multiplicentur in infinitum in aliqua superficie, oportet quod inter quoslibet duos angulos sit superficies plana habens latitudinem lenem determinatæ quantitatis : quia nisi hoc concederet, tunc oporteret quod corpus resolveretur ad superficies non habentes latitudinem aliquam : quod est impossibile. His autem duobus datis, oportet eos aut dare quod a qualibet leni superficie fit reflexio et hoc non dicunt : quia dicunt quod ab aspero non fit reflexio : aut unum de duobus oportet eos concedere, quod quia scilicet a superficiebus parvissimis lenibus non fit reflexio, aut quod fit quidem reflexio ab ipsis, sed adeo divaricantur radii, quod non sit sensibile lumen ad aliquem locum unum reflexum. Primum autem horum ab ipsis dici non potest : si enim, ut inquit, radii egredientes ab oculis sunt lineæ, quarum termini et summitates sunt indivisibiles, non est in aspero invenire aliquam superficiem quæ non sit latior summitate radii. Statim ergo reverberatur radius ex illa : et non potest hoc impedire angulus qui est post ipsum. Si enim ponamus salgemmam vel crystallum vel vitrum conteri in partes minutissimas, numquam erunt adeo minutæ, quod sint latiores summitatibus radiorum indivisibilium : ita debent secundum istos

reflecti a partibus illis. Et idem iudicium non est de quolibet aspero : quia etiam omnimode inter angulos superficies habet interpositas quæ sunt planæ et sunt majores punctis radiorum. Præterea impossibile est ut aliquid in superficie durum vel quocumque modo continuum dividatur in minora quam sint puncta radiorum. Extrema igitur radiorum oportet semper reflecti ab omnibus talibus : et hoc est omnino contra sensum.

Amplius autem duæ sunt causæ repercussionis in leni corpore et solido : quarum una est privatio penetrabilitatis : quia radius corporalis incidens in ipsum, non potest penetrare per ipsum, ut dicunt : et ideo tunc reflectitur. Alia autem causa est impetus violentiæ, qua reflectitur retro et recluditur sicut pila a pariete, sicut fit in resonante sono qui *echo* vocatur. Quando autem neutrum horum est, tunc non debet fieri repercussio : et ideo in diaphano, ut dicunt, nulla fit reflexio : quoniam autem diaphanum, ut dicunt multæ est porositatis : et ideo cum in profundum suum naturaliter recipiat radios, numquam reflecteret eos nisi per violentiam : et sic radii non deberent reflecti ab aqua, cujus nos contrarium videmus oculis nostris : quoniam quando radius oblique et non perpendiculariter incidit aquæ, tunc reverberatur in oppositum corpus ab aqua. Nec potest dici quod lenitas per quam corpus radius penetrare non potest, sit causa universalis reverberationis et reflexionis : quoniam si physice loquamur, non repellit aliquid aliud a se secundum naturam, nisi sicut contrarium repellit suum contrarium. Lenitas autem non penetrabilis et solida per totum non est aliqua qualitas contraria radio, nec est de numero per se agentium qualitatum, sicut sunt calor et frigus. Non igitur potest dici, quod hæc sit causa activa repulsionis radiorum. Si autem propter hoc diceretur quod reflexio fit ex repercussione violentior, sicut repercutitur pila, ita scilicet quod radius vehementer veniens in lene recluditur,

et sic reflectur : tunc oporteret quod a quolibet corpore repercuteretur, per quod potest penetrare vehementer incidens : et sic repercussio radii fieret ab aspera sicut a leni superficie : et hoc est falsum.

Omnia autem quæ inducta sunt, præcipue possunt dici illis qui non tantum ponunt reverberationem fieri radiorum, sed quod etiam simulacra apparent in loco ad quem reverberantur radii : quia illi concedunt quod ab omni superficie leni quantumcumque parva fit reverberatio et apparitio simulacri : sed tamen in aspero una pars obscurat aliam : et obumbratur lumen et simulacrum subsidens in superficie leni ab aspero eminenti, ita quod confunditur et obtenebratur et fit insensibile : tamen ex prædictis patet quod illi qui ponunt reverberationem radiorum fieri a superficie leni, nullo modo possunt evadere ab objectionibus inductis.

Si vero concedant, quod quidem fit reverberatio a quacumque parva superficie : sed tanta fit radiorum divaricatio, quod non possunt congeri ad locum unum : et ideo remanet insensibilis : propter quod nihil videtur per radios repercussos ab aspero : hoc nullo modo stare videtur : quia in speculis habentibus figuram determinatam et locum, aliquando multo magis divaricantur radii visuales : et tamen per illos completur visio. A speculo enim plano reflexio fit ad hemisphærium, ut in *prospectivis* probatur : et videtur hemisphærium in speculo plano, cum constet multo plus divaricari radios qui disperguntur in hemisphærium, quam illos qui reverberantur a superficie partis parvæ quæ interjacet angulis asperi corporis. Neutrum igitur suppositorum dici potest : nec enim dici potest, quod a parvis superficiebus asperi reflexio fieri non possit, nec etiam quod fiat, sed sit insensibilis propter divaricationem. Hæc igitur est objectio prima quæ occasionatur ex dictis antiquorum auctorum reverberationis radiorum egredientium ex visu.

Secunda autem objectio ex dictis eo-

rumdem exorta est : quoniam dicunt quod aliquando radius penetrat per aquam ad profundum aquæ, sicut quando videmus lapides albos in fundo aquæ jacentes : et aliquando repercutitur ab aqua in aliud, sicut quando videmus simulacrum alicujus apparentis in aqua. Cum enim radius sub quo fit visio, non tangat visibile nisi in puncto indivisibili, videtur quod tam id quod videmus radio penetrante per aquam, quam etiam id quod videmus radio reflexo ab aqua in aliud, debeant videri successive sicut puncta congregata, et non ut forma rei perfecta, licet unum eorum perfectius videatur quam aliud : perfectius enim videtur quod radio incidente videtur, quam id quod videtur radio reflexo : et hæc est una de fortibus objectionibus contra opinionem istorum.

Objectio autem tertia contra eosdem est : quia dicunt, quod forma quæ videtur in speculo sicut in subjecto, sicut nos supra diximus : sed cum incidit radius visivus in superficiem speculi, reflectitur discedens a superficie speculi in faciem cujus simulacrum apparet in speculo : et quia directe opponitur speculo, et continuus est radius reflexus a facie intuentis in speculum : hoc enim stare non potest. Quæramus enim utrum discessio radii reflexi a superficie speculi sit causa discessionis formæ rei visæ a radio ipso, aut non ? Si autem discessio et progressio radii reflexi a superficie speculi, non est causa discessionis formæ rei visæ a radio, tunc quomodocumque removeatur speculum, dummodo radius visivus repercutiatur a speculo, non deberet recedere forma rei visæ a radio : et hoc est falsum : quoniam taliter potest moveri elevando et deprimendo speculum, quod videns videbit speculum : et tamen non videbit seipsum in speculo, sicut demonstratum est ab Euclide in *Prospectivis*. Si autem progressio et discessio radii a superficie speculi est causa discessionis rei visæ a radio, tunc cum semper radius procedat a speculo ad aliquod corpus, numquam

debet idem corpus cum speculo videri simul una et eadem visione : et hoc iterum est falsum, cum sæpe videamus simulacrum in speculo : et tunc videmus speculum et simulacrum una et eadem simplici visione.

Si autem aliquis forte ad hoc velit respondere dicens, quod secundum diversa puncta radii incidentis et reflexi diversa simul viderentur, ita quod in puncto radii incidentis videatur speculum, et in puncto alio ejusdem radii reflexi a speculo et procedentis ab ipso ad aliud corpus videatur forma quæ apparet in speculo. Contra hoc est : quia cum radius egreditur a visu alicujus in Socratem et deinde procedit in Platonem, videbuntur Socrates et Plato secundum diversa puncta radii ejusdem ab oculo egredientis. Si ergo unitas radii reflexi a speculo facit videri unum in alio quando apparet in speculo simulacrum, tunc etiam Socrates debet videri in Platonem, vel e converso quando procedit visio a Socrate in Platonem, et tangit utrumque per diversa puncta : et hoc est falsum ad sensum. Igitur hæc responsio est inconueniens. Si autem fortasse dixerit, quod non est simile : quia in speculum incidens linea est reflexa ad formam quæ apparet in speculo, est radius unus, licet sit ab uno in aliud reflexus, sed non est radius unus qui incidat Socrati et Platoni, sed duo. Hoc iterum non impedit prædictum inconueniens : quoniam nos ostendimus supra, quod virtus visiva non egreditur ab oculo ut sentiat in radii extremitatem, sed radius egrediens, si tamen egreditur, reddit sensibile virtuti visivæ quæ est in oculis. Sive igitur reddatur per unum radium, sive per duos, semper uni et eidem redditur visibile omne. Cum igitur a diversitate radiorum non accipiat diversitatem, relinquatur omnia ut unum reddi : cum radii omnes ad unum punctum in oculo terminentur, et secundum istam opinionem nihil a re visa accipiat per quod visus fiat. Quæcumque igitur videntur, sic vi-

deri debent, quod unum appareat in alio sicut forma in speculo : et hoc modo planum est visum nullo modo esse de rebus visis. Amplius autem opinio hæc concedit multos a visu egredi radios, et illis etiam alios extrinsecæ lucis permisceri : oportet igitur quod radius incidens alicui rei visæ, a multis intersecetur radiis qui rebus aliis incidunt.

Resumanus igitur superius habita, non fieri visum supponentes, ita quod ex oculo egrediatur virtus visiva ad visibilem, sed sic fieri visum per radios sicut per medium quod reddit virtuti visivæ in oculo formas rerum visarum. Si igitur sic reddit radius, omne quod tangitur omnibus radiis intersecantibus radium visivum, redditur radio visivo : et per consequens ille omnia hæc reddit oculo. Igitur omne quod quocumque modo distat a radio visivo, dummodo recta radiatio possit fieri ab ipso ad radium visivum, debet videri simul et præcipue in speculo : quia de illo dicunt quod radius incidens nuntiat simulacrum, eo quod contingitur a radio reflexo ad simulacrum intuentis : et hoc expresse falsum est : quia nihil videtur in speculo vel extra speculum, nisi quod determinatam habet oppositionem speculi et oculi ad rem visam.

Ut autem hoc melius intelligatur, ponamus de hoc demonstrationem per lineas geometricas. Dicam igitur, quod *A* sit oculus de quo egrediuntur radii quocumque voluerimus, *B* autem sit speculum, *C* vero cujus imago apparet in speculo, *D* autem sit res alia cujus imago in speculo apparere non potest. Protrahatur autem linea *AB* quæ est radius incidens ab oculo in speculum, et nuntians speculum quod videtur. Protraham etiam lineam *BC* quæ est radius reflexus a speculo in rem, cujus simulacrum apparet in speculo. Protraham etiam lineam *AD* quæ est radius ab oculo incidens in rem visam, cujus imago in speculo apparere non potest. Linea autem *AD* secabit lineam

BC in puncto E , et hujus figuræ hæc est disciplina.

Resumam autem propositiones et per se notas et eas quæ sunt superius habitæ. Propositio autem per se nota est, quod quando agens tangit patiens, quod tunc patiens patitur ab ipso. Supra autem habitata propositio est, quod si visus fit per radios, quod hoc esse non potest, ita quod egrediatur virtus visiva ab oculo usque ad summitatem radii: sed hoc fiet ita quod radius reddat ei formam visam quam tangit in puncto. His autem habitis, constat quod oculus videt speculum per punctum B quod est extremitas radii AB , et idem oculus videt simulacrum per punctum C , quod est extremitas radii BC qui terminatur ad radium AB in puncto B communi utrique radio, incidenti scilicet et reflexo: et ideo videtur C in B : hoc autem non potest esse nisi speculum et simulacrum formas suas in quibus videntur, agant in radium: et hæc actio proveniat per radium usque ad visum. Hoc autem fieri non potest nisi altero duorum modorum: aut enim actio illa fuit continue per omnes partes radiales corporis usque ad speculum et oculum, aut venit de puncto ad punctum non per medium. Si autem primo modo fiat, tunc eadem ratione etiam res visa quæ est D immutabit continue partem radii quæ est CD , et in contactu incipiet immutare radium qui est CB , et perveniet forma ejus in speculum: et sic tria simul videbuntur, ita quod unum in alio, scilicet BCD , quod falsum est. Et non potest dici quod obliquitas impediatur quo minus immutetur linea BC quam linea CD . Quia si obliquitas et angulus impedirent immutationem, tunc non perveniret forma C per speculum B in oculum qui est A , quoniam linea AB et CB oblique conjungunt se in puncto B . Si autem dicatur,

quod immutatio venit de puncto ad punctum subito et non per medias partes radii: hoc non est intelligibile: quia sic aliquid transiret de extremo ad extremum, et non per medium: quod esse non potest. Si autem dicatur quod visus hoc modo non fit per lineas angulares, sed per eas quæ in eadem superficie describuntur: hoc est omnino absurdum: quia secundum hoc numquam fieret visus alicujus in speculo per lineas reflexas a superficie in superficiem: quod ipsi non dicunt: neque est etiam verum secundum veritatem. Omnia igitur hæc inconvenientia ostendunt visum non fieri per radios emissos ab oculis.

Si autem forte isti a nobis quærant causam quare visus non fiat nisi ad rectam oppositionem, ex quo non concedimus lineas egredi de visu quæ describantur in corpore lucis quæ cum eis ab oculis egreditur? Dicemus ad hoc quod non concedimus lineas exigi ad hoc quod sit visio: sed quia colores non recipit nisi diaphanum illuminatum, ideo oportet actu lucem esse in diaphano ad hoc quod fiat visus: et illud lumen est illius naturæ, quod formas quas abstrahit, non reddit nisi ei in quod secundum rectam oppositionem procedit. Si autem esset lux talis forma quæ afficitur circumquaque ad omnem distantiam, tunc visus esset omnis rei quæ quocumque modo per medium deferens visui conjungeretur: sicut et tactus est omnis calidi, et auditus est omnis soni, sicut in secundo de *Anima*¹ ostensum est.

¹ II de Anima, tract. III, cap. 7.

CAPUT IX.

Et est DIGRESSIO declarans errorem istorum ex his quæ dicunt de reflexione facta a speculo.

Volumus autem adhuc objicere contra istam opinionem ex reflexione quam dicunt fieri in speculis. Sæpe enim contingit, quod in una visione et in uno tempore videmus rem visam in seipsa, et etiam simulacrum ipsius ejusdem in speculo illi opposito: cujus illi causam esse dicunt, quod duo radii egrediuntur ex visu: unus quidem directe ad rem visam, et alter incidit speculo et reflectitur oblique ad rem visam: et tunc isto secundo radio videntur speculum scilicet et res, et unum videtur in alio.

Oportet igitur considerare utrum hoc secundum dicta eorum sit possibile, vel non. Jam enim propter duos radios quorum unus directus ad rem visam, et alter reflexus est ad speculum ad rem ipsam, idem numerus apparet duo, et in duobus locis: quoniam et in speculo apparet, et extra speculum. Et iste est error quidam visionis, ex quo dicunt formam rei visæ in speculo nullatenus esse. Hoc autem non concordat positionibus eorum. Est enim una de positionibus eorum, quod propter jactum diversorum radiorum incidentium in rem unam, non accidit error in visione: nec videtur unum et idem duo et in diversis locis: quia ex hoc quod multi radii ad idem

quocumque modo terminantur, magis densantur circa illud: et densatio causa est certificationis visus, et destruens fallaciam ipsius. Ergo res ista ad quam sic duo radii terminantur, debet videri una et in uno loco. Cum enim radius secundum istos corpus sit, et corpus non penetret in corpus, non potest radius reflecti in seipsum: cujus tamen contrarium dicunt dicentes radium perpendiculariter alicui leni incidentem in seipsum reflecti. Nec potest dici quod ideo unum videatur duo et in diversis locis, quia terminantur ad ipsum diversæ partes radiorum visualium: quia nihil interest utrum radii sint directi vel reflexi: quoniam in utrisque ponunt radios non sentientes quidem, sed recipientes formas visibilibus et reddentes eas oculo. Cum igitur diversi directi ad rem visam non faciant ipsam videri duo, quorum unus est directus et alter reflexus, non debet ipsum facere videri duo et in duobus locis. Causa igitur hujus non potest esse diversitas radiorum cadentium super ipsum.

Si autem dicant quod in veritate id quod inductum est, non est causa, sicut bene probatum est: sed potius hujus causa est, quia radius unus qui directe incidens vocatur, cadit super rem visam tantum: radius autem qui reflectitur a speculo ad ipsum, cadit super duo, scilicet super speculum et super rem visam: et si caderet super unum tantum, non redderet visui nisi idem quod reddit radius incidens: sed quia cadit super duo, ideo reddit duo, quorum unum apparet in alio, eo quod radius ex omni eo immutatur quod tangit: et ideo accidit videri unum duo et in diversis locis. Hoc destruitur duobus vel tribus vel pluribus speculis sibi oppositis, quorum quodlibet apparet in alio: unico enim radio videmus speculum tale, et ejus simulacrum videmus in alio speculo, et sic de quolibet aliorum: et tamen unum duo videtur.

Et si dicatur quod plures sunt hic radii reflexi, hoc non impedit: quia quilibet eorum apprehendet omnino idem

quod alter, cum quolibet radiorum videatur et speculum et simulacrum ejus, quando opposita sunt duo specula.

Et si dicatur quod istius multitudinis reflexio est causa quæ quasi bis tangit, semel incidendo, et semel in parte reflexi: sed hoc videtur quod multoties fiat reflexio ejusdem radii: videmus enim utrumque speculum et simulacrum utriusque. Oportet igitur quod una reflexio sit ex primo speculo in secundum, et alia ex secundo in primum: et cum resultet simulacrum primi speculi in secundo, iterum ex secundo resultabit idem in primo: et ita videbimus simulacrum primi speculi bis, semel in secundo, et semel in ipso primo speculo: et sic ex eodem radio videtur idem tria et in tribus locis.

Si autem et hoc concedatur: tunc quæram ab eis causam quare radius quando secundo reverberatus est ad ipsum corpus speculi, non reddit tale visum quale reddit cum primo incidit: cum idem incidat radius primus, et reflectatur secunda reflexione. Hujus enim causam vix poterunt assignare: non enim potest dici quod hoc sit propter diversas partes et extremitates radii incidentis et reflexi: quia diversitas partium radii non causat diversitatem et numerum visibilium, sed potius diversitas formæ et numerus sensibilis, cujus species non una sit, redditur idem visui per omnes partes radii. Si enim diversitas aliqua esset in visibili ex partibus radii, tunc cum partes faciant distantiam, et quod est in una parte non est in alia, oporteret ut per vices et moras temporum visibile transiret et redderet visui, quod non est verum.

Si autem forte aliquis velit, quod differentia et numerus formarum visibilium causetur ex attenuatione radii, quia radius tenuissimus sufficiens est repræsentare rem sicut est: et ideo componit eam cum alios: et videtur in eo forma minoris quantitatis, sicut nos videmus quod formæ eminus apparentes minoris quantitatis esse videntur quam prope: eo quod radius extensus ad eas, quo ma-

gis tenditur, eo magis attenuatur. Et hæc causa etiam est, quod res multum longe apparentes tremere videntur, sicut stellæ fixæ videntur scintillare: radius enim attenuatus tremit, et non res visa. Et volunt forte similiter dicere, quod sicut longitudo directa attenuat radium, ita etiam longitudo sæpius reflexa: et quo sæpius reflectitur, eo magis attenuatur: et ideo fallax in numero et situ efficitur visibilium.

Cujus exemplum est: quia si dicimus radium prima reflexione reflecti ex speculo A in speculo B, et iterum secundo ex speculo B in speculo A, et tertio iterum ex A in B: si longitudo speculi ab oculo est duorum palmorum, erit radius ter reflexus octo palmorum: sed speculum a speculo per duos distat palmos, et ideo minoris est virtutis quo magis reflexus fuerit: et ideo dictam fallaciam in visu adducit. Si, inquam, sic dicatur, quod causatur numerus et fallacia visibilium: tunc oportet dicere quod radii reflexi non uniuntur sibi, sed servat unusquisque suam extensionem divisam ab alia: si enim unirentur, tunc efficeretur unus multiplicatus et fortificatus radius: et hoc iudicium non convenit dictis eorum, et est incredibile: quia secundum hoc non contingeret ignem elicere ex speculis concavis, cum radii reflexi nunquam unirentur et fortificarentur.

Adhuc autem secundum hoc minus deberet apparere quod apparet ex reflexione tertia quam quod apparet ex reflexione prima vel secunda, servata eadem distantia speculorum ab invicem. Et hoc experimentum docet esse falsum.

Amplius etiam secundum hoc cum multiplicarentur reflexiones, deberent eadem specula effici invisibilia, quod absurdum est omnino. Hæc autem objectio præcipue est Empedoclis, qui dicit radium de visu egredientem exteriori lumini non misceri ad confortationem. Secundum autem ea quæ dicta sunt maxime sequitur absurditas: quia radii reflexi non commiscuntur sibi, sed tangunt se exterius.

Quæramus igitur, virtute cujus accipit ipsum sensibile radius reflexus? Aut enim accipit virtute radii incidentis qui contrarius est ei, aut accipit virtute propria. Et si accipit virtute radii incidentis: tunc oportet quod nihil sentiat nisi quod sentit primus radius: nihil igitur reddit nisi illud: et sic non videbitur unum duo. Si autem accipit et reddit virtute propria, tunc redditio sensibilis per ipsum non venit nisi ad angulum in quo contrariatur radio incidenti: et tunc ille fit fortior, et fortiozem habet formam sensibilis, quod videtur excludere passionem quam sibi attulit radius reflexus, et sic non veniet ad visum aliquid ex his quæ radio reflexo sunt accepta: et sic iterum unum non videtur duo. Si autem dicatur, quod extremis diversis faciunt diversa radii isti: tunc sequitur quod ea quæ sentiunt, nullo modo sunt unum: et hoc est falsum, quia in veritate sunt unum secundum eos, licet acquirant diversa. Et sequitur etiam quod neutrum perfecte rem apprehendit in tota sua forma, sed punctatim accipit eam.

Ut autem etiam naturaliter contra ista objiciamus, quæramus ab eis, quid facit istas diversas formas, quarum una radio incidente accipitur, et altera radio reflexo? Si enim ea omnia quæ faciunt formarum diversitatem, non invenimus nisi duo, quorum unum est diffinitio quæ diversificata formas diversas facit in specie: alterum autem est materia recipiens, quæ diversificata diversas formas facit in numero et loco. Secundum autem dicta istorum nihil est in duobus speculis sibi oppositis vel in speculo et quolibet alio cujus simulacrum resultat in speculo: subjectum enim formæ resultantis in speculo duplex est, scilicet corpus cujus est forma: et hoc totum unum et idem est: diffinitio etiam una et eadem est: et ideo nullo debet diffi-

niti vel apparere duo. Secundum autem nostram opinionem nihil de istis sollicitamur: quia nos ponimus recipientia diversa diversificare formam: unum enim est corpus, cujus est forma: et alterum est speculum, quod etiam recipit eam aliquo modo receptionis: et similiter aer et etiam oculus: ab his igitur diversis recipientibus causatur secundum nos numerus istarum apparentium formarum.

Hæc igitur sunt quæ ex dictis Peripateticorum extraximus, et præcipue Avicennæ, et Averrois, et Haceuben Huchaym ad istius erroris destructionem.

CAPUT X.

Et est DIGRESSIO declarans solutiones dubiorum pro ista opinione superius inductorum.

Sufficit autem jam improbatibus erroribus istorum quantum ad hanc pertinet speculationem. Solvendæ sunt dubitationes quæ induxerunt eos ad ea dicenda quæ dixerunt.

Fuit autem unum illorum: quia videtur quod res de propinquo non videtur, et quod figuræ et colores rerum non localiter recedunt a visibilibus et veniunt ad visum: nec sunt qualitates activæ, ut sunt sensibilia tactus et illorum sensuum: et horum nos jam in libro de *Anima*¹

¹ II de Anima, tract. III, cap. 16 et 32.

dedimus causam et solutionem. Causa enim quod sine distantia nihil videtur, est quia visus non recipit visibile nisi secundum esse spirituale : et si visibile tangeret visum, ageret violenter in ipsum, et destrueret ipsum. Oportet igitur intercidere duplex medium : unum agens quod est lumen quod agit in coloribus esse spirituale : et alterum deferens quod est diaphanum : sed tamen lumen illud non egreditur ab oculo : numquam enim invenitur potentia passiva in se agere formam sui activi : et ideo visus non habet aliquid quo in se agat formam sensibilis, sed potius lumen quod est endelechia diaphani, facit hoc : et modus hujus actionis in libro de *Anima*¹ determinavimus : nihil enim separat a corpore colorato per esse materiale : sed similem formam generat in medio, sicut similitudo formæ sigilli generatur in cera vel in aliquo alio, et ab illo cujus forma sensibilis imprimitur oculo. Quod enim sit in oculo, Haceuben Huchaym multis probat signis, quorum infra nos faciemus mentionem.

Qui autem dicunt visum comprimi in visu, non fit ideo quod lumen ex visu exprimitur, sed potius ut vis visiva et humor crystallinus adunentur, et ex ipsa adunatione confortentur : quia omnis virtus visualis potentior est adunata quam sparsa et multiplicata : et ideo ordinavit natura cilia eminentia et grossa et nigra, ut adunent visum, nè confundatur divaricatus a lumine exteriori : et frequenter contingit, quod animalia melius et acutius videntia habent cilia eminentiora et nigriora, sicut erodius. Et hujus signum est, quod cum tenebræ sint circa visum densæ, et lumen non procedit in ipsum, tunc videt stellas : et ideo videntur stellæ de nocte et in tempore eclipsis et non in die, quando lumen in visu procedit et divaricat ipsum. Hinc est etiam, quod

cum aliquis acute videre vult, obumbrat visum manu, ut per umbram visus confortetur. Hoc autem fit ideo quia spiritus visivus a nervo optico ad oculos decurrens, ab anteriori parte cerebri quasi a canali descendit : et quia ille lucidus est, ideo divaricatur luce nimia : et obumbratio confortat eum, ut bene recipiat formas visibiles. Ex symbolo enim quod habet cum lumine exteriori, movetur ad extra, et divaricatur nisi retineatur. Hæc autem etiam causa est, quia in vigilia effundit anima spiritus ad exteriora in organa sensuum ad operationes ipsorum explendas : et ideo propter symbolum et propter directionem animæ nimis effunderetur in conatu videndi et nimia apertione oculi : propter hoc stringitur oculus : et ideo umbratur ciliis et manu aliquando, ut adunatus confortetur ad visum. Ille autem spiritus lumen est quod percusso oculo micat divaricatum in omni oculo : et ipse idem est, qui multiplicatur in altero oculorum, quando alter clauditur velamine pelliculæ vel alio modo excæcationis oculi : tunc enim spiritus qui decurrit in duos nervos opticos, retrahitur totus ad alterum oculum, eo quod fugit otium cum anima utatur ipso pro instrumento. Instrumentum enim in manu artificis existens, semper applicatur ad opus. Fugit autem oculi excæcati tenebras, et inundat ad oculum clarum propter symbolum quod habet ad ipsum : et ideo habens unum oculum, plus quam dimidium habet visum.

Quod autem dicunt de lumine oculo- rum, non est negandum : quoniam omne animal modo prædicto habet lumen in oculo. Quædam autem animalia calidioris cerebri partes ignitas in oculis habent, ut leo, lupus, serpens, cattus : itaque aliquando oculi eorum illuminant medium, ita quod in nocte venantur. De his autem quæ in nocte lucent, aliquid

¹ II de Anima, tract. III, cap. 7.

diximus in libro de *Anima*¹, et aliquid in sequentibus adjungemus. Sed quod hoc intelligendum est, est quod lux quæ est in oculis, non est egrediens ut corpus radiale quod procedendo ab oculo visum perficiat.

Quod autem dixerunt de idolis apparentibus in speculis, omnino est falsum, et habet duas responsiones, quarum una est Aristotelis et antiquissimorum Peripateticorum : et est quam dixi in secundo de *Anima*², quod scilicet visibile per solam formam et non materialiter agens, formam suam simplicem secundum esse spirituale et intentionale generat in medio quod actu lucidum est : hæc autem forma non quale facit medium : quia si quale faceret ipsum, non posset tunc ab eodem puncto aeris videri album et nigrum : et hoc est falsum : quia si dicamus duos oculos diametraliter sibi oppositos contra se aspicere, quorum unus videat album, et alter nigrum, oportet speciem albi et nigri in mediis punctis diametri simul esse : et neutra species destruit aliam : quia si se invicem destruerent, tunc ad visum distinctæ species non pervenirent. Hæc enim species quæ non proprie qualitates sunt, sed intentiones qualitatium in corpore non determinato neque figuras tenente, sunt secundum modum et congruentiam ipsius, sicut omnis species recepta in aliquo recipitur secundum potestatem et congruentiam subjecti recipientis. Et ideo in aere non habent determinatas figuras, sed in corpore terminatas figuras habente, quod tamen est perspicuum illuminatum, habent figuras determinatas. Tale autem corpus est oculus vel speculum quod in altera parte extinctum est : et ideo in illis resultant secundum figuras determinatas.

Nec valet si objiciatur, quod forma non agit in speculum nisi perspicuum

non determinatum : perspicuum autem indeterminatum non habet formam determinatarum dimensionum : ergo non agit in aliquid formam determinatarum : non enim oportet quod omne quod agit formam aliquam in aliud, agat eam secundum quod est in ipso : quia tunc forma agentis reciperetur in patiente secundum potestatem et congruentiam agentis, et non secundum potestatem et congruentiam patientis : quod falsum est. Gladius enim non habet incisionem nisi secundum figuram : et tamen agit eam in actu quando percutit corpus solidum : et sic est in omnibus aliis. Posset tamen dici quod solum aer, vel aliud perspicuum non terminatum, non agit formam in perspicuo determinato, sed juvat ad hoc præsentia rei objectæ cujus forma agitur : et per illam accipit lineamenta determinatæ dimensionis. Sed primus modus melior est : quia licet res objiciatur, tamen non tangit speculum : et ideo videtur non agere : quia ad actionem exigitur aliquis contactus, ut tradunt Peripatetici.

Et quod dicunt, quod subjectum idoli non est speculum, quia motu speculi non movetur, nihil valet omnino : quia in veritate forma non movetur, sed nova et nova in diversis sitibus superficiæ speculi generatur. Cum enim omnia visibilia agente lumine fiant, non habent generationem nisi luminis : et ideo sicut sola oppositio luminaris ad rectam diametrum sufficit ad luminis generationem per omnes partes perspicui quæ recte luminari opponuntur, ita etiam ad omnem colorum et figurarum generationem non exigitur aliquid nisi recta oppositio visibilium ad perspicua indeterminata vel determinata, quæ conveniunt cum determinatis in natura compositionis, sicut speculi et oculi : et ideo non valet illa eorum objectio.

¹ II de Anima, tract. III, cap. 12 et 16.

² II de Anima, tract. III, cap. 15.

Sed tamen adhuc confortant hanc objectiones Auctores sententiæ inductæ, dicentes quod nos videmus, quod talia tersa solida radios reflectunt et refulgerant ad majorem quantitatem luminis quam sit incidens in ipsa, sicut patet quando radius reflectitur in parietem oppositum speculo vel aquæ: fit enim tunc in pariete latius et longius lumen quam sit super speculum vel aquam: et sic videtur adhuc radius corpus esse: quia nihil reflectitur et repercutitur nisi corpus, ut dicunt. Sed ad hoc dicendum, quod tersa spissa sive dura sint, sive non, reflectunt simul et divaricant lumen: et ideo in oppositum multiplicant ipsum. Hoc autem ideo est, quia suæ superficies politæ sunt: et politum est hujus naturæ propter convenientiam quam habet ad lumen, quod multiplicat lumen super ipsum: propter quod etiam tegitur color omnium hujusmodi tersorum, et videntur radiantia quando sunt in lumine. Projectio autem luminis in oppositum est ideo quia reddit lumen ex sua tersione. Si enim tantum retineret, tunc non fieret quod dictum est: sed quia abundat lumine ad copiam, ideo fundit ipsum in oppositum radii incidentis: et ex hoc non sequitur quod radius sit corpus, quia multa reflectuntur quæ non sunt corpora, sicut echo, et iris, et hujusmodi. Talia enim non reflectuntur nisi in suis subjectis in quibus sunt secundum esse spirituale. Ea autem quæ hic dicta sunt, conveniunt dictis Aristotelis et Haceuben Huchaym in *Perspectivis*, et Averrois et Alfarabii.

Sunt autem quidam quibus ista non placent, sicut Avicennæ, dicentes non esse probatum a Peripateticis quod omnis actio sit per contactum, sed tantum esse dictum probabiliter, eo quod in pluribus agentibus physice non habeat instantiam. In his autem quæ non agunt physice, sicut Deus, et intelligentia, et anima, omnino est falsum: et dicunt non posse inveniri rationem hoc probantem, quod omnis actio sit per contactum agentis ad patiens, nec acceptam esse hanc

propositionem quasi ab auctoritate Antiquorum. Et confortavit ipsam admirationem: quia eo quod in multis agentibus physice videmus quod agunt per contactum, trahimur in admirationem si aliquid sit quod non tangit quando agit: et si haberemus inductionem de opposito, scilicet quod agentia non tangerent, tunc haberemus admirationem de hoc, utrum aliquid tangeret quando agit: et hæc dictio præcipue est in necromantiæ philosophia et incantationis, in quibus frequenter agit id quod non tangit: sicut anima unius fascinando agit in eum quem non tangit.

Adhuc autem idem dicit quod est in idolo speculi et oculi, quod in veritate est quoddam speculum, quod in veritate corpus visibile agit in id quod non tangit: et perspicuum pervium non est nisi id per quod fit hujusmodi actio, et non in quo fit. Et ideo forma sensibilis numquam est in perspicuo pervio, sicut dicunt, in objectis visus. Corpus autem visibile, ut isti dicunt, non agit formam suam nisi in oculo quod est perspicuum terminatum et tenens species visibiles: et hæc forma numquam est in speculo neque in aere intermedio: sed, ut dicunt, quod res visibilis facit in una recta distantia et uno situ, quod scilicet formam suam generat in oculo, hoc facit speculum factum in duabus distantibus et duobus sitibus. Una enim distantia est a re visibili ad speculum, et altera est a speculo ad visum: et unus situs est rei visæ, et alter est speculi: et cum res visibilis agit formam per perspicuum pervium actu lucidum, illud lucidum quod sic est via generationis formæ visibilis, reflectitur ad aliam distantiam et situ a speculo ad oculum: et hic est modus conversus ei quem ponunt Auctores radiorum. Illi enim dicunt, quod radius reflectitur a speculo ad rem visam: et isti dicunt, quod generatio formæ rei visæ quæ fit per totam distantiam perspicui, reflectitur ad alterius lineæ distantiam et ad alium situm per speculum ad oculum.

Et hæc sententia dictis Aristotelis non concordat: quia Aristoteles vult quod separata numquam agant in aliquid, nisi per aliud conjungantur illi: et ideo magis intelligibile est dictum Aristotelis quam dictum Avicennæ: sed cum necromantiis et incantationibus et arte imaginum magis concordat dictum Avicennæ. Sic igitur solvenda sunt ea quæ induxerunt Auctores sententiæ eorum qui dicunt nos videre extra mittendo et non intus suscipiendo.

CAPUT XI.

Et est DIGRESSIO declarans quare unum videtur duo.

Remanet autem hic determinare, quare unum videtur duo et in duobus sitibus: quia vehementer innituntur huic illi qui dicunt nos extra mittendo radios videre. Nos autem hujusmodi quæstionem per duo problemata dividimus: quorum unum est, quod quærat, quare unum videatur duo ex diversa dispositione videntis: et secundum est, quare unum videatur duo ex dispositione rei visæ. Ad ista autem problemata determinanda sumimus ea quæ probanda sunt in libro de *Inspiratione et Respiratione* et generaliter de spiritu: quoniam spiritus est corpus lucidum subtile quod instrumentum est animæ in omnibus vitæ operibus et quod vehit virtutes animæ ad operationes in omnibus organis corporis.

Dicimus igitur, quod sunt quatuor causæ quare unum duo videtur ex parte ipsius videntis. Quarum una est, quia cum nervi optici ab oculis ad anteriorem cellulam cerebri directi intersecant se ad modum linearum trianguli, cujus basis est distantia mensuræ quæ est inter duos oculos, contingit aliquando elevari unum nervorum vel removeri a loco contactus: et tunc id quod recipitur ab oculis ambobus transiens in spiritu visivo ad sensum communem, non contingit se in aliquo puncto uno: et tunc propter duos oculos unum bis nuntiantes videtur unum duo. Et hoc contingit quoties exprimitur unus oculorum quasi semievulsus suppositione digiti.

Causa quadruplex quare unum videtur duo, Prima causa.

Secunda causa est, quod aliquando spiritus visivus qui a capite decurrit in oculos, propter aliquam ventositatem interclusam in ipso vel in oculo, vel propter aliquem calorem innaturalem agitantem eum, movetur extra metas mensuræ naturales dextrorsum et sinistrorsum in oculo: et ideo accipit formam quasi motam a dextro in sinistrum oculi: et ideo apprehendit omne quod apprehendit quasi distensum in duo lateraliter sibi conjuncta.

Secunda causa.

Tertia autem causa est in opposita redundantia ejusdem spiritus. Voco autem in oppositam redundantiam, quando movetur spiritus ad intus et extra: ad intus quidem respectu sensus communis, ad extra vero ad oculi crystallinum ut percipiat formam: tunc enim continue reddit et accipit: et antequam compleatur redditio, inchoat iterata acceptio quamdiu sensibile manet præsens: et tunc videtur unum duo, quorum unum stet ante aliud. Fit aut hoc accidens in spiritu aliquando ex multo humore calido sicut in ebriis: quia calor vini movens in opposita, humor multiplicat fluxum: et sunt juxta hoc accidens multa accidentia valde et præcipue in visibili quod est motus. Cum enim aliquis navigat, eo quod unam partem accipit, et antequam illam reddat sensui communi, immutatur ab alia et a ter-

Tertia causa.

tia, contingit tamen idem ex frequentia motus spiritus quod videtur sibi omnia moveri. Similiter etiam si extremitas virgulæ circumducatur quæ flexibilis est, accipitur situs ejus in ubi uno, et antequam reddatur, accipitur in alio et in tertio : et sic continue varicatio illius situs accipitur et redditur, et videtur describere basin pyramidis. Et hæc est causa quare gutta aquæ cadens videtur esse linea recta continua : quia cum accipitur in uno ubi antequam compleatur redditio ejus ad sensum communem, accipitur in alio, et sic continue : propter quod linea recta videtur quodlibet punctum continue fluens. Inde etiam contingit, quod ventositate vel alia causa in anteriori capitis vertiginem faciente, omnia videntur moveri : et cadit homo in partem ad quam se tenet, tamquam cadat altera pars sub ipso.

Quarta
causa.

Quarta causa est compressio vel expressio tunicæ perforatæ quæ dicitur *uvea* : cum enim premitur intus et cedit ad interius oculi, et tunc coangustatur foramen, et videtur res minor quam sit in veritate, aliquando cedit ad exterius : et tunc foramen dilatatur, et videbitur res major quam sit.

Istæ igitur sunt causæ magis generales quæ faciunt fallaciam in visu. Ex parte autem visibilis unum videtur duo propter duo subjecta in quibus est secundum diversum esse ipsius, sicut in speculo, et in materia in qua est secundum naturam, sicut superius diximus de forma quæ apparet in speculo secundum duplicem opinionem Peripateticorum contra hæc. Hæc igitur dicta sunt a nobis contra opinionem eorum qui nos ponunt videre extra mittentes radios.

CAPUT XII.

De disputatione Aristotelis contra Empedoclem et Platonem, in quo etiam est de noctilucis.

Aristotelis autem disputatio contra hæc est ista : dicit enim, quod si visus esset igneæ naturæ secundum dominium eorum quæ sunt in oculo, sicut dicit Empedocles, et in *Timæo* Platonis scribitur : tunc accideret videre exeunte ab oculo lumine ignis per tunicas oculi pervias, sicut lumen egreditur per vitrum vel per pellem perviam ex lucerna. Lumen autem quod sic egreditur de lucerna, illuminat medium : et tunc sequeretur quod homo et quodlibet animal videret colores in tenebris sine adminiculo alterius luminis exterioris.

Quod autem aliquis dicat quod ideo hoc non accidit, quia in tenebris lumen ab oculis egrediens exstinguitur : quoniam exteriori lumine non calescit, et nutritur, sicut in *Timæo* Platonis scribitur, omnino vanum est. Quæ enim posset assignari causa, quod lumen egrediens exstinguitur in tenebris : cum tenebræ nihil sint omnino : calidum enim siccum, sicut est ignis, exstinguitur aliquo sibi contrario, sicut est frigidum humidum : et sic videtur exstingui ignis in materia terrestri carbonum, et in materia aerea, sicut flamma quæ est fumus. Neutrum autem contrariorum istorum apparet igni in lucido, hoc est, diaphono tenebroso : et ideo non

potest dici quod ignis micans ex oculis exstinguitur in tenebris.

Si autem dicatur, quod lumen ignis micans ex oculis est quidem salvatum in tenebris, sed propter absentiam luminis exterioris debilitatur, quo absente infrigidatur perspicuum diaphanum, et frigiditas debilitat ignem oculorum : et propter debilitatem decipit et latet nos, ita quod ipsum videre non possumus : tunc multo magis etiam in die exstingueretur lumen ignis : quia aqua plus contrariatur ei quam in frigidatum diaphanum in tenebris ex luminis absentia : et oportet perfectas fieri tenebras in glacie : quia illa excellenti frigiditate totum exstinguit ignem visus : flamma enim et ignita corpora extinctionem patiuntur ab aqua et glacie : nunc autem nihil tale videmus accidere.

Empedocles autem videtur aestimare, quod videre accidat animalibus exeunte lumine ignis ab oculis, sicut supra dictum est. Si quis autem objiciat, quod in veritate loca nivosa et glacies late tenebrosæ videntur. Similiter autem in hyeme videntur loca tenebrosa, et eodem modo littora marium : et hoc accidere videtur propter luminis egredientis ab oculo aliquam extinctionem : dicemus quod hoc non est verum, sed potius frigiditas nivis et glaciei et excellens frigus aeris et multæ aquæ, ut est in mari, restringit tunicas et humores oculi : quo facto limpide immutatur oculus a formis sensibilium : et ideo talia quasi objecta caligine videntur.

Dubitabit autem fortasse aliquis ex eo quod videntur multa micantia et lumen emittentia, quorum tamen nullum exstinguitur aut in aqua, aut in glacie, sicut carbunculus, aut noctiluca, et multa alia hujusmodi. Non enim potest dici lumen illorum esse de natura cœlesti : quia natura cœlestis non venit in compositionem

corporum generatorum et corruptibilium. Sed hujus et similium determinatio accipitur ex his quæ a nobis in secundo de *Anima*¹ sunt determinata, ubi ostendimus quod natura perspicui non est propria alicujus elementi, sed communis natura quæ est in multis, et participata est per prius et per posterius ab illis : quæ quidem purior est quanto est ab opacitate remotior : et hoc est quanto est naturæ superiorum similiorum : et hujus proprie actus est lux quæ fieri habet in illa natura. Fit autem in ipsa quoties constant partes ejus limpidiore et nobiliores : et ideo tunc micant omnia talia. Hæc autem compositio aliquando est in toto composito sicut est in carbunculo et aliis quibusdam : aliquando non in toto, sed in exterioribus alicujus : cujus causa est, quia cum talis natura sit elementorum levium, magis accedit ab intimis compositorum ad extrema, eo quod talia supernatant : et sic invenitur in capitibus et spinis et ossibus quorundam piscium, et in testis ovarum quorundam, eo quod tales partes minus assæ sunt : et egit in eis calor multam naturam densatorum perspicuorum. Aliquando agit hic calor in exterioribus quarundam rerum, quando exhalat ab eis et trahit secum subtile multæ diaphaneitatis : et sic lucent partes quercus putrefactæ. Omnia tamen hæc quæ debilem habent lucem, teguntur clariori luce superveniente, sicut alibi determinatum est.

¹ II de Anima, tract. III, cap. 8.

CAPUT XIII.

De improbatione opinionis Democriti, qui dicebat oculum videre solum ubi picturam et apparitionem formæ sensibilis.

Democriti
opinio de
visu.

Tactis autem sufficienter quantum ad hanc spectat speculationem opinionibus eorum qui dicebant nos extra mittentes radios ab oculis videre, tangamus et opinionem Democriti, qui dicebat nos videre intra suscipientes. Dicamus itaque quoniam Democritus in hoc quod visus instrumentum dicit esse aquam quantum ad ea quæ in sua dominantur compositione, bene dicit. Quia autem putavit, quod ipsum videre per oculum non esset aliquid nisi apparitio et pictura formæ sensibilis in exteriori pelle oculi quæ *cornea* vocatur, et quod figura hæc esset quidam defluens propter aliquid substantiæ rei sensibilis in visum, non bene dicit. Quod enim ibi repræsentatur forma quasi in speculo, accedit oculo, non secundum quod est instrumentum visus, sed secundum quod lenis est et terminatus, sicut supra diximus. Et ideo figura ista non est in cornea oculi sicut in vidente secundum quod est organum visus : cujus signum est, quod secundum imaginem hanc sensus oculo apparet, non videt, sed factam ante eum et aspiciens ad ocu-

los ejus videt eam. Passio igitur oculi hæc est refractio et reflexio visibilium quæ fit a speculo et ab omni corpore leni terso terminato. Sic etiam reflectitur echo et iris : cum enim procedant visibilia secundum processum luminis abstrahentis ea, tunc oportet quod ea quæ nata sunt restringere et convertere luces, et restringant et reflectant omnes formas visibilium : hæc autem sunt terminata tersa polita. Sed universaliter de apparentibus in visu omnibus visibilibus et de refractione quæ reflexio visibilium et lucis vocatur, nondum tempore Democriti causa erat manifesta secundum quod ex dictis ejus videtur.

Incongruum autem est ut prætereamus, quin faciamus objectionem a qua non potest evadere Democritus. Si enim nihil amplius exigitur ad visum nisi de pictura figuræ visibilis in corpore leni perspicuo determinato, quæramus ab ipso, quare solus oculus videt, et nullum aliorum corporum in quo apparent depicta idola, sicut specula et alia corpora quæ multa sunt valde ? Nulla enim esset hujus causa secundum Democritum : et ideo talis figura non est in oculo sicut in vidente, sed sicut in perspicuo polito determinato. Et ideo cum cornea pervia sit visibilium formarum, transeunt ad foramen tunicæ quæ dicitur *uvea* : et per ipsum foramen *uveæ* deveniunt ad cellam quæ vocatur *aranea* : quæ quidem quia subtilis valde et pervia est, ideo non facit impedimentum quin deferantur ad ipsum centrum humoris crystallini, in quo est spiritus visivus : et ibi primo efficiuntur sicut in vidente, non tamen simpliciter : quia vis visiva non absolute est in rivo, sed est in eo secundum quod continuatur ad impetum fontis : sic etiam vis visiva non est in centro crystallini nisi secundum quod dirigitur per spiritum qui gerulus et vehiculum virtutis ad sensum primum est, sicut in libro de *Anima* ¹ determinatum

Objectio
contra De-
mocritum.

¹ II de Anima, tract. III, cap. 14.

est. In cornea igitur et uvea et aranea et si qua alia sunt anteriora oculi, non est nisi sicut in deferente, sicut etiam fuit in perspicuo medio extra oculum, præter hoc solum quod perspicua oculi magis sunt determinata quam perspicua exterius.

Quod igitur visus est aquæ attributus secundum Democritum, hoc quidem verum : sed tamen non accidit sibi videre tamquam per medium instrumentale secundum quod est aqua : quia si ita esset, tunc nihil esset medium visus nisi aqua : sed accidit videre per oculi partes secundum quod sunt perspicuæ, sicut jam dictum est. Perspicuum autem commune est etiam aeri et igni et cælo : sed cæleste corpus in compositionem non venit : ignis autem abundans in compositis composita destruit : et ideo in compositione oculi oportet abundare aut aerem, aut aquam : et hujus causa est, quia quæ sunt ejusdem actus, sunt ejusdem potentiaë necessario, cujus perfectio est actus ille. Jam ostensum est, quod lumen et visibilia sunt actus perspicui medi et actus oculi : perspicuum ergo oculi et medium stant connaturalia in materia. Cum igitur aut aer aut aqua necessario abundant in oculi compositione, non potest abundare in eo aer : cujus causa est, quia oculi non tantum est recipere visibilia, sed etiam servare donec compleatur iudicium sensibile : aer autem id quod recipit, non servat : abundabit igitur in oculi compositione aqua quæ recipit formas faciliter : et est salvabilior quam aer, eo quod est magis spissa : quin etiam hanc ipsam aquam natura curavit limpida facere ad modum crystalli, propter quod *crystallinus humor* vocatur : et terminando amplius spissavit eam, ut servatas bene formas reddat per spiritum vehementem in interioribus viribus animæ, quæ sunt sensus communis et imaginatio,

et reliquæ a nobis in libro de *Anima* ¹ determinatæ.

Pupilla igitur et totus oculus præcipue inter se componentia sunt aqua. Hoc autem probatur maxime ex ipsis operibus et passionibus eorum. Si enim corrumpatur oculus ex aliqua causa, quod scindantur pelles ejus et tunicae, non discurrit ex oculis nisi aqua limpida. Non autem est dubium, quod omnis res ex eisdem componatur, in quæ corrumpitur et resolvitur. Similiter autem fit in ebris fluiditate vini superatis : cum enim calor vini corrumpat oculum, non distillat ex eo nisi humor aquæ. Hoc etiam experimur in his, quorum oculi sunt claritate excellentis lucis devicti et convicti ² : claritas enim intensissimum in corpore polito inducit calidum, quod scindit oculi tunicas, quibus scissis fluit humidum ex oculo, et non amplius aliquid.

Ex ipsis autem naturæ operibus idem erit manifestum : quoniam albugo oculi in hominibus et omnibus animalibus habentibus sanguinem est plus et crassius quam in non habentibus : et ideo sagax natura humori crystallino in talibus animalibus circumposuit abundanter, ut conservetur humidum crystallinum tam ab exterioribus in ipsum agentibus calido et frigido, quam ab his quæ agunt in ipsum intrinsecus : et sic permanet incoagulatum et non exsiccatum : sicut enim superius diximus, frigus exterior constringendo obscurat oculum : et calidum exterior resolvit ipsum. Similiter etiam interior frigiditas cerebri constringeret ipsum, et calor spiritus et sanguinis resolveret ipsum, nisi esset circum munitum albuginoso humore, qui spissus et multus existens obstat utrisque : et præcipue ideo quia crassus est et viscosus : et ideo partes conjacent sicut catenæ, et arescere non possunt nec coagulari : et ideo quantum ad ipsam sui compositionem de natura

¹ II de Anima, tract. III, cap. 10.

² Alias et corrupti.

sua in frigidabilis est oculus : propter hoc natura in sanguinem habentibus quæ molles oculos habent, ordinavit supercilia et palpebras velantia et claudentia oculum : et ideo quod infra palpebras velatum sic est, non in frigidat, eo quod palpebræ protegent ipsum. In animalibus autem quæ non habent sanguinem, oculi sunt duræ pellis valde : et hæc pellis facit protectionem ne frigus transiens coagulet humidum oculorum. Hæc igitur de opinione Democriti dicta sint a nobis.

CAPUT XIV.

De comparatione opinionis Democriti ad opiniones Empedoclis et Platonis.

Si autem comparare velimus inter duas sententias Antiquorum jam habitas, tunc irrationale omnino est dicere, quod videre fiat per visum exeuntem ab oculo, et extendatur per hemisphærium usque ad astra, sicut dixit Empedocles. Dicere autem etiam visum esse prodeuntem ab oculis quodamtenus, et quoddam spatium scilicet, et ibi juvari lumine exteriori, sicut dixit Plato coadjuvari visum sic prodeuntem rebus visibilibus. Hoc enim quod dixit Democritus, quod visus est forma quæ in principio exterioris pellis conjungitur oculo, melius est : sed tamen hoc etiam stultum est dicere, sicut patet ex dictis. Quod autem isto stultior sit sermo Platonis, qui dicit interius lumen conjungi exteriori, manifestum est. Quæramus enim, quid sit quod dicit lumen conjungi

lumini ? Et quæramus etiam, quomodo possibile sit quod lumen lumini conjungatur ? Cum enim Plato et Empedocles posuerunt lumina et radios esse corpora, erit eis impossibile invenire medium hujus conjunctionis : non enim quodlibet corpus conjungitur cuilibet : illa enim non conjunguntur, inter quæ semper medium est. Interius igitur lumen semper in oculo existens, et exterius non possunt conjungi : quomodo enim conjungerentur, cum inter ea continua et solida interciderat oculi miringa, quæ est oculi tunica ? Duo enim corpora in eodem loco esse non possunt. Si autem interius exiret per miringam, oporteret lumen et miringam esse in eodem loco, quod est impossibile.

Quod autem sine lumine quod est actus perspicui non possit perfici visio, dictum est a nobis in aliis libris. Sed sive hoc sit lumen, sive sit aer perspicuus, sive aliud perspicuum quod medians est inter rem visam et visum qui est in medio centro humoris crystallini et inter ipsum oculum, semper hoc verum est et certum quod meatus qui est per pervietatem talium perspicuorum tam exterius quam interius oculi, perficit ipsum quod vocamus videre : et omnia talia per quæ est meatus iste, sunt deferentia visibile et reddentia ipsum et non videntia vel sententia : spiritus autem et virtus visiva quæ in crystallino centro est, est recipiens et sentiens et dirigens ipsum in spiritu sensibili ad interiores cellulas capitis, in quibus aliæ virtutes sunt animæ sensibilis. Sensitivum autem commune quod est sensus communis, est accipiens et sentiens complete, et nulli reddens secundum sensibilem cognitionem. Omnibus autem istis consideratis, rationale est quod id quod est interius oculi ubi virtus visiva sita est, sit aqua : quia aqua de numero perspicuorum est, quæ lumen et visibilia recipiunt. Et quia perspicuum non perficit visum sine lumine, quia sine lumine exteriori non potest videri in perspicuo : ita etiam interius in oculo videri non potest sine lumine : sed hoc lumen

est ingrediens ab extrinseco in oculum.

Ad hoc autem quod fiat visus secundum actum tam interius in componentibus, quam exterius in deferentibus visibilia, oportet perspicuum illuminari. Interius igitur oculi necesse est aquam esse : quia ignis abundans destrueret oculum : cœleste autem perspicuum per substantiam in compositionem corporum corruptibilium non venit. Similiter autem aer esse non potest propter duas causas : quarum una est, quia non servat formas, sed defert tantum. Id autem in quo est iudicium sensus, servare oportet. Secunda autem est : quia si esset aer, magis abundaret in extremo exteriori oculi quam in interioribus oculi : et sic anima quoad virtutem visivam esset in extremo oculi. Probat hoc quod diximus ex hoc quod aer eo quod est spirituale, non potest commisceri secundum dominium in corporibus generantibus : quia motum haberet extra mixtum, et esset ibi violentum : et talia non perficiunt suas operationes. Aqua autem cum terra commiscetur et manet. Cum igitur anima oculi quæ est visus, sit interius in centro crystallini, oportet interius oculi perspicuum esse et receptibile. Hoc etiam manifestum est ex accidentibus oculi. Jam enim per experimentum didicimus, quod quidam ita vulnerati sunt in bello juxta tempora, quod accidit fieri tenebras in oculis : eo quod nervi abscissi fuerunt qui dicuntur *optici*, per quorum poros virtus visiva decurrit ad oculos : abscissis enim his et post resanatis propter duritiem cicatricis obstruitur porus per quem lumen a crystallino oculi vectum spiritu ingredi habuit : et ideo tenebræ fiunt, sicut quando lucerna exstinguitur. Et mirabile de hoc accidit tempore nostro, quod miles vulneratus in tempore sinistro, dextrum amisit oculum : quod utique contingit ex concancellatione nervorum ab oculis ad anterius capitis directo-

rum, sicut superius diximus. In talibus enim agentibus id quod vocatur *perspicuum pupillæ*, abscinditur sicut lampas obstruitur : et ideo non parat lumen ad interiora.

Accidentia autem hæc indicantia multa sunt valde : quorum unum efficacius est, quod oculus incisus et dissolutus emanat aquam. Accidentia autem alia plurima sunt : quia videmus quod visus post excellentem claritatem aliquam luminis vel albedinis in quam diu adspexit, si convertat se postea ad colores minus claros, videtur ei primum quod tecti sunt panno subtili albo qui paulatim deficit : hoc enim significat, quod perspicuum formativum formarum in oculo erit elementum perspicuum quod est aqua. Adhuc autem diu motus navi vel alio vehiculo si convertat visum ad terram, videtur ei terra moveri : cujus eadem causa est, quia servatur in visu et spiritu visivo forma motus. Idem autem est de gutta cadente, sicut diximus supra : est tamen spiritus in oculo vehens formas visibiles, sicut supra ostendimus¹, qui in tenebris ad interiora corporis movetur : propter vero longam absentiam ejusdem ab humoribus oculi coagulatur et nimis in frigidatur humidum oculi et tunicæ. Et ideo contingit, quod qui diu stetit in carcere tenebroso, si subito educatur in claram domum quæ habeat parietes albos, vel ad lumen solis, confunditur visus ejus et excæcatur : et forte convertuntur ei oculi in figuram lapidum : et hoc est ideo quia lumen extrinsecum circumfulgens oculum excitat calorem propter reverberationem quæ fit in lenitate oculi : et expellitur frigus oculi ad interiorius et constringit oculum et destruit.

Ex diversitate autem horum spirituum, et ex diverso situ humoris oculi diversitas magna accidit circa visum : quoniam habens humorem crystallinum non in centro, sed versus interiorem superficiem

Nota.

¹ Cap. 11.

oculi non videt nisi de propinquo : et quia lumen non directe ingreditur per centrum oculi : quia si via ad centrum occasionata non esset, tunc humor crystallinus esset in centro, ideo super centrum est via perspicui et luminis : et ideo tales non vident nisi re visibili elevata super oculos.

Si autem solum spiritum debilitari contingit, sicut fit in senibus et exsiccatis ex vigiliis et studio, tales non vident juxta oculos sed eminus ad distantiam aliquam : cujus causa est, quia quando visibile est juxta oculos, tunc ad directum oculi non diriguntur nisi paucae partes ejus : et quaedam sunt super oculum, et quaedam infra, et quaedam a latere divergentes a directo oculi : et quia spiritus debilis est, tales partes non percipiuntur : cum autem removeatur magis ab oculo visibile, tunc magis ex directo percipiuntur, eo quod magis tunc diriguntur lineae quae sunt inter visum et visibile : et ideo etiam est quod stans in determinata distantia a visibili aliquo, magis percipit distantiam ejus quam stans prope.

De visu.

Ad hoc autem sciendum, notandum est omnem visum fieri sub figura pyramidis, cujus basis est super rem visam, et angulus in centro crystallini : propter quod cum oculus sit spiritus, omnes lineae a basi pyramidis ad angulum ejus protractae, perpendiculares sunt super oculum et super humorem crystallinum, a cujus circumferentia ducuntur ad centrum ejusdem sicut semidimidiam sphaerae. Haec autem pyramides multiplicantur secundum numerum visibilium : quia a visibili procedit lumen in visum cum forma visibili : et quando huc et illuc verticatur oculus, mutatur pyramis secundum diversa visibilia : et haec pyramis non describitur in corpore quod sit lux vel lumen, ut dixerunt Antiqui, sed describitur super formam perspicui per quod est visus : et lineae describentes sunt rectae luminis immutationes et non corpora. Cum autem sic fiat visus sub pyramide, fortior tamen est visus ad lineam quae vocatur axis sphæ-

ræ oculi, et axis pyramidis, quae quidem linea mobilis est : quia ipsa nihil aliquid est nisi recta immutatio ad centrum oculi directa : et cum movetur oculus, necesse est etiam moveri ipsam. Haec autem omnia supponenda sunt, probanda autem in libris de visu in *perspectivis*, quae scientia compleri non potest nisi primum consideremus ea quae pertinent ad geometriam.

Hoc igitur sic supposito, expresse patet, quoniam quando res fuerit propinquior oculo, tunc plures partes basis pyramidis oblique respiciunt oculum : et quando mensuratae fuerint distantiae, tunc plures ejus partes respiciunt oculum directius. Hic autem supponemus exemplum. Sit enim oculus A, et diameter basis pyramidis sit B C, quam ponemus in una parte oculi propinqua, et in altera remota : et tunc apparebit quod diximus.

Ex omnibus autem præhabitis constat, quod si aliquid illorum accidit quae dixerunt Antiqui, quod scilicet sensuum instrumenta elementis adaptentur, sicut diximus, manifestum est quod oportet attribuire sensibus elementa secundum hunc modum, quod oculi quidem visivum instrumentum assignetur æquæ, propter causas quas diximus.

CAPUT XV.

De assignatione aliorum organorum sensuum.

De auditu. Sensitivum aut strepituum sive sonorum, oportet appropriari aeri. Cujus causa est duplex: quarum unam diximus in libro de *Anima*¹, quod scilicet aer naturaliter concluditur in aere ad quem quietum existentem perveniunt soni. Alia vero est, quia pellis quæ vocatur *tympa-num auris*, in qua est nervus qui concavus, sicca est et aere plena secundum naturam in qua percipitur sonus ab exteriori aere propter symbolum: sicut enim perspicui natura in anterioribus est oculi, ita etiam aeris natura in anterioribus pellis et nervi auditivi continetur. In interioribus enim contineri non potest propter causam quam superius assignavimus.

De odoratu. Odoratum autem oportet attribuere igni: non ideo quidem quia igneus sit, sed ideo quod est medietas ignitorum odorum. Omnis enim odor est calidus siccus. Et si diffiniatur secundum primum movens, erit evaporatio fumalis enchimi sicci, licet secundum suum esse qualitas sit et non evaporatio, sicut infra ostendemus. Diximus enim in libro de *Anima*²,

quod id quod est virtute odorabile, hoc est percipiens odores: tale est potentia quale est odorans in actu: quæ potentia non omnino materialis est, sed formalis, ut habens primum esse quod est sicut somnus: et ab objecto accipiens esse secundum quod est sicut vigilia: et ideo symbolum sunt habentia sensus et sensatum: et sic symbolum habet olfactus cum ignis proprietate quæ est calidum siccum, licet in compositione sit frigidum humidum, sicut in libro de *Anima* determinari habet. Et animalia quorum complexio accedit magis ad calidum et siccum, melius olfaciunt quam alia. Odoratus enim, sicut diximus prius, est virtute calidus siccus, qualis est postea cum olfacit secundum actum. Et inde ulterius est manifestum, quod organum odoratus proprie est situm in loco propinquo cerebro. Est enim odoratus virtute quidem calidus et naturaliter et complexionaliter frigidus: et ideo sicut natura ordinavit refrigerans ingredi ad cor et ad pectus ad mitigationem caloris, ita ordinavit quod actu calidum ingressum habeat ad frigidissimum ad mitigationem frigiditatis. Oculi autem generatio eundem modum habet, quia frigidissimi: sed non potuit per ipsum ingredi igneum calidum sicut per odoratum: quia ex illo destrueretur oculus, sicut constat ex supra dictis. Constat igitur generatio oculorum a cerebro, et in miringis ejus circumvolvitur: cerebrum autem frigidius et humidius est omnibus partibus complexionatis corporis animati: et ideo quod generatur ab ipso, necesse est frigidum esse: et quod actua-lem frigiditatem aeris attingit, frigidius est cerebro: non enim cerebrum frigidius est nisi principalibus partibus quæ sunt cor et hepar et testiculi: sed oculi simpliciter sunt frigidiores.

Tactus autem instrumentum aptatur De tactu gustu.

¹ II de Anima, tract. III, cap. 18.

² II de Anima, tract. III, cap. 25.

¹ II de Anima, tract. III, cap. 26.

terræ propter causam quæ in his quæ de anima sunt, dicta est. Gustus autem est quædam species tactus, et ideo elemento terræ attribuitur. Et hac causa circa cor est instrumentum horum duplici ex causa : quarum una est, quia cerebrum et cor in complexione opponuntur. Et ideo cor oportet esse calidissimum omnium partium corporis : tantum autem calorem non retineret nisi esset creatum ex carne dura solida. Talis autem caro maxime terræ habet. Dicitur autem hos duos habere instrumenta circa cor hac de causa : quia cum tactus ubique sentiat tangibilia,

tamen excellentius sentit cor omnibus aliis membris, et est fons tactivæ virtutis : propter quod etiam tactus unus est, et est forma dans esse animali secundum quod procedit a corde : tamen secundum quod judicium tangibile est, sic est plures tactus et non unus. Gustus igitur secundum judicium saporum absque dubio in lingua sicut in organo diffunditur : sed secundum quod tactus est, sic ad cor sicut ad fontem sensus tactus dirigitur.

Hoc igitur modo sit determinatum de sensibilibus organis quæ sunt partes animati corporis.

TRACTATUS II

DE GENERATIONE SENSIBILIIUM.

CAPUT I.

Quæ sit tractatus intentio, et quæ sit natura coloris in communi.

Cum autem hic intendamus de sensatis, oportet scire quod de omnibus sensibilibus quæ sunt secundum unumquodque organum sensus, quæ sunt, scilicet color : sonus quem quidam strepitum vocant, quidam autem crepitum impro-

prie loquentes : et odor, et gustabile, quæ sunt gustata et tacta. De omnibus, inquam, his secundum quod sunt agentia in sensum, et qui sunt actus corporis in sensum, universaliter quidem et non descendendo ad species eorum, dictum est in libro de *Anima*¹, ubi etiam determinatum est quid sit operari secundum quodlibet instrumentorum sensuum.

Hic autem non intendimus figuraliter et universaliter loqui de istis, neque secundum quod agunt in sensus : sed volumus considerare quid secundum naturam suæ essentiæ et generationem sit quodlibet eorum, sicut, verbi gratia, quid color, et quid odor, et quid sonus, et quid sapor, et similiter de differentiis tactus : et quia primus sensus visus, sicut in libro de *Anima*² est ostensum, ideo etiam primum dicendum videtur quid sit color secundum generationem et naturam. Unumquodque autem istorum sensibilium est dupliciter dictum per actum et potentiam. Sed in libro de *Anima*³

¹ II de Anima, tract. III.

² Ubi supra.

³ II de Anima, tract. III, cap. 47.

dictum est, quid est color actu sensibilis secundum quod agit in sensum : et similiter quid sonus actu sensibilis : et ibidem dictum est qualiter hæc sunt eadem actu sensibilibus secundum actum factis, scilicet visui et auditui in actu consideratis. Sed nunc volumus dicere quid sit unumquodque istorum existens per seipsum, quod quando actu est sensibile, facit sensibilitatem secundum actum et operationem in sensum.

Incipiamus autem investigando primo naturam coloris in genere. Dicimus igitur, quod quemadmodum dictum est in libro de *Anima* ¹, quod lumen est color perspicui secundum actum facti, quando
 Quid color? color accipitur : quia lumen secundum veritatem est actus colorum in eo quod colores sunt : et ideo est natura formalis eorum, et cum propria potentia in qua habet fieri hic actus, fit perspicuum, necesse est quod omnis color sit participatio luminis in tali vel tali perspicuo. Prima enim principia cujuslibet naturæ sunt potentia ejus et actus ejus. Cum igitur constet actum colorum esse lumen, et cum lumen sit in perspicuo sicut actus in propria sua potentia, oportet quod prima potentia subjecta colori sit aliquod perspicuum.

Quod autem verum sit quod dicimus, probatur ex hoc quia oculis videmus, quod quando præsens est aliquod corpus ignitum lucens in perspicuo, tunc præsentia illius est lumen, et privatio luminis sunt tenebræ. Ex his igitur habemus primum actum et primam potentiam colorum. Sicut autem etiam in libro de *Anima* ² nos dixisse meminimus : perspicuitas enim non est propria aeris vel aquæ neque alicujus corporis sic dicti singulariter vel specialiter : sed est quædam communis natura et virtus passiva et receptiva in pluribus corporibus inventa ex convenientia cum perpetuis et

superioribus corporibus : et hæc quidem natura et virtus a corpore separata nullatenus est, sed est in quibusdam eorum : et etiam secundum magis et minus inest illis quibus inest : et hæc est in simplicibus compositis : magis enim perspicuum est cælum quam ignis, et ignis quam aqua, et aqua quam terra : terra enim ad minus in superficie aliquid perspicuitatis habet. In commixtis autem est plus quam in terra, et minus quam in igne et aere et aqua : et hoc necesse est, quia in ipsis secundum essentiam commixta sunt perspicua opacis : et ideo utrumque temperat reliquum. Dicimus etiam, quod quemadmodum omne corpus necesse est esse ultimum in terra, quod concluditur tota mensura ejus quod ultimum est superficies corporis : ita oportet quod illa superficies etiam sit aliquid perspicui, cum jam habitum sit quod omne corpus aliquid habet perspicuitatis : ergo et natura lucis quæ est actus et perfectio quæ debetur perspicuo, erit maxime in perspicuo sic terminato per ultimum quod est perspicuum : hoc enim ultimo maxime afficit lux cum in affectione illius a nullo impediatur.

Quod autem ipsius perspicui quod est in corporibus sicut natura et virtus eorum naturalis sit præcipue in superficie natura hujus lucis incorporatæ et retentæ in perspicuo, est omnino manifestum. Color namque qui constituitur ex his duobus sicut ex actu et potentia, aut in extremitate præcipue, aut ipsa extremitas est corporis, secundum quod est perfectus color ex his duobus. Sicut enim non est color in tenebris nisi in potentia tantum perspicui : quod etiam probatur ab autoritate quod Pythagorici vocabant propter hoc colorem ἐπιφανείαν, quod Latine sonat *superapparitionem*, eo quod secundum esse et complementum non participatur lumen a perspicuo nisi in su-

¹ II de Anima, tract. III, cap. 8.

² II de Anima, tract. III, cap. 17.

perficie corporum quæ dicunt habere colorem. Est enim color in extremitate corporis non pervii, quod vocatur determinatum, quia terminat in sui superficie lumen et visum, et non recipit ea in sui profundum : et ideo non est color extremitas : quia extremitas est extrema superficies, quæ est mensura corporis in genere quantitatis existens, cum color sit in genere qualitatis.

Cum autem hæc sit coloris natura in superficie terminati corporis, quod scilicet participatio luminis a perspicuitate majori vel minori superficie corporis : tunc jam ex hoc sciemus etiam naturam coloris, quæ est in profundo talium corporum : oportet enim existimare esse eandem naturam quæ participando lumen exterius coloratur, et illam quæ potentiam habens interius lumen coloratur : et erit color ejus actu, quando lumen participabit actu. Est autem illa natura nulla nisi perspicuitas simplex, secundum quod est compositorum corporum. Hoc autem probatur, quod quæcumque recipiunt lumen ut afficiat ea, oportet quod per eandem naturam potentiæ recipiant ipsum. Videmus autem quod ipsa perspicua simplicia, sicut ignis et aqua et aer, quæ recipiunt ipsum in profundo sui et non in superficie tantum, non recipiunt ipsum nisi per naturam potentiæ quæ vocatur *perspicuitas* : propter quod et interius et exterius illa dicuntur colorari a quibusdam Philosophis, licet improprie vocetur hæc color. Per eandem igitur naturam recipiunt lumen corpora determinata quæ in exterioribus sui tantum secundum actum recipiunt : diversitas igitur perspicuitatis clarioris vel minus claræ causat diversam luminis participationem, ut sit natura coloris participatio a perspicuo luminis, et diversitas coloris, sit participationis hujusmodi diversitas.

Quod autem diximus pervia colorari in profundo et in superficie, non est inconueniens : aer enim et aqua inveniuntur colorata. Aurora enim non est nisi color aeris : quando enim noctis frigiditate spissatur aer, et præcipue in Oriente, a quo diu deficit solis calor : tunc spissatus non omnino transducit per se lumen, sed afficitur ipso in eo quod retinet ipsum : et quia quædam habet in se diffusa combusta perspicua a frequenti præcedentium dierum calore, ideo videtur coloris aurei : hic enim color est ipsius aeris ibidem existentis pervii. Cujus signum est, quia radius solis tunc penetrans per ipsum, eundem colorem parat super parietes quibus incidit, sicut si transiret per vitrum, quod aurei esset coloris. Per hoc igitur patet, quod lumen incorporatur perspicuo secundum modum quo ingreditur in ipsum et miscetur ei : tunc tale compositum constitutum est color. Similiter autem coloratur aqua, sive in nube, sive in se sit, et sicut in mari per modum ingressus luminis in eum, sicut nos explanavimus in fine tertii *Meteororum* ¹, cum de coloribus iridis loqueremur.

Talia tamen corpora eo quod pervia sunt ab aliorum corporum coloribus, quia non eundem habent colorem pervia accedentibus prope et longe, sicut sunt aer et maris aqua : alia autem unum tenent colorem, sive hoc sit longe, sive prope : cujus causa est, quia radii qui peragunt, procedunt ad visum a re visibili, recte incidunt rei visæ, quando homo est prope, et non intrant in profundum talium corporum : tamen propter hoc videntur quasi in toto lumine vel quasi sub obscuro. Si enim sunt puræ perspicuitatis, sicut rarus aer et ignis et cælum, videbuntur nusquam visum terminantia, sed plena lumine perficientia sicut color saphiri clarissimi. Quando autem longe est, tunc

¹ III Meteororum, tract. iv, cap. 17.

obliquatur pyramis reflexa ad oculos : et tunc de necessitate basis ejusdem pyramidis oblique jacet in superficie talium corporum : et quia superficies habent lenes et spatiosas, ideo apparent splendida ad nimiam albedinem cum splendore mixtam declinantia : et hoc fit quando sunt spissata aliquantulum, sicut superficies maris apparet : si autem habeant in se diaphana combusta vel incensa vel aliter alterata, tunc recipiunt diversos colores secundum hoc, quemadmodum aurora, crepusculum, et nubes.

Quod autem ex omnibus his est sciendum in hoc loco, illud est, quod phantasia coloris sive apparentia coloris quam *φαντασιαν* Græci vocant, in omnibus corporibus, sicut dictum est, a luminis participatia diaphano diversitate determinatur secundum naturam ipsius coloris, hoc solo excepto, quod locus continens corpora aliquando facit transmutationem ad alium colorem quam sit ille quem habet secundum sui perspicui naturam. Sicut enim videmus, quod cum sol splendet super parietem ante quem sunt arbores, et transeunt nubes non spissæ aquosæ, tamen ante solem radius per nubes veniens colorem plantarum projicit super parietem : et tunc non videtur in colore naturali. Cujus rei causam aliam rem non arbitror, nisi quam supra diximus : quia lumen si afficit perspicuum secundum posse perspicui et non secundum posse luminis : et ideo cum nubes aquosæ transeunt super sole mixtione luminis cum perspicuo aliquantulum spisso aquoso, generatur color viridis : quia est ipsum lumen sic nubi incorporatum : quod lumen sic veniens super plantas, primo figuram accipit plantarum : eo quod plantæ non sunt perviæ : et ideo veniens ad parietem tingit parietem colore viridi, qui in veritate est nubes : et dicitur plantæ, quia figuratur a planta, sicut figuratur umbra a corpore quolibet super quod fulget lumen.

Ex omnibus autem dictis manifestum est, quod una et eadem natura perspicui

receptiva est coloris tam in perviis coloribus quam hic in corporibus determinatis non perviis : perspicuum enim sive perspicuitas facit colorem participare secundum modum quo est in corpore, sicut supra diximus. Inest etiam hoc perspicuum plus et minus in omnibus corporibus tam mixtis quam simplicibus, sicut determinatum est. Quoniam autem hoc perspicuum secundum actum perspicuitatis est in extremitate corporum determinatorum, oportet necessario etiam colorem secundum actum esse in extremitate. Sicut autem hoc curamus de potentia calore et de potentia perspicuo : quia nos quærimus hinc caloris naturam et esse et diffinitionem : et manifestum est quod nulla res diffinitur per hoc quod est in potentia et non in actu. Color igitur utique erit talis qualis dicta est perspicui extremitas vel extrema perspicuitas in determinato corpore existens : et erit per eandem naturam colorum ipsorum perspicuorum corporum sicut aquæ, et si quod est aliquod corpus talem habens perspicuitatem : et in quocumque color prius videtur inesse, ipse inest sine dubio secundum modum et diversitatem extremæ perspicuitatis in omnibus : sicut enim illa variatur, ita et variatur color naturalis ipsius.

Contingit autem aliquando inesse perspicuo quocumque modo accepto hoc ipsum quod in aere facit lumen : et illud etiam contingit non inesse, et tunc vocamus hoc *tenebram* in aere. Quando igitur illud lumen est in extremo perspicuo, et ipsum perspicuum corporis terminati est clarum : tunc talis participatio luminis in perspicuo vocatur *albedo*. Quando autem in toto privatur vel fere in toto, vocatur tunc hæc *nigredo*. Et ideo quia in corporibus perviis est lumen et tenebra, hæc in corporibus determinatis est albedo et nigredo : propter quod patet nigredinem esse privationem albedinis, sicut sæpe docuimus in libris quos fecimus ante istum de scientia naturali. Secundum igitur istam determinationem

lumen colorum est hypostasis et forma : et perspicuum est eorum potentia in qua fiunt secundum modum diversitatis ipsius potentiæ. Signum autem quod sit sic sicut dictum est, hoc est, quod præcipue videmus in eclipsi solis omnia corpora vehementer alba pallescere, quasi forma sibi et actus sui caloris diminuatur. Propter eandem autem causam fulgentem albedinem habentia de die, in lumine solis pallida apparent ad lumen lunæ. Est ergo sic determinanda natura coloris.

CAPUT II.

Et est DIGRESSIO declarans dubia quæ sunt circa caloris generationem.

Dubitatio-
nes.

Habet autem plurimas dubitationes, quæ nisi solvantur, non poterit aliquid constare quod diximus. Est autem prima dubitatio ex supra dictis surgens : quoniam color qualitas est simplex : quod autem ex actu et potentia componitur, non est simplex : diximus autem colorem fieri ex actu qui est lumen, et potentia perspicua.

Amplius autem perspicuum omne substantia est : ex substantia autem non fit non substantia, sicut neque ex non substantia fit substantia : videtur igitur non esse vera inducta coloris determinatio secundum naturam.

Adhuc autem lumen nullum habet contrarium : color autem secundum speciem contrarium habet : non igitur videtur lumen esse actus coloris.

Quæramus autem adhuc, unde venit coloris contrarietas, si color non est nisi participatio luminis a perspicuo?

Est autem harum dubitationum solutio, quod non esse hoc compositum est secundum esse cujus essentia fluit ex pluribus : quia quælibet forma dans esse et speciem, fluit ex omnibus quæ sunt principia ejus in eodem genere prædicamenti : et tamen est simplex forma specifica, sicut humanitas quæ ex substantia et intermediis generibus et differentiis constat : et tamen non est composita hoc modo compositionis quo dicimus compositum esse hoc aliquid in natura : et quod etiam ipsa differentia simplex est : et tamen exit a genere et superioribus generibus et differentiis : aliquid tamen esse ex aliquo non facit compositionem, sed determinat in esse magis determinato : et ideo rationale non magis compositum est quam sit sensibile, licet sit magis determinatum. Propter hoc etiam paucioribus convenit : et tales formæ potentialiter habent in se virtutes eorum ex quibus sunt, licet non componantur ex naturis diversis.

Patet igitur non esse consequens, quod si coloris esse causatur a lumine simul et perspicuo, quod color sit compositus : non enim fluit ex illis duobus sicut ex componentibus, sed potius totum esse coloris est alterum ipsorum quod est lumen sic vel aliter determinato perspicuo participatum : et licet lumini accidat participari, tamen substantiale est colori quod sit participatum : quia ipsum non est hypostasis coloris nisi prout est participatum.

Quod autem objicitur, quod perspicuum substantia est, non est conveniens : quia nos supra diximus, quod perspicuitas confert ad esse coloris, et non sicut ingrediens substantiam ejus, sed sicut id in quo habet fieri sicut in proprio subjecto, in quo etiam variatur secundum dispositionem perspicuitatis ejus.

Quod autem dicunt lumen nullum ha-

Solutio.

Contrarietas coloris

unde sit? bere contrarium, verum est : contrarietas autem colorum non est ex lumine, sed ex contrariis dispositionibus perspicui, quæ sunt opacitas et transparentia partium determinati corporis in superficie continente. Et per hoc patet omnes inductas dubitationes non impedire prædictam coloris determinationem.

Sunt tamen qui hæc omnia negant, dicentes lumen esse substantiam quam quidam vocant corpus spirituale : quidam autem vocant eam formam substantialem perspicui : et ideo non est de consideratione coloris. Sed quod lumen non sit substantia, nos jam in libro de *Anima* probavimus : et ideo hic trans-eundum est : sed alias physicorum opiniones volumus considerare quid habeant veritatis.

Dixerunt igitur quidam non talem esse coloris determinationem sicut diximus : eo quod non dicunt colorem esse lumen perspicuo incorporatum, sed dicunt quia color est ipsa perspicuitas : dicunt enim omnis perspicui hanc esse naturam, quod quando comminuitur, efficitur pulvis ejus albus, sicut apparet in nive, et glacie, et vitro, et crystallo, et omnibus aliis. Hujus autem causam esse dicunt, quia cum comminuitur perspicuum, nulla pars alii continuatur : neque quælibet existens in una superficie cum alia terminata est in seipsa : et ideo efficitur pulvis non pervius. Quia vero perspicuum quodlibet habet aliquid luminis, ideo quælibet lumen suum reflectit super alia : et efficitur in eis lumen quasi calcatum et spissatum ex tali reflexione partium ad invicem : et ista spissatio luminis est albedo et candor : et a causis contrariis opaci corporis efficitur nigredo. Hoc autem probatur in spuma quæ est alba, et in aliis multis perviis quæ sunt minutatim comminuta. Juvat autem ad hoc quod comminuta imitantur aerem propter quem magis albescunt : hæc autem comminuta cum continuantur et componunt corpus aliquod, adhuc retinent discontinuationem : clara enim perspicua non compo-

nunt aliquod corpus nisi comminuta et divisa, ita quod plurimum unius sit cum plurimo alterius. In composito igitur etiam reflectuntur lumina eorum ad invicem : et causabitur ab eis albedo si pure vincant opacitatem : et hæc sententia non longe est a nostra sententia præinducta.

Illi autem qui dicunt aereum perspicuum præcipue causare albedinem, dicunt quod humidum aqueum secundum actum causat nigredinem : quia vident quod pars glaciei soluta in aquam, tenebrosior est quam non soluta. Et hujus causam dicunt esse aquam actu humidam a qua evolat aer, qui intra glaciem contentus non poterat evaporare : propter quod glacies erat perspicua, et quasi candentis et lucentis et fulgentis perspicuitatis. Quod autem fractura causet terminationem, probant ex hoc quod quando perspicuum frangitur per scissuram aliquam, sicut glacies scissa vel crystal-lus, locus scissuræ statim est albus et non pervius, sicut patet.

Si autem quæritur ab istis, unde venit aer in pervium spissum et durum, magis quam in pervium liquidum? Dicunt quod ex altera duarum causarum contingit. Quando enim pervia sunt congelata sicut glacies et crystallus, tunc frigus congelans ea in spissando in ea comprimit aerem loci continentis ea : et ille facit ea lucentia quando sunt integra, et alba quando sunt comminuta. Si autem sunt coagulata primo calido humiditatem educente, et postea frigido humidum vaporosum comprimente, sicut quidam lapides pretiosi : tunc aereum est in eis ex calido ducente humidum aqueum ad formam aeris, et continetur in eis et comprimitur et ex commixtione prima et ex comprimente frigore secundo.

Invenitur autem alia opinio physicorum dicentium, quod nigredo sola est certissima natura coloris : et albedo accidit translucenti pervia per causam quæ dicta est, et causa ejus in nigredinem est : quia videbant quod tinctorum super

nigrum colorem alium colorem tingere non possunt : super autem quemlibet alium bene tingitur alius. Si autem esset nigredo, ut inquiunt, privatio coloris, sicut videtur haberi ex supra dictis determinatis, quemlibet colorem de facili reciperet : eo quod privatio in natura facit esse subjectam cuilibet formæ.

Adhuc autem alii sunt qui dicunt omnia elementa esse pervia plus et minus : et cum continentur ita quod plurimum unius est cum plurimo alterius, et minimum cum minimo, divisa partium pervietas irradiat se per totam superficiem, et condensatum in determinato corpore lumen reddit colorem album : et hujus nulla causa est, nisi quia superficies minimorum componuntur in compositione plana. Si autem angulose componuntur, tunc una obscurat aliam : et ideo visus non penetrat per superficiem talem : et hæc obscuritas, ut dicunt, nigredo vocatur. Et hæc opinio in multis convenit cum prima : differt autem in hoc quod non ponit aliquid opacum esse ex natura, sed solum ex positione angulosa partium in superficie exteriori : et secundum istos prima causa coloris est pervietas et non pervietas.

Alia autem quædam adhuc invenitur sententia dicens ad colorem nihil omnino facere pervietatem, sed corpora esse colorata ex seipsis et in profundo et in superficie : sed aliquando in corpore sunt pori vacui, in quos penetrat lumen et radius visus : et hæc videntur alba si alba videntur : aliquando autem non sunt porosa, et in illa non diffunditur visus.

Ex omnibus autem his collatis opinionibus hoc solum difficiliter est investigare, quomodo pervietas sit causa albedinis? et tamen nigredo sit vere color uno modo contrarius albedini, et alio modo privatio coloris, et oppositus albedini sicut privatio et habitus opponuntur. His autem qui dicunt albedinem causari ex pervii contritione, et post si componantur attrita, tunc aliquando adhuc reti-

nent albedinem : opponitur contra hoc, quoniam nos videmus gipsum et lapides multos non satis effici albos ex contritione, sed potius ex decoctione, sicut causatur albedo calcis. Si enim hæc attendantur solum, et postea infundatur aqua, et conglutinantur, non multum albescunt exsiccata : sed si adunantur, multum albescunt : non igitur albedo causatur ex sola attritione pervii. Sed si concedatur eis, quod etiam in gipso et calce, prout dicunt, causatur albedo, quid dicent de albedine ovi decocti? Constat enim quod albugo ejus ante decoctionem ejus non fuit multum alba, et per decoctionem fit multum alba : cujus causa non est divisio, cum nos videamus quod inspissatur fortiter per decoctionem. Nec potest dici quod hoc fiat propter aeris admixtionem : si enim in decocto plus esset aeris quam in crudo, tunc decoctum ovum levius esset quam crudum : cujus contrarium videmus, quia decoctum mergitur citius in aqua quam crudum.

In alchimis etiam est quidam modus ^{Litargirum.} operationis, quia accipiunt *Litargirum* et coquunt in aceto albo, puro, bono, fori decoctione donec dissolvatur in eo : et postea colant acetum multoties quousque fiat translucens et album aliquantulum, et miscent illud acetum cum aqua in qua decoctum est albumen vetus : et tunc ambo simul mixta colant diligenter, et sæpe quousque totum mixtum simul fiat quasi lacryma. Si autem diligenter colatur, tunc non provenit ex eo compositio quæ quæritur : et cum permiscantur hæc duæ aquæ, tunc ex eis coagulatur litargirum : et quod fuit translucens dissolutum efficitur albissimum sicut lac acidum : et ideo vocant ipsum *lac virginis*, et exsiccatur et induratur. Constat autem, quod hæc divisio non fit ut ex ipsa fiat translucens : quando enim dispersum fuit in aceto, particulæ ejus non fuerunt translucens multum : albedo igitur quæ accidit constricto, non fuit causata ex pervietate contrita sola, ut videtur.

Album qualiter venit in nigrum?

Est autem adhuc ad hæc objectio quæ dicta est supra, quod color sit quoddam esse luminis in perspicuo terminato. Si enim sic esset, tunc albedo esset lumen clarum in terminato perspicuo, et nigredo esset privatio ejusdem, sicut nos supra diximus : et si hæc concedantur, non erit motus de albo in nigrum nisi uno modo, ut primo sit subpallidum, deinde pallidum, et sic continue motum efficiatur nigrum. Nos autem contrarium hujus videmus. Si enim ea quæ frequentius accidunt attendamus, tunc album venit in nigrum tribus modis : quorum unus est proprius, quando solum album et purum convertitur in nigrum : hoc enim primo efficitur subpallidum, et postea pallidum, deinde fuscum et sic nigrum. Aliquando autem videmus ipsum moveri primo ad subrubeum vel croceum, deinde ad rubeum et sic ad purpureum, et per indicum venire in nigrum. Tertiam autem videmus viam, quando ex illo statim fit viride clarum, et deinde viride, et postea intensa viriditas, et postea efficitur nigrum. Ista autem diversitas non potest esse ex albo et nigro tantum : igitur oportet tertium esse aliquid visibile unde causetur ista diversitas : et hoc erit si nos dicamus, quod albedo non est esse luminis in perspicuo terminato, sed albedo quoddam visibile præter lumen : cujus lumen non est hypostasis hæc substantia, sed aliquando accedit ei, et aliquando non : tunc enim si albedo simpliciter transeat in nigrum, tenebit per media quæ sunt subpallidum, pallidum, fuscum, et cætera quæ dicta sunt. Si autem albedo sit cum lumine irradiante eam, et super ipsam reverberetur fumositas intensa, et sic moveatur in nigrum : tunc si albedo lucens vincit fumum album, ibit primo ad subcitrinum, et sic ad citrinum, et post ad subrubeum, et rubeum, et indicum, et nigrum. Si au-

tem statim in principio motus vincitur albedo, retento tamen lumine, tunc tenebit medium subrubeum, et rubeum, et rufum, et rubicundum, et purpureum, et indicum, et nigrum. Si autem fuerit albedo clara radiosa victa vapore aqueo reverberante eam, tunc antecedit album primo, deinde clarum, et tunc viride lini : et tunc erit sicut ærugo æris, et tandem sicut folia pørri : et sic continue deficit in nigrum.

Et hæc quam nunc diximus, videtur esse opinio Avicennæ¹, sicut apparet ex verbis ejusdem. Confirmat autem dictum istud per rationes quasdam : dicit enim quod si pervietas et lumen esset sufficiens causa albi et privationes causa nigri, tunc videremus quoniam nigrum si sic esset, non redderet colorem suum alteri quando est in pervio vitro : radius enim non transit per ipsum, nec ingreditur in ipso sicut in alio colore : ita etiam medii colores nihil omnino deberent reddere de nigro, quia nihil est : sed tantum deberent reddere aeri et visui ad quod est in ipsis coloris albi : et hoc nos non videmus. Si autem aliquis ad hoc velit dicere, quod operationes albi et nigri in mediis coloribus sunt permixtæ, et ideo non possunt immutare id quod est albedinis simpliciter, iste concordat jam in hoc quod nigredo sit aliquid determinatum : quia privatio cum habitu non permiscetur : eo quod nihil et aliquid nullam habere possunt penitus permixtionem. Et ideo etiam objectio eorum qui probant nigredinem esse aliquam determinatam naturam contrariam albedini, licet concordare videantur cum ista opinione, tamen non concordant, vel non concedunt. Duo enim sunt modi permutandi colores, tingendo scilicet vel transeundo subjectum in alium colorem. Et verum est quod tingendo nigrum non recipit colorem alium : et hoc contingit

¹ AVICENNA, In VI Naturalium, parte III, cap. 4.

ideo quia tinctura magis est in substantia corrosiva, et non permittit sibi alium colorem in ista superficie superlinita coherere : transmutando autem bene permutatur nigrum in album et in quemlibet alium colorem : cerusa enim licet sit nigra, cum de plumbo est facta, tamen sæpe transmutata efficitur alba. Idem autem est de pulvere ferri qui niger est, et in aliis similibus est eodem modo. Hæc autem natura melius facit quam ars : eo quod ipsa semper transmutando operatur, et ad transmutationem ars non sufficit propter moventis defectum. Calidum enim vel frigidum in natura transmutans movetur a cælo, cujus virtus est in ipso sicut quodlibet instrumentaliter operans habet in virtutem sui motoris. Calidum autem vel frigidum movens in arte, non habet hanc virtutem : et ideo raro pertingit ad speciem quæ quæritur, nisi per artem quærat hora in qua cælum cum homine operatur. Hæc igitur est opinio Avicennæ.

Sententia autem quæ dicit de poris, nulla est omnino : quia pori illi aut sunt pleni, aut sunt vacui : et si sunt pleni, tunc non prosunt ad penetrationem luminis et visus. Si autem vacui, tunc vacuum esset aliquid, quod nos improbavimus in scientia *Physicorum*.

Amplius si detur poros esse in corpore, quomodo salvabitur hoc quod dicunt, quosdam poros esse in rectitudine contra lumen et visum, et quosdam tortuose? Fiat enim pila crystallina vel hyacinthina, et sint pori quos rectos dicunt in una superficie ejus ad aliam quæ vocatur longitudo pilæ : tunc enim in alia superficie latitudinis ejus non penetrabit in eam visus et lumen : quod falsum esse videmus.

Amplius constat quod hæc corpora sunt colorata secundum istos : coloratum autem tegit corpus quod est post ipsum cum sit determinatum : hæc autem corpora non tegunt, sed reddunt colorem corporum existentium post ipsa : ergo aut ipsa non habent colorem : quod non concedunt : nihil enim habens colorem

potest esse medium colorum, sed potius non color est medium ad colores, sicut habitum est in libro de *Anima*. Si igitur habent colorem, oportet quod habeant colorem tectum et occultatum : et quæramus quid tegit colores eorum? et non poterit dici quod tegat eum nisi porositas quæ est in ipsis : porositas autem cum det locum lumini et visui, magis deberet revelare et detegere colorem quam tegere et abscondere : et ita nihil omnino videtur valere dictum de poris.

Adhuc autem porositas cum sit vacui interceptio in corpore, et vacuum nihil sit, videtur porositas nihil esse, aut prope nihil : hoc ergo quod aut nihil, aut prope nihil est, non debet contegere colores, ut videtur.

Quod autem isti dicunt, qui solam pervietatem causam colorum esse dicunt, non videtur esse conveniens : quia ex ipsa sola non posset oriri diversitas colorum. Spissitudo enim non est causa albi, neque etiam raritas. Similiter autem neutrum istorum est causa nigri : et ideo ista opinio etiam falsa est. Adhuc autem quoniam si pervietas esset causa albedinis, videtur quod maxima pervietas causa esset maximæ albedinis : et hoc non est verum : quia maxime pervia magis luminosa sunt quam alba.

Ex omnibus igitur dictis opinionibus, aut illa est vera quam supra explanavimus, aut illa quam diximus esse Avicennæ : sed illa quæ est Avicennæ diminuta est, quia non ostendit nobis quid sit albedo, ex qua dicit eam non esse lumen in perspicuo terminato. Et ideo adhuc est revertendum ad supra determinatum modum colorum qui est de opinione Aristotelis, quod scilicet lumen in determinato perspicuo incorporatum fit color, et quod lumen hoc modo sit hypostasis colorum : et ideo planum est quod sola divisio perspicui non facit albedinem. Concedendum est autem quod lumen secundum se acceptum non est color, nisi large sumpto colore : et ideo albedo calcis et gipsi causatur ex adustione,

quia calidum extrahit ubique humidum subtile, quod secum ducit subtilius siccum : et ideo siccum ubique passum est ab humido evaporante : propter quod partibus terrestribus minimis ubique in superficiebus adhærere perspicuum : et inde est quod efficitur calx albissima.

Quod autem dicunt pervium divisum effici album ex hoc quod una pars super aliam projicit lumen, et ideo lumen inspissatur, ergo arbitror esse concedendum : sed id pervium efficitur subtile per determinationem : et cum illud existens ubique tingat terreum, et aliquo modo adhæret ei, oportet quod talia combusta sint albissima : et quando humectantur per aquam, aliquantulum obscurantur propter aquæ spissitudinem : et cum sint exsiccata, tunc subtile adhærrens redit ad actum, et tunc efficiuntur albissima.

Et quod obijciunt de opere alchimico, quod *lac virginis* vocatur, dicendum acetum et aquam albuminis esse perspicua, et per colationem effici magis perspicua : et quia sunt acuta multum, ideo lavet ex litargiro unctuosum humidum quod non sinebat ipsum depurari : quo extracto induratur per terrestre siccum quod est in eo : et tunc propter omninodam penetrationem humidi perspicui per ipsum et terminationem sui in ipso efficitur albissimum.

De ovo autem quod inducit Avicenna, causam habet : quia in quantum perspicuum rarum est, tanto habet per se partem a parte distantem : et quanto constant partes, tunc unaquæque irradiat super aliam lumen quod remanet ex spissitudine et viscositate : et tunc efficitur fortis albedinis, sicut est in ovis coctis : et licet minus sit in eis de aereo, tamen lumen retinetur in perspicuo humido quod retinetur infra terreum et albificat ipsum : hujus autem signum est, quoniam ova in toto combusta quando in toto separatur humidum aqueum, nigrescunt, aut fusca inveniuntur.

Et quod inducit de tribus viis albi

moti in nigrum, facile est solvere secundum Aristotelem, ita quod non oportet dicere quod aliquid sit color præter esse quoddam luminis in perspicuo terminato. Si enim contingat plus esse perspicuum quam terminatum, erit luminis esse in ipso cum fulgore quodam : et tunc si super illud reverberet perspicuum fumosum, multum habens opacitatis, sicut est vaporosum terrestre incensum tenue, tunc erit rubeum et subrubeum : et si super idem album fulgens reverberet vaporosum perspicuum mixtum ex aqueo et terreo subtile bene commixto cum humido vaporante, erit croceum sive subcitrinum et citrinum, et sic ulterius. Si autem reverberet super ipsum aqueum humidum tenue vaporans, perspicuum erit inde plus et minus secundum diversitatem hujusmodi perspicui. Si autem sit aereum vaporosum permixtum subtilissimo terreo bene commixto et adusto, erit color hyacinthinus. Et sic ex esse luminis in diverso in perspicuo erit accipere coloris naturam et omnem colorum diversitatem. Refutamus igitur omnes opiniones præter eam quæ est Aristotelis de natura et generatione colorum, quam in præcedenti capitulo determinavimus.

CAPUT III.

De falsis opinionibus quæ sunt circa generationem mediorum colorum.

Habita igitur natura coloris et de generatione albi et nigri secundum modum physicum, erit nunc dicendum nobis dividendibus medios colores quot modis alios colores qui medii dicuntur, oportet accipi. De acceptione igitur mediorum colorum introducemus opinionem aliorum.

Dicunt enim quidam sic generari medios colores ex albo et nigro, quod albus et niger æque distant, id est, proportionaliter componantur, ut sit servata aut æqualitas arithmetica, aut æqualitas geometrica : hæc enim vocatur æquidistantia in commixtis secundum visibilia : cum sic miscentur, tunc unumquodque albi et nigri quæ per minima dividuntur, est insensibile propter parvitatem quam habet : sed id quod est ex ambobus, est visibile fieri. Hoc autem ita intelligendum est, quod album et nigrum in atoma dividantur, et tamen servent suas naturas : et sic diversa proportione naturaliter componantur, in qua compositione adhuc suas retinent formas : sicut si nos diceremus pulverem atramenti cum aloë componi : tunc enim unumquodque compositorum esset insensibile propter parvitatem : et quod fit per compositionem ab ambobus, efficitur visibile. Cum igitur omne visibile sit color,

oportet hujusmodi esse colorem. Non autem est color extremus si qui est albus vel niger : erit igitur color medius mixtus ex utroque, et alia species coloris ab utroque. Hoc enim modo Democritus et Leucippus omnem dicebant fieri admixtionem ex albo et nigro in actu salvatis, sed per minima divisio in atoma : quorum compositione secundum proportionem stante æque arithmetice, geometricæ, vel musice, generari dicebant omnes medios colores.

Contingit igitur sic concipere secundum istos plures colores esse quam album et nigrum, qui multiplicantur secundum multiplicatam proportionem. Contingit autem album et nigrum in compositione æquidistantia jacere composita, sicut tria ad duo, quando sunt tres partes unius et duæ alterius : jacent autem sic tria ad quatuor, quando sunt tres partes unius et quatuor alterius : et similiter contingit ea simul jacere composita secundum alias numerorum proportionum, ut dicunt Democritus et Leucippus. Contingit autem ea componi nulla servata proportione et ordine compositorum, sed tamen secundum abundantiam et defectum, quod sit scilicet de uno plus et de altero minus absque proportione, qui vocantur ab eis *numeri asymmetri*, hoc est, non mensurati : eo quod non mensurantur proportione aliqua.

Oportet autem, quod hæc compositio ex atomis extremorum colorum eodem modo se habeat in his quæ observantur in consonantiis musicalibus. Colores enim illi qui sunt compositi in numeris proportionabilibus, sunt delectabilissimæ in visu species colorum, sicut in consonantiis delectabilissimæ symphonie sunt in auditu, in quibus servatur proportio numerorum in vocibus et tonis. Et hoc modo dicunt esse consitos medios colores conchilinum et puniceum. Est autem *conchilinus* idem quod conchineus, qui rubicundus est cum claritate, et dicitur conchilinus, quia fit ex sanguine concheæ

cujusdam ut ostreae, quod in concha generatur, quod ostreum a quibusdam vocatur conchus: propter quod etiam *cochineus* vocatur color. Vocant autem ipsum reges antiqui in legibus *murices* et *munilegulos* eos qui illud jus habent colligendi et venandi. Colores autem medii non in numeris mixti, alii sunt ab his et indelectabiles, vel sicut cujus omnes colores contingit esse in numeris. Et si dicat aliquis quod abundantia et defectus est quidam numerus non proportionatus, tunc oportet dicere quosdam esse ordinatos, quorum generatio est secundum proportionem numerorum, et alios inordinatos qui fiunt ex compositione extremorum non proportionata. Hos autem medios colores forte dicet aliquis non esse potentias, quando non sunt in numero proportionato.

Post hoc autem advertendum, quod Democritus et Leucippus non dicebant aliquid generari nisi tantum per congregationem: propter quod etiam dicebant medios colores non fieri nisi quadam congregatione albi et nigri in atoma diversorum, sicut ex positione albi et nigri pulveris, sicut diximus supra, vel ex compositione albæ et nigræ lanarum resultat color neque niger neque albus. Perfectionem autem hujusmodi colorum omnium dicebant esse sicut et ordinem et figuram, sicut alibi dictum est. Quod autem sit in æquidistantia proportionis secundum numerum esse, et aliquid esse sine hac abundantia et defectu, nos infra explanabimus in loco proprio, ubi numerum specierum mediorum sensibilium tam in colore quam in aliis ostendemus. Iste igitur est unus modus generationis mediorum colorum secundum Democritum et Leucippum.

Unus etiam modus generationis colorum alius a prædicto secundum Anaxagoram, quando scilicet unus fit ex eo quod unus extremorum resultat per alterum: et hoc fit qualiter sive niger sub- tus, et albus supra, sive medio, æqualiter enim per alternos resultat tertius qui

est medius inter duos: et hujusmodi exemplum dicunt esse in arte pingendi. Illa enim sæpe unum colorem ponit inferiorem, et alterum superlinit faciens eum eminere secundum apparentiam super alium, et ita tamen, quod non penitus exstinguat et tegat eum. Hoc autem faciunt pictores quando pingunt aliquid quasi stans in aqua vel in aere: tunc enim colores imaginis ponunt primo, et superducunt illis colorem tenuem diaphanum non tegentem colores et figuras imaginis: et hunc modum in natura invenimus in aurora, et quando sol apparet per fumum incensum ex subtili terreo elevatum: tunc enim fulgor solis qui est in se albus, videtur et apparet quasi puniceus. Isti autem sicut et anteriores multitudinem mediorum colorum causabant ex eo quod fit sibi superlinitum in proportionem et extra proportionem secundum abundantiam tamen et defectum. Potest etiam esse tertia inferioris et duplum superioris vel in alia proportionem naturali: et potest esse abundans superlinitus super inferiorem sine proportionem multis modis valde, sicut infra ostendetur.

CAPUT IV.

De improbationibus inductarum opinionum de mediis coloribus.

Omnes autem Antiqui qui sic colores ex atomis extremorum, vel ex supernatione unius super alium generabant, in hoc conveniunt quod dicebant sensum visus fieri per resolutionem alicujus rei a corpore colorato, quæ per medium discurreret ad visum et tangeret ipsum : et dicebant ipsum esse quemdam tactum : et in hac opinione maxime fuit Democritus : et causa dicti illius superius explanata est : et ex illis quæ diximus ibi, patet quod dicere sicut Antiqui dixerunt, colores sensibiles esse sicut discursiones corporis visibilis ad sensum divisi in atomo vel superficies superlinitas coloribus, est omnino incongruum. Patet enim ex quo sentimus intus suscipiendo, quod in omnibus sensibus sensus fit per quemdam tactum : et in hoc verum dixerunt Antiqui : sed tactus ille non est corporis sensibilis nisi in tactu et gustu, sed est speciei simplicis in aliis tribus sensibus : propter hoc metaphorice dicitur tactus. Et quia sic fit sensus istius, sicut probatum est tam in libro de *Anima* quam in præsentis tractatu, melius est ut dicamus quod medium quod est inter sensum et sensibile, subito præcipue in visu moveatur, et sic motu illo fieri sensum tactus metaphorice et non discursionibus.

Illi qui dicunt medios colores generari

ex æquidistantia seu proportionaliter jacentibus simul extremis compositis, omnino falsum dicunt. In omnibus enim sunt æquidistanter simul et uno composito jacentibus, oportet dicere quod aliqua magnitudo colorati corporis sit invisibilis et non videatur nisi composita cum alia : et quia componentia non sunt ejusdem coloris, ideo ex tali composito non resultat color componentium. Resultabit ergo color medius qui non est color componentium : sed sicut magnitudo colorati est divisibilis, ita etiam tempus in quo perficitur sensus, est divisibile in minima. Oportet igitur etiam dicere, quod tempus in quo sentitur unum componentium, et aliquid sit insensibile : et ideo utrumque sensitur simul. Si enim atomaliter extrema tantum composita sunt, tunc non est unum mixtis ex ipsis. In omnibus autem talibus tantum in loco compositis est sentire componentia ante compositum, sicut patet : quia turba non sentitur nisi per hoc quod unus et unus, et sic multa videntur : et numerus eorum collectus dicitur turba esse. Sic igitur in sensu atomorum componentium est, quod oportet cadere sensum super extrema primo, et post super compositum ex ipsis : sed quia hoc tempus est invisibile, ideo dicunt non sentiri extrema, sed medium compositum : et propter insensibilitatem temporis motus simplicium atomorum diversorum secundum esse decipiunt et latent visum : et putatur unum medium esse tantum, cum in veritate duo appareant, sed simul in loco : sed hoc ideo est, quia sic composita non amittunt formas extremorum, cum non sint alterata ad medium : et quia retinent formas extremorum, secundum illos alterant sensum : et ideo sic dicere sicut isti dixerunt, nulla est necessitas.

Sed isti qui supernatione colores medios resultare fecerunt, melius dixerunt. Color enim superior qui est in supernatione, mobilis est et alterabilis a subjacenti sibi, sicut omne diaphanum et moveatur et alteratur ab eo quod videtur per

ipsum. Et ideo quando sic alteratur et movet visum, non facit sibi similem motum primo, sed movet in forma ejus qui alteravit ipsum quasi permixta forma sua propria, sicut superius patuit in exemplo solis, cum ex fumo apparet puniceus: puniceus enim color est fumi ab albedine solis alterati: et ideo talis color fit ex duobus resultans, alius apparet visui statim, et non albus vel niger pure. Nec oportet in tali visione prius accipere formas albi secundum se, et nigri secundum se, et postea compositi ex utrisque, sicut sequitur ex prædicta opinione, et latere nos propter temporis insensibilitatem: quia ex supernatione causatur actus medius qui neuter extremorum: et ideo agit in visum sub actu proprio, et non sub actu extremorum. Et secundum istam opinionem non oportet nos dicere, quod aliqua magnitudo corporis colorati sit invisibilis: sed potius dicemus quamlibet esse visibilem ab aliqua distantia determinata majore vel minore.

Hæc igitur utique quædam secundum veritatem est colorum admixtio, non quidem secundum rem, sed secundum quod perveniunt ad sensum. In re enim ipsa color fumi secundum actum alter est a colore solis: sed quando perveniunt ad sensum, tunc uniuntur et immutant in alia resultatione ex utroque. Illo autem modo qui in præcedenti opinione dictus est, nihil obstat quin appareat quidam communis et medius color ex compositione albi et nigri, eis qui stant a longe a re visibili. Sed iste qui stat prope, discernit in tali composito atomos albos et atomos nigros, et non medium. Nos enim in eis quæ deinceps in fine istius libri tractabimus, ostendemus quod non est aliqua magnitudo colorati corporis invisibilis. Est ergo opinio secunda melior quam prima: sed tamen et hæc falsa, quia non fit talis mixtio mediorum colorum secundum quod in se accipiuntur, et non prout immutant sensum visus.

CAPUT V.

De vera causa commixtionis mediorum colorum.

Si autem est commixtio corporum non secundum istum modum quem putant quidam, sicut Democritus et Leucippus, tunc erit vera causa commixtionis colorum mediorum ad medios colores generandos: non enim fit commixtio corporum physicorum sic quod minima atoma simplicia prima quæ in eis æquidistant secundum proportionem ponuntur: quæ tamen sunt immanifesta nobis secundum sensum: licet miscentur omnino alterata a formis extremis ad medias, sicut dictum est in fine primi de *Generatione et Corruptione*. Sed ibi quidem universaliter dictum est de mixtione secundum quod universaliter competit omnibus: hic autem habemus dicere de colorum extremorum mixtione sola. Illo autem modo quo illi dicunt, quod atomalis scilicet compositio faciat mixtionem, sed solum componuntur quæcumque oportet dividere ad minima suæ speciei et non alterari a suis speciebus, sicut dicimus homines dividi et equos et semina et omnia individua. Illa enim ulterius non dividuntur: quia minima sunt in quibus salvatur species: hominum enim minimus et hic homo et ille, et equorum hic equus et ille: et ideo istorum multitudo congregata in unum locum secundum istos dicentur permixta, quando æquidi-

stant et proportionaliter ponuntur et disponuntur in loco uno. Et hæc præcipue oportet esse quando connaturalia sunt æquidistanter posita : eo quod etiam plantæ oportet connaturalia esse quæcumque miscentur secundum naturam : et ideo unus homo non permiscetur cum equo, vel e converso. Quæcumque vero non dividuntur ad minimum, sed ex suis formis alterantur ad medium, horum commixtionem non oportet fieri sic : sed oportet ea ex toto alterari, et sic misceri ita quod nihil retineat secundum actum de extremo alterato. Hæc enim sunt quæ secundum naturam maxime commisceri habent.

Qualiter autem sit possibile talem mixtionem fieri in physicis corporibus, manifestum est ex eis quæ diximus in fine primi *Peri geneleos*, cum tractarem de *commixtione*. Quæ autem sit necessitas, quod commixtis simul etiam colores miscentur, manifestum est ex his quæ statim dicemus : et tunc oportet hanc eandem esse causam, quod multi sunt medii coloris : et tunc patebit quod non oportet dicere causam omnium mediorum colorum esse supernationem vel indivisibilium æquidistantem positionem. Si enim diceretur quod æquidistans positio causa est mediorum colorum, tunc oporteret dicere quod prope videnti non esset color medius, quia ille videret extremum qui mixtus esse diceretur : sed longe videns non videret extremum commixtum si appareat ei medius, et esset debiliter videnti medius, et lynceo non esset medius color. Quæ omnia falsa sunt.

Quare albedo et nigredo uno modo private, alio contrarie opponuntur ?

Dicamus igitur causam quare mixtis corporibus misceri necesse est colores : et in eadem hac causa manifestum erat, qualiter album et nigrum opponuntur contrarie uno modo, et ut privatio et habitus alio modo. Habitum autem est in præhabitibus multoties, quod diaphanum quod est in coloribus quibusdam, est in eis ex convenientia cum perpetuo superioris corpore : et habitum est quod est

in omnibus fere secundum magis et minus. Quia igitur in multis est elementis, et non in elementis inest ipsa natura quam vocamus perspicuum, prius naturaliter, quam primæ qualitates elementorum quas vocamus activas et passivas : quia vero in multis est elementis, oportet quod nullam habeat contrarietatem cum aliqua illarum qualitatum. His duobus sic probatis, est adhuc sciendum quod raritas et densitas non faciunt perspicui naturam et opaci. Si enim demus opacum rarefieri, adhuc remanet in ipso opacitas : adhuc autem spissa luminosa sunt, sicut sol et stellæ : et rara opaca sunt, sicut terrestres nubes.

Ex his igitur tribus suppositis relinquatur, quod cum commiscantur elementa, ita quod plurimum et minimum unius est cum minimo et plurimo alterius, convenit omnibus habere partes perspicuas. cum partibus opacis, sicut dicit primum de tribus probatis : et manebunt hæc in ipsis non alterata a natura perspicuitatis, eo quod non contrariantur eis qualitates activæ et passivæ visibilium, sicut dicit secundum ex eis quæ probavimus : et hoc non impedit raritas et densitas, sicut ostenditur ex tertio. Diviso autem perspicuo et composito, ita quod compositio intercipitur opaco, oportet quod lumen quod habet perspicuum terminatum sicut et ipsum perspicuum dilatetur in ipso extremo ubi tangit ipsum : et hoc esse luminis est color ipsius : quoniam cum ex multitudine perspicui lumen in tota superficie valet dilatari et profundari, erit res alba procul dubio. Quando enim ex multitudine opacitatis numquam dilatatur in ipsa, et profundatur, absque dubio erit nigra res illa : propter quod nigredo ad opacitatem quæ perspicuitati contraria est, sicut ad causam reducta qualitas est, et non privatio : et sic albedini opponitur contrarie : et tamen lumen nullum habet contrarium, eo quod ipsum non est perspicuum, sed actus perspicui. Et si subtiliter hæc considerentur, invenitur

nigredo opponi albedini contrarie secundum id quod materiale est in albedine : privative autem opponi ad id quod formale est in ea : propter quod magis privative opponitur ei quam contrarie.

Multitudo autem colorum mediorum causabitur ab eo quod multi sunt modi commixtionis corporum ex perspicuo et opaco. Possunt enim commisceri quædam secundum numeros proportionales, ita quod triplum perspicui in superficie sit cum simplio opaci, vel e contrario, et aliis multis modis potest talis commixtio fieri. Quædam autem non servata proportione in numeris possunt commisceri per abundantiam unius istorum, et defectu alterius in superficie. Ista enim oportet dicere eodem modo fieri et multiplicari, quo etiam secundum primam opinionem multiplicari dicuntur æquidistantia positi et compositi colores : et sicut dictum est in secunda opinione de proportione supernationis. Omnes enim illi modi servantur in commixtis corporibus ex perspicuo et opaco. Quæ autem sit causa, quod colorum species formaliter necesse est esse terminatas et non infinitas secundum numerum, similiter autem et saporum et sonorum et aliorum sensibilium, postea dicemus : quia una ratio est de omnibus. Sic igitur tantum dictum sit a nobis quid sit color, et quæ de causa sint multi colores.

Quia autem nos non hic intendimus de sensibilibus secundum quod intrans sensum, sed de ipsa generatione sensibilium et secundum suum esse in natura, et tamen sonus et vox non immutent sensum nisi secundum suam generationem, ideo nos oportuit in libro de *Anima* ¹ sufficienter tractare de generatione vocis et multitudine sonorum : quia ibi tractatur de eis prout sensum immutant. Quæ igitur ibi dicta sunt de sono et de voce, sufficiant : et ibi

etiam diximus causam quare nullius sensibilis multiplicatio potest causari ex primis qualitatibus : quia nos quærimus causas per se essentielles sensibilium. Calidum autem et frigidum et humidum et siccum non sunt causæ per se istarum : cujus signum est, quia album quandoque generatur a calido, et quandoque ab ipso generatur nigrum, et similiter de frigido et aliis qualitatibus primis : igitur non sunt per se causæ colorum essentielles, aut non sunt. Sed quoniam non salvantur in essentiis eorum, et hoc quidem etiam in libro de *Anima* ² capitulo de *gustu* diximus, abhorremus hic ponere causas tales colorum : et illi qui boni erant inter Peripateticos ante nostra tempora, hac via qua nos incedimus, inceserunt.

CAPUT VI.

Quod homo prave odorat, et de generatione saporis in communi.

De odore autem et sapore nunc dicemus. Est enim fere eadem passio et qualitas odor et sapor : quia utrorumque est sequela complexionis nutrimenti, sed non sunt in eisdem subjectis tamquam in materia : quia sapor est in humido aliquid passo a sicco complexionali, et odor est in sicco complexionali aliquid

¹ II de Anima, tract. II, cap. 21 et 22.

² II de Anima, tract. II, cap. 27.

passo ab humido complexionali : sed saporum genus nobis hominibus manifestum est magis quam genus odorum. Hujus autem causa est : quoniam hunc sensum qui odoratus vocatur, pejorem habemus omnibus sensibus aliis qui nobis sunt, et omnibus aliis animalibus quæ perfecta sunt secundum numerum sensuum : nisi forte sint aliqua aquatica, quorum membra valde sunt frigida et humida. Tactum autem habemus discretissimum inter omnia alia animalia. Cum igitur gustus quidam tactus sit, consequitur etiam ut aliis sensibus et aliis animalibus melius et discretius habeamus gustum. Causa autem horum omnium partim in libro de *Anima* ¹ generaliter quidem et figuraliter dicta est, partim autem et particulariter et perfecte determinabitur in libro de *Animalibus* ², ubi de membris humanis agatur. Quia autem nobis certius est saporum genus et generatio quam odorum, et sapor est aliquo modo causa odoris, et ideo tractando generationem sensibilibus oportet nos prius determinare de generatione saporum quam odorum.

Prius autem volumus quærere de generatione saporis in communi. Cum autem sapor aliquid sit, et in aliquo sicuti in primo subjecto aliquam causam habeat suæ generationis, oportet quod ex his natura saporis determinetur.

Quærentes igitur primum subjectum ipsius in quo habet fieri, dicimus quod id erit proprium subjectum saporum, quod in se nullum habet saporem : et cum sapor sit passio nutrimenti, et omne quod nutrit, actu sit humidum, sicut in libro de *Nutrimeto* est ostensum, oportet quod primum subjectum saporum sit humidum insipidum. Scimus enim quod aquæ natura est esse insipidam. Oportet igitur quod aut in humido aqueo genera fiant saporum, aut in hu-

mido aeris, quia hoc etiam est insipidum. Sed non possint fieri in humido aeris : quia ipsum est spirituale et non incorporabile ad nutrimentum. Oportet igitur quod sint in ipso humido aquæ tamquam in subjecto proprio. Cum igitur sit aqua subjectum primum et proprium saporum, oportet quod sit uno trium modorum subjectum ipsorum. Aut enim sic est subjectum, quod omnia genera saporum sunt actu in ipsa, sed insensibilia propter dividentium parvitatem, ita scilicet quod saporosum corpus sit in atoma divisum et dispersum in aqua, et propter parvitatem dividentium sunt insensibilia : et hoc est dicere, quod aqua de se habeat omnes sapes, et ex commixtione efficiatur sapor sensibilis, sicut diximus de coloribus : et hoc modo determinant de odoribus Empedocles et Anaxagoras. Aut ita erit subjectum saporum, ita quod in se habeat universaliter semen saporum sufficiens ad esse ipsorum secundum causam efficientem et materialem : semen enim est efficiens et materia ejus cujus est semen : et secundum hoc dicemus omnia genera saporum ex aqua sola fieri efficienter et materialiter, secundum quod alii et alii sapes fiunt ex aliis et aliis partibus aquæ, sicut ex alia parte seminis fit manus, et ex alia pes, et sic de aliis membris. Aut quod tertium membrum divisionis, quod dicatur quod nullam differentiam saporis habet aqua, sed secundum potentiam solam, et aliud est quod est causa efficiens quod facit res et educit secundum actum saporis : sicut si aliquis dicat quod calidum vel sol agit sapes in humido aqueo complexionali. Sol enim facit eos in terræ nascentibus et præcipue in fructibus plantarum. Calidum enim facit eos et complet indigestis per artificium epsesis et optesis. Sol autem ut diximus in pempasi.

¹ III de Anima, tex. et com. 63.

² XIX de Animalibus, cap. 5.

Horum autem primum quod dictum est, sicut dicit Empedocles, multum est et apertum mendacium. Si enim saporum secundum actum essent in aqua, sed non sentirentur propter parvitatem dividendum, tunc fierent saporum sensibiles ex congregatione partium saporosarum in aqua : et hoc fieret ex colatione aquæ et congregatione saporosorum : nunc autem nihil tale facit vel mutat in humidum complexionale : quia videmus quod saporum non congregatione, sed alteratione commutantur et congenerantur quando efferuntur fructus ad solem in pempasi : et quando uniuntur in optesi et epsesi digestionibus : poma enim decocta dulcescunt assa vel elixa : igitur saporum non fiunt ex eo quod est ab aqua, tales factos esse congregatos, cum calor non congreget, sed disgreget : sed potius ex hoc fiunt, quod transmutantur per alterationem factam in primo fructu : primo enim transmutantur calido naturali, et sole ad determinationem humidi complexionalis movente : deinde resudat superfluum humidum quod evaporaliter est in eis a calore solis : et quia hoc humidum est vaporosum, propter hoc aliquantulum est incensum et amarum : et ideo oportet quod resudet superfluum humidum vaporosum quod exsiccat cum egressu caloris quem fructus trahunt a loco suæ generationis, sicut vinum quando bullit in uva antequam vindemietur : deinde oportet quod resudet ad tempus quando bullit humidum eorum, sicut vinum bullit in dolio duplici calore, scilicet calore loci et naturali agitatus, et tunc egrediente calido loci residet calidum complexionale, et humidum vaporabiliter in fructibus dispersum aereum coadunatur ad aqueum : et hæc ambo efficiuntur proprium caloris naturalis subjectum : et tunc habet fructus debitum saporum : et sic patet quod fructus fit alterante calido complexionali humidum complexionale, et non per partium saporosarum congregationem.

Ex talibus autem alterationibus fiunt saporum acuti ex dulcibus saporibus et

peramari. Quando enim calidum agit in dulce, paulatim extrahit humidum subtile aereum : et quando remanet terreum in humido, incensum fit acutum. Quando autem in toto aduritur humidum, tunc efficitur sapor peramarus. Hujus autem signum est opus quod faciunt alchimici in faciendo aquas acutas : distillant enim urinam : et præcipua est ad hoc urina pueri masculi propter fortitudinem caloris digestivi : et id quod ex distillatione provenit in terra distillata, tunc elevatur oleagena substantia, et remanet aqua acutissima, residensque oleagena substantia si iterum distillationem recipiat, residebit in fundo nigrum quoddam viscosum corpus amarissimum propter multam actionem ignis in ea. Urina autem per naturalia vasa eliquatur a substantia nutrimenti succosa quæ dulcis est : et sic fit ex dulci acutum et peramarum. Naturaliter autem ex ebullitione sanguinis spumosum subtile terreum evolat, et in saporum amarum convertitur per adustionem. Hoc autem modo actione caloris in humido per alterationem videmus saporum omnimodos factos secundum omne genus saporum transmutatos : et ideo non est verum quod saporum actu divisi per minima dispersi sunt in humido.

Similiter autem impossibile est pansperma materiam saporum esse : si enim materia esset eorum pansperma, tunc non requireretur agens extra, nisi forte ad bene esse secundum generationem saporum. Hoc autem falsum est, quia ex aqua videmus factos alios saporum, sicut ex esca nutrimentali per calidum elixatum vel assatum per artem vel naturam. Ea autem quæ pansperma sunt, in seipsis habent agens et formam speciei.

Restat igitur tertium superius inductæ divisionis membrum, quod scilicet aqua transmutatur in saporum naturam, eo quod patitur aliquid ab aliquo agente quod est extra ipsam.

Licet autem dixerimus et probaverimus jam aquam esse subjectum primum saporum, tunc non potest esse, quod sim-

plex aqua a calido passa sit saporosum subjectum. Manifestum est enim, quod a virtute calidi simplex humidum aqueum hanc non recipiat passionem : omnium enim humidorum subtilissimum est aqua pura simplex eorum quæ corporalia sunt et incorporalia per nutrimentum. Hoc autem dico propter aereum humidum quod subtilius est quam aqueum, sed non est corporabile per alimentum, ut supra explanavimus. Quod autem omnium talium humidorum subtilius sit aqua, manifestum est : quia si aliquod humidum corporeum subtilius esset ipsa, esset hoc elementum : hoc enim videtur subtilius, eo quod effusum secundum plus in superficie se protendit humectando quam humidum aqueum : et quod plus protenditur et majorem habet locum, est subtilius et formalius quam id quod protenditur minus et locum capit minorem, sicut patet in elementis : quia formalia elementa protenduntur in locum majorem quam materialia. Hæc autem probatio est fallax : quia accidit elemento quod plus protenditur quam aqua, et non convenit humido utriusque per se, sed per accidens : convenit autem hoc ei propter lubricitatem propter quam cito labitur de parte in partem mollificando. Secundum verum signum, quod humidum aquæ sit subtilius quam elementum, est quia humidum aquæ in concavo manus, minus potest teneri et servari quam humidum olei, quod non convenit nisi propter ejus subtilitatem : et quia ita subtilis est et pura, ideo diximus in quarto *Meteororum*, quod aqua non est elixabilis : quando enim calida facta est et bullit, in nullo apparet incrassata et inspissata quando est per se sola. Omnia autem commixta inspissantur per elixationem. Oportet igitur quod non sola aqua simplex sit causa et subjectum saporum, sed et alia quædam aqua non pura inspissabilis per decoctionem : omnes enim saporos licet sint in humido, tamen sunt inspissabiles in subjecto suo et habent crassitudinem. Calidum igitur sicut agens concausativum

est : et ideo sufficienter causativum est saporum cum humido aqueo : oportet enim quod calidum digestivum et terminativum agat saporos in humido aqueo non puro, sed aliquid passo.

Et quæramus a quo debeat pati ut saporos recipiat : et accipiemus ea quæ primo videntur dare saporos humido aqueo. Accipiamus igitur humidum aqueum saporosum in primis simplicibus, in terra et in commixtis, in plantis et in quocumque fructibus crescunt in plantis. In his enim tamquam in primis videmus humidum aqueum ad saporos alterari. Et quod quædam genera terræ humido aquæ dent saporos, patet ex eo quod multi antiquorum Philosophorum qui de natura locuti sunt, dixerunt tale humidum aqueum habere saporos qualem saporos habet terra per quam transit. Et hoc manifestum est in amaris aquis maxime, et in eis quæ sunt juxta mare, quæ sunt salsæ. Sals enim est quædam species terræ, sicut dictum est in tertio *Meteororum*. Similiter autem aquæ per cinerem colatæ, faciunt amarum saporos ipso cinere per quem colatæ sunt amaro existente. Sunt etiam fontes multi, quorum quidam sunt amari, quidam acuti, alii vero omnimodos recipientes saporos secundum diversitatem terræ per quam transeunt. Sapor igitur fit in humido aqueo passo a quodam sicco terreo. Rationabiliter autem etiam in plantis est genus saporos : maxime quia planta habet quasi omnes vires a terra : et sic iterum siccum terreum humidum plantarum facit pati ad saporos : humidum enim habet pati a suo contrario, quemadmodum omnia alia quæ patiuntur.

Contrarium autem humido aqueo est siccum, aut prout est in igne, aut prout est in terra. Ignis autem natura est sicca sicut est terræ : sed tamen magis proprium ignis est calidum esse quam siccum : et terræ proprium est siccum esse magis quam frigidum, sicut in secundo *Peri geneseos* de elementis dictum est. Secundum autem quod ignis et terra ni-

hil posunt agere vel pati : quia in hac consideratione substantiæ sunt non habentes contrarium activum et passivum : sicut autem nihil omnino est agens vel patiens, sed potius secundum hoc quod contrarietas inserta est in eis : sic enim omnia agunt et patiuntur. Oportet igitur nos dicere, quemadmodum illi qui lavant aliqua colorata corpora vel saporosa in humido aqueo, talem faciunt aquam in qua lavant habere saporem et colorem, qualem lavant a corpore colorato vel sapido : sic facit etiam natura humidum aqueum habere saporem ipsum per siccum terreum, et movens decoquens ipsum per calidum : sic enim calido movente et decoquente et sicco alterante per quod coloratur, facit natura ipsum humidum quale quid secundum sapes. Passio autem quæ fit in humido a prædicto calido ignis et sicco terræ, est saporis natura. Gustus autem virtute et potentia alterabilis est per operationem et actum ab hujusmodi sensibili quod sapor vocatur : sensibile enim ducit ad hunc gustum qui ante hæc virtute et potentia talis, ut sapor fuit præexistens quando gustus suscepit ipsum : hoc enim oportet ex quo sensibile est agens, et gustus et alii sensus patientes. Non enim dicimus sensum secundum extra mittere et dejicere sensibilem virtutem ad id quod sentitur, sed potius secundum intra suscipere formam sensibilem. Sicut autem dicimus, quod non omne humidum est subjectum saporis, sed complexionale et nutrimentale : ita nec omne siccum est quod est agens in humidum et facit saporem in ipso, sed complexionale et commixtum. Et ideo etiam non omnis terra per quam colatur aqua dat ei saporem, sed potius ea quæ commixta sunt, ut sulphur, auripigmentum, et hujusmodi : et ideo sicci nutritivi sapor est passio in humido colato per ipsum. Et ideo hinc ab ista consideratione saporis oportet accipere, quoniam nec humidum absque sicco, nec siccum absque humido proprium est saporis subjectum. Esca enim sive nutrimentum neque

ipsis animalibus est aliquid, nisi sit utrumque commixtum. Cum igitur sapor sit passio et qualitas nutrimenti, oportet quod sapor sit ex utroque.

Amplius autem oblatis cibi animalibus quibus cibantur, sunt illa de numero tangibilium et sensibilium quæ augmentum faciunt et detrimentum : oblatum enim ad escam nutrit secundum quod gustabile, sicut sæpe dictum est. Cujus signum est, quod omnia nutriuntur dulci simplici vel commixto. Quando enim dulce cum aliter sapientibus commixtum est, natura tamen trahit dulce, et rejicit amarum : sed quibus nutriuntur animalia, determinatum est secundum quod oportet in secundo de *Generatione* : sed hic dicendum est de ipso in quantum necesse est ad hanc materiam quam modo tractamus.

Calidum enim active augmentat et struit et terminat digerendo et decoquendo nutrimentum, quo præparato leve quidem trahit natura, quod equidem dulce est, quia est calidum et humidum. Amarum autem et salsum quod grave et terrestre est, rejicit et relinquit : cujus causa est, quia terrestre est et non est natum suscipere formam ejus quod nutritur, neque moveri ad ipsum, et cum calidum in ipsum fumat et exsiccat plus, et plus aduritur : humidum autem aqueum vel aereum influit membris, neque fumat calefactum, sed potius eliquatur et terminatur ad formam et speciem membrorum suscipiendam. Quod enim in exterioribus corporibus facit exterior calor ignis vel solis, hoc in corporibus animatis animalium et plantarum facit calor naturalis et digestivus. Videmus autem quod exterior calor elevat et attrahit subtile et leve quod est dulce, et grossum terrestre relinquit incendendo ipsum. Hoc igitur idem faciet calor digestivus animalium.

Ex quo patet, quod ea quæ nutriuntur, dulci nutriuntur : propter quod etiam poetæ secundum fabulam cantantes physica, dicunt deos conversantes inter duos tropicos potari nectare : quia ibi planetæ

semper discurrentes elevant subtile ex stagnis et paludibus maximis, quæ sunt sub æquinoctiali, quo Ægyptii dicebant nutrirî cœlestia.

Licet autem omnia dulci nutriantur quæ nutriuntur, tamen in nutrimento exterius præparato alii sapes commiscuntur : sed hoc fit per condimentum. Acutum enim et salsum condiunt cibum : sed dulce solum est, propter quod animata attrahunt cibum. Sed cum nutrimentum sit multum dulce, tunc propter levitatem enativum est, et repletionem facit, et appetitum tollit, et abominationem facit antequam sit saturitas ad sufficientiam nutrimenti : et idem oportet quod misceatur gravi cum quo descendit, et inferiora ventris replet, ut ex vacuitate superioris orificii stomachi desiderium ad cibum excitetur. Conditur autem ut frequenter acuto vel salso, quoniam illi sapes penetrant linguam, et tollunt fastidium.

Sic igitur colligitur ex omnibus antehabitis, quod sapor est in humido complexionali aqueo sicut in subjecto, sicut color est in diaphano terminato, et quod sapor sit agente calido digestivo et naturali complexionali, sicut color actu luminis movet visum, et quod sapor est passio facta in humido a sicco complexionali, sicut color est quoddam esse luminis in corpore terminato. Cum autem dicitur, quod est sicca passio, non intelligitur quod sit passio sicci permixti per substantiam cum humido, sed potius est humidum in quo est virtus sicci : et ideo esse saporis est simplex. Licet enim humidum sine sicco sibi permixto non nutriat, non tamen subjectum saporis est siccum, sed humidum : et esse saporis in ipso est alteratio humidum per sicci virtutem calido agente et terminante : frigidum autem non operatur ad sapes nisi per accidens, cum vaporabiliter diffunditur humidum sapidum in cibo : et propter hoc sapor ejus non est adunatus : per frigidum enim constringitur humidum ad centrum, et

tunc adunatur sapor, sicut diximus in quarto *Meteororum*.

CAPUT VII.

De numero mediorum saporum, et de generatione eorum, et quare sunt septem.

Quemadmodum autem supra diximus, quod colores medii generantur ex commixtione albi et nigri : ita et sapes generantur ex dulci et amaro qui sunt extremi inter sapes, sicut infra ostendemus : et generantur medii sapes secundum proportionem ad extremos in eo secundum quod magis et minus propinquus est extremo unusquisque eorum, sive hæc proportio fiat secundum numeros commixtionis et motus, sive fiat indeterminate secundum abundantiam tantum et defectum.

Omnes autem qui delectationem faciunt in gustu et natura, hi sunt commixti in numeris. Cujus signum est, quod ars coquinaria et medicina quæ componit cibum ad delectationem et sanitatem, numerum et pondus attendit componentium. Secundum autem hunc modum considerando sapes, solus pinguis inter medios est quasi dulcis propter vicinitatem quam habet ad ipsum. Cum enim dulcis sit ex subtile in humido virtutem habens sicci, pinguis habet hoc fere : sed ex terrestre habet plus parum, in quantum viscositatem et lubricitatem habet quamdam, quæ est ex majori sicco tenente humi-

dum, quod tamen victum est ab humido subtili aereo. In altera autem parte salsus est juxta amarum : quoniam cum amarum sit in sicco combusto, ex defectu humidi salsus est in sicco combusto in humido : et ideo fere idem sunt illi et non distant nisi per majorem et minorem humidi defectum. Ponticus autem et acetosus et stipticus et acutus sunt in medio : sed stipticus et ponticus sibi invicem magis sunt vicini : quoniam stipticus causatur ex multo terrestri, quod propter calidi defectum non est subtiliatum : et ideo alteratur humidum complexionale ad modum terræ : propter quod terrestris est sapor ille, cui attribuitur cum eo quod habet de natura saporis exsiccare, propter multum terrestre quod in eo est. Stipticus autem est, qui est fortissimæ terrestitatis et exsiccationis. Acutus autem causatur ex calido complexionali nimis acuate terrestre siccum complexionale, non tamen incendente, nec comburente : tunc enim alterando humidum complexionale acuet ipsum : et ideo isti sapor a Galeno attribuitur calefacere et solvere. Juxta autem hunc est aeris sapor, qui causatur ex calido alterante siccum, quod alteratum alterat humidum ante complexionem et decoctionem completam per calidum : et ideo iste sapor est fructuum : et ideo etiam isti sapor, testante Galeno, attribuitur non calefacere, eo quod actio calidi in ipso non sit completa, sed attribuitur ei solvere solum. Sicut autem aeris est ante complexionem, ita acetosus est postquam ex acutis humidis evaporaverit calidum complexionale : ideo enim frigidæ substantiæ est, et tamen acutæ est actionis : quod accidit propter quasdam partes sicci combustas in ipso : propter quod dicitur quod acetum est hebes in substantia et acutum in actione.

Fere enim sunt æquales humorum

species et colorum : dico autem fere, quoniam cum ex pluribus constituatur sapor quam color, necesse est esse plures differentias saporum quam colorum : et hoc probat opus naturæ, quæ plures sapes operatur in plantis quæ sunt ejusdem coloris. Patet igitur quod diversitas complexionis plus variat sapes quam colores. Hujus autem rei vera causa est, quoniam in uno tantum quod componit corpora, invenitur color, hoc est, in diaphano quod non est corporum secundum quod complexionantur ad invicem, sed ex convenientia eorum cum perpetuo superiori corpore : sapor autem ex omnibus complexionantibus corpora constituitur.

Si quis autem velit considerare numerum sensibilium formaliter secundum quod discernibilia sunt per sensum, septem inveniet notabiles diversitates in eis. Quod sic probatur : quia sicut nos diximus in libro de *Anima*¹, ea quæ sunt in physicis corporibus, per motum fiunt in illis : motus autem cum in qualitate non sit nisi quale fluens : quale autem fluens sit inter privationem et habitum quæ sunt aliquo modo contraria : oportet quod medium de natura sit extremorum, eo quod motus non est nisi forma post formam, sicut ostendimus in tertio *Physicorum*² : « Elementa igitur prima omnium mediorum sunt extrema inter quæ est motus. » Licet autem in quolibet motu sint infinita fieri, sicut dictum est in sexto *Physicorum*³, non tamen sunt infinita in eo secundum actum accepta. Quæ autem æqualitate proportionales accipiuntur, secundum actum et numerum terminatum sunt accepta : non igitur sunt infinita. Si igitur sciamus quod proportionaliter accepta sensibilia sunt inter extrema, tunc sciemus numerum sensibilium cujuslibet sensus. Constat

¹ II de Anima, tract. III, cap. 5.

² III Physic. tract. I, cap. 4.

³ VI Physic. tract. II, cap. 7.

autem quod inter quælibet duo extrema inter quæ est motus alterationis, est proportio æqualitatis quæ est penes tantum habere de uno quam de altero. Est igitur penes unum medium accipere quo distat per æquidistantiam ab utroque extremorum : in nulla autem natura quæ secundum genus est una, est plus una proportione quæ est secundum æqualitatem : quoniam sicut unum est in numeris, ita æquale in proportionibus. Non igitur contingit accipere in aliquo sensibili unius sensibilis plus uno medio quam sit per æquidistantiam extremorum mediorum. Omnia igitur alia sunt intermedium hoc et alterum extremorum : aut igitur sunt inter medium hoc et extremum quod ponimus esse nigrum æquidistanter, aut secundum proportionem inæqualitatis.

Et dicamus medium æquidistans esse c, extremum autem unum esse a, et alterum extremum b, et accipiamus d inter c et a : aut igitur æquidistant utrique et proportionem habent æqualitatis ad utrumque, aut proportionem habent inæqualitatis. Si dicantur æquidistare : ergo tantum habet de c quantum de a. Sed medietas ejus quod est c fuit a, quoniam inter a et b c distabat æqualiter. Ergo hoc ipsum d partem a accepit de c, et accepit similiter ab a partem a : ergo per duas acceptiones appropinquat ad a, et non nisi per unam quæ non est pura, sed permixta : appropinquat ergo et c. Est igitur vicinum magis a quam b, et datum erat quod æquidistabat uterque. Patet igitur quod non est æquidistans medium accipere inter a et c, et eadem ratione non est æquidistans accipere inter c et b in uno sensibili. Oportet igitur quod non abundanti multum acceptione accipiat de c quam de a, si debeat fieri propinquius a : sicut si diceremus quod accipit quadruplum c quantum accipit de a, quando movetur de a in c : tunc enim efficitur vicinius c quam a : propter igitur abundantem proportionem constituuntur media inter

c et a. Si igitur abundabit a, erit vicinius extremo : et si abundabit c, erit vicinius medio æquidistanti : nec potest in genere magis multiplicari proportio inter duo quando est proportio inæqualium : non igitur erunt nisi duo media inter medium æquidistans et alterum extremorum.

Erunt igitur septem proportionaliter in genere accepta sensibilia, duo scilicet extrema, et quinque media : quorum unum sumitur proportione æqualitatis per æquidistantiam inter extrema : et alia duo per abundantiam unius extremi supra medium, et per abundantiam medii super extremum, et similiter residua duo inter reliquum extremum et æquidistans medium. Si quis autem in his proportionibus ad speciem et materiam descendat, erunt amplioris diversitatis : et ideo est quod quidem multo plures colores dicuntur esse quam septem, et novem dicuntur esse genera saporum vel plura : sed secundum formalem in genere acceptam proportionem impossibile est ultra septenum extendi sensibilium numerum et diversitatem. Et quia mediorum quædam sunt propinquiora extremorum alteri, ideo rationabiliter dicunt quidam lividum, quod *pallidum* vocatur, album esse. Esse enim albi quasi in proximo sequitur flavum, quod est subalbum, sicut sapor unctuosus sequitur dulcedinem.

Color autem puniceus et ille qui Græce dicitur *άλουργος*, quem nos *citrinum* dicimus, et viridis color, alii sunt in medio albi et nigri secundum dictas proportionem accipiendi : et alii sunt inter istos, quia inter medios vicinos extremum sunt alii medii viciniores medio secundum æquidistantiam accepto. Et sicut diximus quod nigrum est privatio albi in perspicuo, ita amarus plus et salsus minus sunt privatio dulcis : sed cum forma saporis sit passio facta a sicco in humido, in amaris est privatio materialis principii saporum, quia in amaris humidum complexionale evaporavit et remansit sicut terreum incensum et combustum :

et quoad hoc privative opponitur dulci. Quia autem effectus calidi in sicco combusto est aliqua qualitas, ideo formaliter contrarie opponitur dulci amarum, et materialiter ut privatio et habitus : et iste est conversus modus oppositionum quæ sunt inter album et nigrum, sicut patet ex superius dictis. Ex hoc dicitur, quod cinis combustorum omnium amarissimus est : eo quod totum humidum complexionale exhalatum est ex ipsis, et non remansit nisi siccum incensum.

CAPUT VIII.

De falsis opinionibus quæ sunt circa sensibilia.

Licet autem gustabile sit quoddam de numero tangibile, sicut diximus in libro de *Anima*, tamen Democritus et quidam alii Philosophi qui de sensibus et sensibilibus loquuntur, omnino incongruum faciunt tractatum. Dicunt enim, quod omnia sensibilia sunt tangibilia : etenim si concedatur hoc quod dicunt totaliter se habere sicut dicunt, tunc unusquisque aliorum sensuum est actus quidam. Quod autem hoc est impossibile, non est difficile discernere ex his quæ in libro de *Anima* dicta sunt. Peccant autem ad hoc Antiqui qui utuntur his quæ sunt communia sensibus sensibilia tamquam sint propria : et ideo hoc fecerunt : quia sensus sextus esset illorum. Magnitudinem enim et figuram et

asperum et lene faciunt tamquam propria sensata. Amplius autem acutum et obtusum quæ principaliter sunt in glebis terrestribus sunt communia sensuum, quia ad figuram reducuntur : et quamvis hic non ab omnibus æqualiter sensibus participantur, tamen tam visui quam auditui sunt communia : et de visu quidem non est dubium : de auditu vero etiam constat, quia acutus sonus et gravis ex figura percutientium causatur. Nos autem in libro de *Anima* determinavimus quibus sensibus et quæ sunt communia.

Quidam autem super propria sensata ad ista referunt sicut ad causam eorum, et non accipiunt media proportionaliter, sicut supra docuimus : sicut Democritus dicit album et nigrum causari : album quidem esse quoddam asperum, eo quod multum penetret visum : nigrum autem dicitur lene, eo quod visum lente movet. Similiter autem ad figuras refert sapes : et hujus causa est, quia ipse dixit nullam esse formam sensibilem omnino, sed videri eis ex compositione et ordine et situ atomorum diversas figuras habentium : et hoc dixit tangere sensum et perficere sensualitatem secundum actum.

Sic igitur tripliciter peccavit Democritus. Uno quidem modo, quia dixit communiter omnes sensus esse quosdam tactus : eo quod ponebat non fieri tactum nisi per figuras indivisibiles tangentes sensus. Alio autem modo, quia dixit communia esse sensata propria, et per ea sentiri quidquid sentitur. Tertio autem modo ea esse causas essentielles priorum sensibilium : et hoc quidem dixit Democritus, quamvis nullius sit omnia sensata communia deprehendere nisi solius visus : vel si alii deprehendant quædam, non omnia communia : tamen visus deprehendit ea maxime. Sic igitur sensibilia aliorum sensuum non debent dici deprehendi mediantibus communibus, nisi forte secundum Democritum in solo visu : quod tamen et ipsum falsum

est : quia in libro de *Anima*¹, probatum est, quod communia per consequens accipiuntur et proprie remouentur a sensibus particularibus.

Si ergo dubitatur secundum Democritum, quod gustus inter omnes magis sentit communia quæ sunt figura et magnitudo, quæ dicuntur causare sapes, et esse ipsorum actionem in gustum sapes : oportet igitur quod circa unumquodque genus figurarum sit discernere minimas differentias figurarum, et in exanimato sensu et perfecto : oportebit igitur, quod gustus etiam alia communia sentiat magis inter omnes sensus, quæ sunt magnitudo, et numerus, et sic de aliis : et oportet gustum esse secundum hoc discretissimum figurarum : et ad hoc sequitur demonstratio geometrica maxime perfici per gustum : quod absurdum est totum hoc.

Amplius omnia propria sensibilia habent contrarium, sicut in colore propria contraria sunt album et nigrum, et in sapore dulce et amarum. Figura autem figuræ non putatur ab aliquo esse contraria. Figuræ enim magis distantes sunt, quæ perficiuntur linea curva et recta : quia penes illam est quædam contrarietas in lineis terminantibus figuras. Circulus autem fit ex linea curva : polygoniæ autem omnes ex rectis : et tamen non potest dici cui polygoniarum figura constituta ex circumferentia sit contraria. Non ergo figura est proprium alicujus sensus sensibiliter. Similiter autem est de aliis sensibilibus.

Amplius autem figuræ potentiæ sunt infinitæ, non autem accipiuntur per formales proportionales, sicut supra diximus de sensibilibus, sed potius accipiuntur earum species ex numero angulorum. Cum autem numerus potentia crescat in infinitum per formales differentias, oportet quod etiam figuræ crescant in infini-

tum formaliter multiplicatæ per numerum angulorum. Sensibilia autem secundum Democritum formaliter in genere multiplicata crescant in infinitum. Constat autem ex superius habitis hoc verum non esse, cum a nobis sit hoc dictum de gustabili : sicut enim aliæ passiones saporum ex calido digerente causatæ per pempasim et epsesim vel optesim, et per indigestiones his contrarias, quæ propriam cupiunt habere solutionem in philosophia quam faciemus de plantis, eo quod vires plantæ sunt sicci terrei, cujus actio in humidum facit sapes.

CAPUT IX.

De medio et proprio subjecto odorum secundum genus.

Nunc vero eundem modum oportet intelligere etiam de odorum natura : quod enim facit in humido siccum complexionale in saporum natura, hoc vice versa facit in sicco humidum enchimum in alio genere sensibilibum quæ sunt odorum natura. *Enchimum* autem vocamus in Latino intrinsecum sive complexionale humidum, quod est radicale sive nutrimentale in rebus physice complexionatis. Chimus enim succositas cibi est sive alimenti : et ideo enchimum nutrimentum humidum alimenti vocatur. Scimus

¹ II de Anima, tract. III, cap. 5.

autem ex multis præcedentibus dictis, quod hoc est complexionale humidum alteratum a sicco et calido decoquente : et tunc convertentes sermonem dicemus, quod primum subjectum odorum in re odorabili est siccum passum et alteratum a tali humido vaporoso : tale enim siccum secundum actum est et nihil aliud est nisi specie resolutus ab hujusmodi humido : et hic spiritus subjectum est odorum primum. In aqua autem et in aere est tamquam in mediis et non tamquam in primo susceptivo. Ex quo autem est in utroque istorum elementorum sicut in medio, oportet quod illa duo secundum commune ad utrumque sint media odorum.

Dicamus igitur nunc quid sit commune aeris et aquæ secundum quod sunt medium odorum. Scimus autem quod id quod est perspicuum, est odorabile sicut medium, sed non secundum quod est perspicuum, quia secundum hoc est medium in visu : sed potius quod sunt humida lavabilia odorabilia et non mundabilia ab ipsis odoribus : si enim non essent mundabilia ab odoribus, non omnium possent accipere odorem. Si autem non essent quasi ablutiva odorum ab ipsis primis odorantibus, tunc non deferrent odores. Secundum igitur utrumque istorum, scilicet secundum quod sunt emundabilia et lavabilia, sic deferunt odores tamquam media.

Quod autem ambo ista elementa sunt media odorum, manifestum est ex animalibus habitantibus in utroque quæ odorant, scilicet pisces, et duripelia habitantia in aquis, sicut cancer, et alia quædam manifeste videntur odorare, eo quod a longe sentiunt cibum in tenebris, et in silentio nullo aere existente in aqua qui deferat eis odores : aer enim odores non defert nisi quando est purus et secundum actum existens. Si autem talis esset in

aqua, ipse supernataret, eo quod levis est in aqua, sicut in *Cælo et Mundo*¹ est probatum. Non igitur salvatur in aqua aer qui deferat odores animalibus. Nec potest dici quod attrahant eum de extra aquam et postea odorent in ipso, quia talia animalia non spirant : non autem possent attrahere aerem nisi per respirationem. Si quis igitur ponat aquam et aerem utraque humida esse secundum naturam, et ideo lavabilia et mundabilia, oportet quod utrumque eorum sic sit medium horum, et erit tunc utrumque id enchimi sicci quod est in humido lavabili et mundabili sicut in medio alterato ab ipso naturaliter odor. Odorabile autem sive odoratum quod est sensus odoratus, erit virtute vel potentia tale quale secundum actum est medium ab odorante primo alteratum.

Quoniam autem sicut tale non est nisi spiritus humidi complexionalis, oportet quod omnis odor sequela quædam sit et passio nutrimenti, et similiter est sapor : sed sapor sequitur immediate, et odor mediante humido saporoso, sicut patet ex prædictis. Hoc autem manifestum est per inductionem tam in non habentibus odorem quam in habentibus : elementa enim non sunt odorabilia, eo quod nec humidum nec siccum habent complexionalia, veluti ignis, terra, aer, et aqua : sicci enim spiritus resoluti ab ipsis sunt achimi, hoc est, ab humido nutrimenti saporoso non resoluti : nisi forte commixta in quibus cum dominantur simpliciora, forte faciunt odorem, et ideo maxime habet odorem. Constat enim quod habet saporem salsum, et habet siccum spiritum ab ipso resolutum, et ille in primo est subjectum odorum in re odorabili. Similiter autem ex eadem causa sal magis odorabile est quam nitrum : sal enim humidius est nitro, et ideo resolubilius in spiritum odorabilem. Hoc autem manife-

¹ IV De Cælo et Mundo, tract. II, cap. 2.

stat, quia oleum exit ab utroque, scilicet tam sale quam nitro : sed nitrum terrestrius est quam sal : et ideo non quidem est inodorabile, sed minus odorabile est quam sal : et plus effluit olei de sale quam de nitro. Hoc autem artificium est in alchimis : quoniam si ad ignem lentum ponatur sal vel nitrum in vase quod sic taliter aptatum sicut id per quod stillatur aqua rosacea, tunc primo distillat aliquid aquæ, quæ si in tanto lento igne valde distilletur, distillet tamen aliquid olei inde : hoc autem non distillaret ab eis nisi haberent aliquid saporosi humidi spirantis siccitatem odoriferam. Sunt igitur talia odorabilia propter hanc causam.

Amplius autem lapis terreus durus non unctuosus est non odorabilis, eo quod ipse est achimius, hoc est, sine chimo conglutinatus. Ligna autem universaliter sunt aliquid odoris habentia, eo quod sunt enchimia : inter ligna autem aquatica ligna sunt minus odorabilia : quod contingit propter lignorum talium frigiditatem, quæ impedit pati humidum enchimum a sicco complexionali : et ideo insipida, et minus odorantia inveniuntur.

Amplius in eis quæ metallantur per artem et in metallorum sunt genere per naturam, aurum minus est odorabile omnibus aliis : cujus causa est, quia nimia subtilitas terre et humidi, et optima permixtio eorum non sinit unum pati ab alio aliquam transmutationem : et ideo remanet humidum sicco permixtum, et non enchimum. Æs autem et ferrum quia non bene commixta sunt, habent humidum et siccum : habent ea passibilia ab invicem : et ideo efficitur eorum humidum enchimum : et ideo odorabilia sunt plus omnibus aliis metallis. Argentum vero et stannum magis sunt odorabilia auro et lapidibus, sed minus quam æs et ferrum : et hoc contingit quia media sunt

inter ea, et sunt aquatica plus quam ferrum et æs : et ideo impeditur passio humidi sicut in plantis aquaticis.

CAPUT X.

De errore quorundam dicentium, quod odor est evaporatio fumalis.

Ex his autem quæ diximus de primo et proprio subjecto odorum, visum est quibusdam quod odor sit fumalis evaporatio, et quod nusquam sit odor in medio nisi aliquid sit ibi substantialiter fumalis evaporationis : et hoc quidem in libro de *Anima* ¹ probatum est : hic autem ad hoc volumus inducere demonstrationem.

Ponamus autem in primis positionem eorum. Dicunt igitur isti, quod odor est fumalis evaporatio, et non qualitas generata in aere ab eo quod fumaliter evaporat : dicentes hanc evaporationem communiter esse terre corporis et aquei : quia, sicut diximus in scientia *Meteororum* ², illa sola duo elementa evaporant : dicunt autem isti hanc evaporationem esse aeris sicut in quo diffunditur ipsa evaporatio. Super hanc autem positionem sustentantur omnes loquentes de natura odoris. Unde Heraclitus utique tale verbum dicit, quod si omnia entia fiant fumus, quod omnia erunt odorabilia et nares discernent odores eorum. Sic igitur

¹ II De Anima, tract. III, cap. 25.

² I Meteororum, tract. IV, cap. 3.

tur omnes physici odoris naturam asserunt esse aut exhalationem quæ fit vapore aqueo, aut evaporationem in qua est vapor terreus, aut utraque ista.

Quod autem nullum istorum verum sit, videtur quod chimus odoriferus est humiditas quædam complexionalis : fumalis vero evaporatio communiter est terræ et aeris : terræ autem est sicut medii, aeris vero sicut loci et medii per quæ diffunditur : et evaporatio fumalis large sumpta non vaporat nisi ex aqua et terra : et hoc patet quia quando resolvitur ad materiam unde sumitur, non tunc constituitur terra ex vaporatione fumali terræ, sicut patet in fumo ignis qui generat fuliginem : ex evaporazione autem aquæ constituitur aqua, sicut patet in aqua fumante in olla cooperta. Horum autem neutrum videtur odorum : chimus enim odoriferus in aqua est effundens odorem : fumalis autem vaporatio numquam est in aqua secundum actum.

Quod autem odor in aqua sit, patet ex hoc quod dictum est prius, quod animalia odorant in aqua. Amplius autem evaporatio secundum similitudinem dicitur esse sicut hujus et illius quod est terræ secundum Antiquos et aquæ : et si evaporatio terræ quæ est fumus, non bene dicitur in aqua esse, tunc nec evaporatio terræ vel aquæ potest esse in aqua secundum actum : humidum enim aqueum frigidum restringit vaporativum siccum. Non autem immanifestum est, quoniam utrumque humidum tam illud scilicet quod est in spiritu, hoc est, in aere, quam illud quod est in aqua secundum quod utrumque est medium odorum : oportet enim pati et recipere odorem qui est ab enchimia siccitate : tam aer enim quam aqua deferunt odorem sicut medium odorum : aer enim humidus est secundum materiam, et non immanifestum est ex physicis quod odoriferum similiter agat, et facit in humidis elementis, et in aere in quo est spirituale humidum, quemadmodum agit et facit in humido odorem suum lavatum in ipso siccum enchimum :

aqua enim in qua lavatur odoriferum, fit odorifera. Odor igitur est in aqua secundum actum : odor igitur non est evaporatio fumalis. Nec aliquis nos arbitretur contraria nobis dicere : quia diximus supra quod odor est in sicco vaporativo sicut in subjecto primo, in quo est secundum esse materiale, sed in medio est secundum qualitatem simplicem odoris et secundum esse spirituale. Heraclitus autem et sui sequaces dixerunt ipsam qualitatem et essentiam odoris esse fumalem evaporationem, et nusquam esse odorem nisi secundum esse fumalis evaporationis, quod hic demonstravimus esse falsum, sicut patet ex dictis.

CAPUT XI.

De proportione odorum ad saporis, et de numero odorum.

In accipiendis autem speciebus odorum attendendum est, quod oportet species odorum esse proportionales saporibus qui causantur ex illis : hoc tamen non generaliter est verum. Causa autem est, quia præcipue saporis frigore causati, ut ponticus, et stipticus, non in omnibus, sed in quibusdam rebus adveniente calido vaporativo, amplius digeritur humidum quod est in eis : et ideo cum vaporat, melior est odor ejus quam sapor : quia resolvitur ab enchimo magis decocto. In quibusdam autem magis grossis et viscosis a quibus non separatur pars humidi magis digesti, sed magis vaporativi ab

ipso humido complexionali, remanet proportio odoris et saporis : et invenimus odores nominibus saporum nominatos, ut sunt odores acetosi, et dulces, et acuti, et pontici, et crassi. Et aliquis diceret forte, quod odores putridorum putrescentes proportionales sunt saporibus putridorum : et hæc causa est dicta in quarto *Meteororum*¹ : putrida enim sunt vel colore naturali combusta, et ideo sunt primo exterius humida et tandem arida : et sic incinerantur sicut combusta : oportet igitur, quod amara sint hujusmodi sicut et cinis combustorum. Cum igitur odor sequela sit saporis et præcipue saporum ex calido causatorum, oportet quod odor putridorum, sicut stercorum, et cadaverum, proportionetur saporis amaro : et ideo consequens est, quod sicut putrida divisibile habent humidum quod potatio vocatur ad gustum : ita etiam putrea sive putrentia vel fœtentia ea quæ desiccata sunt in diversa fœtentia, quia jam resolvuntur et discontinuantur : et ideo sunt pentea quæ abominabilia vocantur.

Ex his omnibus manifestum est, quod sicut sapor est in aqua sicut in medio per quod pertingit ad gustum : ita in aqua et aere tamquam in mediis est olfactus : et odor fit ex partibus ipsius odoriferi per calidum vaporativum : et propter hoc frigus et conglutinatio restringunt tam saporis quam odores, sed hebetant saporis, et destruunt omnino odores : quia humidum enchimum constringitur per frigus, et per conglutinationem retinetur virtus : et ideo cum non det saporis nisi quando est in actu fluens, hebetatur sapor a frigore et conglutinatione : odor autem qui fit per calidum quod movet et generat odorem ex odorabili, in medio aufert quidem frigus, et restringit intus conglutinatio fortis in partibus rei odorabilis. In omnibus ergo aliis sensibilis motus est per se de contra-

rio ad contrarium per media determinata in septenario numero secundum numerum proportionum in genere, quæ alio modo potentia sunt infinita, non actu, sed solum secundum abundantiam et effectum, sive forma proportionis media accipiuntur : sed in odoribus motus est de contrario ad contrarium per hoc quod motus est in saporibus : et ideo generatio odorum est sicut finis generationis saporum.

Quod autem nos diximus media potentia esse infinita quando sine proportione accipiuntur, hoc modo est verum, secundum quod probatur in sexto *Physicorum*² infinita esse facta in quolibet fieri, et infinita fieri in quolibet esse, et ante quolibet factum : et ideo ubicumque sunt motus sensibiles ut dicantur fieri ibi actu, necesse est constitui unum sensibile medium. Propter quod dicit Alfarabius et Averroes consentit, quod medii colores et alia sensibilia media sunt infinita : non enim omnia secundum diversitates proportionum naturalium accipi possunt : quia multæ proportionum sunt in continuis, quæ nullo modo sunt in numeris. Adhuc autem multiplicatio continuorum sibi non sunt proportionabilia nisi secundum abundantiam indeterminatam et defectum. Ad numerum igitur mediorum saporum necesse est concordare ut in pluribus medios colores : et in quibus non concordant, erit propter causam supra inductam.

¹ IV Meteororum, tract. I, cap. 7.

² VI Physic. tract. II, cap. 7.

CAPUT XII.

De duabus speciebus odorum, et quare una earum est omnibus propria?

In genere autem considerando odores in relatione ad olfactum, duæ sunt species odorum in consideratione ista. Cujus causa est, quia quidam habent delectabile et triste, non propter se, sed propter aliud: et ideo delectabile et triste est in eis non in quantum odores sunt, sed in quantum judicant quiddam de sapore nutrimenti, nec quærentur nisi propter escam: alii autem odores sunt quæsi propter se in quantum odores sunt, et non sunt relati ad escam, sed delectabile et triste habent in seipsis. Quod enim dicunt quidam, quod hæc secunda non sit species odorabilis aliqua, non est verum: sed oportet determinare quomodo est species odorabilis, et quomodo non est species ejus.

Unum enim genus odorum est in ipsis ordinatis saporibus, sicut prius diximus: et hoc est quod delectabile triste habet non in quantum est odor, sed secundum accidens, quia est iudicium convenientis vel inconvenientis alimenti. Et quia odor est quædam passio et qualitas ejus quod nutrit alimenti, ideo tales odores optantibus, id est, esurientibus et desiderantibus cibum sunt delectabiles: et ideo esuriens odore carniarum, et vapore coquinarum delectatur: qui tamen odor secundum se non est delectabilis. Cujus

signum est, quia plenis et saturatis et non indigentibus cibo non est delectabilis, sed abominabilis. Si autem habuisset hic odor secundum se delectabile, et esurientibus et saturatis esset delectabilis: et isto quidem modo quæcumque delectabilia sunt, habent odores absque esca, ita scilicet quod non judicant nutrimentum conveniens vel inconveniens hac specie odoratus, nec delectabiles, nec tristes sunt. Iste igitur quidem odor propter cibum solum desideratus, non habet delectabile et triste nisi secundum accidens: et ideo quia omnium animalium est nutriri, oportet hanc speciem odoratus esse causam omnibus animalibus.

Quidam enim odorum in alia specie sunt odorabiles, quorum delectabile triste nullo modo quæritur propter escam: quia ipsa odorifera a quibus resolvuntur, non sunt esibilia, sicut sunt odores florum, rosarum scilicet et violarum et hujusmodi: isti enim non magis vel minus consequuntur escam et saporem ejus, nec conferunt ad desiderium cibi quod est fames, sed potius contrarium: et hoc quando sentiuntur de prope, quia tunc per vaporem ingrediuntur in corpora: qui vapor officina venarum replet, sicut ex repletionem fit, quod cibum non desiderant: et ideo est iste unus modorum attenuandi eos, quorum natura gulosa est et famelica. Quod autem ista nihil faciant ad cibi appetitum, sed ad contrarium, patet ex hoc quod si sint multa aromatica, impediunt cibi appetitum et generant fastidium, quando cibus conditur per ea. Propter hoc Tracius coquum suum Euripidem vituperans, præceptum dedit dicens, « Non infundas miron in lente, quando decoquis eam: » est enim *miron* confectio unguenti odoriferi ex balsamo et oleo, sicut dicit Dionysius Areopagita, et odoriferum et aromaticum balsamit tollit appetitum et generat fastidium: et ideo lentes Tracio inesibiles factæ fuerunt ex condimento.

Si quis autem nobis objiciens dicat,

quod multi antequam bibant, miscent aromata, et tales virtutes odorum secundum se delectabiles sunt ad potationes suas, ut quando fit vinum conditum, vel claretum rosatum, vel alio odore conditum : et sic videtur non tollere desiderium, sed augere. Dicimus quod illa non augent desiderium, sed potius faciunt vim ad virtutem compositam delectationis donec a duobus sensibus, scilicet gustu et odoratu perficiatur delectatio per usum talis potus, sicut in sensibus efficitur delectatio ab uno illorum sensibilium : et etiam quando mixtum est, quæritur in eo delectatio propria odori, sicut quando est simplex. Si enim non quæreretur propter odorem delectatio, tunc per ipsum potus non condiretur : quia forte absque condimento magis est desiderabilis secundum naturam in potum.

Istud igitur odorabile propriam habens, ut diximus, delectationem, proprium est homini : odores autem ordinati et proportionati saporibus, sunt communes omnibus aliis animalibus, sicut dictum est prius : et illis quidem, eo quod secundum accidens habent delectabile : accidit etiam dividi in species proportionatas et nominatas secundum saporibus. Istis autem qui proprium habent delectabile, nequaquam dividi accidit in tales species : et hoc contingit ideo quia natura eorum secundum seipsam est delectabilis vel tristis : propter hoc et odores tales dicuntur aromatum vel fœtidorum. Causa autem propter quam hominibus tales odores sunt delectabiles, est propter frigus quod specialiter homo habet circa cerebrum. Homo enim inter omnia animalia respectu quantitatis sui corporis majus habet cerebrum propter multas operationes ipsius animæ quæ sunt in ipso plus quam in aliis animalibus. Cerebrum autem de natura sua frigidissimum est, sicut in libro de *Animalibus* dicitur ¹. Sanguis enim qui est in

venis circa cerebrum existentibus, et nutrit cerebrum, subtilis valde : et quia subtilis est, citissime est infrigidabilis a frigore cerebri : ad cerebrum autem continue elevatur fumus cibi a loco digestionis : et quando est in capite, resolvitur sicut fumus in olla cooperta : et tunc redit in phlegma quod si in cerebro infrigidatur, reuma efficitur defluens a capite quod influens pectori et spiritualibus, facit diversas infirmitates in hominibus, in quibus nullum est de cerebro infrigidante : et cibus ejus subtilior est et de facili infrigidabilis est. Species autem odoris quæ habet delectationem per se, facta est ei adjutorium sanitatis : nullum enim aliud est opus ei in homine quam istud : istud autem opus facit natura sua manifeste : cibus enim qui delectabilis est, sive sit siccus, sive sit humidus, multoties propter dictam causam facit infirmitatem.

Et quamvis Galenus et alii Auctores tradant reuma fieri et ex calida causa et ex frigida, non habet instantiam hoc ad id quod diximus : ex calida enim causa numquam fit per se, sed quandoque per accidens si cerebrum ab aliquo sit calefactum accidentaliter : et tunc calore suo de stomacho nimis trahat humidum, ita quod trahendo nimis oppilat venas et obruit seipsam : et tunc non juvatur calore, sed infrigidatur et fit reuma. Patet igitur, quod semper fit reuma frigore sicut ex proxima causa : operatio autem quæ est ab hujusmodi odore qui de se est odoriferus et delectabilis est quasi semper utilis, qualitercumque etiam se habeat natura odorantis : quia licet etiam odoriferum sit frigidæ complexionis, quemadmodum camphora vel rosa, tamen infundens odorem est calidum : et hujusmodi virtute omnis odor secundum actum est calidus : et ideo temperativus excellentiæ frigiditatis in capite.

Et hæc est causa quare natura dedit

¹ XII de Animalibus, tract. II, cap. 3.

homini per aspirationem accipere odores : hoc enim non omnibus convenit animalibus, sed hominibus : et multum sanguinem habentibus terrestribus, velut quadrupedibus, et his quæ magis participant naturæ aeris, sicut faciunt aves quæ leves et aereæ naturæ multum sunt. Si enim odorare non esset hominis nisi secundum delectabile cibi, tunc odor alteratus cum cibo in stomacho non per seipsum attingeret cerebrum, et sic pertingeret in humido cymballari, et sic præstaret nocumentum et non sanitatem : nunc autem in spiritu aereo pertingit ad cerebrum, et calidate sua et siccitate, et similiter siccitate aeris in quo attrahitur, præstat cerebro adjutorium : ascendentibus namque odoribus hujusmodi ad cerebrum et tangentibus illud propter levitatem caloris qui est in illis, sanius se habere facit quemcumque hominem circa hunc locum : odoris namque unius natura calida est, sicut dictum est supra.

Ex his autem quæ dicta sunt in libro de *Anima*¹, constat quod natura utitur inspiratione duobus usibus sive utilitatibus, quarum una est operosa et necessaria omnibus his animalibus quæ spirant, quæ est inspiratus et frigidus aer sicut odorantis, et aliorum spiritualium adjutorium refrigerationis et præcipue cordis, quod motu et calore suo aliter intenderetur. Alia autem est ut adventitia : quia non operatur ex spiritu solo attracto, sed operatur ex eo quod advenit spiritui sicut ex odore qui est in spiritu sicut in medio : et hic est usus odorandi. Quando enim exhalat in spiritum aliquid odoris sicut adventitium quid veniens in spiritum, statim spirando facit fortem per nares motum, sicut nos videmus, quod animalia spirantia sicut canes et animalia quæ sentiunt odorem, statim fortiter trahunt spiritum ut odorem discernant : hoc enim genus odorandi ma-

gis proprium est hominibus, eo quod et plus de cerebro habet homo proportionem suæ quantitatis, et habet ipsum humidius aliis animalibus spirantibus respectu suæ complexionis.

Et hæc enim causa est, quod hoc animal quod est homo, per seipsum acceptum differenter sentit et acceptat odores omnibus aliis animalibus, et solum gaudet florum et talium aromaticorum odoribus. Et hæc causa est quæ dicta est, quod scilicet talium calor in odoribus temperatus est et siccus : et temperatus motus ipsorum quo temperante alterant cerebrum, est quoddam temperamentum in siccum ad hyperbolem, hoc est, excessum frigiditatis et humiditatis quæ est in loco capitis, et maxime in anteriori parte ejus quæ est plus medullosa et humida quam posterior propter multitudinem sensuum qui sunt in anteriori parte capitis. Causa autem omnium horum in libro de *Animalibus*, ubi de homine agitur, determinabitur. Aliis vero animalibus quæcumque habent pulmonem, dedit natura anhelitum propter spirare solum, quibus etiam natura dedit sensum alterius odoris : non enim habent nisi illum qui habet delectabile per accidens quod est in cibo. Non enim oportuit quod illa animalia aliter attraherent odores quam per respirationem, quia natura non facit duo ubi sufficit unum : et ideo cum odoratus et anhelitus possunt effici per unum, complevit utrumque per respirationem : sicut enim sufficit hoc unum ad tria in hominibus, quæ sunt refrigerium pectoris, et perceptio cibi per odoratum habentem delectabile cibi, et ad sanitatem per odorem qui secundum se appetitur : ita sufficit his animalibus ad duo inspiratio quæ sunt refrigerium pectoris, et odoratus cibi. Aliquorum enim animalium ab homine horum solorum odororum est sensus.

¹ II de Anima, tract. III, cap. 23 et melius 26.

Objectio. Si quis autem objiciat, dicens, quod non potest esse quin odor calidus et siccus horum animalium cerebrum attingat et alteret : cum igitur circa cerebrum eorum non sit hyperbole frigiditatis et humiditatis, nocebit odor talium capitibus, ut videtur. Sed ad hoc dicendum, quod cum talia animalia non delectentur odore secundum se, non multum attrahunt odorem, sed raro : et ideo non læduntur : homo autem etiam non juvaretur ex modico odore, sed potius ex eo quod delectans in talibus multum et sæpe attrahit odorem. Cum enim parum calidus et siccus sit odor et sit spiritualis, non multum alteraret hyperbolem totius frigiditatis cerebri, nisi multum et sæpe attraheretur.

Solutio.

ad cibum et in tenebris : et tamen pisces non respirant sicut nec minuta animalia quæ pectus non habent et sentiunt. Igitur ista non propter aliud nisi propter illam speciem odoris quam diximus nutritivam, eo quod est alimenti, quam sentiunt aliquantum multum remota a propria esca. Odor enim diffunditur ad magnam distantiam et occurrit animalibus in aere, ut apibus, et vespis, et hujusmodi, quæ longitudine magna distant a cibo quem per odoratum prosequuntur : ita enim licet non adeo longe ut apes et perparvarum formicarum genus videmus moveri ad escam : et hoc modo de genere marinorum sentit odorem animal quod vocatur *purpureus* : habet hoc nomen, eo quod sanguine suo purpureo tingimus, vel quia purpuræ assimilatur : et multa aliorum talium animalium non spirantium acute et diligenter et longe sentiunt escam propter solum odorem : et hoc manifestum fit, quia sentiunt odorem : non tamen adeo manifestum est quo instrumento, vel quo modo sentiunt.

CAPUT XIII.

Quod odoratus non spirantium ejusdem rationis est cum odoratu spirantium.

Quod autem ea animalia quæ non spirant et sunt perfecta sensu ejusdem odorabilis, habeant quod odorant, et cujus habent sensum etiam spirantia, manifestum est : etenim pisces et animalia quæ atoma sunt, eo quod propter sui parvitatem, anatomie divisione dividi non possunt, diligenter sentiunt odores. Cujus signum est, quod a longe moventur

Et ideo si quis objiciens contra ea quæ diximus, quærat quo modo vel quo instrumento tale animal sentit odorem, dicens sic, quod sic spirantibus quidem omnibus sit solum odorare, eo quod odorare sit solummodo accidens spirantibus propter attractionem qualitatis aeris cum aere attracto : nullum autem talium animalium spirat : tunc sequitur quod sentiunt odores per odoratum, quia non est ejusdem generis cum sensu odoratus spirantium : et sic sentiunt sexto sensu qui est propter quinque determinatos in libro de *Anima*¹. Hoc autem est impossibile. Quibuscumque enim unum accidentium specie propria infert passionem, horum potentie passivæ sunt ejusdem rationis. Constat autem quod odor est unum accidentium inferens passionem

¹ II de Anima, tract. III, cap. 26.

olfacientibus quæ odorabilia animalia vocantur. Igitur odoratus ipsorum est huius rationis quoad odorum perceptivam potentiam. Licet igitur specie sentientium differat odoratus secundum differentiam odorantium, tamen ipse odoratus secundum quod est potentia passiva et perceptiva odorum, est unius rationis potentia, sicut et visus.

Sed forte non eodem modo fit odoratus spirantibus et non spirantibus : sed animalibus exhalantibus per anhelitum quamdiu spirant, tunc spiritus aufert ex vehementia motus velamen superjacens super organum odoratus : sicut si auferatur cooperulum quoddam ab aliquo cooperato. Et hæc causa est, quod minime sentiunt odores non spirantia : et causa huius est, quia velamen non auferitur operiens organum olfacienti, sicut dictum est in secundo de *Anima*¹ : et subtilius ista in *anatomia animalium* tractanda erunt. Animalibus autem quæ non spirant, hoc velamen ablatum est per naturam : cujus causa est, quia talia animalia sine sanguine frigida sunt : et expedit eis ut occurrat eis per seipsum temperate calidum semper : propter quod etiam talia animalia frequenter tempore frigido non moventur ad aerem, nisi multum habeant cerebrum remotum ab odoratus organo, sicut habent pisces : si enim aqua attingeret cerebrum, morerentur : propter quod cerebrum multum in posteriori parte capitis talium animalium natura collocavit, et ante posuit sibi ossa et pelles et squamas ad protectionem : et odoratus talium per nervos perficitur in anteriori parte nasi.

Hæc autem differentia animalium, scilicet odorare, similis est quodammodo animalium differentia, scilicet videre per oculos : quædam enim animalium palpebras habent quibus non apertis et revelatis non accidit eis videre, et sunt

omnia sanguinem et molles oculos habentia : animalia vero quæ duros oculos habent, non habent huiusmodi palpebras : et ideo etiam non egent aliquo modo motu et motore qui revelet eis oculos : sed accidit eis videre a facultate naturæ, quæ statim existit in eis sine aliquo opere motus et moventis, quod aliquid ab oculis removeat. De hac autem differentia animalium satis in libro de *Anima* dictum est : et ideo sicut nos non dicimus diversa ratione diversam potentiam visus esse in habentibus oculos apertos, et in non habentibus operculum super idem.

Si autem iste modus diversus non diversificat potentiam perceptivam odoris secundum quod operatur ad odores : ita nec illa de qua prius dictum est, quod scilicet quædam animalia non accipiunt odores nisi per accidens delectabiles : et ideo accipit homo hos et illos qui per se sunt delectabiles : omnium enim ab homine aliorum animalium nullum indignatur vel fugit odorem eorum quæ de se sunt de numero fœtidorum : et talia sunt quorum delectabilis est odor per se non relatus ad cibi convenientiam, nisi forte ita excellat odor, quod venenosus vel corruptivus sit cerebri propter nimiam sui caliditatem et siccitatem : et hoc fit quando cum vapore grosso et forti et mortifero diffunditur. Diximus enim in libro de *Anima*², quod omne excellens sensum corruptivum est, eo quod sensus est quædam sensibilibus harmonia : a talibus enim omnium eodem modo corporum patiuntur aliorum animalium capita, sicut homines a fumo et vapore carbonum patiuntur gravedinem capitis : eo quod siccus nimis et grossus est talium vapor. Et huiusmodi causa temperantur carbones infusione vini et salis ut subtilietur fumes et humectetur et minus lædat. Quando autem non sic temperantur et

¹ II de Anima, tract. III, cap. 26.

² II de Anima, tract. IV, cap. 1.

sint facti de lignis viridibus commixtis et terrestribus, tunc sæpe interficit homines fumus eorum, et præcipue si in caverna arcta clausus sit, nec descendi possit nec vaporare : et ex tali causa tres nuper in Colonia in caverna pauperes apud carbones mortui sunt inventi. Similiter autem moriuntur multi a sulphuris virtute et diversorum afflatu, sicut argenti vivi et aliorum hujusmodi, quæ *spiritus* in alchemicis vocantur. Et ideo talium odores fugiunt animalia : non ideo quia detestentur fœtorem secundum se, sed quia gravedinem vel corruptionem ab eis patiuntur : et ideo fœtida non corrumpentia non fugiunt, sicut sunt stercora et hujusmodi. Et ideo ipsam fœditatem secundum se non curant, quamvis sæpe sint talia fœtida : quia multa crescentium ex terra, ut plantæ, fœtida sunt valde. Hanc enim fœditatem non curare videntur nisi conferat vel noceat aliquid ad edulium ipsorum, cujus odor est passio in quantum est gustabile.

CAPUT XIV.

Qualiter odoratus et odorabile sunt media sensuum et sensibilium?

His autem sic determinatis, determinemus qualiter se habeat odorandi sensus ad alios sensus : videtur enim sensus odorandi habere impari qui cadit in medio in imparibus existentibus omnibus aliis sensibus. Omnis enim impar numerus unum qui facit,

imparitatem habet in medio parium : quoniam diffinitio numeri imparis est, qui in medio parium unitatem habet, propter quam in duo æqualia dividi non potest. Et sic quinque existentibus sensibus, locum qui est in medio parium possidet odoratus : ipse enim medius est sensuum tangibilium qui fiunt per rei sensibilis contactum, quemadmodum sunt tactus et gustus : et in alia medietate sunt sensus qui sunt eorum qui per omnia extrinseca media sentiuntur, sicut sunt visus et auditus.

Et propter hoc odorabile est passio nutrimentorum, quoniam est passio alimenti : et est sicut in subjecto in sicco enchimo quod est de numero tangibilium : et quoad hoc convenit cum gustu et tactu. Est autem et in eodem genere quoad medium extrinsecum cum audibili et visibili : cujus signum est, quia odores odorantur in aqua et in aere, quæ sunt extrinseca media odorantium, in quibus secundum esse spirituale sit species odorum. Odorabile igitur quodammodo commune est amborum generum sentiendi : tactuali enim quidem inest quantum ad subjectum odorum, et perspicuo per quod est visus, et audibili per quod est auditus : audibile autem voco aerem tremoris et soni susceptivum. Rationabiliter igitur assignatur odor siccitati enchimiæ, quæ ex odorante diffunditur in medium, sicut color et sanatio attribuuntur suis mediis secundum proprias naturas in ipsis inventas.

Tantum igitur dictum sit a nobis quomodo oportet accipere species odorabiles, et quomodo non oportet easdem accipere. Sicut autem sensus odoratus est medius sensuum, ita odorabile est medium sensitivum, quoniam subjectum ejus est de numero tangibilium : esse autem odoris in medio est simile audibilibus et visibilibus quoad esse spirituale quod habet in medio.

CAPUT XV.

De errore Pythagoræ qui quædam animalia nutriri dixit odoribus.

Quod autem quidam Pythagoricorum dicunt, ex dictis non apparet esse rationale : dixerunt enim illi quædam animalia nutriri odoribus : et fuit illa ratio dicti eorum, quod nihil invenitur in ventribus eorum : cum enim odor sit secundum esse spirituale deveniens ad odoratum, constat quod nutrire odores animalia possunt.

Et prima ratio quam contra hoc inducimus, est quia nos videmus, quod nutriente ea animalia de quibus dicunt, non sunt simplicia, sed composita habentia esse materiale et corporale et in corporali nutrimento, et simplicia quæ formæ sunt simplices, non nutriuntur. Si igitur hoc est, quod ab omni cibo primitus tracto fit quædam superfluitas quæ rejicitur ab eo quod nutritur : sed hoc fit dupliciter. In quibusdam enim nutritis fit segregatio superfluitatis in ipsis quæ nutriuntur, sicut in animalibus habentibus stomachum vel vesicam vel alterum istorum. In quibusdam autem fit segregatio superflui extra ipsa quæ nutriuntur, sicut in plantis quæ trahentes nutrimentum in terra, relinquunt id quod est impurum.

Dictum autem est de his in libro de *Nutrimiento et nutrito*¹. Cum igitur a simplici et formali nihil segregari possit, eo quod totum est æqualiter purum vel inæqualiter impurum, et odores esse simplicium habeant qualitatum, relinquuntur quod odoribus nihil nutritur.

Amplius autem ipsa quæ corporale habent humidum esse solum, non sunt nutritiva : quod enim constitutum est nutriti corporalis, et corporale vult esse nutrito : et cum nutritum sit mixtum, oportet nutrimentum esse mixtum. Si autem aqua simpliciter non nutrit, multo amplius impossibile et multo minus rationale aerem nutrire qui venit cum odoribus : oportet enim incorporari ei quod nutritur : et hoc esse non potest cum spiritualis sit, et in ipso odor sit in esse spirituali.

Cum his autem rationibus quæ dicta sunt, ista inducimus, quoniam omnibus animalibus quæ nutriuntur, est locus determinatus qui est venter, in quem trahitur nutrimentum ut ibi digeratur : et ab illo loco postquam est cibus ingressus, recipit totum corpus. In tali autem loco non est instrumentum odoratus, sed potius in capite, qui locus non est digestionis cum sit frigidus, et ad caput intrat odoratus cum spirituali fumositatis : et ideo vadit utique ad locum ad quem pertingit inspiratus per nasum spiritus, et non ad locum nutrimenti : ergo non nutritur aliquod animal odoribus. Manifestum est igitur, quod odorabile non confert ad nutrimentum.

Quomodo autem odorabile conferat ad sanitatem per modum qui supra dictus est, manifestum est et experimentis sensus et aliis rationibus quæ supra inductæ sunt : et ideo quod facit nutrimentum in per se nutritilibus, hoc ad sanitatem facit odor in per se odorabilibus.

Hoc igitur modo determinetur de sen-

¹ De Nutrimiento et nutrito, tract. 1, cap. 2.

sibilibus secundum unumquodque instrumentum et organum sensuum : quoniam hic de tangibilibus nihil dicemus : quoniam tangibilia secundum seipsa in se-

secundo *Peri geneseos*¹ considerata sunt : secundum vero relationem ad sensus qui dicuntur tactus, determinatum est de ipsis in secundo de *Anima*².

¹ II de Generatione et Corruptione, tract. III, cap. 6.

² II de Anima, tract. III, cap. 35.



TRACTATUS IIIIN QUO TRACTANTUR DUBIA COMMUNIA QUÆ SUNT CIRCA
SENSATA.

CAPUT I.

Qualiter ad minima dividitur sensatum?

Oportet autem nos hic quædam dubitalia de sensibilibus determinare, ex quibus Antiqui magnas occasiones sumpserunt errorum. Erant autem in universo tria, quorum primum est de sensibilibus in se consideratis. Secundum de eisdem prout sunt in motu ad sensum. Tertium autem de his prout jam in sensu existunt, et sentire secundum actum perficiunt.

Et de primo quidem objiciat forte aliquis sequens Democritum et Leucippum dicens, quod si omne corpus in infinitum est divisibile, et ista sensibilia sunt formæ corporeæ in infinitum divisibiles, et subjecto suo diviso, oportebit quod etiam passiones sensibiles in infinita dividantur, sicut color, chimus, odor, gravitas, sonus, frigidum, calidum, asperum et lene, durum et molle, et alia quæcumque sunt sensibilibus passiones. Si autem in infinita dividantur, tunc oportet quod ex infinitis componantur: et sic erunt atomi sensibiles: aut oportet quod passiones nihil sint, sed resultent in sensu ex ordine et situ et figura atomorum. Hoc autem est impossibile, quod scilicet sensibile componatur ex infinitis indivisibilibus, quorum quodlibet sic sensibile secundum actum, vel quod dividatur ad infinita divisibilia, quorum quodlibet sit sensibile secundum actum. Unumquodque enim sensibile secundum actum in eo dicitur sensibile, quia est operativum in sensu secundum actualem sensus immutationem: omnia enim in eo dicuntur sensibilia, quia possunt movere sensum

et facere eum secundum actum sentire. Si igitur sensibile in infinita dividatur, quorum quodlibet est sensibile, necessarium erit potentiam sensitivam in infinita dividi, in eo quod quodlibet indivisibilem deprehendit et percipiet secundum actum sentiendi : potentia enim non dividitur nisi respectu objecti, ut in *Cælo et Mundo* dictum est : et in hac divisione ultimum potentiæ passivæ stat in minimo. Si igitur hæc potentia quæ est sensus, patiatur ab indivisibili inferente sensu- alitatem, et nihil sit minus indivisibili, erit passio potentiæ sensibilis divisa per infinita. Ex his autem sequitur omnem magnitudinem quantumcumque parvam, etiamsi indivisibilis sit, esse sensibilem : hoc autem falsum est, quia minimum in quod potest dividi album, impossibile est videre.

Si vero oppositum hujus detur et dicatur sic non esse : tunc utique oportebit quod aliquod corpus sit, quod non habet omnino colorem et sonum et gravedinem et alias tales passiones sensibiles : quod est omnino falsum, quia corpus sensibile non dividitur omnino ad insensibilia, quæ nullo modo habeant sensibiles passiones. Si enim detur sic dividi ad insensibilia, tunc etiam componetur ex omnino insensibilibus, et sequetur ex hoc quod formæ sensibiles fiant ex nihilo : quoniam in omnino insensibilibus, nec potentia formali, nec actu inest forma sensibilis : omnes autem Philosophi conveniunt in hoc quod ex nihilo nihil fit omnino, sicut patet in primo *Physicorum* : necesse est igitur omne sensibile ex sensibilibus componi : nullo enim modo fieri potest quod corpus naturale componatur ex mathematicis, in quibus nihil est de forma sensibilium. Cum autem omne corpus componatur ex eisdem in quæ dividitur, si dividatur in infinitum, tunc oportebit, sicut dicunt, quod

dividatur ad corpora indivisibilia : et illa non possunt esse physica et sensibilia, sed erunt mathematica, quæ sunt ante sensibilia, in quibus sensibilia nec sunt potentia, nec actu : et ex talibus non componitur corpus sensibile : quia ex hoc sequeretur, ut prius dictum est, quod aliquid esset ex nihilo. Formæ enim sensibiles ex nihilo essent.

Amplius si talia sint minima et indivisibilia quæ non possunt movere sensum, quæramus ab eis, cui hæc adjudicare debemus cognoscenda, nisi toti menti quæ vocatur intellectus? sed hoc facere non possumus : quia non essent intelligibilia secundum doctrinam intelligibilium quam tradidimus in libro de *Anima* : omnis enim intellectus corporalium oritur a sensu : mens enim nihil sentiendo cognoscit sive accipiendo ex sensu et sine exteriori sensu secundum factum ab ipso sensibili movente sensum. Hæc autem dicta sunt insensibilia. Igitur hæc etiam erunt non intelligibilia.

Similiter autem cum istis inductis duobus omnia dicere sensibilia sic se habere quod componantur ex indivisibilibus et insensibilibus, videntur ferre testimonium illis qui principium corporum naturalium faciunt esse indivisibiles magnitudines et corpora : et si sic sit, tunc solvetur sermo disputationis inductæ, dicendo sensibilia componi ex insensibilibus : et quod hoc non sit inconveniens, eo quod sensibilis forma in se nihil est, sed tantum est secundum apparentiam sensus, quæ apparentia sensus causatur ex situ et ordine et figura atomorum, sicut diximus in primo libro de *Generatione*. Sed hoc est impossibile : dictum est enim in sermonibus de motu in sexto *Physicorum*¹, quod impossibile est aliquid componi ex indivisibilibus. Sed nos solutionem inductarum dubitationum solvemus, et simul cum so-

¹ VI Physic. tract. 1, cap. 2.

lutione ipsorum manifestabimus, quare determinati et non infiniti numeri sunt species sensibilium sicut sunt colores, odores, soni, et alia sensibilia.

Ostendemus autem dupliciter species sensibilium esse finitas: uno quidem modo ex parte formarum sensibilium: alio autem modo ex parte subjectorum continuorum corporum in quibus sunt formæ sensibiles. Ex parte autem formarum, procedemus sicut processimus in V *Physicorum*: quia omnium sensibilium quorum in uno genere sunt extrema simplicia sensibilia, eorumdem hæc eadem ultima sunt contraria: omne enim sensibile secundum speciem acceptum habet contrarium, sicut determinatum est superius, sicut in colore contraria ultima sunt album et nigrum, et in sapore dulce et amarum, et similiter in omnibus aliis sensibilibus sunt ultima contraria: cum autem motus sit ab ultimo in ultimum finitus, sicut in *Physicis* probatum est¹, oportet quod media per quæ est motus, sint finita: aliter enim numquam deveniet in ultimum. Media ergo secundum actum accepta sunt finita: et si attendantur genera proportionum quibus se habent ad invicem, tunc sunt septem numero.

Quia autem diximus supra sensibilia media fieri ex alteratione et compositione corporum in quibus sunt extrema sensibilia, et compositio non possit ex eis fieri in quæ est divisio, oportet præintelligere qualiter continuum in infinitum dividatur, et qualiter non: et sic etiam sciemus, quod secundo modo, scilicet ex compositione corporum sensibilium non erunt sensibilia infinita nisi in potentia et non in actu. Revocemus igitur ad memoriam quæ in sexto *Physicorum* determinata sunt, quod scilicet dividi in infinitum non convenit tantum mathematicis, sed etiam naturalibus cor-

poribus secundum quod mobilia sunt, sed non convenit eis secundum quod in forma specificata sunt, sicut est cælum et terra, et ignis, et hujusmodi. Sicut autem in III *Physicorum* est probatum, quod continuum quando dividitur per inæqualia, semper ad infinita dividetur, sicut si dividi dicatur aliquid in duo, et medietas in duo, et sic semper: ista enim divisio numquam stabit. Si autem in quæcumque æqualia sit, in duas medietates, vel tres tertias, vel quatuor quartas, vel in alia æqualia, illa absque dubio mensurabunt et numerabunt totum, per hoc quod sunt æqualia: et ideo talem nec esse estet stare divisionem. Illud autem quod secundum seipsum non est continuum, sicut species sensibiles, id non dividitur divisione continui nisi per accidens, sed dividitur per duas formaliter appositas insensibiles species finitas. Dicendum autem est, quod passiones sensibiles sunt species in natura, licet hoc negaverit Democritus, qui dicebat eas vere non esse in rerum natura, sed in apparentia sensus tantum, sicut diximus supra: diviso autem continuo per æqualia, semper est connexio sensibilium ex his dividendis, quod est per modum quem diximus supra, ut scilicet duæ tertiæ vel quartæ perspicui convertantur cum quinque quintis, vel sextis, vel decimis opaci, vel aliter quocumque modo: et ex taliter per divisionem acceptis cum finita sint, eo quod sunt æqualia media sensibilia, resultabunt finita: et similiter est in aliis subjectis sensibilium. Si autem connexio fiat ex inæqualibus præter proportionem acceptis, ut scilicet minus de perspicuo convertatur cum majori de opaco inæqualiter, et in æqualibus erunt colores asimetri et infiniti secundum potentiam: et idem omnino iudicium est de sensibilibus aliis. Et sic patet qualiter species sensibilium

¹ VII *Physic.* tract. 1, cap. 2.

dupliciter sunt finitæ: et hæc ratio quæstionis secundo inductæ est cum quæstione principali quæ est de divisione sensibilium.

Solutio autem quæstionis principalis est, quod debemus supponere et sumere ab his quæ sæpe demonstrata sunt in *Physicis*: quia in physicis aliud est quod est potentia et virtute, et aliud quod est actione sive actu. Similiter ergo sensibilium aliud est virtute sensibile, et aliud sensibile secundum actum, sicut in visu: si enim dividitur granum milii in decem millia, decimum millium milii fallit et latet visum, nec est visibile secundum actum, quamvis superveniat eis visus, et incidat in locum ubi jacet. Similiter autem in auditu sonus, qui est minima pars et differentia soni, qui dicitur *diesis* Græce, fallit auditum, et non est sensibilis secundum actum, quamvis omnis et totus causatus continuus existens audiat secundum actum. Et quamvis milium integrum et continuum existens videatur secundum actum, sed distantia minimarum partium ejus quod intus est, hoc est, medium, est ad ultima accepta per divisionem, fallit sensum et latet secundum actum. Similiter autem et in aliis sensibilibus, quæ sunt omnino parva, latent sensum secundum actum: talia tamen sunt virtute et potentia visibilia, sed non actione quando per divisionem ad minima sunt separata. Quod autem aliqua sint virtute sensibilia, quæ tamen actione sensibilium non sunt, probatur a minori: quia gressibile quod per diffinitionem homini convenit, aliquando virtute inest bipedi et non actione. Ergo multo magis quando separantur superabundantiæ sensibilium, quæ possunt agere in ipsam: tunc rationabile est ea separari et dividi in contingentia sensibilia quæ sunt sensibilia potentia et virtute: velut nec non separatur et dividitur subtilissimus infusus nari qui est odor parvissimus: hoc enim dividitur in ea quæ virtute et potentia odores sunt: et hæc sunt contingentia odorabilia. Sed quia est supera-

bundantia sensus quæ actu agit in sensum, et est superabundantia ejus quod est sensibile per seipsum secundum essentiam, non est separata ad minima. Jam enim virtute et potentia suæ divisibilitatis est in discretiori, hoc est, in amplius divisa superabundantia quæ est divisibilis etiam secundum actum, sicut est superabundantia prior que in ipsa divisa est: ita tamen quod sensibile non est separatum ad ultima minima, erit illam superabundantiam sentiri: hoc autem quod dicimus tale est, ac si dicamus aliquid continuum totum esse sensibile: et ideo dici superabundantia, quia superabundat movendo sensum potentia agentis sensibiliter: quod si dividatur, erit discretius quam primo fuit.

Dicamus igitur ipsum dividi primo in ea quæ sensibilia sunt, tunc erit in discretiori superabundantia sensibili: nec per istam divisionem sensibile separatur ad insensibilia: quia adhuc erit ista actione sentiri: et ideo licet ita divisum sit, tamen est adhuc sensibile: et si iterum ulterius ultimum dividatur ita diu donec amittat superabundantiam movendis sensum, est tamen adhuc aliquo modo sensibile: hoc enim virtute jam est sensibile, et est actione sensibile quando est perfectum per compositionem cum alio, cum quo accipit superabundantiam movendi sensum. Sic igitur sensibile componitur ex insensibilibus secundum actum, sensibilibus tamen secundum virtutem, in quibus est inchoatio formarum sensibilium: et sic non sequitur aliquod sensibilium fieri ex nihilo, aut ex mathematicis.

Quoniam igitur quædam magnitudines et quædam passiones latent sensum, et propter quam causam hæc contingant, et quomodo illa sunt sensibilia et quomodo non, sit determinatum a nobis. Quæcumque autem partes sensibilium ita sunt ad ea continua quæ actione sensibilia sunt, quia et ipsa divisa sint sensibilia separari determinata, et non solum secundum quod in toto sunt accepta, illa necesse

est in numero determinato et finito esse, sive sint colores, sive sapes, sive soni. Alia autem quæ virtute sunt sensibilia quæ sunt separatim determinata, non sunt in numero determinato.

Patet igitur quod sensibile in eo quod sensibile, dividitur ad non sensibilia, virtute tamen sensibilia, etiamsi dividatur in infinitum : et hoc ignoraverunt Democritus et Leucippus.

CAPUT II.

Utrum sensibilia in momento perveniant ad sensum, vel primo per virtutem ad medium, et sic successive ad sensum ?

Secunda autem quæstio inducitur propter opinionem quam supra in primo hujus libri tractatu induximus. Ibi diximus quosdam ex eis qui dixerunt sensum fieri extra mittendo virtutem sensibilem, dicere medium non prius pati a sensibili, et postea ab illo pati sensum : sed dixerunt sensum immediate pati a sensibili. Similiter autem quidam ex eis qui dixerunt nos sentire intra suscipiendo, dixerunt sensibile non prius fieri in medio et postea in visu, cum potius dixerunt medium suscipere formam sensibilem in tribus sensibus qui fiunt per medium extrinsecum. Sed media esse efficientia formas sensibilium in sensu, absque eo quod medium habeat eas. Et dant exemplum de hoc quod faber imprimit formam ensis in ferro per malleum absque

eo quod malleus umquam habeat figuram ensis : et sic malleum instrumentaliter dicunt operari ad sensum materiæ. Media autem sensibilia sicut primum efficiens et movens.

Hac igitur de causa objiciet aliquis et quæret an sensibilia et motus eorum perveniant per formam ad sensum statim, non per medium quodlibet, quocumque modo fiat sensus sive visus, sive odoratus an non, est hoc verum : sed operantur sensibilia suas formas prius in medio, et postea medium agit eas in organum sensus. Hoc enim secundum videtur consonare his qui sunt in odore : nos enim videmus in olfactis, quod propius est juxta primum odorans, sentit prius odorem, quam id quod est distantius ab ipso : et hujus causa non est alia, nisi quia prius odor immutat propinquiorem aërem vel aquam, quam illum aërem vel aquam quæ magis distat a primo odorante. Similiter autem videtur de sono : quia cum nos scimus quod percussus et percussus sonat percutiendo, et nos videmus prius ictum quam perveniat ad nos sonus : cujus exemplum est de muliere lavante pannos ultra latam aquam, quæ inter nos et eam est : quando enim percutit ligno pannum, videmus quod diu post ictum venit ad nos sonus : tardatio autem soni non causatur, nisi quia prius generatur in prima parte medii quæ juxta primum sonans est, et postea in remotiori, et sic continue donec cesset motus percutientis qui generat sonum. Hæc igitur duo sensibilia prius fiunt in medio, et ex medio fiunt in sensu.

Quæramus igitur, utrum medium sit de visibili et lumine ? quia hoc multi dixerunt, sicut Empedocles. Cum enim diceret lumen et radium esse corpus, dixit quod lumen quod est a sole in hemisphærio prius in tempore est in aere quam in visu hominis : et cum sit elevatus stans super terram, dixit quod prius est in visu quam in terra. Oportet enim eum concedere necessario hoc, cum diceret lumen et radium esse corpus :

omne enim corpus movetur in tempore, ut probatum est in sexto *Physicorum* : quidquid autem movetur in tempore, habet talem divisionem in tempore, qualem habet in spatio si in æquali velocitate semper moveatur : et ideo ad minus spatium pervenitur citius, et ad majus in longiori tempore. Putatur enim utique hoc rationabiliter accidere : omne enim quod movetur, est corpus : et hoc semper movetur ex alio in aliud continue durante motu. In omni enim tali motu necesse est esse tempus quod habet prius et posterius, in quo movetur ad quod movetur ab alio in aliud in spatio loci per quod transit : tempus enim omne divisibile : et in prima quidem corporis parte est in priori parte spatii, et prius est in medio quam in fine : sequitur ergo necessario, quod tempus fuit quando radius et lumen nondum venerat ad visum : et tunc tamen ferebatur et movebatur in spatio quod erat inter visum et solem propinquius soli quam visui.

Et si etiam aliquis dicat, quod tota forma sensibilis simul venit ad sensum et non pars ejus una prius et postea alia : totus enim sonus simul auditur et non partes : et hunc totum simul etiam prius auditur et postea durante sono audiet : et universaliter dicat, quod totum sensibile est in quolibet sensu et simul accipitur : non enim per partes accipimus aliquod sensibile, sed totum simul, hoc non impedit inductam dubitationem : quia de tota forma sensibili simul quæritur secundum quem modum perveniat ad sensum. Licet enim concedatur quod sensibile non sit successiva generatio in sensu, quando jam in sensum perveniunt, sed sunt absque fieri successivo in sensu, eo quod tota forma simul fit in ipso, non tamen minus hoc concessio verum est, quod sonus venit ad sensum successive per medium, licet totum simul moveatur. Patet enim, quod venit ad auditum postquam virtus primi sonantis jam per aliquod tempus perfecta erat : experiendo enim sentitur, quod jam facto

ictu, quando jam longe stat primum verberans, nondum auditur.

Hoc autem quod dictum est, manifestat litteratæ vocis transfiguratio in aere : oportet enim illam figurari in aere, quem admodum id cui adjungit latio, quæ est motus localis in medio aere, qui est causa vocis : litterata enim vox dicta, longe nondum est audita quando dicta est : ergo aer delatus et motus causans vocem transfigurantur de loco ad locum circulariter usque ad auditum : non igitur subito venit ad auditum, quamvis tota simul indistanter prolata veniat. Similiter igitur videtur de lumine et colore, quod veniant ad visum successive per medium, quamvis non veniant simul per partes acceptas a visu. Non enim potest aliquis dicere et evadere per hoc quod diximus in libro de *Anima*, quod relativa sunt sicut visus et visibile : et dicatur quod videns videt, et visum videtur in eo quomodolibet se habeant ad invicem, sicut relata æqualia, æqualia sunt et dicuntur per hoc quod aliquo modo comparisonis ad invicem referuntur : relativorum enim ad invicem comparatorum nullum oportet alicui in distantia loci determinata esse recta vel circulari, extra quam non comparatur ad suum relativum : æqualibus enim factis aliquibus per æqualitatem ad invicem comparatis, non differt utrum prope aut longe sint ad invicem, vel recte distent a se invicem vel circulariter : semper enim comparantur : hoc autem non est in visu et visibili in quæ exigitur distantia determinata a qua illud videt et aliud videtur.

Quod autem nos in libro de *Anima* diximus de sensu et sensato, diximus secundum actum factis, et de motu sensibilium ad sensum, ubi quærere non fuit nostræ intentionis. Numquid igitur de sono et colore accidere quod diximus est rationale? quod successive veniat ad visum, ut dicamus quod quemadmodum tota et omnis aqua, et totus et omnis aer continua sunt a primo sonante usque

ad auditum, ita ut sensibile veniens per ipsum idem primo primus qui propinquior est sensibili, et postea illud idem transiens ulterius participet postea postremo, et sic fiat odoratus, auditus, et visus, sicut lapis unus numero, primo movetur in prima parte spatii per quod jacitur, et postea idem numero movetur in postrema parte ejusdem spatii. Sicut enim idem audibile et eundem sonum participat prope primum sonans stans, et stans longius ab ipso, et non in eodem tempore simul : et hoc quidem aliquo modo est verum, et aliquo modo non est verum, sicut infra ostendetur.

Videtur enim quibusdam esse objectio de his quam solvere oportet antequam solvamus principalem quæstionem. Licet enim Plato dicat idem numero verbum fieri in auribus multorum, tamen quidam dicunt hoc esse impossibile, quod aliquid idem numero per aliud et aliud medium sive per aliam et aliam partem et audiatur et odoretur. Et hæc est causa, quia esse quoddam habet in medium : omnis autem forma diversificatur et numeratur per subjectum. Cum igitur diversæ partes medii sint diversa subjecta per numerum, non potest idem secundum esse fieri in auribus vel olfactibus diversorum. Et non est simile de lapide jacto : quia lapis corpus est, et esse non habet ab aere in quo projicitur : sed sensibile est forma quæ esse non habet nisi in aliquo subjecto : idem ipsum enim esse sensibile est unum, velut esse formale moventis primi, est separatum in medio et divisum per modum qui est dictus, sicut esse soni campanæ, qui statim circulariter inundans separatur in esse multorum sonorum secundum materiam medii in quo fit : et sic est de libatione odoratus et gustus, per quod unum primi sensibilis existens dividitur et separatur in diversas partes medii. Ita enim est de esse ignis quoad lumen suum. Unum enim existens dividitur secundum divisionem et magnitudinem perspicui cujus ipsum est actus : et actum illum qui est

unius primi sensibilis numero, sentiunt omnes, licet non idem numero esse habeat secundum quod venit ad sensum omnium sentientium : et ideo proprium uniuscujusque sentientis sentitur alio et alio numero esse in medio. Sed cum hæc omnia sic separata sunt idem sensibile specie, et hoc modo idem simul multi vident et audiunt et odorant. Causa autem hujus est, sicut diximus : quia ista non sunt corpora quæ in diversis partibus medii eadem secundum se remaneant, sed sunt passiones et motiones formales primorum sensibilium, et hoc esse non habent sine corpore, nec idem esse in diversis corporibus. Sic igitur in audire et in olfacere non accidit simul subito mox ab ipso primo sensibili movente, sed in medio est sensibile antequam sit in sensu, et prius est in prima parte medii quam sit in ultima.

De lumine autem alius sermo est : in eo enim quod ad aliquid est, lumen est, non quidem quod sit relativum, sed est ad aliquid, eo quod semper est alicujus : id autem cujus est motus localis luminosi corporis illius, et illius finem consequitur perspicui illuminatio, sicut effectus sequitur causam : quod sic probatur. Ex prædictis enim constat quod perspicuum nullam habet contrarietatem, sed secundum naturam est ante contraria in corporibus perspicuis : non sic igitur habet impedimentum actus ejus quominus recipiatur in ipso ex aliqua qualitate elementalī præsentē : ergo illuminatio statim et in momento generatur in ipso, sicut patet ex his quæ determinata sunt in *V Physicorum* : per quemlibet autem motum terminatum ad quodlibet punctum fit præsentia luminaris ad aliquam rectam perspicui oppositionem : ergo in momento semper ex tali fine motus generabitur lumen in perspicuo. Finis autem motus est indivisibilis et simplex et non in tempore, sed in momento temporis : ergo et effectus ejus, quæ est illuminatio ad omnes partes perspicui, ad rectam oppositionem erit in momento et non in

tempore. Sic igitur intelligendum est, quod illuminatio est ad aliquid, et quod est subito : et sic declinantur abusiones quas fatuitas hominum introduxit, dicentium lumen esse corpus, aut substantiam spiritualem, aut formam substantialem, aut aliquid aliud secundum quod in libro de *Anima* diximus.

Cum autem dicamus illuminationem esse subitam alterationem totius perspicui ad rectam oppositionem illuminantis primi, dicimus quod non omnino similiter se habet in alteratione et latione quæ est motus localis. Lationes enim sive motus locales, eo quod sunt corporum per se motorum, rationabile est prius esse in prima parte medii quam in postrema corporum motorum attingentium motu suo diversas partes medii secundum prius et posterius tempus : et ita sonus qui adjunctus est motui locali, eo quod omnis sonus est alicujus lati localiter, sicut in libro de *Anima* diximus. Non autem quæcumque alterantur, oportet similiter alterari in tempore, sicut lationes fiunt in tempore. Oportet enim quædam subito alterari, et non dimidium prius, nec dimidium posterius : sed oportet primum statim in toto transmutari ab illo quod est alterans primum : et hoc contingit quoties alteratio causatur ab aliquo fine motus, et non ab ipso motu, sicut generatio quæ large dicitur alteratio secundum quale formæ substantialis, quæ ideo subito est, quia est finis alterationis qualitatum activarum et passivarum : et illuminatio perspicui recte oppositi puncto ad quod figuratur motus primi illuminantis, et tamen non est necessarium semper simul et subito fieri omnem alterationem : eo quod non omnis alteratio facta est a fine alicujus motus et non ab ipso motu. Si enim subito fieret omnis alteratio, tunc etiam gustatio sive gustabilis diffusio in humido et lingua essent simul, quemadmodum et odor secundum diffusionem in medio esset simul et non successive in humido aeris vel aquæ, quæ sunt media odoris. In istis autem mediis

sentimus odorem et saporem prius in eo quod remotius est in nobis antequam tangamus ipsum in sensu : primum enim percipit aliquis prope stans quam stans longe : et ideo quando longe stamus, tali signo deprehendimus formam sensibilem esse prius in propinquo quam in remoto.

Rationabiliter autem dicendum, quod quæcumque sensibilia organorum sensuum non sunt in medio secundum aliquod esse quod habent in medio et a medio, non simul omnia, sed successive patiuntur talia media, nisi in solo lumine et colore propter ea quæ dicta sunt : et ideo consequitur visum etiam fieri subito sicut perspicuum illuminatur subito : quoniam visus de numero perspicuorum est, sicut patet ex antehabitis : et ideo lumen facit videre. Sicut autem color subito immutat : quia alterat actum luminis et perspicui, sicut patet ex his quæ dicta sunt in prima parte libri hujus, et ex secunda parte, ubi probatum est quod color nihil aliud est nisi quoddam esse luminis in perspicuo determinato.

Tantum igitur sit dictum a nobis de solutione quæstionis secundo inductæ.

CAPUT III.

Disputatio in qua est, quod duo sensibilia non contingit simul sentiri in indivisibili tempore.

Est autem adhuc et alia objectio talis de sensu secundum actum facto, quando sensibile jam est in sensu secundum actum facto. Quæritur enim si contingat duos sensus secundum actum factos in nulla virtute sentiendi, sicut duo visus simul videntur posse secundum actum in uno et indivisibili tempore.

Ut autem intelligatur hæc quæstio, revocetur ad memoriam quæ in libro de *Anima* dicta sunt de sensu communi. Ibi enim dictum est, quod in una et indivisibili virtute sentiendi contingit plura sentiri simul in indivisibili tempore, ita quod non unum prius et alterum posterius : et de hoc hic quærere volumus, utrum sit verum, vel non? Vocamus autem duos sensus duas secundum actum apprehensiones sensibiles : duas autem apprehensiones esse sensibiles necesse est quotiescumque duo sensibilia unius vel diversorum sensuum apprehenduntur : et istas apprehensiones vocamus hic sensus secundum actum factos. His autem sic suppositis, intendimus probare duos sensus secundum actum factos non

posse esse simul in uno indivisibili tempore secundum virtutem primi sensitivi quod est sensus communis. Si enim motus est major in una anima, semper minorem repellit, etiam quando sunt motus illi secundum diversas virtutes in anima : tunc multo magis accidit hoc secundum unam et eandem virtutem existentibus motibus duobus vel pluribus. Quod autem major motus minorem depellat, scimus per signum : quia videmus quod quiddam visibile superlatum super oculos non sentiunt, quando accidit illos vehementer esse intendentes per intellectum circa aliquid : vel quando accidit eos esse timentes vehementer vel audientes magnos et terribiles sonos, averunt intentionem a visibilibus in oculis existentibus : et hac de causa non advertimus amicos obviantes nobis in via, quando mente opinamur¹ circa quædam alia. Hæc autem sic subiaceat et supponatur : quoniam diligentius in *Somno et vigilia* habet tractari, quando inquiremus quare motus phantasmatum non semper æqualiter et ab omnibus deprehenduntur. Hic autem jam habemus, quoniam fortior motus depellit minorem ab anima, et multo magis quando motus duorum fiunt in eadem animæ virtute.

Hoc autem accepto et supposito, accipimus quod unumquodque simplex per seipsum acceptum magis sentitur et fortiori motu movet sensum, quam ipsum idem commixtum cum alio : sicut vinum intemperatum magis movet sensum quam temperatum, et mel magis sentitur intemperatum quam temperatum. Similiter autem est sentire calorem magis immixtum quam mixtum : et vox simpliciter acuta magis movet sensum sola quam diapason quæ est vox mixta cum contrario. Non mixtum autem vocamus simpliciter sensibile quod est per modum

¹ Alias occupamur.

habitus, et non id quod est per modum privationis. Quoniam forte magis sentitur medium mixtum et magis movet sensum primum quam simplex, et est sicut privatio in genere aliquo sensibilium. Causa autem quare simplex fortius movet sensitivum quam mixtum, est quia mixta obscurant se invicem quando alteratur utrumque ab alio : talis autem commixtio non accidit nisi his sensibilibus ex quibus fit unum sensibile, aut ex utrisque commixtis. In talibus enim etiam verum est, quod major motus etiam minorem repellit : et ideo necesse est quando simul sunt unita permixtione in qua utrumque miscibilium excellit et alterat reliquum : utrumque simul mixtum minus est sensibile quam fuerit simplex sensibile primum. In ipsa enim mixtura quando se invicem alterant, necesse est aliquid sensibilitatis auferri a magis sensibili per hoc quod miscetur ei minus sensibile. Si autem æquales sunt motus duorum sensibilium, altera existente alteratione ab altera non permixtis, tunc utraque excludit alteram : sed sensibilia prout sunt in sensitivo primo non miscentur : quia si miscerentur, tunc nunquam judicarentur actu plura : quod falsum est, sicut ostendimus in II de *Anima*: ergo prout sunt in ipso plura sensibilia, remanent ut altera et altera.

Quærat ergo utrum habeat æquales motus, aut inæquales? Si æquales, tunc utraque excludit alterationem alterius : et sic neutrum percipietur acceptione communi. Quod falsum est : quoniam etiam quando miscentur sensibilia in re extra, si utrumque alterat æqualiter alterum, neutrum facit sensum per se : et sic neutrius erit sensus secundum seipsum, sed unius medii quod constituitur ex ambobus : obscurat enim altera forma et non contingit sentire simpliciter aliquam earum secundum seipsam. Sic igitur non potest dici quod sensitivum commune simul duo sensibilia accipiat, quando accipit unum commixtum ex duobus : sentire enim sic duo commixta aut nullus est

sensus, eo quod neutrius est per se, aut erit sensus unus secundum formam mixti, qui est sensus unus ex duobus sensibilibus mixtis et alteratis in tertium ex duobus constitutum : talis enim sensus videtur fieri omnibus commixtis, in quocumque genere sensibilium commisceantur. Non igitur propter hoc sensitivum commune primum duo sentit simul in uno et eodem indivisibili tempore. Quoniam ergo ex quibusdam sensibilibus commixtis fit unum quid mixtum, et ex quibusdam non fit unum mixtum si simul sensus communis plura sentiat, oportet quod sentiat ea prout non fit unum sensibile ex ipsis, sed salvantur secundum actum plura : talia enim quæ sunt, sub alio et alio sensu sunt, ex quibus permixtione non fit unum : eo quod illa sola commiscantur, quorum naturæ ultimæ ad quas resolvuntur, sunt natura una, sicut album et nigrum resolvuntur ad colorem : et quorum natura in qua stat resolutio non est una et eadem, ex eis non fit unum permixtione : et ideo ex albo et acuto in sonis non fit unum permixtione, sed fit unum ex eis per accidens in hoc subjecto : quia forte utrumque accidentium illorum sensibilium est cum altero in eodem subjecto, sed non fit ex eis unum formaliter permixtione, sicut ex acuto in voce, et gravi in voce mixtura proportionis fit symphonia. Hæc omnia dicta sunt ad hoc quod diximus, quoniam illa quæ non miscentur, non oportet sentire simul : et illa quæ miscentur, sentiuntur simul non ut duo, sed ut unum.

Ostensum est igitur, quod sensibilia æquales habentia motus, non sentiuntur simul uno sensu secundum actum facto, sive sint simplicia, sive commixta. Supra autem fecimus divisionem, quoniam si duo simul sentiantur, aut motus sunt æquales, aut inæquales. Accipiamus igitur alterum dictæ divisionis membrum, et dicamus quod motus duorum sensibilium sunt æquales in movendo sensum : tunc igitur fortior motus magis facit sensum

et melius quam duo : tunc secundum unam virtutem actu simul sentiet anima, quia habitum est supra quod major repellit minorem. Hoc etiam in eis fit sensibilibus, quorum unus est sensus, sicut accidit acutum et grave in voce, et reflectuntur ad auditum, cum tamen magis deberet simul esse motus duorum sensibilium in sensitivo communi quæ sunt hujusmodi unius particularis sensus, quam sensibilium quæ sunt duorum sensuum, visus scilicet et auditus : quia sensibilia unius et ejusdem sensus, ad minus conveniunt in una generis natura in qua uniuntur : sensibilia autem diversorum sensuum in nulla una natura communi sunt unita. Si ergo plura sentiret simul sensus communis, magis videretur plura sentire simul quæ sunt unius sensus, quam ea quæ sunt plurium sensuum. Non contingit autem uno sensitivo communi simul plura unius sensus existentia in uno tempore sentire, nisi commisceantur, ut patet ex supra habitis : commixtio autem vult esse unum et non duo : ergo nullus sensus sensibilium simul erit unus secundum actum sensus communis plurium : sed plurium sensibilium potest esse unus sensus specie sentientis, sicut dicimus visum unum specie et auditum : sic enim etiam dicimus specie sensus unum esse sensum communem : dividitur enim sensus in species, sicut et alia quæ genere conveniunt, et dividuntur suis differentiis.

Omnia ergo quæ sensus communis unico sensu secundum actionem facto sentit plura, necesse est simul commixta sentire : et sic non sentit ea ut plura, sed ut unum : nec sentit tunc plura unico sensu, quia unus numero sensus est, qui actione sentiendi est unus. Specie autem unus sensus est, ut diximus, qui virtute specifica sensus est unus, sicut una specie virtus est visus, et alia auditus, et sic de aliis. Si ergo unus est sensus qui secundum unam actionem sensibilem illa sensibilia quæ plura sunt, dicit et judicat, tunc plura illa videtur quod

unum dicat et non plura : non autem duo dicuntur unum nisi quæ sunt commixta : ergo necesse est quod omnia talia commisceantur in sensu communi ea sentiente. Quando igitur sunt simul, commixti erunt duo sensus formales, eo quod duæ formæ sensibilium sunt in eis permixtæ (duos enim dico sensus secundum actionem unam acceptos, et non duos virtute acceptos), et erunt simul commixti in indivisibili tempore, et non unus post alium : tunc necesse est quod operatio sensus super ea sic commixta sit una, eo quod omnia commixta facta sunt unum, et unius semper est motus unus et collatio una : et quælibet alia alteratio et illius operationis est etiam virtus una a qua exit operatio illa : quia probatum est in quinto *Physicorum*, quod motus unus debet esse ad unum, et ex uno et ab uno movente, et in uno et eodem tempore. Duo autem sensibilia permixtione non unita non sunt motus unius, et idem sensibile super ea non est nisi sicut super unum : ergo non potest esse in uno et eodem tempore sensus utriusque : hoc enim esset ac si linea recta una ad eandem partem terminaretur ad duo puncta : operatio enim egreditur a virtute una sicut linea, et terminatur super sensibile sicut ad punctum. Patet igitur quod non debet duo sensibilia non commixta simul sentire uno sensu sensus communis secundum actionem : etiamsi sint eadem in genere et ejusdem sensus proprii objecti.

Manifestum est igitur, quod si ea quæ secundum eundem sensum proprium ordinantur, plura simul sentire est impossibile, quod multo minus ea simul uno secundum actum sensu sentiuntur, quæ sunt objecta diversorum sensuum : et hoc est contra omnia quæ in libro de *Anima* de sensu communi dicta et determinata sunt.

Amplius autem ea quæ sunt secundum duos sensus sensibilia, convenit non simul sentire, ut album et dulce, eo quod ista non permiscerentur. Quod autem ista

convenient simul ut plura sentire, ex hoc videtur, quod anima et animæ virtus una numero existens videtur dicere, quod numero unum subjecta duo sit secundum formas sensibiles : hoc autem videtur dicere alio quodam quam in eo quod ista sunt simul : videtur enim in uno momento dicere unum quando accipit per gustum, et in alio album quando sensibile refertur ad visum. Quod autem sensibile est specie unum sic visibile et audibile dicit unum vel duo numero iudicante sensu communi, et uno modo referendo tantum ad unum sensum et non ad diversos : et sic iterum duo sensus non sunt simul in eodem nunc, quando duorum relatio ad unum vel plures sensus penes quos distinguuntur, non simul.

Dico autem hoc explanando, quoniam album et nigrum quæ sunt contrariæ specie coloris, iudicabit quæ est sensus communis æqualiter una virtute existens et actione si duo simul sentit, et ipsa eadem sic iudicabit dulce et amarum : et hoc fecit velut ipsa contraria prima sint ipsius ut ipsius et ejusdem, sicut etiam alia contraria : quoniam omnia sensibilia particularia referuntur æqualiter ad sensum communem, sicut in libro de *Anima* determinatum est. Et licet una virtus animæ sic sit diversorum sensibilibium in genere et specie, discernit tamen aliter et aliter utrumque contrariorum : videtur enim diversificata secundum formas contrariorum discernere contraria et diversa : similiter et ipsa quidem dijudicat prima contraria sensibilibium ut hæc sunt prima contraria in quolibet genere sensibilibium ex quibus componuntur omnia media : sed semper ista diversificata secundum actum et esse non discernit uno sensu per actum, sed potius referendo ad esse diversorum sensuum, sicut gustus dulce sentit, ita visus sentit album : et sicut visus nigrum, ita gustus sentit amarum tamquam privationem dulcis : et non potest idem esse primi sensitivi secundum actum in utrisque is-

tis : ergo non contingit plura genere vel specie sentiri uno sensu secundum actum et numerum, quamvis hoc sit primum sensitivum quod est sensus communis.

Amplius autem contrariorum motus sunt contrarii : sed contraria simul in eodem in indivisibili esse non possunt, sicut dulce et amarum. Si autem ista sentiantur simul, tunc simul essent in uno atoma : ergo contraria simul non sentiuntur. Similiter autem et ea quæ non sunt contraria dummodo sint diversa, simul sentiri non possunt in eodem. Illa enim quæ non sunt contraria, sunt media : et mediorum quædam sunt viciniore albo, et hæc comparata nigro sunt contraria nigro : et quædam viciniore nigro, et comparata albo ei contraria sunt ; et ipsa media etiam sunt sibi invicem contraria propter eandem causam : et ideo sicut diversa contraria simul sentiri non possunt, ita nec medium et contrarium extremum, nec medium et contrarium medium simul sentiri possunt : quæ autem sunt contraria diversorum generum, amplius contrariantur quam ista : quoniam per specificas et generales differentias contrariantur : et sic nulla diversa sensibilia videntur simul posse sentiri. Sicut autem diximus de contrariis et mediis in visu, ita est in contrariis et mediis aliorum sensuum, velut chimorum hic quidem est sapor dulcis, hic vero amarum : et commixta ex eis diversa media non possunt simul sentiri : eo quod ipsa media sunt proportionales contrariorum, ita quod unum abundat plus in uno et alterum in alio : et ideo simul in eodem esse non possunt, sicut media in voce super diapason et diapente quæ simul sentiri non possunt, nisi sensitivum primum ea sentiat, sicut unum mixtum ex ambobus : si autem sic sentiat, tunc una proportio et commixtio extremitatum contrariorum fit ex eis, et tunc ut unum sentit quod neutrum illorum est : et aliter non contingit diversa simul sentiri, sicut ostensum est supe-

rius : et sic enim commixtio in uno medio ex duobus simul erit, quæ est proportio multi ad parvum, si per abundantiam. et defectum extremorum medietas accipiatur, et sic erit simul proportio paris ad impari : impar enim numerus parem vincit uno : et ita est de medio in quo vincit alia extremitas alteram. Si ergo magis et multo amplius, sicut diximus, differunt ab invicem prima genera contraria dicta in alio et alio genere quam sensibilia dicta in eodem genere : sicut dulce et nigrum multo amplius differunt secundum speciem et formam, quam album et nigrum.

Amplius autem si detur alterum duorum ex dicta proportionem, quod oporteat ad minus simul sentire, aut ipsa contraria, aut genera eorum, et habitum est quod plus differunt genera contrariorum quam esse contraria, tunc oportet quod si illa quæ contraria sunt, non simul possunt sentiri, quod nec illa quæ sunt genera contrariorum : ergo nulla duo sensibilia simul possent sentiri, ut videtur.

CAPUT IV.

De falsa solutione quorundam circa inductam quæstionem.

Quod autem ad istam quæstionem dicunt quidam tractantium de sensu et sensato de concordii harmoniarum, concedentes quoniam nullæ simul duæ consonantiæ vel duo soni perveniunt ad auditum, sed successive una post aliam : sed

propter temporis insensibilitatem quæ est inter unam et aliam, decipere videtur auditum, ita quod putatur consonantia diapente vel diatesseron audiri simul : et hoc volunt referre similiter ad visum et ad sensitivum primum, concedentes propter inductas dubitationes nulla duo simul sentiri sensu communi, nec simul audiri, nec simul videri : duo etiam quæ sunt partes alicujus totius, oportet dicere aliquem utrum unum recte dicatur an non : est enim examinandum dictum istud, et non statim oportet opinari, quod non sit aliter simul videri rem aliquam vel audiri, nisi quando decipiuntur sensus per tempus insensibile quod est inter sensum unius, et sensum alterius. Si enim hoc quod dicunt, non est verum, tunc non oportet aliquod tempus insensibile per quod decipiatur ut credantur duo simul sentiri, sed tota et omnia simul sentiri et non decipi propter tempus.

Si enim sensus sentit aliquid alicujus sensibilis, hoc est, aliquam partem unam et aliquid, vel aliam partem ejusdem sentit incontinenti ex continuo tempore : tunc oportet ipsum non decipi, quod ipse sit sensus illius partis : quia quodcumque sensus accipit aliquid de sensibili, tunc sentit se accipere illud cum sensibili cognitione : et tunc non latet id quod sic accipit. Est enim sensus aliquis tunc per formam sensibilis informatus, et tantus est quantum accipit de sensibili : et utrumque istorum est in continenti, hoc est, in continuo tempore sensibilitatis secundum actum factæ : ergo tunc non latet sensum tempus unius et alterius : quoniam si lateret eum, simul etiam acciperet sensibilem cognitionem de aliquo : et hæc duo stare non possunt simul, quia sequeretur quod idem noscet per sensum et non noscet. Cum enim accipit sensibile perfectum, tunc etiam apprehendit tempus quando accipit : sensus autem qui est omnino rei insensibilis, ille decipit sensum et latet : et hoc quidem per se manifestum est : hic enim

decipitur quidem ipse sensus sicut sensus secundum actum factus : hoc enim non deprehendit sensus, quando est super insensibile, quamvis forte videat ipsum et sentiat secundum quod sentit. Si ergo tempus sic dicatur insensibile, et cum hoc ponatur sentire : tunc sequitur quod sensus videt et sentit secundum quod sentit : et tamen non deprehendit se sentire, eo quod est insensibile tempus : et hæc sunt impossibilia.

Amplius etsi nos concedamus, quod est quædam magnitudo et temporis et rei insensibilis propter parvitatem, sicut supra diximus, non propter hoc utique esset aliquod tempus vel res aliqua quæ non sentitur, id quod in hujus temporis aliqua parte, vel istius quanti temporis aliquam partem videt. Dixerunt enim quidam, quod in toto tempore nihil videtur simul, sed in partibus temporis videtur pars et pars rei visibilis, et in toto tempore simul nihil videtur. Hoc autem dixerunt, quia voluerunt visum modum esse visus super visibile, et discursu dixerunt perfici visum, ita quod pars in parte temporis et in alia parte videtur alia pars, et in toto tempore simul nihil omnino. Et licet nos concedamus quod continuum et tempus et visibile dividitur, non tamen propter hoc concedimus quod in toto et totum nihil videatur hac de causa : quia visio si fiat per luces et partes rei visæ, ita quod in nulla hora sit totius rei simul : hæc est enim opinio Euclidis in libro de *Visu*, et opinio omnium eorum qui dicunt visum perfici transitu aliorum super illud quod est visibile. Si enim dicimus quod intus suscipiendo, non tam magnitudine simul videt et sentit in continuo toto tempore, sicut necesse est dicere si videamus intus suscipiendo, eo quod non recipitur pars et pars formæ visibilis per vices temporis, sed tota species simul in toto tempore visionis, tunc non potest alicui parti totius temporis auferri per divisionem in qua non sentiebatur totum, sed pars ejus una quæ sit prima, vel media, vel tertia.

Et hujus exemplum est, sicut si ponamus tempus visionis unius secundum actum factum esse $D G$: dico quod si tunc videat totum intus suscipientem, non possumus aliquod nunc vel horam auferre a $D G$ tempore, in qua non sentiebatur totum : non ergo possumus dicere quod aliquod hujusmodi sensibile sentit in parte temporis, sed totum in toto sentit : hoc enim esset dictu, sicut nos diceremus quod aliquis videt totam rem unam sicut arenam hanc, quia partem arenæ videt, et numquam totam arenam simul : et sicut diceremus quod hic ambulet in anno, quia ambulat in parte anni hac et illac : ambulatio enim actus est qui non est motus temporis, nisi quia pars ejus est divisa per partes temporis : et ultima pars ejus est in ultima parte alterius. Si igitur visio talis est actio, quod discurrat per vices temporis super partes magnitudinis visibilis, sicut dicunt Plato et Euclides et alii Auctores, ad radiorum esse, toto tempore $D G$ nihil sentit de visibili, sed in ultimo puncto temporis jam sentit totum sensibile, eo quod tunc tetigit punctum ejus. Si ergo secundum istos dicitur totum sentire $A B$, quod sit magnitudo visibilis et sensibilis : hanc enim ponimus esse $A B$: et hanc, ut diximus, dicitur totam sentire et totam rem sensibilem, eo quod in ejus parte temporis sentit aliquid ejus quod est $A B$, et sic per vices curret per partes : sic enim est eadem proportio in $A B$ indivisibili quæ est in $D G$ tempore : tunc enim in D sentit A et in G sentit B , et sic dicitur totum in toto tempore sentire. Hoc autem est inconveniens : quia secundum hoc oportet sentire sensum unum aliquid quod est pars $A B$ et alicujus temporis $D G$: erit illud sicut G . Totum autem simul secundum hoc numquam est sentire, eo quod numquam per indivisibilia potest transire totum : si enim radius discurrat, cum extremitas sua sit indivisibilis, non attinget nisi indivisibile et in indivisibili tempore : et sic non sentiet umquam nisi aliquot indi-

divisibilia in aliquot indivisibilibus temporis : et totum numquam perficiet secundum sensum.

Cum igitur hoc inconueniens sit, oportet dicere quod omnia simul sensibilia sunt, sed sic fit visio, quod videantur quod sunt indivisibilia quæ sunt in ipso. Diximus enim supra quod solam magnitudinem et ea quæ sensibilia decernuntur ab ipso, videt a longe visus : sed non videntur ea quæ quantumcumque indivisibilia sunt in ipsa : sed videt visus id quod non est indivisibile. Causa autem hujus dicta est in antedictis. Ex his igitur patet, quod nullum tempus in quo fit visio est insensibile et indivisibile in quo fit motus visus super indivisibile rei visæ, sicut isti dixerunt. Nos autem multa superius in primo tractatu contra istam opinionem induximus quæ hic supponimus : hoc autem ideo fecimus ut confundantur qui adhuc hodie istam defendunt opinionem.

CAPUT V.

De solutione primæ quæstionis qua quaeritur, an plura sensibilia contingat sentiri ab eodem in indivisibili tempore.

Antequam autem solvamus hoc ultimum inductum, videtur nobis considerandum esse de prius introducta dubitatione, utrum scilicet oportet primum sensitivum simul multa sentire, sicut demonstratum est in libro de *Anima*, vel oportet

hoc non fieri simul, sed divise, sicut videntur suadere superius introductæ sophisticæ objectiones? Singula autem dico sentiri plura quando sentiuntur in una indivisibili virtute animæ et tempore ad se invicem comparata. Est ergo primum considerandum an unam numero animam, hoc est, animam unam simplicem virtutem oportet simul tempore sentire hoc per unum sensum, et alibi in alio organo per alium? ita quod hæc duo non sentiat in divisibili parte sua et tempore divisibili, sicut dictum est in libro de *Anima*, quod sensitivum primum sentit simul accepta per diversos sensus, eo quod refertur ad sensum sicut centrum ad lineas quæ egrediuntur ab ipso ad circumferentiam : sic enim vocamus indivisibile in quo plura sentiuntur simul, sicut omni sensu existenti continuo et continuato ad istud indivisibile primum sensitivum. Omnium enim organa sensuum particularium colliguntur et continuantur ab organo sensitivi primi : aut igitur sic sentit simul hic et alibi acceptum sensibile, sicut diximus : aut sentit primum quidem ea quæ secundum suum sensum sentiuntur, et postea ea quæ sunt secundum alium sensum. Hujus autem quæstionis exemplum est, sicut si nos quæramus an visus sentit plura simul aut non? ac si diceremus eum simul plura sentire, sicut nunc simul sit sentiens alium et alium colorem : eo quod plures partes habebunt hæc sensibilia in quibus alius et alius color accipitur : et supra probatum est non per partes discurrere visum super visibile, sed formam totius accipere simul : hæc enim plura semper sentiuntur rursum in eodem genere sentiendi, quia sentiuntur per visum omnia.

Et si forte dicat aliquis visum habere oculos duos, et in uno sentire unum, et in alio aliud, nihil obstat similiter esse in anima quæ est primum sensitivum : quia sicut duo oculi diriguntur ad idem in quo perficitur virtus visiva, sicut supra diximus, ita etiam omnes communiter sensus diriguntur ad unum et idem

indivisibile in quo est prima virtus : et ideo est unus et idem effectus eorum. Ex his ergo forte unum quidem fit, eo quod diriguntur ad unum : et ideo est unus et idem effectus eorum. Si vero conceditur, quod secundum unum quidem sit sentire quod est ex ambobus sensibus duobus vel pluribus, tunc quoad hoc necessario unum sensibile erit secundum quod aliquod ad hoc est relatum, sed separatim comparatum ad hunc proprium sensum vel ad alium non similiter se habebit, sed potius duo erunt : et ideo diximus in libro de *Anima*, quod sensitivum primum est formaliter unum, et materialiter plura, eo quod plura terminantur ad ipsum.

Amplius sensus accipientes sensibilia sunt plures, sicut aliquis sciens dicat plures : ille enim non sentit plures per comparisonem ad sciens primum, sed per comparisonem ad ea de quibus est scientia : non enim potest esse aliquis actus sine virtute essentiali et per seipsam quæ est actus illius operatrix, sicut scientia non est scientia nisi ab operatione primi et per seipsam scientis quod est intellectus agens. Similiter nec sensus actus erit sine virtute secundum seipsam sentiente. Hoc autem non est visus in quantum visus, qui si sic diceretur, tunc non sentiret auditus. Oportet igitur quod virtus illa sit primum sensitivum : absque hac igitur non erit aliquis omnino sensus : si enim hæc virtus quæ sensitiva est, simul multa et in uno sentit indivisibili tempore vel non, tunc manifestum est quoniam alia virtus quæ est sensus communis, simul plura sentiat : magis enim oportet hæc sensibilia etiamsi genere sint alia simul esse multa quam sensibilia, eo quod minus differunt.

Quod autem diximus intellectum sentire, ideo dicimus quod ex sensu multa accipit et talem comparisonem habet ad sensus interiores, qualem habet sensitivum primum ad sensus proprios positio : omnes illi qui dixerunt non simul plura posse sentire intellectum, sic dixerunt et

corporalem virtutem, sicut in libro de *Anima* diximus. Si autem diceretur quod alia virtute sentit dulce, et alia album, et in alia et alia parte animæ : tunc dicemus quod cum sensitivum primum per se neutrum sit istorum, oportet quod sensitivum quod est ex eis necesse est aut esse unum, aut non esse unum. Non autem potest dici quod non fiat unum, quia omnis multitudo quæ est sub uno communi, refertur ad unum quod est principium ipsius ex quo fit. Necesse est igitur quod ex eis fiat unum sensitivum primum : oportet enim quod una quædam sit sensualis pars prima et per se.

Quæramus ergo, cujus unius organi corporalis est illa pars animæ quæ est per se et primo sensualis : hoc enim nullum potest esse ex istis quæ vocamus organa propriorum sensuum, sicut probatum est prius : quia cujuscumque unius solus esse diceretur propriorum, sequeretur quod sentire non conveniret alteri, eo quod proprii sensus a se invicem differunt in eo quod proprii sunt.

Ex omnibus igitur his sequitur, quod necesse est unam dici partem animæ qua omnia sentit sensibilia propriorum sensuum, sicut prius in libro de *Anima* dictum est. Aliud autem genus propriorum sensibilibium in quantum est aliud et aliud sentit per aliud et aliud genus sensuum. Dicamus igitur quod secundum quod indivisibile est primum sensuale secundum actionem unum existens, idem et unum est sensuale dulcis et albi et aliorum sensibilibium : quando vero divisibile fit secundum actionem, ut scilicet referatur ad agentia diversa quæ materialiter sub ipso sunt : tunc efficitur etiam sensuale dulcis et albi aliud et aliud. Ex his igitur determinatis habetur, quod per idem indivisibile possunt sentiri plura : sed debemus adhuc dicere an simul, an non simul.

CAPUT VI.

*De alia solutione et causa prius inductæ
quæstionis.*

Aut ergo, sicut dictum est, dicemus causam unitatis primi sentientis accipientes esse illam quæ dicta est, quod scilicet necesse sit propria sententia referri ad proprium sentiens unum: vel dicemus, quemadmodum oportet esse ipsas res sensibiles, ita oportet esse in anima sentiente. In rebus enim unum et idem numero simul est album et dulce et sonans et odorans, et sic de aliis multis sensibilibus quæ sunt unum subjecto, nisi per subjectum divisæ sint passiones sensibiles ad invicem: sed quando sunt unum subjecto, tunc non est alterum esse eorum unicuique, quia color non est sapor, et sic de aliis.

Similiter igitur ponatur esse in anima idem et unum primum sensitivum esse omnium, quod secundum rem comparatum ad hunc sensum et alium fit aliud et aliud respectu horum, quodlibet genere factum aliud et aliud respectu aliorum actus specie aliud et aliud cum in rebus sensibilibus fit quando sunt unum subjecto et differunt secundum esse formale, oportet in anima aliquid unum esse quod dicat talem esse convenientiam et talem differentiam esse in sensibilibus, sicut in libro de *Anima* dictum est. Quare illud idem et unum existens per essentiam, sed proportione quam habuit sen-

sui vel illi comparatum, non est idem et unum secundum esse: et quod dictum est in objectionibus, quod non contingit duo sentiri simul, reducebatur ad duas causas: quarum una fuit, quod motus et operatio unius virtutis non terminatur simul super duo: et alia fuit, quod unus motus excludat alium, sive sint contraria, sive disparata et non contraria: et sive sint in eodem genere, sive in alio genere: et hoc solvere non est difficile.

Dicemus ergo secundum prædicta, quod virtutis unius quæ secundum essentiam et esse est eadem, non potest esse operatio super duo: sensitivum autem primum non est tale, sed essentialiter est unum, et secundum esse diversificatur: et ideo operatio ejus existens est una secundum quod comparatur ad essentiam ipsius primi sentientis, sed efficitur plures ex parte qua est in esse diverso secundum quod comparatur ad sensus proprios, sicut centrum unum in essentia existens, plurá est secundum esse terminando et principiando lineas quæ egrediuntur ex ipsa: et hæc solutio est Averrois et Alfarabii, et est bona.

Posset tamen dici, quod aliquando duo contingit referri ad unam virtutem dupliciter: possunt enim referri ad ipsum sicut fines: et hoc modo impossibile est quod una virtus secundum actum operationis accepta sit simul super duo operans, quoniam hoc modo verum est quod actus et operationes suis finibus differunt: et propter diversos fines efficiuntur diversæ operationes vel motus qui non sunt simul in eodem operante, sicut dictum est in quinto *Physicorum*. Aliquando autem non sunt comparata ad ipsam sicut fines, sed sicut ea inter quæ facit operationem diversitatis et convenientiæ: et sic una virtus potest operari super diversa: reducit enim ea ad unum in quo uniuntur vel separantur sicut ad subjectum vel comparisonem, et in illo uno accepta componit ea vel dividit, et alias facit inter easdem comparationes. Nisi enim plura ad invicem reducerentur ad

unum, impossibile esset unam secundum actum virtutem operari super ea, una numero operatione et in eadem natura temporis. Talis autem virtus non potest esse una multorum materialium virtutum sicut est sensus proprius : quoniam tales virtutes nullo modo sunt plurimum nisi eorum quæ sunt unius generis et divisim. Oportet igitur quod sit forma quædam uniens plures materiales, per quas accipit plura per modum qui est prædictus.

Et quod dictum est, quod unus excludit alium, verissimum est quod unus repellit alium quando accipitur ut finis : sed quando accipiuntur ambo sicut reducta ad unum, tunc neutrum est ut finis : et ideo tunc neutrum secundum propriam virtutem movet. Quod autem obijciunt de contrarietate extremorum vel mediorum vel diversorum generum, absque ratione est dictum : quia in libro de *Anima* ostendimus, quod etiam quamvis organa sensuum quorundam accipiunt species sensibilibus materiales, sicut gustus et tactus, tamen hoc quod reddunt primo sensitivo, non habet esse nisi intentionale et simplex : hoc autem non habet contrarium : et ideo intentiones contrariorum ad primum sensitivum delatæ non sunt contrariæ, sicut nec in intellectu rationes contrariæ sunt contrariæ, quia aliter anima nullo modo subjiceretur eis : si enim secundum esse materiale subjiceretur anima formis rerum, oporteret quod esset alba et nigra, lapis et lignum, quod in libro de *Anima* est improbatum. Est igitur quæstio dicta quoad omnes suas objectiones sic sufficienter soluta.

CAPUT VII.

De improbatione Platonis et Euclidis opinionis superius inductæ dicentium nihil sentiri totum simul.

Oportet autem nos etiam solvere et determinare id quod ex Platone et Euclide introductum est : et ut sit conveniens solutio, prius repetamus istorum virorum positionem et rationem quas induximus supra contra eosdem.

Fuit autem positio istorum sensum et visum fieri extra mittendo radios, quorum tactu accipitur sensatum : et quia non contingit nisi pars post partem, ideo non dicebant accipi aliquod sensibile nisi per partes : et tamen in hoc extenderunt, quod in tactu corporali perfici dicerent intellectualem operationem, sicut nos in libro de *Anima* diximus. Causa autem positionis a Platone quidem fuit, quoniam spiritus vehementes in corpore virtutes animæ videbat esse lucidos et lumina quædam : et cum putaret hæc lumina egredi de corpore, dicebat vehere secum virtutes sensibiles, et per tactum ad sensibilia habere notitiam sensibilibus, sicut nos superius in primo tractatu explanavimus. Euclides autem dixit hoc de solo visu : propter quod demonstravit in libro de *Visu* aliquid in pavimento jacens non videri, cum tamen basis pyramidis visus effundatur super totum pavimento : cujus causam dicit eam esse quæ dicta est, quod visus perficitur decursu

radii qui dicitur axis pyramidis : et ideo non considerat jacens in pavimento nisi quando tangitur ab axe pyramidis. Hæc igitur est positio istorum.

Dicebant autem insensibile esse tempus transitus radii de parte in partem, et ideo putari rem videri simul totam : nos autem ostendimus nullum tempus in quo accipitur sensibile esse insensibile : quia scit tunc quod visus est distinctæ rei alicujus : et ostendimus etiam, quod si visus esset in parte temporis super partem visibilem, oporteret quod illæ partes essent indivisibiles, quia radius tangens est extremitatis indivisibilis : et adhuc sequitur duplex inconueniens, quorum unum est, quod indivisibile est visibile, quod superius in prima quæstione est improbatum. Secundum autem est, quod in toto tempore numquam erit visus, nec alicujus totius umquam erit visus : quoniam contingit transire indivisibilia infinita quæ sunt in toto tempore et in toto visibili. Et hæc est summa nostræ disputationis quam supra posuimus.

Dicamus igitur hic determinantes prædicta, quoniam omne sensibile est magnitudo, et quod non contingit indivisibile sentire : et hoc manifestum est. Si enim dicamus intus suscipientes nos sentire, tunc oportet quod sensibile sit unum quoddam quantum : et visibile est quoddam unum quantum indivisum : et non videtur istud sic quod apostimo videatur in infinitum. *Apostimum* autem voco indivisibile, quod post quodlibet indivisibile actu acceptum in continuo relinquatur accipiendum potentia in infinitum. Id enim quod videtur, videtur unum indivisum et infinitum : quia tota species sua visibilis simul abstrahitur et simul venit ad visum. Similiter autem est de odorabili et de quolibet alio sensibili, quæcumque non tangendo, sed per medium extrinsecum sentimus. Quæ enim tangimus, aliquando tangimus secundum partem et partem, sed non in infinitum : quia tangimus ea ad quantitatem manus vel alte-

Apostimum.

rius membri tangentis, cujus quantitates non sunt infinitæ in ejus quod sentitur quantitate : est enim ultimitas apostimi dicta ab Euclide et Platone unum indivisibile quod numquam videtur : eo quod ad ipsum numquam contingit devenire visum, eo quod ante quodlibet tale sunt infinita illi æqualia, per quæ prius oportet currere visum. Primum autem indivisibile in continuo sensibili videtur secundum istos : quia si radius non tangeret primum aliquod indivisibile, non inciperet discurrere super continuo quod videtur. Primum autem quod sic videtur, necesse est esse indivisibile propter id quod non oportet sentiri secundum istos aliquid amplius, sive majus existens indivisibili : et sic indivisibilis est extremitas radii tangentis ea quæ videntur. Sed hoc indivisibile necesse est sentire, sicut dictum est in eo quod est indivisibile : quia nihil sentitur secundum istos, nisi in eo quod est indivisibile : et ideo indivisibilitas non repugnat sensualitati secundum actum. Sed quando ponitur in ultimo communi visibilis, tunc est unum quoddam quod est insensibile, non propter indivisibilitatem, sed quia est visum numquam devenire ad ipsum. Primum autem illud idem positum in continuo, est sensibile, sicut diximus : ergo accedit simul idem visibile et indivisibile esse tantum diversificatum penes positionem in primo vel in ultimo. Hoc vero non est impossibile, quia quod visibile est per se, ubicumque ponatur, erit visibile.

Igitur de instrumentis quæ dicuntur sensuum organa, et de his sensibilibus quomodo se habeant tam organa secundum se, quam sensibilia secundum se, et quomodo singulariter, et quomodo communiter ad sensum relata, et quando se habent singulariter secundum unumquodque organum sensus, sit hoc modo a nobis determinatum. Sufficiunt enim ista cum his quæ in libro de *Anima* considerata sunt.

INDEX

Tractatum et Caputum in libro de Sensu et Sensato.

TRACTATUS I.

CAP.	I. De ordine et modo dicendorum.	1	structione hujus erroris per ea quæ sequentur ex dictis eorum.	17
	II. Qualiter auditus et visus hominibus dantur ad utilitatem?	4	IX. Et est DIGRESSIO declarans errorem istorum ex his quæ dicunt de reflexione facta a speculo.	22
	III. De falsa opinione Antiquorum qui visum igni adaptaverunt.	5	X. Et est DIGRESSIO declarans solutiones dubiorum pro ista opinione superius inductorum.	24
	IV. De vera causa quare in tenebris aliquando videtur ignis micare ex vel oculis.	7	XI. Et est DIGRESSIO declarans quare unum videtur duo.	28
	V. Et est DIGRESSIO declarans quatuor opiniones Antiquorum de natura oculi visus.	8	XII. De disputatione Aristotelis contra Empedoclem et Platonem, in quo est etiam de noctilucis.	29
	VI. Et est DIGRESSIO declarans rationes dictarum opinionum quæ dicunt extra mittendo fieri visum.	11	XIII. De improbatione opinionis Democriti, qui dicebat oculum videre solum ubi picturam et apparitionem formæ sensibilis.	31
	VII. Et est DIGRESSIO declarans improbationem opinionum, quæ dicunt extra mittendo fieri visum.	13	XIV. De comparatione opinionis Democriti ad opiniones Empedoclis et Platonis.	33
	VIII. Et est DIGRESSIO de de-		XVI. De assignatione aliorum organorum sensuum.	36

TRACTATUS II.

De generatione sensibilium.

CAP. I. Quæ sit tractatus intentio, et quæ sit natura coloris in communi?	38
II. Et est DIGRESSIO declarans dubia quæ sunt circa coloris generationem.	42
III. De falsis opinionibus quæ sunt circa generationem mediorum colorum.	48
IV. De improbationibus inductarum opinionum de mediis coloribus.	50
V. De vera causa commixtionis mediorum colorum.	51
VI. Quod homo prave odorat, et de generatione saporis in communi.	53
VII. De numero mediorum saporum, et de generatione eorum, et quare sunt septem.	58
VIII. De falsis opinionibus quæ sunt circa sensibilia.	61
IX. De medio et proprio subjecto odorum secundum genus.	62
X. De errore quorundam dicentium, quod odor est evaporatio fumalis.	64
XI. De proportione odorum ad sapes, et de numero odorum.	65
XII. De duabus speciebus odorum, et quare una earum est omnibus propria?	67
XIII. Quod odoratus non spiran-	

tium ejusdem rationis est cum odoratu spirantium.	70
XIV. Qualiter odoratus et odorabile sunt media sensuum et sensibilia?	72
XV. De errore Pythagoræ qui quædam animalia dixit nutriri odoribus.	73

TRACTATUS III.

In quo tractantur dubia communia quæ sunt circa sensata.

CAP. I. Qualiter ad minima dividitur sensatum?	75
II. Utrum sensibilia in momento perveniant ad sensum, vel primo per virtutem ad medium, et sic successive ad sensum?	79
III. Disputatio in qua est, quod duo sensibilia non contingit simul sentiri in indivisibili tempore.	83
IV. De falsa solutione quorundam circa inductam quæstionem.	87
V. De solutione primæ quæstionis qua quæritur, an plura sensibilia contingat sentiri ab eodem in indivisibili tempore?	89
VI. De alia solutione et causa prius inductæ quæstionis.	91
VII. De improbatione Platonis et Euclidis opinionis superius inductæ dicentium nihil sentiri totum simul.	92



D. ALBERTI MAGNI

RATISBONENSIS EPISCOPI, ORDINIS PRÆDICATORUM,

PARVA NATURALIA

LIBER

DE MEMORIA ET REMINISCENTIA.

TRACTATUS I

DE MEMORIA.

CAPUT I.

*Et est DIGRESSIO declarans intentionem
Avicennæ et Averrois de memoria.*

Reliquorum autem primum considerandum est de *memoria* cum agimus de communibus animæ et corporis animati,

et dictum sit qualiter sensibilia veniunt ad animam, relinquitur considerandum qualiter anima per sensibilia existentia apud eam reddat in ipsas res sensibiles quæ sunt extra ipsam. Tunc enim primo perfectus est motus sensibilibus. Non enim sensibilia accipit anima propter aliquid nisi ut per ipsa in res sensibiles veniat.

Quia autem, ut mihi videtur, omnes fere aberraverunt Latini in cognitione harum virtutum quas *memoriam et reminiscentiam* appellamus, ut æstimo propter verborum Aristotelis obscuritatem, ideo primo volumus ponere planam de memoria sententiam Peripateticorum, antequam Aristotelis sententiam prosequamur.

Revocentur igitur ad memoriam ea

Memoria
perficitur
ex quatuor.

quæ de virtutibus sensibilibus apprehensivis dicta sunt, et inveniemus quod quatuor sunt in quibus memoriæ perficitur operatio. Non enim dicimus nos rememorari, nisi quando per id quod habemus apud nos, distincte recognoscimus id quod prius vidimus et audivimus et didicimus. Cum autem didicimus, quod memoremur ex eo quod est apud animam, oportet necessario duas præcedere operationes, quarum una est esse receptum id a quo memoria incipit : et hæc est operatio sensus communis. Secunda autem est esse conservatum apud nos ex præsentia accepto in præteritum. Et ostendimus in libro de *Anima*¹ impossibile esse, quod ejusdem potentiæ organicæ sit bene recipere et bene conservare. Hanc autem conservantem Avicenna vocat formalem vel imaginativam. Averroes autem in hujus libri commento vocat eam conservantem, non imaginativam vel formalem : cujus causa secundum eum est, quia imaginatio quasi mutatio dicta, est virtus referens formam ad rem cujus est forma, sed conservans non est nisi retinens formas in se depictas : propter quod dicit quod conservata in nobis plura sensibilia habere possumus, sed imaginari plura simul non possumus. Patet igitur ex his necessario probatum esse, quod quoad hanc partem memoriæ, quod scilicet procedat et incipiat ex eo quod habemus apud nos, duæ virtutes ante eam esse exiguntur.

Similiter autem ex illa parte qua distincte revertitur in rem prius visam vel auditam, oportet unam virtutem ante eam operari. Non enim distincte cognoscitur res ex ipsa ejus figura : quia si hoc esset verum, tunc distincte quamlibet cognosceremus rem, cujus figuram apud nos habemus : et hoc non potest esse, cum multa sit similitudo in figuris : sed distinctam rei cognitionem operatur in ani-

ma, quando cognoscitur quod hæc figura hujus rei et non alterius intentio est. Oportet igitur, quod ante memoriam quædam virtus operetur quæ ex ipsa figura elicit eorum intentiones singulares : et hanc quidem Avicenna bene et proprie vocavit æstimationem. Averroes autem improprie vocat cogitativam animalium brutorum, per quam fugiunt nociva et persequuntur convenientia. Cum igitur memoria habeat utrumque eorum, oportet in ipsa depictas esse figuras et intentiones. Completur enim actus memoriæ ex compositione horum duorum.

Propter quod dicit Averroes eleganter in hujus libri commento quinque loca apprehensivorum organorum esse in capite : quorum unus est exteriorum organorum, quem vocat valde corporalem duri corticis : quia in cortice præsentia rei accipit : et complementum illius loci est in organo sensus communis in prima parte capitis medullosa et humida. Secundus autem locus est sensus communis, qui primus est locorum spiritualium, sicut diximus alibi : quia sensus communis formalis est ad sensus proprios comparatus. Ideo iste locus est complementum, ut diximus, loci primi. Tertius autem qui ut complementum se habet ad secundum, organum est imaginationis locus : imaginatio enim est spiritualior quam sensus communis, et accipit imaginationem pro eodem cum phantasia. Qualiter autem se habeat veritas de hoc, in libro de *Anima* determinatum est. Quartus locus est in organo virtutis distinctæ, quam vocat Averroes *cogitativam brutorum*², quæ distinguit intentiones a figuris rerum. Quintus est in organo virtutis memorativæ : et ille locus est magis spiritualis inter omnes, quia recipit medullam ejus quod tres vires sensus, scilicet communis et imaginativa et distinctiva distinxerunt : et per id distincte et discrete revertitur

¹ II de Anima, tract. iv, cap. 7.

² Cf. III de Anima, tract. i, cap. 8.

ad res. Et ideo virtutis memorativæ actus est, quod componendo intentiones distinctas cum imaginibus rerum distincte ad res revertitur.

Quod autem quinque loca ista in capite distincta sunt ab actionibus, probat Averroes concorditer cum Avicenna dicentes quod receptio sensus communis et imaginatio sunt in fronte in anteriori parte cerebri, cognitio sive distinctio in medio, et conservatio et memoria in posteriori. Et ideo læsa posteriori parte inducitur oblivio : et manet cognitio et distinctio et imaginatio et sensibilibus acceptio. Læsa autem media, remanent anteriores et posteriores secundum suum modum et debilitatur media. Et læsa priori aufertur operatio prima et remanet media et postrema secundum suum modum. Ex his igitur patet, quod conservativa secundum Averroem, non differt a memoriali nisi secundum esse : quia conservativa conservat tam imagines quam intentiones : sed memoria componendo ista duo refertur ad res extra per ipsa. Quod igitur Averroes et alii dicunt esse sententiam Aristotelis, hæc est.

Ego autem unum puto esse addendum antequam sententiam Aristotelis prosequamur. Hoc autem est quod dicitur, quod memoria sit primi sensitivi. Huic autem vehementer insistentes, dicunt memoriæ organum esse in partes anteriori capitis : quod est contra omnes de viribus animæ loquentes, et qui Peripateticorum imitati sunt peritiam. Propter quod nos tenemus primum sensitivum esse, quod est fons et origo sensualitatis, et cui contingit sentire secundum se semper et in omni sensibili : et patet quod hic non est sensus particularis. Et si esset etiam sensus communis et memoriæ idem organum, tunc omnia habentia sensum communem, haberent etiam memoriam : quod falsum est, quoniam vermes et conchæ memoriam non habent. Propter quod patet, quod primi sensitivi est sicut a quo est primus mo-

tus ejus, sicut phantasia dicitur motus a sensu secundum actum factus. Sic igitur dicitur memoria esse primi sensitivi sicut id in quo quiescunt motus primi sensitivi, et a quo fit reflexio in rem primo per sensum acceptam.

CAPUT II.

Quæ libri intentio, et quæ vere sint memorabilia ?

His habitis, sententiam ponamus Aristotelis, dicentes considerandum esse primo de memoria inter reliqua opera animatorum quæ communia sunt corpori et animæ. Considerandum autem est etiam de actu memoriæ, qui est memorari, quid est utrumque istorum, et propter quas causas sit in animatis quibusdam. Et considerandum est etiam cui partium animæ accidit hæc passio quæ est memoria, utrum scilicet rationali, vel sensibili : quia constat quod non accidit vegetabili. Considerandum est etiam posterius de ipso reminisci : quia licet conjuncta sint aliquo modo memoria et reminiscentia, tamen non omnino idem sunt : et hoc scitur per subjecta ipsorum propria. Quia non idem sunt homines bene memorativi et bene reminiscibiles, sed sicut in multis et frequenter, tardi quidem ingenio sunt memorabiles. Reminiscibiles autem ut frequenter sunt velocis ingenii et bene discentes.

Quia autem ab objectis oportet cognoscere virtutes animæ et actus, primo ac-

cupiendum est qualia sunt memorabilia : hoc enim multoties decipit propter id quod latet. Dicimus igitur, quod ea quæ sunt futura ut futura sunt, nullo modo convenit memorari, sed futura potius sunt opinabilia vel sperabilia. Opinabilia quidem quæ simpliciter expectantur ut vera, sicut solis eclipsis, vel terræ motus, vel aliquid hujusmodi. Sperabilia autem quæ expectantur ut proficientia ad vitam, sicut fertilitas anni, vel victoria belli, vel aliud hujusmodi. Sub sperabilibus autem etiam timenda continentur, quæ expectantur ut mala futura. Scientia enim quæ est sperativa, sicut quidam mathematicorum dicunt divinationem omnium esse sperativam scientiam, et maxime eam quæ est per astrorum positionem et motum, eo quod illa super certiora fundantur principia. Sunt autem tales scientiæ necromantia, et geomantia, et alia hujusmodi, sed non habent adeo verum nomen scientiæ, sicut divinatio quæ est per astra. Sic igitur patet quod futuri memoria non est.

Similiter autem memoria non est præsentis : sed potius sensus est præsentis : sensu enim neque futurum neque factum in præterito cognoscimus, sed tantum præsens. Cujus causa est, quia sine materiæ præsentia non agit sensibile in sensum. Cum igitur memorabile cernat aliquam temporis differentiam, oportet quod memoria sit facti in præterito, et non præsentis, neque futuri : præsens enim quando adest in sensu, sicut cum aliquis videt præsens album, nullius dicitur memorari. Similiter autem cum aliquis considerat per intellectum, cum aliquis sit actu considerans et intelligens. Intellectum enim secundum quod est hujusmodi, est universale quod est ubique et semper et ab omni differentia temporis separatum. Memorabile autem concernit differentiam temporis quæ est præteritum tempus. Cum igitur aliquid adest, hoc sentire dicimur. Cum autem per intellectum consideramus aliquid, illud dicimur scire. Cum vero sine

actibus, hoc est, sine actione propria objecti particularis vel universalis in ipsam habeat alicujus sensibilis cognitionem vel scientiam, tunc dicimur memorari, quia tunc oportet quod in rem cognitam prius procedat ex eo quod habet apud seipsam. Sicut, verbi gratia, si ad hunc triangulum qui non est præsens referat quod trianguli tres anguli æquales sunt duobus rectis : tunc enim speculatur per intellectum hoc quod didicit in præterito vel speculatus fuerit. Aut si sensibilem habet cognitionem, tunc sentit hoc quod prius audivit vel vidit : oportet enim quod cum aliquis secundum memoriam agit, sic dicere in anima ad præteritum referendo, quod hoc prius audivit, aut aliter sensit, aut intellexit, quando memoria est intelligibilium per accidens, sicut infra ostendemus.

Ex omnibus autem præmissis patet quod memoria neque est sensus, neque opinio rationalis, sed est habitus aut passio cujusdam horum quæ sunt sensibilis vel rationalis animæ, cum fiat determinatio præteriti temporis circa sensibile vel opinabile. Ipsius autem in ipso nunc præsentis non est memoria, sicut dictum est, præsentis quidem sensus, futuri vero spes, facti autem memoria. Et ideo post tempus rei circa quam agit anima omnis fit memoria.

Ex hoc autem ulterius concluditur, quod quæcumque animalium tempus sentiunt, hæc sola memorantur, et memorantur in eo scilicet in quo tempus sentiunt, sicut infra patebit. Non autem omnia animalia sentiunt tempus : sentitur autem tempus dupliciter, in se scilicet secundum quod est numerus motus : et sic rationabilia sola sentiunt et cognoscunt tempus. Alio autem modo sentitur tempus in temporali et non secundum se : et tunc sentitur sub determinata differentia temporis, secundum quam adjacet rei temporali : et hoc est obscure percipere tempus : et sic sentitur in præterito quando res præterit, sicut oves et capræ revertuntur ad caulas, cognos-

centes caulas ubi habitaverunt in præterito, et formicæ colliguntur in domibus suis præsentientes pluvias in futuro. Sed tamen minus sentiunt bruta futurum quam præteritum. Sentiunt enim præteritum per picturam præteritorum quæ sunt in ipsis : futura autem non præsentiant nisi signo aliquo præsentis, sicut vapore, vel calore, vel aliquo hujus. Ex his patet quid sit memorabile proprie.

CAPUT III.

Cujus partis animæ sit memoria ?

Nunc autem superest dicere cujus partium animæ sit memoria. Dicamus igitur, quod de phantasia prius in his quæ de anima sunt, dictum est : ubi etiam dictum est, quod intellectus possibilis non sit in nobis in actu sine phantasmate. Eadem passio accidit intellectui quæ accidit discretioni. *Discretionem* autem vocamus distinctam cognitionem unius ab alio, quæ fit per cognitionem quando applicatur universale particularibus, ut ex propriis particularibus distincta habeatur cognitio. Ita nulla in intelligibilibus utentes quantitate determinata secundum quod intelligibilia sunt, eo quod abstrahant a quantitate determinata intelligibilia, tamen discretam cognitionem habere volentes ex intelligibilibus

quæ apud nos habemus, describimus ipsa intelligibilia esse finita et determinata per quantitatem et figuram : et idem facimus cum opinamur. Omnia enim oportet reducere ad quantitatem et figuras determinatas, quando ex his quæ intelligimus vel opinamur, distinctam rei volumus accipere cognitionem : et si etiam intellectus ut intellectus non intelligat quantitatem determinatam, tamen quando reducit intelligibilia ad res, ponit ante oculos quantitatem : quia refert ad rem figuratam quasi esset coram oculis : sed intelligit tamen absolute quantitatem secundum rationem quantitatis, et non secundum quod est quantitas sic vel aliter figurata, quamvis natura et ratio quantitatum sit in universali ipsas esse infinitas et non figuratas figura hujus vel istius : tamen intelligibilia reducendo ad res ponit et disponit quantitatem finitam talis vel talis figuræ, quæ rebus competit acceptis per sensum : et hanc quantitatem secundum quod intelligitur solum absolute ad res extra non referendo, non intelligit, nisi quod quantitas est in universali habens quantitatis rationem. Hæc enim passio adeo vehementer sequitur intellectum possibilem qui ex sensu accipit, quod Dionysius Areopagita dicit ¹, quod « quando etiam aliquis aliquid intelligit divinorum, quod adaptat ipsum ad quantitatem et figuram in quibus manifestatur per actum, sicut motorum intellectum attribuimus figuræ circulari simplici motæ ab ipsis. »

Propter quam autem causam hoc conveniat intellectui possibili, quod nihil contingit ipsum intelligere eorum quæ sunt in tempore, sicut naturalia et mathematica quæ secundum esse sunt in tempore sine imaginatione continui et imaginatione temporis, cum tamen rationes universales eorum nec continuorum sunt, neque temporalium, alia ratio

¹ S. DIONYSIUS, De cœlesti hierarchia, cap. 2.

est quæ partim in libro de *Anima* dicta est, ubi diximus quod « possibilis intellectus movetur a phantasmate quod habet speciem continui et temporalis : » partim autem dicitur in libro de *Intellectu et intelligibili*. Sicut enim intellectus possibilis natus est moveri a forma quæ est cum continuo et tempore, sic connaturale est eidem intellectui coaptare universale continuo et temporali, quando ad rem revertetur per universale quod apud se habet, licet ipsum universale sit ubique et semper non habens aliquam figuram vel tempus. Habemus igitur ex omnibus determinatis, quod neque per imaginationem, neque per intellectum contingit redire in rem ex his quæ sunt apud animam nisi per figuram et speciem temporalem prius acceptam.

Videmus igitur qua parte animæ accipitur continuum et figura et tempus, et tunc sciemus cujus partis animæ sit memoria. Dicamus igitur, quod necesse est eodem cognoscere tempus quo cognoscuntur magnitudo et motus. Scimus enim quod tempus non habet rationem quantitatis nisi ex magnitudine et motu. Diximus autem in libro de *Anima* ¹, quod « phantasia est passio sensus communis sicut efficientis : » quoniam est motus et passio a sensu communi facta. Quare manifestum est, quod in primo sensitivo quod est sensus communis prima horum cognitio fit : memoria autem, sicut jam ante diximus, etiam illa quæ est intelligibilium, non fit sine phantasmate : ergo memoria ex eis quæ sunt apud animam, reflectitur in res per accidens quidem intelligibilium : eo quod ipsa reflexio aliquando incipit ab intelligibili prius accepto. Per se autem est primi sensitivi : eo quod perfectio memoriæ nunquam fit sine eo quod acceptum est a primo sensitivo, quod est magnitudo determinata et tempus. Non autem volumus

dicere nisi de eo quod informat et facit memoriam quoad memorabilia : licet enim illa aliquando incipiant ab intelligibilibus, tamen non secundum quod intelligibilia sunt, reducuntur in rem prius visam, sed potius secundum quod sunt sensata primo sensitivo. Illa enim figura et differentia temporis secundum quod prius accepta sunt, faciunt animam in rem reflecti. Et quia per accidens est memoria intelligibilium, ideo in aliis animalibus ab homine inest memoria, et non solum hominibus et habentibus opinionem vel prudentiam, sicut quidam dicunt Pigmæum habere, qui secundum rei veritatem non est homo, sicut nos in libro de *Animalibus* ostendemus ². Si enim esset memoria de numero intellectivarum partium, non utique inesset multis aliorum animalium : et si nos intellectuale dicamus ab intellectu agente puro, tunc nulli mortalium inesset memoria. Hoc autem in libro de *Intellectu et intelligibili* ³ erit inquirendum subtilius et cum certitudine. Quoniam autem sensibile per se, non tamen omnibus inest sensitivis, propter id quod ut nunc vel tunc non omnia temporis sensum habent, sicut in libro de *Anima* ⁴ diximus, quædam imperfecta non habent imaginationem et sensum communem nisi permixta cum gustu et tactu : semper enim cum agit memoria rememorando, sicut et prius diximus, agit cum determinato tempore præterito, sicut quando vidit hoc aut audivit. Si enim est memoria hujus cujus est per se, hoc est, in primo sensitivo accepti, aut quoniam didicit prius si est ejus cujus est per accidens sic intellecti. Et ut generaliter dicatur, memoria agit sicut aliquid repræsentans quod prius sensit. Constat autem esse prius et posterius in tempore : et ideo memoria agens concipiendo præteritum, agit cum temporis differentia determinata.

Pigmæum
non est
homo

¹ III de Anima, tract. 1, cap. 1.

² Lib. XXI de Animalibus, tract. 1, cap. 2.

³ De Intellectu et Intelligibili, lib. I.

⁴ II de Anima, tract. 1, cap. 10.

Manifestum igitur ex dictis, cujus partis animæ sit memoria principaliter. Est enim partis sensibilis accipientis quantitatem et tempus, cujus est etiam phantasma : hæc enim quæ accipiuntur sic perse, sunt memorabilia : quia illorum est etiam phantasma. Secundum autem accidens memorabilia sunt quæcumque sunt cum phantasia, sicut sunt intellecta intellectus possibilis quæ ex phantasmatis prius accipiuntur, et postea phantasmatis iterum applicantur, quando ex intellectis anima reflectitur in rem prius per sensum acceptam.

CAPUT IV.

De solutione dubitationis quæ ortum habuit ex hoc quod dictum est memoriam esse præteriti.

Dubitabit autem aliquis de hoc quod diximus, præteriti, secundum quod præteritum est, esse memoriam. Quæret enim aliquis, propter quam causam rememoramur rem absentem quæ non est præsens, potius quam passionem præsentem, quæ præsentialiter dicta est in thesauro formarum, quem supra vocavimus servativam animæ partem ? Et hoc est quærere, quia cum constet memoriam accipere a specie quam habet apud se quæ præsens est animæ, et per eam in

rem prius sensam devenire, quare dicitur memoria esse præteriti propter rem absentem potius quam præsentis propter speciem a qua incipit reflexio quæ præsens est in anima. Manifestum est enim, quoniam hujus aliquid a quo incipiat reflexio, oportet intelligere præsens esse in anima per sensum communem et proprium acceptum : et oportet id esse præsens intelligere in parte corporis quæ habet memoriam, sicut organum habet virtutem quæ est perfectio ejus : nisi enim aliquid tale in parte memoriæ intelligeretur in esse, non haberet memoria unde inciperet reflecti in rem quam prius sensit memorans. Aliquando enim pictura quæ pingitur in anima sensibili per sensum accepta, est passio et qualitas quædam illius ejusdem partis animæ, cujus superius diximus esse memoriam habitum quemdam : factus enim motus sensibilis ad animam, signat unum individuum in quod reflexio fit per memoriæ actum : et hoc sic est sicut figura quædam vel alius motus sensibilis gustus vel odoratus, sicut sigillantis annuli qui in cera relinquit signum sine materia, sicut in libro de *Anima*¹ est determinatum.

Quod autem talis impressio a sensibili relinquatur in partibus animæ sensibilis et maneat, probatur ex ipsis dispositionibus potentiarum receptorum secundum quarum numerationem numeratur etiam memoria : quod non esset nisi corporaliter sigillata memoria intelligeretur. Videmus enim in his quorum complexio mobilis et reflexibilis est multum, sive hoc sit per infirmitatem, sicut est in apoplecticis quibusdam et paralyticis et lethargicis : sive hoc sit propter ætatem, juventutem infantilem scilicet, et decrepitam senectutem : illis non bene accidit memorari. In infantibus enim nimis abundat humidum augens et radicale. In decrepitis autem abundat humidum hu-

¹ II de Anima, tract. I, cap. 3.

mectans non augens quod est phlegmaticum : propter quod non bene retinent sigillata a sensibus. Quoniam propter frigidum cerebrum præcipue humiditas abundans dominatur in cerebro illorum qui in aliqua istarum humiditatum habent abundantiam : et fit in eis hoc sicut sigilli figura incidere imagnetur in aquam et motum illius : quia tunc non tenebitur forma sigilli, licet de facili recipiatur : humiditas enim dicta in quibusdam abundat propter frigidum esse quorundam : frigidum enim inductivum est humiditatis : et fit in eis sicut in ruinosis ædificiis, in quibus non fit sigillatio propter putrefactionem ipsorum. Omnia enim putrefacta exterius sunt humida, et interius arida. Aliquando autem propter durtiem accipientis qualitatem sive passionem illam quæ est a sensu, non fit phantasma : eo quod difficulter a sensibili sigillatur. Ex his dictis causis multum novi infantes in quibus humida dominatur ætas, et multum decrepiti senes immemores efficiuntur. Infantes enim propter humidum fluens a calido in augmentum : senes autem propter humidum humectans extra et fluens in decrementum, eo quod interiora manent arida et destituta.

In aliis autem complexionibus similiter est : quoniam multum velocis ingenii existentes, non sunt bene memores propter humidum facile recipiens, et calidum multum movens. Calidum enim commovet imaginationes et perturbat eas : et humidum præcipue continuo calore motum non bene retinet eas. Similiter autem et multum tardi non de facili recipiunt : et ideo deficiunt eis imagines : propter quod memorativi non efficiuntur. Veloces enim plus quam indigeant ad bonitatem memoriæ, humidi sunt : tardi autem minus habent de humore, quam ad receptionem sufficiat imaginationum. Quibusdam enim, sicut nimis humidis, non manet phantasia in anima : aliis autem sicut siccis, non contingit sigillari ex phantasmate.

Si enim hujus accidens quod est forma sigillata a sensu, est circa memoriam, tunc merito quæritur, utrum hæc passio præsens in anima sit perficiens memorari : aut illud sensibile a quo in sensu primum hæc passio facta est. Siquidem hoc dicitur esse memorabile quod est præsens in anima : tunc memoria nihil omnium memorabitur : quoniam de præsentibus alias habemus apprehensiones quæ sunt sensus communis, et phantasia, et aliæ hujusmodi potentiæ, ita quod ad nihil omnium eorum quæ sunt præsentia, indigeremus memoria. Si vero id dicatur esse memorabile quod est absens, et transivit in præteritum, tunc memorabimur hæc quorum sumus scientiam habentes : quæ tamen non scimus præsentia. Hoc autem non videtur : quia cum memoria sit una de viribus passivis animæ sensibilis, tunc non potest effici in actu nisi per speciem præsentem in ipsa, sicut nec visus, nec imaginatio, nec cæteræ potentiæ passivæ. Non igitur videtur esse alicujus absentis secundum quod est potentia apprehensiva effecta in actu per apprehensum : et si dicatur id quod est in memoria simile picturæ et figuræ quam sibi sigillavit res sensibilis, tunc videtur quod hujus ejusdem est sensus : quia primum in quo sensibile suam sigillat figuram et picturam, sensus est. Ergo memoria erit alterius cujusdam, eo quod supra ostendimus sensum non esse memoriam. Si enim daretur quod esset hujusmodi præsentis, tunc agens memoria quando memoratur hanc passionem ut præsentem, speculabitur quando incipit ab intellectu, vel sentiet quando incipit a sensibili : et utrumque horum esset inconueniens : quia tunc memoria non esset aliud aut a sensu, aut ab intellectu. Memoria igitur non est præsentis ut præsens est. Quæramus igitur quomodo non præsens potest memorari ? cum, sicut diximus, omnis potentia passiva non fiat in actu nisi per speciem aliquam præsentem in ipsa. Si diceretur quod memoria potest effici in

actu per non præsens, tunc eadem ratio esset de omnibus aliis potentiis passivis : et sic contingeret etiam in sensu, ita ut contingeret videre non præsens, et sic de aliis.

Dicamus ergo solventes inductam dubitationem, quod in talibus est sicut contingens, et accidens est contra aliquid. Quod enim memoria est sicut species in pictura quiddam contingens et accidens est multos habere modos : quod sic declaratur. Quia sicut in tabula pictum animal est quidem animal pictum et imago imitans id cuius est repræsentativum, et in substantia quidem est hoc unum et idem, sed non est suum esse unum et idem : quia primo modo accipitur absolute, et secundo modo accipitur comparative ad alterum. Et ideo potest considerari sicut animal pictum, et potest considerari sicut imago repræsentans. Sic et in nobis phantasma factum oportet rimari. Diximus enim in libro de *Anima*, duplices esse formas animæ, scilicet separationis, et compositionis. Separationis quidem quæ sunt a re : et illæ sunt quæ absolute fiunt in anima. Compositionis autem formæ sunt quæ referuntur ad res quibus applicantur. Ità etiam est in phantasmate : si enim accipiamus ipsum prout absolute quiescit in anima notitiam de re faciens, tunc est phantasma præsens in anima a qua egreditur intellectus quando movet intellectum possibilem. Si autem ad rem ad quam acceptum fuit, referatur per propria rei illius, tunc vocatur imago quasi *imitago* dicta : et hoc modo perficit memoriam. Et ideo licet sit in potentia præsens, tamen quia non accipitur ut ipsum absolute, sed ut alterius quod est præteritum : et in hoc esse perficit memoriam secundum quod ipsa est potentia passiva : et ideo memoria est præteriti et non præsentis. Sic igitur dicimus, quod est phantasmatis considerare quædam per se sive per considerationem : et est etiam

considerare speculationem phantasmatis secundum quod est alterius : et secundum quidem seipsa dicimus ipsam speculationem quamdam esse, aut phantasma quoddam. In quantum autem alterius est, tunc dicitur imago aut memoria, quia ut imago perficit memorationem. Igitur quando agit in animam motus phantasmatis secundum quod consideratur absolutum per seipsum, sic perficit sensum interiorem animæ vel exteriorem. Et hoc modo quando progreditur in potentiis abstrahentibus, tunc egreditur a phantasia sicut intellectus quidam qui ex phantasmate accipitur. Secundum autem quod alterius est quædam imago, tunc considerat ipsum relatam tamquam imaginem. Et hujus est exemplum, sicut si nos dicamus quod anima non est considerans tonsorem qui dicitur Socrates Dionis filius, qui tonsor fuit secundum se tantum : aut etiam tonsoris imaginem est considerans tantum. Sed utroque modo considerat anima tonsorem : et hinc alia passio egreditur speculationis hujus quando considerat tonsoris imaginem : et aliqua quando considerat absolute, sicut animal pictum in tabula : hic enim quidem in anima fit sicut intellectus solum per abstractionem, et hoc est quando perficitur motus formæ separationis ad animam a re factus.

Alia autem consideratio est secundum quod ipsum non ut pictura quædam, sed ut memoria est quædam et imago : quia sic ab eo incipit reflexio in rem priorem quasi utens eo ut forma compositionis ad rem cuius est forma. Et inde contingit occasio prius inductæ dubitationis : quia nescimus propter istam eandem causam duplicis considerationis, quando fiunt tales motus phantasmatis in anima, utrum acciderit ex eo quod sensimus prius cuius iste motus imago est : aut acciderit ab eo quod sentimus ut phantasma præsens. Motum autem vocamus, sicut in II de *Anima*¹ docuimus, formam per

¹ II de Anima, tract. III, cap. 1.

motum impressam alicui virtuti animæ : et inde ulterius causatur : quia nescimus si actus animæ rationalis memoria est, aut non est memoria. Aliquando autem accidit intelligere et scire nostrum reminisci et rememorari : eo quod bene scimus nos reminisci et rememorari. Et hoc est quando aliquid speculamur referentes ad id quod audivimus prius secundum id quod prius audivimus. Hoc autem contingit cum speculans tamquam idem in substantia committit memoriæ : et considerat ipsum tamquam secundum alterum esse quod est esse imaginis, sicut jam ante diximus.

Aliquando autem fit speculatio in contrarium hujusmodi : et hoc est quando speculamur formam animæ a re factam in anima absolute, non referentes eam ad rem cujus est imago. Isti enim motus sunt contrarii per terminos : quia unus est a re ad animam : alter autem ab anima ad rem extra visam vel auditam, vel aliter in præterito acceptam. Et hujus similitudo est in speculo concavo circumferenti spherico, quando in illo forma impressa uni parti projicitur super alteram, et ab altera reprojicitur super

primam. Similiter autem est in aliis speculis duobus vel pluribus distantibus. Quæcumque enim in talibus apparent, dicebant Antiqui fieri ut ipsa absoluta, et dicebant ea etiam fieri sicut memores sunt, et memorantes ab aliquo. Hoc autem fit, sicut diximus, cum aliquis imaginem tamquam imaginem considerat.

Probatio autem eorum quæ dicta sunt, est, quia meditationes salvant memoriam. Meditari autem nihil aliud est quam speculari multoties aliquid idem sicut imaginem rei præteritæ, et non per se. Ergo memoria etiam incipit ab eo quod est in ipso sicut imago et non per se.

Sic igitur dictum est a nobis quid est memoria, et quid memorari : et ostensum est quoniam memoria per se phantasmatis est, et non secundum quod est phantasma absolute, sed secundum quod est imago : et dictum est a nobis, quoniam habitus est ejus cujus est phantasma in prædicto modo consideratum. Dictum est etiam cujus partium animæ sit quæ sunt in nobis : et dictum est quia est ut agentis primi sensibilis quo tempus sentimus.



TRACTATUS II

DE REMINISCENTIA.

CAPUT I.

Et est DIGRESSIO de opinione Peripateticorum de reminiscencia.

De reminiscencia tractaturi, non eligimus sequi dicta communia, sed Peripateticorum, sicut fecimus tractantes de memoria. Ponamus igitur primo sententias Averrois et Avicennæ, et Alexandri, et Themistii, et Alfarabii, qui omnes concorditer dicunt, quod reminiscencia nihil aliud est nisi investigatio obliti per memoriam. Non igitur credendum est eis qui dixerunt reminiscenciam esse

Reminiscencia quid sit secundum opinionem Antiquorum? Tria exiguntur ad reminiscenciam.

partem intellectualis animæ secundum se. Tradunt enim præinducti Philosophi tria exigi ad reminiscenciam, quorum primum est repræsentatio imaginis ut imaginis : et hoc non fit nisi per memoriam per se incipientem quidem a phantasmate, per accidens autem ab intellectu, ut in prædictis diximus. Secundum autem est descriptio figuræ et aptatio secundum quod debet esse : et hoc fit virtute, quæ dicitur imaginativa, adunante figuras et aptante eas. Et ideo multa vis reminiscenciæ est in imaginatione bona vel phantasia. Tertium autem est quod Arabes vocant *virtutem distinctivam*, quæ est componens omnia hæc, et attribuens rei omnibus modis quibus attribui possunt per simile et contrarium et per locum et tempus et aliis modis, ut eliciatur secundum intentum quod cecidit in oblivione, sicut inferius monstrabimus : et quoad hoc solum reminiscencia solis rationabilibus convenit.

Ex his igitur patet, quod motus reminiscenciæ est sicut motus interruptus et diversificatus. Interemptus quidem sive interruptus, quia non continue per eandem formam reflectitur in rem : eo quod

illa cecidit in oblivionem vel in toto, vel in parte. Diversificatus autem, quoniam ex multis est formis similium et antecedentium et consequentium et locorum et aliorum diversorum quæ accidunt rei quæsitiæ per reminiscentiam. Propter quod dicunt prius inducti Philosophi memoriam esse digniorem quam reminiscentiam, sicut motus continuus et uniformis dignior est motu intercepto et multiformi. Adducunt autem quiddam mirabile: dicunt enim Aristotelem dicere quemdam senem fuisse tanti vigoris in imaginum adunatione et compositione, et tanti vigoris in potentia intellectiva distinguente unum ab alio et componente unum cum alio secundum rei proprietatem, quod rerum veris formis refigurabat ea quæ in præteritum per auditum audierat. Et hoc esse non potuit nisi procul dubio ex formis ipsis res inveniatur. Et hoc modo describit elephantem vere et proprie, qui numquam elephantem vidit vel picturam ejus, sed tantum audivit de ipso. Et ideo etiam non est mirum, si oblita tamen prius scita per adunationem talium imaginum, iterum ad animam revertantur.

Scias tamen, quod cum tria prædicta operentur ad reminiscentiam, unum læditur ex altero. Et modus hujus est, quia semper illud quod est corporalius, lædit id quod spiritualius est, et impedit in reminiscendo. Sensus enim communis corruptus lædit phantasiam, et non e converso: et phantasia lædit memoriam, et non e converso. Memoria autem læsa lædit intellectum distinguentem, et non e converso. Et ideo aliquando utuntur homines imagine ut imagine: et bene et distincte reflectitur et attribuitur rebus: sed tamen quia læsa est phantasia sive sensus communis in adunando imagines eorum quæ circumstabant rem quam quærimus, non contingit nobis reminisci eorum quæ intendimus. Et hujus causa bene volentes reminisci trahunt se a publico lucido, et vadunt ad obscurum privatam: quia in publico lucido loco spar-

guntur imagines sensibilium, et confunduntur motus eorum. In obscuro autem adunantur et ordinate moventur. Hinc est quod Tullius, in arte memorandi quam ponit in secunda *Rhetorica*, præcipit ut imaginemur et quæramus loca obscura parum lucis habentia. Et quia multas imagines et non unam quærit reminiscentia, præcipit ut similibus multis id quod volumus retinere et reminisci, figuremus, et figuras adunemus: sicut si volumus recordari ejus quod adversatur nobis in iudicio, imaginemur aliquem arietem in obscuro magnis cornibus et magnis testiculis contra nos venientem. Cornua enim ducunt in recordationem adversarii, et testiculi ducent in dispositionem testium.

Sic igitur intelligendum est de reminiscentia quam Peripatetici multi *recordationem* vocant: et secundum ista debemus interpretari dicta Aristotelis qui princeps est Peripateticorum.

CAPUT II.

De reminiscentia secundum Aristotelem, in quo convenit et differt a memoria et aliis virtutibus et habitibus et passionibus animæ.

Dicamus igitur, quod ex quo nos secundum Aristotelis mentem diximus de memoria, reliquum est dicere nunc de reminiscentia quæ alio nomine ab aliis Philosophis *recordatio* vocatur. Quod autem oportet nos ponere et supponere

convenire reminiscentiæ, primum est quæcumque vera sunt secundum argumentativas rationes, ex quibus concludemus convenientias et differentias ipsius ad alias virtutes animæ et habitus et passionibus.

Differentia
inter memo-
riam et re-
miniscen-
tiam.

Dicemus igitur, quod non est omnino eadem memoriæ receptio cum reminiscibilitate: quia, sicut diximus, jam memoria motus continuus est in rem et uniformis. Reminiscibilitas autem est motus quasi interceptus et abscissus per oblivionem, et non est uniformis, sed causatur ex multis principiis circumstantibus illud, cujus est proprie reminiscibilitas. Similiter autem reminiscibilitas secundum actum non est acceptio simplex alicujus. Simplex enim acceptio est, quando aliquis primum addiscit aut patitur secundum intellectum, sive secundum sensibilem cognitionem. Omnes enim illæ potentiæ perficiuntur passionibus, eo quod passivæ: tunc autem quando sic accipit, non recipit aliquam memoriam, quia talis acceptio non est ante facta: neque accipit aliquis tunc notitiam ex aliquo principio quod fuerit ante, sed tunc primo fit in anima: et hoc est phantasma a quo egreditur intellectus et non memoria, sicut ex prius dictis facile probatur. Cum vero jam in præterito factus est habitus et passio, tunc fit memoria: quia sic utitur imagine ut imagine a qua non egreditur intellectus, sed potius reflexio in rem prius visam aut auditam. Passione igitur tali nondum facta in præterito non fit memoria: ergo neque reminiscencia: quia reminiscencia non fit sine operatione memoriæ, sicut patet ex dictis.

Amplius autem cum primo facta est passio disciplinæ in individuo ultimo, hoc est, id ultimo individuante formas quod est intellectus conjunctus phantasie: quia illud est ultimum habens individuans: tunc est scientia in ipso sicut in primitus patiente: si tamen oportet vocare scientiam hujusmodi passionem ad habitum: quoniam hujusmodi scien-

tia nec vere passio est, nec vere habitus quo movetur intellectus, sicut patet ex dictis in libro de *Anima*: memoria autem nihil est talium: quia licet memoria sit per accidens intelligibile, sicut ostendimus in præcedenti tractatu, est tamen scitorum quæ ante jam scivimus. Memoria autem per se non est intelligibile, quia per se intelligibilia sunt abstracta ab omni temporis differentia: per se autem memoratur tunc quæ audit et vidit prius, et non quod nunc passus est, sed potius quod passus est prius secundum sensum vel intellectum. Ex hoc infertur, ut prius, quod si memoria non est præsens acceptio scientiæ, quod nec reminiscencia præsentis est acceptio.

Amplius autem manifestum est ex his superius habitis, quod reminiscenciam non contingit rememorari nunc, respectu temporis præsentis, sed potius reminiscenciam convenit memorari quæ ex principio temporis præteriti ante hoc nunc aliquid fecit, vel aliquid didicit: contingit enim eum memorari cum accipiat scientiam aut sensum quem prius habuit, et sub differentia temporis determinati in præterito: hæc enim memoria talis præteriti sciti per sensum accepti cujus nos aliquando habitum diximus esse memoriam: et tunc quando interciso motu accipiat iterato scientiam quam prius habuit, vel sensum quem prius habuit. Cum igitur iterata acceptio scientiæ vel sensus exigatur ad reminiscencias, tunc oportet quod reminisci sit aliquid eorum quæ dicta sunt, vel est alicujus eorum. Est enim absque dubio memoriæ, sicut in primo capitulo hujus tractatus ostendimus. Cum enim sit motus intercisus, oportet quod rememorari sive reminisci procedat sicut investigatio: et tunc memoria sequatur postquam inventum est quod quæritur: tunc enim continue movetur in quæsitum. Igitur reminiscencia non simpliciter est iterata acceptio prius acceptorum. Si enim talia essent salva in anima, et ite-

rum fiant accepta motu reflexionis in res, non est reminiscentia, sed est memoria: eo quod iste est continuus et uniformis motus. Sed quodammodo est reminiscentia, et quodammodo non. In reminiscendo enim oportet eundem bis discere et invenire ignotum idem: primo quidem investigando per doctrinam vel inventionem cum primo accipit scientiam. Secundo autem per memoriam cum iterato invenit partem oblitam per imagines eorum quæ circumstant ipsum, sicut supra diximus. Oportet igitur quod differat reminisci ab his quæ dicta sunt, quæ sunt acceptio scientiæ et memoriæ: et oportet quod ipsum reminisci sit pluris principium quam sit id ex quo addiscunt primo: attamen reminisci est principium multo prius memoratorum, quorum non est principium simplex acceptio scientiæ.

CAPUT III.

De modo et arte reminiscendi.

Modum autem et artem reminiscendi tradere volentes, repetamus quædam eorum quæ diximus. Est autem unum illorum, prout supra diximus, reminiscentiam nihil aliud esse nisi investigationem obliti per memoriam: propter quod differt ab iterata scientiæ acceptione, quæ non fit per memoriam: et differt ab ipsa memoria, eo quod ipsa memoria est motus continuus in primum acceptus: et

differt a meditatione quæ frequens est memoria. Ex quo igitur secundum dicta Peripateticorum talis est reminiscentia, oportet quod semper ab aliquo incipiat quod jam pridem existit in nobis, quod ordine aliquo respicit rem quæ quæritur, quam ante ordinem habere non potest, nisi sit principium consequentiæ ad minus ad illud habendum probabiliter, aut ex necessitate. Ordo igitur iste aut erit ex parte reminiscentis, aut ex parte reminiscibilis. Et siquidem est ex parte reminiscentis, tunc erit consuetudo, quia vis maxima consuetudinis est: quod probatur, quia ea quæ consuevimus per ordinem enuntiare, dicto uno priori occurrit secundum etiam absque attentione. Si autem est ex parte reminiscibilis, tunc hoc aut est ordo necessitatis aut probabilitatis. Et si est ordo necessitatis, tunc ex ipso statim in quæsitum venit. Si autem est ordo probabilitatis, tunc aut erit in pluribus quidem dialectice, aut rhetorice: et tunc ab omnibus quæ aliquo modo adhærent rei, vel referuntur ad ipsam, est inventio rei per reminiscentiam.

His itaque suppositis, dicamus secundum Aristotelem, quod omnes reminiscibilitates in quolibet homine contingunt hoc modo. Quia hic motus, qui est reminiscibilitas, aptus natus est esse post hunc. Alius motus qui est memoria prius accepti quod aliquo prædictorum modorum est principium consequentiæ ad inferendum quæsitum. Id enim reminiscimur, cujus in se habemus oblivionem, sed principii ejus recordamur per memoriam. Si igitur inter hæc duo est ordo qui est ex necessitate, tunc manifestum est quod cum moveatur aliquis illo motu qui est memoria principii ut principii istius, tunc movebitur etiam isto motu qui est reminiscentiæ, et inveniet de necessitate quæsitum. Et hic est facilis modus reminiscendi: sed tamen non ideo semper reminiscendo movetur ex necessitate, eo quod reminiscens non semper tali utitur ordine, sed potius sicut fre-

quenter et in multo movebitur ex consuetudine. Propter dictam enim causam ea quæ sequuntur se secundum rem, fiunt consequentia in animæ motibus propter consuetudinem. Accidit enim in nobis quosdam motus simul sumptos velocius meminisse, quam alios qui multoties facti sunt in nobis. Hujus autem causa duplex est : et una quidem est ætas, quia invenit animam minus occupatam : et ideo parvus motus profundatur in ea : et hac sola de causa pueri diu reminiscuntur. Alia autem causa est dispositio rei moventis animam : et hæc est duplex, destructio scilicet vehemens, et abominatio vehemens. Hæc etiam profunde intrant in animam et diu manent. Et his de causis, ut Tullius docet, « quædam semel videntes diutius memoramur quam alia quæ multoties vidimus et agnovimus. » Si autem sic est, et similiter erit consuetudo ex sæpe movendo profundum motum faciens in anima et diu manens.

Cum igitur reminiscimur, tunc primum movemur secundum aliquem priorum et antiquorum motuum nobis impressorum : et volumus illos motus quousque ille motus moveatur et tangatur in nobis secundum quem consuevit consequi ille quem quærimus : motus autem hic vocamus formam impressam per motum sicut et motum alibi accepimus. Et ideo curamus et sollicitudinem ponimus, intelligentes id quod est consequenter ordinatum ad quæsitum, magis quam intendamus alteri cuidam quod nullum ex parte nostri vel rei habet ordinem ad illud quod quæritur. Curamus autem et sollicitamur intelligere illud ab omnibus quæ possunt esse principium consequentiæ in illo : et ideo incipimus aliquando a simili, et aliquando a contrario, et aliquando a continuo secundum ordinem rei necessario : sicut ex causa venimus in causatum, et accipimus ista similia et contraria, et continua aliquando in toto, aliquando in parte : propter hoc enim fit reminiscibilitas : manifestum enim est,

quod omnis investigatio fit ab aliquo principio : et cum reminiscencia sit investigatio per memoriam, oportet quod incipiat a principio memorativo aliquorum dictorum modorum : motus enim in quibusdam istorum sunt idem, sicut in continuis essentialem et necessarium ordinem habentibus. In quibusdam autem eorum sunt similes, sicut in similibus dialecticis et rhetoricis, in quibus ex simili fit iudicium similitum. In quibusdam autem sunt in parte contrariorum, et in parte similitum, sicut diximus prius. Propter quod cum ita fiat reminiscencia, tunc omnes reminiscentes quærunt reliquum, ex illo ordine quo parvum motum habet : et ideo est in parte oblivionis post illud quod est principium ejus, et cujus motus ingressus est in memoriam. Illi autem qui non quærunt sic sequentes ordinem rei, reminiscuntur tamen quando tale est reminiscibile, cujus motus consequenter est post alium motum ex consuetudine rememorantis vel reminiscentis.

Nec oportet aliquem objicere contra id quod diximus, ut dicat quomodo hoc possit esse ut memoremur et reminiscamur eorum quæ procul sunt a coordinatione ab invicem ? Posset enim aliquis intendere, quærens quomodo memoramur ea quæ procul sunt, sed potius quæ prope sunt, dicat reminisci. Manifestum est enim, quoniam in coordinatis est idem motus quodammodo. Dico autem ac si aliquis diceret, quod idem quod consequenter est et verum ut non sit perquirens aut reminiscens in talibus, eo quod non habet principium a quo procedat. Jam enim diximus quod licet in talibus non sit principium rei, est tamen principium a quo consuevit procedere reminiscens. Et ideo hæc species post hanc est, et hæc reminiscibilitas est post hanc ex consuetudine. Et hoc est principium sufficiens reminiscentiæ, sicut diximus.

Cum igitur talem reminiscentiam faciens voluerit reminisci, quærit tale accipere principium sui motus, post motus

reminiscibilis quod quæritur, erit sufficienter ex consuetudine reminiscens, licet non sit principium ex parte rei. Et quia reminiscencia procedit ex talibus principiis, ideo maxime veloces sunt in reminiscendo qui ex principio consequentiæ incipiunt reminisci : et quanto illud essentialius consequentiam principiat, tanto in reminiscendo sunt velociores : tunc enim reminiscibilitates se habent ad invicem sicut res quæ consequenter sunt ordinatæ secundum sua principia : et ideo magis sunt reminiscibilia quæcumque habent ordinationem aliquam secundum sua principia, sicut doctrinæ demonstrativæ et probabiles : prava autem quæ sunt inordinata, graviter sunt reminiscibilia.

Et ista est differentia in qua reminisci differt ab eo quod est iterato addiscere, cum reminiscencia possit moveri quodam prædictorum modorum in id principium quod est ante quæsitum jam in memoria, sive ex parte rei, sive ex parte consuetudinis. Iterato autem addiscens a talibus non movetur. Cum vero non investigat et movetur per aliquod principium, tunc non recordabitur vel reminiscetur. Multoties autem contingit, quod primo quidem quærens et investigans aliquid, reminisci nullo modo potest. Quærens autem postea, et potest invenire, et invenit : et hujusmodi causa est, quia aliquando species majoris impressionis prius occurrunt, quæ impediunt ejus principium, cujus quærit recordationem. Postea autem sedatis illis reditur ad principium, et fit reminiscencia : et ideo motus reminiscentiæ fit in eo quod multa movet, et tamdiu quousque veniat in principium quod res quæsita consequitur. Meminisse enim sive reminisci est inesse posse moventem speciem quæ est sicut principium. Hoc autem movens inest, quando id est quod est sicut ex ipso fiat motus, vel ex quibus habet moveri et fieri motus, si plura sunt talia, sicut jam sæpe dictum est. In reminiscen-

tia enim oportet accipere principium sicut ex quo fit processus.

CAPUT IV.

A quo principio procedat reminiscencia ?

Ea autem quæ sunt sicut principia ex quibus fit reminiscencia, sunt multiplicia, sicut supra diximus. Aliquando enim habet fieri a locis, in quibus vidimus vel audivimus primo res quas quærimus. Aliquando autem a similitudine secundum partem, non secundum totum. Causa autem est, quod reminiscens velociter ab aliis in aliud veniunt transeuntes, hi qui reminiscuntur, sicut ex memoria lactis reminiscitur albi quod simile est lacti in colore : ab albo autem in aerem, eo quod album et aer in parte similia sunt : quia album est perspicuum terminatum, et aer perspicuum interminatum. Ab aere autem in humidum, eo quod naturalis qualitas aeris sit humidum. Ab humido autem recordatur veris quod est calidum et humidum tempus. Et dicamus, quod nec est hora pro memoria investigata. In processu autem tali id quod est principium universale, videtur ad omnia esse principium et medium, per quod fit investigatio omnium sequentium : nisi enim detur quod prius per memoriam in hoc veniat, tunc alterum duorum inconvenientium sequetur : aut enim nihil omnino reminiscitur, cum nullum habeat principium, et omnis investigatio incipiat a principio aliquo, aut cognoscet

aliunde quam ab eo quod est principium rei vel consequentiæ : quod est inconueniens, cum omne id quod invenitur et scitur, ex aliquo principio inveniatur et sciatur.

Hujusmodi autem exemplum est, quod ponamus principia intelligibilia memorata ex quibus procedit recordatio sive reminiscentia, esse quæ sunt de numero A B C D E I L T, ex quorum aliquo vel pluribus potest haberi aliquod recordabile. Si enim in L principio non reminiscitur rei quæsitæ, tunc in T recordabitur quod est proximum : contingit enim secundam hypothesim recordabile dictum in utrisque his esse motum sicut ex principio : quia L est penultimum, et T est proximum. Contingit autem idem etiam esse motum in A sicut in primo, et in E sicut in quinto : eo quod velox in reminiscentia fiat processus ab uno in aliud, sicut prius ostendimus. Si vero detur quod non sit recordatio in aliquo quatuor dictorum, tunc oportet quod recedatur aliquod eorum quæ sunt in consequens enumerationis dictæ : quia aliter non procederet ex principio. Nos enim posuimus ista esse principia et non alia : hæc autem quæ sunt in consequens A D E sunt I et L et alia similia. Si autem dicatur, quod in nullo consequentium sit reminiscentia, tunc oportet quod fiat in primo quod est A, quia aliter non fieret ab aliquo principio quod esse non potest : et si incipiat ab A, tunc semper ita fiet a primo in consequens, donec perveniat in quæsitum. Sed ab eodem principio contingit aliquando meminisse, aliquando autem non. Causa autem hujusmodi est, quia aliquando movetur ab ipso principio, et aliquando non movetur plus ab ipso quam ab alio : et hujus exemplum est, sicut si aliquis moveatur ab ipso principio, et alia vice non moveatur plus ab ipso quam ab ipso E vel D. Hujusmodi autem causa superius dicta est, quia scilicet non potest procedere aliquando motus ab ipso propter impedimentum motus aliarum specierum. Sic igitur semper

procedit reminiscentia a principio aliquo consequentiæ et coordinationis quæcumque sit illa.

Si igitur aliquando movetur reminiscentia per principium antiquum, hoc est, ab antiquo consuetum, tunc movetur in id reminiscibile quod consuetius est sibi, et per consuetudinem adjunctum sibi. Et iste est naturalis ordo sicut ex parte reminiscentis : consuetudo enim jam mollita est ab antiquo sicut natura quædam. Unde ea quæ multoties intelligimus et in consuetudinem ducimus, velocius reminiscimur : quia sicut in processu naturaliter continuo ex parte reminiscibilium natura ipsorum post hoc principium, scilicet naturale, posita est : et sicut consequens se habet ad antecedens secundum naturam rerum, sic ex parte reminiscentis multoties hoc intellectum post illud naturam quamdam fecit et induxit : quia consuetudo est habitus in modum naturæ movens.

Quoniam igitur reminiscentia fit in his quæ sunt extra naturam reminiscibilium propter consuetudinem reminiscentis, sicut in his quæ sunt naturaliter reminiscibilia ex ipsa natura rerum quas reminiscimur, tunc ad hoc magis et velocius fit reminiscentia in his in quibus utrumque istorum est : et illa sunt quæ consuetudine determinata sunt : quibus tamen similiter inest natura ex parte ordinis reminiscibilium. *Extra naturam* autem dicimus esse quæcumque fortuite conjuncta sunt. In illis enim non potest poni principium a quo reminiscentia procedat nisi consuetudo. Accidit igitur moveri reminiscentem etiam ubi sunt fortuita, sed aliter quam in aliis, sicut diximus : et cum ipse reminiscens retrahatur in talibus a consuetudine, et indigeat reminisci aliquod nomine quod prius audivit, tunc accipiet dissimile nomen prius audito quod est sicut illud secundum aliquid. Et quia tunc nec consuetudine, nec ordine naturali juvatur, tunc faciet solæcismum in reminiscendo, quod idem est quod inconvenientium conse-

Quæ sint
extra natu-
ram ?

quentia et coordinatio. Igitur reminisci accidit hoc modo qui determinatus est a nobis.

CAPUT V.

Qualiter omnis reminiscentia vel memoria accipit tempus præteritum?

Licet autem omnis reminiscentia sive recordatio omnis ab aliquo principio procedat, et hoc fit difficulter, sicut in præcedentibus est habitum, tamen hoc generaliter verum est, quod maxime omnem reminiscentem oportet cognoscere tempus præteritum secundum quod ipsum est mensura ejus quod reminiscitur. Hoc autem dupliciter contingit: aut enim id est definitum quando, aut indefinitum. Definitum autem quando est, ut cum dicimus ante tres annos: indefinitum vero quod recolimus, sed simplex præteritum non determinantes certa mensura quando fuerit. Tempus autem judicat anima sicut judicat numerum, quando judicat plura aut minora sive pauciora. Rationale est etiam quod judicet ipsum sicut judicat magnitudinem. Cum enim tempus habeat aliquo modo esse numeri et esse continui, oportet quod eodem modo judicet anima tempus, quo judicat magnitudinem et numerum: quorum unum est discretum et alterum continuum. Intelli-

git enim anima magna et procul secundum loci distantiam non extendendo ad illam intelligentiam, sicut dixit Plato, et sicut quidam visum ad visibilia in radiis corporalibus dixerunt extendi: sed potius in speciebus intelligit, quæ simplex et spirituale esse habent in ipsa: et similiter intelligit tempus non protensa ad temporis durationem nisi in specie temporis, prout accipitur quando in re temporali, cui adjacet ut mensura: et namque etiam cum non sit præteritum tempus: eo quod ipsum discessit in non esse, sicut in quarto *Physicorum*¹ diximus.

Adhuc tamen similiter intelligit sicut prius, eo quod species ipsius quando quod est ex præterito ex anima diffinite vel infinite non recessit: sed motus isti sunt in anima secundum analogiam et proportionem: quoniam sicut proportionatur res ad quando quod rebus adjacet, sic etiam proportionantur rerum species ad speciem, quandocumque intelligitur ut speciebus adjacens. Sunt enim in ambobus istis quæ sunt in anima similes figuræ et motus proportionales his quæ sunt in rebus. Figurata enim species figurarum habent in anima, et reservantur in memoria, et similiter motus in rebus, et quando motuum species sibi similes habent in memoria et in anima. Et cum reminiscentia sit quæstio et investigatio per memoriam facta, oportet quod reminiscentia utatur his prout proportionatur rebus. Quo enim distabit anima a seipsa, cum majora intelligat, aut cum minora, constat quod in nullo: et hoc est ideo quod non intelligit ad res protensa, sed potius per species acceptas a rebus quibus non accidit magnum et parvum esse, sed tantum proportionales esse rebus, sicut intentio proportionatur ei quod intenditur per ipsam. Ipsa igitur in nullo distat a se quando intelligit

¹ IV Physic. tract. III, cap. 13.

majora et quando intelligit minora. Omnia enim quæ sunt intra in ipsa, sunt minora quam ea quæ sunt extra : et tamen proportionaliter sunt ea quæ sunt intra et quæ sunt extra. Et ideo unum intelligitur per alterum.

Et similiter est de distantia temporum: hanc enim non distans a seipsa ipsa memoratur et intelligit anima : est enim forte accipere aliquam in anima distantiam et protensionem, sicut accipitur in speciebus quæ sunt in ea separatæ a rebus. Distantia autem hæc non est loci vel temporis quo protendatur in hoc vel in illud, sed est proportionis, sicut dictum est : hæc enim est distantia, quæ est in anima sicut distantia realis in rebus distantibus. Hæc autem dicta sunt contra eos qui dicunt animam distendi ad tempora et eorum quantitates quas intelligit et reminiscitur.

Quod autem distantia proportionis operetur in anima, quod distantia quantitatis vel loci operatur in rebus, sic ostenditur. Si enim $A B$ res aliqua, cui adjacet quando distantia faciens in tempore ita quod A sit res, et B sit quando quod relinquatur circa eam ex adjacentia temporis. Cum igitur animæ potentia quæ est sensitiva, primum accipiat quantitates discretas et continuas, dicamus quod species $A B$ in sensitivo communi sit $B C$. Et quia quod est in sensitivo communi, ulterius etiam movet intellectum vel memoriam quæ per accidens est intelligibile, ponamus species in intellectu vel memoria ex his factas esse $C D$: ista igitur erunt proportionabilia : et si incipiat motus a rebus extra, et veniat ad animam, tunc secundum $A B$ rem exteriorem movetur $B C$ ad sensum communem: et tunc facit $D C$ in intellectu vel memoria : quia memoria per accidens est intelligibile, sicut supra determinatum est : proportionale enim est, sicut diximus, $A B$ et $C D$, et ideo devenitur per $C D$ in $A B$, quando motus reminiscentiæ incipit ab anima, et devenit in rem quæsitam : quia sicut id quod est in sensu

communi, proportionale est rei, ita quod per ipsam res sicut est apprehenditur : ita id quod est in memoria a quo incipit reminiscencia, proportionale est rei : et ideo per ipsum in rem absentem perfecte devenitur. Ponamus autem quod $\kappa \iota$ sit res alia cum differentia temporis alia, cujus species in sensitivo communi sit $\tau \iota$, et in memoria faciat $z \iota$. Si ergo tunc quærat aliquis quare $A B$ facit in memoria magis $C D$ quam $z \iota$, dicemus quod sicut $D C$ ad $A B$ se habet proportionaliter sicut species et intentio ad rem cujus est species et intentio, sic se habent $\tau \iota$ in sensu communi ad $z \iota$ in memoria proportionaliter, eo quod utrumque istorum est species ejus quod est $\kappa \iota$ in re extra. Igitur anima secundum hoc motus proportionales movetur simul : quia continuitas est inter primum movens et ultimum motum, sive incipiat motus a rebus extra, sive incipiat ab anima. Et sic quæstio soluta est prius inducta, quando $A B$ quod facit $C D$ non habet proportionem ad $z \iota$, et ideo non facit ipsum. Si vero anima velit intelligere, sive per intellectum accipere $z \iota$, omnino similiter intelliget ipsum in suo ordine sicut intelligit $C D$ ordine alio, sed per $\tau \iota$ quæ sunt species in sensu communi intelligit $\kappa \iota$ rem cujus est species illa. Motus enim qui sunt $\tau \iota$ et $\kappa \iota$ omnino similiter se habent ad invicem, sicut se habent ad invicem $B C$ et $B A$, tamen alio ordine.

Ex his igitur patet, quod per species rerum anima devenit in res absentes et præsentis. Cum igitur simul fiat motus ab anima in rem et rei et temporis, tunc agit memoria. Et similiter est de reminiscencia, quæ numquam investigat nisi per memoriam, sicut dictum est supra. Aliquando tamen agente memoria non opinatur se aliquid memorari propter hoc quod non refert ad præteritum tempus ut præteritum, sed voluit ipsum tantum apud seipsum non referendo ad tempus. Nihil enim prohibet aliquem mentiri sibiipsi et decipere seipsum, ita quod

videatur sibi memorans esse, cum tamen non sit memorans. Quod fit utique quando accipit aliquis et meditatatur ea quæ sunt in se præterita, et non accipit ut præterita, sed sicut simpliciter intellecta vel sensata imaginatur ea non referens ad rem præteritam secundum quod præterita est : non enim contingit opinari simul aliquem esse memorantem et agentem : quia actio omnis circa præsens est, et nulla circa præteritum. Memoria autem omnis circa præteritum et nulla circa præsens : et ideo cum aliquis imaginatur vel intelligit quasi agens iudicando vel delectando circa illud, non accipit ipsum ut memoratum : erat enim ipsum memorari secundum superius determinata hoc quod est circa præteritum ut præteritum. Et ideo etiam si species in anima afficit, non afficit ut præterita : quia sic non est appetibilis vel fugibilis, sed afficit ut præsens simile præterito. Sed si rei fiat recordatio sine tempore, tunc ipse sic recordans illius rei, non reminiscitur proprie loquendo.

Quod autem diximus esse temporis memoriam et reminiscentiam, hoc est dupliciter : aliquando enim sub certa mensura memoramur tempora, utrum dicimus quod tertia dies est quod fecit hoc cujus recordamur. Aliquando autem non certa mensura fit hoc : et tamen tunc memorantur, quamvis non certa mensura ad præsens mensuretur præteritum tempus. Consueverunt enim homines dicere, quoniam memorantur ipsi, tamen temporis præteriti distantiam ad præsens nesciunt : et hoc est quando metro certo non cognoscunt quantitatem ipsius quando, in quo fuit res cujus recordamur.

CAPUT VI.

Quod memoria differt a reminiscentia secundum subjectum.

Quod autem non idem sint memoriæ rerum et reminiscibilitates in actibus et habitibus, in prioribus determinatum est. Differt autem memorari ab ipso reminisci non solum secundum tempus quod non accepit memoria nisi in re memorabili : reminiscentia autem ut numerum certum vel indeterminatum secundum distantiam ad præsens. Sed etiam in hoc differunt, quod memoriam participant multa aliorum animalium ab homine, quæ tamen potentiam habent cognitivam : sed reminisci nullum, ut ita dicam, participat nisi homo.

Causa autem hujus est, quod reminisci cum sit investigatio per memoriam, est sicut syllogismus quidam a principio procedens : non tamen est vere syllogismus : quia procedit per se ex particulis in res, et non in cognitionem aliquam factam per principia : sed procedit in rem quæ primo fecit cognitionem in anima : et est syllogismus quidam ejus quod aliquis prius vidit aut audivit aut aliquo hujusmodi secundum sensum passus fuit. Sic enim syllogizatur reminiscens in seipso et in sua reminiscentia : et est sua reminiscentia quæstio sive investigatio quædam, sicut diximus superius. Talis autem investigatio non est sine ordinante ratione : et ideo accidit eis

quibus accidit deliberare et ordinare antecedens ad consequens. Ratio autem deliberans unum ex altero est per modum syllogismi, qui quandoque quidem est necessarius, quandoque autem probabilis, et quandoque quasi consuetudinis utitur auctoritate.

CAPUT VII.

De his qui bene et qui male sunt reminiscibiles.

Ex his autem quæ diximus, quod reminiscentia est cum deliberatione syllogizante, non debet aliquis credere, quod reminiscentia accidat solum secundum intellectum separatum. Cum enim reminiscentiarum finis sit acceptio præteriti sub metro certo vel incerto, oportet quod reminiscentia motus et passio sint corporea: et reminiscibilitas est secundum dispositiones corporeas et complexionem bonas vel malas.

Quod autem sic corporea passio quæ patitur complexio sensibilis organi ab hoc phantasmate quod movendo infert passionem ei, signum est hanc quam vocamus reminiscibilitatem habere quosdam determinatæ complexionis homines, et secundum motum hujusmodi complexionis. Quod reminisci non possunt deficientes intelligentia: et cum defectu

isto argumentantes inordinate: nihilominus facit esse verum quod diximus, quod scilicet sit corporea passio phantasmatis cujusdam reminiscibilitas. Diximus enim hanc habere quosdam determinatæ complexionis homines: et hoc dicimus, quod signum ejus quod diximus, est maxime inter omnes homines hanc habere melancholicos et præcipue illos, sicut Aristoteles in libro de *Problematibus*: tradit, qui habent melancholiam fumosam et ferventem. Sunt enim tales qui melancholiam habent accidentalem quæ causatur ex sanguine et cholera simul adustis. Hos enim inter omnes homines phantasmata maxime movent: quia in sicco posterioris cerebri maxime et fortissime imprimuntur: et calidum melancholiæ fumosæ movet ea: et talis mobilitas confert reminiscentiæ quæ est investigatio. Conservatio autem sicci multa repræsentat ex quibus movetur.

Causa autem magnæ reminiscibilitatis est id quod reminisci non est a seipsis hominibus, ita quod sit in arbitrio eorum stare et procedere in motu reminiscentiæ: sed cogit frequenter ad hæc dispositio corporis naturalis vel accidentalis, quæ ex infirmitate causatur vel ætate: sicut projicientibus lapidem non habent amplius a seipsis ut stet lapis quando voluerint, sic etiam quasi necessitate quadam corporis movetur reminiscens: movet enim phantasma aliquod corporale organum in quo passio accidit quæ est reminiscentia. Talem autem habent passionem non quidem quod est bona reminiscentia, sed quod non possunt sistere cum volunt motum in ipsis factum quibus humiditas abundans quælibet naturalis vel accidentalis inest circa locum virium animæ sensibilis: talis enim humiditas mota a sensibilibus non de facili pausat quousque deveniat in id quod quærit. Attentio enim quærendi trahit spiri-

Reminiscibilitatis causa.

¹ Particular. triginta problematum, problemate 1.

tum et calorem, et in hoc impetu circumferunt humidum quod natum est non stare ex ipso : sed quando invenitur intentum, tunc cessat intentio quærendi, et retrahuntur et calor et spiritus : et tunc paulatim residet humidum. Talis enim motus humidi recte procedit ad intentum ex principio memoriæ, sicut supra determinatum est.

Et hæc est causa quare iræ et timores talibus complexionibus accidentes quando moventur aliquo quod existimatur malum, circummoventur velòciter : et his motibus iterum circummoventibus non statur, sed in idem sæpe circummovent cerebrum, quamdiu manet mali terribilis examinatio. Hæc autem passio quæ est involuntarius cursus reminiscentiæ, comparatur nominibus sive verbis in loquela et rationibus persuasionum, quando tales locutiones nominum et rationum fiunt per melancholicos et fluidos. Quando enim nominibus et verbis et rationibus tales uti inceperunt, diu loquuntur et non quiescunt : et est unum melancholiæ signum, multum persuasivis verbis impertinentibus abundare. Licet enim aliquando valde pausent tales exterius, et quasi non volentibus accedit sine causa iterum cantare aut loqui, sive dicere de rerum nominibus propter multum motum phantasmatum qui est in eis. In his igitur sunt multæ reminiscentiæ.

Sunt autem etiam isti qui habent partes anteriores partis capitis quæ sunt circa sensum majores, dummodo habeant in eis humiditatem compressam aliquantulum, reminiscibiliores quam contrario modo se habentes. Magnæ enim hujusmodi partes multo humido dilatato et multæ virtuti attestantur. Compressio

autem humidi facit fortiter tenere phantasmata : et idcirco sunt multum reminiscibiles. Tales enim in sensibili parte habent gravitatem multi et compressibilis humidi in quo multa est commotio sensibilium. Isti enim ex principio motus facti in eis non poterunt multum manere, sed multum sunt soluti, et fluxam habentes humiditatem quæ tenet formas propter compressionem : neque isti in reminiscendo facile quiescunt, sed moventur multum. Penitus autem novi, sicut infantes, et multum senes, non sunt reminiscibiles propter multum motum qui est in eis, et nihil habent virtutis retentivæ formarum. Senes enim in decremento sunt humectantem extraneam habentes humiditatem. Infantes autem in augmento fluunt habentes humidum augens nimis fluidum propter spermatis vicinitatem : propter quod non tenent, nisi propter admirationem vel affectum magnum doloris vel gaudii profundentur in talibus pueris species. Amplius autem compressi, sive compressam habentes complexionem ex ætate in quibus stetit et non defecit humidum, sicut juvenes et virilem ætatem agentes, sunt bene reminiscibiles : et durat in eis reminiscentia usque ad longam ætatem quæ dicitur senectus, eo quod illi satis habent humidum et non nimis fluidum.

Sic igitur a nobis dictum est de *memoria* et de memorari, qui est actus memoriæ, quæ sit natura ipsorum. Et dictum est qua partium animæ animalia memorantur. Dictum est etiam de reminisci ipso et de *reminiscentia*, quid est, et quo modo est utrumque illorum, et propter quas causas contingit utrumque ipsorum.

Quare pueri
et senes non
sunt reminiscibiles ?

Signum melancholiæ.

INDEX

Tractatum et Capitulum in Libro de Memoria et Reminiscencia.

TRACTATUS I.

De memoria.

- CAP. I. Et est DIGRESSIO declarans intentionem Avicennæ et Averrois de memoria. 97
- II. Quæ libri intentio, et quæ vere sint memorabilia? 99
- III. Cujus partis animæ sit memoria? 101
- IV. De solutione dubitationis quæ ortum habuit ex hoc quod dictum est memoriam esse præteriti. 103

TRACTATUS II.

De reminiscencia.

- CAP. I. Et est DIGRESSIO de opinione Peripateticorum de reminiscencia. 107
- II. De reminiscencia secundum Aristotelem, in quo convenit et differt a memoria et aliis virtutibus et habitibus et passionibus animæ. 108
- III. De modo et arte reminiscendi. 110
- IV. A quo principio procedat reminiscencia? 112
- V. Qualiter omnis reminiscencia vel memoria accipit tempus præteritum? 114
- VI. Quod memoria differt a reminiscencia secundum subjectum. 116
- VII. De his qui bene et qui male sunt reminiscibiles. 117



D. ALBERTI MAGNI

RATISBONENSIS EPISCOPI, ORDINIS PRÆDICATORUM,

PARVA NATURALIA

DE SOMNO ET VIGILIA

LIBER PRIMUS

TRACTATUS I

CUI CONVENIAT SOMNUS?

CAPUT I.

Et est DIGRESSIO declarans quæ sit intentio libri et modus, et quis ordo in scientia naturali, etc.

Somnus et vigilia non sunt passiones nisi animalis, et conveniunt omni, ita

quod unum istorum ¶ inest semper : non autem conveniunt animali nisi secundum organa : et ¶ ideo non bene scientur ea quæ de sensibilibus virtutibus dicta sunt, nisi interponatur hic de scientia istorum, et sunt ista, secundum Augustinum, una pars scientiæ quæ est de communibus operationibus et passionibus animæ et corporis, de quibus post scientiam de anima tractandum erat : quoniam anima non habet operationes nisi quæ sunt conjunctæ et quæ separantur in animali præter solum intellectum, sicut patet in demonstratis in libro de *Anima*¹, et in libro de *Intellectu et Intelligibili*.

Cum etiam somni quædam passio sit somnium, et etiam somnia multa non

¹ I de Anima, tract. 1, cap. 6.

sunt sine intellectu, confert ista scientia ad meliorem notitiam eorum quæ de intellectu dicta sunt. Et iterum de hac causa hic statim est tractandum : quia licet juvenus et senectus, vita et mors generaliora sint quam somnus et vigilia, tamen quia facilitatem doctrinæ per omnia attendimus, videtur nobis de *somno et vigilia* prius quam ex illis esse tractandum : eo quod cum superius digestis majorem videtur habere cognationem. Est enim quidam modus separationis intellectus et conjunctionis cum separatis substantiis somnium quoddam, sicut dicunt Avicenna et Algazel, et plurimum conferunt ad sciendum qualiter intellectus mortalium illuminationem recipit a substantiis separatis : somnium autem non accedit nisi dormienti vel similiter disposito ut dormiens disponitur : et ideo hic continue de somno et vigilia videtur nobis esse tractandum.

Est autem hoc non prætereundum, quod apud antiquos Aristotelis discipulos hic liber est inventus continuari cum libro de *Sensu et sensato*, quem in quatuor dividebant libros, quorum primum de *sensu et sensato* dicebant. Secundum de *memoria et reminiscentia*. Tertium de *somno*. Quartum de *somnio*. Et hunc librum esse dicunt quem Aristoteles sæpe nominat de *communibus operationibus animæ et corporis*, quibus etiam quidam eorum convertunt alios tres, scilicet de *inspiratione*, et de *juventute*, et de *motibus animalium* : librum autem de *intellectu et intelligibili* quartum dicebant esse librum de *anima*, et tribus de *anima* qui communiter habentur, annectendum : et secundum hoc iterum non incongrue interponitur hic scientia illa a nobis.

Est igitur ista scientia de *somno et vigilia*, quæ sunt passiones animalis convenientes ei per instrumenta sensuum,

per quas animal est et vocatur animal : passiones enim animalis secundum quod est animal, quædam oriuntur ex anima et terminantur ad corpus, sicut sensus : quædam oriuntur ex corpore et terminantur in animam, sicut somnus et vigilia : et ideo incongruum videbatur superius inductis Philosophis, quod simul tractaretur de sensu et sensato, et de somno et vigilia. Cum autem somnus sit quies vel quieti similis multum, sicut ostendemus infra : et ideo ut privatio videtur non cognosci nisi per vigiliam : tamen quia causas físicas habet somnus, ideo oportet inquirere de somno quasi principaliter, et per solutionem somni cognoscere vigiliam : vigilia enim causas speciales non habet nisi eas quæ somnum solvunt et terminant, nec proprietates multas sibi attributas habet, nisi quæ sensui secundum actum convenire videntur. Hac igitur de causa licet somnus, ut diximus, sit quædam privatio et quies, tamen non habet causas privativas, et habet propria multa, de quibus oportet considerare physicum. Et hæc est causa quare ista scientia a somno magis quam a vigilia habet denominationem, cum tamen sit de utrisque : eo quod oppositorum scientia est eadem, sicut et idem subjectum susceptibile ¹.

Sunt autem quidam dicentes hanc particulam rerum naturalium debere consequi libros *Animalium*, eo quod illi libri sunt de corporibus animatis : somnus autem et vigilia sunt conjuncti : corpus autem simplicius est quam conjunctum ex anima et corpore. Et illi errant valde : quoniam in scientia de *Anima* determinatum est quoddam animalium principium sine quo non contingit sciri animatum corpus. Anima autem non scitur nisi sciantur opera ejus et passiones : opera autem quæ sunt animæ sensibilis, sunt agere per sensus et organa sensuum, et

¹ Cf. VI Topic. cap. 13.

passiones ejus sunt quæ in substantiis talibus fuerunt passiones : hæ autem operationes et passiones quæ fiunt per sensum ut causas, præcipue inducunt somnum.

Quoniam igitur congruum est de somno animalium determinare post scientiam de passionibus et operationibus sensuum : quia hæc omnia postea principia quædam sunt ad sciendum naturam animati corporis, licet iterum somnus et vigilia sint passiones secundum organa sensuum accidentes animali, non tamen hæc scientia de ipso animali tractat, eo quod habent causas principales et essentielles opera animæ sensibilis, ut diximus : labor enim qui est per exercitium sensuum somni, est causa communis et essentialis : et ideo non cum scientia de animalibus, sed post scientiam de operationibus sensuum et passiones eorum tractanda est scientia ista.

Quia vero librum Aristotelis de scientia ista habemus, sequemur eum eo modo quo secuti sumus eum in aliis, facientes digressiones ab ipso ubicumque videbitur aliquid imperfectum vel obscurum dictum, dividentes opus per libros et tractatus et capitula, ut in aliis fecimus. Nos autem omissis operibus quorundam modernorum, sequemur tantum Peripateticorum sententiâs et præcipue Avicennæ et Averrois et Alfarabii et Algazelis, quorum libros de hac materia vidimus concordantes : tangemus etiam quandoque opinionem Galeni, etc.

CAPUT II.

Quod somnus et vigilia insunt omnibus secundum idem : in quo etiam numerantur quæstiones hujus scientiæ.

Cum autem hic considerandum sit de somno et vigilia, ut diximus, videtur conveniens primo enumerare quæstiones principales et problemata, quæ de hac materia determinare intendimus : et quia non dubitamus, an sit somnus et vigilia, ideo ommissa ista quæstione, quæremus quid somnus sit et vigilia, et utrum sint animæ tantum, vel corporis tantum, vel communia utrisque ? Et si persuadebitur quod sint communia, tunc quæremus cujus particulæ animæ vel corporis sint ista per se ? et quæremus iterum propter quam causam insunt animalibus, investigantes et efficientem et materialem et finalem causam istarum passionum : et comparando istas passiones ad suum proprium susceptibile quod est animal, quæremus utrum omnia animalia communicent ambobus, scilicet somno et vigilia, vel quædam animalia non communicant nisi somno, et quædam non communicant nisi vigilia, aut ita conveniunt animalibus, quod quædam nec somno, nec vigilia communicant : quædam autem communicant utrisque.

Et his determinatis in libro primo, quæremus in secundo, quid est somnium : et propter quam causam quidam dormientium somniant, quidam non : et quare

qui somniant, aliquando recolunt, et aliquando non recolunt : et quæ sit causa hujus, quod recolunt aliquando : et quæremus adhuc, licet non omnia sint de hujus scientiæ proprietate, utrum contingat in somno prævidere futura vel non : et si detur quod contingat futura prævidere, quæremus qualiter hoc contingat. Quæremus etiam, utrum contingat prævidere futura et causata ab homine solum, vel aliqua virtute quæ in ipso naturaliter sit vel non sit, sed habeant causam ex quibusdam dæmonibus, qui sunt animæ cœlestes, quas quidam *intellectus* vel *intelligentias* vocant. Et oportet iterum quærere, utrum hæc somnia habeant causam determinatam in natura, vel fuerint casu, vel eventu, ut quidam dicunt.

Istæ quæstiones sunt in tota scientia determinatæ : non autem eo ordine quo enumeratæ sunt, determinari possunt. Quoniam cum prima quæstio sit, quid est somnus : et somnus est quædam passio animalis : et nos scimus, quod passionis diffinitio non habetur nisi per substantiam, oportet nos determinationem primæ quæstionis dimittere, donec quædam aliæ determinantur.

Adhuc autem nos nulla ratione indagare possumus, utrum sint istæ passionnes communes animæ et corporis, nisi sciatur secundum quid eidem animali insunt, oportet ab illo nostram incipere considerationem.

Dicamus igitur, quod manifestum est has passiones circa idem animal et circa eandem partem animalis inesse. Hoc autem probatur per hoc quod illæ duæ passiones inter se opponuntur ut privatio et habitus, aut habentia modum privationis et habitus : quod nos inferius declarabimus, et causæ eorum habent oppositionem contrarietatis. Sed quod hic sufficit, est quod somnus est impotentia quædam sensuum, vigilia autem potentia sensus secundum actum facti. Impotentia autem et perfectio opponuntur sicut privatio et habitus. Causæ autem proximæ istarum passionum sunt calor et frigus, ut infe-

rius ostendetur. Sic igitur supponamus ista nunc esse sicut opposita, et quod somnus sit quædam privatio vigiliæ : dico autem *quædam*, quia nec proprie quies est, nec proprie privatio, ut videbitur inferius. Cum igitur sic habent modum oppositorum, oportet etiam quod insint eidem et nata sint fieri circa idem : omnia autem extrema quæ maxime distant in generibus oppositorum, circa idem videntur esse, ut docent logicæ rationes. Hæc enim generalis est tam in naturalibus quam in aliis, et probatur per inductionem : visus enim et cæcitas insunt circa idem, quia circa oculum : simpliciter autem secundum idem insunt sanitas et ægritudo, quia secundum complexionem vel compositionem insunt corporibus complexionati vel compositi : sicut secundum idem insunt fortitudo et debilitas, quia sunt secundum ministrativam virtutem et robur naturale corporis : et similiter pulchritudo et turpitudine circa proportionem coloris et figuræ membrorum corporis : et similiter surditas et auditus, quia circa auditum sunt : et sic de omnibus aliis extremis in oppositione invenitur. Dico autem *extrema oppositorum*, præcipue in eis quæ opponuntur ut privatio et habitus : eo quod in his non sint nisi extrema, sicut in affirmatione et negatione, et nullum omnino medium secundum se : cum igitur talem modum oppositionis habeant somnus et vigilia, oportet omnino de hoc inesse eidem et secundum idem.

Amplius autem hoc idem erit manifestum etiam ex his quæ nunc dicemus. In qua enim particula cognoscimus vigilantem dum vigilat, in hac eadem cognoscimus dormientem dum dormit et a somno premitur. Nos autem eum qui sensu utitur, putamus et dicimus vigilare : et e converso dicimus eum qui vigilat, sensu uti et per sensum secundum actum sentire aliquem motuum extrinsecorum quem inferunt exteriora sensibilia in organo sensuum, vel aliquem motuum exteriorum si forte retrahit virtutem sensus commu-

nis ab exterioribus organis, et convertit ad interiora motuum perceptionem ut faciunt formæ sensibilium receptæ in organo sensus communis et phantasiæ vel interiorum aliquarum virium. Si ergo vigilia in nulla parte cognoscitur animæ, nisi in ea quæ est sensus secundum actualem usum sensuum, manifestum est quod in parte illa qua contingit sentire, vigilant animalia vigilantia et dormiunt animalia dormientia dum dormiunt vel vigilant.

CAPUT III.

Quod solum secundum sentire insunt somnus et vigilia, et quod plantis non conveniunt, eo quod sensibilem partem non habent.

Sic igitur determinato eo quod tertio loco quæsitum supra posuimus, facile determinatur nobis id quod secundo loco quærebat. Cum enim tale quid sentire sit quod est facultatem utendi sensibus habere, vel impotentiam ejusdem, neque animæ solius proprium est, neque solius corporis: eo quod sensus qui secundum actum talem est motus quidam per corporeum instrumentum, patet quod hæc passio quæ est somnus et vigilia, nec animæ propria solius est, nec corporis: cujuscumque enim est talis potentia quæ est plena facultas sensus usus, ejusdem etiam est actus et privatio ejusdem. Vigilia autem est actus talis facultatis et somnus privatio: igitur somnus et vigilia sunt pas-

siones communes. Et hoc patet per hoc quod sicut solius animæ sine organo est non sensibus uti, ita nec inanimatum corpus organo sensuum possibile est sentire.

Cum autem passiones conjuncti determinatæ sint, facile ex prædictis scire possumus cujus conjuncti, ex qua scilicet anima et ex quo corpore conjunctæ sunt istæ passiones: in aliis enim libris quos fecimus de *anima*, primum determinatum est de particulis quæ dicuntur vires vel potentiæ animæ: et in illis libris determinatum est de nutritiva potentia animæ: et ostensum est quod hæc potentia animæ inter ea quæ habent corpora animata, separatur ab aliis potentiis animæ, quæ sunt sensus et intellectus, et secundum esse et subjectum: cum tamen nulla aliarum potentialium secundum subjectum separaretur ab ipso. Omne enim sensibile vegetabilem habet potentiam, et similiter omne intellectuale in his quæ habent corpora mortalia.

Ex dictis igitur manifestum est, quod quæcumque animata non participant nisi augmenti et diminutionis per vegetabilem potentiam, non habent sensum quo determinatur vigilia et somnus, non habent vigiliam neque somnum: plantis igitur non inest nec somnus, neque vigilia: plantæ enim non habent sensibilem particulam animæ, sive demus, quod tamen non constat, quod sensibile separabile est a vegetativo secundum possibilitatem: eo quod aliud genus potentiæ est, et etiam secundum esse diffinitum separabile sit, sed non secundum subjectum: quia subjecto esse sensibile, vegetabile est, sed non convertitur. Cum igitur in plantis sit privatio sensibilis particulæ secundum subjectum, plantis omnino non convenit dormire et vigilare.

Dubitabit autem fortasse aliquis de hoc: si enim gustus est sensus alimenti et similiter tactus, alimento autem uti contingit secundum vegetabilem animæ particulam, videbitur forte alicui quod plantis inest sensus tactus et gustus: et hoc quidem dicit Isaac Israelita Philosophus in

Plantæ qualiter non dormiunt neque vigiliant?

Pulchra dubitatio.

Isaac Israelita.

libro de *Elementis*, distinguens duplicem tactum et duplicem gustum: dixit enim hos duos sensus inesse quibusdam naturaliter solum, et quibusdam naturaliter et animaliter: naturaliter autem dicit his inesse quæ capiunt alimentum secundum substantiam solum, naturaliter vero et animaliter his quæ capiunt alimentum secundum substantiam, et insuper habent potentias apprehensivas sensibilium specierum alimenti: plantis igitur videbuntur inesse per hanc rationem isti duo sensus, et per consequens ita erit in eis somnus et vigilia.

Amplius cum omnis potentia agens in determinatum tempus lassetur in opere, ut dicetur inferius: et necessario indiget quiete reparante quæ est somnus: et cum alere et augere et generare sint opera hujusmodi potentiarum, videtur quod particulæ secundum quas fiunt hujusmodi opera, indigeant quiete quæ est somnus: et ita non solum animalibus secundum sensibilem particulam, sed etiam vegetabilibus inerit et somnus. Et hoc quidem concessum est jam a pluribus.

Et adjungit rationem his quæ dicta sunt et multa signa. *Ratio* autem quam in dictis injungit, est quod, sicut nos inferius declarabimus, somnus est propter reparationem spiritus in qualitate et quantitate debilitatis, ex hoc quod promovetur ad exterius corporum animatorum: ideo etiam somnum diffinientes dixerunt, quod somnus est retractio spirituum ad interiora: in plantis autem est hujusmodi expansio spiritus et caloris in exteriora corporis plantarum: cum igitur ex hoc et in quantitate et qualitate deperdatur, indigent plantæ somno, in quo hujusmodi spiritus reparatur. *Signum* autem hujus esse dicunt, quod in noctibus flores plantarum claudi videntur et comprimi, et in die aperiri et extendi: hoc autem est proprium dormientium, quod corpora

sunt minora dormientia, et sunt majora vigilantia. Hæc ergo omnia videntur somno et vigilia participare. Fuerunt autem in hac opinione multi Antiquorum, et rationes illæ et multæ aliæ minus probabilitatis habentes inveniuntur in libro eorum.

Sed omnino falsum est quod dicunt: ^{Contra Isaac et alios.} sensibilis enim particula gustus et tactus non diffinitur ab eo quod est capere alimentum tantum, sed ab eo quod est sensibiles species apprehendere sine materia, quod omnium sensuum convenire diximus in libro de *Anima*¹: et ideo nulli insunt sensus nisi animali solum. Natura enim secundum quod hujusmodi, non est principium alicujus sensus, sed anima quædam est, ex qua emanat sensus: et ideo sensus naturæ non invenitur, sed neque omnis animæ, sed tantum ejus quæ est sensitiva, et non ejus quæ est intellectiva: et ideo mendacium est quod Isaac confinxit.

Quod autem dixit lassari potentiam quæ agit in tempore determinato, solvant ante nos Philosophi plures, et præcipue Averroes, qui dicit hoc intelligi de potentiis et virtutibus, in quibus motus virtutis quo movet organum, non est naturale motui organi: in his enim ex usu necessario motus inducitur lassitudo et languor, sicut est in ambulatione et motu elementorum et omnino non aliorum sensuum: talis enim motus non est sentire, nutrire, et augere, sicut nos ostendimus in libro de *Physico auditu*, et in libro de *Nutrimeto*, quod cibus movetur naturaliter ad membrum sicut ad suum locum, et ad suam speciem per quantitatem ejus fit augmentum, et per superfluum ejus generatio: et ideo tales motus non inducunt lassitudinem, sed perfectionem: propter quod ex illis non causatur somnus nec etiam vigilia.

Et quod dicunt de instrumento quod est spiritus, dicendum quod in talibus

¹ II de Anima, tract. III, cap. 31 et 32.

corporibus duris sunt pauci spiritus et humor plurimus et tenax : et ideo non facilis est excursus et recursus caloris et spiritus, sed per totam hyemem recurrit et per æstatem deducitur, non quidem sicut in somno et vigilia, sed potius sicut repressus solo frigore circumstantis aeris, et revocatus calore ejusdem : in somno autem et evaporatione cibi causatur retractio et emissio hujusmodi spirituum.

Responsio
ad signum
Isaac et
aliorum.

Et quod corpora sint minora uno tempore quam alio, non est nisi propter frigus aeris circumstantis, et non propter somnum. Et ex eadem causa est clausio florum in nocte, et apertio quæ est in die : si enim sic crederent syllogizare, quod plantæ reprimuntur et excluduntur, et sic concludere vellent plantas dormire et vigilare, esset syllogismus ex affirmativis in secunda figura. Sic igitur patet soli animali secundum sensibilem particulam convenire somnum et vigiliam, etc.

CAPUT IV.

Quod omne animal quandoque dormit, quandoque vigilat, et nullum animal semper facit alterum istorum, ex quo concluditur imperfecta somni definitio.

Quinto autem quæsitum, scilicet utrum eadem animalia communicant utrisque his passionibus vel non, ex dictis facile est determinare. Nullum enim est animal quod semper vigilet, neque animal est aliquod quod semper dormiat, sed eisdem animalibus utraq̃ue passiones successive insunt, ita quod modo una, postea alia : et iterum patebit quod nullum est animal sensum habens, quod contingat neutrum horum participare, ita quod neque dormiat, neque vigilet : utraque enim hæc passio est circa sensum primi sensibilis sive sensui, quod ostendimus in libro de *Anima* esse sensum communem, quod sequentia declarabunt. Sed nunc dicimus quod non contingit alterum horum, somnum scilicet et vigiliam semper inesse eisdem : velut si diceretur aliquod genus animalis semper dormire et numquam excitari, aut aliquod genus animalis diceretur vigilare et numquam dormire.

Amplius quorumcumque animalium est aliquod opus secundum naturam virium quæ sunt in ipsis, quando excesserit tempus determinatum illis virtutibus, vel excesserint aliqua eorum quæ

secundum suas facultates possunt quodam tempore facere, necesse est ea languescere : sicut oculos videntes qui non habent facultatem nisi in quodam tempore utendi visu, necesse est languescere : et tunc necessarium est quod illa quiescant aliquando, tales non faciunt actiones.

Hæc autem hic supponemus : eo quod in scientia de *Anima*¹ probavimus omnem sensum esse harmoniam et corrupti ab excellentia operationum, et ab excellentia objectorum : necesse est esse harmonice compositum : non enim potest esse, sicut postea declarabimus, quod discursus et motus multus spirituum sensibilium in organis non inducat resolutionem in organis et in ipso sensu : est autem continuus discursus spirituum in organis in usu sensuum : inducitur igitur languor et lassitudo ex usu sensuum in spiritu sensitivo et organis sensuum : eadem de causa necesse est languescere manum et omne membrum harmonicum, cujus est opus vel officium aliquod, ita quod motus moventis virtutis non est omnino de natura organi moti, sicut in *Cælo et Mundo* determinatum est. Si igitur sentire est alicujus organi opus, si continue sentiat sine interpositione quietis, oportet ipsum languescere per aliquod continuum tempus in quo suum exercuit opus : et ideo tunc suspendetur ab opere et non faciet illud : si igitur vigilare diffinitur, quod sit solutio sensuum et exploratio ad actum, absque dubio vigilare per exercitium hujusmodi in organis sensuum lassationem inducit. Cum igitur sit contrarium ei quod est dormire, et contrariorum alterum necesse est inesse, et vigilia non inest continue propter hoc quod resolutionem inducit sensus et spiritus, oportet quod aliquando insit dormire, tempore videlicet illo quo vigilia non potest inesse propter resolutum

spiritum sensibilem et organum sensus.

Si autem est rationis talis passio, qualis nunc dicta est, hujus est impotentia quædam quæ inducta est propter excessum vigilandi, tunc somnus sic diffinitur quando dicitur, quod somnus est impotentia utendi sensibus propter excessum vigilandi. Sed hæc diffinitio non dicit plene quid est somnus : quia non dicit causam proximam, sed tantum essentiam ejus : quoniam potest haberi secundum quod privatio est vigiliæ, sicut si diffiniendo eclipsim lunæ dicerem : eclipsis lunæ est defectus luminis lunæ, ex eo quod lumen non recipit a sole : ex hoc enim non dicerem nisi essentiam eclipsis, et non causam propinquam : et tales diffinitiones sunt sicut conclusiones demonstrationum, et non sicut media : et ideo sunt imperfectæ : quia in diffinitione passionum oportet ponere causam propter quam inest passio : eo quod passio non comparatur ad subjectum, sicut ad subjectum tantum, sed sicut ad subjectum ad causam essentialem ipsius. Si enim compararetur ad subjectum ut ad subjectum tantum, tunc esset accidens communiter et non propria passio, et posset adesse et abesse præter subjecti corruptionem, etc.

¹ II de Anima, tract. iv, cap. 1.

CAPUT V.

Quod omnis somnus est excitabilis et omnis vigilia terminatur ad somnum.

Quia autem jam nos diximus quod somnus est impotentia quædam sensuum, et vigilia est exercitium sensuum secundum actum, oportet nos determinare qualis et quæ impotentia sensuum sit somnus. Vigilandi enim excessus ultra quam possint sustinere organa sensus, aliquando est ab ægritudine : et tunc vocatur *insomnietas* : aliquando est absque ægritudine ab ipso usu sensuum ultra quam sustineat sensuum compositio et harmonia. Cum enim uno oppositorum multipliciter dicto necesse sit et reliquum multipliciter dici, oportebit etiam quod sensuum impotentia aliquando sit ab ægritudine, aliquando præter ægritudinem ab ipso usu sensuum causata. Et ideo necesse est quod omne quod vigilando excedit, aliquando dormiat : quia, sicut jam dictum est, impossibile est quod semper agat secundum sensus.

Eadem autem ratione non convenit aliquid semper dormire. Et hoc quidem multis rationibus patet, quarum una est, quia cum anima sensibilis sit en-delechia corporis sicut vigilia, ut diximus in libro de *Anima*¹, quod somnus

est ligamentum sensus ab usu sensuum, oportet hoc vinculum sensuum et immobilitatem aliquando resolvi. Inest enim somnus, ut diximus, secundum sensibilem partem animæ : et ideo necesse est quod omne dormiens habeat sensibilis partem : sensibile autem est, quod a facultate naturæ possibile est sentire secundum actum, sed dum dormit, impossibile est agere secundum sensum. Si ergo natura nihil facit frustra, et ipsa sensibilis pars perfecta est magis ut vigilia quam ut somnus, necessarium est omnem somnum excitabilem esse : aliter frustra erit sensibilis quæ, ut dictum est, nihil operatur in somno secundum sensus exteriores.

Alia autem ratio est : quoniam sicut organum sensus languet ex nimio spirituum sensibilium in ipso discursu et frequentia, ita etiam obstruuntur pori ejus, et complectuntur humoribus grossis, si nimis iniaceat ei humor grossus et frigidus : talis autem humor reducitur in organa sensus per somnum : et ideo sicut necesse est quandoque dormire ut quiescant organa sensuum, ita necesse est somnum aliquando excitari, ne organa destruantur per frigus et humorem.

Adhuc autem alia ratio est : quia somnus non desideratur nisi secundum accidens, finis enim sensuum est vigilia : quod autem per accidens et propter aliud desideratur, in quoddam tempus et non semper oportet manere : oportet ergo somnum omnem excitabilem esse.

Amplius autem adhuc alia ratio est : quia cum in somnis calor et spiritus ad interiora moveantur retracta propter digestionem perficiendam, oportet quod digestionem perfecta cibus et virtus diffundantur per membra : ad hoc enim facta est digestio, et sine hac esset otiosa et vana : oportet igitur quod confortato spiritu redeat spiritus ad exteriora vehens

¹ II de Anima, tract. I, cap. 3.

virtutem et nutrimentum : hoc autem est vigilia, expansio scilicet spiritus et caloris ad exteriora, et evectio virtutis : oportet ergo omnem somnum excitabilem esse, et nullum animal semper dormire.

Amplius autem Isaac dicit, quod spiritus motus est in corpore sicut motus lucis est in mundo : est autem lucis motus et caloris ascensus et descensus, ut diximus in libro de *Nutrimeto* : oportet igitur proportionem his motibus habere spiritum motus : his autem non proportionatur motus nisi motus ad intus et ad extra spiritus caloris : quia descensus lucis et caloris per frigus ad interiora recludit spiritum et calorem : ascensus autem lucis et caloris in mundo evocat spiritum et calorem ad exteriora : sed reditus ad interiora spiritus et caloris causat somnum, evocatio et expansio ipsorum ad exteriora causat vigiliam. Igitur omnis somnus ad vigiliam, et omnis vigilia ad somnum terminatur.

Somnus et
vigilia unde
causentur.

CAPUT VI.

Quod omne animal somno communicat et vigilia solum et semper, sed differenter.

His igitur probatis, manifestum est quod pene omnia animalia somno communicant. Omnia enim in rei veritate somno communicant, licet non de omnibus sit manifestum hic. Et hoc per inductionem experti probant de omnibus :

natatilia enim et volatilia et gressibilia visa sunt dormire : experimento enim genera piscium visa sunt dormire, et alia genera quæcumque habent oculos duos, et non habent palpebras quibus tegant oculos : hoc enim specialiter ponimus : quia in oculis eorum non potest considerari quando dormiunt et quando non, eo quod semper habent oculos apertos : consideratur autem in hoc quod huiusmodi animalia inveniuntur quiescentia. In his autem quæ habent apertos oculos, planum est : quia cum causa somni, ut infra patebit, sit humiditas frigida a cerebro descendens, et magis juxta cerebrum sint oculi quam alii sensus, oculi primi sunt qui gravantur et premuntur in somno : et ideo in oculis primo consideratur somnus. Similiter autem dormire invenimus animalia intersecta sive succincta, quæ quasi composita ex corporibus colligatis in medio, quæ vocantur annulosa, sive rugosa, ut vespæ, et apes, et muscæ, et huiusmodi : omnia enim hæc quiescunt immobilia existantia aliquando. Animalium autem quædam sunt valde brevis somni : et ideo frequenter imperitos latet utrum talia animalia somno participant vel non : et hoc præcipue in his quæ durum habent corium exterius, sicut scarabæus, et annulosa volatilia : in his enim secundum sensum non facile percipitur somnus propter brevitatem somni eorum. Sed tamen si alicui videtur verisimilis ratio quam induximus, potest illa suadere : hæc enim fuit causa quare adhuc rationes multiplicavimus, ut ex pluribus quasi persuadeatur quod omne animal necesse sit dormire.

Ut ergo quasi recapitulando dicamus, ex dictis est manifestum, quoniam omnia animalia participant somno : diffinitur enim animal per hoc quod est sensum habere, ut diximus in libro de *Anima*. Ex dictis autem in hoc libro constat, quod somnum dicimus per diffinitivam rationem esse vinculum quoddam et immobilitatem sensuum, et vigiliam esse

Quid somnus ?

Quid vigilia ?

sensuum solutionem et remissionem ad exteriores actus. Patet enim ex his, quod nullam plantarum possibile est communicare alteram illarum passionum, ut quod neque somnus, neque vigilia existat sine sensu : in quibus vero sensus est, his et tristari et gaudere insunt, ut in libro de *Anima* sufficienter est probatum : quibus vero inest tristitia vel gaudium, his omnibus inest concupiscentia : et differenter quidem insunt animalibus perfectis et imperfectis : perfectis enim perfecte, et imperfectis confuse insunt hæc : et similiter sensus communis : plantis autem nihil horum inest, neque perfecte, neque confuse.

Signum autem ejus quod diximus, accipere possumus in hoc quod si sensus inesset secundum nutritivam quæ est in plantis, tunc ligamentum ejus esset somnus : nunc autem somnus non ligat eam : quia nutritiva magis opus suum perficit in dormiendo quam in vigilando, eo quod tunc spiritus et calor ad interiora reducti coadjuvant calorem digestionis, et complent digestionem : quando autem ad exteriora expanduntur, tunc immutatur spiritus et calor interius, et debilitatur digestio : omnia enim dormientia magis in somno nutriuntur et augentur, licet ligatos tunc habeant sensus : et hoc fit tamquam ad alimentum et augmentum nihil sint egentia, ad sensus secundum actum reversionem.

Cum autem sic sit, quod omne animal aliquando dormiat, et aliquando vigilet, tamen diversimode valde se habent in his animalia. Quæcumque enim sunt frigida et viscosa, habent multas superfluitates circa locum digestionis, et sunt spissæ pellis, dormiunt diutius quam alia : et necesse habent multum tempus anni, quando phlegma generatur, dormire, sicut ciconiæ et nisi et hujusmodi : quæcumque autem habent subtile humiditatem paucam, parum dormiunt, et est tempus breve somni eorum. De his autem determinandum est in libro de

Animalibus, ubi animalium differentiarum determinabuntur.

CAPUT VII.

Et est DIGRESSIO declarans principium spiritus, ut sciatur qualiter somnus est ligamentum sensuum.

Ad intellectum autem faciliorem eorum quæ dicta sunt et dicenda, faciemus digressionem, dicentes quod in corpore omnis animalis est corpus subtile quod vocatur *spiritus* : et est aereum in substantia, vel potius secundum naturam inter aerem et aquam medium, quemadmodum dixit Heraclitus. Est autem evaporatio quæ fit ab humiditate cibi quando est naturale : si enim esset evaporatio quando fit ab humido radicali, tunc non esset secundum naturam : quia tunc debilitaretur corpus ex multitudine ejus. Nos autem scimus quod confortatur multum corpus ex multitudine spiritus. Fit autem hæc evaporatio per calorem naturalem, cujus primus et principalis fons est cor. Hoc igitur corpus lucidum est, quia est diaphanum spissum : et est subtile, quia ab animali calore digestum et depuratum : qui calor subtilior est quam aliquis calor corporis. Est igitur instrumentum animæ directum ad omnes operationes ejus : et ideo movetur sursum, et deorsum, et ad latera, et est vehiculum vitæ et omnium operationum vitæ quæ est ab anima, et omnium virtutum ejus. Oportet igitur quod sedeat

Peripateticorum opinio de principali membro.

et causam habeat primo et principaliter in corde et profluxum ab ipso, et profluens a quo dirigitur ad hepar : et fit spiritus naturalis : eo quod perficit naturalia, quæ sunt digerere et convertere et assimilare et hujusmodi : proficiens autem ad cerebrum, perficietur in illo, ita quod sit spiritus animalis, sic dictus, eo quod perficit in cerebro virtutes animales, quæ sunt sentire, imaginari, et cogitare, et hujusmodi. Hoc autem quod diximus, est sententia Peripateticorum omnium.

Galenus opinio.

Sed Galenus non ita dicit, et quidam alii. Dicunt enim spiritum naturalem oriri ab hepate et alterari a cerebro præter hoc quod aliquod istorum referatur sicut ad primum principium istius. Sed quod hoc omnino falsum sit, ostendetur in libro de *Animalibus*¹ : sed ostensio quæ hic sufficit, est hæc quam nos jam scimus ex libro de *Anima*², quod anima est una in substantia, et plures in potentiis, et quod ipsa est perfectio organici et physici corporis in omnibus animatis. Oportet igitur, quod sicut in motore multitudo potentiarum fluit ab una et refertur ad illam, ita etiam in eo quod movetur corpore, multitudo tota organorum exeat ab uno, et referatur ad illud : hoc autem non est nisi cor : oportet ergo quod illud quod vehit operationes virtutum in quodlibet organum, deriveatur ab illo a quo est fluxus virtutis : hoc autem est ab anima quæ est in corde. Dum igitur tale vehiculum sit spiritus, spiritus secundum principium sui et sedem ex corde est, et ad cor refertur. Nec obstat, quod diximus spiritum ex humore cibi nasci : quoniam non nascitur ex humore cibi impuri : quia quamdiu non est colatum purum ab impuro, non generatur ex eo spiritus nisi qui est ventositas. Est autem duplex colamentum ipsius. Unum quod fit in stomacho, ubi

Reprobatio Galeni.

ab ipso separatur superfluitas grossa sicca : alterum autem in hepate, ubi separatur ab ipso superfluitas humida quæ est urina. In animalibus autem habentibus vesicam, remittitur hoc ad vesicam, sed in non habentibus vesicam, remittitur ad stomachum et ad inferiora alvi, ut ejiat cum stercore, quæ est superfluitas sicca. Chymus autem et massa puri cibi elevatur ad locum qui est sub corde, et ibi accipit digestionem et subtilitatem et formam illam qua postea per se movetur ad membra viva : de qua forma diximus in libro de *Nutrimeto*. Habet enim habitum vitæ quæ non potest ei ferre nisi membrum universale, quod est principium vitæ in omnibus, et ibi generatur spiritus ex ipso humore, cujus tota substantia ad cor refertur : et ab ipso dirigitur ad membra quæ diximus : et cum pervenit, in ipsis accipit determinationem ad formam et ad virtutes et ad operationes, quæ sunt secundum proprietates membrorum illorum.

Hoc autem in minori mundo contingit sicut in majori : ibi enim videmus unum primum motorem esse a quo fluit quid est virtutis et operationum in toto cælo et elementis : quæ tamen virtus secundum quod applicatur inferioribus, determinatur et contrahitur ad operationes quæ sunt in inferioribus principiis convenientes. Similiter autem est in virtute luminis solaris, quod est principium omnium generatorum, et per applicationem sui ad virtutes quæ particulariter hoc et illud generant, determinatur et specificatur ad hoc et illud generandum.

Sic igitur in corde est virtus cujus vehiculum est spiritus : quæ tamen virtus et spiritus per directionem ad unum vel aliud membrum determinantur vel contrahuntur in speciales virtutes et operationes : nullum enim omnino inconveniens est si dicetur quid operari per vir-

¹ III de Animalibus, tract. I, cap. 5 et 6.

² II de Anima, tract. I, cap. 11.

tutem sibi attributam a corde, et postea illud operatum referri ad cor ut compleatur, et postea de illo completo iterum fieri distributionem in nutrimentum quo nutriatur hepar et cor et singula alia membra in corpore animalis.

Quod autem quidam dicunt, quod spiritus sunt de natura corporis cœlestis, est omnino absurdum : quia, sicut in libro de *Cœlo et Mundo*¹ probavimus, corpus cœleste non intrat per substantiam in compositionem alicujus corporis generabilis. Causa autem dicti est, quia spiritus movetur ad modum luminis cœlestis in totum corpus subito. Motum autem credebant indicare naturam corporis moti : sed hæc est deceptio, quoniam motus non indicat naturam corporis moti, nisi quando est motus naturalis : hic autem motus animalis non est naturalis : et ideo sicut motus pedis non indicat naturam materiæ pedis, sed indicat officium pedis inter membra officialia, ita motus spiritus non indicat naturam motus substantiæ spiritus, sed indicat officium ejus in motibus et actibus vitæ. Actus autem vitæ sunt omnia opera animæ, ut ostensum est in secundo de *Anima*².

His autem habitis, non est difficile declarare intellectum omnium quæ dicta sunt. Subjectum enim sensus habet actum vitæ, ut vehiculum vitæ et virtutis vehat ad ipsam virtutem. Si ergo non contingit extendi ad ipsum vehiculum, non habebit virtutem operativam. Diximus autem in libro de *Anima*³, quod virtus visiva actus est et perfectio oculi, et esset unius anima ejus si oculus esset animal : cum ergo pupilla habeat completam perfectionem ad esse, si non fluat ad ipsum spiritus vehens virtutem quæ fluit de fonte primo, erit ligata propter impotentiam organi : somnus autem est retractio spiritus ab exterioribus organis :

somnus igitur erit ligamentum virtutum exteriorum particularium sensuum et impotentia earum ad agendum.

Sic igitur intelligitur, quod somnum diximus esse impotentiam et ligamentum sensuum. Hoc autem est supra in *V Physicorum* concordanter hoc dicentium, scilicet Algazelis, Avicennæ, Alfabi, Averrois et Alchindi Philosophi.

CAPUT VIII.

Et est DIGRESSIO declarans qualiter omnis vigilia ad somnum, et omnis somnus ad vigiliam terminatur.

Quæret fortasse aliquis, quæ sit causa hujus extensionis et retractionis spiritus, ut sic causentur successive somnus et vigilia ? Sed hæc causa plana et in promptu est : quoniam cum spiritus calore nascatur cordis, et sit vehiculum omnium virtutum vitæ et operationum, necessario erit calidus in se et cum calore : cujus proprius motus est a centro usque ad circumferentiam : spiritus igitur naturaliter tendit ad extra sicut bonum ad dilatationem sui, ut calor naturalis etiam naturaliter a centro cordis ad omnem circumferentiam corporis expandatur. Non autem sic expanduntur spiritus et calor ut expanduntur tantum quantum est in

¹ I de Cœlo et Mundo, tract. 1, cap. 9.

² II de Anima, tract. II, cap. 2.

³ II de Anima, tract. I, cap. 3.

Quid vigilia
secundum
aliquos ?

ipsis forma et principium virtutum et operationum vitæ : sicut forma artis est in instrumento artis, et per instrumentum in actu inducta : necessario enim invehunt omnibus organis perfectionem et virtutem et operationem vitæ, quæ est operatio animæ, ut diximus. Et hoc est quod tradunt Philosophi, quod vigilia est expansio caloris et spiritus ad exteriora corporis. Cum ergo sint subtiles spiritus et calidi, necessario aperiunt poros corporis : et cum sint substantiæ liquidæ fumales, evaporant et evanescent : cujus signum est, quia calor coarctans spiritus, et motus dissolvens poros, et sudor, et hujusmodi omnia debilitatem inducunt propter evaporationem spirituum et caloris naturalis.

Similiter et usu sensuum contingit debilitari spiritum qui est vitæ vehiculum, et contingeret spiritum in toto deficere et animal mori, nisi esset aliquid reparans eum, et restituens quod est deperditum ex ipso : debilitato enim spiritu et attenuato, contingit infrigidari organa quæ calore spirituum erant aperta. Infrigidatis autem organis, contingit poros exteriores claudi corporis, et per frigiditatem repelli calorem et spiritum ad interiora, sicut omne contrarium repellitur a suo contrario. Hoc autem facto, contingit necessario languere organum, et destitui sua virtute et operatione, quamvis sit animatum et perfectum in esse : sic igitur necessario revocatur aliquando ad interiora spiritus et calor : et tunc exteriora corporis ligantur a somno : et hoc est quod diximus, quod omnis vigilia necessario terminatur ad somnum qui est ligamentum sensuum. Hæc igitur est causa generalis omnis somni. Recurrentibus igitur calore et spiritu tali necessitate ad interiora, ad fontem et ad principium spiritus recurrunt : unumquodque enim naturalium ad suum recurrit principium secundum naturam. Tunc autem necessario contingit condensari calorem et spiritum ex multa reduplicatione eorum in seipsos. Si ergo ibi inveniant ma-

teriam ex qua multiplicentur, illam fortiter calefaciunt, et calefacta ea ex ipsa multiplicabuntur iterum : et quia calefaciunt, ideo digestionem coadjuvant : et hoc est quod dicitur, quod somnus est ligamentum animalium virtutum exteriorum cum intensione naturalium. Nutribilis enim particula, sicut diximus supra, magis perficit opus suum in somno quam in vigilia : cujus causa est quæ nunc dicta est : et cum omnis virtus confortetur quando multiplicatur ejus materia et subjectum proprium, necessario iterum multiplicabitur spiritus, et resumet esse deperditum ex sicco cibo per virtutem cordis et caloris similiter. Confortatis autem eis, sic iterum per naturæ necessitatem efflant ad exteriora vehentes in organa virtutes vitæ et operationes : eo quod tunc possunt super frigus quod recluserat poros et clauserat sensus : et tunc necessario lassantur organa sensuum in vigiliam et operationem : et hoc est quod diximus, omnem somnum esse excitabilem de necessitate.

Ex dictis autem habentur duo corollaria, quorum unum est, quod si spiritus ad interiora recurrentes, non inveniunt materiam ex qua reparetur deperditum ipsorum, quod tunc calor interior excitatus et multiplicatus consumit humidum ex quo debuit reparari spiritus : et homo tunc excitatur et debilitatur : et ideo dixit Aristoteles in *Regimine dominorum ad Alexandrum*, quod somnus jejuni exci-
Corollariæ primæ
Somnus junis quæ malus

Aliud autem est, quod si calor et spiritus recurrentes ad interiora, inveniunt ibi siccum cibi grossi et terrestri, qui potius fumat quam evaporet in spiritum, et tunc ex illo generantur fumi grossi ex spiritibus subtilibus, qui venientes ad organa sensuum pungentes generant ea : et ideo homo qui surgit a somno indigestus et fumo grosso plenus, sentit gravitatem in membris exterioribus.
Corollariæ secundæ

Patet igitur ex dictis intellectus præcedentium, et qualiter somnus sit vinculum et immobilitas et impotentia quædam sensuum exteriorum, vigilia autem habet omnia his contraria.

CAPUT IX.

Et est DIGRESSIO declarans diversas diffinitiones somni.

Dixit autem Alchamadi⁴ Philosophus, et videtur Averroes præbere assensum, quod somnus est vigor et confortatio sensus spiritualis, et debilitas est vinculum sensus corporalis : vigilia autem e converso vigor et confortatio sensus corporalis, et debilitas sensus spiritualis. Quod dictum verissimum est, quoniam sensus est in spiritualibus et non in corporalibus operans : spirituales autem sunt formæ acceptæ a rebus in anima interius existentes : avertens autem spiritum et sensum ab exterioribus, sicut diximus, necessario convertit ea ad interiora, et confortat eundem circa illa. Facit etiam hoc somnus : per contrarium autem vigilia quæ extrahit sensum et spiritum ad exteriora, avertit ab interiorum perceptione : et ideo circa talia debilitat sensum et spiritum vigilia : sensus autem corporales dicuntur sensus formales, qui fiunt ex præsentia corporum, et circa hoc ex-

trahendo spiritum et sensibilem virtutem confortat vigilia, et debilitat somnus, ut diximus. Dixit etiam idem Philosophus, quod sensus spiritualis dignior est quam corporalis, quando est verus : quando autem est falsus, est sensus corporalis dignior quam spiritualis : quod iterum est verissimum et subtiliter dictum : quoniam sensus spiritualis est perceptio sensibilium spiritualium : et hæc vera sunt quando in anima monstrantur sicut in re eveniunt : et hoc est verissimum genus divinationis, quod potest esse in somnis, sicut in secundo hujus scientiæ libro declarabimus : et ille sensus ideo vocatur, quia formæ sensibiles tangunt instrumentum sensus in somnis : dignior autem est, quia ex propriis principiis animæ perpetuis fluit. Quando autem falsus est, tunc est motus phantasticus confusus ex inordinatione phantasmatum, cujus inordinationis multæ sunt causæ quæ inferius ostendentur.

Per prædicta etiam patet intellectus multarum descriptionum, quæ a multis assignatæ sunt, et a nobis hic inductæ sunt. Quod autem quies dicitur somnus, non est proprie, sed metaphorice dictum : sicut enim patet ex declaratis in *Physicis*, quod vigilia non est motus physicus, neque usus sensus, sed est simile cuidam motui : et ideo etiam privatio vigiliæ non est proprie quies, sed secundum metaphoram et similitudinem sic vocatur.

Alfarabius autem diffiniens somnum dicit, quod est introitus sensus ad interiora, et immobilitas sensus omnimoda. Vigilia autem est exitus sensus ad exteriora : et iste Philosophus vult, quod tam somnus quam vigilia sint motus, et neutrum quies et immobilitas : quod contrarium his quæ dicta sunt, esse videtur.

Sed ad hujus solutionem hoc oportet supponere quod inferius ostendemus,

⁴ Vel melius *Alchindi*, quem cognominaverunt

Arabes *philosophus excellentissimus*.

quod scilicet somnus sit in animali secundum primum sensum, quod est sensus communis, et hoc est, quod comparat sensata particularia et propria, sicut prius diximus in libro de *Anima*¹. Cum autem spiritus sit formarum sensibilium vehiculum, et recurrit spiritus ad interiora, virtus vecta ad interius adhuc comparat ea sicut primum : et tunc magis quando ab exterioribus abstrahitur et abducitur : et quoad hoc solum dicitur, quod somnus est recursus sensus communis ad interiora : quia virtus spiritus sequens ipsum recurrit ad primum ejus principium, quod est quasi cor. Nec est intelligendum hoc de potentia animæ, quæ vocatur sensus communis : hæc enim sita est in organo suo sicut visiva virtus in oculo, sed intelligitur de virtute quæ influit super instrumentum, et de forma quæ formaliter sensus communis vocatur : illa enim adhuc interius retracta sensus communis objectum est, et discernit eam sensus communis. Sicut enim virtus sensus communis extenditur ad organum priorum sensuum per hoc quod est quasi centrum unde derivantur omnes, ita cum retrahuntur spiritus sensibilium organorum, et in ipsis formæ sensibiles adhuc respiciuntur ab ipso intrinsecus, et relationem habent ad eum sicut sibi deservientes : non enim minus refertur ad unum quod interius dirigatur quam exterius, sed in hoc est differentia, quod ad interius recurrentes spiritus sequitur virtus sensus communis, ad ex-

terius autem egredientes informat et transmittit organis sensuum particularium. Si autem in aliquo somno non sit talis sensibilitas formarum, non facit hoc minus generalem esse diffinitionem Philosophi : hoc enim contingit per accidens ex profunditate somni et turbatione spirituum et confusione, sicut inferius ostendemus : per se autem spiritus recurrens ostendit formas quas habet sicut regrediens repræsentat easdem. Et hujus simile est speculum, quod convertitur inter duos situs : in utroque enim repræsentat formam quam habet in se resultantem.

Est igitur somnus sensus communis ingressus hoc modo, cum tamen sit simpliciter ligamentum sensuum organorum. Signum autem hoc quod dictum est, dicit esse, quod et in vigilia sæpe interius determinatur sensus communis et ingreditur, quando videlicet homo circa interiora occupatus, considerat apud se aliquid quod resultat in spiritu sensibili : tunc enim non advertit ea quæ sunt coram oculis ejus, eo quod forma sensus communis tunc detinetur ne derivetur in organum sensus proprii : sicut enim in libro de *Anima* dictum est, sensus communis se habet ut forma, et sensus proprius ut materia in judicio sensibilium : et ideo imperfectum est judicium sensibilium quando sensus communis retrahitur ab eis, sicut materialia imperfecta sunt sine formalibus, etc.

¹ II de Anima, tract. iv, cap. 6.

TRACTATUS II

SECUNDUM QUID, ET PROPTER QUAM CAUSAM SEQUITUR SOMNUS?

CAPUT I.

Secundum quam partem animæ est somnus?

Considerantum autem deinceps est propter quam causam proximam dormiunt et vigilant animalia, et propter qualem sensum : et si secundum unum tantum inest somnus, vel secundum plures : et si secundum plures, secundum quales plures inest somnus.

Dictum est autem in III de *Anima*, quod quædam animalia habent omnes sensus, sicut quæ dicuntur perfecta :

et quædam non habent omnes sensus, sed carent quibusdam, sicut talpa dicitur carere visu. Sed tamen dictum est ibidem, quod sensus qui sunt necessarii ad vitam, omnia habent animalia, ut tactum et gustum : et hoc ideo est, quia isti sensus sunt sensus alimenti, sine quo non vivit animal, nisi sit valde perfectum : et tunc quidem non habet gustum secundum quem iudicium saporum est, sed tamen habet ipsum secundum quod est locus per quem attrahitur alimentum. Impossibile autem est quod qualecumque uno particulari sensu sentiat, vel usum sensus habeat animal quod dormit, eo quod omnes sensus habet clausos : oportet ergo quod passio quæ vocatur somnus, insit animali simul secundum omnes sensus : si enim partim sentiret secundum aliquos sensus non clausos per somnum, et partim non sentiret per aliquos sensus clausos per somnum, tunc sequeretur quod animal dormiendo sentiret simpliciter : qui enim secundum unum sensum sentit, sentit simpliciter : ergo sentiret dum inesset sibi vinculum et immobilitas sensuum universaliter, quod est impossibile. Quod enim

somnus sit naturale vinculum sensuum, patet ex demonstratis in ante habitis. Quoniam autem scimus ex libro de *Anima*, quod secundum unumquodque animal inest aliquid sensuum propriorum, et aliquid secundum quod est sensus communis, erit proprium, sicut proprium est visui videre, et auditui audire, et sic de aliis secundum unumquemque sensuum. Est autem quædam communis et formalis potentia, quæ sequitur omnes proprios sensus, et est quasi centrum ad quod sensus proprii sua referunt sensata : et hoc est secundum quod percipimus quod videmus, cum videt se videre, et cum videt se audire : non enim visu videt animal quando videt et audit, sed sensu communi : et hæc potentia etiam iudicat et discernit, quoniam alia vel eadem secundum subjectum sunt alba et dulcia faciendo compositionem et divisionem ad invicem sensibilibus propriorum. Sic enim visu vel gustu non potest discerni, quod alia sunt alba a dulcibus : nec ambobus sensibus his simul potest hoc iudicium fieri, sed oportet quod fiat quadam particula animæ communi quæ est communiter sensibilibus universorum. Hæc autem omnia probata sunt in libro secundo de *Anima* ¹.

Si autem sensus communis hic est unus, et suum organum sentiendi est unum secundum se, secundum tamen esse diffinitivum sensibile uniuscujusque generis est diversum, sicut soni et coloris et aliorum : et ideo componens inter hæc et dividens est unum et multa, unum quidem in subjecto et forma proprii organi, multa autem per naturam ad quam refertur propriorum organorum uniuscujusque proprii sensus. Quia autem hæc omnia certificata sunt in libro de *Anima*, ideo hic commemorata sunt tantum.

Sensus autem communis ille se habet

ad alios sensus, sicut tactus se habet ad alios : et est aptatio secundum aliquid similis isti. Actio enim hæc est operatio, quæ per tactum exercetur et maxime inest animalibus : hæc enim ab aliis organis sentiendi separatur : et alia ab ista nullo modo separantur, sicut in libro de *Anima* determinatum est. Sed est in hac adaptatione aliquid dissimile quantum in quolibet sensu proprio duo sint necessaria ad usum, virtus videlicet et perfecta dispositio organi : virtus ipsa fundatur supra virtutem sensus communis qui est suum principium unde fluxit formaliter : dispositio autem talis organi est sicut dispositio animalis, præter hoc quod organum est pars, et animalis totum secundum se, et si quodlibet organorum secundum se acciperetur, ipsum esset animal : et vis sensitiva quæ est in ipso, esset anima ejus. In animali autem sic est, quod nullum est animal præter tactum, qui est primum fundamentum animæ sensitivæ. Igitur in quolibet organo sic est, quod nulla vis sensitiva inest organo nisi prius secundum naturam insit tactus eidem, in quo fundatur virtus illa. Sic igitur similes et dissimiles aptationes habet ad sensus proprios sensus communis et tactus : ex quo relinquitur, quod cum virtutes omnium sensuum propriorum dirigantur ad organum sensus communis, quod vis quæ primo et tamquam fundamentum inest illis nervis, est virtus tactiva : et si contingeret illam ligari, quod omnes aliæ ligatæ sunt. Cum enim infrigidatus humor primo tangit organum sensus communis, quod est ab anterioribus capitis et cerebri, tunc continue tangit nervos sensuum particularium ad sensum communem directos : et cum immutet in eis qualitatibus quæ sunt frigus et humor, ut inferius patebit, immutat et immobilitat in eis virtutem tactus, in qua fundantur aliæ : et sic omnes ligantur et immobilitantur.

¹ II de Anima, tract. iv, cap. 8 et 10.

Sic igitur patet quod somnus est primo passio sensus communis influentis virtutes particularibus : et per hoc ligantur ne hauriant formam sentiendi, et proxime est tactus secundum quod est fundamentum organorum animatorum, et per consequens est sensuum priorum omnium : nec haberet rationem ligandi eos, nisi per hos duos modos : quia ex primo modo quo ligat sensum communem, aufert et avertit spiritum super quem vehitur virtus in quemlibet sensuum priorum. Ex secundo autem aufert habilitatem organorum, ne susceptibilia sint virtutum propriarum, etiamsi adesset vehiculum ad vehens ex sensu communi : et quia aversio spirituum est somnus per se et generaliter, ideo per se somnus est passio sensus communis : et quia humor et frigus non sunt causa somni nisi per hoc quod repellunt spiritum et caliditatem ab exterioribus, ideo tactus etiam est passio et somnus secundum quod est fundamentum sensuum, sed per aliud : sensuum autem particularium aliorum est per accidens passio ista.

Manifestum igitur ex dictis est, quod hujus particulæ quæ est sensus communis secundum quod ad ipsum referuntur nervi tactus virtutem habentes, est passio somnus, et etiam vigilia : propter quod omnibus insunt animalibus istæ passiones, eo quod tactus inest omnibus : quia ipse est sensus sine quo animal non est animal, et quo posito constituitur esse animal. Hoc autem licet modo probatum sit ostensive, tamen idem probatur per ad impossibile eductionem : si enim dormire inesset animali in eo quod omnes sensus proprii secundum se considerati aliquid patiuntur et immobilitantur, hoc non posset esse nisi hoc modo, quod uno immobilitato omnes immobilitarentur : hoc enim inconveniens videtur. Dicere enim simul immobilitari per plura, quæ neque necesse est, neque possibile secundum aliquem modum simul agere, ita quod uno agente omnia agant, est inconveniens : non enim necesse est quod

cum visus videt, quod auditus audiat : neque iterum possibile est quod actione visus audiat auditus, quia, si ita esset, oporteret quod idem esset objectum utriusque, quod est impossibile. Cum igitur neque necessarium sit simul agere omnes sensus uno agente, neque etiam sit possibile modo aliquo quem diximus, inconveniens est dicere omnes simul vacare uno vacante et immobilitato : contrarium igitur rationabiliter accidit eis, ut non simul quiescant uno quiescente. Si enim quod dictum est nunc, rationabilius se habet de his passionibus dicere, scilicet quod sint istæ passiones per se et primo sensus communis, per aliud autem tactus, et per accidens sensuum priorum. Nam, sicut patuit, cum principale membrum sentiendi quod est organum aliorum organorum priorum sensuum, et cui omnia alia innituntur per modum quem diximus, tunc necesse est omnia alia simul pati cum illo, sed non convertitur, quod cum aliquod priorum cui alia innituntur, impotens sit, fiant etiam alia impotentia, cum patiantur cum illo. Membrum autem et organum est uno modo sensus communis organum, et alio modo tactus organum, secundum quod est fundamentum sensuum : hujus igitur passio erit somnus et non sensuum priorum.

Hoc autem et aliter probari potest, quod manifestum est ex his quæ nunc inducimus, quod somnus fit in eo quod sensus sive usus priorum sensuum vacet ab exercitio et immobilitetur : neque fit somnus in eo quod impotentes sint sentire proprii sensus : impotentia enim et vacatio sensuum priorum fit, quando nullus est somnus in quibusdam alienationibus quæ dicuntur animæ defectiones : animæ enim defectio est quædam impotentia sensuum : amentia enim quædam sunt tales, quibus homo impotens ad sentiendum, ex melancholia factæ, ex quibus efficitur attonitus, ita quod neque audit, neque videt, cum tamen non dormiat.

Amplius autem hoc fit violentia, ut

quando venæ in cervice apprehenduntur et strangulantur, efficiuntur insensati secundum proprium sensum homines : cum tamen nihil dormiant. Sed somnus est, ut diximus, quando nec impotentia infirmitatis intercipit usum, neque vis fit in organo sentiendi aliqua, neque alia pro qualibet causa fit infirmitas naturalis, sed tantum, sicut diximus superius, tunc fit naturalis somnus, quando fit interceptio sensus in primo quo sentit anima, quod est sensus communis : et in primo organo tactus quod est fundamentum sensuum aliorum. Cum enim hoc impotens fuerit, necesse est etiam organa aliorum sensuum omnium habere defectum utendi sensibus : et non convertitur, quod cum aliquod aliorum organorum deficiat in propriis sensibus, quod propter hoc defectum et eclipsim quamdam patiatur primum organum sensus communis, et organum tactus, in quo fundantur cæteri sensus. Sic igitur dictum est cujus particulæ animæ sit hæc passio primo, etc.

CAPUT II.

Propter quam causam inest somnus et vigilia, et præcipue quæ sit causa finalis istarum passionum ?

Quoniam vero plures modi causarum sunt, quas cognoscere habet physicus,

dicendum est nunc propter quam causam accidit dormire, et cujus passio sit somnus : quia hoc quod ex vera causa somni declarabitur, dico quærendum esse in physicis, propter quam causam accidit hæc passio : quia nos physice loquendo dicimus aliquando causam propter quam res fit, quæ vocatur causa finalis : dicimus etiam aliquando causam unde est principium motus, quæ vocatur causa efficiens : magis autem improprie vocamus eam naturam et rationem sive formam, quæ dat esse et rationem, cum tamen illæ duæ causæ ingredientur in esse rei, magis proprie vocentur elementa, sicut efficiens proprie vocatur principium : finalis autem quæ causa causarum est, magis proprie vocatur causa. Quia igitur illa causa causarum est, dicamus ergo primo causam finalem hujus passionis.

Primo ergo considerandum hoc quod diximus in II *Physicorum* ¹, quod omnem naturam aliquid facientem dicimus ipsam facere quam ob rem, id est, ob quam rem : et hoc est bonum illius rei, cujus natura hoc facit : omni autem ei quod natum est moveri tali motu quo non semper et continue moveri potest, et qui inducit lassitudinem et est cum labore, dicimus quietem esse bonum et dulce, et est cum voluptate, et necessaria et utilis si salvari et non dissolvi debeat. Somnus autem, sicut diximus in *Physicis*, habet coaptatam metaphoram quietis : propter quod in rei veritate animal tunc quiescit, licet talis immobilitas non proprie quies vocetur, ut superius diximus ². Somnus igitur propter salutem existit animalium, alioquin spiritus et virtutes et per consequens omnia membra dissolverentur in ipsis : vigilia vero simpliciter est finis sensibilis potentiæ animalium : quia sentire secundum sensum et sapere secundum intellectum, omnibus est finis ultimus quibus inest altera illarum potentiarum, sensus scilicet

¹ II Physic. tract. III, cap. 2.

² Cf. superius, tract. I, cap. 9.

cet et intellectus : optimum enim non est in potentia neque in habitu etiam similis potentiae, sed in actione et operatione est, sicut probari habet in *Ethicis*. Cum enim potentia terminatur ad actum : similiter autem et habitus non detur nisi ut sit facilis potentia in agere, patet quoniam ambo sunt propter agere : et ideo agere secundum sensum vel intellectum est simpliciter finis sensibilibus vel intellectuum : hæc enim sunt optima sensuum vel intellectuum : finis autem uniuscujusque est optimum ejus. Est igitur unicuique animalium necessarium inesse somnum propter lassitudinem inductam ex opere sensuum.

Necessitas duplex.

Cum igitur multiplex sit necessitas, tamen qua indigemus, hoc est, quod est duplex necessitas, absoluta scilicet, et conditionalis. Necessarium autem absolute est, quod est secundum causam efficientem, vel materialem, vel formalem inevitabilem, sicut dicimus necessarium calefieri quod est in igne propter efficientem, vel grave descendere propter materiam, vel hominem rationalem propter formam. Necessarium autem conditionis est dictum secundum causam finalem eo modo quo dicimus, quod philosophantem necesse est studere : philosophia enim non discitur nisi per studium : et ideo si Philosophus fieri debeat, ut hic supponitur, studere oportet. Hæc igitur necessitas suppositionis, in quo fine supposito necesse est poni ea quæ sunt ad finem, per quæ habetur finis, et sine quibus non contingit haberi finem illum. Sic igitur ex suppositione finis, quæ est salus animalium, oportet aliquando inesse somnum : si enim animal ponatur habere suam naturam salvatam, oportet ei inesse quædam, sicut cibum evaporantem a loco caloris, et his existentibus, necesse est inesse quædam alia ut fines illorum, sicut est somnus et quies. Hæc igitur est causa somni finalis, propter quam natura vult somnum et desiderat, etc.

Causa finalis somni.

CAPUT III.

De causa efficiente somni et vigiliæ.

Amplius autem post hoc dicendum est quali motu et actu, sive cujus membri motu et actu accedit vigilare et dormire animalibus.

In primis igitur supponamus quod proportionale est, et in libro de *Animalibus* habebitur, quod in aliis animalibus ab his quæ habent sanguinem, causæ sunt proportionabiliter similes somno et vigiliæ, et his causis quæ sunt esse harum passionum in his quæ sanguinem habent. In animalibus vero habentibus sanguinem aliis ab hominibus, æstimare debemus etiam esse similes causas harum passionum, quæ in hominibus sunt causæ ipsorum : non enim potest esse quod una causa communis omni generi animalium, non habeat causas similes in omnibus : quia si in esse essent dissimiles, non posset esse passio ejusdem rationis in omnibus, cum ratio passionis non accipiatur nisi ex subjecto secundum quod est causa passionis, ut superius diximus.

Hoc igitur supposito, speculemur quæ sit causa somni et vigiliæ in homine. Nos autem in aliis diximus, quod in animalibus ab ea parte est principium primi sensus a qua est et principium motus.

In libro enim de *Anima*¹ probavimus, quod non moveat nisi intellectus et phantasia : et iterum dicemus de hoc in libro de *Motibus animalium*. Locus autem a quo originatur utrumque horum, est pars media trium determinantum locorum in animalium natura. Medium dico sursum capitis, et deorsum ventris vel hepatis. Hæc enim loca constituunt spirituum regiones, et a Platone et ab omnibus Philosophis : quia regio ventris ubi est hepar, est regio spirituum naturalium : regio capitis est principium spirituum animalium, et media quæ est cordis principium vitalium : et hæc præcipue dicitur regio spiritualis. Peccavit autem Plato, ut in libro de *Anima* diximus, dispartiens animam in diversas essentias in has regiones, cum ipsa sit substantialiter una et diversificata in potentiis. Oportet igitur hoc esse in corpore, quod est in substantia animæ et potentiis ejus : et ideo necesse est quod regiones illæ ad unum aliquod principium referantur, unde causatur spiritus in aliis : hoc autem principium non est nisi cor, ut in libro de *Animalibus*² probabitur. Omnibus igitur sanguinem habentibus cor erit primum principium motus et sensus. Omnia enim sanguinem habentia habent principium motus, et primum principium proprii sensus est ab eodem. Manifestum est igitur, quoniam primum principium motus animalium et spiritus est cor.

Nota ubi sit origo spiritus vitalis, naturalis, et animalis.

Contra Platonem.

Nota hic de spiritu vitali animali, et naturali, quomodo ab invicem differant.

Modum autem hujus superius diximus : quoniam licet spiritus naturalis formam naturalia perficiendi forte accipiat ab hepate, sicut dicunt medici, tamen substantia spiritus fluit a corde : et idem dico de spiritu animali in cerebro, eo quod in vegetabilibus experimentis probatur virtutem sensitivam et motivam fluere a cerebro : sed hæc virtus, ut dicit Avicenna, a corde est cerebro reddita : et substantia ejus et sui spiritus est a

corde : determinatio autem ejus ad aliter agere est a forma quam dat cerebro, eo modo quo virtus sensus primi determinatur in organis sensuum propriorum.

Sic igitur supposito, quod sit principium sensus et spiritus et caloris et motus, oportet quod principium refrigerationis sit ab eodem secundum causam efficientem : refrigeratio enim apta est ad salutem caloris qui est in corde : nisi enim refrigeratio sequeretur, totus calor et spiritus efflueret et corrumperetur animal, ut ostensum est superius. Non enim hic loquimur de refrigeratione quæ est per anhelitum, quia de illa non intendimus ad præsens, sed potius de refrigeratione quæ fit per causam somni materialem : illius enim refrigerationis causa prima est a corde, licet causa proxima efficiens a cerebro sit, sicut in sequentibus declarabitur : sicut prima causa refrigerationis pluvialis est a sole elevante vaporem, licet proxima causa condensans et convertens vaporem et infrigidans sit locus frigidus in medio spatio aeris. De hac autem media parte a qua est calor et inchoatio refrigerii, postmodum secundum se dicetur quando de membris animalium tractabitur.

In omnibus autem non habentibus sanguinem, sicut sunt intersecta juxta diaphragma, et ea quæ non recipiunt spiritum exteriorem per respirationem, in talibus omnibus est locus qui est principium spiritus et sensus et motus et refrigerii immobilitatis proportionalis cordi : quia forte licet non habeant cor et sanguinem talia animalia, habent tamen aliquid intra superius et inferius corporis proportionale cordi : et ab ipso emanat ejus spiritus et sensus et motus, sicut ex primo principio. Hæc enim habent complantatum sibi a natura spiritum, et non attractum ab extra, qui principiatur ab eo quod est loco cordis, et dirigitur

¹ III de Anima, tract. iv, cap. 5.

² III de Animalibus, tract. i, cap. 1 et ultra.

ad naturalia et animalia ipsorum : videtur enim spiritus collocatus in ipsis ex natura. Quandoque enim nos videmus, quod exsufflat in eis in somno ex alarum conjunctione : propter hoc vero sonant, nisi quando alas movent, et quando tenentur et sonant : et videtur tremor in alis eorum propter exsufflationem spiritus naturalis in ipsis : hoc autem planum est in ipsis quæ *totala* vocamus, eo quod per modum cotilorum quorundam per annulos texta habent corpora dura exterius et rugosa : propter quod rugosa et annulosa a quibusdam vocantur. Talia autem sunt apes et vespæ et muscarum genera et multa alia. Hoc enim jam habitum est, quoniam non potest fieri aliquid secundum sentire et movere sine robore et virtute derivata ad ea organa per quæ fit opus illud : vigorem autem non facit nisi spiritus qui vehit virtutem : hic autem spiritus coalitur in his quæ respirant a spiritu exterius attracto. In his autem quæ non respirant, facit robur illud et vigorem sive virtutem spiritus ex natura complantata in eis in tractione ipsorum : quod enim talem spiritum emittunt, probatur per hoc quod quando alata sunt per volatum et motum de loco ad locum feruntur bombantia, id est, sonantia, scilicet bombando, quod ab imitatione soni quem facit in eis spiritus, sicut dictum est. Fit enim hic sonus actione et attractione spiritus complantati, qui exsufflatus ex corde ascendit ad succinctorium sive diaphragma totalare sive rugosare. Cum igitur sit locus medius, exsufflat spiritum per ambarum alarum virtutem motivam, quæ sunt juxta succinctorium : et sic virtus motiva procedit a corde ipsorum, vel ab eo quod est loco cordis a quo principaliter etiam spiritus.

Omne autem quod movetur, movetur sibi prius aliquo sensu facto secundum

actum, sive ille sit proprius, sive alienus. Cum enim non fit motus, sicut diximus in libro de *Anima*¹, nisi ubi fiat nuntium : nisi enim anima dicat fugere vel imitari conveniens vel nocivum, neque fugiet, neque imitabitur : alieno autem sensu movetur quod movetur nuntiante aliquo alio quod vidit vel audivit terribile vel delectabile : sicut si ego tibi nuntiarem de imitando vel fugiendo aliquid : illud autem nuntium sensus non fit, nisi in organo primi sensitivi : quia nullum aliud componit sensibilia ad eliciendum terribile vel delectabile. Cum igitur motus prius fiat a corde, oportet quod sensus nuntiantis referatur ad cor : et sic sensus motus procedunt ab eodem sicut a principio.

Sed tamen observandum est, quod verisimile est aliter esse in annulosis et parvis animalibus, et aliter in aliis. In parvis enim valde minuta sunt capita, in quibus impossibile est distinguere organum sensus : et in illis sunt corda frigida, et forte non habent organa distincta in capita : sed vias sensus communis habent ad organa aliis partibus distincta : et cor in talibus est organum sensus communis : et hujus signum est apis tritea quæ vocatur *apis cæca*, quæ oculos habet in posteriori parte corporis post succinctorium. In animalibus autem magna capita habentibus, est organum sensus communis in capite secundum omnes Peripateticos, licet prius fluxus sensuum sit a corde et ad ipsum referatur. De hoc autem multum diximus in libro de *Anima*², et dicemus in libro de *Animalibus*³. Ex dictis autem constat, quod si somnus et vigilia sunt passiones particulæ hujus sicut primi efficientis qui est cor, tunc patet in qua particula animæ, et in quo loco corporis sicut in efficiente primo sit somnus et vigilia.

¹ II de Anima, tract. I, cap. 6.

² II de Anima, tract. IV, cap. 11.

³ III de Animalibus, tract. I, cap. 1 et ultra.

CAPUT IV.

Et est DIGRESSIO declarans quatuor causas somni secundum Averroem et Adamidin.

Nos autem ad intelligendum prædicta et sequentia interponemus sententiam Averrois et Adamidin. Ad omnium igitur prædictorum notitiam oportet scire, quod somnus (ut in communi sit dicere) quatuor causas habet, quarum duæ sunt animæ, et duæ sunt a parte dispositionum quæ sunt in corpore vel a partibus corporis.

Somni quatuor causa.

Prima causa.

Ex parte autem animæ est, quod anima cum sit una, revocat et congregat ad operationem instrumenta quibus magis indiget : et ideo cum congregatur in loco digestionis, revocat spiritum et calorem ad interiora, qui ad interiora revocati deserunt exteriora : et tunc deprimitur animal somno. Et similiter accidit quando aliquis profunde cogitat de re aliqua apud se, et maxime subtili et divina, quæ vix simile habet in exterioribus corporis : tunc enim animæ vigor ingreditur intra seipsum, et similiter sensus communis, et retrahit secum spiritus ab exterioribus organis : et relictis exterioribus a spiritu et calore gravat ea frigiditas, et incipit homo dormire. Et est hoc quod homines dormiunt quando audiunt ea de

quibus subtiliter cogitant, vel quando sine auditu tractant ea apud seipsos.

Secunda autem causa ex parte animæ est quando delectabilia et concupiscibilia audit vel videt : tunc enim spiritus et calor subito protenduntur ad exteriora et consumunt humidum quod est in eis, et evaporant : et cum debilitantur, diminuuntur : et vincit ea frigus, et inducitur somnus. Et ideo est, quod reges et magnates secundum consilium Pythagoræ præceperunt musicos canere molliter cum vadunt dormitum, ut dormitent : et hæc est causa, quod homines dormiunt ad vielas et symphonias.

Secunda causa.

Ex parte autem corporis sunt item duæ causæ. Una est quæ est fatigatio et labor, in quibus resolvitur calor et spiritus : et tunc gravantur exteriora somno. Et hæc est causa, quod fatigati labore corporis vel spiritus desiderant somnum.

Tertia causa.

Secunda autem causa est frigiditas duplex. Una scilicet quæ fit ex cibo, scilicet ex vapore qui spargitur ex cibo in omnibus membris : et ideo propellitur ab eis calor et obtinet frigus quod induxit somnus. Secunda est ex loco ad quem fit evaporatio cibi, qui est cerebrum quod est frigidius omni parte corporis, et evaporatio quæ fit ad cerebrum ipsum, infrigidatur et descendens tangit nervos sensibiles et gravat eos, et immobilitat et somnum inducit¹ : cujus signum est, quod in dormientibus exteriora sunt frigida : et ideo multis coopertoriis se tegunt dum dormiunt : et corpora habent contractiora et minora propter frigus comprimens ea exterius : et pallent plus in somno, et præcipue in principio somni propter frigus quod comprimit calorem et sanguinem ad interiora.

Quarta causa.

Ex omnibus autem his colligitur, quod somnus est ligamentum virtutum sensibilium et motivarum cum augmento et confortatione earum. Vigilia autem est

Quid somnus ?

Quid vigilia ?

¹ Et hæc ait Aristoteles in libro de *Sensu et sensato*, tract. II. cap. 12, et alibi.

solutio earumdem cum diminutione et debilitate earum : et ideo dicit Alfarabius Aristotelem præcepisse, quod homo debet semper conservare se intra somnum et vigiliam quasi medium : si enim plus declinaverit ad vigiliam, tunc debilitantur et consumentur in eo spiritus et virtutes : si autem plus declinaverit ad somnum, tunc malis humoribus et grossis replebuntur organa sensuum, et grossus efficitur spiritus, et per consequens hebes efficitur virtus quæ est in ipso.

CAPUT V.

De his qui faciunt in somno opera vigilantium.

His autem habitis, oportet scire, quod quamvis somnus sit ligamentum sensus et motus, tamen in somno quidam moventur et faciunt multa opera quæ sunt vigilantium, sicut est ambulare, et equitare, et aliquando quærere et insequi inimicos, et forte occidere eosdem, et redire ad lectum dormientes. Et vidi ego et audiavi quemdam hoc facientem, qui interrogatus elevavit se in lecto, et respondit ad interrogata quærentibus et reposuit se, illis dimissis, et continue dormivit, dum hoc faceret. Hoc autem sine phantasmate movente non faciunt : quia autem phantasia, aut intellectus movet,

Nota.

sicut in scientia de *Anima*¹ probatum est. Fit etiam hoc quodam sensu : non enim moveretur ad præsens, nisi esset phantasma movens per modum sensus : et hoc fit cum formæ quæ sunt in ipso, tangunt organum sensus communis : tunc enim ut sensibilia accipiuntur, sicut in secundo hujus scientiæ declarabimus. Quod autem hoc non sit sine quodam sensu, patet ex hoc quod certum est istos ex somnio moveri : somnium autem est quoddam sensibile simulacrum per quemdam motum qui infra patebit.

Quare autem hoc est, quod somnium memoriter retinent expergefacti, sed actus quos fecerunt, qui sunt, ut actus vigilium, non memorant, dictum est in libro de *Problematibus* ab Aristotele, qui liber non ad me pervenit, licet viderim quædam excerpta de ipso. Sed ad determinandum ipsum, ordinabimus hoc quod diximus in duo problemata : quorum unum est qua de causa hoc fit, quod dormientes quidam faciunt opera vigilantium, et quidam non. Secundum autem est quare expergefacti recordantur somnii quod movit ad actus illos, et actuum nullam omnino habent recordationem. Primum autem istorum problematum adhuc in duo dividemus : quorum unum est quod dictum est prius : et secundum est juxta illud quæsitum, utrum tales dicendi sint simpliciter dormire vel vigilare.

Solventes igitur ad primum, dicimus quod frigiditas ligat organa sensuum communis et particularis per modum qui dictus est sæpe, et inducit somnum propellendo ab exterioribus calorem naturalem : contingit autem aliquando humore infundi exterioribus calorem innaturalem, aut ex cibo, aut ex humore putrescente febrili : et ille solvit organum tactus : et tunc movet virtus motiva phantasma

Nota quid sit somnium.

Primum problema.

Secundum problema.

Solutio primi problematis. Quare simpliciter dormientes aliqui exercent opera vigilantium et aliqui non?

¹ III de Anima, tract. iv, cap. 5.

quod ostenditur in somnis : et ideo frequentius in somnis loquuntur et movent se febricitantes : non enim oportet ad motum solvi organum, nisi tantum tactus, ut prædictum est. Hujus autem caloribus, ut dictum est, potest esse causa ira inimici, vel concupiscentia mulieris, vel cibus calidus, et aliquid tale : et nunc repulsa frigiditate ab exterioribus organibus laxantur membra ad motum : cujus signum est, quod membra inferiora citius moventur in talibus somniis quam superiora, et membra superiora citius moventur omnia quam oculi : illi enim tardissime aperiuntur, eo quod sunt proximi frigiditati descendenti.

Solutio secundi problematis. Utrum tales dormientes possint dici simpliciter vigilare ?

Solutio autem secundi est, quod tales simpliciter dormiunt et non vigilant, sed per accidens faciunt quosdam actus vigillum : non enim moventur ad rem nisi casu conveniat eam inveniri in loco ad quem per somnium veniunt : somniant enim tales inimicum in tali vel tali loco esse, et tunc moventur ad locum illum ex phantasmate, et non ex visu : et ideo vadunt in tenebris sicut in lumine, et aliquando contingit quod est ibi, et tunc percipiunt eum : aliquando autem contingit, quod columnam vel lignum vel aliud quod impugnant pro inimico. Somnium enim aliquando est verum, aliquando falsum, ut diximus : et quando est verum, dirigit sicut sensus, cujus causam in sequentibus dicemus : quando autem falsum est, tunc abducit. Contingit etiam aliquando tales cadere vehementer, et aliquando mori ex casu : quod non contingeret si sensum sequerentur, quia sensus non sic abducit : et ideo isti nullum sensum habent solum, nisi tantum tactum secundum quid et confuse, secundum quod instrumenta possunt extendi ad motum : et ideo tales dormiunt.

Solutio tertii problematis. Quare tales dormientes recordantur somni, et non actuum qui exercentur per somnium ?

Solutio autem tertii problematis est facilis ex dictis : cum enim simulacrum somni perfecte sit impressum sensui communi et imaginationi, ibi remanet : et ideo de illo recordantur : cum vero actus vigillum sint facti per organa sen-

suum, et illa simpliciter sint clausa et accidentaliter tantum soluta, ea quæ fiunt in ipsis, non referuntur ad sensum communem et imaginationem : et ideo non imprimuntur eis formæ illæ : propter quod etiam recordantur eorum post somnum, sed videntur eis tantum in somno facta fuisse. Hæc igitur solutio est inductorum problematum.

CAPUT VI.

De proxima causa propter quam est somnus.

Consequens autem est cum his quæ dicta sunt pertransire, quibus existentibus ut materiali principio, et unde principium motus quantum ad causam efficientem sit istarum passionum, vigilandi scilicet et dormiendi ? Ad hoc autem dicimus, quod manifestum est per se et ex his quæ in antecedentibus libris determinata sunt, quod omni animali necessarium est cum sensum habeat, tunc etiam suscipere primum et conveniens sibi nutrimentum atque augmentum : omnibus autem quæ nutriuntur, est aliud nutrimentum extremum et ultimum. Cum enim sit nutrimentum primo dissimile, et postea simile primum, et postea simile illud quod est simile, elevatur ad cor, et ibi accipit formam quæ tendit ad membra per virtutem cordis, et hoc extremum et assimilatum nutrimentum in habentibus sanguinem est sanguis ad minus extremum, quod infunditur vasis

deportantibus ipsum, quæ vasa sunt venæ. In non habentibus autem sanguinem est aliquis humor, qui est loco sanguinis. Dico autem *extremum quod infunditur vasis* : quoniam experimento probatur, quod extremum quod resudat de extremitatibus venarum, et jam incipit uniri membris, est non sanguis, sed albus humor, qui ab Avicenna et ab aliis *Cambium* vocatur. Cujus signum est, quod quidam subito decollati lac videntur dare et effluere ex venis : sed colamentum massæ ptisanariæ quæ colata est duplici colatione in stomacho et hepate, dum plene induit formam et habitum potentiæ ad vitam animati corporis, et infunditur venis, sanguinis habet ruborem in habentibus sanguinem, vel humor qui est loco sanguinis in non habentibus sanguinem. Locus autem sanguinis per quem sicut canalia decurrit sanguis ad singula membra corporis, est venæ : harum autem principium est cor. Licet enim Galenus dicat, quod venarum principium est hepar, eo quod majora orificia venarum sunt ex parte hepatis, tamen hoc non est verum, sed potius substantia venarum a corde venit ad hepar, et ibi dilatantur ora earum, ut inde sugant cibi colamentum : et a corde ad hepar venientes inde rarificantur per totum corpus.

Contra Galenum.

Hoc autem quod dictum est, palam est ex recisionibus et divisionibus corporum, quæ Græce *anatomix* vocantur. Cum igitur cibus per os extrinsecus ingrediat ad loca susceptibilia cibi, sicut ad stomachum primo, et postea ad hepar, tunc cibi colati fit evaporatio ad venas, et quasi quædam sublimatio ipsius, et in sanguinem ibi vertitur circa gibbum : et tunc quod fit sublimatum in collo venarum quod est inter cor et hepar, vadit ad principium quod est cor, ibi accipiens virtutem et formam qua feratur ad mem-

bra, sicut ad naturalem locum ipsius. Dictum est autem de hoc in parte in his quæ de *Nutrimto* scripsimus.

Nunc autem in tantum repetendum est de eis quæ ibi dicta sunt, hujus rei gratia, quod sciamus quid sit principium primum induens nutrimentum tali habitu quo movetur ad membra, ut principium hoc motus speculemur ex illo, et quid ex tali principio, et quid tali nutrimento patiat in somno vel vigilia particula primi sensitivi, dum accidit vigilia vel somnus. Non enim est somnus quælibet impotentia sensus vel amentia, ut diximus : suffocatio enim aliqua in his in quibus venæ apprehenduntur in cervice, et strangulantur, et cæteræ amentix quæ animæ defectiones vocantur, et præcipue quæ sunt cum syncopi, talem faciunt sensuum impotentiam : et tamen non fit somnus : nam etsi sic fiat animo deficientibus phantasia et apparitio phantasmatum, sicut in somno fit, tamen illud non est somnium proprie, nec defectio talis est somnus. Scimus enim quod quibusdam talem a sensibus alienationem animæ patientibus facta est aliquando phantastica apparitio similis somnio, præcipue quando talem defectum animæ fortiter et vehementer patiuntur. Videmus enim nonnumquam quosdam homines quando vehementer intendunt in quædam divina a sensibus remota, sicut in consideratione spirituum cœlestium, alienari a sensibus, et ex vehementia intentionis abstrahi, ita quod quasi mortui videntur : quod quidam *raptum* vocant : et tunc cum non sint occupati circa sensus, fit eis phantasma ejus ad quod vehementer intenderunt : et videtur eis, quod deos et angelos videant : propter quod etiam Socrates in tali alienatione positus dictus est Deum deorum vidisse ¹. Contingit autem hoc præcipue mulieribus propter humiditatem suæ complexionis, quæ ve-

¹ Sicut Paulus Apostolus ad tertium cœlum raptus vidit quæ non licet homini loqui. Cf. II

ad Corinth. XII, 1 et seq.

hementer fluit in omne quod intendunt, licet cito remittatur, etiam quod phantasma sit plurimum falsum, et aliquando verum ostenditur per hoc quod ea quæ dicuntur revertentia, plurimum sunt phlegma et conficta ea fictione qua phantasia fingendo componere solet imagines ad ea quæ desiderantur et sperantur vel timentur vel detestantur.

Cum autem verum sit phantasma, non habet aliam causam suæ veritatis nisi quam habet verum somnium, de quo in secundo hujus monstrabitur : et propter similitudinem illam etiam habet aliquam dubitationem, utrum somnium sit vel non : si enim contingit obdormire quemlibet hominem qui defectum animæ et alienationem sensuum patitur, tunc procul dubio phantasia facta est sibi somnium : quia somnium est passio dormientis, et phantasia similiter : multi enim sunt qui vehementer animo deficiunt et alienantur a sensibus plus quam dormientes, ita quod videntur quasi mortui. De quibus omnibus unam rationem esse opinor, et sicut diximus, non omnis impotentia et immobilitas sensibilis particulæ est somnus, sed passio hæc quæ est somnus, per se fit ex evaporatione quæ est circa nutrimentum.

CAPUT VII.

Per quem modum fiat somnus ex vehementi evaporatione ?

Qualiter autem ex tali evaporatione fiat, nunc est dicendum. Dico igitur quod id quod evaporat ex colamento cibi præparati, necesse est compelli usquequo, hoc est, ad determinatum locum : natura enim in corpore præparavit apta vasa, in quibus fiant colamenta tali ssublimationis, et fecit poros per quos ejiciatur quod est impurum et terrestre de illo. Cola autem stricta vasorum in quæ elevatur colamentum cibi quando sublimatur, sunt venæ et præcipue duæ venæ, quæ plures cæteris habent ramos : quarum una vocatur magna, et alia major. Illa proprio nomine vocatur *adorti* : in quarum concavitatibus intrans vapor præfocatur, et convertitur in ipsis : et quando elevatur usque ad operculum, necesse est quod reflectatur et convertatur in seipsum et permutetur in humorem : conversio autem est sicut in Euripo, hoc est, in vento turbinis, in quo una pars involvit aliam, et involvitur ab eadem : calor enim cuscumque animalis natus est ferri ad superiora, et trahit secum colamentum nutrimenti vaporabile, sicut fit cum aqua rosea fit in alembico rosis.

Cum autem vaporabiliter colamentum elevatum fuerit in superioribus locis in craneo capitis infrigiditate loci ex reflectione sui in seipsum et reduplicationem

multam, convertitur in humorem aqueum vel aquosum, et fertur deorsum et dirigitur ad anterius capitis : ideo quia ibi sunt pori et viæ per quas purgatur : phlegma enim purgatur per nares, et melancholicum illius conversionis per oculos, et cholericum incineratum purgatur per aures : et inde est, quod cum aliquis jacet in dorso et dormit, si ante bene comedit, frequenter stertit : eo quod superfluitates gravedine sua declinent a suis viis naturalibus, et non fluunt in eis : tunc clauditur via anhelitus, et ex tali constrictione fit cantus stertentium. Pingues autem stertunt propter obstructionem viarum earum ex multo pingui et phlegmatica superfluitate. Id autem quod ex colamento non educitur sic paulatim, declinat ad nervos sensibiles et motus per organum sensus communis, ut diximus, et immobilitat eos et facit somnum : ideo enim maxime fiunt somni a nutrimento : repente enim a calore præcipue cordis, et post hoc hepatis multa humiditas corpulenta grossa evaporabiliter fertur sursum ad capita animalium. Cum igitur stat illa ingrossata et conversa, et in se sæpius reduplicata in capite infrigidata gravat organa sensuum et facit dormire inducendo vinculum et sensus et motus : et ideo primo cum tangit superiora nervorum, facit primum dormire. Cum vero paulatim rependo deorsum et revertendo per exteriora frigiditas claudit poros et impellit calorem ab exterioribus, tunc fit somnus fortis, et animal tunc dormit : per exteriora autem repetit deorsum, et non per interiora : ideo quia calor fortis in interioribus facit quod grossum est evaporare : et non potest ideo per eam viam redire, per quam ascendit : contraria enim non sunt simul in eodem secundum idem.

Signum autem ejus quod dictum est, accipitur in his quæ somnum faciunt, quæ *somnifera* vocantur. Hæc enim omnia caput gravant, aut compilando nimio humore et vapore, aut complexionali frigiditate, sicut cibi somniferi, sicut

opium, mandragora, vinum, lolium, etc. Hujus etiam signum est, quod frigida non malum sanguinem generantia, quorum frigiditas temperatur aromatibus calidis, convenientem somnum valde faciunt : et ideo dicit Galenus, « Manduco quoque die olera facta ex lactucis cum aromatibus, et diligo somnum : quoniam jam ego sum senex. » Senibus enim defectum humidi nutrientis patientibus, licet abundant humido phlegmatico, somnus reducit humidum nutriens : et ideo juvat eos valde dormire, et conservat eis vitam.

Signum etiam hujus quod dicitur, accipimus in hoc quod quando aliquis capit somnum subito, antequam humidum de capite descendit digestum, invenit frontem gravari et anterius capitis : et si ibi parva est humiditas, per sternutationem expellitur, et tunc liberatur : et si multa est, remanet gravitas usque ad tempus quod iterum dormiat, et tunc liberatur. Quando igitur sic humiditas deorsum fertur, et dormiunt animalia, tunc tales gravitates videntur pati : declinant enim caput; et non possunt levare ipsum, et palpebræ cadunt, eo quod vicinæ sunt et citius illa frigiditate ligantur : post cibaria autem maxime fit hujusmodi somnus et dormitio, eo quod multa tunc a cibariis est evaporatio : quia tunc est grossus cibus, et non colatus : resolvuntur ab eo fumi terrestres grossi et intensi : et ideo cum aliquis dormit statim post cibum, calidi fumi confusum somnum faciunt : quia calore punctus resolvitur sæpe de latere in latus, et jacere non potest quietus, et grossities elevata obstruit poros : et ideo frequenter talis somnus inducit surditatem, vel cæcitatem, vel aliquid hujusmodi. Propter quod præcepit Aristoteles in *Regimine dominorum*, post cibaria movere et deambulare levi motu donec resideat cibus. Cum enim per vigiliam extra retinetur calor, non ita potest fumare cibus, et tunc sua gravitate descendit : id quod levius et purius est, remanet, et illud

Post cibum
aliqua-
liter
moveri ju-
bet Aristo-
teles.

sublimatur in venas, et erit conveniens somnus,

CAPUT VIII.

De causis somni per similem modum somnum causantibus.

Alia autem causæ somni per similitudinem dictæ causæ somnum inducunt. Ex laboribus enim quidam somnus inducitur et præcipue spiritualibus : quia illi a sensibus avertunt, et ad interius spiritus dirigunt : labor enim corporalis hoc facit, eo quod labor est colliquativus interioris humidi : motus enim intus excitat calorem : et tunc evaporat et liquatur humidum cibi congelati vel viscosi : exterius autem aperit poros, et evaporat calor et spiritus : et ideo exteriora obtinet frigiditas : et tunc refunduntur ad interiora calor et spiritus : et ideo labor inducit somnum. Et quia labor colliquativus est chymi congelati, præcipitur his qui ex pigritia vel diminutione exercitii male colorati et dispositi sunt, et præcipue his qui malam pinguedinem habent, et insomnes effecti sunt, quod exercitentur aliquo labore ut liquescat in eis humidum congelatum et sic digeratur, et vapore suo inducat somnum, et calore digerente consumatur superfluum, et dividatur viscosum : et sic redeat ad pulchritudinem coloris et statum sanitatis : labor enim quidam de numero colliquativorum est : illud autem quod sic colliquatur interius, congelatum fit sicut

Quomodo labor somnum inducit ?

nutrimentum indigestum, quod calore digerente liquatur : et liquatum elevatur ad caput, et somnum inducit, nisi utique tantæ sit frigiditatis, quod liquare non possit et vaporare. Similiter autem ægritudines quædam faciunt somnum magnum et quasi inexcitabilem, adducendo scilicet quæcumque simul fiant a superfluitate humiditatis et caliditatis, sicut fit in febricitantibus humidis atque lethargicis, qui somno inexcitabili dormiunt.

Amplius autem propter idem causa somni est prima ætas, quæ est calida et humida. Pueri enim vehementer dormiunt : eo quod fluidum humidum et subtile habeant nutrimentum et sanguinem et colorem multum, licet non acutum habeant : et ideo facile ad caput elevatur in ipsis nutrimentum, et dormiunt : et est conveniens somnus eorum.

Quod enim omne nutrimentum puerorum ex magna parte sursum feratur, probatur per hoc quod quantitas membrorum superiorum in eis, sicut humeri et collum et caput, excedit quantitates membrorum inferiorum, et hac de causa membra virorum superiora proportionabiliter majora sunt inferioribus propter calorem fortiolem in viris. Et ideo cum cadunt ab alto viri, frequenter cadunt super humeros vel collum, et colliduntur : fœminæ autem super posteriora cadunt, et ideo non adeo colliduntur. Hæc etiam est causa, quod frequenter pueri epileptici sunt propter multum humidum quod fertur ad caput eorum : somnus enim simile aliquod est ita causa epileptiæ : et ipse somnus quædam epileptia videtur esse. Propter quod etiam pluribus hominibus principium epileptiæ accidit in somno, licet postea forte evigilent : et dormientes quandoque in epileptia consumuntur et moriuntur, suffocato nimis humido : vigilantes enim quoniam non habent humidum nisi ex causa ægritudinis, et ideo minus habent quam illi qui habent ex somno et ex morbo : cum enim multus spiritus evapora-

Nota qualiter pueri vehementer dormiant

Nota de epileptia

tionis tam in somno quam in epileptia feratur sursum ad caput, descendens per venas colli et gutturis, facit intumescere venas, et illis intumescens coarctatur et præfocatur porus cannæ per quem fit respiratio, et sic suffocatur.

Nota quare pueris et nutricibus non competit vinum.

Et hæc est causa, quod pueris non conferunt vina et cætera vaporosa, neque nutricibus puerorum : quoniam enim ad nutrimentum nihil vel parum pueris videtur differre in prima ætate dare vinum, vel nutricibus, quia virtus cibi nutricis remanet in lacte quod bibit infans. Sed oportet nutrices quæ lactant, bibere vinum aquaticum valde et modicum, eo quod ventosum est vinum, et magis vino medo ventosius est propter inflationem. In tantum vero superiora corporis sunt plena nutrimento in infantibus, quod quinque mensibus cervicem non vertunt postquam nati sunt, nisi raro forte hoc contingit : est enim in eis sicut in ebriis quibusdam, in quibus multa humiditas sursum lata, constringit poros et gravat caput : et hæc est causa, quod in spatio priorum quinque mensium, neque signa, neque verba nominant, sed statim incipiunt aliquid notitiæ ostendere : multus enim fluxus humidi non permittit formam signorum in eis stare, ut ex eis aliqua conceptio fieret : et hanc humiditatem vocavit Plato *craterem lacteum*, in quo obliviscuntur omnium animæ a stellis, ut ait, descendentes, eorum quorum scientiæ naturaliter sunt apud eas.

Platonis dictum.

Rationabile est autem ex eadem causa primum et postquam vivunt primo embryones qui crescunt in matricibus, postea autem incipiunt moveri, non quidem quod dormiant, quia non est vere somnus : sed quia superiora infusa habentes superflua humiditate, se movere non possunt. Omnino autem et universaliter signum horum quæ dicta sunt, quod amatores sunt somni præ aliis qui occultas ex parvitate habent venas : illi enim frigidi sunt et humidi, qui si calidi essent, calidum perforativum amplas perforasset venarum vias. Nam etiam

Diligentes somnum.

præ aliis amant somnum qui magna habent capita. Eorum vero qui occultas habent venas, sunt venæ angustæ : quod satis amplum est substantiæ evaporativæ ad ducendum sursum strictum, est substantiæ ingrossatæ in humorem spissum conversæ ad descendendum deorsum : et ideo diu est antequam descendat humiditas, eo quod difficulter descendit propter angustum : et ideo diu dormiunt et libenter. Illis vero qui magna capita habent, magnus impetus evaporationis fertur sursum, et magna evaporatio propter magnitudinem capitis, in quo multum retinetur : et ideo diu dormiunt.

Manifestas autem et amplas venas habentes, non sic somnolenti sunt propter oppositas causas : facilis enim est defluxus humidi de capite propter amplitudinem venarum, nisi aliquam aliam habeant passionem contrarium facientem huic eorum dispositioni : possunt enim aliqua causa obdurari venæ vel augeri in ipsis grossa humiditas, quæ sui multitudine et grossitie etiam per amplas venas difficulter descendet. Similiter autem neque melancholici somnum diligunt : in illis enim locus interioris caloris et infrigidatus et siccatus est : et ideo non habent id quod facere deberet evaporationem, et elevare ad caput : et ideo non fit in eis multitudo evaporationis. Ex eadem autem causa multum edaces sunt : ex frigido enim et sicco provenit appetitus multus comedendi : frigidum enim semper descendit gravando profundum stomachi, siccum autem non est evaporativum quando est conjunctum frigido : et si vaporet, propter debilem calorem est fumus niger et spissus, qui generat terrorem melancholicis : et sic superiora stomachi semper manent vacua : et hæc vacuitas est causa famis : calor enim debilis pungendo orificium stomachi, provocat desiderium : et similiter venit ad os illud quidam porus fellis, qui sua punctura facit sensum famis quoties ipsum invenit vacuum et aliquo humore non infusum. In his autem qui calidi

Qualiter causatur famis?

sunt et humidi, vel saltem humidi, non fit tale desiderium : caliditas enim facit evaporare fundum stomachi, qui vapor replet ipsum orificium superius, et tollit desiderium : et hoc idem facit etiam calor in sicco, sed minus : humiditas autem frigida viscosa est, et ex se adhæret orificio stomachi, et tollit desiderium in tantum quod aliquando in ducit fastidium.

Ex eadem causa sunt etiam duri melancholici non permoti de facili ad aliquid nisi quod prius ceperunt : corpora enim ipsorum afficiuntur, sicut omnino nihil jucundum habentia : quia jucunditas provenit ex tenui et subtili sanguine, quem movet temperata caliditas : isti autem omnino sunt contrariæ dispositionis : habent enim grossum et gravem sanguinem, quem comprimit multa frigiditas complexionis. Signum autem ejus quod diximus, est quod pueri et juvenes subtili et temperato sanguine abundantes, multum sunt lusivi et jucundi : et senes exsiccati et frigidi graves et severi : nigra enim cholera, quæ melancholia est, cum naturaliter frigida sit, locum nutrimenti et digestionis frigidum facit, similiter omnes alias partes ubicumque erit secundum potestatem excellentem hujusmodi superfluitas nigræ cholerae.

CAPUT IX.

In hoc concluditur vera causa somni et diffinitio, et solvuntur dubitabilia quæ sunt circa eam.

Ex omnibus autem quæ dicta sunt, patet perfecta somni et vigiliæ secundum causam diffinitio, quod scilicet somnus est conventus quidam caloris intrinsecus, et naturaliter reciprocatio ejusdem propter prædictam a nobis causam respirationis et revocationis spirituum et caloris ab exterioribus ad interius recursus. Ideo enim multus est motus humiditatis dormientis : quia calor reciprocatus multum potest in movendo : et cum deficit, incipit vinci a frigido : in frigidatur enim humidum, et descendit primo ad superiora faciei, et tunc concidunt palpebræ : et in somno in frigidantur quidem plus superiora quam inferiora, et in frigidantur exteriora corporis, interiora vero et inferiora sunt calida ut ea quæ sunt circa pedes et intrinsecus : ad inferiora descendit grossus humor sanguinis calefacti et non in frigidati per cerebrum : unde et pedes frequentius movent dormientes. Quod autem immobilitantur crura in somno, hoc fit ideo, quia nervi motus qui a capite veniunt in suis principiis, immobilitantur ab humore facto. Interiora vero ideo calefiunt, quia sunt juxta fontem caloris et spiritus. Et hæc quidem verissima sunt, quamquam alibus possit dubitare circa dictam causam

somni, quærens quare post cibum calidum frequenter fortissimus fit somnus? Videmus enim somniferum esse vinum, et alia quædam calida. Irrationabile autem videtur, quod facientia somnum sint calida, cum somnus secundum sui causam et effectum frigidus sit, et infrigidans superiora et exteriora, ut diximus.

Quæramus ergo, quibus de causis possit ista accidere frigiditas quæ est somni? Et primo quæramus, utrum hoc accidens sit, quod quemadmodum venter qui quidem vacuus calidus est propter calorem cordis et hepatis, cum nihil obicitur, infrigidatur ex repletionem propter motum actu frigidi cibi, licet potentia sit calidus, et propter humorem cibi in quo diffunditur calor et amittit acumen, et ideo non ita sentitur sicut prius: ita et cerebrum vacuum sublata evaporatione quæ fit ad ipsum, fit frigidum, sicut venter propter ingressum evaporationis humidæ: quæ quia extranea est, non convenit calori: et quia humida, tollit caloris acumen. Et hoc licet dici possit, tamen ex hoc non causatur sufficiens frigus: quia calor in humido, licet amittat acumen, ut dicit Galenus, tamen non amittit quantitatem: et ideo hæc causa non est sufficiens.

Quæramus ergo aliam solutionem dictæ objectionis, quærendo utrum conveniat hoc sicut tremor accedit corporibus, et horripilatio, quando perfunduntur aqua calida? eo quod aqua calida aperit poros, per quos apertos exspirant spiritus naturalis et calor: et tunc frigus irrepit, et contrahit pellem, et contrahendo pellem erigit pilos: ita calida evaporatione ascendente et poros aperiente, egredientibus calore naturali et spiritu, congesta, hoc est, compressa et comprimens frigiditas refrigerat: et hoc calidum quod inest, facit pigrescere et secedere a partibus exterioribus ad interiora: et ita exteriora et superiora ad quæ fit hujusmodi evaporatione, infrigidantur. Sed et hoc licet verisimilitudinem habeat, non tamen est sufficiens solutio:

frigus enim tale non sufficienter inducit somnum, sed et tremorem tantum: et in his in quibus spissa pellis est et viscosi humores, non inducet somnum unquam: quia per talem aquam calidam vel per aliquid simile illi, non inducitur frigus in eis.

Amplius ex quo dicta solutio non sufficit, quæramus utrum sit talis causa frigiditatis somni, sicut infrigidatur locus, quando multum nutrimentum incidit in eum, quod sui contrarietate alterat contrarium: omnia enim agentia physice patiuntur: et ideo cum digestio sit completio a naturali et proprio calore ex contrajacentibus passionibus, remittitur et refrigeratur calor ex contrajacentibus passionibus nutrimenti, quando agit in ipsum et sublevat ad superius corporis: et tunc remanent infrigidata superiora: sicut ignis qui supponitur lignis viridibus, primum exstinguitur et refrigeratur quousque paulatim vincendo digerat humorem et consumat: fit enim somnus, sicut in *Physicis* dictum est, quando corpulentum et grossum humidum sursum fertur, et turbulentum per venas ad caput ascendit. Cum autem hic amplius calor non possit elevare, sed incipiat in capite sua multitudine excedere calorem et alterare in frigiditate ex contrarietate quam habet ad ipsum, tunc id quod elevatum est, iterum repellitur et fluit deorsum. Signum autem ejus quod sic fit somnus, et ex tali causa frigidus, est quod cadunt homines quando dormiunt, tamquam remissus sit calor qui elevabat corpora eorum, et erexit: hoc enim proprium habet homo inter animalia, quod est recti corporis et erecti: et ideo calore subtracto solum inter animalia sic alteratur in somno, quod cadit, cæteris animalibus stando dormientibus: et postquam sic cecidit, caput levare non potest: facit enim somnus phantasiam quæ somno aliquid prænuntians vocatur. Somnium fit in imaginationem eorum impressio naturam veri somnii habens, sed fiunt in eis, ut dicit Adamidin, corti-

ces formarum sensibilium. Dicere autem, sicut prædictum est, adhuc non sufficit : quia licet cibi non cocti sint contrajacentes passiones, non tamen in omnibus qualitatibus illa est contrajacentia : et ideo posito quod cibus calidus sit, tunc postquam ille calefactus erit in loco digestionis, non induceret somnum : cujus contrarium videmus in omnibus : somniferum enim est omne quod tale est frequenter, etiam quando calida fiunt plus quam ipse calor naturalis et digestivus.

Dicamus igitur, quod hæ inductæ solutiones non sunt convenientes ut fiat frigiditas in somno superiorum et exteriorum : sed proprie et connaturaliter locus qui est circa cerebrum, frigidissimus omnium locorum corporis est, sicut in aliis libris de natura animalium determinandum est in animalibus habentibus cerebrum et caput. In his autem quæ non habent cerebrum et caput, est aliquid loco capitis et cerebri, quod facit dictam in frigidationem. Dicamus igitur, quod quemadmodum humidum in mundo quod evaporat sub solis calore, cum venerit ad medium aeris interstitium, qui est locus frigidus, in frigidatur propter loci illius frigiditatem et inspissatur, et congestum deorsum fertur in pluvia, et sic fit rursus aqua : sic fit in elevatione humidi calidi, quod est ex colamento cibi elevati ad cerebrum, ex frigiditate loci cerebri in frigidatur et inspissatur, et sic superflua evaporatio in aquosum phlegma redigitur, et descendit, ut sæpe diximus, in frigidatum.

Hæc enim est causa quod catarrhi et hæ infirmitates phlegma multum habentes, ex capite videntur fieri : phlegma autem est humiditas non nutriens, sed exterius fluens per nares. Illa autem humiditas quæ est nutritiva exteriorum membrorum et non ægrotativa, quæ facit catarrhum vel apoplexiam vel paralysem, nihilominus fertur deorsum congesta aliquantulum, et ex ea refrigeratur quod calidum est in exterioribus et superioribus membris : est enim ex loco a quo de-

scendit ; et ideo propellit calorem naturalem et spiritum a membris : et hæc est secunda causa frigiditatis, et est hæc vera et propria causa. Dispositiones autem coadjuvantes ex parte corporis, quod diu durat hujusmodi in frigidatio, sunt tenuitas sive exilitas et angustia venarum illarum quæ sunt circa cerebrum : hæ enim non facile suscipiunt evaporationem : et cum humor conversus multo grossior sit, difficulter et per longum spatium vix distillat humor in frigidatus : et ideo diu durat somnus. Hæc igitur vera et propria causa est in frigidationis in somno.

CAPUT X.

Quando et qua causa expergiscuntur animalia ?

Expergiscuntur autem animalia, cum digestio completa fuerit et obtinuerit secundum perfectam virtutem et vigorem caliditas multa quæ fuerat impacta ad anteriora in angustum intrinsecus : hæc enim, ut diximus, impacta et impulsiva est ab eo frigore quod circumstabat in exterioribus membris : intus enim caliditas multa efficitur et spiritus : et tunc obtinent exteriora : et tunc expergefaciunt ad vigiliam. Hoc autem est cum distincti fuerint ad invicem corpulentior sanguis in partem unam deorsum atque purissimus in partem aliam sursum : est enim purissimus et tenuissimus sanguis, qui est in capite : quia aliter non nutriret

sensuum organa : nutriens enim ea debet esse aptum sigillationi formarum : et hoc est tenue in substantia et purum in qualitate : turbulentissimus autem est, qui nutrit inferiora : eo quod dura sunt et fortia, sicut portantia totam molem corporis : talia autem nutriuntur sanguine grosso et turbido terrestri, sicut in aliis jam sæpius dictam est, et adhuc dicetur in scientia de *Animalibus*. Omnis sanguinis principium primum est cor : cor autem, sicut anatomia probat, tres habet thalamos sive concavitates, dextrum scilicet, sinistrum, et medium : et medius autem est communis utriusque extremi thalami qui est in corde : de quorum extremorum thalamorum hinc et inde undique inchoat ex utraque vena, quarum una vocatur magna, et reliqua adorti, quæ diffunduntur ex corde : et una ascendit, et altera descendit : in media autem cellula fit discretio sanguinis nutrientis inferiora et nutrientis superiora.

Hæc autem dubitationes multas habent et contradictiones a Galeno et suis sequacibus : sed diffinire subtiliter de his est aliorum sermonum, quos in libro *Animalium*, Deo favente, complebimus : eo quod multa et proluxa de hac materia sunt dicenda.

Propter hoc autem quod maxime generatur sanguis, post nutrimenti obla-

tionem, sive post cibum, et adhuc non est distinctus purus ab impuro, ideo tunc fit indiscretus et incertus somnus, sed potius confusus et interruptus, sicut diximus superius, quousque separatio fiat sanguinis, ita quod purissimum ejus sursum mittatur, turbulentum autem deorsum : et quando hoc acciderit et vicerit caliditas excurrens, tunc absoluta a gravitate nutrimenti a vinculo somni expergefiunt animalia.

Sic igitur diximus, quæ fit causa dormiendi. Est enim causa ejus redhibitio humidi in frigidati, quæ est ejus evaporationis quæ a cibo sursum fertur ad caput per ingenitum et naturalem calorem, de frigido facta et conversa ad primum organum sentiendi sensus communis.

Diximus iterum quid est somnus : quoniam est interceptus usus in sentiendo facta in primo organo sentiendi : et hanc interceptionem diximus factam esse ex necessitate suppositionis : eo quod non contingit animal esse et salvari non existentibus convenientibus quæ ipsum perficiunt. Est enim propter salutem somnus necessario : quies enim est somnus : quies autem salvat animal, ut diximus.

Sic igitur de somno et causa somni et accidentibus ejus sufficienter dictum est sic.



DE SOMNO ET VIGILIA

LIBER SECUNDUS

TRACTATUS I

CAPUT I.

Et est DIGRESSIO declarans totum esse somniorum ad intellectum meliorem sequentium.

Post hoc de somnio quærendum est. Et primo quæramus cui potentiarum animæ attribuat passio hæc, utrum scilicet

intelligibilis partis animæ passio sit, aut sensibilis? Accipiamus autem hic *intelligibilem partem* large pro comprehensione et acceptione, quæ est certa vel probabilis, sicut est opinio: *sensibilem* autem intelligimus simpliciter hic communem particulam, quæ accipit formas vel intentiones sensibilibus particularibus, et individuales, secundum quod comprehendit decem sensus, scilicet quinque interiores, et quinque exteriores, secundum quod in libro de *Anima* ¹ dictum est: sic enim accipiendo intelligibilem et sensibilem particulam solum in duabus inter omnes potentias animæ quæ sunt in nobis, haberemus potestatem et facultatem aliquid cognoscendi: per vegetabilem enim particulam nihil cognoscitur omnino.

Ut autem faciliter instruamur esse et causas et significationes somniorum de quibus intendimus, volumus primo di-

¹ II de Anima, ex diversis colligitur textibus.

cere quomodo somnium est in nobis. Scimus autem quod non dicimus nos somnare, nisi quando clausis per somnum sensibus, fiunt in nobis comprehensiones formarum sensibilium, quæ quidem res non sunt, sed sunt aliquid simile rebus partibilibus determinatis, secundum hic et nunc : non autem tales formas tantum somniamus, sed etiam intentiones adjunctas illis formis convenientis et nocivi : et ideo animalia moventur in somnis per modum imitationis et fugæ : et quando talis fit motus in somnis, tunc dicimus nos somnare. In somniando autem non videtur nobis tantum esse visus imaginum, sed videtur nobis quod sentiamus directe per omnes quinque sensus, et fortius per illos sensus quos fortiores habemus : quoniam videtur nobis, quod videamus lumina et colores clare et distincte, et quod audiamus sonos, et tangamus calida vel frigida vel homines quorum figuras somniamus, et quod gustemus dulcia vel amara. Sed rarissime somniat aliquis quod odoret fœtida vel odorifera : quod contingit ex hoc quod homo habet hunc sensum debilissimum : unde etiam quando somniat se esse in locis fœtidis sicut in latrinis, non somniat se loca illa odorare. Similiter quando somniat se esse in cellis aromaticum vel in hortis ubi multa sunt aromata, non somniat se, nisi valde raro, delectari odore : sed somniat se tantum immutari in visu, vel auditu, vel tactu, et forte gustu talium. Et si somniat se aliquid percipere de odore, hoc erit per gustum, ita quod somniat se aliquid gustare, et postea illius odorem percipere. Hæc autem omnia signa sunt, quod formæ somniorum sunt acceptæ per sensus, et quod illæ quæ debiliter imprimuntur, aut non remanent, aut ita debiliter remanent, quod sine præsentia rei sensibilis sensum afficere non possunt.

Hæc autem inducta sunt adhuc ut sciamus, quoniam homo in somno sensibilibus et non imaginabiliter tantum afficitur : sensibilis autem affectio nullo mo-

do potest fieri nisi patiente organo sensus aliquid a sensibilibus formis : cujus enim potentia est, ejusdem est actus, ut prius dictum est : potentia autem sensibiliter afficiendi non est nisi sensus : et ideo oportet quod cum actualiter sic afficitur, quod hæc affectio sit aliquid in organo sensuum. Constat etiam, quod in somnio in organa sensuum non agunt res exteriores cum ad illos clausa sint organa : quia si hoc diceretur, tunc sensus essent in usu sentiendi : usus autem sentiendi est vigilia : et tunc sequeretur quod somnus et vigilia inessent eidem et secundum idem et in eodem tempore, quod est impossibile : relinquatur ergo, quod illa sensibilia quæ agunt in organa sensuum, sint spiritualia non realia, et cum afficiunt sensuum organa, oportet quod hæc sint ex altera duarum causarum, scilicet vel sunt in ipsis organo sensuum reservata, aut sunt ad ipsa ex intrinseco capitis et corporis venientia. Si autem continue essent reservata in organo sensuum, sequerentur duo inconvenientia : quorum unum est si continue reservaretur in eis, continue afficerent organa : et sic homo continue somniaret, quod est falsum. Secundum est, quod non habens organum visus, ut cæcus, homo somniaret numquam de rebus visibilibus. Relinquatur igitur quod ab intus ad organa sensuum veniant.

His igitur positis, videamus unde et usquequo veniant. Scimus autem ex his quæ bene in libro de *Anima* determinata sunt, quod omnis forma ministrata ab anima, procedit ab aliquo thesauro. Theaurum autem scimus non nisi duplicem esse, intentionum scilicet, quarum thesaurus est memoria, et formarum quarum thesaurus est imaginativa sive formalis : oportet ergo quod ex illis ministrantur formæ istæ : sed nos ostendemus inferius, quod somnus aut semper, aut frequenter ligat mediam : non ergo possunt procedere ex media. Cum autem nos sciamus quod sensus communis est, qui primo componit et dividit inter sen-

Quare homo raro somniat odorare?

sata propria, et quod ex illa compositione et divisione resultant intentiones nocivi et convenientis, sicut in scientia de *Anima* determinatum est, sequitur ex illo procul dubio, quod dummodo non claudatur, ligetur imaginativa, quod dum formæ administrantur ex ipsa, resultabunt intentiones boni et mali ex ipsa compositione eorum, non quidem intentiones rerum, sed similes illis acceptæ in spiritualium imaginationum compositione et divisione.

Dicamus igitur, quod convenientius est, quod motus somni est ex imaginatione quam quidam phantasiam vocant. Sed si velimus scire ubi sit terminus motus hujusmodi, revocemus ad memoriam prædicta, ubi diximus quod affectio sensibilis motus necessario est in organo sensuum. Cum autem organa sensuum secundum duas divisiones clausa sint, oportet necessario quod si aliquid recipiunt, quod sint in loco ubi magis appropinquant ad calidum vaporem interius: quia quanto vapor somni ad exteriora fluit, tanto magis in frigidatur: interius autem licet frigidum sit, cum adeo non sit frigidus, quin plus habeat de caliditate quæ est a principio, quod elevat ipsum, quam in loco ubi distat ab ipso eodem principio. Ex hoc igitur relinquatur, quod nervi sensibiles in concavitatibus suis spiritum sensibilem habentes in loco ubi conveniunt ad organa sensus communis directum ad cor per conlimitationem quam habet cum ipso, informantur sensibilibus formis provenientes a thesauro imaginationis in vapore spiritali, quem elevat principium caloris. Ex quibus omnibus constat, quod motus somni incipit ubi terminatur motus vigiliæ, scilicet in thesauro imaginationum sensibilium, et provenit ad locum ubi incipit vigilia, hoc est, ad primum organum sensuum, et quod evaporatio somni vehit eas ab uno loco in alium.

Hoc est igitur quod volumus præmittere, ut sequentium facilius sit intellectus. Sunt autem multa genera somnio-

rum, de quibus omnibus in sequentibus ostendemus diversitatem et causam. Sed communiter de esse somniorum in omnibus generibus eorum secundum Peripateticos et Averroem cum Alfarabio et Adamidin philosophos dicta.

CAPUT II.

Cui parti animæ convenit somnium?

Resumentes igitur quod a principio dictum est, dicamus quod de somnio in hoc secundo libro quærendum est: et cum passio non sciatur nisi per suum subjectum, oportet nos primum quærere cui parti earum quæ sunt partes animæ conveniat dicta passio: et utrum sit passio intellectualis particulæ, vel sensibilis: sicut enim diximus, somnium cognitio quædam est: et in his duabus partibus animæ large acceptis solum cognoscendi aliquid habemus facultatem. Ostendemus ergo primo, quod hæc non sit passio sensus qui est acceptivus sensibilium specierum materia præsentis, sine materia tamen: si enim usus visus est videre, auditus audire et omnino videmus quod sensus usus est sentire speciem re præsentis exterius: quæ autem sic sentiuntur præsentis materia, aut sunt communia sensuum, aut propria: communia quidem, ut figura, aut magnitudo, et alia hujusmodi: propria vero, ut color, sonus, et sapor, et his similia. Scimus autem, quod omnia, claudencia sensus et dormientia sunt in potentia, et non habentia

facultatem utendi sensibilibus, et non possunt videre, nec aliquo sensu reliquorum uti : tunc patet quod nihil omnino sentimus in somno : et sic videtur quod sensu non percipiamus somnium : necessario autem concludit id quod sensu immutato a rebus extra somnium, impossibile est percipere.

Videtur autem quod somnium sit conceptio quædam similis opinioni impartibilibus formis judicanti, et tamen probabimus etiam quod neque in opinione sit somnium : quando enim per opinionem de sensibilibus vigilantes non solum adveniens ad nos dicimus hominem esse, vel equum, quæ sentimus per accidens, et accipimus per opinionem per se, sed dicimus ipsum esse album vel pulchrum, sumendo iudicium et de his quæ per se et proprio sensu sentimus : talia autem omnino non iudicat opinio sine usu sensus, sive iudicium ejus sit verum, sive falsum : ea enim circa quæ iudicium ponit, sensibilia sunt : et illa non habent nisi per sensuum apprehensionem secundum actum factam. In somnis autem accidit animam iudicium simile omnino isti facere : nos autem videmur videre in somnis, scilicet omnino similiter de adveniente aliquo, quoniam homo, et quoniam equus est : quorum utrumque est sensus per accidens, et opinionis per se. Videtur etiam nobis, quod videamus quod quoniam albus vel pulcher quem videmus in somnio : quorum utrumque sensus est per se et opinionis per accidens. Si ergo primum iudicium non habet sine sensu omnino, neque utique habebit secundum sine sensu secundum actum facto. Jam autem probatum est, quod secundum actum non fit sensus in sensu in dormiendo.

Amplius autem si recurramus ad ea quæ experimur in nobis ipsis, videbitur quod non omnis acceptio quæ fit in somnis sive iudicium vocetur somnium : quia somnium est affectio sensibilis in organis sensuum facta, sicut diximus : nos autem præter hoc somnium frequen-

ter dormientes videmus et concipimus quoddam aliud, quod secundum intellectum elicitur ex illo : sicut enim vigilando sentimus aliquid, et ex illo per collationem intelligimus quoddam aliud, et disponimus illud : sic etiam facimus in somnis : præter phantasmata enim quæ afficiunt sensus, intelligimus dormientes quoddam aliud. Hoc autem homini jam videbitur qui exercet mentem suam per experta, cum tentat surgens a somno memorare qualiter in somno se habuit : multi enim jam videntur somnia talia quæ disponebantur, quasi secundum memoriæ perceptionem disponderent quæ videbantur in somnis ad facere vel scire, sicut ex memoratis disponit intellectus vigilantis : contingit enim aliquid talium præter phantasma quod est somnium in dormiendo ponere quasi ante oculos, et in loco disponere illud, et ordinare ad intellectus conceptionem.

Cum autem secundum prædicta somnium nullo modo sit conceptio intellectus, manifestum est quod non omne phantasma quod est in somno, proprie vocatur somnium : oportet enim ipsum afficere modo sensibilis sensum, aliter somnium proprie non vocatur. Propter quod Socrates in tria divisit ea quæ occurrebant in somniis, et unum vocabat somnium, secundum divinationem, tertium prophetiam : sed de his in sequentibus erit manifestum. Est autem manifestum ex hoc quod intelligimus aliquando certitudinaliter in somnis, et concipimus in eis certam scientiam quæ in vigilando tantum opinione opinabamur : et hæc apprehensio nullo modo est somnium.

CAPUT III.

Ex qua causa deceptio fit in somnis cum formæ accipiuntur pro rebus ?

Ex his autem quæ prædicta sunt, palam est quod in somno est deceptio : eo quod forma sensum afficiens accipitur ut res ipsa : deceptionem autem istam invenimus etiam in vigilantibus quibusdam ægris, ut melancholicis et phreneticis et maniacis, et non potest esse quod effectus similes non perveniant ex similibus causis : et ideo quæramus causam hujus deceptionis : hoc enim idem quod vigilando etiam in somno facit deceptionem.

Dicamus igitur, quod sanis et videntibus sol videtur esse monopetalis, et consentiunt in apparitionem hanc, eo quod rationale eorum detentum est ab ignorantia, sensu nuntiante, quod non potest ratiocinari de contrario, quod hæc major sit terra, licet petalis propter longinquitatem videatur. Hæc autem deceptio fit primo inter phantasma et sensum, sive idem, sive dicamus diversum esse phantasticam formam et sensibilem, et phantasticam potentiam et sensibilem : deceptio enim fit in his etiam absque videre exterius, et absque audire, et omnino absque sentire exterius, et iterum vi-

dendo exterius, et audiendo exterius fallimur aliquando : sicut enim diximus in scientia de *Anima*¹, sensus proprius non decipitur in proprio sensato : unde videntis quidem verum quod nuntiat de proprio sensato : et hoc modo etiam audientis est verum, sed nequaquam est id semper verum quod in his arbitramur componendo et dividendo sensata, et arbitrando hoc esse illud, vel non esse, vel conveniens, vel necessarium : et ideo hujus deceptionis aliqua est causa. In somno autem positum est nihil omnino contingere videre, vel audire exterius, vel etiam omnino sentire ab exterioribus rebus præsentibus : igitur non contingit aliquem sensum videre unum, vel aliquid etiam pati videndo per modum dictum. Sed tamen experimenta scimus, quod licet non per exteriora cum in somnis contingit visum pati, sicut et alios sensus. Singulum autem horum in quibus patimur secundum singulos sensus evenit nobis quemadmodum vigilantibus quodammodo : quia in utroque afficitur sensus organum affectione sensibili, licet non sit omnino sicut accidit nobis vigilantibus : id enim quod apparet in somno, aliquando dicit opinio falsum esse, quando scilicet in somno iudicium rationis non omnino sopitur et detinetur : sicut etiam in vigilia quædam iudicat inconvenientia et falsa, sed non est de esse somni : quandoque autem in somno detinetur ne procedat ad iudicium, et tunc consequitur æstimatio hominis phantasma sicut rem ipsam, et est deceptus. Et hæc est causa, quod quidam inhonesta somniantes consolantur se in somno, eo quod non sit curandum, quia somnium sit et non veritas.

Patet igitur ex dictis et melius patebit ex sequentibus, quod hæc passio quam vocamus somnium et somniare, non est passio opinantis vel intelligentis aliquid.

¹ II de Anima, tract. III, cap. 5.

Hoc autem sic probatur expressius quam in ante habitis probatum sit. Constat autem ex omnibus quæ in primo libro istius scientiæ digesta sunt, quod omnis dormitio vinculum est, et immobilitas, et præcipue exteriorum sensuum : si autem intus et opinio in actu esse debeant, oportet a sensibus fluere phantasmata ad opinionem et intellectum, a quibus abstrahantur intentiones probabiles et universales ad informandum opinionem et intellectum : non autem sic fluunt in somno, eo quod tunc spiritus animalis qui est vehiculum formarum, retractus sit, et sensus subtrahit se ab exterioribus, et reduxit se ad interiora : igitur per accidens somnus erit et vinculum et immobilitas intellectus et opinionis : oppilantur enim viæ per quas formæ ad interiora transire debuerant. Quod autem in quibusdam somnis hoc non fit, in quibus fiunt intellectus et opiniones, vere per accidens contingit, et non est de natura somni, sed habet causam aliam quam inferius exsequemur.

CAPUT IV.

Quod somnium est passio sensibilis particulæ animæ, non in quantum sensibilis, sed in quantum phantastica.

Cum autem jam constet somnium non esse passionem opinionis vel intellectus, videtur quod nec sensibilis particulæ sit

hæc passio quam somnium appellamus. Si enim simpliciter esset somnium hoc sensus, sed quod ipse simpliciter est sensus, tunc esset vigilantis passio : quia sensus cum sit potentia passiva, non est simpliciter et absolute, nisi quando est in agere et pati a proprio et exteriori objecto : sic autem non fit sentire in dormiendo : et tamen in somnio fit simpliciter videre et audire, hoc modo quo prius diximus : et ideo qualiter et quemadmodum fiat afflictio sensus in somnio, hic considerandum est.

Ponamus igitur primum, quod tamen manifestum est, quod somnium est passio sensibilis particulæ animæ : hujus enim passio est somnus, in quo somno et numquam aliter fit somnium : non enim potest esse, quod aliquando alicui animalium vel partium animæ insit somnus, et aliquando somniare : sed eidem animali et particulæ accidit somnus et non somniare. Quoniam vero de phantasia diximus in libro de *Anima*¹, secundum quod sub se comprehendit et imaginativam et æstimativam, patet quod phantasticum subjecto idem est sensibili, sed esse suum formale et diffinitivum non est idem cum esse sensibilis. Est autem phantasia motus ille qui fit a sensu secundum actum facto, sicut diximus in libro de *Anima*². Dico autem phantasiam formaliter cum suis formis accipiendo : motum autem voco formam ad ipsam in spiritu animali devectam : somnium autem quoddam phantasma videtur esse per experta. Diximus enim quod hoc phantasma quod est in somno, est aut simpliciter factum, aut quodammodo : non simpliciter factum dicimus esse somnium : manifestum est igitur, quoniam partis sensibilis animæ est somniare, non quidem sensibilis, secundum quod simpliciter est sensibile, quia sic fit in actu ab exterioribus, sed sensibilis est secundum quod sensibile efficitur

¹ III de Anima, tract. 1, cap. 8.

² Ibid.

phantasticum informatum et affectum a phantasmate: hoc autem est quod diximus in principio, quod somnium incipit a phantasia vel imaginatione, et terminatur ad sensibilem particulam animæ: et e converso vigilia incipit a sensu, et terminatur ad imaginationem et memoriam et opinionem et intellectum in aliquibus. Est ergo phantasma somnium faciens non simpliciter factum: quia sic esset a rebus factum, sed est factum quodammodo per reversionem evaporationis tenuis et lucidæ, quæ in somno ab interiori capitis revertitur ad principium organorum sensibilium: deceptio autem in his fit a vinculo detinente iudicium potentiarum animæ, quæ possunt discernere verum et falsum in phantasmatum collatione secundum compositionem et divisionem facta.

CAPUT V.

Qualiter forma somnii sit in sensibili parte animæ secundum quod patitur sensus ab objecto et remanet forma sensibilis in organo sentiendi?

Habito proprio subjecto somnii, cuius ipsum est passio, superest speculari quid sit et quomodo sit somnium. Speculemur igitur ex his quæ maxime ut in pluribus circa somnium accidunt.

Dicamus igitur primo, quod objecta sensibilia nobis afficiunt sensum secundum singula organa sentiendi, et passio sive formalis qualitas et figura quæ fit

a sensibus, non solum est in organis sensuum dum sensata extra præsentiam sunt et agunt in sensum, sed etiam postquam abierunt, aliquantulum perseverant in organis formæ illæ: quod licet in libro de *Sensu et sensato* probatum sit diligenter multis experimentis, tamen ut certior sit doctrina, probetur etiam hic. Dico igitur hic, quod hæc passio quæ fit a somno et sensu, similis est violentiæ qua feruntur ea quæ feruntur motu violento, qui est motus expulsionis sive projectionis: in isto enim motu ea quæ agitantur et projiciuntur, adhuc moventur, quando jam non attingit ipsa ulterius primum movens, sicut movetur lapis postquam non tangitur chorda blitæ, et sagitta movetur postquam non tangitur a chorda arcus: et hoc est ideo, quia id quod primum motum facit, secundum impulsionem movet aerem, et ille aer motus movet aerem alium: et sic movetur unum ab alio donec stat violentia: sic enim secundum impulsionem violenter faciunt motus omnia quæ moventur in aere vel elemento humido quod est aqua: quia in his tantum duobus elementis est motus violentus. Hoc autem hic inducimus tantum pro exemplo: sed utrum verum sit, an non, in octavo *Physicorum* ante finem libri requiratur.

Quidquid autem sit de his quæ localiter et violenter moventur, cum superius dictis oportet nos opinari accidere in alteratione: nam quod calefactum est ab aliquo calido, calefacit ulterius hoc quod sibi proximum est, et hoc iterum ulterius distribuit calorem, et sic fit continue per moventia et mota usque in primum principium motus, hoc est, solum movens non motum in genere motus illius in quo movet sequentia. Igitur similis modus motus est in eo in quo sentire contingit: quoniam sentire alteratio quædam facta est et ipsius sensus, quando est secundum actum factus et alteratus a forma sensibili: non tamen est simpliciter alteratio, ut diximus alibi. Est igitur hæc causa, quod aer motus ab oculo al-

terat sensum, et organum sensus alterat sensum communem, et sic ulterius secundum ordinem virium animæ sensibilis : et remanet forma per spatium in organo sensus postquam alteratum est : quia aliter secundum illam formam non moveret interiores animæ partes et organa : et ideo quiescentibus jam rebus exterioribus a movendo sensus, alteratio fit adhuc et remanet tam in superficie sensus in organis, quam in profundo capitis, ubi sitæ sunt aliæ particulæ animæ sensibilis : hoc autem palam est per experta : cum enim diu et frequenter sentiendo patitur sensus ab aliquo sensibili valde activo, et nos postea eundem sensum transferimus ad alia sensata ejusdem sensus, tunc passio prius accepta sequitur sensum.

Et hujus exemplum est, sicut quando nos transferimus visum a sole prius viso ad tenebras vel tenebrosa : accidit enim tunc nihil videre in domibus tenebrosis propter lumen solis adhærens oculis. Et simile accidit quando diu aspicimus ad colorem clarum, sive ille sit albus, sive cæruleus, et sit bene coloratus ejusdem coloris, videtur nobis esse omne corpus ad quod subito permutamus visum, quod pellis alba vel cærulea sit expansa super ea quæ postea videmus. Et si ad solem inspiciamus vel aliquid aliud splendidum valde, et statim contineamus claudendo oculum, et nobis observantibus aliquid aliud secundum directum visum immediate conspiciendum ubi accidat visum videre, statim apertis oculis subito post aspectum solis judicabit oculus colorem esse hujus quale est lumen : deinde post modicum, passione oculi remissa, permutatur in puniceum, hoc est, in clarum rubeum colorem, deinde ad purpureum sanguineum, et ultimo pervenit ad nigrum vel ad illum qui est verus color corporis, super quo dirigitur oculus, eo quod tunc evanescat passio prius facta in oculo.

Et simile est in sensu communi qui percipit motum : cum enim aliquis in-

tueatur ea quæ permutantur, et postea videat alia, videbuntur ei moveri sicut illi qui sensus organum permutant a cursu fluminum, et maxime ab his fluminibus quæ citissime fluunt, postea vero quando sunt in terra, videntur eis etiam moveri ea quæ quiescunt propter formam motus manentem in organis sentiendi. Hoc autem non est tantum in visu, sed in auditu : unde a magnis sonis diu auditis fiunt aliqui obsurdescentes ad alios sonos, non propter hoc quod corrumpatur auditus tantum, sed quod forma magni soni remanet in auditu, et excludit perceptiones aliorum sonorum. Ex eadem etiam causa fiunt etiam a validis odoribus non odorantes alios odores, et in omnibus similibus idem est iudicium. Hæc autem omnia manifeste accidunt secundum modum quem diximus.

CAPUT VI.

Quod organum sensus non solum patitur, sed etiam agit in corpora vicina.

Ante autem quam propositum habere possimus, oportet nos ostendere quod organum sensus non tantum patitur ab objectis, sed etiam agit in corpora vicina. Quod igitur organa sentiendi cito modicas differentias sensibilibus sentiant, apparet in rebus animatis, quæ non ita bene præparatæ sunt ad patiendum, quæ tamen valde cito a modicis differentiis agentium immutantur. Hoc autem in speculis accidit, quod ipsum exemplum tam mirabile videtur, quod si insistendo

per omnem considerationem considerabit quis diligenter, quasi mente videbitur utique consternari præ admiratione facilitatis passionis.

Et ex illo manifestum est non solum organa sensuum faciliter pati, sed etiam agere aliquid in corpora vicina, non etiam in eodem subjecto sibi conjuncta : in isto enim experta probant, quod quemadmodum visus patitur a diversis, et agit et facit aliquid in corpora se tangentia. In speculis enim valde puris si contingat mulieres inspicere, menstruis supervenientibus, generatur superficies quædam velut nubes sanguinea : et si quidem novum fuerit speculum, non facile est abstergere hujus maculam : si autem verus, facile : quod contingit ideo, quod in veteri sunt sordities quædam nubæ quæ excludunt maculam ex oculo menstruatæ per aerem venientem. Causa autem est, quia, sicut diximus, non solum patitur visus ab aere inspiciendo formam visibilis, sed etiam facit aliquid in aerem : et ideo sanguis fluens vaporabiliter resolutus in aerem ex oculis menstruatæ, facit in aerem et in oculum, sicut faciunt omnia splendida quæ illuminationem aliquam largiuntur corporibus sibi vicinis, postquam a luminositate perceperint lumen. Organum est de numero splendorum et de numero eorum quæ habent colorem : multa enim colorata sunt splendida, non quidem propter lumen quod sit in ipsis, sed propter lumen quod reverberatur super ea, sicut diximus in libro de *Sensu et sensato* : in mulieribus autem menstruatæ rationale est oculos affici sanguine, sicut et omnes reliquæ partes corporis earum afficiuntur : naturaliter enim secundum suam complexionem existunt plenæ venarum : venæ autem sunt viæ sanguinis : ideo cum fluunt menstrua propter turbationem et fervorem sanguineum, licet nobis incerta sit differentia sanguinis illius qui decidit ex oculis, scimus tamen quod inest ipsis aliqua differentia et portio menstrui sanguinis, sicut in cæteris

membris. Scimus enim, quod seminis natura est eadem et menstruorum : eo quod utrumque est superfluum ex quo fit generatio, nisi quod semen est activum, menstrualis vero sanguis passivum : semen autem a quo fit generatio totius, necesse est quod decidatur a toto corpore, licet a capite decidatur plus quam ab aliis membris. Menstruum igitur a toto corpore descinditur, et sic erit sui aliqua pars currens in oculis : et cum fervet, resolvitur vaporabiliter, movetur aer ab ipso, et serpit alteratio illa et motus usque ad aerem, qui in speculis est tangens speculi superficiem propter continuitatem qua continuatur motus aer ab oculis usque ad speculum, et qualem quemdam facit oculus aerem, et talem facit eum qualis est ipse in passione sive qualitate eadem existens : aer autem talem facit speculi superficiem. Ita enim fit in speculo mundo sicut fit in vestibus : vestes autem quæ maxime mundæ sunt, citissime inquinantur ; quod enim valde purum est, diligenter monstrat sordidum quod receperit, et præsertim minimos motus secundum alterationem factos. Omne enim politum et planum est, qualemcumque parvum tactum etiam mundissimæ manus, tactum maxime sentit et demonstrat : statim enim spissam trahit nubem. Oportet enim intelligere hunc tactum sive qualitatem quæ inficit tangens factum, esse tamquam aeris infecti a nube sanguinea quamdam actionem in superficie speculi, et actionem quamdam aeris ad speculum : et sicut attrahi dicuntur quæ se collidunt per confricationem, et quod sit tamquam explicatio quædam aeris ad speculum.

Hæc enim tria succedunt sibi cum speculum ex aere inficitur. Primum quod tangit ipsum, cum extremum aeris est cum extremo speculi. Secundo attingit aer speculum, quasi ingerens se in profundum speculi. Tertio autem exspoliatur se forma nubis inducendo eam in speculum, et speculum tenet eam propter duram substantiam sui : hæc autem macula

statim fit manifesta, quantumcumque sit parva, vel magna, propter munditiam speculi : quod autem non de facili et celeriter exit ex novis speculis, causa est hæc, quod purum politum et planum est speculum : ex his enim dispositionibus serpit macula in profundum speculi omnino : nam eo quidem quod purum est speculum, serpit in profundum omnino speculi macula : ratio autem quia planum est, serpit naturaliter et omnino, quia in plana superficie facilis est diffusio vaporis, cum nulla pars emineat, quæ protegat sibi vicinas partes ab infectione. In veteribus autem speculis macula non est una, neque simul : quia non in eo macula subit in profundum, sed magis natat in superficie speculi : cujus causa superius assignata est. Quoniam igitur etiam a parvis differentiis sensibilium fiat motus, et alteratio organorum, et celeres sensus secundum actum ex potentia moti.

Amplius autem quoniam non solum patitur sensus, sed etiam agit e contrario organum per quod sentimus colorata, manifestum est ex his quæ dicta sunt. Attestantur etiam his quæ inducta sunt etiam ea quæ circa vina et circa pigmenta eveniunt : oleum enim quod separatum est ab amurca, et est depuratum et præparatum cito accipit odores corporum sibi proximorum : et omnia patiuntur illud ipsum. Non enim solum commiscerentur vina odoribus corporum quæ immittuntur in vinum, sicut fit in vino pigmentato, sed recipiunt etiam odores corporum quæ proprie vasa ponuntur, vel per se juxta vasa existunt.

Ex omnibus his quæ dicta sunt, arguimus duas conclusiones : quarum una est facile et celeriter et usque in profundum sui sicut speculum a parvis differentiis patitur ab extra, quod similiter facile et celeriter moveri potest organum sensus a particulis intra, cum illæ sint in organis sensuum conjunctæ in eodem subjecto et continuus sit nervus ab interioribus ad organa veniens : exteriora autem sunt

diversa ab eis in subjecto et non habentia adeo continuitatem naturalem usque ad ipsa.

Secunda est, quod cum organum sensus agat secundum passionem naturaliter et accidentaliter acceptam in aliquod corpus quod non est secum in eodem subjecto, quod multo fortius organa interiora et instrumenta informata sensibilibus formis, agere possunt in organa priorum sensuum secundum formam, ut perfectio in perfectibili, et naturaliter est eis sicut actus in potentia.

Ad eam ergo quæ ex principio consideratio in intentione nostra revertatur : sicut igitur ex his quæ dicta sunt, patet quod post recessum sensibilis extrinsecus in cella anterioris capitis ubi sita est formalis, conveniunt simulacra habentia similitudinem aliquam cum forma quæ est objectum sensus : et hoc præcipue fit, quando ea quæ sunt prima sensibilia, quæ agunt in organa sensus, valde disponuntur ad agendum secundum aliquem sensum specialem et secundum effectum quem imprimunt in ipso : effectus enim valde activorum multum penetrat in passivum sibi proportionale.

CAPUT VII.

*Quæ sit vera causa deceptionis in somno
et quot sint?*

Adhuc autem ex superioribus longe dictis apparet, quod facilitas deceptionis in sensibus tam in dormiendo quam in vigiliando, est ex passionis vehementia, in qua existimus : et diversi homines et diversa animalia sunt in diversis passionibus : et ideo diversas habent causas deceptionis suæ in his quæ apparent ex sensibus : sicut trepidum decipitur in timore existens, et amans decipitur in amore vehementi existens, in tantum ut etiam propter modicam similitudinem videatur timenti quod videat hostes, et amanti videatur quod videat dilectum. Eodem modo est etiam in ira et in omnibus concupiscentiis et passionibus, quod facile videlicet decipiuntur omnes existentes et detenti ab eis.

Adhuc autem quando passibilior utique et magna passione detentus fuerit quis, tanto amicitiae movetur. et permittitur similitudine et magis ac magis movetur, quanto in passionibus fuerit magis et magis : hæc enim est causa, quod febricitantibus quibus materia vaporat ad caput, videtur quod animalia videant in parietibus propter modicam similitudinem linearum casu protractarum in parietibus : et quidem taliter infirmantium quibus non detinetur rationis usus, vehementer decertant apud se contra phan-


tasmata, scientes esse falsum : et hoc contingit in eis qui non laborant multum : non enim tunc latet eos, quod falsum est quod tunc dicit imaginatio : si autem major sit passio infirmitatis, in tantum quod detineat rationem, tunc movetur ab ipsa similitudine irascendo, vel timendo, vel concupiscendo, sicut re præsentem. Causa vero in omnibus hujusmodi una est, hæc scilicet quod omnia non judicat secundum eandem potentiam id quod est principale, sicut res, et id quo fiunt phantasmata : primum enim judicat ratione, et secundum sensu communi vel æstimatione sensibili. Hujus autem exemplum est quod videtur secundum id quod phantasmata faciunt solem esse unius pedis : sed alia pars animæ quæ est sæpe in scientibus, contradicit ad phantasiam, et dicit eum esse majorem tota terra.

Similiter autem si globulus ex cera vel alia aliqua materia formetur, et postea digitus super digitum cancelletur, ita quod utriusque digiti extremitate simul tangatur globulus, videntur duo esse globuli qui unicus est : attamen non dicimus quod duo sint, quia alius sensus, qui dignior est in certificando de rebus et numero earum, tactui contradicit : in omni enim certificatione dignior est visus quam tactus. Si vero non haberemus nisi tactum et talem tactum qui est cum transpositione digitorum et non alium, tunc procul dubio decepti judicaremus duo esse quod unum est : et mentiendi causa esset, quia non esset aliquid dignius tactui contradicens. Mentiendi autem causa naturaliter est in sensibus, et non solum ex hoc quod forma quælibet apparet cum movetur sensibile quod primo movet sensum, sicut prius induximus superius in multis exemplis : sed etiam ex hoc quod fiunt apparitiones multæ, cum ipse sensus movetur secundum formas præacceptas, vel naturaliter in eo existens, sicut est lumen, et diaphaneitas, et splendor, et hujusmodi : tunc enim eodem modo movetur sicut sensibile ex prius accepta forma motus in organo.

Dico autem explanando hoc sicut terra videtur moveri aspicientibus, quorum visus ab aliquo prius motus est.

Et ut liquide hoc intelligatur, oportet scire quod causa deceptionis in somnis provenit ex uno principaliter, et ex tribus aliis secundo. Principale autem est, quia non est contradicens ad phantasma nisi valde raro, eo quod humiditas somni oppilat porum per quem est transitus imaginum ad usum rationis : et tunc accipitur phantasma ut res, et similis est causa in omnibus amentibus. Unum autem secundorum et non principale est passio : hæc enim trahit formam ad id quod timet vel desiderat : nam quod quisque timet vel sperat, per somnum cernit

idipsum : et ideo luxuriosus fit somnium de coitu, famelicus de cibo decipiens. Secundum autem decipiens est similitudo cibi vel humoris qui dominatur in corpore, et id quod somniatur, sicut cui dulce phlegma distillat a capite per dentes, somniat quod mel bibat, et cholericus somniat se propter modicum calorem esse in igne, et phlegmaticus propter modicum frigus se esse in aqua, et sic de aliis. Tertium autem est lineatio imaginum in vapore fluido interius organa tangente : sicut enim vapor est incertæ figuræ, ita et imaginationes quæ feruntur in ipso. Hæc autem in sequentibus magis erunt manifesta.



TRACTATUS II

QUID SIT ET QUALITER FIAT SOMNIUM?

CAPUT I.

Qualiter in nocte fiat somnium?

Ex omnibus autem his quæ habita sunt, esse et diffinitionem somnii investigantes, dicimus manifestum esse, quoniam non solum fiunt motus a simulacris quæ sunt in corpore in vigilando, sed etiam tales motus qui sunt extrinsecus in sensuum organo, sed fiunt hujus motus in animalibus quando in eis fit passio ista quæ vocatur dormitio vel somnus, et tempore somni magis apparet, et plus se manifestat.

Hujus autem causa est, quia in die quando animal vigilat, fiunt majores sensuum motus extrinsecus, et ab illis expelluntur a perceptione debiles motus intrinseci, quando fortiter extrinsecus agit objecta exteriora in sensus, et intrinsecus fortiter agunt conferendo et diversa tractando ratio et intelligentia : exterminantur enim tunc ne percipiantur, quemadmodum juxta multum et fortem ignem exterminatur minor : et sicut exterminantur parvæ tristitiæ et parvæ oblectationes ne percipiantur juxta valde magnas tristitias et delectationes. Nocte vero quando frigus claudit organa sensuum et vacant ab exteriori tumultu fortissimarum passionum quæ fiunt ab exterioribus objectis, et propter impotentiam agendi exterius propter ligamentum dormitionis, eo quod in ipsa ab exterioribus membris ad interiora fiat caliditatis et spirituum reflexio, tunc referuntur sensuum vigores ad primum principium sensibilis particulæ quæ est cor restaurans quod deperditum est in spiritu et calore : tunc etiam interiores motus phantasmatum fiunt manifesti, sedata maxima turbatione, quæ est in evaporatione quæ sursum fer-

tur in fine digestionis, postquam segregati sunt grossi sanguines a subtilibus, ut diximus superius, imaginationes cum subtili evaporatione fluunt ad principia nervorum sensibilium, et ibi manifestantur.

Oportet autem nos opinantes hunc fluxum fieri sicut fiunt modicæ vertigines primo quæ feruntur in fluvio : instante enim aqua circuli fiunt, sed in flumine cito fluente res injectæ faciunt vertiginem, sed cito frangitur propter fluxum aquæ. Et eodem modo arbitrari nos oportet unumquemque motum phantasmatis fieri continue in somnio : sæpe enim vehitur imaginatio vecta in sua propria similitudine ad principium sensus, et sæpe corrumpitur in alias figuras propter fluxum humidi spiritualiter evaporantis, quæ deferunt formas phantasiæ : corrupto enim subjecto, necesse est corrumpi figurationem formæ quæ in ipso est. Hæc autem corruptio fit propter repercussionem vaporis ad concavum capitis, ex quo reflectitur necessario in seipsum, et non tenet figuram in qua ascendit : hæc enim est causa, quod immediate post multum nutrimentum, et præcipue si calidum sit, et multum vaporativum, non fiunt somnia : eo quod multus motus vaporationis fortiter repercutitur ad craneum, et in seipso refractus non tenet imagines. Eadem enim causa multum teneram et humidam et mollem habentes complexionem, et pueris calidis et humidis multum existentibus ante, non fiunt aut raro aut confusa fiunt somnia : quia humiditas eorum vaporat multum a calido, quod sæpe repercussa nullam omnino tenet imaginem : multus enim et profundus est somnus propter multam caliditatem quæ est ex nutrimento : et ideo quemadmodum fit in humido quod vehementer movet quis, sic fit in tali somno. In humido enim vehementer moto nullum omnino apparet idolum, quamdiu vehementissime movetur : et quando non adeo vehementer movetur, tamen cito apparet quidam, sed distortum, et omnino alterius

modi quam debeat esse si aqua quiesceret : et si quiescant aquæ motus, tunc apparent pura et manifesta idola. Sic per omnia et in dormiendo fiunt phantasmata distorta vel vera, et reliqui omnes motus secundum quod magis et minus movetur et repercutitur evaporatio ad cerebrum facta. Interdum etiam quando vehemens est valde motus evaporationis, tunc omnino exterminantur et annihilantur, et interdum conturbatorum phantasmatum apparent visiones somniorum, et ex his fiunt monstruosa et horribilia somnia.

Hæc autem propter diversas causas præcipue eveniunt febricitantibus et melancholicis febricitantibus et ebriosis : eo quod materia febris obscuro fumo sursum vaporat, et caliditate sua formas commiscet : et tunc monstruosa apparent : grossitie autem et multitudine obstruit porum logisticæ cellulæ, et sic detinet rationem contradicentem, et tunc movetur æger ad simulacrum sicut ad rem ipsam. Vinolentis autem eveniunt hæc eadem : quia calor vini facit elevare multum humidum vini, et obstruit poros logisticæ, et permiscet operationes formarum : et inde resultant monstra quæ apparent. Propter motum autem humidi quod movetur a calido, videtur eis quod res quæ circa eos sunt, moveantur. Adhuc accidit, quod vinum detinet eorum nervos motivos et trementes facit. Et ex his simul junctis est, quod facile cadunt ebrii. Melancholicis autem fit hoc propter nigrum vaporem qui spissus est, eo quod elevat eum parva caliditas : et ideo imagines videntur certæ, sed non permixtæ et confusæ, et sunt, sicut in nigris nubibus videntur quædam nigra similitudines imaginum habentia, et hæc stant diu. Propter hoc etiam terrores et conceptiones melancholicorum diu durant : hæc enim evaporatio grossitie sua claudit, et frigiditate sua constringit porum logisticæ contradicentis apparitioni quæ fit in phantasia. Omnes autem hæc et hujus passionis his similes propter hoc quod ventosæ sunt, faciunt multas et multarum

imaginationum motus et turbationes in capite.

CAPUT II.

Qualiter conservata simulacra in somnis movent organa sensuum ?

Conservatorum autem simulacrorum quæ a sensibus accepta in formali reposita sunt, motus facit somnia valida, postquam sedatur a turbante et commiscente calido ustivo, et postquam distinctus est purus ab impuro : quia tunc possunt lucere imagines in eo quod est purum. Quoniam autem impuro non poterat apparere, præcipue quando calidum fumosum continue permiscuit operationes et elevationes ejus : tunc enim movebatur continue et fortiter duobus motibus, ascensionis videlicet et reflexionis in seipsum : et quia conservata simulacra tunc faciunt valida somnia, et ideo ea quæ a sensu visus in formalem deferuntur, faciunt videre in somniis : et ea quæ ab auditu deferuntur, faciunt audire.

Simile est et de aliis formis quæ deferuntur ab aliis sensibus : ex eo enim quod discreto sanguine progreditur talis motus simulacrorum ad sensum communem, ubi contingunt se nervi sensibiles, quod est principium vigilandi, sicut sæpe diximus, videtur sibi somnians videre et audire et omnia universaliter sentire. Videtur autem decipi ex hoc quod visus videtur moveri, qui non movetur a re sensibili aliqua, sed est forma motus in

eo ipso : et hanc judicat videns inesse rebus quas videt, sicut diximus de tactu, qui transpositis digitis duos tactus annuntiat : et sic videtur unum esse duo, cum tamen hoc non sit nisi in tangente et non in re tacta. Similiter est in somno, quod in veritate nihil videt, nihil audit, nec sentit realiter et secundum veritatem esse rem aliquam : sed hæc sunt tantum in somniantem per formas ab intus defluentes ad principium sensitivum : et ideo sentire tunc videtur. Unde etiam in dormiendo si contingat aliquem sensum moveri a re exteriori, minor sensus in auditu secundum rem existens videtur esse maximus, et modica lux oculis objecta videtur maxima, ita forte quod videtur coruscatio lumen parvum candelæ, sicut inferius dicemus : omnino autem et universaliter forma quæ ab unoquoque sensuum est, ducit ad principium sensuum originem similem sensui, nisi sit aliquis sensus dignior qui contradicat. Illud igitur quod videtur in somnis, prorsus apparet homini sicut sensibile : sed id quod sic apparet, videbitur secundum veritatem non esse : sed id quod intra judicium dat, non detinetur : vel si proprio motu movetur, quamvis forte in parte et non in toto detineatur, sicut diximus superius in his quæ non habentes fortes ægritudines decertant contra imagines, et dicunt eas non esse.

Quemadmodum enim diximus, quod aliquando propter aliquam passionem facile decipimur, ita facile decipitur propter somnum detinentem id quod natum est judicare : et ideo quod a simulacris rerum moveantur organa sentiendi : hoc enim naturam deceptionis repræsentat. Cooperantur adhuc alia accidentia somni, sicut qualitas cibi, et potus, et qualitas complexionis ipsius dormientis : et quod multum cooperatur, est consuetudo, et mores, et studia in quibus est dormiens, et spectacula quæ cum diligentia adspexerit, et desideria quæ habuerit, et hujusmodi omnia, quæ ad illa formantur et disponuntur simulacra. Nihil enim est

in corpore animato quod non subdatur per aliquem modum animæ motibus : et ideo etiam formantur et ordinantur imagines somniorum ad motus animæ perversæ : perversa est enim anima dormientis, cum a somno impeditur et detinetur rationis iudicium. Et hæc est causa quod dicit Aristoteles quod meliora sunt phantasmata justorum quam quorumcumque : actus enim somniantis multum ad se trahit somnium, ut diximus : hæc enim accidentia et passiones somniantis in interioribus faciunt multo efficacius quam in exterioribus, quod videlicet modicam habens similitudinem, videtur illud a quo afficitur ex passione et alio accidente : et tunc tertiam partem formationis vix habens videbitur species hominis vel alterius.

Et ex hac causa contingit, quod plures homines easdem formas somniantes, unum non significant : eo quod diversa accidentia causant eas in eis. Hoc autem sic fit, quod cum animalia dormiunt, descendente plurimo sanguine ad principium sensuum vaporabiliter, descendunt motus, hoc est, imaginum impressiones, quæ sunt motus sensibilium, et moventur organa in suis principiis, et talium motuum simulacrorum quidam sunt potestate, alii vero actu : *potestate* quidem qui possunt elici ex figura vaporis propter aliquam convenientiam, præcipue ab eo qui passione aliqua detentus est : *actu* vero sicut illæ quæ a sensibus acceptæ sunt imagines, et refluunt ad organorum principia.

Sunt autem et alio modo imagines somniales et actu et potentia : prior enim est in actu, et posterior in potentia : et erit in actu corrupta priore. Hæc autem per omnia similiter se habent sicut in motu, et præcipue in motu alterationis, qui, sicut in tertio *Physicorum* diximus, est generatio formæ post formam : sic enim directe est fluxus somnialis factus ad principium organi sentiendi : in illo enim unus motuum formalium est potestate, et alter actu : unius enim supernatat alium tangens sensum : si vero hic corrumpatur,

generabitur alius sensus, quia sæpe fit forma post formam : per omnia enim ita se habent formæ fluentes ad principium sensibilium in successione sui fluxus. Hæc enim ad invicem se habent quemadmodum ramunculi liquefacti salis in aqua, præcipue si aqua sit calida : tunc enim sal in fundum primo cadens, emittit albas vias liquefactionis suæ diversas ascendentes successive, unam post aliam et splendent in eis quædam corpora lucida parvula, sicut et sal micat aliquando, et præcipue marinum quando movetur : et per omnia simulacra primo a sensibus vadunt primum ad fundum animæ sensibilis ad organum imaginationis et phantasæ, et ex inde refluunt lucentes et successive venientes ad primum sensitivi principium : sic enim sunt potestate quædam et actu quædam moventes : cedente enim una forma quæ prius fluxit et prohibebat agentem secundam, et resoluta illa prohibente formam, sequentes habent similitudinem formæ per quam factæ in organo sentiendi et in exiguo sanguine et reliquo qui remanet de materia somni, habent similitudinem moventium et movent ad somnium actu quæ prius erant potestate.

Et hujus simile est in nubibus. In his enim videmus cito permutari formas. Videmus enim quod simili modo in centauris et hominibus, quod cito ex resolutione vaporis permutantur in formas alias. Similiter autem est in formis aliis delatio in somno, quod cito permutantur de forma in formam, quæ insunt potestate et actu, sicut diximus. Horum autem simulacrum unumquodque habet illum modum existendi, sicut dictum est de reliquis quæ fiunt in nubibus et liquefacto sale.

CAPUT III.

Qualiter vis somni facit latere somniantem quid sit quod apparet in somniis?

Sed abeunte motu simulacri ejus quod est in actu movens primum sensitivum, verum quidem est dicere, quod est tale ut Coriscus, vel tonsor, vel sicut quilibet alius cujus species apparet in somnio : sed hoc non verum est, quod sit Coriscus ipse secundum rem. Cum enim qui nunc dormit, sentiebat in vigilando, non dicebat proprium sensum qui dijudicat et nuntiat rem sensibilem, esse Coriscum vere, vel secundum rem : sed dicebat per hunc sensum formalem quem accipit, illum esse verum Coriscum quem quidem sumendo dicit esse hunc, qui etiam in rei veritate est Coriscus : forma enim accepta sensu et postea imaginata ab eo qui vigilat, scitur non esse Coriscus verus, licet Coriscus verus sit, qui sentitur per formam illam et repræsentatur : hoc autem est verum iudicium vigilantis : et hoc modo vigilans aliquis iudicat, si non omnino detineatur aliquo sanguine amentiam faciente, sicut detinetur non sentiens secundum usum sensuum et actum qui est impotens sentire. Hoc enim sicut etiam somnians movetur motibus simulacrorum qui sunt in organis sentiendi, et

illi quidem simile tantum et simulacrum esse id quod verum est in re ipsa, et decipitur tunc habens se ad simulacrum sicut ad rei veritatem : et est similiter tanta potentia somni, quod facit latere hoc simile : et ideo somnians indifferenter movetur ad similitudinem sicut ad rem ipsam.

Quemadmodum igitur est in superius inductis similitudinibus deceptionis ¹, ita est etiam in somno. Si enim digitus supponatur oculo, ita quod situs oculi mutetur, unum duo videbitur propter causam quam alibi loquentes de sensibus expressimus : unde si tunc supponamus illum esse detentum, ita quod non contradicat ei quod apparet, tunc in veritate dicet unum esse duo, et decipitur. Si autem non sit detentus, sed iudicet esse simulacrum in sensu tantum et non in re existens, tunc non decipitur : quia non videtur ei esse verum secundum rationem quod apparet in sensu : sic enim omnino est in somno : si enim adeo sit tenuis somnus, quod sentiat se dormire, et sentiat aliquo modo sensum in quo est passio dormientis, tunc quidem apparet somnium, sed non decipitur : quia non videtur ei ita esse secundum rem : et iterum dum somniat, contradicit et dicit somnium videri quidem Coriscum, non autem esse in veritate Coriscum. Hoc enim sæpe contingit, quod dormiendo dicit aliquis somnium esse et non rei veritatem id quod apparet in somniis : si autem lateat eum, quod dormit, tunc in nullo contradicit : et tunc deceptus sequitur simulacrum sicut rem ipsam.

¹ Cf. superius, tract. I, cap. 7.

CAPUT IV.

*De natura et propria diffinitione somni
et ejusdem explanatione.*

Manifestum est autem quod vera diximus in præhabitis, quod videlicet somnia sunt motus phantastici in organis sentiendi. Si quis enim attendens diligenter quæ patimur dormientes somniantes, tentet ad memoriam revocare expergefactus. Interdum enim eadem idola quæ apparuerunt in somnis parum ante, inspiciet expergefactus in eisdem organis sentiendi in quibus ante somniavit ea : et de hoc exempla dabimus inferius aliquantulum. Sed in quibus hoc manifestius est, juniores sunt : quibusdam enim illorum in tenebris etiam quando prospiciunt oculis apertis et vigilant, plurima idola moventur in interioribus organis, ita quod in tantum horrent, quod obvelent se et tegant ut abscondantur : et videtur eis aliquando, quod ictus datus sit eis propter maximum phantasticum motum. Ex talibus igitur universis syllogizare oportet, quod somnium phantasma quoddam sit in somno fluens, et movens modo sensus organa sentiendi. Dicimus autem *in somno*, quia idola quæ modo dicimus esse in tenebris, in junioribus non sunt somnia, eo quod non sunt in somnis, neque generaliter aliquid eorum est somnium quod videtur solutis ad vigilandum sensibus.

Sed neque somnium simpliciter dicitur esse phantasma : aliquando enim aliqui-

bus accidit parum et tenuiter dormientibus sentire aliquo debili modo : sentire etiam ab extrinseco somnum et lumen et saporem et tactum. Sentiunt autem hoc languide valde, et veluti immutati sint a sensibili quod de longe et remotum est ab illis : quod contingit eadem causa quam diximus : quia videlicet somnus ligat sensum : et quia sensus istorum debili somno et tenui ligati sunt, debiliter percipiunt : et propter deceptionem hanc, debilitatem ad sensibile deferunt, et credunt quod hoc sit ex longinquitate sensibilis imitantis sensum.

Quod autem illa sint sensibilia non de intus ex loco phantasiæ descendencia, sed ab extra in sensum venientia, probatur per hoc quod tales e vestigio statim surgentes a somno vigilando cognoverunt idem esse lumen lucernæ quod vigilantes vident, quod prius in somno nunc senserunt. Expergefacti enim cognoverunt manifeste idem esse lumen et ejusdem lucernæ quod et prius tacite dormientes senserunt semiclausis sensibus. Similiter autem multi gallorum et canum voces expergefacti cognoverunt eadem quas prius subaudiendo in somnis quasi de longinquo auditas senserunt. Quidam autem sic etiam in tenui somno existentes respondent interrogati. Et hæc omnia contingunt, eo quod contingat aliquem simul dormire et vigilare, ita tamen quod alterum istorum simpliciter insit, et reliquum secundum quid secundum aliquem modum et non simpliciter : propter quod nullum prædictorum modorum dicimus esse vere somnium. Qui enim utitur sensibus, non dormit, nisi forte secundum quid quod jam incipit gravari ad somnum.

Sed neque adhuc somnium dicimus secundum veram somni rationem, quæcumque sunt veræ intelligentiæ dormiendo perceptæ : essenziale enim est somno decipi ex vi dormitionis, sicut supra diximus. Non omne igitur phantasma movens in somno, somnium est : quia in aliquo præter phantasma contingit adesse

veram intelligentiam præter phantasmata et non decipi, de quibus inferius tractabimus : sed phantasma illud quod est a motu simulacrorum, quod fit in dormiendo, et secundum quod dormit animal, hoc est secundum primum sensitivum, hoc est somnium.

Ex omnibus his patet quod somnus incipit ubi vigilia finitur, et finis ejus est ad principium vigiliæ. Hæc igitur dicta sunt de somni causa et quidditate.

CAPUT V.

De his quibus non accidunt somnia, et de his qui obliviscuntur somniorum.

Jam autem inventi sunt quidam hominum quibus accidit per totam vitam numquam vidisse aliquod somnium : et hoc est raro valde : et tamen accidit aliquando, quod in tali dispositione perseverant usque ad mortem. Aliquibus autem in protracta ætate accidit somnia videre, cum aut in pueritia, aut in virili ætate nullum unquam viderint somnium. Causam autem quia talibus somnia non contingunt, oportet arbitrari simile aliquod ad eos qui post cibum immediate dormientes, non vident somnia : et ad hoc quod diximus, quod pueris non fit somnium. Quibuscumque enim talis natura et complexio perseveranter consistit a qua multa et spissa et permixta evaporatio continue per totam dormitionem ascendens ascendat in superiorem locum capitis, quæ iterum in seipsam reflexa spissam multitu-

dinem motus facit ad vigilandi principium, isti profundo et gravi somno oppressi numquam vident aliquod somnium : prodente vero ætate, si mutantur per calorem et humiditatem, nihil inconueniens si mutetur et accidens somni eorum, ita quod tunc appareant eis somnia : permutatione enim corporis facta secundum ætatem et secundum passionem corporis contrariam, necessarium est hanc contrarietatem somniandi et non somniandi eis accidere.

Quidam sunt, qui multum somniant et continue suorum somniorum patiuntur oblivionem : quod ex illa causa contingit, quia pro certo motus fortiores aliqui excludunt perceptionem imaginationum apparentium in somnis : et ideo qui continue post somnium fortiter moventur corpore antequam memorantur de somno, omnino obliviscuntur, præcipue si somnium in fine somni viderint, sicut frequenter omnes homines somniare consueverunt. Quod autem hæc causa a nobis inducta vera sit, quare videlicet provenit, non viderunt somnia, in quibusdam ex multa et spissa evaporatione ad superius facta est, et ad inferiora delata, probatur ex hoc quod vacui dormientes et exinaniti continue somniant quando modico somno premuntur. Oportet etiam scire, quod omnino ei accidit somniare, cui accidit dormire, præcipue ei qui non confusam habet phantasiam et sensum communem, sicut sunt animalia imperfecta : hæc enim forte non somniant, sed animalia perfecta somniant : et hoc sæpe in canibus experimur, quod latrant in somno et moventur ad imagines, sed non percipiunt hoc ipsum nec attendunt in vigilia propter defectum rationis : et ideo non dicuntur somniare nisi cortices imaginum, et non ipsas medullas.

Tot ergo et tanta de causa et quidditate et subjecto proprio somni dicta sunt a nobis.



DE SOMNO ET VIGILIA

LIBER TERTIUS

TRACTATUS I

QUOD SIT ALIQUA DIVINATIO, ET QUID SIT?

CAPUT I

Et est DIGRESSIO declarans quam difficile sit aliquid tradere de divinatione.

Satis diligenter per declarationes et similitudines in antehabitis causa somni et diffinitio ipsius et modus habitus est a nobis secundum Peripateticorum peri-

tiam et præcipue Aristotelis, qui princeps hujus scientiæ fuisse cognoscitur. De divinatione autem somniorum et similibus principiis qualia habita sunt, nullo modo potest aliquid dicere : et ideo super alterius principio determinationem tractare incipimus.

Quod quidem quam difficilis sit, tria ostendunt. Unum est, quia nullus omnino apparuit, qui de hoc satisfecerit studiosis : sed potius in hoc etiam quod ipsorum Peripateticorum verba in tantum variantur, quod fere a propria secta recedunt, et documenta afferant a schola Stoicorum et Epicureorum. Quidam enim hoc diis immortalibus attribuunt, sicut Stoici : quia hoc ipsum dicunt sonare divinationis nominationem. Et quidam hoc attribuunt substantiis aliis quæ sunt principia rerum, rebus tamen ipsis similibus, sicut Epicurei.

Taxat Peripateticos et alios Philosophos.

Opinio Stoicorum de divinatione.

Et hoc ipsum quidem quod de divinatione dicit Aristoteles, breve quidem est et imperfectum, et habens plurimas dubitationes. Dico autem *breve*, quia carens probatione, sed simplex, et parum philosophiæ habens videtur esse narratio, nec species somniorum neque probationem somnii aliquid significandi in se continens. *Imperfectum* autem est, quoniam licet sine magicis et astronomicis non possit ars interpretandi somnia adipisci, tamen solis physicis sufficienter scitur ex quibus et qualibus simulacris consistit somnium de quo debet esse divinatio: et hoc neque ab Aristotele, neque a Philosophis quidquam determinatum est. *Plurimas autem dubitationes habet*, quia in incerto relinquitur causa talium somniorum.

Nec etiam ejus quod dicunt, quod similitudines inspiciens est iudex somniorum, determinavit modum et causam: tamen hoc quod dicit Aristoteles plus accedit veritati, quam aliquid quod ante vel post scripsit aliquis Philosophorum, ejus scripta ad nos devenerunt.

Porro si aliquis inspiciat omnia quæ de hoc physice aliqui loquentes dixerunt tantam invenisse diversitatem, quod ipsa diversitas sermonum et difficultatem ostendit materiæ: et cum hoc dubitationem in his quæ tradita sunt, demonstraret: et tam auctores dubie dicunt, certa doctrina de his tradi non poterit. Averroes enim hic impugnat Avicennam et iterum Algazel Adamidin, non per omnia inter se, neque cum Avicenna concordantes impugnantur a Rabi Moyse de Ægypto. Si quis autem Tullium legat in secundo libro de *Natura deorum*, qui de divinatione particulariter loquitur, inveniet quod ille cum nullo concordet prænominatorum.

Similiter autem est de Socrate, qui fidem magnam ponebat in somniorum divinatione, et hanc dixit esse unam de principalibus scientiis, ut videlicet scientia haberetur de somniorum conjecturatione. Plato autem cum Socrate concor-

dare videtur, sicut magister cum discipulo: sicut enim narrat Apuleius Modenensis in libro de *Dogmate Platonis*, etiam Socrates per somnium instructus Platonem puerum in discipulum assumpsit. Dicitur enim Socrates tale somnium vidisse: visus est sibi cygnum pullum ex altari, qui secundum ritum Academicorum Cupidini consecratur, et exaltatum volasse et in ejus gremio rediisse: et postea olorem illum pennis cælum petiisse, canore musico auditus hominum deorumque mulcente. Cum autem hoc somnium in Academia in conventu sociorum referret, ecce apparuit quidam Armon puerum nomine Platonem afferens Socrati, ut eum magistri commode et utilitate imbutum redderet, in quem cum adspiceret Socrates, et ingenium optimum per physiognomiam de exteriori conspicatus est facie, statim exclamans ad socios, « Amici, hic ille erat, inquit, de Academia Cupidinis cygnus. » Iste etiam Socrates scientiam divinationis in somniis magnifice extollens, ad Athenienses fertur exclamasse: « O viri Athenienses et Philosophi, absit a me ut hanc vestram quam experti estis per somnia, dicam falsam esse scientiam, sed hanc ut divinam me ignorare profitear, humana me scire exiliter protestor: et, ut verum dicam, hoc solum me scire arbitratus, quod ignoro, eo quod scientiam deorum auctorum nondum sim adeptus. » Ex his ergo et talibus constat difficile esse aliquid per rationem certam de divinatione tradere somniorum.

CAPUT II.

An divinatio somniorum sit, an non sit?

Quæramus igitur primo an sit divinatio? et ad hanc quæstionem cum Aristotele dicamus, quod de divinatione quæ pro certo in somniis multis fit in ante a nullis Philosophis dicitur accidere, utrum sit, vel non sit, neque de facili idoneum est contemnere, neque de facili suaderi, ut simpliciter et absolute divinationem talem esse dicamus.

Quod enim aliquam futurorum vel occultorum aliorum somniat significationem, præstat fidem hoc quod plures vel omnes æstimant esse ipsam: est enim hoc non auditus inanis, sed experientiæ testimonium, quod vix arbitror quemquam inveniri hominem, qui non de multis futuris præmonitus sit per suiipsius somnia: et quod in veritate de quibusdam somniis sit divinatio, non est incredibile. Habet hoc enim quamdam rationem: et quia quædam sic somnia conjecturantur, creditur ab aliquibus, quod de omnibus aliis somniis fit similiter: et ideo student ad omnium suorum somniorum conjecturationem.

E contra autem, cum nullam rationabilem causam invenire possimus istius conjecturationis et divinationis, incipimus discordare et dicimus non esse divinationem. Si enim Socratis imitari velimus peritiam, ut dicamus ideo dici divinationem, quia hæc scientia humana non ex-

stens, a Deo immittatur: et quia, ut dicit Simonides, « Deus invidet hanc scientiam homini, et ideo velat eam sub metaphora et deceptione: » tunc occurrit ab altera parte, quod si dicamus Deum mittentem hanc scientiam fatuis et melancholicis et aliis amentiam patientibus, et quod non immitteret eam prudentissimis et optimis viris, et quod immittat eam quibuslibet indifferenter et idiotis hominibus, magnum videbitur esse inconveniens: dictum enim et invidum nequaquam dici potest.

Propter quod mentitur Simonides, nisi forte secundum poematicum modum fabulose dicat similitudinem esse invidiæ ex hoc quod velatur hæc scientia: « invidia enim, ut ait Plato, a Deo longe relegata est. » Si autem affertur hujusmodi causa, quod videlicet dicatur Deus non esse causa et immittens hujusmodi scientiam, tunc nulla aliarum causarum videtur esse conveniens. Scimus enim omnis scientiæ esse proprium, quod fiat ex præexistenti cognitione. Omnis enim scientiæ duæ sunt apud nos præcedentes cognitiones: quarum unam cognitionem principiorum vocant, alteram præparationem quæ est in nobis, ut dicunt Arabes, quæ est acceptio terminorum: principia enim cognoscimus in quantum per sensum terminos cognoscimus. *Sensum* autem dico per se, vel per accidens communem, vel proprium. Sine his duabus numquam accipimus scientiam aliquam intellectivam: eo quod omnis scientia effectus est aut demonstrationis, aut aliqujus saltem persuasionis probabilis a ratione perfecta, aut imperfecta probata.

Ad divinationis autem scientiam nulla talis præexistens cognitio in nobis est. Non enim est aliqua via persuasionis, quod si luna exaltari videatur, quod homo augmentum fortunæ sequatur: vel si sol videatur eclipsari, quod diffusio famæ et potestatis debeant minorari. Cum enim omnis probatio sit aut ex toto veris universalibus, aut in pluribus, sicut est hoc quod omnis mater diligit, ad scien-

tiam prædictæ divinationis neutro modo possumus devenire, quin potius talis impressio talis exaltationis vel depressionis lunæ vel solis, neque ut universale, neque ut particulare videtur habere aliquem ordinem ad felicitatem vel infelicitatem. Si autem dicatur quod metaphorice et per similitudines accipienda sunt, videtur quod peccet omnis talis acceptio: peccatum enim est in problematibus vocare platanum hominem, et asinum vas, et hujusmodi: cum enim via plana conferre possit talium scientiam sine etiam natura, si a causa est alia naturali, mirum utique videbitur quod talibus vult uti metaphoris.

Ex his igitur persuadetur quod non sit aliqua talis divinatio. Somniare enim de his quæ in Occidente sunt particularibus et contingentibus in fine Occidentis, quæ Herculeæ columnæ dicuntur, sive Gades Herculis propter causam quam in libro de *Natura locorum* assignavimus: similiter autem somniare de his quæ contra Borysthenen in ultima parte Orientis, et ex talibus somniis aliam providentiam futurorum accipere, videtur multum esse exaltatum supra nostram prudentiam: quia ex his principiis quibus accipere consuevimus scientias et opiniones rerum, non possumus invenire principium et originem istorum. Sumus igitur inter duo, quod autem videlicet dicamus quod non sit aliqua scientia divinationis, et tunc contradiceremus expertis ab omnibus vel pluribus: aut dicemus talem scientiam esse, et tunc dicemus nos habere aliquam scientiam cujus in nobis nulla sunt principia, et quæ sic fit et generatur in nobis, quod suæ generationis in nobis nulla præexistunt principia, quod est impossibile.

CAPUT III.

Et est DIGRESSIO declarans de distinctione visionis et prophetiæ et somnii, ut solvatur præinducta dubitatio.

Nos autem istam dubitationem nequaquam solvere possumus, nisi prius de ipsis visionibus somniorum aliquid præcognoscamus. Revocetur ergo ad memoriam quod supra diximus, scilicet in aliquibus somniis esse veras intelligentias præter ipsa phantasmata: et hæc secundum Aristotelis doctrinam diximus non proprie somnia vocari. Distinguamus igitur ostendentes, quod aliud est visio sicut somnium divinationem habens, et aliud est somnium, et aliud prophetia, et non secundum Theologos accepta: nam et astronomi loquuntur de signis prophetiarum, et magi docent interpretari somnia, et physici de visione physica illa quæ est una operationum animæ intellectivæ: et propter hoc est necesse nobis loqui de distinctione horum, prout his utuntur Philosophi, et ante nos numquam invenimus præinductæ disputationis solutionem.

Dicamus igitur quod visio proprie dicatur, quod aversis sensibilibus et introrsum retractis videtur in vigilia, quocumque modo videatur, sive ex quacumque causa, sive patiatur aliquis alienationem, sive non, sive etiam patiatur aliquis syncopim sive non patiatur. Sicut quando somno sensus ligantur, refluunt phan-

Visio quid sit?

tasmata ad organa sensus, et aliquando fiunt vera somnia proprie sicut res se habent et fiunt intelligentiæ claræ, ita fit aliquando aversis sensibus et per revocationem sensuum ad interiora ligamentum sensuum in vigilia : et tunc aut per simulacrum, aut per propria sicut res est, aut per illustrationem intelligentiæ apparitiones fiunt veræ et falsæ, quæ *visiones* a physicis appellantur, quibus maximus usus est in magicis : illi enim student in talibus sensum avertentibus, et in talibus apparitionibus præcipue, et in quibusdam quæ sumpta sensus claudunt et stupefaciunt, et ad apparitiones quæ tunc fiunt, conjiciunt futura.

Prophetia. Taliter igitur et talis vocatur visio in prophetia : prophetia enim proprie vocatur quando homo per raptum intellectus sui illustratur de scientia futurorum vel aliorum occultorum ad quæ deveniri non potest per inquisitionem et rationem.

Somnium. Somnium est in phantasmatis et in somno solum : propter quod prophetia nobilior est quam somnium : prophetia enim est quasi habitus vel naturæ habilitas ex illuminatione intellectus futura præcognoscens : et visio quidem aliquando est cum intellectu, aliquando sine illo : semper autem est cum phantasmate, aliquando aliquid significante, aliquando nihil. Somnium autem secundum phantasmata est aliquando aliquid significans, et aliquando nihil, et per se numquam cum intellectu : propter quod tradiderunt Philosophi, quod somnium aliquod futurum prænuntians est casus a prophetia factus. Casus enim vocatur immaturus fructus decidens, qui tamen figuram et saporem fructus etiam aliquo modo præterdit. Similiter autem est de somnio, quod futurum significat vel occultum aliquod : hæc enim figuram prophetiæ in præostensione habet ut quendam saporem ex longinquo in convenientia similitudinum : et tamen in illo usque ad plenam et perfectam intellectus illustrationem non pervenit. In compara-

tione autem ad somnium visio minus cadit a prophetia quam somnium.

CAPUT IV.

Et est DIGRESSIO declarans præinductæ disputationis solutionem.

His autem habitis, oportet præinductam solvere disputationem sequendo experta in nobis ipsis, et relinquendo pro constanti in somniis esse futurorum frequenter et occultorum aliorum divinationem ex quacumque causa sit illa : quia de hoc inferius quæremus : potest enim esse a Deo, vel a stellis, vel a causa quæ est in nobis : et quæcumque causa sit, per experta dicimus in somniis esse divinationem ex phantasmatum similitudinibus excerptam et conjecturatam. Nec vera sunt dicta Simonidis : quia ista velatio divinationis in metaphoris non est ex illustrante causa quæcumque illa sit, sed potius ex natura hominis qui talem accepit illustrationem. Scimus enim ex his quæ in scientia de *Anima* determinata sunt, nihil intelligere vel parum nostrum intellectum sine continuo et tempore. Si enim ponamus necessariam esse revelationem tam ex parte moventis quam ex parte ejus quod movetur, oportet necessario quod fiat imaginibus et formis sensibilibus : quia aliter non esset causa naturalis, cum non accipiat noster intellectus nisi cum continuo et tempore, sicut jam dictum est. Obstrui autem ponamus virtute somni logisticam, tunc

relinquitur quod talis revelatio non fiat nisi sub imaginibus et formis sensibilibus.

Si autem quæritur, quare non fit per sensibilia et imaginabilia propria, cum lucidius et compendiosius sciretur ex propriis quam metaphoricis, et compendium eligit natura, eo quod non abundat superfluis, videtur mihi esse dicendum, quod talia omnia de quibus est somnium, præcipue sunt contingentia de futuro : hæc autem non sunt in se antequam fiant : nec etiam habent causam stantem et ordinatam : propter quod nec similitudine propria suæ essentiæ, nec in similitudine fieri possunt in anima, præcipue cum omnes similitudines quæ sunt in anima, fiant per abstractionem a rebus. Ex quo igitur fieri non possunt simulacro proprio, nec simulacro causarum, necessario sequitur quod propria simulacra quæ nec aliena figuratione talia præostendunt, talia præfigurari non possint. Si igitur præfigurantur, oportet quod hoc fiat per aliquam influentiam superiorum, et simulacro alieno non proprio. Oportet autem quod illa influentia sit aliqua valde remota causa : et tunc quando ista influentia tangit animam, percipietur in ipsa in phantasmate alieno, eo quod proprium in se vel in sua causa non habuit, ut diximus : alienum autem phantasma non ostendit nisi per similitudines et metaphoras : oportet igitur in talibus somniis metaphoricè accepta esse animæ phantasmata.

Objectio. Si autem forte aliquis objiciens, dicat quod si tale somnium habeat causam influentiam alicujus superioris substantiæ, sive corporalis, sive incorporeæ, tunc sub similitudine et motu illius influentiæ ostendi potest proprie et non metaphoricè : et sic redit idem quod prius. *Dicendum* quod influentia illa sive sit ab intelligentia, sive a stellis, facta est communis valde et indeterminata, et habet determinari a particularibus et per naturam particularem vel ex proposito : et ideo illa in se non habet figuram, neque colorem, neque quantitatem, et non inno-

Solutio

tescit sicut est nisi intellectui : hunc autem clausum in somno jam in præhabitis esse supposuimus.

Sed cum dicitur quod res ab anima comprehenditur per suum simulacrum vel causæ suæ, intelligitur hoc de causa quæ est convertibilis cum re, sive accipiat per essentialia, sive per communia quæ sunt signa probabilitatem facientia, sive etiam accipiat, non in causa, sed per seipsam res illa. Constat autem quod nullo istorum modorum potest accipi contingens particulare de futuro. Sed nolo quod hoc alicui difficultatem generet quod dixi, quod illa influentia est causa communis et remota et intellectualis potius quam imaginabilis vel sensibilis : ex hoc enim posset credi, quod non moveret animam sensibilem, et sic non generaret phantasma : non enim hoc est verum. Licet enim non sit figurabilis, nec qualitatem sensibilem habens, tamen ex quo effluit in lumen cœleste et elementa, motiva est corporis et animæ vegetabilis et sensibilis : motus autem talis non efficitur in anima sensibili et corpore secundum potestatem primi influentis, sed potius secundum potestatem recipientis animæ sensibilis et corporis : et ideo illa forma sic efficiens animam sensibilem est ex loco passionis inclinantis ad hoc quod movet. Cum autem anima sit informata et affecta, tunc ipsa per imaginationem parat et fingit simulacra quibus hoc repræsentetur : et cum non habet propria, nec habere potest, præparat aliena ex quorum metaphoris hoc pronuntietur, per omnem eundem modum quo timens imaginatur terribilia, et amans concupiscibilia somnia, et esuriens simulacra ciborum : forma enim ex influentia somniorum afficiens, agit in animam præceptibiliter, quando anima vacat a tumultu sensuum, et est medium per quod pervenit ad animam quam tangit : et tunc facit in ea quod solent facere prius inductæ passionēs.

Fiunt tamen somnia aliquando in quibus

per influentiam causantur veræ intelligentiæ, sive cum metaphoris, sive cum propriis similitudinibus sumptæ : de quibus omnibus unam et eamdem arbitror esse rationem. Quando enim vera intelligentia est cum metaphoricis symbolis, tunc pro certo afficit forma influxa animam sensibilem, et illustratio ejus tetigit intellectum per modum quem inferius dicemus : sed tamen non est tanta vis intellectus per vinculum sensuum et animæ, quod in toto elevet ipsum intellectus, et ordinet conceptum ejus per species proprias, ita quod in anima rationali fiat notitia certa de hoc et propria. Quando autem est somnium ut res ipsa, tunc minus fuit vinculum animæ, sive in somno, sive in visione : et ideo tunc intellectus illustratus ab influentia abstraxit formas et species proprias a phantasmatibus, et ordinavit eas sub proprio et perfecto conceptu rationis, qui dicit hoc vel illud esse futurum : quando autem in toto ligata est anima rationalis, tunc pro certo non potest nisi in alienis phantasmatibus per modum qui dictus est, manifestari.

CAPUT V.

Et est DIGRESSIO declarans dispositiones naturales ad prophetandum et somnandum.

Adhuc autem ut perfecte intelligatur, oportet scire quod animæ ad hujus visiones et somnia et prophetias triplex est

in genere dispositio. Quibus enim est intellectus multum agens et clarus, illi per naturam sui intellectus multum superioribus substantiis congruunt : et cum tota anima sit instrumentum intelligentiæ, dicitur imprimere in eam quotiescumque influentia sit ei sui luminis. Cum autem intelligentia, ut diximus, sit plena formis explicabilibus per motum cœli, cum radii et figura radiorum tangunt corpora et animæ partem inferiorem, accipitur lumen influentiæ ab intellectu per modum possibilem sibi, et accipitur clarum et manifestum valde : et ideo tales homines optime intelligere nati sunt, et ad altissimas scientias quæ sapientiæ vocantur, optime et secundum naturam dispositi. Propter quod et Moyses Ægyptius tales vocavit *sapientes*.

Sunt iterum aliqui optimum habentes organum phantasiæ et imaginationis in quantitate et qualitate et complexione et compositione et figura et omnibus aliis quæ exiguntur ad organi imaginativæ potentiæ bonitatem, et illorum imaginatio excellenter est compositiva imaginum verarum et metaphorarum : et tales sunt perfecti in metaphysicis secundum naturæ habilitatem. Sed nisi adsit eis lumen intelligentiæ, efficiuntur multiplices in rationibus phantasticis propter mobilitatem imaginationis et multipliciter : et isti confundunt sophisticis veras sapientias, et innituntur probabilibus, et talia placent eis, et sunt abundantes in rhetoricis et civilibus, quæ omnia probabilitatem in imaginabilibus habent, et talis Heraclitus et sui sequaces fuerunt. Intellectu autem præditi sive civilium perspecta scientia fuerunt Anaxagoras et Thales Milesius.

Sunt autem tertii per optimam dispositionem habentes in utrisque, tam in intellectu videlicet, quam etiam in imaginatione et organo, et illi et bona et ordinata valde habent simulacra, et præparantur semper ad veros et certos intellectus : et illi sunt de habilitate naturæ et vere somniantes sunt, et vere præ aliis

visiones habentes, et nonnumquam etiam clarissimas pronuntiantes prophetias. Si tamen ex hoc supponatur, quod aliis et præcipue exterioribus et corporalibus passionibus detineantur, et ideo timor et concupiscentia venereorum et sollicitudines et dissolutiones gaudiorum vanorum, et tristitiæ, propterea quod animam detinent, ad se trahunt imaginationem, et turbant intellectum ne moveri possit ab influentia descendente vel alia causa movente. Propter quod multi sapientium dixerunt, sicut narrat Moyses Ægyptius, quod tempore concupiscentiæ, tristitiæ, et timoris, prophetæ non prophetizant, neque vera futura denuntiant : oportet enim per studium longum et honestos mores et ordinationes affectuum animam ab exterioribus ad interiora revocare, et claudere vias ne tumultus sensibilium qui est in vigilia, animam extrahat ad exteriora : et si hoc jam multo tempore factum est, ita quod jam evanuerint simulacra accepta per sensus et passiones animam pertrahentes ad alia, tunc divinatio certior erit : et hæc est causa, quod Hermes et alii quidam divinationi studentes, in antris desertis absconditi jacuerunt.

CAPUT VI.

Et est DIGRESSIO declarans de causis differentie animarum in prophetia et somnio secundum Avicennam et Algazelem, cum improbatione opinionis eorumdem.

Sed neque adhuc dicta plene intelliguntur, nisi ostendamus unde venit causa istius differentie in animabus humanis, tam in intellectu quam in imaginatione, et quam in utroque : et quia diversitas sensuum exteriorum nihil omnino ad hoc operatur. Ut autem limpidius hoc clarescat, inducamus : sunt hæc opiniones Avicennæ et Algazelis et Averrois, et Platonis ex altera parte et Socratis et aliorum Stoicorum : quia dictis istorum collatis ad invicem aliquid forte melius apparebit : unde sciri potest ista animarum differentia.

Avicenna et Algazel per omnia concordantes dicunt animam intellectualem non esse in corpore, sed potius illustrare in ipsum suum splendorem. Dicunt enim quod intellectus in homine de natura intellectus est agentis, et est proprius ejus effectus : et ideo est separatus et non mixtus corpori : et ideo super totam naturam influere habet suas virtutes et operationes, præcipue super corpus cum quo incipit anima rationalis : quia circa hoc plus afficitur quam circa aliud, eo quod hoc sit suum esse cum quo incipit : propter quod in illo facit lumen scientiæ,

Avicennæ
et Algazelis
opinio.

sive de futuris, sive de præsentiis, sive de quibuscumque aliis. Addunt etiam gradus esse in hujusmodi anima intellectuali : quia quidam sortiuntur animas altiores, et quidam inferiores. Altiores quidem quanto fuerint abstractiores, et intellectus eorum agentiores universaliter, sicut et agens omnis intellectus inferiores et ignobiliores, ex eo quod intellectus ipsorum est unus separatus et magis moli corporis obligatus. Hi autem qui superiores animas sortiuntur, aliquando ita separati sunt intellectus eorum, quod per conformitatem superioribus intelligentiis congruunt : et ex illa congruentia imprimunt in eis lumen suum, per quod illuminantur ad sciendum ea quæ disposita sunt fieri in universo, et sine medio corpore fit, et in tantum exaltant nobilitatem hujus intellectus, quod invenitur anima quæ omnia scit per seipsam, ut dicunt : et est quoad intellectum quasi Deus incarnatus, qui perfectionem habet ad omnia scienda ex seipso. Aliquando autem est minor nobilitas hujusmodi : et illi sunt bene addiscentes ab aliis, et multaveniunt, sed non sciunt omnia ex seipsis : et sic est talis descensus donec invenitur anima quæ nihil potest scire, nec ex se, nec ab alio. Talem autem separationem intellectus agentis dicunt etiam sequi potentiam animæ operativam. Cum enim ipsa (ut dicunt isti) non sit immixta corpori, erit elevata super naturam corporis sui et naturam aliorum corporum. Omnis autem motor elevatus supra naturam, agit in eam et mutat eam sicut intelligentiæ mutant orbem et totam naturam generabilium et corruptibilium : et hujus signum dicunt esse festinationem et virtutes magicas, in quibus (ut asserunt) anima unius operatur in corpus alterius hominis et animam, et impedit operationes ejus et imprimit suas. In hoc etiam dicunt esse no-

bilitatem majorem et minorem : in tantum enim posse animæ dicunt aliquando congruere intelligentiæ cœlesti, quod mutabit materias corporum sicut voluerint : et tunc faciet ille homo mirabilia et per gradus et descensus, donec inveniatur homo cujus anima minimarum et paucarum est operationum in proprio corpore.

Isti igitur dicunt, quod prophetiæ et somnium præostendenda futura sunt in animabus nobilibus separatis agentibus, in quarum corporibus organum imaginationis optime est complexionatum et compositum et commensuratum et universaliter remotum secundum quod possibile est a nocentis. Ferunt autem per hunc modum, quod lumen intelligentiarum et splendor illustrat eas, et agit in eis formas futurorum effectuum aperte vel metaphorice, sub quibus futura prævidentur et prædicuntur. Et si quæritur ab eis, per quam conformitatem animæ sic imprimuntur et formantur ab intelligentiis? Dicunt quod propter rationem congruentiæ anima tales splendores nata est suscipere per rationem ordinis naturæ : quæ intelligentia est ut agens, et anima sicut instrumentum nata est influere : nec in talibus exigitur contactus corporum, eo quod sunt incorporea : contactus autem est corporum. Ista autem est sententia Algazelis in fine *philosophiæ suæ*, et Avicennæ in *prima philosophia sua*¹ : in quibus locis isti duo de prophetis et prophetiis loquuntur.

Sed mirabile videtur si ratione philosophica probari potest quod dicunt. Si enim talis est differentia animarum, oportet quod hæc differentia a corpore non possit causari : quia extra ipsum est, ut dicunt. Constat enim quod non causatur a materia et substantia animæ : quia tales diversitates anima secundum

¹ AVICENNA, In prima philosophia, tract. x, cap. 2.

quod in sua substantia consistit, non habet : relinquitur ergo quod causatur ab eo qui facit animas, secundum eos, hoc est, ab intelligentia. Tunc ergo differentia animarum causabitur a diversitate intelligentiarum : et ex hoc sequitur, quod aut animæ nobiliores et minus nobiles sint diversarum specierum et ordinum sicut intelligentiæ : aut quod res ejusdem speciei causentur per se a rebus diversarum specierum. Et horum utrumque est inconueniens : quia si animæ sunt diversarum specierum, tunc cum ipsæ sint formæ substantiales hominum dantes eis speciem et rationem, erit homo diversarum specierum : et hanc consecutionem jam ante nos intellexit Averroes dicens, quod si homo est omnia sciens per se et extra corporis sibi conjuncti materiam generatorum mutans ex natura, ille erit æquitate dictus homo nobis qui talem non habemus scientiam, neque talem virtutem agendi materiam generatorum.

Amplius autem quale est hoc, quod dicatur animam non esse in corpore, sed illustrare tantum ipsum? si enim nullo modo sit in corpore, non esset aliquo modo corporis forma et hominis : quod falsum est, cum dicat Aristoteles in X *Ethicorum*, quod homo solum est intellectus. Sed quia multa nos jam diximus de conjunctione et separatione intellectus cum corpore in tertio de *Anima*, ideo illa dimittimus hic. Hæc autem adhuc avertimus huic disputationi, quod per philosophiam haberi non potest, quod incorporea substantia substantiam incorpoream producat et in eam agat : neque enim ad hoc sufficit congruentia naturæ, sed exigitur quod per aliquid virtus agens et forma veniat ab agente in patientem, et iste modus ab his non est assignatus. Propter hoc igitur et his similia fabula videtur dictum Avicennæ et Algazelis.

CAPUT VII.

Et est DIGRESSIO declarans quæ sunt de opinione Averrois, Alfarabii, Isaac, et de improbatione ejusdem.

Averroes autem, Alfarabius et Isaac Israelita probabiliorem de dictis dederunt sententiam. Dicunt enim isti animam esse perfectionem corporis, et ex corporis differentiis in bonitate et malitia complexionis esse differentias animarum secundum nobilitatem et ignobilitatem operationum suarum : intelligentias autem agentes cœlestes, sicut et Avicenna dicit, animabus lumen affluere, et eas de scientiis per principia scientiarum, de futuris contingentibus aliquando per prophetiæ habitum illustrare. Cum autem formæ et intelligentiæ sint universales, et phantasmata in quibus futura apparent, sint particularia objicientes sibi quomodo intelligentia habens formas universales simplices, dat particulares et imaginabiles. Solvunt dicentes quod hoc sæpe contingit, quod duas formas habet in uno modo, et accipiens accipit eam in alio modo : quia, sicut sæpe dictum est, non accipit eam secundum potestatem dantis, sed secundum potestatem accipientis : et ideo formam quam habet intelligentia universalem, recipit anima somniantis particularem et imaginabilem. Et de hoc dant exemplum, quoniam nos videmus quod omnes formæ quas explicat motus cœli, sunt in cœlo uni-

versales : et cum in elementis recipiuntur, sunt determinatæ : et materia rei generabilis recipit particulares et determinatas ad hoc vel illud significatum in rebus naturæ. Similiter igitur dicunt fieri in impressionibus animæ ab intellectu orbis : quoniam quidem has recipit aliquando intellectus universales et simplices : minus tamen quam fuerunt in intelligentia, et easdem effingit imaginata ad modum suæ possibilitatis et quantitatis et figuram determinatam et significatam. Tale igitur est dictum istorum Philosophorum, ut videtur ex dictis eorum.

Videntur autem inconvenientia plura sequi ex dictis eorum. Jam enim alibi diximus, quod cum dicitur quod intelligentia est plena formis, et quod intelligentia est quæ habet formas universales, et est alia quæ habet formas speciales et particulares, quod hoc dictum est de formis prædictis quas explicant per cœli motum : hoc autem quod tali motu influitur, corpus primo tangit, et post hoc animam : et sic non convenienter videtur esse dictum, quod anima illustretur splendore formarum ab intelligentia agente separata.

Adhuc autem cum nos sciamus talia futura aliquando etiam divinari per astrorum motus, videtur quod primus afflatus hujus scientiæ notitiæ sit ex corpore cœli, et non ab intelligentia sola. Et quod omnibus contingit inconveniens, sequitur etiam ad dictum istorum, quod videlicet assignatur communicatio et explicatio intelligentiæ agentis in animam secundum modum illustrationis quam dicunt : et ideo modus talis impossibilis esse videtur.

Amplius sicut in libro de *Intellectu et intelligibili* diximus, una est forma prima quæ procedit ab universitatis principio, quæ etiam explicatur ab omnibus motoribus cœlestibus, sive sint simplices, sive compositi ex movere et mobili : quæ quanto plus procedit in distantia moventium et eorum quæ moventur,

tanto plus multiplicatur et determinatur per divisionem, et contrahitur ad esse determinatum : et si talis est forma quæ est in intelligentiis, videtur talis forma nihil conferre ad scientiam futurorum, etiamsi imprimatur in anima, eo quod est forma operis et non scientiæ alicujus futuri vel alterius. Propter hoc igitur et his similia non videtur mihi dictis istorum Philosophorum penitus esse adhærendum.

CAPUT VIII.

Et est DIGRESSIO declarans opinionem Stoicorum, et de improbatione eorumdem.

Plato autem et Socrates præceptor ejus, sed et illius præceptor in philosophia Dionysius academiæ præcipuus Stoicorum, dicunt concorditer omnes a comparibus stellis animas descendisse, et in se habere differentias nobilitatis et ignobilitatis secundum differentiam istarum stellarum : et ideo habere differentias intellectus et imaginationis quas supra diximus.

Dicunt autem isti somnia animarum esse per substantias quæ *dæmones* ab eis vocantur : visiones autem per deos corporeos, et prophetias per deos incorporeos, qui solo intellectu (ut dicit Apuleius in libro de *Deo Socratis*) vix contemplatur homines mortales. *Δαίμων* autem *sapiens* in Græco dicitur : et, sicut videtur Apuleius velle, dogma Platonis est esse

quasdam substantias separatas in aere, quæ mortalium animas ad conceptum iræ et concupiscentiæ immutant, et imprimunt in eas formas quas volunt : et forte istæ substantiæ sunt quas intellexit Orpheus, quando dixit aerem istum plenum esse diis. Sed partem illam opinionis quæ dixit animas a comparibus stellis descendere, jam improbavimus, et iterum perscrutandi de hoc subtiliter tempus erit in *prima philosophia*. Sed hic solum præsentem tangit materiam, qualiter dii invisibiles et incorporei sint, sicut dicit Junonem, et Minervam, et Plutonem, et hujusmodi, suas formas imprimunt in animas, cum nulla sit communicatio sive applicatio inter tales deos et animas. Idem est autem de his quos vocat *dæmones*, qui formas sensibiles imprimunt animabus. Non enim sufficit dicere tam dubia tantum, sed oportet probationem adhibere : et hæc quidem nullus Platonico- rum fecit.

Tullius vero in tantum innititur huic opinioni, quod utitur eo tamquam famoso in quo senserunt sapientes, et ex illo probat esse deos in libro de *Natura deorum* : eo quod sibi videtur incredibile, si aliquis dicat non ex diis hujusmodi fieri revolutiones. Nam etiam divinatio ex diis nomen accepit : eo quod divinatio non nisi per deos fiat, sicut asserit. Propter quod etiam multa valde narrat somnia, quæ expressam de futuris dabant significationem : et, ut breviter dicatur, omnes Antiqui in hanc opinionem sentire videntur.

Nos autem in hoc opere tantum physice loquentes, videmus ex physicis nullo modo posse probari a diis vel intelligentiis hujusmodi influentias somniorum venire in animas. Scimus enim, quod omnium generabilium et corruptibilium motus reducantur sicut ad causam ad motum orbis : hic autem motus non est motoris simplicis, sed potius est motus motoris compositi ex motore et mobili, sicut satis tam in *physico auditu*, quam in libro de *Cælo et Mundo* demonstratum est.

Quidquid autem virtutis in tali composito movente est, non potest ad locum generatorum et corruptorum venire, nisi sit vehiculum quod vehat ipsum, sicut spiritus vehit virtutes animæ per totam materiam quæ subjacet moventi animæ. Nec invenimus umquam probatum per philosophiam, quod intelligentia simpliciter per se physice aliquid agat vel causet : quoniam mobile ad hoc datum est ei ut hoc sit medium ejus, quo ut instrumento possit movere corpora, dum virtus ejus per corporeum influitur instrumentum. Oportet ergo quod lumen radiale diversimode figuratum advehat nobis omnes virtutes orbis. Sic igitur nihil fit, ut videtur, per deos : et inutiles sunt ad prævisionem futurorum. Ponere autem dæmones in aere habitantes, et ad nos venire, et nobis præostendere futura, omnino absurdum est : substantiæ enim illæ non ponuntur, nisi ut principia quædam generatorum : nos autem jam sæpe ostendimus, quod virtutes cœlestes cum activis et passivis qualitatibus elementorum sufficienter generant omne quod est generabile et corruptibile : et ideo iste sermo non est secundum rationem dictus. Adhuc autem nos invenimus alias scientias divinantes, quæ omnes innituntur motibus astrorum, et invenimus quoniam frequentius, ut dicunt, adveniunt. Igitur hujusmodi præsignatio occultorum non est a diis, vel dæmonibus, sed a causis naturæ, aut per se, aut per accidens evenire.

Sed forte objiciet aliquis, quod frequenter præsignantur in somniis et visionibus et prophetiis ea quorum non est causa natura, sed voluntas : hæc autem per signa causarum naturalium sciri non possunt : ad illos ergo etiam naturalis inclinatio eorum non movet, et sic per talia somnia non sciuntur, sed per immisionem a diis vel a Deo factam.

Ad hoc autem Aristoteles videtur dicere, quod talia sunt per accidens, eo quod somnium neque per simulacrum causæ, neque per simulacrum signi præ-

Objectio.

Solutio.

ostendit illud. Sed hæc responsio mihi nulla videtur : quia si ita esset, ut dicitur, non posset haberi ars aliqua talia somnia interpretandi : id enim quod est per communiter accidens, non est terminabile per artem, quia infinitum est. Nos autem experti sumus veritatem esse in arte interpretandi somnia, et quæ sit veritas utrum necessaria vel contingens : et si contingens, quam rationem contingens habeat, inferius determinabimus.

Dicamus igitur, quod licet propositum et voluntas sint causæ per se operum nostrorum quibus non sit necessitas ad aliter movendum quam volunt, tamen hæc secundum inclinationes subduntur causis universalibus superioribus et naturæ : et ideo inclinantur ab his ad aliquid volendum, sicut inclinatur alicui injacens passio timoris vel concupiscentiæ voluntatem, quod aliquid vult, quod liberatus ab hujusmodi passione nequaquam vellet, et est adeo violentum, quod licet non imponat necessitatem, tamen fere totam trahit hominum multitudinem : omnes enim fere sequuntur passiones magis quam rationem. Per eundem autem modum trahit vis ex stellis versa ad nos, licet non percipiamus eam nisi in somnis quando quiescimus ab operationibus et passionibus aliis. Hæc autem omnia magis erunt plana in sequenti : sed nunc in tantum dictum est, quod non est necessarium diis attribuere vel intelligentiis, si volumus physice loqui de istis.

CAPUT IX.

Et est DIGRESSIO declarans plane causam somniorum in quibus est divinatio.

Quia igitur in operationibus Antiquorum non invenitur convenienter dictum esse, videtur dicendum quod sicut probatur ex octavo nostro quod de *physico auditu* fecimus, quod homo et animal quod habet virtutem se movendi, est quodammodo imago mundi, præcipue cum hoc convenit homini, qui secundum virtutem habet intellectum moventem, sicut et orbis qui ab intelligentia movetur. Est enim in homine quod movet per se et indivisibile et immobile per se existens : et est in eo quod movetur ab ipso divisibile et motum, corpus videlicet cujus passionnes veniunt ad animam, sicut et e converso passionnes animæ deveniunt ad corpus. In superioribus autem ita esse diximus, quod quibus superior motor influit super inferiorem et virtutem et formam quam explicat per motum : aliter enim non esset exitus universitatis in uno et eodem principio. Secundum hanc igitur convenientiam ordinis, cum homo sit quoddam ex motore et moto compositum ultimi ordinis, oportet quod omnia superiora influant ei virtutes et formas practice moventes. Cum autem talis influenza etiam fingentibus difficilis sit, nisi ponamus vehens lumen quod ad nos defluit ab orbe, sicut in libro de *Anima* diximus lumen radiale stellarum esse qua-

litem influxam elementis, et in ipso esse virtutes superiorum motorum, quæ ab unoquoque passivorum inferiorum percipiuntur, secundum quod congruum ex natura et possibile fuerit unicuique. Hac autem forma sic defluens in ea quæ sunt susceptura ipsam, efficax est ad movendum plus quam alia passio moveat voluntatem ad timendum vel concupiscendum : et, ut generaliter dicatur, ad prosequendum aliquid vel fugiendum ab ipso : quod ex hoc probatur, quod nisi ista forma a commixto ex elementis suscipitur, qualitates elementares non operantur nisi sicut instrumenta ipsius, et materia alteratur : et tunc dirigitur ad speciem in qua forma cœlestis prima in actu efficitur : propter quod fortior est in movendo, quam qualitates elementares vel forma quæ prius fuit in materia.

Videmus etiam, quod cum ipsa simplex sit et unita, statim illapsa commixto operatur plures virtutes, et multiplicat eas secundum quod indiguerit ad speciem secundum se inducendam. Hæc omnia sæpius a nobis sunt declarata.

Videmus etiam has formas quandoque ad vitam animalis terminari secundum congruentiam esse quod inveniunt in materia. Similiter igitur per omnia videtur dicendum, quod formæ cœlitus evertæ ad nos, corpora nostra tangentes fortissime movent, et suas imprimunt virtutes, licet non sentiantur propter exteriorum tumultum : et ideo quando alienatio fit a sensibus, quocumque modo illud fiat, tunc percipiuntur motus sicut patiens percipit motum passionis, licet non moveat ut passio, sed potius ut signum, et quædam causa futurorum : anima autem imaginativa ad quam pervenit motus huiusmodi formæ, recipit motum secundum modum possibilem sibi, et hoc est ad formas imaginationis. Quærit igitur formas simulacrorum quibus explicabitur talis forma, sicut quærit formas quibus explicatur amor venereorum, in eo quod a tali detinetur concupiscentia, ad præparationem talium imaginum inclinat

forma cœlestis injacens somnianti et movens eum ut faciat vires corporis et animæ sibi instrumentaliter deservire, sicut facit in materia quam movet ad alterationem et generationem, sicut diximus superius : et ideo talibus instrumentis multiplicantur multa simulacra, sicut in materia multiplicantur et multa agentia sub ipsa : et ex materia est, quod fit somnium multorum factorum et dictorum, in quibus demonstratur cœlestis formæ explicatio.

Hujus autem exemplum est videre in forma artis : quoniam hæc est species operis, et ubi procedit in materiam artificiatam, multis utitur instrumentis : et hæc eadem movens animam artificis, movet virtutes ad imaginandum figuras omnium convenientium ad hoc ut in artificiatum producat. Istud igitur est dictum propheticum, cui annectimus adhuc duo capitula ut fiat magis manifestum.

CAPUT X.

Et est DIGRESSIO declarans modos quibus hæc forma movet videntem aversum a sensibus.

In primo autem volumus determinare tredecim modos quibus talis forma sigillatur in anima somniantis vel aliter prævidentis secundum sui diversitatem.

Prima habet, quod expressius vel minus expresse percipitur ab eo quod movet : aliquando autem secundum infimum gradum suum non manifestat se, nisi in

quadam animi confidentia, qua homo concipit quamdam audaciam et certitudinem aliqua prædicendi et faciendi : cum tamen super hoc nullam habeat imaginationis conceptionem vel intellectus : et ideo est, quia forma cœlestis non tangit nisi virtutes motivas hominis illius, et non elucet in cognitis nisi implicite et confuse : quia videlicet cor dicit homini sic debere evenire vel aliter secundum quod instigatur a proprio corde. Hic igitur est unus et minimus gradus virtutis cœlestis, et frequenter fallens : eo quod aliquando quis concipit phantasiam ex aliis accidentibus complexionis vel corporis, et non habet ordinem talem ad futura, nec tale auxilium sicut habet a cœlesti forma.

Secundus gradus est, quando affectus formæ et motus pervenit ad animam secundum lucem indistinctam et confusam quæ determinari ex suis simulacris non potest : et in talibus præparantur simulacra non bene representantia et valde aliquando inconvenientia : et ideo sub illis expressa visio similibus non intelligitur : et vix est qui eam possit explicare, sicut et Plato ait quemdam somniasse quod moreretur, et prolongabatur ejus vita.

Tertius autem gradus hujus formæ est, quod movet adeo expresse quod per metaphoras convenientes exponitur, et ista sunt somnia quæ sapientes interpretantur, et ad quæ inventa est ars interpretandi in scientiis magicis.

Quartus autem gradus est, qui quidem in nullo attolleretur super imaginationis actum, sed tantum somniat non metaphorica sicut res evenit, sicut fuit in somnio quod narrat Tullius in secundo de *Natura deorum*, quod cum duo incaute hospitati fuissent, altero dormiente recessit ab eo aliqua occasione vigilans socius : et cum dormiret ille qui remanserat, apparuit socius petens auxilium, eo quod jam nisi juvaretur, jugulandus esset : et ille non reputans somnium, rursus dormivit, et iterum per omnia eandem vidit visionem quam prius, nisi quod socius ut ei

citius auxiliaretur, instantius quam prius rogare videbatur : sed neque tunc reputans, tertio dormivit, cui socius apparuit cum querela magna dicens se jam jugulatum esse et in crastino in plaustro fimo funeri superposito fore extra portam portandum et projiciendum, ut celari posset homicidium, rogans ut summo mane cum iudice ad portam illam pergeret, et de nece sui ultionem expeti faciat in eum qui tanti fuerat minister sceleris. Surgens autem mane vir qui somnium viderat, narravit sicut viderat in somnis.

Ego etiam somniavi me stare super ripam cujusdam fluminis, in quo suspensum super aquam fuit molendinum, videbaturque mihi, quod puer in aquam caderet, et veniens ad rotam molendini deprimeretur, et necaretur ibidem. Evigilans autem cum hoc sociis referrem, antequam finita esset recitatio, nuntiatur adesse mulier magno ejulatu nuntians hoc idem per omnia quod videbatur in somniis : cum tamen et mater et puer omnino fuissent ante hoc mihi incogniti, neque umquam noveram vel videram easdem personas.

Quintus autem gradus est, quando jam movet quidem phantasiam, et videtur ei assistere aliquis explanans quod videtur, non quod expresse, sed in verbis et figuris. In tali enim visione aliquis elucet intelligentiæ radius, licet non sit depuratus a phantasmatum permixtione, sicut frequentissime omnibus fere evenit hominibus : et ideo de hoc non oportet ponere exemplum.

Sextus autem gradus, quando movent quidem simulacra, sed elucet quidem expresse intelligentiæ actus per modum docentis alicujus, qui docet recte futuram visionis significationem. Causa enim hujus est, quod intelligentia pro certo soluta est simpliciter, et ligata tamen quoad quid, quod videlicet lucem sui luminis accepit tamquam a quodam alio docente : et hoc vocaverunt Philosophi *splendorem intelligentiæ desuper descendentis in animas somniantium*, attribuentes fi-

guras simulacrorum cœlestibus corporibus, et splendorem intellectus intelligentiæ moventi. Quod ego non inficior esse verum, dummodo dicatur intellectus provenire ad actum ex motu formæ descendenti de cœlo, et non ita quod intelligentia superior ingerat lumen animæ sine aliquo vehiculo corporali. Hujus autem exemplum est forma pulsus in homine : species enim pulsus tangit quidem corpus : et cum ab anima sapientis percipitur in ea, dispositio animæ ejus est pulsus et modus suæ vitæ. Sic igitur etiam in forma movente in somniis vel aliis visionibus est forma corporis : et ex hoc tangit corpus. Est enim in ea vis et lumen intelligentiæ agentis : ex quo etiam illustrat et afficit mentem intelligentis, et diffundit lumen super significationes simulacrorum.

Septimus autem gradus est, quando adhuc in somno vere et expresse apparent intelligentiæ sine simulacris : et tale videtur fuisse somnium Scipionis de colentibus justitias, quod ad æthereas sedes recipiantur. Causa autem talis somni est fulgor intellectus agentis et splendor, qui sua radiatione ad se totam animam trahit, et avertit ab imaginum motu : intentio autem animæ quando tota fertur ad intellectum et excellenter est in ipso, distrahitur a consideratione sensibilibus in vigilia, et a perceptione imaginum in somno : talis autem in somnio frequenter optimas invenit intelligentias et demonstrationes quas in vigilia invenire non poterat, dum exterioribus sensibus vel imaginibus detinebatur : et propter hæc tria genera somniorum a Philosophis natura deorum probatur, et præcipue ab Epicureis et Stoicis : quia omnia hujusmodi somniorum genera, sicut quintum, sextum et septimum, per numina in somniis hominibus existentia fieri arbitrantur. Scias autem, quod etiam forma movens venit a corpore, sed potentior intellectus animæ talis, qualem diximus superius esse sapientis animam, nimia luce intellectus ex forma concipit veras intelligentias :

et hoc est quod dicit Aristoteles, quod aliquando in somniis sunt veræ intelligentiæ : et huc usque et non ultra procedit visio somnialis.

Octavus autem gradus est, quando forma cœlestis est adeo fortis, quod movet in vigilia aversum a sensibus et retrahentem sensus intra se, sicut superius exposuimus : sed tamen non ostendit se nisi in simulacris obscuris : et iste gradus respondet secundo superius dicto. Sed in hoc omnes præcedentes excellit, quod movet in vigilia quod fortius est multo quam illud quod movet in somno : eo quod minus ligati sunt sensus in vigilia, licet sint ad interius retracti quam in somno : et ideo non prævaleret tunc exterioribus motibus sensuum, nisi esset fortior omnibus prædictis : et talia visa movent corpora animalium vigilantium : et tunc in motibus eorum præsignificat aliquid futurum, quod student augures scire et conjecturare : super tantum enim rationis fundata est augurii divinatio.

Nonus autem gradus, qui respondet tertio, quando videlicet vigilantia averso a sensibus occurrit imaginatio futurorum et ex forma cœlesti movente per formas expressas et de facili adaptabiles : et talia sunt visa melancholicorum et alias amentias patientium, quando avertuntur a sensibus. Sunt tamen sine aliqua sensuum illustratione : et in hoc sane fortiores præhabitis, quod vigilantes movent : et tales visiones frequentissime occurrunt infirmis.

Decimus gradus est sumptus juxta septimum : quoniam et imagines habet expressas et aliquid luminis intellectus etiam mixti in partibilibus, quod est per modum instruentis et docentis : et tales sunt illi qui loquuntur et hominibus adstantibus sibi quibus se dicunt audire et verba instruentia significationes eorum quæ videntur.

Undecimus autem sumptus est juxta sextum, quando videlicet ex imaginibus soluto intellectu veras et expressas elicit intelligentias futurorum et aliorum occul-

torum : hoc enim descendit in animam ex minimo splendore intelligentiæ agentis et optima suæ imaginationis compositione.

Duodecimus autem est, qui sumitur juxta quartum, et ille est primus gradus prophetiæ, de qua Philosophi sunt locuti. Et ille est, quando videntur expresse imagines rerum futurarum, sicut eveniunt in vigilia aversis et interius retractis sensibus : talis enim prænuntiat occulta et futura : et inde est dictum Hermetis, quod talis homo habet spiritum divinum : et Socrates dicit omnino divinam esse hanc occultorum scientiam.

Decimus tertius gradus complementum est prophetiæ, quando bona occulta per cœlestium instinctum sic præconcepit, quod veram intelligentiam de his habet etiam absque magna sensuum aversione : et iste gradus est summus humanæ animæ.

Hos tredecim gradus absque dubio in nobis experimur, cum etiam a diversis Peripateticis ante nos sunt notati.

CAPUT XI.

Et est DIGRESSIO declarans qualis sit forma illa, et quare sic nominetur.

Non est autem ignorandum, quod hæc forma quæ quasi formalis et agens est omnium formarum inferiorum, eo quod omnes virtutes materiæ sibi instrumentaliter deserviunt, a nonnullis Platonicis convenientissime nominata est *forma ordinis et explicationis cœlestis et univer-*

saliter agens. Dicta autem est *forma ordinis*, quia cum multa sint ordinata ad hoc quod fiant in effectu ipso, omnia illa informat, sicut ars informat instrumenta ad agendum et materiam similiter. *Explicationis* autem *forma* vocatur, quia sic effluxa a cœlestibus virtutibus, elementorum et materiæ dispositionibus explicatur. *Universaliter* autem dicitur *agens*, quia in toto ordine suæ explicationis ipsa est primum agens in materia : et omnia alia virtute ipsius agunt quidquid agunt : eo quod ipsa, sicut sæpe diximus, est virtus formalis in materia quæ format omnia et dirigit ad hoc ut ad formam agant. Cum autem sic proficiscatur a cœlestibus, et cœlestium harmonico motu, multiplicis est virtutis, eo quod effluit a multitudine motorum et orbium in se concordantium ad talis formæ effluxionem : multiplex autem habet et accipit esse ex corporibus, per quæ sicut per media, et in quæ sicut in ea quæ afficit, deveniens, et ex illis potest confortari vel debilitari, ut plus vel minus moveat corpora quæ afficit, similiter et animas. Propter quod dicit Ptolemæus, quod cœlestis effectus juvatur a taliter disponentibus subjectum ejus, sicut juvatur semen terræ aratione et fimatione, et omnino frequenter unus movetur talibus formis, et non alius, propter differentem suorum corporum et animarum dispositionem similem vel contrariam. Cuicumque autem hoc contingit, quod corpus ad idem cum forma talis ordinis est dispositum et animæ passiones, statim ad idem ille ad hunc ordinem explicationis tribus inclinatur moventibus : et ille somniat fortius : et tales sunt visiones, quæ sunt provenientes simul ex cogitatione et revelatione cœlesti. Et forte propter cogitationem et desiderium vel timorem vel aliam passionem fingit phantastica simulacra plura quam moveat forma cœlestis : et tunc somnium illud in parte est inane, et in parte significat, sicut frequentissime in somniis solet evenire.

Nec lateat nos, quod illa forma sit mo-

Corpora superiora non necessitant inferiora.

vens, licet afficiat corpora, tamen non imponit necessitatem. Est enim illa forma causa remota, ad cuius causalitatem appropriandam plura exiguntur in elementis et elementatis, antequam ad actum perveniat ultimum, ex quorum quolibet impedita potest evacuari : cum tamen in primis moventibus verissime significavit aliquid futurum, quod absque dubio evenisset, si concreata cum ipso ad concurrendum concurrissent : sed in his fuit impedimentum : et ideo dixit Ptolemæus in *Almagesto*, quod stellæ movent per aliud et per accidens : et non de necessitate evenit illud ad quod movent, intelligens quod *per aliud* : quia movent per media alia corpora, in quibus multum mutantur virtutes earum. *Per accidens* autem movere dicit, quando movent per quædam quæ nisi communicantia fuerunt, et organice sub ipsis moventia, iterum non eveniunt. Propter quod præcipit, quod divinans in astris non faciat nisi iudicium commune : quia non nisi formam communem non appropriatam elicere potest ex astris : appropriatio autem est commixtionis et materiæ et virtutum agentium et patientium quæ sunt in materia : et ista per astra non sciuntur, sed ex physicis rationibus. Propter quod ipse etiam præcipit, quod doctus iudex astrorum non sit imperitus in physicis. Sicut autem omnium cælestium effectus semper variantur ad motum planetarum, horas climatum et climata : ita etiam fit de motu formæ de qua diximus, et quod præcipue variat, hic est diversus situs cælestium et climata. Et ideo in arte interpretationis somniorum magis præcipiunt in diversis et certis horis aliter et aliter interpretari somnia, et præcipue secundum mansiones lunæ et accessiones, eo quod illa ut vicina corporibus generatorum existens, plurimum habet dominium mutandi corpora. Demonstratur autem hoc in menstruis, et aliis infirmitatibus, quæ præcipue periodum sequuntur lunæ.

Ex prædictis autem patet, quod etiam

quando somnium aliquid signat, tamen frequentissime non venit propter causam jam dictam.

Ex prædictis etiam patet, quod solum homo vere somniat, et videt alias visiones : quoniam licet phantasmata in aliis moveantur animalibus, tamen non ordinate : ordinem enim quo phantasia hominis ordinat directe ea quæ faciunt ad explicationem formæ cælestis ad actum procedentis, habet imaginatio ex conjunctione sui cum anima intellectuali : propter quod ipsa est majoris potestatis : et ideo alia animalia non habent nisi corticem somniorum, ut optime dicit Averroes : et cum somniant et alia faciunt ad formæ cælestis inclinationem, tunc tamen hoc ipsum non percipiunt : nec hoc est eis causa operationum, sed agunt a forma cælesti, sicut a quadam natura. Propter quod etiam cælestis effectus circa motus eorum citius manifestatur, quam circa actus hominis : quia homo sollicitus circa propria non percipit motus qui sunt in seipso : et ideo non agitur ab eis ad aliquid, sed alia animalia percipiunt et agunt statim, nisi forte insecutio vel fugatio ab homine facta, impediatur. Propter quod præcipitur in augurio, quod talium animalium motus et garritus attendatur : quia illa sunt, ut dicit Ptolemæus, stellæ fere ex quibus frequenter futura prævidentur.

CAPUT XII.

Et est DIGRESSIO declarans qualiter sit aliquis propheta secundum naturam et prophetiam, et qualiter somnium est quidam casus a prophetia.

Omnibus his quæ dicta sunt habitis, non est difficile scire quid sit prophetia apud Philosophos, et utrum qui prophetizat, continue remaneat propheta vel non : et qualiter sibi observandum est tempus prophetiæ. Naturam enim et habitum prophetiæ ille habet, qui optime dispositus intellectu agente separato, bonum et perfectum adeptus est organum imaginationis, quod intellectui formas subministrando deservit, sicut diximus.

Hic autem absque dubio ad actum prophetiæ nequaquam deveniet sequens passiones concupiscentiarum corporali-um, et timores rerum variarum, et gaudium detentus exteriori, et sollicitudine et tristitia exagitatus : hæc enim omnia inclinant ad imaginandum alias formas : et ideo non percipit in se talis homo lumen et actum prophetiæ quem habet in naturæ aptitudine : et si multo tempore talibus fuerit passionibus detentus, immutabitur ab eo complexio sui corporis,

et per consequens etiam immutabitur organum imaginationis, et tunc etiam amittet ipsam naturæ ad prophetizandum habilitatem. Si autem studuerit virtuti, intellectivæ maxime, et scientiis, et solitudini, et liberaverit animam a curis sæculi, et aliena non curiose investigaverit, sed potius se intra seipsum recluserit, et dederit operam scientiis aliis in quibus multum abstrahitur intellectus, tunc absque dubio de facili manifestabitur ei pulchritudo cælestis in omnibus his quæ ab orbe fluunt ad regimen eorum quæ generantur et corrumpuntur. Et hoc est quod dixit Ptolemæus in *Disciplina proverbiorum* : « Excellentior in hominibus est, qui non curat in cujus manu sit mundus : excellens enim et altus inter homines est, qui tale fastigium intellectus et imaginationis per naturam est adeptus : et ille ad actus prophetiæ deveniet, si curas abjicit, et circa mundana nihil prorsus cogitat gaudente, vel tristando, aut timendo, vel sperando : ille enim non curat in cujus manu sit mundus. »

Est autem et aliud genus visionis et prophetiæ secundum altissimos theologos qui de divinis loquuntur inspirationibus, de quibus ad præsens nihil dicimus omnino : eo quod hoc ex physicis rationibus nullo modo potest cognosci : physica enim tantum suscepimus dicenda, plus secundum Peripateticorum sententiam persequentes ea quæ intendimus, quam etiam ex nostra scientia aliquid velimus inducere : si quid enim forte propriæ opinionis haberemus, in theologis magis quam in physicis, Deo volente, a nobis profertur. Per hunc modum primo surrexit prophetiæ Socrates in Academia : propter quod dicit Apuleius in libro de *Deo Socratis* : « Non mirum si Socrates vir apprime perfectus, et Apollinis quoque testimonio sapiens, hunc Deum suum cognovit et coluit, quem videlicet mente sic contemplatus est, omnino clausis sensibus. Propterea et ejus custos prope, ut ita dicam, par contubernio familiaris

cuncta quæ arcenda sunt, coercuit, et quæ cavenda præcavit, et præmonenda præmonuit : sicubi tamen omissis sapientiæ officiis, non consilio, sed præsagio indigebat, præsagium habuit, ut in dubitatione sapientis et claudicans ibi divinatione consisteret. »



TRACTATUS II

DE CAUSIS SOMNIORUM IN NOBIS.

CAPUT I.

Quæ secundum rationem causæ aut signa sunt in nobis quantum ad dispositiones corporis?

Omnibus autem quæ præmittenda erant exsecutis, ad sententiam Aristotelis revertamur : quia illa modo planior et intelligibilior apparebit. Supposito enim ex prædictis, quod divinatio sit in somnis multis et aliis visionibus, dicamus quod ea somnia, quorum principium est in nobis, necesse est esse aut causas eorum quæ fiunt et in somniis

apparent, esse in nobis : aut signa si aliquem ordinem habent ad futura, et ad eas formas quæ videntur in somniis : aut si nullum habent ad hoc ordinem, tunc sunt accidentia communiter illis quæ eveniunt, sicut accidit me ambulante cadere montem vel domum.

Somnia igitur sunt in uno istorum trium ratione, aut forte in ratione duorum : tertium enim cum his non coincidit : quia quod per accidens est, raro est, et neque signum, neque causa. Dico autem *causam*, sicut dicimus eclipsis lunæ esse causam terræ interpositionem, et eclipsis solaris causam esse positionem lunæ inter visum nostrum et solem, et sicut putrefactio vel labor putrefaciens humorem est causa febris. Sic etiam sunt quædam somnia quæ causas habent imagines ignis. *Signum* autem vocatur quod designat aliquid, licet non sit causa ipsius sicut accensio directa lunæ ad modum capitis vel caudæ draconis, et directa subtractio, signum futuræ eclipsis : asperitas autem linguæ signum est febricendi, et somnium de gustu fellis signum est febris instantis. Signum autem, ut dicit Galenus, est respectu futuri, et respectu præ-

sentis, et præteriti : et hoc præcipue in somnis fit, in quantum divinando cognoscuntur occulta cujuslibet differentia temporis. *Accidentia* vero sunt quæ a casu et fortuna sic eveniunt, sicut aliquo ambulante convenit casu deficere vel eclipsari solem : ambulatio enim illius neque signum, neque causa defectus solis est : nec e converso defectus solis est causa vel signum ambulandi : et ideo nihil talium casualium et non per se accidentium nullum fit semper vel frequenter, sed raro valde et incerte, ut diximus in secundo de *physico auditu* ¹.

Dicamus ergo, quod quædam somniorum de quibus nullam in præhabitis fecimus mentionem, sunt causæ et signa passionum et operationum quæ circa corpus accidunt : et hæc sunt somnia quorum principia sunt in nobis. Propter quod etiam qui doctiores inter medicos sunt, dicunt quod oportet valde intendere somniis : quoniam etiam complexio et passio et accidens animæ et corporis bonum et malum frequentissime demonstratur in somnio. Sicut autem accidit in corpore, ita procul dubio conveniens est æstimare accidere in artificialibus, quæ quando operantur, intendunt ad aliquid : et de hoc occurrunt eis phantasmata. Et similiter est de fantibus, quibus etiam occurrunt ea in somnio de quibus fantur.

Causa autem somniorum potest esse et in corpore et in anima : et somnium illius erit demonstrativum ut signum : hoc enim in somno magis manifestatur quam in vigilia : cujus causa est, quia illi motus qui sunt talium humorum vel affectionum in die moventes corpus vel animam, nisi sint valde magni, forte latent, eo quod non sentiuntur propter majores motus corporis et animæ qui fiunt a sensibilibus in sensus agentibus in vigilando, etiam in die. In dormiendo autem fit contrarium : motus enim parvi

moventes corpus vel animam, magni videntur esse. Hoc autem manifestum esse probatur ex his quæ circa nos sæpius in somniis accidunt nobis : arbitramur enim fulgura cadendo micare, et tonitrua fieri, quando parvi soni in auribus nostris fiunt, et parva micant lumina, et melle et dulcibus saporibus perfrui videmur nobis, quando tenue et dulce phlegma a capite fluit ad linguam, et somniamus nos ambulare per ignem et calefieri vehementer parvo calore facto circa partes aliquas corporis : et præcipue si in interioribus corporis fit. Sicut somniavit quidam fundi sibi in ventrem picem ardentem, et se exæstare in igne picis, eo quod choleram adustam nigram incensam in ventre habuit : et hanc emisit, cum surrexit a somno. Postquam enim expergefacti sumus, sæpe nobis ipsis manifestum est, quod nulla alia causa fuit hujusmodi somniorum, nisi quod talis erat dispositio secundum passionem corporis vel animæ. Manifestum est enim, quod omnia principia sunt parva quantitate, licet magna sint potestate, nisi resistatur eis : sicut enim principia ægritudinum et aliarum passionum parva sunt : et ideo in vigilia ab eo qui circa alia occupatus est, animo nequaquam percipiuntur. Manifestum igitur, quod hæc principia debilis sunt motus primitus habentia et magis in somno quam in vigilia percipiuntur.

Sic igitur quædam somnia ab his quæ in corpore sunt passionibus et dispositionibus causantur, et ipsa nihil aliud quam talia in corpore existentia significant.

¹ II Physic. tract. II, cap. 15.

CAPUT II.

De his quæ secundum dispositionem animæ vel corporis sunt in nobis secundum rationem causæ vel signi.

Quædam autem phantasmatum quæ fiunt nobis in somnis, convenit esse signa vel causas nostrorum propriorum actuum vel negotiorum, quæ acturi sumus in vigilia, sicut et actiones ante factæ vel pertractatæ sunt aliquando causæ phantasmatum quæ postea apparent in somniis : neutrum enim istorum est irrationabile. Nos enim aliquando in rectitudine somnii existentes, quando somniamus non metaphorica quædam, sed in rei veritate sicut est, et sicut eveniet, conferimus et agimus somniando, quemadmodum debemus agere in rei veritate in futurum, vel quemadmodum agimus in præsentī, quando sumus in actione, vel quando egimus olim in præterito.

Causa autem est hujus, quia sicut a diurnis inchoationibus operationum in vigilia paratus erexit motus phantasmatis in somnio, sic et rursus necessarium est accidere, quod qui in somnio sunt motus, bene et utiliter in directione somnii sint præordinati frequenter, sicut principia diurnorum actuum in vigilia : eo quod bene sunt præparata rursus in somnio, et eorum intelligentia perfecta est in phantasmatis nocturnis.

Et tale fuit somnium, de quo dicit

Galemus, quod quidam dolens splenem sæpe contulit et ordinavit quod faceret, unde sibi contrarium splenis medicaretur, et somniavit quod mingeret super manum inter duos digitos auricularem et annularem : et cum evigilaret sic fecit, et convaluit : et sic somnium fuit sibi principium operationis diurnæ quam fecit in vigilia sequenti. Sæpe autem fiunt hujusmodi somnia : hoc ergo modo contingunt quædam somniorum, quorum principia sunt in nobis et causæ.

CAPUT III.

De somniis quæ casualiter eveniunt, et est cum neque sunt causæ neque signum eorum quæ fiunt.

Plurima vero somnia quæ non habent causam aliam nisi motum accidentalem phantasmatis, non contingit se habere ad eventum futurorum nisi sicut est per accidens et casu, sicut de his quæ procul circa ignotos nobis accidunt, sicut de navali bello Græcorum contra Phrygios. Somnia enim ex his dispositionibus quæ sunt in nobis, nihil de his indicant, et si dicantur aliquando aliquod malum præaugurare, et eveniat, sicut interpretatus est eventus : ille enim per accidens, et non ideo quod somnium causa vel signum fuerit illius. Conveniens enim est eodem modo esse de istis, veluti quando memoranti alicui de aliqua re, contingit quod hoc sit quod cogitet vel memoratur : sua enim memoria vel cogitatio illi

eventui nec dedit causam eveniendi, nec signum : sed casu sic accidit, quod nihil prohibet in somniis similiter accidere : quinimo magis conveniens est multa somnia sic evenire ut somniantur, quibus tamen eventibus somnium nec causa fuit, nec signum. Quemadmodum igitur meminisse de aliquo et hoc evenisse nec causa fuit sic accidendi, nec signum, postquam evenit, sicut somnium fuit : in veritate enim tale somnium hujus eventus nec causa, nec signum est, sed est incursum casualis. Et ideo multa talium somniorum non eveniunt : quia accidit talis concursus cum sit casualis, neque semper neque ut frequenter evenit hoc. Tamen totum de his somniis evenit quæ cassa fictione fiunt phantasie, et ex qualitate cibi causantur : illa enim valde sunt multiplicia et ordinata a confusione complexionis vel passionum vel ciborum trahentia originem.

Hæc autem omnia quia nullam ad futura ponunt causalitatem, aut non eveniunt, aut si eveniunt, non eveniunt propter hoc quod prævisa sunt, sed casualiter accidit : et hoc vocamus *incursum*, quando duo videlicet sibi convenienter concurrunt, unum præcedens et alterum quasi ex illo consequens : quorum tamen neutrum est signum vel causa alterius. Talia autem somnia signum habent quod inordinata sunt in seipsis, ita quod simulacra apparentia mutantur de forma in formam, sicut videtur alicui qui viderat homines qui statim mutantur in canes, vel in equos, et iterum in alias figuras.

Et hujus duæ causæ sunt, humiditas videlicet complexionis fortiter mota, sicut in pueris et in juvenibus, et vapor nimis motus ex vehementia caloris : tunc enim una pars vaporis consequitur aliam et frangit figuram ejus : et ideo multa simulacra resultant imperfecta : et ideo hæc duo genera hominum incertissima habent somnia.

CAPUT IV.

Quod somnia non a Deo immissa sunt, sed est causa naturalis ipsorum.

Quod autem quidam Stoicorum et Epicureorum dicunt, quod nisi a Deo immissa esse somnia, et nullum somnium ab aliquo fieri nisi a Deo, non habet veritatem. Cujus probatio est, quod quædam etiam alia ab homine alia somnia habent : quod non fieret si a Deo immissa essent, et aliam causam physicam non haberent. Si enim a Deo immitterentur somnia, et causam naturalem non haberent, tunc constat quod non immitterentur ad regimen vitæ. Causa autem talis regiminis non est in aliis animalibus : non enim est aliquod animal legale vel civile, nisi homo sicut in civilibus habet ostendi : et ideo si a Deo immitterentur ad regimen vitæ, non nisi homini immitterentur : igitur non sunt facta divinitus hujus, quod dictum est. Somniorum enim scientia et eruditio naturalis est, et ex naturalibus causata principiis, et non divina, quæ non nisi ex principiis causatur divinis, ut est Simoniades.

Signum hujus est, quod infirmi et quasi amentes homines et fatui, sicut melancholici, sunt optime futura prævidentes et recte somniantes frequenter, sicut evenit secundum rem ipsam, et hoc fit tanquam Deo non immittente somnia : quoniam sapiens Deus non immitteret imprudentibus et patientibus amen-

tias, sed sapientibus et optimis, sicut diximus superius : sed quorumcumque natura loquax est per multiplicia phantasmata discurrens, et qui secum cum soli sunt, loquuntur multum : horum enim natura multiplex est in phantasmatis, et est melancholica. Hi vident multiplices visiones et ordinatas aliquando, sæpe autem inconcinnas, maxime quando vigilant : et ideo etiam proferant inconcinnas orationes. Hi enim super infantibus sunt, et phantasmata eorum sunt fixe adhærentia, sicut inferius dicemus, et manifestantur in eis leves motus omnium quæ aliquo modo imprimuntur in corpus, sive ex dispositionibus aeris, sive ex revolutione orbium, sive propter passionem timoris vel concupiscentiæ : et horum omnium causam assignabimus inferius. Eo ergo quod tales circa plura et multiplicia moventur, nanciscuntur similia suis motibus theoremata, sive apparitiones et visiones : imaginativa enim semper imagines præparat ad motum qui factus est in corpore congruentes : de his enim melancholici habent fortunam in omnibus aliis, sicut infelicissimi, quod videlicet studiosi, et multa phantasmata inveniunt, et hæc conjectant ad futura.

Et hujus exemplum est sicut contententes rapiunt libenter : ita etiam isti quasi ex contentione rapiunt ista. Est autem hoc certum, quod melancholici propter multos motus sibi inhærentes quasi semper secum contendunt, et ex hoc rapiunt simulacra motuum et passionum diversarum : et ideo, sicut proverbio dicitur, quod « Qui multa et multoties jactat jacula, quandoque jactat dispariter signo, quandoque compariter : » ita accidit in his : tot enim vident, quod non potest accidere quando aliquod eveniet somniorum, quod vident : non enim omnia causantur a causis vel signis, quæ sunt in nobis et extra nos : sed multa sunt quæ casualibus accidentibus causantur : et illa non eveniunt nisi casualiter contingat, sicut in ante habitis determinatum est.

Sed dubitabit fortasse aliquis dicens non debere melancholicos fortuitos esse in talibus : quia frigidum et siccum non evaporat multum : et ideo non videtur multum movere phantasmata : melancholia autem est in extremo complexionis humanæ frigida et sicca. Quod si etiam vapor illud dicatur, non videtur esse multus et fortis, sed debilis et paucus.

Sed ad ista et similia facilis est responsio : quoniam vapor multus et fortis magis impedit visiones et somnia, quam promoveat : cujus signum est, quod immediate post cœnas dormientes, parum vel nihil somniamus. Calidum ergo paucum quod est in melancholicis, elevat vaporem et spiritum debilem. Quod si multus esset, consumeretur debilis spiritus : et quia calor non commiscet hujusmodi spiritum, ideo imagines bene tenent se in ipso : siccum autem melancholici complexionale est, et hoc in actu humidum et potentia siccum et virtute.

Adhuc autem non tollitur vaporabilitas : quoniam potius vaporat, et vapor ex siccitate tenet fortiter figuras imaginum : frigus etiam non omnimode est, sed conditionale. Hoc etiam facit ad bonam imaginum retentionem. Nullum autem istorum est causa multitudinis imaginum, quæ sunt in melancholicis : vapor enim et spiritus non nisi suscipiunt imagines, sed non causant et conferunt : ipsa enim imago est causa imaginum, et ipsa causa est multimodarum imaginum per facillimam ad omnes impressiones alterationem et motum. Et hujus causa inferius habebitur. Cum igitur ista conjuncta fuerint, sequitur quod melancholici multarum imaginum sunt, et multum in eis permanent : et ideo fere omnes amentias patiuntur : horum enim somnia sunt vaticinium habentia : propter quod a Deo sapiente ad regimen vitæ non videntur esse immissa, sed a natura causata.

CAPUT V.

Quare somnia in futurum aliquid in rei veritate significantia semper eveniunt?

Non autem est inconueniens secundum dicta ante, quod illa somnia quæ ut signa et causæ sunt eventuum futurorum, non eveniunt aliquando : videmus enim, quod multa signorum quæ sunt in corporibus nostris ex quibus prognosticantur medici, non eveniunt. Et similiter est in corporibus cœlestibus : hæc enim sæpe pluvias et ventos vel aliquod aliud futurum significant, quæ tamen non eveniunt. Et similiter est in auguriis, et omnibus scientiis divinationum : omnes enim illæ divinant ex signis : cum enim signum non sit nisi ex causa, vel ex causæ dispositione remota et communi valde, quæ per multa appropriari debet, antequam agat, si in aliquo mediorum appropriantium fiat fortior ad oppositum motus, tunc cassabitur primum, et non eveniet. Similiter autem si sint media disposita ad contrarium, ita ut primi apparentis motum non recipiunt, iterum non eveniunt. Verbi gratia : dicamus enim, quod signum cœleste vel aliud præsignat melancholiam et infirmitatem quartanæ : disponantur autem fortiter corpora ad sanguinem, et cassabitur motus causæ primo moventis ad quartanam.

Propter hoc dicit Bugufarus sapiens in

Commento super centiloquium Ptolemæi, quod homo sapiens et juvat et impedit cœlestem effectum virtute regiminis sapientiæ quæ est in eo. Quotiescumque ergo fortior motus supervenerit in mediis vel mediorum aliquo, quam ille est a quo sumptum fuit signum futuri eventus, non evenit quod vaticinatum est. Hujus enim exemplum videmus in humanis per nos operabilibus : in his enim optime consulta quæ fieri expedit, mutantur propter digniora consilia supervenientia, vel propter alios diversos casus emergentes : in omnibus enim talibus per multa impeditur primum quod inchoat futuri significationem : et universaliter dicendo non omne contingens fieri in futurum eveniet : quamvis enim sit natum et dispositum ad unam partem, non tamen propter hoc semper eveniet contingens illud quod futurum est fieri, neque in id quod se habet ad utrumque : tales tamen remotæ causæ sive dispositiones causarum a quibus sumuntur hujusmodi signa, dicendum quod essent principia prima a quibus erat inchoatio futurorum, licet non perfecta sint ab ipsis, et verissime ista signa fuerunt futurorum, quæ tamen non fiunt propter impedimentum quod diximus.

Et hæc est causa quare non deceptus videtur decipi astronomus et augur et magus et interpret somniorum et visio-num et omnis similiter divinus. Omne enim fere tale genus hominum deceptionibus gaudet, et parum litterati existentes putant necessarium esse quod contingens est, et pronuntiant tamquam absque impedimento aliquid futurum, et cum non evenit, facit scientias vilescere in conspectu hominum imperitorum, cum defectus non sit in scientia, sed potius in eis qui abutuntur eis : propter quod etiam Ptolemæus sapiens dicit nihil esse judicandum nisi valde generaliter et cum protestatione cauta, quod stellæ ea quæ faciunt, faciunt per aliud et per accidens, ex quibus multa in significatis suis occurrunt impedimenta : fru-

stra enim poneretur studium ad scientias vaticinantes, si ea quæ futura prævidentur, impediri non possent : ad hoc enim prævidemus ut mala impediatur, et bona expediatur ad actum, sicut faciunt periti medicorum in suis prognosticationibus.

CAPUT VI.

De somniis divinationem habentibus, quorum origo prima non est in somniante.

De his vero somniis quæ non hujusmodi quales diximus habent origines, quæ sunt in somniante per modum causæ vel signi primitus, sed potius sunt dilationes sive distantiae magnæ temporum vel locorum inter somniantem et eventum somniorum : aut etiam si nulla sit distantia inter somniantem et rem somnii, licet tamen hoc sit certum, quod somnium primam originem non habet in somniante, sed extra ipsum, aliter omnino dicendum est : hæc enim somnia non sunt in somniante secundum causam quæ sit in corpore, vel in anima, nisi forte dicatur fieri per accidens, ut diximus superius de casuali incurso : sed non potest hoc dici de somniis quæ vere et secundum artem divinationem habent, ut diximus superius : hujusmodi ergo somnia magis dicenda sunt fieri, velut dicit Democritus, qui defluxiones a cœlestibus factas et idola defluentia causas dixit et fecit talium esse somnio-

rum. Sed nos in hoc differimus a Democrito, quia ipse dicit defluxiones esse corpora parva atomalia, quæ fluunt a corporibus luminosis, et lux vocantur, et per poros intrant corpora somniantium, et sunt pars animæ in eis : et tunc somniant apparent idola quæ in talibus lucibus defluerunt.

Sed nos alibi istam opinionem improbavimus : sed in hoc convenimus cum eo, quod dicimus formam cum lumine defluere, et corpora tangere, et ea afficere, et fortiter movere cum non alia passione detinentur : et hunc motum animam tangere, eo quod omnis motus qui in corpore fit, pervenit ad animam, et tunc parat anima imaginationes, et forte aliquando intelligentias, quibus est explicabilis in re talis formæ per modum quem supra diximus. Quemadmodum enim fit in motu locali violento, quod cum ad primum moverit aquam vel aerem, per quæ duo elementa fit motus violentus : et postea aqua vel aer motus aliquid sibi proximum movet, et ille motus explicatur et procedit usque ad aliquid ultimo motum, quamvis primum inchoans motum non sit præsens neque moveat : tunc si nihil prohibet motum, aliquam sensibilem perceptionem appropinquare ad animas per corpora somniantium, a quibus motibus idola dicit Democritus fieri defluxiones quas diximus. Hæc autem satis per prius habita intelliguntur.

Sed hoc attendendum esse videtur, quod secundum Avicennam et Algazlem, non tantum a cœlestibus fiunt hujusmodi motus, sed etiam ab animalibus : quia illi dicunt animam unius imprimere per modum fascinationis in animas multorum aliorum, sed hoc per philosophiam probari vix posset. Quæcumque quidem igitur defluxiones sic corporibus appropinquant, has dicit Democritus sapienter loquens et vere magis perceptibiles esse nocte quam die, propter duas causas : quarum una est, quod licet magis spissus sit aer noctis quam diei propter frigus noctis, tamen aer noctis circa somniant-

tem magis est quietus nocte quam die : strepitus enim et tumultus diei circa homines talium perceptiones impediunt. Cujus signum est, quia soni campanarum et tubarum longius audiuntur nocte quam die.

Sciendum est quod venti, tempestates et hujusmodi, aut parum, aut nihil impediunt hujusmodi motus et effluxiones. Cujus causa est, quia cum lumine fluunt, et hujusmodi motus spiritualis est sicut esse suum, et ventis et parum dissipatur et movetur, aut nihil : sic ergo dicemus, quod in die magis dissolvatur perceptio istorum motuum quam in nocte, propterea quod silentes et quiescentes sunt nocte. Alia autem causa est quam sæpe diximus, quod in nocte multa parum vigoris habentia, quæ omnino de die nullum facerent sensum perceptionis, de nocte faciunt sensum propter somnium excludentem multitudinem sensibilibus : hæc enim est causa, quod parvos motus intrinsecus sui factos magis sentiunt dormientes quam vigilantes. *Intrinsecus autem sui factos* dico, quia extrinseca corpora dormientium frigida sunt et ligata. Repunt autem istæ formæ ad interius : quia naturales sunt defluxiones luminis ipsis spiritibus, et ideo pertrahuntur ad interius : et quia omne cœleste magis omnibus aliis intrinsecum afficitur quando venit ad corpora et corporum mixtiones : hoc enim vivificum est et formativum et omnibus aliis utens pro instrumentis, ut sæpius dictum est. Hi autem motus qui sic ad somno depressos defluunt, faciunt phantastica per modum qui in antehabitis expressus est, et ex illis phantasmatis conjecturantur futura secundum tredecim diversitates quas superius induximus.

CAPUT VII.

Quare non sapientissimis, sed quibuslibet talia fiunt somnia ?

Hæc igitur est vera causa, quod accidunt somnia talia vaticinium habentia quibuslibet hominibus indifferenter, et non accidunt viris prudentissimis et optimis : sapientes enim et optimi non sunt intenti nisi circa sapientias et virtutes et honesta alia : propter quod non percipiunt somnia, nisi forte illa quæ diximus superius, quæ fiunt a dispositionibus operum et inchoationibus, quæ de die sunt pertractata : a talium enim curis non destituitur anima sapientissimorum et optimorum etiam in nocte : et ideo cura talium excludit ab eis motuum aliorum perceptionem, tam in somno quam in vigilia.

Si autem Deus ad regimen vitæ humanæ talia immitteret somnia, cum pro certo Deum sciamus esse ordinatum in suis operationibus, faceret istam immisionem in eis in tempore quo ad majorem proveniret utilitatem regiminis : hoc autem esset, quod in die immitteret tales immisiones sapientibus, quibus traditum est regimen vitæ : et sic sapientes tantum in vigilia somniarent. Nunc autem quia aliunde ducunt originem, contingens est per talia somnia quoslibet homines prævidere, et non sapientes propter ipsorum circa alia majorem occupationem. Intelligentia quorumlibet plebei-

orum hominum non est effecta curis melioribus, sed est deserta, in nullo forte habens affectionem : et ideo sicut inanis et vana de facili movetur hujusmodi influxionibus, et agitur secundum congruentiam ejus quod movet eam : sicut enim diximus, quod passio movet ad quærendum idola sibi congruentia, ita movet defluxio illa, sed movet ad modum naturæ, et est multum efficax in movendo omne quod afficit.

Sed quia de hoc satis dictum est, ad alia transeamus, hic adjicientes, quod jam habetur causa ejus quod supra diximus, quare videlicet hujusmodi homines sunt multorum phantasmatum : hoc enim contingit propter multimodos motus interiorum et exteriorum, qui omnes usque ad medullas perveniunt, propter id quod natura est deserta et aliis occupationibus destituta. Causa autem destitutionis est in propriis gravitas spirituum, et defectus calidi bene moventis et humidi bene mobilis : et ideo sicut in speculo vacuo vel panno mundo profundantur maculæ et sordes, ita fit in istis. Horum autem omnium causæ satis in *Physicis* sunt habitæ.

CAPUT VIII.

De his quibus conjici possunt somnia vera.

Quod autem quidam vesani prævident, causa est quod proprii motus non insunt eis, sed casu feruntur vagi et destituti a propriis, et incertam et instabilem animam eorum quilibet apprehendit motus passionis extraneæ quæ tangit eas. Causa autem, quod quidam recte frequenter somniantes sunt sicut res eveniunt, et causa ejus quod somniant de suis votis et curis, accidit ex eo quod præcipue voti quando sunt separati et procul ad invicem maxime pro invicem sunt solliciti, de se invicem multa sperantes et de se multa timentes. In primo enim cognoscunt se invicem, et sentiunt motus ad invicem sibi factos per passiones spei, timoris, et amoris : et hoc modo se habent motus somnia facientes : notorum enim magis noti et profundati sunt quam extraneorum.

De causa vero recte somniandi satis in *Physicis* dictum est. Melancholici enim propter horum motuum vehementiam qui fiunt in ipsis, quemadmodum in destitutis ab aliis qui minus propriis curam impendunt et minus propriis intendunt, et raro vel numquam profunde dormiunt, melius aliis somnia conjectant, et quoniam habentium symbolum facilius est transitus et permutatio, et habentium symbolum facilius est translatio, eo quod

transferentes semper secundum aliquam similitudinem transferunt, ideo quod cito vicinius est somnio, per rationem symboli imaginantur, sicut docent Philegidæ poemata, qui poetriam primo ordinavit et scripsit. Ars enim poetriæ hoc modo secundum philosophiam super symbola conscripsit fabulas : et dicitur ideo composita fabula ex miris. Sunt enim melancholici, ut dicit Aristoteles in libro de *Problematibus*¹, studiosi, præcipue si patiantur melancholiam quæ ex corpore per incinerationem facta est : illa enim est fumosa sicut vinum rubeum, et est adhærentium multum phantasmatum, circa quæ profundatur intellectus et conjicit ea.

Et hæc est causa quare illi qui sunt furiosi, dicunt futura adhærentia per metaphoram illi quod imaginatur. Furor enim non omnino claudit intellectum et rationem, sed relinquit intervallum, et ideo somniantes venerea intelligunt verum tempus propter similitudinem caloris et humoris et lætitarum et amœnitatis : venerea enim talia important, et per hunc modum conjectant omnia futura ad interiora phantasmata quæ vident.

Amplius autem propter vehementiam talium motuum non repelluntur motus talium hominum ab aliquo alio motu qui fuit in ipsis : tales enim, ut diximus, motibus propriis destituti sunt.

CAPUT IX.

De arte interpretandi somnia.

Artificiosissimus autem judex est somniorum, qui bene similitudines potest ex facultate naturæ et artis inspicere, hoc modo quod etiam similitudines visæ et ad cœlestia et ad locum et passionem somniantis et complexionem comparet, et tunc secundum hoc vaticinetur. Somnia enim quæ recta vocantur, et somniantur per omnia sicut eveniunt, cujuslibet etiam imperiti est interpretari : sed somnia quæ carent intelligentiis quæ in solis sunt motibus phantasmatum metaphorice designata secundum modos diversos, non est interpretari non habentis artem et usum interpretandi, et quia multa jam talia conjecit et avertit.

Dico autem similitudines phantasmatum quæ sunt in somnio. Phantasmata enim somniantium similia accidunt in somno idolis illis quæ sunt in aqua apparentia, sicut et prius diximus : in aqua enim si nullus motus fiat, similis rei fit apparitio, sed post idola tunc in aqua apparentia non sunt similia formis veris, sed partes illius formæ confusas et inordinatas et distortas : et promptus erit judex in talibus, qui cito committit et componit diversa et distorta idolorum, sic ex


¹ ARISTOTELES, Lib. de Problem. Part. xxx, probl. 1.

motu confusorum dicens, quoniam hoc est hominis, et hoc est equi, et sic de quibuslibet aliis. Ille enim simili facultate quam habet in aquis motis iudicandi idola, potest etiam iudicare somnium hoc vel illud : et cum habet simulacra, non est ei opus nisi quod transferat ad significata secundum motum quem diximus : et tunc conjecturatum est somnium : idola autem diligenter perspiciat quaecumque sunt secundum causam apparentia, etsi diversa videantur, quia motus subjecti frequenter impedit rectum somnium : et cum scitur causa motus, et idolum ad formam redigitur, tunc

potest conjici somnium, dummodo attendantur præcipue loca et tempora et complexiones et mores somniantium, ut superius diximus. Hoc autem docere magicæ scientiæ pertinet et non physicæ.

Sic igitur diximus in primo libro quid sit somnus, in secundo quid somnium, et propter quam causam est utrumque istorum.

Amplius autem et hic in tertio de divinatione quæ ex somno est, secundum quod ex physicis rationibus sciri potest. Et hoc est totum quod intendimus quærere a principio de hac materia.



INDEX

Librorum, Tractatum et Caputum in Libris de Somno et Vigilia.

LIBER PRIMUS.

TRACTATUS I.

Cui conveniat somnus?

- CAP. I. Et est DIGRESSIO declarans
quæ sit intentio libri et
modus, et quis ordo in
scientia naturali, etc. 121
- II. Quod somnus et vigilia in-
sunt omnibus secundum
idem : in quo etiam nu-
merantur quæstiones hu-
jus scientiæ. 123

- III. Quod solum secundum sen-
tire insunt somnus et
vigilia, et quod plantis
non conveniunt, eo quod
sensibilem partem non
habent. 125
- IV. Quod omne animal quan-
doque dormit, quando-
que vigilat, et nullum
animal semper facit alte-
rum istorum, ex quo con-
cluditur imperfecta somni
diffinitio. 127
- V. Quod omnis somnus est
excitabilis, et omnis vi-
gilia terminatur ad som-
num. 129
- VI. Quod omne animal somno
communicat et vigilia
solum et semper, sed
differenter. 130
- VII. Et est DIGRESSIO declarans
principium spiritus, ut
sciatur qualiter som-
nus est ligamentum sen-
suum. 131

VIII. Et est DIGRESSIO declarans qualiter omnis vigilia ad somnum, et omnis somnus ad vigiliam terminatur.	433	II. Propter quam causam inest somnus et vigilia, et præcipue quæ sit causa finalis istarum passionum?	140
IX. Et est DIGRESSIO declarans diversas diffinitiones somni.	435	III. De causa efficiente somni et vigiliæ.	141
TRACTATUS II.		IV. Et est DIGRESSIO declarans quatuor causas somni secundum Averroem et Avicennam.	144
<i>Secundum quid, et propter quam causam causatur somnus?</i>		V. De his qui faciunt in somno opera vigilantium.	145
CAP. I. Secundum quam partem animæ est somnus?	437	VI. De proxima causa propter quam est somnus.	146
		VII. Per quem modum fiat somnus ex vehementi evaporatione?	148
		VIII. De causis somni per similem modum somnum causantibus.	150
		IX. In hoc concluditur vera causa somni et diffinitio, et solvuntur dubitabilia quæ sunt circa eam.	152
		X. Quando et qua causa expurgantur animalia?	154

LIBER SECUNDUS.

TRACTATUS I.		III. Ex qua causa deceptio fit in somnis cum formæ accipiuntur pro rebus?	161
CAP. I. Et est DIGRESSIO declarans totum esse somniorum ad intellectum meliorem sequentium.	157	IV. Quod somnium est passio sensibilis particulæ animæ, non in quantum sensibilis, sed in quantum phantastica.	162
II. Cui parti animæ convenit somnium?	159	V. Qualiter forma somni sit in sensibili parte animæ secundum quod patitur sensus ab objecto et remanet forma sensibilis in organo sentiendi?	163
		VI. Quod organum sensus non solum patitur, sed etiam agit in corpora vicina.	164
		VII. Quæ sit vera causa decep-	

tionis in somno, et quot
sint? 167

TRACTATUS II.

Quid sit et qualiter fiat somnium?

CAP. I. Qualiter in nocte fiat som-
nium? 169

II. Qualiter conservata simu-
lacra in somnis movent
organa sensuum? 171
III. Qualiter vis somni facit
latere somniantem quid
sit quod apparet in som-
niis? 173
IV. De natura et propria diffi-
nitione somni et ejusdem
explanatione. 174
V. De his quibus non acci-
dunt somnia, et de his
qui obliviscuntur somnio-
rum. 175

LIBER TERTIUS.

TRACTATUS I.

Quod sit aliqua divinatio, et quid sit?

CAP. I. Et est DIGRESSIO declarans
quam difficile sit ali-
quid tradere de divina-
tione. 177
II. An divinatio somniorum
sit, an non sit? 179
III. Et est DIGRESSIO declarans
de distinctione visionis
et prophetiæ et somnii,
ut solvatur præinducta
dubitatio. 180

IV. Et est DIGRESSIO declarans
præinductæ disputationis
solutionem. 181
V. Et est DIGRESSIO declarans
dispositiones naturales
ad prophetandum et som-
niandum. 183
VI. Et est DIGRESSIO declarans
de causis differentiæ ani-
marum in prophetia et
somnia secundum Avi-
cennam et Algazem,
cum improbatione opi-
nionis eorundem. 184
VII. Et est DIGRESSIO declarans
quæ sunt de opinione
Averrois, Alfarabii, Isaac,
et de improbatione ejus-
dem. 186
VIII. Et est DIGRESSIO declarans
opinionem Stoicorum et
de improbatione eorum-
dem. 187
IX. Et est DIGRESSIO declarans
plane causam somniorum
in quibus est divina-
tio. 189

X. Et est DIGRESSIO declarans modos quibus hæc forma movet videntem aversum a sensibus.	190	II. De his quæ secundum dispositionem animæ vel corporis sunt in nobis secundum rationem causæ vel signi.	199
XI. Et est DIGRESSIO declarans qualis sit forma illa, et quare sic nominetur.	193	III. De somniis quæ casualiter eveniunt, et est cum neque sunt causæ neque signum eorum quæ fiunt.	199
XII. Et est DIGRESSIO declarans qualiter sit aliquis propheta secundum naturam et prophetiam, et qualiter somnium est quidam casus a prophetia.	195	IV. Quod somnia non a Deo immissa sunt, sed est causa naturalis ipsorum.	200
		V. Quare somnia in futurum aliquid in rei veritate significantia semper eveniunt?	202
		VI. De somniis divinationem habentibus, quorum origo prima non est in somniante.	203
		VII. Quare non sapientissimis, sed quibuslibet talia fiunt somnia?	204
		VIII. De his quibus conjici possunt somnia vera.	205
		IX. De arte interpretandi somnia.	206
TRACTATUS II.			
<i>De causis somniorum in nobis.</i>			
CAP. I. Quæ secundum rationem causæ aut signa sunt in nobis quantum ad dispositiones corporis?	197		



D. ALBERTI MAGNI

RATISBONENSIS EPISCOPI, ORDINIS PRÆDICATORUM,

PARVA NATURALIA

DE SPIRITU ET RESPIRATIONE

LIBER I

TRACTATUS I

DE SPIRITU SECUNDUM SE.

CAPUT I.

De ordine dicendorum, et de modo communitatis operum.

Multa sunt animalia quæ quidem secundum locum moventur, et tamen non spirant : nullum autem spirantium est,

quod etiam secundum locum non moveatur. Ideo secundum convenientiam naturæ prius de *inspiratione et respiratione* dicendum est, quam de motu secundum locum qui competit animalibus. Est autem etiam primus motus secundum locum qui apparet in corpore animato, motus spiritus : propter hoc etiam de motu spirationis sermo, sermoni de *Motibus animalium* est anteponendus.

Amplius autem prima operationum animæ per quam etiam diffinitur, est vita : quoniam et ipsa anima est perfectio corporis physici potentia habentis vitam ¹. Omnis enim operatio animæ est operatio vitæ : sed tamen vita abstrahit a vegetatione, et sensu, et intellectu, et

¹ II de Anima, tex. 6.

est ante unumquodque istorum secundum naturam. Nos enim videmus adhuc vivere animalia quando corruptum est membrum per quod fit nutrimentum : et quando non nutriuntur, adhuc vivunt, licet non diu in vita salventur.

Similiter autem est de sensu et intellectu, quod separatis eis ab animali, et stupido existente, adhuc deprehenditur vivere animal : quod deprehenditur in corde animalium, quod extractum adhuc contingit vivere : et multo magis intus habet vitam etiam stupefacto toto corpore postquam sensum perdidit. Adhuc autem nervis sensibilibus descendentibus a capite per quos sensus diffunditur in corpore, apprehensis et strictis fortiter, et concipitur sensus : non tamen intercipitur propter hoc vita continue : propter quod patet vitam esse fundamentum et vegetationis et sensus et intellectus et motus. Vehiculum autem vitæ proprium est spiritus.

Propter hoc igitur et his similia de spiritu et spiratione nunc inter opera communia animæ et corporis dicendum est : quoniam opera communia sunt tribus modis vel quatuor, ut quibusdam videtur, quibus quidam addunt etiam quintum. Tres autem qui visitati sunt et proprii sunt, ut opera quidem animæ quæ perveniunt et terminantur in organis corporis, ut sensus, et memoria aut etiam ut sunt opera corporum inferiorum, et perveniunt ad virtutem animæ, et ibi terminantur et perficiuntur, sicut est somnus et vigilia et somnium : aut etiam ut sit opus quidem animæ et corporis communiter secundum rationes diversas, sicut est pulsatio spiritus quem procul dubio ministrat corpus : et ideo corpus est, sed informat anima, et movet secundum seipsam, et non secundum aliquam sui potentiam particularem in primis : et ideo vehiculum vitæ tale corpus est : et operatio vitæ non completur nisi per

tale corpus. Et quia vita est fundamentum vegetationis et sensus et etiam intellectus, ideo non operantur vegetatio et sensus et intellectus sine vita, sicut nec causa secunda causat aliquid sine influenza causalitatis causæ primæ : propter quod etiam sequitur, ut sicut vita spiritu influitur, ita et vegetatio per cibum et augmentum sensus et motus, et intelligere ipsum secundum quod in mortalibus per spiritus motum corporibus animatorum administrantur.

Si autem forte aliquis objiciat, quod vita sine vegetatione inventa non est : et ideo vita non videtur esse fundamentum vegetationis, cum vita secundum Dionysium Platonis doctorem et secundum Japheth Philosophum sit actus generis nutritibilis naturam assequens. Dicemus, quod primum in genere mortalium salvans vitam est vegetabile alimento utens, non tamen est primum secundum naturæ ordinem et intellectus convenientiam, sicut prius ostendimus. Vita enim est actus ab essentia animæ procedens, et nutrire est actus cujusdam particulæ ipsius in omni genere mortalium animatorum. Si enim ad immortalia respiciamus, invenimus vitam sine vegetatione et sensu cum solo intellectu et motivo secundum locum : propter quod etiam in *Cælo et Mundo* ¹ diximus superiora vivere nobiliori vita quam inferiora : est enim talis vita perfecta et perpetua, nullo indigens omnino eorum quæ sunt extra se. Patet igitur vitam, cujus vehiculum primum spiritus est, esse ante omnem aliam animæ operationem. De his autem alibi fecimus mentionem.

Commune autem quarto modo dixerunt quidam esse nutrimenti actum et nutriti : quoniam in illo primo actus pervenit ab anima in corporeum nutrimentum, et postea a corporeo nutrimento in corpus animatum : eo quod primo anima

Objectio.

Solutio.

¹ I de Cælo et Mundo, tract. III, cap. 10.

nutrimentum per spiritum naturalem assimilatur, et facit habere potentia vitam, et postea illud idem incorporatur et pars corporis efficitur, et nutrit partes et auget quæ secundum actum et formam animati sunt partes, sicut in primo *Peri geneleos*¹ dictum est : sed hoc secundum ipsam sui partem continetur sub membro primo communium operationum, et secundum secundam continetur sub tertio : propter quod etiam in illo non est alia communitas a dictis tribus, licet sit alius modus communitatis.

Quintum etiam modum multi adducunt, scilicet quod opus per se totum sit animæ, sed tamen per alterum accipiat vel uniatur corpori, sicut est intelligere omne opus animæ et corpori. Dico autem *intelligere* mortalium quod est cum continuo et tempore. Hoc enim licet sit secundum se animæ, et secundum separatam potentiam ipsius, quæ nullius partis corporis est actus, tamen quia species intelligibiles non abstrahuntur nisi a corporeis organo, per aliud a se, hoc est, per imaginationem a qua abstrahit, tangit corpus et utitur eo : sed actus ejus nec incipit in corpore, nec terminatur in ipso. Lux enim primo extrahens est ab intellectu, et intelligere ipsas species separatas est intellectus operatio. Hic autem motus secundum aliquos Antiquorum reducitur ad secundum : dicunt enim, quod omne nostrum intelligere oritur ex aliquo nostrorum sensuum. Cum autem sensus operatio procul dubio ab anima sit, eo quod virtus proprii sensus diffunditur a sensu communi, et hoc perficitur a sensibili. Sunt etiam qui ista subtilius considerantes, reducunt istum communitatis modum ad primum inter tres primos inductos modos. Quidam autem dicunt, quod iste est modus proprius ab aliis separatus : motus autem localis

quocumque modo fiat, circulum imitatur, et describit ad minus semicirculum : et ideo est ab anima in corpus, et in corpore facit gyrum quemdam, sicut in libro de *Motibus animalium*² docebitur. Secundum istos communitatis modos dixerunt Antiqui subtiliter, quod tractandi sunt libri de communibus operationibus animæ et corporis.

Cum igitur de aliis jam expeditum sit, restat ut de spiritus opere et de motibus animalium dicamus, prius autem de spiritus opere propter prædicta.

CAPUT II.

De opinionibus Antiquorum de spiritus natura.

In quo igitur generum, et quid sit spiritus, inquirendum est. Adhuc quæ sit origo spiritus, et cujus particulæ animæ et corporis instrumentum sit, vel pars propria, et quæ differentiæ ipsius : postea autem de his quæ connaturalem habent spiritum et complantatum. Amplius autem et de inspiratione et respiratione quid sit, et ad quid, et cujus : tandem autem de differentiis spiritus et animæ, et de convenientia ipsorum.

Genus autem et quod est spiritus determinans Heraclitus, qui spiritus et ani-

Heracliti opinio de spiritu.

¹ I de Generatione et Corruptione, tract. III, cap. 12.

² II de Motibus animalium, tract. I, cap. 2 et 3.

matorum et omnium aliorum dixit esse principium. Dixit enim, quod erat spiritus vapor omnium incorporatissimum et per se movens et motum existens : cujus signum esse dixit, quod fluit semper, quamvis a nullo proximo impellatur. Quod autem *per se movetur*, ut dixit, adhibet motum animatis, et est immortale, sicut in *Phædro* probatur, quod « omne per se motum, semper movetur, cum immortale est. » *Incorporatissimum* autem *omnium* dicit esse, eo quod est purius et simplicius omnibus. Principium enim esse *vaporem* dicens, oportuit quod simplicissimum diceret : quia aliter non esset principium aliorum. Hoc ergo dicit esse spiritum, non tamen dicit esse de natura cœlestium omnino, eo quod illa non principiata, sed immortales deos dixit esse.

Alcmæonis
opinio.

Alcmæon autem prædicti Heracliti in Epheso discipulus fere consentit in idem, nisi quod hic addit, quod spiritus vitæ vapor est cœlestis, et non elementorum, aut elementa principians : quod ex ipso motu et substantia probavit et immortalitate. *Ex motu* quidem, quoniam ad omnem partem corporis animati movetur, sicut lumen cœlestium in mundo. Lumen enim etiam dixit nihil aliud esse quam vaporem cœlestium procedentem in mundum undique. *Ex ipsa etiam substantia* spiritus hoc ostenditur, ut ait : quoniam clarus et perspicuus est, sicut quoddam lumen aliquantulum obumbratum. Hanc autem obumbrationem spirituum dixit accidere propter crassitudinem corporis cui incorporatur et quod vivificat et movet. Ipsam autem *immortalitatem* ex hoc probare videtur, quod videbat in exitu animæ a corpore saltuosos fieri singultus in pectore et loco pulmonis et cæteris spiritualibus : propter quod putabat spiritum separari a corpore grosso, sicut incorruptibile a corruptibili.

Alii autem quorum multi modernorum adhuc sunt, ponebant hunc spiritum esse aerem quemdam animæ accommodatum

ad vivificandum et movendum corpus. Aiunt enim isti, quod sicut vehiculum simplex datur cibo, quod ipsum per venas in totum deportat corpus : ita natura ordinavit aereum corpus subtile et tenue, quod est vehiculum virtutum animæ per arterias in totum corpus. Suadent enim isti quod dicunt per motum spiritus spiritum esse aerem : dicunt enim nihil per se moveri in corporibus nisi aerem. Seneca enim et quidam medicorum dicunt hoc : propter quod et pulsum et anhelitum qui sunt motus quidam aerei, spiritus esse dicunt. Signum autem, ut inquiunt, hujusmodi est : quoniam spiritus qui ventus vocatur, ad omnem partem movetur, sicut et spiritus animatus in corpore animalis : propter quod autem præcipue inducti sunt ex hoc quod vident spiritus a corporibus animalium tempore quo calefacta sunt, in aliam substantiam tenuem et fluidam resolvi : et pro constanti relinquunt, quod verum est, quod unumquodque illius generis est quantum ad substantiam materiæ in quod resolvitur : non enim resolvitur aliquid nisi in sua componentia.

Sunt autem quidam qui a Democriti opinione persuasi esse videntur, licet non in toto cum Democrito consentiant. Videntes enim cum spiritu animatorum semper calorem diffundi, refrigerari autem loca ad quæ spiritus interceptus non progreditur, dicunt tunc spiritum esse quiddam igne grossius, et esse tamen ignem. Ignem enim qui cum corporibus miscetur, dicunt esse non in summo calidum : eo quod excellentias primæ qualitates amittunt in mixto. Ignis autem naturam dicunt offendere spiritus in hoc quod abundantius ascendit : et ideo in superioribus plures differentias spiritus esse dicunt : in illis enim vivificat et sensibilis, et facit virtutes animales omnes, et perficit motum. Si autem secundum aliquid descendit, non impedit ignis naturam : quoniam ignis propriam sequens materiam descendit, licet ascendat per

seipsum : sic et spiritum dicunt descendere propter materiam suam, quam invenit ibidem. Igni autem attribuunt, quod semper movetur. Hujus autem dicti causa est quam diximus : et etiam hoc quod a fonte caloris videntur derivari spiritus, et hoc est cor in animali.

Hæc igitur sunt quæ de spiritus natura inveniuntur ab Antiquis : quædam enim alia a Pythagoricis accepta fabulis, omnino derisibilia sunt, et ideo non proferruntur a nobis. Hoc autem posuimus, ideo quod quilibet istorum secundum aliquid dicit naturam spiritus animati, licet nullus tetigerit perfecte et secundum veritatem. Hæc autem ex sequentibus erunt declaranda.

CAPUT III.

De improbatione dictarum opinionum, et de determinatione qui sit intellectus in spiritus natura.

Contra Heraclitum.

Non autem stare potest quod dicit Heraclitus dicens ipsum spiritum esse *incorporatissimum*. Cum enim medium sit quo anima movet et vivificat corpus, non simplex, sed commixtum et complexionatum et compositum, non congrueret instrumentum motus cum eo quod movetur, si esset incorporatissimum omnium. Quod autem dicit hunc spiritum esse *movens* quiddam et motum, veritatem quidem habet, sed non sicut ille dicit ex seipso. Est autem motus spiritus ab anima vivificante et regente corpus, et movens per

easdem virtutes corpus per omnia sicut faber et malleus movent et influunt materiæ eandem formam : faber quidem ut artifex, malleus vero ut instrumentum. Similiter autem in eo verum dicit, quod spiritum *vaporem* esse dixit. Est autem vapor humidi radicalis et cibalis spiritus. Sed in eo est falsus, quod vaporem dicit esse omnium principium, et omnia participare ipsum : omnis enim vapor alicujus est humidi exhalatio : et ejusdem principium esse nullo modo potest nisi conversus in seipsum et repulsus ad humidi naturam.

Alcmæon autem in hoc falsus est, quod dicit vaporare cœlestia, deceptus ex hoc quod dixit lucem et lumen esse corpus, sicut adhuc multi confitentur, sicut alibi diximus. Sed procul dubio verus est sermo Alcmæonis, qui dicit spiritum habere motum orbis et in loco et in velocitate motus. Ad omnem enim partem lustrans corpus animalis pergit spiritus procedens, et ex eodem in idem sicut cœli motus : exspirans enim ab eodem principio exspirat ad quod spirans inspirat : exspiratio autem et spiratio unius motus spiritus esse videntur : eundem autem modum motus videtur habere pulsus spiritus in non spirantibus quæ habent spiritum complantatum ex natura. Velociter enim spiritus movetur, ut dicit Isaac in libro de *Diffinitionibus*, ad modum luminis in mundo, quod in momento per totum orbis spatium movetur : sic et spiritus motus est per suum minorem mundum in corpore animalis. Cum autem non bene assignaverit Alcmæon hujus motum, dicens quod ex natura cœlesti habet hujusmodi motum : natura enim cœlestis non miscetur corporibus generabilibus, sicut alibi probatum est, sed potius hæc est ratio, quod cum anima sit in cujus umbra factus est orbis, ut dicemus in libro de *Intellectu et intelligibili*¹, erit ipsa similis in moven-

Contra Alcmæonem.

¹ I de Intellectu et Intelligibili, tract. I, cap. 5.

do motori orbis secundum quod est possibile sibi, et maxime si fuerit anima nobilis non per multa distans a motore primo. Hæc igitur dirigendo dirigit, et informat sui essentialis actus qui est intra instrumentum, ut ad omnem partem sui corporis quod vivificat et movet, velociter feratur, vehens virtutes et formas vitæ, secundum quod unicuique membrorum possibile est recipere. Non tamen putandum est eum subito moveri, si jam conceditur esse corpus, quoniam jam in sexto de *auditu physico*¹ demonstratum est omnem motum corporis esse in tempore: propter quod quidem celeriter movetur, sed non subito. Utrum autem uno vel pluribus moveatur motibus vel non, inferius inquiretur. In hoc autem quod dicit incorruptibilem et immortalem esse spiritum, omnino est falsum: est enim corpus corruptibile et fluidum valde, corruptibilius cæteris partibus animati corporis, sicut infra dicemus. Quod enim exitum et saltum animæ vetat, ideo contingit, quod cum compositum resolvitur, corrumpuntur organa, et retrahitur ab eis spiritus ad sui principium, et illis membris diutius palpitantibus, diutius retinet spiritum: et cum ex angustia multiplicatur in eis calor, plus de eo trahunt in refrigerium: et ideo ad multum spiritum trahendum et exsufflandum ex angustia spiritualium saltuosos motus dant spiritus organa: quod imperitum vulgus vocat *exitum naturæ*, nesciens distinguere inter animam et spiritum.

Eorum autem qui aerem dicunt spiritum, et hunc per se moveri, opinio parum habet rationis. Si enim concedatur spiritum vitalem in omnibus ex humido naturali produci, cum humidum naturale commixtum sit ex elementis, sequitur necessario spiritum esse corpus ex elementis compositum. Si autem formam præcedit aeris, nihil est inconveniens:

omne enim quod sublimatur ab aliquo per naturam vel artem, formam primo vaporis accipit, quæ formæ aeris simillima est, et plurimum aeris habet: et quod tamen in eo alia elementa mixta sunt, ostendit ejusdem substantiæ cum sublimitate conversio: quæ convertitur aliquando in conclusum corpus valde non spirituale. Quod autem dicunt aerem per se moveri, nullam veritatem continet, et est alibi hoc dictum improbatum. Verum tamen est, quod resolutio quæ fit spiritus in aerem, indicat in spiritu plus esse de natura aeris quam alterius elementi. Propter quod etiam restauratiorem in spirantibus accipit ab aere inspirato: sed hic aer inspiratus primo in pulmone vaporabiliter miscetur et dirigitur, ita quod actus vitæ et non simplex dirigitur cordi. Fuit autem juvenitum maximum in hoc animalium, quod substantia illa spiritualis formam sumit raritatis, quæ aereæ raritati convenit: quoniam, sicut alibi determinatum est, aer habet humiditatem ex centro ad circumferentiam fluentem, et hanc magis mixtam, et convenientem habet spiritum: et ex hoc habilis est ex corde ad motum in totum corpus. In hoc enim motu quando expulsus a corde movetur per totum corpus, secum portat habitum et actum vitæ toti corpori. Motus autem ille quem habet ad cor, est ut accipiat talem habitum et actum a corde. Quod autem dicunt vehiculum esse cibi humidum aqueum, verum quidem est, sed tamen illud est mixtum, non tamen vehit cibum distinctum subjecto et loco a cibo sicut distincta sunt quæ fluunt super aquam: quia si hoc esset verum, de omni vena aperta exiret aqua limpida, super quam nataret cibus partium corporis: quod non est verum: et ideo etiam illud humidum mixtum est cum cibi substantia, sed vincens humidum aqueum

¹ VI Physic. tract. 1, cap. 4.

in eo, dat ei motum, fluxum, et subtilitatem quæ membris instillari possit et uniri.

Illi autem qui ignem spiritum hunc esse dixerunt, inducti sunt ab eo quod superius inductum est. Sed non est verum quod dicunt, quod hæc substantia non generatur ex ipso fonte caloris, sed aliunde materiam accipiens in corde, accipit habitum vitæ et formam quam influit membris : retinet tamen sui informantis, quod est cor, qualitatem : et ideo calidum est, et calefacit membra. Habet autem aliam rationem caliditatis : ab anima enim quæ est motor suus, dirigitur radicaliter per totum corpus : et ideo sicut radii multiplicati ad unum locum, inducunt fortem calorem, ita facit congregatio spirituum, et ideo tempore somni revocantur ad locum digestionis, ut calorem multiplicent ibidem. Similiter autem membra in quæ dirigitur recta diametro, reflexus in seipsum vel ad angulum, magis calefacit quam alia quæ respicit oblique ad angulum expansum, sicut per omnia faciunt radii cælestes. Omnes enim hos motus et proprietates habet ex motore suo spiritus et non ex materia : motor autem suus habet sic movere ex proportionem similitudinis quam habet cum motore orbis. In quantum enim anima talis motor est, tales potest influere proprietates suo instrumento, quod datum est sibi ad perficiendum actum suæ essentiæ qui est vita.

Ex his de facili patere potest quid veritatis, et quid falsitatis dicta Antiquorum contineant.

CAPUT IV.

Quid sit secundum veritatem spiritus animalis?

Nunc igitur secundum nostram sententiam veritatem de omnibus dictis colligamus, omnium falsitatem ambientes.

Dicamus igitur spiritum vivorum esse compositum corpus ex elementis, habens formam aeris, animæ organice deserviens ad omnes vitæ actus. In hac enim diffinitione in hoc quod dicitur spiritus esse *corpus*, ponit spiritum in genus proprium. Quod autem dicitur *ex elementis commixtum*, naturam demonstrat materiæ, et contrahit genus primum et approximatum. Quod dicitur *habens formam aeris*, distinguit spiritum ab aliis commixtis grossis, quæ talem formam non habent. Et quod dicit *animæ organice sive instrumentaliter deserviens*, dat ei ordinem quem habet in corpore animato : est enim in eo motum et movens. Et quod ultimo additur, *ad actus vitæ omnes*, comprehendit actum vitæ vegetationis et sensus et motus : quia ista sunt actus quibus anima vivificat corpus, et quibus vivum a non vivo secernitur.

Est autem hic spiritus tenuis et clarus quantum ad materiam : et est quidem *tenuis* propter penetrabilitatem, ut in omnes partes corporis per subtiles potentias arteriarum possit penetrare. *Clarus* autem est, ut sui munditia omnes formas possit recipere. Lucidus etiam

esse perhibetur a quibusdam Philosophis : quod contingit ei ex multi perspicui admixtione : perspicui enim natura elementis et elementatis convenit ex communiōne corporum cœlestium : et ideo sicut motor cœlestis perspicuo influit vitam entibus, et est hoc, ut dicitur, Lini Philosophi, quasi vita omnibus entibus. Ita etiam motor qui est anima, est imago motoris cœlestium, convenienter habens instrumentum lucidum quod suum mundum minorem vivificet.

Medius tamen est in substantia et forma inter aerem et aquam, habens proprietates utriusque in aliquo, et in aliquo proprietates ignis : sed parum vel nihil habet de proprietatibus terræ. *Aquæ* quidem habet proprietatem in humido aliquantulum spisso, ut et bene formas recipiat et convenienter teneat : hæc enim causa est, quia anterior pars cerebri in qua sigillantur formæ sensuum, medullosa et humida facta est : et tunc a simili probatur, quod idem oportet esse in spiritu animali. *Aeris* autem habet formam propter principia vitæ quæ sunt in aere, quæ sunt calidum et humidum : convenientissimum enim est ut instrumentum vitæ habeat etiam vitæ principia : et quod illa dominantur in eo : propter hoc etiam quoddam restaurum sumit ex aere per anhelitum, sed specialiter per evaporationem nutrimentalis humidum restauratur, sicut in *Somno et Vigilia* dictum est. *Proprietates* autem ignis habet, ut caliditate sua vias aperiat et perforet : calidum enim est aperitivum et perforativum : siccitate autem actuali indurat interiorem tunicam arterialem, ut et ictus sustinere valeat suos, ut et non remollita arteria concidat et emollescat, et tunc spiritus transire non possit : humida enim mollia concidunt et incurvantur, et ad angulum claudunt vias et poros. Amplius si humidus accidentaliter esset, etiam similiter humida arteria fieret : et tunc arteria mollis pulsui cederet : et tunc spiritui pulsanti non esset impetus ante se per arteriam, sed

potius elevaret in una parte : et tunc illud pulsaret et extenderet viam. *Terræ* autem *prioprietatem* non habet : quia terra frigida, gravis, et sicca est, expressa ab ea omnimoda humiditate. Et per gravitatem quidem repugnaret nobiliati, per frigiditatem autem repugnaret vitæ quam operatur, eo quod frigus est mortificativum, præcipue illud quod est conjunctum cum sicco. Per idem autem repugnaret formarum receptioni, quas oportet spiritum universaliter recipere : sicut enim unum instrumentum quod est malleus, habet faber ferrarius, per quod omnes inducat in ferrum formas artis suæ : ita hoc unum instrumentum junctum est animæ, per quod in toto corpore inducit omnes universaliter formas et operationes vitæ : et sicut in arte fabrili est unus artifex et una ars et unum instrumentum, sed multæ formæ artis et multi motus instrumenti, et per consequens multa artificiata : ita etiam in physicis una est anima et unum instrumentum et multæ perfectiones organorum constitutæ ex illis, ut visus in oculo, digestio in hepate et stomacho, et sic de aliis naturalibus et animalibus organis et perfectionibus eorum. Hæc igitur est causa, quod proprietates aliquas terræ non habet spiritus, aut minimum et insensibile habet.

Sed oportet nos non latere, quod hoc instrumento anima et non natura utitur : natura enim jungitur materiæ sine medio, et perficit in ea suas operationes sine medio : eo quod ipsa non operatur essentialiter et per se nisi unum : propter quod instrumento non indiget. Sed anima nihil ita operatur quod non cesset vel cessare possit aliquando ab illo, et operatur multa essentialiter. Cum igitur ipsa sit una et indivisibilis, per se solum hæc plurima operari non potest : et ideo junctum est ei instrumentum, ex cuius formali diversitate plurima valeat operari. Dico autem *formalem* secundum quod spiritus a corde transmissus ad alia membra inducit formas illorum ad ve-

hendum virtutes illorum membrorum in corpus, sicut in cerebro accipit sensus et motus formam, et in hepate virtutum naturalium formam induit, et in testiculis virtutem formativam quæ a Philosophis vocatur *divina*.

Et in hoc egregie Avicenna comparat cor soli, et spiritum vitalem comparat lumini solis in minori mundo: quoniam cor est principium vitæ per totam circumferentiam corporis, sicut sol principium vitæ in majori mundo in circulo declivi, qui causa est generationis et corruptionis rerum, ut diximus in secundo *Peri geneseos*¹. Radii autem solis accipiunt virtutem omnis stellæ quam illuminant et tangunt: et ita faciunt spiritus procedentes a corde ad alia membra principalia: reflexi enim ab ipsis spiritus vehunt secum virtutes membrorum in ea ad quæ reflectuntur. Hæc igitur est certissime substantia et quidditas spiritus animalis.

CAPUT V.

De origine spiritus qui copulatur cum semine, et vocatur RADICALIS cum operationibus ejus.

Spiritus autem qui est instrumentum animæ primum, duplex est, sicut virtus animæ quam vehit. Est enim unus spiri-

tus et primus, qui est evaporatio ipsius humidi quod est in semine aliquo cum eo vapore qui naturaliter continetur in ipso. Et hic spiritus est, qui primo per virtutem formativam quæ in semine est, calido seminali excitatus et loci spirat in semine, et post ante hoc in viscositate ipsius seminis continetur retentus. Cum autem humidum seminis formari a virtute formativa incipit exterius, id quod formatur, pelle circumducitur viscosa, intra quam spirans spiritus ille primo pulsare incipit, vehens artificem formativam, qui est virtus formativa, et virtus ejus in omnium membrorum formationem.

Hujus autem signum est quod spiritus iste sit inviscatus in semine primo radicaliter: dicit enim Aristoteles albedinem esse seminum omnium plantarum et animalium fere, nisi sint valde terrestria adusta, sicut piper, et cubebæ, et hujusmodi: albedo enim hæc ex spumoso fit subtili aereo, quod stans spiritus semine designat, qui cum primo spiraverit, a calido loci et naturæ excitatus, statim viscosum dissolvit humidum, quod in exteriora delatum, in idem constare incipit in frigidatum propter a principio caloris distantiam. Principium autem caloris in semine est medium ejus quod est ei loco centri et cordis: constans autem in exterioribus humidum viscosum retinere intus incipit spiritum, qui exhalare non valens, reflecti incipit et pulsare: et hoc modo informatus a virtute divina quæ formatrix est, incipit operari organa vitæ ex ipso humido quod intra pellem continetur. Nisi enim primo contineatur spiritus et humidum, exhalabit spiritus, nec exspectabit donec calore naturali seminis terminetur et digeratur et formetur ad vitæ organum quod potentia vitam habet, eo modo quo in libro de *Anima*² diximus, quod anima est ac-

¹ II de Generatione et Corruptione, tract. III, cap. 4, 5 et 6.

² II de Anima, tract. I, cap. 2 et 3.

tus corporis physici organici potentia vitam habentis.

Hæc autem est prima substantia spiritus animati corporis, sicut et seminale humidum potentia est substantia organarum : et sicut humidum radicale seu seminale per nutrimentum multiplicatum, præstat nutrimentum et augmentum membris, ita etiam vapor alimenti in corporibus animatorum adjunctus huic spiritui, restaurat eum et auget, ut fortis sit ad vehendum virtutes animæ in corpora perfectæ quantitatis existentia.

Redit igitur quod diximus ad hoc quod ex duobus substantia spiritus seminalis conficitur : quorum unum est id quod de ipsa natura et substantia spiritus est in semine, cum clauditur a generante id quod de ipsa natura et substantia est spiritus. Aliud autem quod nascitur ex ipso vapore humidi radicalis, cum calido loci et naturæ excitatum vaporare incipit.

Spiritus autem hujus in semine sunt quatuor operationes, quarum una est dissolvere humidum ut sit receptibile formarum : et hoc facit per adjunctum sibi calidum. Secunda est pulsare fortiter undique per ipsum : et hoc faciendo facit multa foramina formando arterias per quas arterietur quasi totum corpus animatum. Tertia est vehere virtutem informantem virtutis ad omnes membrorum formationes. Hæc enim virtus est in semine sicut artifex in artificiato : et sunt virtutes particulares ejus quæ sunt formativæ membrorum quæ vehuntur a corde vel ab eo quod est loco cordis in omnes partium differentias. Quarta autem operatio est valde necessaria et subtilis : quia scilicet impossibile est, quod ab eodem et proximo principio fluat spiritus et humor : quia unum impediret alterum in fluxu suo : et hac eadem de causa non potest spiritus per eandem viam fluere cum humido radicali : ideo oportet quod via spiritus ubique juxta vias humidi radicalis penetret, et pulsando sibi ingerat potentiam ad vitam :

nisi enim illo agente conferatur ei potentia ad vitam, non magis posset de ipso fieri membrum actu vivum, quam de illo quovis humido contemperato. Istæ sunt igitur operationes essentielles spiritus qui complantatus est in semine.

Hæc autem licet sint dicta Peripateticorum, tamen per rationem fortem hoc idem sic demonstrative probatur : scimus enim per demonstrationem, quod omne quod movetur, habet motorem conjunctum sibi. Videmus enim semina moveri quando moventur ad formas animatorum et figuras : scimus iterum omnem generationem ex convenienti esse, ita etiam quod generatio univoca est ad quam reducitur æquivoca generatio : oportet igitur formans et movens semen simile esse secundum rationem formæ generati corporis, sicut forma artis similis est formæ artificiatum : et ideo etiam virtus formativa vocatur a Philosophis anima propter conformitatem rationis et speciei quam habet cum anima. Quod enim anima formatum movet et vivificat et regit : hæc formativa in eadem figura format et vitæ præparat et motui secundum locum : cum formalis et simplex sit virtus formativa, non potest per se formare diversa in figura et actu : propter quod debet habere instrumentum quod diversificatum faciat hanc figurarum diversitatem.

Amplius autem in artibus ita est, quod forma quæ secundum esse simplex est in anima, non efficitur in materia lapidum vel lignorum vel alterius materiæ grossæ, nisi mediante instrumento : hæc enim quia movetur ab artifice, habet virtutem inducendi formam : et quia tangit materiam, ideo mutat eam in formam. Cum igitur ars naturam imitetur, erit simile in operationibus animæ in natura. Sic igitur convincitur, quod spiritus ille omnium operationum instrumentum est, quas facit virtus formativa in semine. Nos autem de semine et virtute formativa in libro de *Animalibus* dicemus : hæc enim quæ dicta sunt, ad probandam

originem *radicalis spiritus* commemorasse sufficit.

CAPUT VI.

De origine et operationibus spiritus vitalis in corpore jam formato.

Hic autem spiritus in formato corpore existens, est qui vivificat totum corpus : et de virtute formativa tantum habet, quod alimentum sumptum iterum format ad potentiam vitæ : sed in hoc deficit, quod non format humidum nutrimentale nisi in quodam jam formato, eo quod ipsum magis est extraneum quam seminale, et minus habile et obediens formationi. Propter quod duas virtutes concurrere oportet ad ipsius formationis virtutem, scilicet quam advehit spiritus, et virtutem membri in quo fertur. Sed tamen in hac operatione virtus quam advehit spiritus, operatrix est et actrix : et virtus membri est sicut loci virtus, in quo convenienter formatur humidum aut materia : et ideo spiritus est sicut formans et sigillans, sicut est virtus masculina, et humidum est sicut materia fœminæ, et membrum est sicut matrix in qua concipitur ad formandum. Et hæc est principalis operatio spiritus vitalis in corpore animato, cujus rei gratia humidum quod est nutrimentum ultimum in his quæ nutriuntur, sicut est sanguis in habentibus sanguinem, et in non habentibus sanguinem est humor qui est loco sanguinis, ita decurrit per vias suas a principio vi-

tæ quod in omni loco conjungitur eidem via spiritus, ex cujus pulsu undique recipiat potentiam vitæ et formæ membri animati cui est vivendum.

Hic ergo spiritus sic existens in omnibus animatis, etiam restaurum quærit : eo quod impossibile est, quod non aduratur multum de substantia ejus in corpore, et ideo multum exhalat de ipso per poros corporis : hoc autem restaurum accipit generaliter in omnibus animatis ex vapore alimenti quod jam elevatum est ad primum principium vitæ quod est cor in habentibus cor. In plantis autem et animalibus cor non habentibus est membrum quod est loco cordis. Cum enim sic levatur ad principium vitæ, tunc effumat in ipsum principium vitæ, et ibi formatur ad hoc quod vehat vitæ virtutes et conjungatur diminutio spiritui et restauret ipsum.

Habet enim hic spiritus quatuor principales operationes, quarum prima et principalis est, quod est *vivificus* : etiam hanc habet a summo motore qui est anima. Secunda autem est quia est *calefactivus* : et hanc habet a membro principali quod est fons caloris. Tertia autem, quod est *eventativus* : et per hanc dissolvit et quasi verberando subtiliat ea quæ viscosa sunt in nutrimento corporis : et hanc habet a suo proprio motu. Non enim frustra natura dedit ei tam fortem motum et duras percussiones, sed ingeminata est, ut ictibus illis dispercuteret et divideret ea quibus influit, et sic dissolvendo aptaret ea membris vivis, et eventaret a corruptis. Quarta autem est quam omnes physici dant ei, quod expedit omnem virtutem animæ ad operationes essentielles et sibi proprias. Hæc igitur sunt operationes quas habet in omnibus animatis, sed speciales quasdam habet in quibusdam, de quibus hic non est dicendum, sed in libro *Animalium*.

CAPUT VII.

Quod in quibusdam animatis spiritus habet vias a nutrimento distinctas, et in quibusdam non.

Non autem lateat te, quod spiritus iste vitalis qui a quibusdam naturalis vocatur, in quibusdam animatis distinctas habet vias a viis nutrimenti, et in quibusdam non, sed movetur cum nutrimento in eisdem viis. In quibus enim non est sanguis, sicut in plantis omnibus et quibusdam animalibus minutis, et in quibusdam magnis, in quibus sanguis non est, sicut in multis piscibus et cancris et conchis, etiam per incisionem subtiliter quæsitæ non inveniuntur viæ aliquæ per corpus nisi solius nutrimenti. In omnibus autem sanguinem habentibus utraq; viæ inveniuntur, venæ scilicet quæ sunt viæ nutrimenti, et arteriæ quæ sunt viæ spiritus. Cognoscitur autem hoc quoniam si elixentur corpora animalium et præcipue cor et hepar et cæteræ interiores partes exsiccentur, inveniuntur viæ duræ et apertæ et vacuæ, et viæ molles plenæ sanguine coagulato.

Causa autem hujus est, quod in non habentibus sanguinem profecto grave et viscosum est nutrimentum propter algoris superabundantiam : tale autem nutrimentum nec elevaretur, nec in membra penetraret, nisi et spiritum et calorem haberet conjuncta sibi et interclusa in ipso : hæc enim duo in tali nu-

trimento facit spiritus interclusus elevans nutrimentum, et impingit ipsum in substantiam membri cui uniendum est suo motu et sua subtilitate quam habet.

In his autem quæ sanguinem habent, licet sit aliquis spiritus in sanguine interclusus, non tamen oportet totum esse interclusum : quia sanguis secundum se calidus est, et suo calore levatur : et cum calor sit divisivus et perforativus, calor ille aperit membra ut possit subintrare nutrimentum : et ideo spiritus iter suum habet per alias vias. In hoc etiam est adiutorium non parvum : ut in pluribus enim sanguinem habentibus sunt magnæ diversitates in membris ex quibus componuntur : et hæc membra non expedita essent ad actus, nisi virtus principii vitæ cito vehi posset ad ipsa : non autem cito fluere, si veniret cum nutrimento : quia nutrimentum est humor gravis et spissus, et non de facili mobilis : et ideo ingeniata est natura vias concavas duras ordinare, per quas spiritus advehat omnes virtutes membrorum ad suas sedes in quibus operantur. Sanguinem autem non habentia ut in pluribus valde similia habent corpora, sicut plantæ et pisees et multa vermium et serpentium genera : et ideo per unius modi spiritum vita fit in omnibus, et est sensus et motus in animalibus : et ideo spiritum distingui non est necessarium nisi in capite forte, vel in membro quod est loco capitis, propter virtutes animales. Et hujus etiam causa est, quod talia animalia sanguinem non habentia minus aliis animalibus sunt disciplinabilia : quoniam inviscatum in nutrimento et grossum habentia spiritum, aut parum et non universaliter separatum, non retinent formas auditas neque distinguunt eas. In plantis autem omnibus nisi in poris vias nullas habet, in quibus elevat nutrimentum, in quo esse cognoscitur, per hoc quod semper invenitur spumosum et album : hæc enim, ut diximus, efficit spiritus permixtos nutrimento.

Quod autem talis spiritus in omnibus

sit animatis, ostenditur et ratione et signo. *Ratio* quidem est, quia cum omnis vitæ causa sit calidum et humidum, humidum autem semper cum calido est vaporativum et convertibile in spiritum, necesse est quod in omni vivo sit generatio spiritus. *Signum* autem est, quod in omni vivo videmus hoc quod quando frigus comprimit eum extra, tunc contrahuntur extrema ejus exteriora, sicut tempore frigoris contrahuntur flores in nocte, et corpora animalium minora et pallidiora inveniuntur : cujus causa non potest esse nisi conversio spiritus et compressio ad interiora. Tempore autem calidi solis exteriora tumescunt et replentur nutrimento : cujus causa non potest esse nisi evacuatio spirituum ad exteriora, qui secum ad exteriora trahunt nutrimentum, et ideo aperiuntur et intumescunt. Declaratur autem hoc uno tempore quod est calidum et humidum, quod ita spiritus plantarum et animalium evocat, quod omnia fere tunc tumescunt quasi pubescentia efficiuntur, et turgentibus gemmis in plantis, et animalia impletis vasis seminariis erumpunt in fœtus et fœcunditatem.

CAPUT VIII.

Cujus partis animæ primum sit spiritus?

Ordo autem jam expostulat, ut dicamus cujus sit particulæ animæ spiritus iste. Sed forte dubitavit aliquis, utrum sit alicujus particulæ animæ? Scimus

enim, quod omnis multitudo naturæ alicujus ad unitatem reducitur : et ideo cum virtutes vitæ multæ sint in anima, sicut nutrire, et sentire, et movere, et alia hujusmodi, oportet quod hæc tota reducantur ad unitatem quæ est substantia animæ, quam circumstat talis virium multitudo suarum, sicut naturales potentie circumstant naturam et subjectum in quodstant.

Cum igitur, sicut alibi probatum est, et superius in hoc libro aliquid de hoc dictum, actus primus et proprius animæ in corpus sit vita, spiritus autem sit vitæ vehiculum, oportet quod spiritus secundum se sit instrumentum animæ primo, et per consequens virtutum suarum quæ sunt vires animæ. Cujus multi non parvæ auctoritatis viri, diversas assignant causas et rationes. Aliqui enim fuerunt, qui dixerunt omnino incorporeum et omnino grossum corporeum conjungi non posse sine medio quod conveniat cum utroque : et hoc dicunt spiritum esse, qui subtilitate sua convenit cum anima, et corporeis dimensionibus convenit cum corpore. Hæc autem sententia nulla mprosus habet veritatem, et est contra omnia dicta Peripateticorum : quoniam spiritus non est medium quo anima jungatur corpori : eo quod sine medio unita est ei sicut omnis perfectio suo perfectibili sine omni unitur medio, sed potius spiritus est, per quem anima operatur in corpore opera vitæ.

Et ideo hoc errore abjecto, dicamus quod spiritus est instrumentum animæ, sicut malleus vel dolabrum est instrumentum architecti : et hoc instrumento anima facit vitam in corpore sicut formam artificiatum facit artifex per instrumentum. Hic autem necessitas instrumenti non quæritur propter motoris indigentiam et infirmitatem : quia motor sibi ad omnia sufficit, habens in se omnes formas quas inducere intendit, sicut artifex habet in se omnes formas architecticæ : sed potius propter indigentiam et necessitatem corporis, quod recipit ab anima actum vitæ

et formam. Cum enim illa distet a principio vitæ indigente ad vehendum vitam : quoniam licet virtutes quædam sint in organis et partibus animatorum fixæ non separabiles ab ipsis quamdiu sustinet animal, sicut visus est in oculo : tamen illæ virtutes sunt ligatæ et immobiles quando continue non influitur virtus alia perficiens eas a principio et fonte vitæ, quod est ipsa anima secundum substantiam suam : et ideo spiritus est necessarius qui advehat hanc virtutem. Cujus signum est quod prius diximus : quoniam spiritu ad interiora retracto, organa exteriora contrahuntur et immobilitantur : et eo reducete, laxantur ad actum.

Et ideo quidam dicunt triplicem esse vitam in his quæ vivunt : unam quidem quæ est causa vitæ : et hæc est vita animæ. Alteram autem quæ est fluxus hujus vitæ ad vivum : et hæc est vita instrumenti animæ quod est spiritus. Et tertiam quæ est vita formaliter recepta a corpore et partibus animati corporis : et hæc est qua dicitur caro viva, et auris, et oculus vivus. Hoc autem per omnia simile est his quæ sunt in arte : quoniam artis forma primo est in anima artificis : et cum iteratur fluxu quodam et processu in materiam, quandoque est in operationibus et motibus instrumenti : et tertia est quæ adhæret artificiatio et est producta in ipsum. Sed in hoc est dissimile, quod formatio artis quiescit perfecta in artificiatio postquam in ipsum inducta est. Forma autem organorum animatorum quam adducit spiritus, est laxatio ipsorum ad actum : et hæc est quasi in continuo fieri. Propter quod etiam continue anima utitur instrumento quod in organo visus videri potest, quod habens visum non utitur eo nisi a principio vitæ spiritus veniens laxet ipsum et mobilitet ad operationem. Similiter autem est in aliis partibus animatorum corporum.

CAPUT IX.

Cujus partis corporis primum sit spiritus?

Cujus autem partis corporis sit ipsa substantia spiritualis, jam non est difficile determinare : quoniam licet origo ejus sit ex humido radicali et cibali, tamen generatio ejus et essentia vitalis spiritus est in corde. Per venam enim quæ est in imo hepatis sive convexo ipsius quæ ad medium thalami cordis dirigitur, substantia spiritus bulliens spiritum elevat versus cor, vel versus id quod est loco cordis in his quæ cor non habent et hepar : et forte etiam venis carent. Stâtim autem ut ibi est cibus et spiritus in omnibus cor habentibus, discursio fit ad extremos thalamos, ita quod dextro plus attribuitur sanguinis et grossior et minus de spiritu, sinistro autem plus attribuitur spiritus et minus sanguinis, qui tamen est sanguis clarus et subtilis per spiritualium præcipue nutrimentum. Claritatem autem habet et subtilitatem propter permixtum sibi multum spiritum. Subtilitatem autem habet propter ictus spiritus, et eam quæ facta est in ipso spiritu ejusdem sanguinis sublimationem. A sinistro autem cordis thalamo arteriæ producuntur per totum corpus, in quibus continue spiritus pulsat vitam a fonte vitæ qui est cor : trahitur autem ad sinistram spiritus in habentibus cor et sanguinem ; quoniam cum hepar sit in dex-

tro, repletur fumo malo spiritus, si ad dextrum ventrem sive thalamum cordis distribueretur : hoc autem maximum in vitæ operationibus generaret impedimentum.

Licet autem talis distributio cordis et arteriarum non sit in non habentibus sanguinem pluribus, neque etiam in plantis, tamen aliquid simile est proportionaliter talibus membris, et distributioni respondens, per quod intelligitur spiritus ab eo membro quod est principium totius corporis et totius caloris : non enim acciperet formam vitæ quam influit ubique per corpus, nisi a loco ubi vitæ principium formata omnia membra fovet, et in ipsa virtutes vitales et vitam infuderit. In omnibus enim oportet continuari instrumentum usque ad motorem ipsius : et cum artifex vitæ anima sit in corde, oportet quod etiam spiritus primum in formationi instrumentum operum vitæ derivetur a corde.

Signum autem hujus est, quod cum motus spiritus sit duplex, scilicet diastoles et systoles, qui motus est compositus ex pulsu et tractu, hos motus primo perpendimus in corde, vel in eo quod est loco cordis : propter quod etiam in toto corpore per diastolem et systolem spiritus, perpenditur qualis sit cordis dispositio. Oportet igitur quod spiritus a corde procedat : ampliatio enim corde in ventriculis suis, necesse est ipsum spiritum trahere. Concluso autem eodem, necesse est ipsum spiritum expelli. Per dilatationem igitur cordis et contractionem causatur motus expulsionis et attractionis : expulsio autem in spiritu et arteriis causat diastolem, et attractio causat systolem : quod fieri nullatenus posset si spiritus ab alio quam a corde procederet.

Sed quia generalis debet esse doctrina de natura spiritus, sciendum est quod in plantis et sanguinem non habentibus aliquid istis est proportionale. Cum enim actus vitæ communiter inventus sit in omnibus animatis, et sit vita proportionaliter in eis perfectior et minus perfecta,

oportet quod et principia et instrumenta vitæ omnibus proportionaliter insint : et ideo licet non sit in plantis talis spiritus et alimenti distributio, sicut in habentibus cor et sanguinem, tamen necesse est quod calor naturalis in eo quod est fons et principium caloris, sicut radix est in plantis, aliquid de humido resolvat in spiritum in quo virtus vitæ quæ est in radice devecta et succum vegetet et præparet, et totam plantam pulsando moveat ad vitæ vigorem. Cum enim spiritus inclusus in aliquo unde exire non potest, revolutus et diffusus pulsando fluit per id in quo est, et aliquando recurrit ad suæ generationis principium, quod est cor, duplici de causa. Una quidem ut restauretur deperditum in ipso. Alia est ut exteriora non dissolvantur nimis et laxentur per continuam spiritus attractionem : per hoc enim exhalaret spiritus, et humidum et virtus corporis desiccaretur nimis, et debilitarentur virtutes corporis.

His igitur de causis aliquando retrahitur, aliquando extra ducitur spiritus : et iste est quidam spiritus omnium animatorum. Sed in animalibus hoc melius apparet, quæ omnia motum habent dilatationis et constrictionis, qui sunt motus proprii spiritus vitalis, licet non omnia habeant motum processivum localem. In plantis autem minus : sed tamen et in his tempore veris in nocte clauduntur flores, et de die aperiuntur : quod est certum signum duplicis motus spiritus vitalis, scilicet ad interiora de nocte, et ad exteriora de die. Et similiter inter hyemem et æstatem proportionaliter loquendo : quoniam spiritus in æstate et vere movetur ad exteriora plantarum, et ideo tunc frondent et florent et germinant : in hyeme autem moventur ad interiora, ut ex vapore humidi interiorius contenti et repressi sumat restaurum spiritus. In autumno autem frigidus incipiunt claudi pori corporum plantarum ad principium retrahendo calorem et spiritum, hoc est, ad radicem : et ideo tunc ibi calor et

spiritus multiplicati quasi circa locum digestionis trahunt humorem a terra sicut a quodam ventre sive stomacho, ex quo humore iterum spiritus restaurantur et multiplicantur. Innegabile igitur est, quin spiritus sit illius particulæ animati corporis, a quo oritur sicut a principio, et ad quod recurrit sicut ad principium restaurans quæ deperdita sunt in ipso : hoc autem est cor, aut quod est loco cordis.

Hæc autem et alia jam constant ratione : quia jam scimus quod fons caloris est cor vel id quod est loco cordis : et scimus quoniam humidum nutrimenti non terminatur nisi per calidum. Oportet etiam quod humidum ad cor vel versus cor dirigatur quando terminatur ephesi : calor autem ex humido necessario generat spiritum. Cum igitur tam calor quam humor terminati et completi sint a corde et sint cordis, oportet quod spiritus per omnia sit ejusdem principii, et multo amplius ex quo in cordis sinistro ventriculo primo invenitur et motus spiritus et abundantia illius spiritus, et magis quam in aliquo membro quod sit in corpore animato.

CAPUT X.

De motibus spiritus in corporibus animatorum.

Hoc autem habito, de motu spiritus oportet nos determinare. Oportet autem scire, quod spiritus iste vitalis, qui secundum ordinem naturæ est ante respirationis spiritum, eo quod respirationis spiritus assumitur in adjutorium et augmentum istius, habet tres motus : unum quidem ex natura materiæ, et alterum quidem ex virtute motoris qui est anima, et tertium ex dispositione cordis vel ejus quod est loco cordis, a quo sicut a principio corporeo primo oritur et procedit.

Motus autem quem habet ex natura, est ascendere sursum, et maxime illud quod purius et subtilius est in ipso : quamvis enim sit compositum corpus ex elementis, abundat tamen in natura aeris, et ideo retinet motum aeris. Quod autem hunc motum in corpore obtineat, ex hoc nobis signatur : quia in omnibus animatis invenimus abundare spiritus subtiles et calores in superioribus circa capita animalium et circa extremitates et summitates plantarum : propter quod etiam plures ipse spiritus in superioribus corporum animatorum perficit operationes : in plantis enim folia et fructus et flores producuntur. In animalibus autem in superioribus fit operatio universaliter spirituum, et non in inferioribus. Quod autem quædam pars ejus descendit, non

impedit : illa autem est inviscata cibo grosso descendenti, et in ipso descendit : aut est repulsa ad locum illum quasi per violentiam, et tunc est ibi modica : ibi igitur est unus motus ejus. In hoc autem motu licet unus sit, tamen per accidens multa contingunt ei ex hoc quod in tali vase movetur : quando enim venit ad extrema animati, quæ aere frigido conclusa sunt, revolvitur in seipsum et inspissatur : et tunc inspissatus poterit complere quæ ante non potuit : et ex hoc est abundantia spiritus in superioribus magis quam in inferioribus.

Alter motus quem habet virtute sui motoris, est motus animæ : qui etiam simplex est in esse, sed multiplex in loco, materia, et virtute. Dico autem, quoniam *simplex est in esse* : eo quod esse suum non est nisi unius et ejusdem instrumenti, et ad unum et eundem motorem relati. Sed *multiplex voco in loco*, quoniam sicut instrumenti motus in arte est ad omnem locum materiæ quæ susceptibilis est formæ artis, ita est motus spiritus ad omnem viam et partem corporis, cui imprimi potest forma animæ quæ est ad operationem cujuscumque vitæ, et actus et perfectio corporis physici potentia vitam habentis : et quantum ad hoc esse formale in ipso voco propter formam motoris qui informat spiritum naturaliter, movetur sursum et deorsum, et ante et retro, et dextrorsum et sinistrorsum, ad omne membrum, in quo anima exercet aliquam operationem vitæ : et iste motus est ei naturalis quoad hoc, licet illa natura sit animæ natura et non corporis. Et, sicut superius tetigimus, sic efficitur spiritus universale instrumentum animæ, sicut lumen est universale instrumentum motoris orbis, quo materiam movet omnium generabilium et corruptibilium. Sicut enim motor orbis radiis et lumine secundum diversas irradiationes et angulos radiorum diversas vires suas infundit materiæ generabilium et corruptibilium, et movet eam ad diversitatem formarum pro diversitate partium materiæ secun-

dum quod unaquæque susceptibilis est, ita per omnia anima spiritibus radialiter implet corpus suum, cujus ipsa est motor, et implet ipsum viribus animalibus sive animæ pro diversitate organorum susceptibilium. Et hæc est causa, quod unus et idem spiritus operatur visum in oculo, et auditum in aure, et sic de aliis. Et hæc est causa, quod est motus ejus multiplex *in virtute* : licet enim sciamus, quod ab uno motore in uno mobili non possit causari nisi unum, tamen illud unum tantum multiplicatur secundum virtutes, secundum quod ostendit in alia et alia : et ideo una forma qua ab anima informatur spiritus quæ *forma vitæ* vocatur, et est in spiritu, non tamquam in subjecto vivente formaliter, sed est in eo sicut ars, et artis forma est instrumentum per quod inducitur in materiam. Et in hoc deceptus fuit Pythagoras qui hujusmodi spiritus voluit animalis esse.

Sic igitur illa forma vitæ potentia distinguibilis est et contrahi potest ad omnem virtutem quæ operatur aliquem actum vitæ, sicut est nutritiva, augmentativa, et sensitiva, et secundum locum motiva. Hic autem motus licet sit naturalis a forma instrumenti secundum quod instrumentum est, tamen, ut Avicenna bene dicit, neque naturalis, neque violentus, neque voluntarius potest dici. Causa autem quare non potest dici *naturalis*, hæc est : quia naturalis motus non est nisi uno modo, et ad finem unum sive loci sive formæ : hic autem motus est ad loca et ad formas multas : neque uno omnino est, quoniam est expulsione et attractione, sicut superius diximus : cum omnis motus naturalis, sive sit corporis simplicis, sive compositi, sit una via tantum, et non ex eodem in idem revertendo. Constat autem hoc in omni simplici habente motum rectum. In compositis autem ex hoc constat : quia sicut in aliis libris disputatum est, nullum corpus potest componi æqualitate arithmetica ex omnibus elementis, sed compositio est per æqualitatem geometricam :

et ideo omne compositum sequitur motum elementi in eo dominantis. De motu autem cœli qui est ab eodem in idem, alibi ostensum est quod non est naturalis. Igitur iste motus spiritus non est naturalis. Sed neque *violentus* esse potest : quoniam si ita esset, tunc esset per accidens, et non esset semper in animali, neque frequenter, sed raro, et non constitueret sed corrumperet animalis virtutem et perfectionem : esset etiam cum labore magno et pœna : quæ omnia motui spiritus ab anima omnino aliena sunt : cum ipse de omni animati sit constitutione, et virtutes perficientes et vigorem det universaliter omnibus partibus corporis : et hæc sit delectatio animalis et valor. Vocemus igitur eum motum spiritus secundum congruentiam animæ.

Tertius autem motus quem habet ex primo movente, quod est pars corporis, est motus expulsionis et attractionis, de quo motu per ea quæ determinata sunt in quinto *Physicorum*, scimus quod componitur ex duobus motibus et duabus quietibus. Scimus enim quod quotiescumque motum ipsum, quod fertur, uno puncto ut duobus utitur, quod toties quiescere accidit. Constat autem quod idem est terminus expulsionis, et principium attractionis. Ergo illo ut duobus utitur. Adhuc autem idem est finis retractionis et principium expulsionis : per eandem igitur necessitatem et ibi quiescere accidit : perfectur igitur motus spi-

ritus qui ex motore primo corpore perficitur ex duobus motoribus, qui sunt pulsus et tractus, et duabus quietibus componitur, quarum una est inter pulsus et tractum, alia inter tractum et pulsus. Sed valde considerandum est quis istorum motuum, et quæ istarum quietum sit naturalis, vel ambæ sint naturales quietes, vel ambo motus : sed hoc facile deprehenditur, quod ambo naturales sint animato in quantum animatum : et spiritus in quantum talis corporis instrumentum sit et non simpliciter. Pulsus enim evehit virtutes in organa : et hoc naturale est ei quod ex perfectione sua oportet operari actus vitæ. Tractus enim est revocatio ad interiora spirituum ut salvari possint : et hoc iterum naturale et necessarium et ex suppositione, sicut in libro de *Somno et Vigilia* diximus. Dicamus igitur, quod pulsus est simpliciter intentus a natura animati, sed tractus est intentus ex suppositione et propter aliud, ut scilicet salvetur a natura animati corporis : igitur et quies quæ est finis pulsus, erit naturalis ex hypothesi sive ex conditione exstante illa, quod salvetur animatum et vivum : quies enim illa naturalis est ad quam est motus naturalis : et universaliter quale iudicium est de motu, tale est de quiete ad quam est motus idem.

De his igitur quæ essentialiter spiritui animatorum conveniunt, in tantum a nobis dictum sit.

TRACTATUS II

DE DIFFERENTIIS SPIRITUS.

CAPUT I.

*Utrum sit unus spiritus naturalis, vitalis,
et animalis, aut diversi?*

Fuerunt autem quidam magnæ auctoritatis viri, qui hunc spiritum qui est instrumentum animæ, per differentias dividerunt. Plato autem et ante eum Socrates secundum illas differentias dividunt etiam principium spiritus, dicentes principium naturalis spiritus esse in hepate animam cupiditivam sive appetitivam : principium autem spiritus vitalis esse in corde animam quam *crascentiam* vocat

Plato, sicut dicit Apuleius in libro de *Platonis dogmate* et vita ipsius. Principium autem animalis spiritus esse animam rationalem in capite : animas tres per substantiam differentes, et spiritus sedes ipsorum. Horum autem opiniones in tantum videtur sequi Galenus, qui dicit nullo modo idem esse principium naturalis spiritus, quod est principium spiritus animalis : cum naturalis spiritus per venas operetur et fluat ab hepate : principium autem animalis dicit esse in cerebro per nervos sensibiles et motivos : principium autem spiritus vitalis assertit esse in corde per arterias. Cumque apud istos persuasum sit non ab eodem principio derivari venas et nervos et arterias, dixerunt non esse idem principium istorum spirituum qui differunt substantia et loco : differunt etiam formæ substantiales, et motores numerantur, et differunt secundum numerum et differentias eorum quæ moventur. Cum igitur, ut inquiunt, cor, cerebrum, et hepar, loco, subjecto, et numero differant : necesse est quod motores eorum loco, subjecto, et numero differant, et inde tres in homine animos, et similiter in animalium cor-

poribus esse concesserunt vel contenderunt.

Adhuc autem Alexander in libro de *Motu cordis*, per omnia eorum opinioni, ut videtur, consentiens, hanc inducit rationem per hanc propositionem quasi communiter conceptam animo, quod diversarum virium et non subalternatim positarum diversa sunt organa, et per consequens diversi spiritus et operationes. Vegetativa autem quæ est nutritiva, et animalis quæ est sensitiva et motiva, et vitalis, ut asserit, diversæ sunt vires et non subalternatim positæ : propter quod pronuntiant istas esse substantialiter animas diversas. Et Plato quidem, ut Apuleius dicit, ait cupidinem reclusam esse in abdominis latebras concupiscentiæ et luxuriæ, ut longe relegata a sede superna sapientiæ et rationis deviare sensum et sapientiam non faciat aberrare. Irascitivam autem in corde in fonte caloris, ut a loco et sede vitæ nocumenta repellat.

Contra autem ista dicta fuit Aristoteles cum toto Peripateticorum cœtu, quem sequuntur Avicenna et Averroes, multis rationibus adstipulantes sententiæ Aristotelis, et Platonis dogma improbant. Et in libro suo de *Somno et vigilia* disputans contra istos, utitur propositione per se nota, quod totius corporis est anima una et substantia quæ est forma una : eo quod communis animi conceptio est, quod esse differt secundum numerum essentialium formalium, et secundum quod differt esse substantiale, ita differunt substantiæ. Non enim potest dici, quod ex æquo venientes istæ substantiæ perficiunt corpus organicum physicum : quia sic idem ex æque reciperet plures formas sese perficientes. Si autem diceret quod non ex æquo veniunt, tunc secundum prius et posterius in eodem essent formæ multæ non unitæ, quod est impossibile :

aut oporteret dici quod una esset dispositio et accidens, et altera sicui necessitas : et tunc oporteret quod aliqua istarum esset accidentalis. Sed quia nos in libro de *Anima* ¹ de his disseruimus, sufficit de his mentionem fecisse.

Galenus autem objicit dicens, quod per anatomiam probatur venas non a corde, sed ab hepate derivari : eo quod majora orificia habent in hepate et minora in corde : et ideo non esse eandem viam spiritus naturalis et vitalis : cum arteriæ quæ sunt viæ spiritus vitalis, deriventur secundum anatomiam a corde. Eodem autem modo dicit, quod nervi procedunt a cerebro. Cum igitur non eadem sint viæ, nec eadem origines, constat quod spiritus non sunt idem spiritus et unus, nec est alicujus unius particulæ animæ vel corporis. Sed quia ista disputatio non potest determinari sine sententia divisionum vel recisionum quam Græci *anatomiam* vocant, ideo de hac disputatione usque ad librum de *Animalibus* supersedeamus, et de solo loquamur spiritu, utrum sit unus vel non.

Nos enim scimus, quod unius effectus simplicis est causa una : et si contingat illum effectum recipere determinationem vel additionem in eadem generis natura, hoc erit a causa aliqua secunda super quam prima influit. Verbi gratia, esse effectus unius et quamdiu manet unicum esse simplex, non erit causatus formaliter nisi ab essentia una. Si autem fiat ipsum esse determinatum ad vivere, oportet quod hoc fiat a causa vitæ super quam influit causa quæ est essentia aliqua. Hoc autem semper contingit quoties causatum causæ prioris invenitur in causato causæ posterioris cum additione : tunc enim universaliter causa prima influit super secundum causam : et illa quæ est prior, est principium, secunda autem de principio illo traducta.

¹ Cf. II de Anima, per multa capita.

Resumamus igitur quæ sæpius dicta sunt, quod anima secundum se est causa vitæ, et quod nutrire, et augere, universaliter sentire, et movere secundum locum, et intelligere, sint opera vitæ cujusdam : oportet igitur ex demonstratione, quod omnis vita sensus et nutritivi et augmentativi et secundum locum motivi et intellectus causetur ab eo cujus simpliciter est effectus vivere. Probatum est autem in scientia de *Anima* ¹, quod in eadem proportione se habent organa ad invicem, in qua se habent potentiæ motoris ad invicem. Cum igitur potentiæ motoris ordinentur omnes ad unum aliquid a quo fluunt et causantur, oportet quod organa omnia dependeant ad organum unum a quo recipiunt influxum. Hoc autem signum est, quod non dubitamus quin in omnibus animatis principium sit cor, vel id quod est loco cordis, et ex ipso generantur omnia membra et organa. Si ergo ex corde primo omnia generantur, oportet quod ad cor tamquam ad principium suæ perfectionis in omnibus habeant dependentiam et respectum. Idem autem omnino convenit de spiritu : cum enim sit vivificus omnis spiritus secundum aliquam vitæ operationem, oportet quod ab uno aliquo primo formam et habitum vitæ accipiat spiritus omnis : et hic quidem est cordis ventriculus sinister, sicut supra diximus. Propter quod dogma Platonis retinentes dicimus erroneum esse dictum ipsius : etsi forte ista potentialiter divisa et non essentialiter dixit, et hoc esse unius et ejusdem animæ potentias diversas fundatas in una substantia, sicut naturales potentiæ unius et ejusdem substantiæ simplicis valde sunt multæ. Sed hoc non sonant verba ejus, nec hoc dixerunt eum intelligere Philosophi qui post eum dicta sua retractaverunt. Membra etiam omnia ad cor esse reducta et ligata dicit Aristoteles, sicut ad principium

suæ generationis et formationis : et quod Galenus dicit, oriri venas ab hepate, falsum esse contendit Aristoteles. Sed contrarietas illa ex multis anatomiis consideranda est in libro de *Animalibus* ².

Sed nunc hic tantum dixisse sufficiat venarum substantiam oriri a corde, sed tractum primum faciunt ab hepate et stomacho et intestinis. Neque signum sufficiens est ad hoc quod oriri dicantur ab hepate : quia orificia majora habent ab hepatis parte : hoc enim non contingit propter massam substantiæ ex qua generata est substantia venarum, sed quia in primo sugunt massam ptisanariam, et elevant ipsam versus cor, ut inde trahant formam nutrimenti, quod scilicet sit unibile potentia ei quod vivit et in quo animæ exercentur operationes. Ut enim melius totam substantiam nutrimenti capiant, facta sunt orificia earum versus hepar magna et ampla, et non propter hoc quod oriantur ab hepate.

Similiter autem dicimus, quod substantia nervorum venit ex corde, et ducta ad caput, ibi dividitur ex tela cerebri in nervos sensibiles et motivos.

Similiter autem est de substantia spiritus : quoniam spiritus oritur totus a corde : sed cum cor solum habeat virtutem generalem, et cætera membra principalia virtutes habeant particulares et determinatas, ideo spiritus qui oritur ex corde et virtutem vitæ habet universalem, et hoc in cerebro determinatur et specificatur ad formam sensus in parte anteriori, et ad formam motus in posteriori, et ad formam vegetationis habet nutrimentum in hepate, et ad formam formativam, et plasmativam, quam quidem dativam vocant et divinam, in testiculis.

Et sic patet qualiter omnium istorum principium primum est cor : et hoc quod influit, determinant et contrahunt virtu-

¹ II de Anima, per multa capita.

² III de Animalibus, tract. I, cap. 3.

tes in organis principalibus residentes ad operationes vitæ determinatas secundum opera vegetativæ, vel plasmativæ secundum locum.

Et per hoc etiam patet, quod omnes virtutes animæ quasi quadam subalternatione subduntur motori cordis, sicut et omnia membra ab ipso sumunt principium suæ generationis.

Ex hoc etiam patet qualiter principium sensitivum sit directum ad cor, et tamen habet organum suum in cerebro.

Clarum etiam est qualiter spiritus revocati ad interiora, diriguntur ad cor omnes, licet alius sit vitalis, et alius naturalis et alius animalis. De his tamen omnibus in libro de *Animalibus* dicitur.

CAPUT II.

De spiritu naturali et operibus ejus et ortu.

Dubitabit autem forte aliquis, quare nominetur *spiritus naturalis* qui per nutrimentorum spirat regionem, et nutrimento et digestionem deservit. Adhuc autem quare spiritus ille non discurrit in arteriis sicut spiritus vitalis, et ad quid sit necessarius spiritus ille. Si enim naturalem vocant, quia naturæ sit instrumentum, non videbitur esse verum : quia non naturæ, sed animæ nutritivæ instru-

mentum est spiritus ille : cujus signum expressum est, quod non tantum unum operatur, sed multa, nutrimentum vertendo, et augmentando, et hujusmodi multa quæ sunt digerere, attrahere, expellere, retinere, vivere, de quibus alibi dictum est. Convenienter igitur non dicitur naturalis, ut videtur. Cum autem spiritus et nutrimentum sint diversæ substantiæ, videbitur forte alicui inconveniens si non habeant receptacula diversa. Eodem autem modo cum calor hujus terminare possit omnino, videtur superfluum esse spiritus.

Sed ad omnia hæc dissolvenda dicit Avicenna¹, quod in veritate spiritus naturalis derivatur a corde secundum modum superius explanatum. Sicut enim inconveniens est, ut inquit, si aliquid secundum substantiam trahatur ab uno membro, et accipiat ab alio membro perfectionem, et tunc perfectum iterum dirigatur ad id unde substantialiter et materialiter exortum est, ut in ipso propriæ perfectionis exerceat virtutem et operationem : sic igitur spiritus substantialiter et naturaliter elevatus a cibo in corde accipit perfectionem ad opera vitæ : et tunc iterato dirigatur ad hepar et stomachum et viscera alia : et in illis operatur vitæ potentiam in nutrimento. Similiter autem ab ipsis tunc accipit sua virtus determinationem ab opera illa quæ naturalia dicuntur, sicut in cerebro accipit determinationem ad illa quæ animalia dicuntur. Dicuntur enim opera illa naturalia et virtutes illæ naturales et spiritus naturalis : non ideo quod natura sit quæ in hujusmodi agit secundum quod natura distinguitur ab anima, sed ideo quod virtutes et opera illa similia sunt in naturalibus, licet ab anima hujusmodi operationes procedant : et quia fiunt per virtutes naturales, quæ sunt calidum et humidum, frigidum, et siccum, sicut dictum est ali-

¹ AVICENNA, Lib. VI Naturalium, part. v, cap.

8 et alibi.

bi. Ad modum enim naturalium illa esse dicuntur quæ non subjacent libertati, sed necessitati, et in quibus non intervenit lassitudo : sed in hoc naturalibus non simulantur, quia vegetabilia multa agunt per se : et spiritus ejus est expulsus et attractus, sicut et omnis alius spiritus. Spiritus autem iste qui ob has causas naturalis vocatur in attractu ad intus deservit digestionem calefaciendo ex motu et calore quem inducit. In quantum autem est in ipso virtus cordis, quæ universaliter est vitæ operativa secundum potentiam in actum, et quod habitum contrahit vivificantis, substernuntur arteriæ venis undique, ut expulsu et spiratione spiritus habitus vivificationis nutrimento confortetur : et ista est una de utilitatibus ejus potior inter omnes. Confert etiam ipsis organis nutritivis habitum vitæ eo modo quo confert oculus solutionem ad actum vigiliæ. Nisi enim ea influeret spiritus vitæ, non recte formaretur nutrimentum vivo corpori, sed essent sic ligata et suspensa ad actum, sicut organa immobilitata per frigus vel aliquam aliam dispositionem, quæ solum organum suspendet ab usu, licet habeat perfectionem in habitu, sicut in libro de *Somno et Vigilia*, et immobilitate et solutione eorum dictum est. Per hoc etiam patet, quod magna pars et efficacior spiritus naturalis illuc decurrit per arterias in his quæ habent sanguinem et arterias : spiritus autem qui inclusus est in substantia cibi antequam depuretur, imperfectus est : et ideo dirigitur ad cor ubi est sedes et fons vitæ, ut ibi perficiatur, et tunc reversus vitæ perficiat operationem, ut dictum est. In aliis autem quæ arterias non habent, in substantia cibi continetur propter causas superius enumeratas.

CAPUT III.

De spiritu vitali, quare sic nominetur, et de ejus operationibus.

Spiritus vero vitalis secundum omnes Philosophos a corde oritur, et per arterias pulsando per totum corpus dirigitur a sinistro cordis, vel ejus quod est loco cordis, capiens originem, et tendens sursum et deorsum in omnem corporis situm et positionem. Cum autem *vitalis spiritus* dicitur, intelligitur spiritus indistincte et communiter operans vitam, quæ quidem vita viventibus est esse et perfectio¹. Cor enim universalem habens virtutem, sedes animæ est secundum seipsum. Unde sicut anima de se habet actum vitæ, augere autem et sentire per potentias quæ fluunt ab ipsa, et sunt naturales proprietates ipsius : ita etiam corde se non informat spiritum, nisi ad quod sit vivificus : et si debeat fieri sensitivus et motivus, hoc erit ex determinante ipsum organo sensus et motus. Cum enim illud organum quasi pro anima habeat virtutem sensitivam vel motivam cum movet organum suum instrumentum, hoc est, spiritum vivificum a corde sibi directum, movebit ipsum ad formam sensus et motus : et ille diffusus in nervos sensibiles et motivos concavos, per-

¹ Cf. II de Anima, tex. et com. 37.

ficit sensum et motum, sicut patet in exemplo quod sæpe induximus de fabro et malleo. Et hæc est causa, quod intercepta via spiritus in aliquo membro, statim membrum efficitur stupidum et insensibile et immobile: cum tamen retineat figuram suam et quantitatem, et forte nutriatur: et si per medicamentum vel natura aperiatur via spiritus, incontinenti redit spiritus et sensus et motus ad membrum. Ista igitur est causa quare spiritus vitalis dicatur, et ista est operatio ejus propria.

Habet autem spiritus iste magnam differentiam in plantis et animalibus. In plantis enim per similitudinem corporis plantarum non oportet esse talem distinctionem spiritus et organorum: quia ibi ab eodem principio simul per easdem vias procedit spiritus et nutrimentum, et forte in quibusdam animalibus non habentibus sanguinem, quæ multum similia habent corpora, et eodem modo præterquam in membro quod cum aliis partibus corporis similitudinem non habet in figura et virtute, sicut est caput in his quæ habent caput, ut est anguilla, serpens, cancer, et hujusmodi. In aliis autem capita non habentibus, videtur quod permixta habent spiritum et nutrimentum in viis eisdem, nisi quod in loco cordis in talibus motivos spiritus pulsare inveniuntur: nos enim nescimus anatomiam tali animalium propter parvitatem corporis istorum. Est autem non prætermittendum, quod nec spiritus vitalis, nec motus voluntarius esse dici potest, cum necessitati subiaceat, nec naturalis dici potest propter causas superius inductas, nec etiam est violentus, sed est secundum cordis exigentiam, quem Græci dicunt coticum et pulsativum, et non persuasibilem ratione: et ideo coticam et pulsativam virtutem virtuti et vitio non dicunt subjacere posse.

CAPUT IV.

De operationibus et natura spiritus animalis.

Animalis autem spiritus prout omnes testantur concorditer auctores, plus accedit ad opera animæ secundum suam animam sibi convenientem, quam aliquis aliorum. Hic enim licet exeat a corde, evolat in vacuitatem cellularum cerebri, et ex illis dirigitur in nervos concavos, qui a sensus communis organo ad sensus proprios diriguntur: quorum tamen nervi illi qui optici sive visivi dicuntur et majores et magis sunt concavi, et plus capiunt de spiritu et puriorem et lucidiorum, qui solus elevatur, colligunt: omne enim altius de aliqua natura sublimatum, purius est et clarius: et ideo quod a cordis concavo quasi per colla quædam anfractuosa arteriarum aliquid de spiritu evadit ad cerebrum, illud est purissimum et clarissimum formis apprehensionis habile, ut in ipso sigillentur.

Distinguitur autem caput tres cellulas, quarum duæ sunt in capite ambæ per longum sibi conjunctæ: et sunt ambæ medullosæ humidæ, ut facile recipiant formas sensibilium: et ideo duæ sunt, quod si uni nocumentum eveniat, quod altera adhuc virtutes et operationes perficiet animales. Posterius autem est una medullosa, sed magis sicca: et inter posteriorem et duas præcedentes quæ distinguuntur ad frontem, est vacuitas, ut di-

cit Constabenluce. Spiritus igitur animalis in primis infunditur ab arteriis, et per quemdam porum quem claudit caruncula figuræ, et quantitas vermiculi, postquam porus reseratur, colatur in medio vacuum: et quia in posteriori parte qua dirigitur ad vacuum spatium, similis claudit caruncula, et ideo etiam cum illo porus reseratur, colatus amplius fluit in posteriorem capitis cellulam, et aliam perficit in omnibus illis quæ sunt magis animæ quam corporis. In primis quidem duabus sensum communem, et sensus proprios, et imaginationem influit. In tertia autem, ut dicit, memoriam, et influit in nervos motivos, sive oriantur a cerebro, sive a nucha quæ vicarius est cerebri: influit enim spiritus motivus per spondiles dorsi per omnia paria nervorum, quæ a spondilibus et nucha oriuntur, et dat eis motivam virtutem. Sentire autem et imaginari et memorari et intelligere animæ vocantur opera: et ideo vires illæ et spiritus animales vocantur.

Sic igitur spiritus discurrit quidem a corde ad cerebrum, et ibi opera animalia et animalium virtutem operatur transendo de cellula in cellulam colatus et digestus et quasi sublimatus, sicut dictum est. Hujus autem signum est, quod cum homo intente de aliqua re cogitat et meditat, tunc elevat et deprimit caput, quasi ipso motu natura ostendat se laborare et adjuvare ad hoc ut facilius elevata caruncula vermiculari spiritus fluat de cellula in cellulam cum formis intellectus, imaginationis, et recordationis. Tamen, sicut diximus, et virtutes animales fluunt ab anima quæ est in corde, et organa eorum non perficiuntur ad actum nisi per spiritum advehentem virtutem cordis in ipsa, sicut sæpe diximus: et cum retrahuntur spiritus, ad cor recurrunt: cum autem incipit recur-

rere spiritus ad exteriora, tunc prius est in medio vel in posteriori cellula, quam in anteriori: quia anterior est medullosa et quasi catarrhis plena, quia ad ipsam declinat in frigiditate humiditas quæ descendit a cerebro: et ideo soluta imaginatione non solvuntur adhuc sensus post somnum, sicut apparet in his quæ de somno dicta.

CAPUT V.

Qualiter ad invicem se habeant isti spiritus?

Videtur autem talis esse determinatio horum spirituum, qualis est et animæ. De anima enim diximus, quod sua determinatio est determinatio figuræ¹: quoniam sicut in figuris trigonum est in tetragono, ita est vegetativum in sensitivo, et sensitivum et vegetativum in intellectivo. Omni eodem modo videtur vivificus esse spiritus in naturali, et naturalis et vivificus in animali in omni eo quod habet has spirituum differentias. Si enim consideremus istas, in diversis animatis secundum genus, sicut in planta, et animali, inveniuntur in planta non separari vivificum a naturali: non enim aliquo modo aleret nisi operaretur vita: quoniam omne quod alitur, vivit: et omne quod alit, cum assimilatum est, habet

¹ Cf. I de Anima, tract. I, cap. 11.

habitum vitæ quo movetur ad vivum sicut ad naturalem sibi et proprium locum. In animalibus autem numquam separantur hæc duo ab animali spiritu quod constat per se ipsum: quoniam omne operans animaliter et vivit et alitur. Similiter autem invenimus hoc considerando in eodem animato: videtur enim, quod omne posterius in ordine formalis essendi tamquam fundamentum supponit et relinquit suum antecedens: alere enim est vita vivere quadam. Oportet igitur quod omne agens actionem alimenti, agat prius secundum naturam operationem vitæ. Similiter etiam est de animalibus: illi enim non sunt nisi in eo quod alitur organo, et in eo quod vivit. Oportet igitur quod id quod agit ad esse et permanentiam organorum animalium, quod hoc agat ad vitam ipsorum et alimentum: est autem esse ipsorum organorum quo sunt id quod sunt secundum essentiam et formam, quod animalia sunt organa.

Cum igitur nutrimentum sit secundum formam membrorum et non secundum materiam, oportet quod nutriens ea operetur ad animalitatem: igitur et per consequens vivificans ea agit in eis vitam talem qualis competit animalibus organis. Sic igitur patet qualiter virtus vivifici spiritus est in naturali, et virtus naturalis et vivifici spiritus est in animali: et propter hoc animalis spiritus perfectior est, cum plures in se habeat nobilitates vitæ.

Amplius sicut se habent motores ad invicem, sic se habent ad invicem instrumenta. In motoribus autem sic est, quod vivum est in utente alimento, et vivum et alimento utens sunt in animali virtute: igitur in spiritibus qui sunt istorum motorum instrumenta, similiter se habebunt ad invicem, ita quod vis et vi-

gor vitæ erit in spiritu naturali, et vis et vigor vita et nutritionis erit in eo qui operatur animalia.

Sed tunc dubitabit aliquis, qualiter vivificus non separatur a naturali, sicut naturale separatur ab animali per locum et substantiam in animabus, quam etiam in virtutibus spiritus, præcipue cum in eodem corpore inveniamus quasdam virtutes operantes naturaliter et non animaliter, et similiter quosdam spiritus? Videtur enim forte ex hoc alicui, quod etiam quidam spiritus et quædam potentia debent operari vivifice et non naturaliter: hoc autem stare non potest: quia omne animatum terrestre, sive membrum, sive totum corpus, necessario nutritur si debeant in esse salvari. Nec potest aliquis dicere, quod aliquo spiritu nutriantur membra animalia, et alius operetur animalitatem in ipsis: eodem enim modo quo spiritus dicitur operari ad nutrimenti digestionem, eo modo conceditur operari ad assimilationem. Quod autem tantum vivo assimilatum est, non continue sequitur quod assimilatum est sensibili et imaginativo: igitur vivificus spiritus solus non assimilaret sufficienter nutrimentum organum virtutum animalium.

Idem autem prorsus sequitur de spiritu naturali si dicatur ad nutrimentum organorum virtutum animalium operari. Hoc autem totum ex hoc accipitur, quod scimus omne nutriens assimilari debere nutrito: et quod non nutriuntur membra secundum materiam, sed nutriuntur membra secundum formam accepta, sicut in primo *Peri geneseos*¹ dictum est. Est autem et aliud quod in tota natura invenimus, quod scilicet natura procedit via compendii, et non utitur superfluis, sicut non deficit in necessariis. Cum igitur hoc natura uno spiritu facere possit, vi-

¹ I de Generatione et Corruptione, tract. III, cap. 8. Cf. etiam III de Anima, tex. et com.

43, et de Spiratione et Inspiratione, et alibi.

detur omnino superfluum ad hoc alios spiritus dirigere. Adhuc autem si a locis nutritivis dirigeretur ad superiora capitis spiritus, cum loca naturalia sint fumosa grosso fumo, et calidos valde habentia spiritus, omnino oporteret quod et fumus et calor magnus ad superiora dirigeretur: contingeret autem ex fumo obscurari formas apprehensionis, et destrueretur apprehensio, et forte sensus obstrueretur: ex calore autem contingeret permisceri operationes et spiritus, et induci nocumentum.

Sic igitur potest dici animalium virtutum organa nutriri spiritu naturali, qui tamen ponitur nutrimento deservire. Propter hoc autem et his similia dicendum videtur, quod hujusmodi vivificum est in naturali: et hæc duo in animali spiritu, sicut est in ipsis particularibus potentiis animæ. Quod autem vivificum non separatur ab aliis per locum et subjectum, causa est, quia vita est actus animæ secundum seipsam et non secundum potentiam: et sicut substantia animæ et essentia est in omnibus potentiis ejus, ita vita quæ est actus hujus substantiæ, invenitur in omnibus animatis, et communiter in plantis et animalibus. Sic autem non est de aliis potentiis: et ideo etiam vis vitæ et naturalium sive vegetabilium virtutum, est in spiritu animali, sicut dictum est: et omne operans aliter operatur vitaliter et vegetabiliter, sed non convertitur. Quod autem omne vitale vegetando operatur, per accidens est: quia scilicet sine operatione vegetationis non salvatur in esse id quod animatum est, et propterea quando isti spiritus in eodem et uno dicuntur vitales et naturales et animales, nominantur ex ultimo et perfectiori ad quod eos movet motor ipsorum, ut patet per ante dicta.

CAPUT VI.

De differentia quam habent hi spiritus ad invicem.

Est autem in ipsis quoad qualitates eorum magna differentia, licet vigor animatis semper salvetur in sequenti. Spiritus enim naturalis turbidus est et grossus et calidus quasi calore bulliente: propter quod etiam in vulneratis circa loca nutrimenti et superviventibus auditur spiritus quasi ollæ bullientis. Tales enim proprietates sunt necessariæ loco digestionis, qui fumosus est: et ideo turbans spiritum, neque retineret fortem caliditatem, nisi esset spissus, neque iterum nondum assimilatum nutrimentum converteret, nisi esset calidus valde: quando enim ex contrajacentibus dirigitur alimentum passionibus, oportet majoris vigoris esse agentia quam quando de simili efficitur similis. Nutrimentum autem quando primo cadit in vasa nutrientia, omnino dissimile est: et oportet quod spiritus naturales qui ad decoctionem deserviunt, sint calidiores et efficacioris operationis in convertendo et complendo massam cibalem.

Hi autem qui dicuntur vitæ spiritus, oportet esse temperatiores et frigidiores et magis tenues et sicciore, et quasi semper expulsos, ita quod idem numero non retrahitur, sed alius similis sibi, et sunt magis albi spiritus isti, habentes tamen modicum tenuissimi sanguinis admix-

tum : sunt tamen temperatiores et frigidiores propter hoc quod refrigerium quoddam cordi dederunt. Tenues autem et subtiles sunt, ut undique cum vita quam advehunt, possint penetrare : sicciores autem sunt, ut sint velocioris motus : expulsi autem sunt, eo quod fuerunt cordis ventilabrum : et ideo fumosas in aliqua parte sui substantias admixtas habentes, non essent utiles, si ibidem statim retraherentur.

Animales autem subtilissimi, clarissimi, et frigidiores omnibus sunt, et multiplices magis aliis, et diversi inter se huiusmodi qui vocantur spiritus animales, Subtilissimi autem sunt, ideo quia ad altiore locum sunt sublimati. Clarissimi autem sunt, ut susceptibiliores sint for-

marum et intentionum quæ recipiuntur per sensus ex quibus perficiuntur operationes animales : et ut non commisceant rationes et formas, ablata est ab eis caliditas : quia si essent calidi, resolverent substantiam cerebri et permiscerent formas, et operationes confunderent animales. Sunt autem adhuc etiam alia de causa frigidi, ut scilicet in se habeant aliquid retentivum formarum apprehensionis, quas in se vehunt : multiplices autem sunt, quia multiplicibus deserviunt virtutibus animalibus, de quibus in libro de *Anima*¹ satis dictum est.

In tantum igitur de divisione spiritus et de singulis eorum et de convenientia eorum ad invicem et differentia dictum sit a nobis.

¹ II de Anima, tract. iv, cap. 7.

DE SPIRITU ET RESPIRATIONE,

QUI EST DE SPIRANTIBUS IPSIS

SECUNDUM QUOD SPIRANTIA SUNT

LIBER SECUNDUS

TRACTATUS I

DE SPIRITUM INTUS HABENTIBUS.

CAPUT I.

Quare non habentia sanguinem non respirant?

Secundum autem eundem modum de *respiratione et inspiratione* prosequi oportet. Sed nos oportet statim in principio

istius libri loqui de respiratione eorum quæ videntur respirare, quo spiritu scilicet spirent.

Et primo ante omnia an spirent aliquo modo, et unde oriatur in eis iste spiritus, et cujus sit particulæ, et cujus utilitatis sit in ipsis? et tunc tandem dicere de respiratione, quæ est in respirantibus. Spiritus quippe simplicior est qui est intus in respirantibus, si tamen aliqua talia sunt in his quæ spirant extra: et ideo prius de eis dicendum videtur: quia enim sanguinem non habentia non respirant exterius, contingit absque dubio quod talia frigida sunt in corde, et offenderet eis ablatu spiritus, et exstingueret modicum igniculum qui commovet corda ipsorum. Signum autem huiusmodi est, quod talium nutrimentum ad ruborem non convertitur, cum sciamus ruborem in humi-

do fieri ex aliqua ipsius humidi inflammatione. Adhuc autem omne calidum humidum subtiliatur et dividitur si confortatur in ipso calidum. Humidum autem talium animalium viscosum est et spissum, sicut phlegma. Oportet igitur quod talia frigida sint, et in loco digestionis et circa locum vitæ. Si autem aliquis dicat quod spissitudo nutrimentalis humidi provenit ex eo quod nimis agit in ipso calidum, et epotando humidum inspissat ipsum, sicut contingit circa pus nascentiarum et apostematum, hoc nullo modo stare potest: quia tunc primo statim accepto nutrimento esset humor tenuis. Invenitur autem in talibus animalibus, si quis ea evisceret, quod humidum cibi eorum a principio est spissius quam postea.

Relicto igitur quod cum frigida sint illa, ut dictum est, et non conferret eis respiratio et inspiratio. Ea autem quæ semper sunt aquatica, sunt talia: et ideo omnia aut pauci, aut nullius sunt sanguinis: et est sanguinis eorum frigidus et aquosus. Ea autem quæ diu quidem sub aqua, non tamen continue sub aqua esse possunt, sive sint volatilia, sive gressibilia, ut lucus, castor, et lupus marinus, et canis marinus, sive etiam reptilia, ut quidam serpentes, proportionaliter procul dubio etiam oportet quod habeant frigiditatem circa locum vitæ et digestionis. Oportet enim omnino ut sit ex altera duarum causarum: aut enim proportionaliter dicta loca habent frigida, sicut dictum est, quod non calefiunt nisi per magnum tempus: aut oportet quod tantum hauriat simul de spiritu per inspirationem unam, quod ex thesauro illius cor iterum dum sub aqua sunt, eventetur et refrigeretur: sed secundum esse non potest, eo quod in pulmonibus eorum non tam diu posset stare spiritus, nisi calefieret plus quam cordi ad eventandum expediret. Relinquitur igitur, quod causa istiusmodi suspensionis spiritus sit proportionalis frigiditas circa loca vitæ et digestionis. Signum autem est,

quoniam venantur cibum in locis frigidis: cum enim frigidis nutriantur, frigida esse oportet secundum complexionem. Signum autem etiam hujusmodi est, quod talia non multum sunt spissæ et rugosæ pellis. Spissitudinem autem et rugositatem non nisi ex frigiditate causari, non est qui dubitet.

Animalia autem continue respirantia quæ in aquis cito submerguntur, calida sunt valde circa loca digestionis et vitæ, et sincero et frigido aere indigent ad refrigerium pectoris, quem cum non habent, moriuntur corde incendente ex calore suo naturali, et ex eo qui ex motu suo nascitur humidum quod est in ipso, et spiritum consumente utrumque, et ipsum exstinguitur, cum sui caloris destituatur subjecto et vehiculo.

CAPUT II.

An non habentia sanguinem habeant respirationem aliquam, et si habent, quæ sit illa?

Utrum autem spirent intus aliquo spiritu quæ sanguine carent, vel non, dubium ingerit multis subtiliter considerantibus opera et anatomias eorum: propter enim inductas rationes videntur non respirare spiritu respirationis, quæ fit ab exteriori aere: quia, ut ait Orpheus, « aspiratur anima a respirantibus ventis. » Quod autem in seipsis spirent, ex eo pro certo scimus, quod quædam talium sunt musica et vocalia valde, sicut

sunt cicadæ et locustæ et muscæ : et ego vidi ærucam magnam, quæ cum tangebatur, sonum dabat. Ex his enim quæ bene in libro de *Anima* ¹ determinata sunt, scimus sonum et vocem non fieri nisi in spiritu retento, non inspirato, neque respirato. Oportet igitur, quod eorum quæ sanguinem non habent, spiritus intus sit retentus in quo sonos et voces faciunt. Hujusmodi enim quando volant, ut apes, et muscæ, et genera scarabæorum, omnia volando sonant, et, ut in libro de *Somno et Vigilia* dictum est, alata sunt bombantia. Spiritum igitur interius operit ad aliquid percussum : oportet igitur talibus inesse spiritum.

Videmus etiam, quod quæcumque sanguinem non habentia morantur continue in aquis, sicut piscium genera et cancrorum, quæ nullo modo sonant, cum in his quæ sunt in aere et terra, quædam sonent, et tamen sanguinem non habent : videtur igitur quod in ea aliquid inducatur de aere extrinseco. Amplius autem quoniam si esset in eis intrinsecus tantum spiritus, cum ille non sit nisi qui oritur a nutrimento, oporteret quod in multa et continua emissionem illius debilitarentur et conjungerentur animalia ipsa. Hæc autem animalia videmus continue sonantia, præcipue quando moventur. Videtur igitur oportere omnimodo quiddam respirationis aeris exterioris esse in ipsis. Hoc autem non videtur per prædicta, et difficile videtur perfecte determinare de his, ideo quia anatomia corporum eorum non bene est investigabilis propter parvitatem ipsorum.

Videtur tamen dicendum, quod talia spiritum habent ex natura sibi innatum et complasmatum, quem *complantatum* vocat Aristoteles. Spiritus autem ex natura complantatus est, qui ex humido

cibali et radicali nascitur, et juxta diaphragma in regione vacua retinetur. Quod enim talia non sonent ore, ostenditur experimentis : abscisso enim subito capite, adhuc cantat achalab, et multa genera alia animalium reptilium : cum tamen sciamus quod per caput sugit nutrimentum, eo quod videmus tales linguas longas emittere ex capite suo, et infigere his a quibus sumunt nutrimentum. Si autem ab extra spiritum traherent, absque dubio per poros traherent manifestos, per quos etiam trahunt nutrimentum : ubi enim una via sufficit, natura non facit duas, sicut in omnibus demonstratur operationibus naturæ. Est igitur iste complantatus spiritus, qui sic retinetur in ipsis. Signum autem est istius, quod diutissime continue sonant : quod non facerent si spiritus in quo est sonus, esset aliquando exspiratus et inspiratus aliquando : exspirando enim et inspirando nihil omnino sonare potest.

Si autem quis dicat quod sonat spiritus non expulsus : iste autem spiritus si intus retentus est, nihil omnino videtur sonare. Hæc autem solutio facilis est : quoniam absque dubio motu et conatu cordis ille spiritus per circulos pectoris talium animalium expellitur : et tunc sonat. Hujus autem signum est, quod omnia talia dum sonant, tremunt valde in alis etiam quando apprehensa tenentur, et tremunt multum spiritualia ipsorum : et est iste sonus sicut sonus excussus per fistulam : eo quod etiam corpora eorum circularia sunt duris circulis composita, per quæ sicut per foramen fistulæ evadens spiritus sonat. Et hæc est causa etiam, quod spiritus musicus et modulatus videtur esse sonus. Signum etiam hujusmodi præcipuum est, quod talia non sonant nisi tempore calidissimo, et quædam eorum non inveniuntur nisi in terris valde calidis cantantia : causa

¹ II de Anima, per multa capita.

enim hujus esse non potest, nisi quod fervens calor resolvit in eis conjectam frigiditatem humidam et viscosam : et spiritum exinde natum membrum cordis vel id quod est loco cordis, concipiens, juvatur in calore et dilatatur, et desiderium concipit et lætitiā, et his motibus propellit ipsum qui offendens ad diaphragma sicut ad obstaculum fistulæ, percutitur a duris lateribus annulorum in circuitu, et proportionaliter egrediens modulatus auditur. Et probatio hujusmodi est, quod cum talia sedent et cantant, fortissime movent alas. Iste igitur est complantatus quibusdam animalibus spiritus.

Sunt tamen quædam non respirantium genera nullo modo spiritum moventia, nisi quando moventur et ipsa localiter volando, et hæc sunt frigidiora, quæ non commovent spiritum interiorem, nisi cum exsufflant ex corde vel eo quod est loco cordis, spiritum animale qui ad motum pertinet : exsufflando enim illum, ad alas percutitur spiritus offendens ad diaphragma, et tunc emissus sonat. Alio autem tempore numquam auditur perceptibiliter. Sunt tamen quædam exteriori spiritu non ad refrigerium pectoris attracto, sed ad vocandum sonant, ut ranæ, et hujusmodi, quæ cum sonant, magnas vesicas ex utraque parte oris emittunt, in quibus est spiritus attractus in quo sonant. Et forte quædam parvorum, ut muscæ faciunt similiter, licet a nobis percipi non possit propter parvitatem organorum suorum.

CAPUT III.

*Unde oriatur hujusmodi spiritus, et
cujus sit membri et utilitatis?*

Spiritus igitur in non respirantibus complantatus fit a resolutione cibalis humidi viscosi, et dirigitur ad cor ut vitalem vigorem accipiat et animale operationem in animalium regione perficere possit. Cum enim animalia sint, animales oportet habere spiritus et virtutes et operationes : sed cum sint corpora eorum viscosa et frigida et durissimæ pelles et spissæ, parum vel nihil est quod exspirat ex ipsis : et ideo spiritus intus manens sufficit et ad sonum et ad animæ alias operationes, præcipue cum cordis calor non exigat aliquam ejus recreationem. Et ex hoc patet, quod iste spiritus radicalis et cibalis humidi est per materiam cordis, quantum ad generantem et agentem causam : et utilitas ejus est, quod deserviat virtutibus naturalibus et vivificis, et ad hoc quod quædam eorum sonent in superfluo ipsius per modum qui dictus est.

Fuerunt autem Philosophorum quidam et præcipue Pythagorici, qui omnia hujusmodi respirare dicebant, et spiritu attracto et retento hujusmodi sonos formare plectris, quæ sunt in pectoris regione et non in capite. Cujus signum esse dicebant, quod omnia talia sunt maximi pectoris respectu sui corporis, et parvissimi capitis : et ideo multa ex ip-

sis organa sensuum quædam non habent in capite, sicut apis quæ *cæca* vocatur, cujus oculi sunt inventi in posteriori corporis parte post ultima crura ipsius.

Similiter autem dicunt, quod ista animalia trahunt spiritum per poros oculos pectoris, et juxta illos habent plectra formantia hujusmodi voces in pectore, et hac de causa adhuc vocant quædam eorum abscisso capite. Hujus autem signum esse dicunt, quod etiam talium animalium instrumenta motus omnia continentur ad pectus, eo quod capita eorum, nec cerebrum, nec spiritum animale, nec vitalem plene recipere possunt propter ipsarum parvitatem.

Addunt etiam, quod capita ipsorum etiam immota videntur esse, nisi forte declinent ea vel elevent parum valde :

sed nullo modo possunt intorquere ea ad latera ad aliquid ibi videndum, sicut faciunt animalia habentia omnes sensus et organa sensuum in capite. Isti igitur talem de his dant sententiam, sicut invenitur in libris eorum.

Primum autem inter duo ista probabilius videtur : quoniam si vocarent per orificia pectoris, natura fuisset contenta eodem ad gustandum, ut videtur. Aut si diversa sunt instrumenta, hinc quidem respirationis, et illinc gustus, magis debuit hoc facere natura in magnis corporibus in quibus spatium habuit, quam in parvis in quibus spatium vix videtur sufficere ad alterum istorum.

Hæc igitur de his quæ spiritum habent complantatum, dicta sunt : de naturis enim ipsorum amplius in libro de *Animalibus* determinabitur.



TRACTATUS II

DE INSPIRANTIBUS ET RESPIRANTIBUS.

CAPUT I.

Quid sit inspiratio et respiratio ?

Quid respi-
ratio ?

Dicamus nunc de respiratione et inspiratione quid sint, et cujus particulæ corporis, et ad quid sint, et qua de causa. Est autem respiratio motus quidam acris compositus ex inspiratione quæ est quasi tractus, et expiratione quæ est quasi expulsio. Sicut autem superius probatum est, procul dubio inter duos tales motus duæ veræ quietes intercipiuntur : una quidem intus, et altera extra per expirationem : et ideo fere est

motus similis pulsui spiritus et cordis, de quibus in præcedentibus habitum est.

Sed in quinque est differentia : quorum primum est, quod inspiratio et exspiratio sunt ab exteriori spiritu : spiritus autem pulsans intus non est nisi ab interiori. Prima differentia.

Secunda autem est, quod pulsus spiritus interioris est a motu cordis : sed inspiratio et exspiratio causantur a motu pulmonis in habentibus pulmonem et spirantibus, vel ab eo quod est loco pulmonis in non habentibus pulmonem, et tamen spirantibus, sicut multa generavi-
avium esse videntur. Secunda differentia.

Tertia differentia est, quod in pulsu spiritus interioris, quando in bona habitudine perseverat animal spiritum habens, tanta est attractio, quanta est expulsio : et tanta quies est, quæ est inter expulsionem et attractionem, quanta est illa quæ est inter attractionem et expulsionem. Sed in respirationis motibus non est hoc necessarium : plus enim frequenter de spiritu attrahunt quam emittant, et etiam diutius, et quandoque faciunt e converso : si enim non plus aliquando attraheretur quam emittitur, non habe-

rent animalia spiritum in quo vocarentur et sonarent. Hæc autem non fiunt nisi in attracto vel retracto spiritu.

Adhuc autem sollicita natura providet quantum potest; et ideo trahit plus ut in aliquod tempus, licet parvum habeat, si submersione vel aliquo modo contingat impediri in attractu exterioris spiritus: tunc enim de illo quamdiu potest, satisfacit cordi et pectori. Quando autem plus expellit quam attraxerit, valde plus ex fumo malo pulmonis vel ex fumo humoris alicujus contractum est: et tunc propter angustiam unum cum altero nititur expellere ex inspiratione.

Quarta differentia.

Quarta autem differentia est, quod quies extra impulsus spiritus interioris magis videtur esse simpliciter finis et naturalis illa quæ est intus: cum tamen utraque a natura intenta sit, sed una simpliciter, et alia ex suppositione. Hæc autem e converso est in expiratione et respiratione: illa enim quæ est extra, est propter necessitatem motus a quo non contingit reflecti nisi quiete interposita: ea autem quæ est intus, est magis intenta a natura: quoniam tunc in pulmone retentus spiritus, contemperatur humore et potentiis pulmonis, ut aptus sit ad hoc quod cor temperate refrigeret, et tamen non inducat frigiditatem excellentem: quia illam nullo modo cor posset sustinere.

Quinta differentia.

Quinta autem differentia est, quod iste spiritus purgat pulmonem et cor a fumis malis et refrigerat: sed spiritus interior pulso suo vivificat, et facit opera vitæ, sicut in *Physicis* dictum est. Habet tamen iste spiritus cum spiritu intus pulsante multam convenientiam, tum in modo motus, tum etiam in genere et natura: propter illud, quod utrumque refertur ad idem principium quod est cor.

CAPUT II.

Cujus particulæ corporis sit inspiratio et exspiratio?

Et hoc quod de isto spiritu aspirato recipitur a corde, in duas dividitur partes: una enim pars impurius et fumosius cum partibus in corpore intensis repercutitur a corde in pulmonem, qui motu suo expellit utrumque in expiratione: et alia pars ipsius nutrit et restaurat spiritum vitalem, qui exoritur in ventriculis cordis: et ideo ex hoc patet cujus sit sicut principium primi: quoniam in veritate principium primum est, quod movet efficientem et moventem causam proximam istius motus.

Efficiens autem et movens proximum in hoc motu est pulmo, vel illud quod est loco pulmonis: sed non propter se principaliter hoc facit, sed propter cordis calorem, ut dictum est: et ideo quæcumque sunt calidi cordis, respirant, sicut sanguinem habentia omnia: et si intendatur calor cordis aliqua causa motus vel alicujus febris calidæ vel angustię, statim multiplicatur anhelitus exspirando et inspirando.

Primum igitur principium non quidem movens, sed desideratum a movente est refrigerium cordis et spiritualium quæ circa pectus sunt, quæ calore cordis et hepatis nimium læderentur et consumarentur si non eventarentur per hujusmodi inspirationem et respirationem;

movens autem trahendo et expellendo est pulmo, vel illud quod est loco pulmonis : est enim pulmo magnus respectu aliorum membrorum et spongiosæ et mollis carnis : quæ omnia non essent facta a natura, nisi ut in poris et spongiositate melius contineri possit spiritus, et in ipsis temperari cordi et pectori, quibus mittitur pars ejus ad refrigerium et nutrimentum spiritus vitalis.

Motus autem quibus pulmo facit hujusmodi motus duos, sunt dilatatio et constrictio : et ideo sunt per modum diastolis et systolis cordis. Cum enim dilatatur, tunc procul dubio spiritum in interiora sui trahit, qui distare facit per situm partes ejus et poros : cum autem constringitur secundum quamdam systolem, tunc procul dubio expellit aerem qui in ipso jam fuit contentus, sicut foliis quando comprimuntur. Signum autem hujus est, quod in hyeme tempore frigoris magis visibilis est spiritus exspiratio- nis, sicut fumus ollæ cum aqua calida, et spiritus inspirationis non videtur. Causa autem profecto hujus est, quod spiritus inspiratus in pulmone humectatus et inspiratus et conversus ad naturam aquei vaporis, qui quando extra tangitur ab excellenti frigido aeris, ad aquæ naturam incipit inspissari et converti : et ideo primo visibilis est, et postea resolvitur in guttas aquæ super pannos quos tangit, vel super pilos animalium quos tangit egrediens, ita quod etiam ab ore quorundam animalium tunc dependet glacies, ab humore spiritus talis generata. Inspiratio autem attrahit aerem simplum, qui propter tenuitatem suam non subiacet visui. In hyeme autem hoc magis evenit, eo quod in hyeme sunt magis humida interiora animalium quam in æstate. In hyeme enim clauduntur pori animalium per frigus aeris comprimens, ita quod non potest evaporare aliquid vel parum valde de humido interiori : et ideo ad exteriora corporis veniens, et poros oppilatos inveniens, reflectitur vapor in seipsum, et ad interiora sua spis-

situdine involutus in humore repluit, sicut fit in olla, in qua aqua bullit cum fortiter cooperta sit, quando scilicet exspirare potest humidum, sicut in æstate, et comprimit ipsum frigidum. Scias quod hoc magnum calorem in interiori significat, qui tantus est, quod elevat spissum fumum et commiscet eum cum exspirato spiritu, sicut est de his qui diu fuerunt in balneo calido, præcipue aereo, quod ad interiora per seipsum cum anhelitu attrahitur : tunc enim ex nimia combustione fumus emittitur visibilis, ita calidus, quod quasi adurere videatur ea quæ tangit.

Pulmoni autem in hoc deservit arteria quæ *trachea* vocatur, per quam trahitur et emittitur spiritus inspiratus et respiratus, præcipue in animalibus quæ vociferantia sunt : et ideo est compositio ejus ex annulosis circulorum portionibus ex cartilagine dura creatis : non enim sunt circuli versus œsophagum integri, sed potius ibi sunt quasi absissi, ne impedimentum generent in glutiendo : duri quidem ut offendens ab ea percussus spiritus sonet fortiter ad vocandum. Hujus igitur membri spiritus hic est sicut viæ per quam est inspiratio, et in qua tenetur spiritus ad vocandum.

CAPUT III.

Ad quid et qua de causa sit inspiratio et exspiratio?

Ad quid autem sit et ex qua causa, ex prædictis patere potest : est enim ad esse animalis habentis sanguinem, et ad bene esse. *Ad esse* quidem : quia sine ipso salvari non potest animal propter calorem cordis et præcordiorum quæ offendunt apprehensa in gutture animalium. Cum enim suffocatur porus respirationis, continue exstinguitur animal. *Ad bene esse* autem est propter vocem, ut scilicet in ipso spiritu retento vox formetur, sicut ante diximus. Causa autem ex qua est aer attractus, et causa efficiens attractionis et expulsionis, pulmo est vel membrum quod est loco pulmonis propter dilatationem et constrictionem : eo quod pulmo est ventilabrum cordis et follis insufflans vocativam arteriam, quando vox formatur vel sonus.

Ex quibus colligitur differentia anhelitus et pulsus : licet enim utrumque istorum motuum ex duobus motibus reflexivis componantur, tamen anhelitus perficitur pulsu et tractu spiritus, sed pulsus non habet tractum secundum expulsionem et systolem : quia in pulsu non atrahitur aliquid cordi ab extra, sicut in anhelitu, sed spiritum suum qui generatur in ipso, propellit ad membra cum vita quam advenit. Est tamen in pulsu simile tractui : quoniam cum redit in

fundum pulsus, tunc secundum systolem movetur : et hoc est similis tractui per hoc quod est motus ad moventem : et ideo superius diximus pulsum spiritus ex pulsione et tractu componi : sed in anhelitu directe trahitur spiritus per motum diaphragmatis, et motum laceratorum pectoris : sed adhuc pulsus non intercipit in animali bonæ habitudinis et sono : anhelitus enim sæpe intercipit unum tractum ad duos, quod inducit suspirium. Suspirium enim nihil aliud est nisi quidam magnus haustus attracti aeris propter æqualis anhelitus intercepti restaurum : anhelitus autem æqualis vocatur quando secundum proportionem æqualitatis inter superfluum et diminutum habuerit aerem, et intumescere facit pectus, et cæcat membra anhelitus.

Contingit autem talis anhelitus interceptio propter tres causas præcipue, scilicet propter mentis in aliquo fortem fixationem : tunc enim extrahitur homo ab intentione æqualiter aerem hauriendi : et ideo postea oportet suspirare : et quia melancholici multum fixas habent cogitationes et fortes, ideo multa habent suspiria, et multum suspirare, signum est melancholiæ. Secundum autem est tristitia, quæ dejicit et contrahit cor secundum systolem vehementem, et contrahit : et ideo calefacto pectore postea suspirando aerem haurire oportet. Tertium autem est nimia dilatatio pectoris et cordis ex lætitia : tunc enim cor plus quam oportet movetur secundum diastolem : et tunc quia ultra modum spiritum expellit, tunc defectum postea sentit, per suspiria restaurat deperdita.

Sunt autem multæ differentiæ anhelitus, sicut et pulsus, de quibus non per physica, sed per medicinalia particularia oportet expediri. Tanta igitur de inspiratione et de respiratione dicta sint a nobis : alia enim in libro de *Animalibus* dicentur.

Quid suspirium?

CAPUT IV.

De differentia spiritus, et animæ, et animati corporis.

Differentiæ autem animæ et spiritus et corporis animati manifestæ sunt et multæ. Differunt enim spiritus et anima genere : quoniam spiritus corpus est, ut diximus, anima autem est substantia incorporea, quæ nec corpus est, nec forma sequens corporeitatem, neque forma sequens corporis mixtionem vel completionem. Et quod quidem non sequatur corporeitatem, patet ex his quæ in *Cælo et Mundo*, et VIII *Physicorum* dicta sunt : quoniam si sequeretur corporeitatem in corpore, oporteret quod esset divisibilis divisione corporis per accidens : et hoc non contingit animæ intelligibili. Alia autem in libro de *Anima* probata sunt.

Adhuc autem cum omne quod per se movetur, componatur ex motore et mobili, anima erit movens immobile, spiritus autem movens quod movetur, et corpus ultimum quod movetur in talibus¹.

Amplius autem quoniam de se nec deficit, nec corrumpitur, neque restauratur : quoniam si senior accipiat oculum juvenis, videbit utique sicut juvenis :

spiritus autem de se destituitur, et corpus etiam restauratur.

Adhuc autem quoniam anima habet quasdam vires omnino a corpore separatas, quæ nullius partis corporis sunt actus : spiritus autem secundum se totus infunditur corpori, et miscetur in nulla sui parte separatus existens.

Relinquitur autem ex dictis, quod nomen *spiritus* æquivoce dicitur de anima et spiritu corporeo : anima enim apud Platonicos dicitur spiritus, eo quod ipsa spirat effective ad vitam : unde suum spirare est movere et agere spiritum et informare ad vitæ operationem. Spiritus autem, de quo diximus, dicitur essentialiter spiritus, eo quod est substantia spiritalis subtilis et tenuis.

Si quis autem dicat animam proprie et essentialiter dici spiritum, hoc non erit verum secundum quod Philosophi utuntur hoc nomine, *spiritus* : sed hoc erit secundum scientiam divinam : divini enim in multis significationibus hoc nomine *spiritus* utuntur : aliquando quidem pro animæ superiori parte : aliquando pro imaginativa, eo quod dicunt quod spiritus est vis animæ quædam mente inferior, in qua imagines rerum imprimuntur : sed hoc modo non sumus hic locuti de spiritu, eo quod in hoc opere non nisi physica tractare suscepimus.

Spiritus autem a corpore animato differt in eo quod spiritus non est animatus, neque actu pars aliqua animati corporis, et tamen est de naturalibus animæ et corpori conjunctus : est enim vehiculum quod animæ vires vehit in organa corporis, et quod perficit vires in organis ad operationes. Corpus enim simplex, ut est in libro de *Anima* probatum, animari non potest. Similiter autem est de corpore, quod licet non sit simplex, accidit tamen in forma et operatione et motu plus ad simplex quam ad compositum,

¹ I de Anima, tex. et com. 68.

sicut facit spiritus qui in forma aeris apparet. Si enim diceretur quod spiritus esset animatus, et essent partes corporis membrorum ipsi spiritus ad quæ diriguntur, vel eorum a quibus exeunt, magna pars animati corporis continue deperiret et continue generaretur.

Adhuc autem neque per rem similem, neque per dissimilem videmus generari ex cibo, nisi in parte sibi simili, quæ actu est pars hominis : quia caro non nisi in carne, et os non nisi in osse generatur ex cibo, et similiter est de aliis. Si ergo

spiritus esset pars actu animati, oporteret quod nutriretur et generaretur in spiritu aliquo : et hoc non est verum : quia generatur in corde, et non ex spiritu, sed potius ex humida massa nutrimenti. Et etiam probatum est in secundo *Peri geneseos*, omne corpus animatum plus esse compositum ex inferioribus elementis, sed spiritus fere in totum sequitur naturam elementorum formalium superiorum. Hæc igitur de differentiis eorum dicta sunt.

INDEX

*Librorum, Tractatum et Capitem in Libris de Spiritu et
Respiratione.*

LIBER I.

TRACTATUS I.

De spiritu secundum se.

CAP.	I. De ordine dicendorum, et de modo communitatis operum.	213
	II. De opinionibus Antiquo- rum de natura spiri- tus.	215

III. De improbatione dictarum opinionum, et de de- terminatione qui sit in- tellectus in spiritus na- tura?	217
IV. Quid sit secundum ve- ritatem spiritus anima- lis?	219
V. De origine spiritus qui co- pulsatur cum semine, et vocatur RADICALIS, cum operationibus ejus.	221
VI. De origine et operationibus spiritus vitalis in corpore jam formato.	223
VII. Quod in quibusdam ani- matis spiritus habet vias a nutrimento distin- ctas, et in quibusdam non.	224
VIII. Cujus partis animæ primum sit spiritus?	225
IX. Cujus partis corporis pri- mum sit spiritus?	226
X. De motibus spiritus in corporibus animatorum.	228

	II. De spiritu naturali et operibus ejus et ortu.	234
	III. De spiritu vitali, quare sic nominetur et de ejus operationibus.	235
TRACTATUS II.	IV. De operationibus et natura spiritus animalis.	236
	V. Qualiter ad invicem se habeant isti spiritus?	237
<i>De differentiis spiritus.</i>	VI. De differentia quam habent hi spiritus ad invicem.	239
CAP. I. Utrum sit unus spiritus naturalis, vitalis, et animalis, aut diversi?		231

LIBER II.

De spiritu et respiratione, qui est de spirantibus ipsis secundum quod spirantia sunt.

	II. An non habentia sanguinem habeant respirationem aliquam, et si habent, quæ sit illa?	242
TRACTATUS I.	III. Unde oriatur hujusmodi spiritus, et cujus sit membri et utilitatis?	244
	<i>De spiritum intus habentibus.</i>	

CAP. I. Quare non habentia sanguinem non respirant?	241
---	-----

TRACTATUS II.

- II. Cujus particulæ corporis sit inspiratio et exspiratio? 247
- III. Ad quid et qua de causa sit inspiratio et exspiratio? 249
- IV. De differentia spiritus, et animæ, et animati corporis. 250

De inspirantibus et respirantibus.

- CAP. I. Quid sit inspiratio et respiratio? 246



B. ALBERTI MAGNI

RATISBONENSIS EPISCOPI, ORDINIS PRÆDICATORUM,

PARVA NATURALIA.

DE MOTIBUS ANIMALIUM

LIBER I

TRACTATUS I

DE EO UNDE ANIMA HABET MOVERE HUNC MOTUM ?

CAPUT I.

De ordine et modo dicendorum, et de sententia Platonis, et natura movendi.

Tempus et ordo expostulant, quod de *animalium motibus* hic disseramus : quia

de aliis generibus anime et corporis jam expeditum est. Quæcumque autem de moventibus partibus animæ in libro de *Anima* dicta sunt, hic supponantur. Oportet autem nos hic querere de motu, cujus sit animæ et corporis particulæ, ex quo commune est opus utriusque, et cujus animati sit hic motus, et qua de causa. Adhuc autem qualis sit ipse motus, et ad quid, et quæ differentia ipsius. Sic enim sufficienter sciemus et movens et motum ipsum.

Oportet autem primo investigare unde contingit animæ movere : quia super hoc Socratici et Platonici physici omnia diversa his qui Aristotelem sequuntur, tradiderunt. Plato enim dicit animam sem-

per per se moveri, et hoc accepit a Socrate : nec fieri alicujus animalis animam, nec corrumpi cum corpore, sed potius omnem animam ex fonte omnium animarum qui est anima orbis et mundi, ad corpus devehī, et ex corporibus omnes animas in eundem fontem refundi ¹. Propter quod etiam anima devecta ad corpora corruptibilia per se movetur, sicut anima orbis et mundi cujus quædam pars et similitudo consistit : et quia per se movetur, ideo immortalem esse asserit eam. Et ideo post corporis corruptionem iterum ad fontem totius vitæ et motus dicit devehī ad sedes supernas. Et hujus sententia etiam invenitur in libro Apuleii Madonensis, quem fecit de Platone et dogmate Platonis, dicens in eadem opinione fuisse Socratem et Speusippum et alios Academiae sapientiores.

Ex his autem accipitur, quod anima movet motum localem corporis, quia per se movetur : movetur autem per se, quia est pars animæ mundi et orbis quæ per se movetur, vel saltem aliqua illius animæ similitudo. Nos autem non intendimus hic ostendere, quod anima orbis non per se moveatur : quia hoc satis in VIII *Physicorum* ², et in primo et in secundo *Cæli et Mundi* determinatum est. Nec iterum studebimus ad hoc quod destruamus, quod anima mortalium non per se moveatur : quia hoc in libro de *Anima* jam fecimus sufficienter. Nec iterum possumus hic disputare de origine animarum vel earum corruptione : utrumque enim horum jam partim fecimus in libro de *Anima*, et de hoc finem perscrutationis faciemus in libro *Animalium*, et de statu animæ post mortem erit dicendum in scientiis divinis.

Sed hic solum accipiemus a Platone qui sentire videtur, quod anima animalium habeat movere in natura ex eo quod similitudo vel pars animæ mundi existit :

hoc enim non verum esse videtur, quod sit pars ipsius : si enim est aliqua quæ sit et vocetur mundi anima secundum quod etiam asserit Plato, illa est cui in motu orbi obedit et mundus. Scimus autem ex his quæ in libro de *Anima* sapienter dicta sunt, quod sicut motor se habet ad mobile, ita partes motoris se habent ad partes mobilis sive ejus quod movetur. Si igitur est aliqua quæ sit orbis et mundi anima quæ sit motor sphaeræ cœlestis, sicut illa tota se habet ad orbem, ita partes ejus se habebunt ad partes orbis, et sunt perfectiones partium. Cum igitur corpus mortalium non sit pars orbis, neque univocum illi, neque permittit ratio necessaria quod anima animalium sit pars animæ orbis. Relinquitur igitur quod et verum est et forte quod sit similitudo quædam animæ illius, et ex hoc movere in natura et potestate. Cum igitur videbitur alicui, quod omnis illa substantia quæ ante orbem est dignitate naturæ, facultatem habeat movendi : et sic infertur, quod plantis non debeant deesse motus : quod omnino non videmus : quin potius quædam animalium videmus immobilia esse secundum locum. Videtur quod ex similitudine cum anima mundi, ea quæ est animalium anima, facultatem movendi non habeat.

Sed ad hoc dicendum esse videtur, quod secundum Platonem ea quæ est mundi anima, seipsam movet continue propter desideratum quod exoptat, et continue adipiscitur per motum suum. Hæc autem est similitudo aliqua Dei deorum et causæ primæ, sicut in *Physicis* diximus et, in *Cælo et Mundo*. Similitudinem autem illam non movere animam nisi conceptam et desideratam, constat in his omnibus quæ de movente in libro de *Anima* disputata sunt. Erit igitur anima cœlestis si qua est ex hoc movens seipsam : quia agit se per conceptum mentis et de-

¹ Et hoc invenitur in *Phædro* Platónis.

² VIII *Physic.* tract. II, cap. 7.

siderium in bonitate nobilem primi motoris, qui *pater orbis* a Platone vocatur : cujus etiam mentis filius dicitur ab eodem esse mundus, et materia mater. Quæcumque igitur anima in conceptu et desiderio boni alicujus non capit similitudinem cum anima orbis, illa prorsus nullum potest movere motum secundum Platonem. Anima autem vegetabilis secundum se accepta, neque concipit bonum, neque desiderat : et ideo secundum Platonem nullum suo corpori præstat motum, sicut neque ipsa in seipsa movetur. Hæc igitur est sententia Platonis de movente anima et non movente, a qua secundum veritatem tantum accipimus, quod anima virtutem habent movendi ex similitudine quam habet cum movente primo in apprehendendo et desiderando bonum quod exoptat, et per motum acquirere potest. Accipiamus igitur bene dictum a Socrate et Platone, et rejiciamus falsum, quod scilicet moveat in eo quod movetur, et omnis anima ab orbe descendit, et iterum ad ipsum orbem ut ad fontem animarum refluitura sit.

CAPUT II.

Ex qua natura anima potest movere in comparatione ad corpus accepta?

Quod autem subtili indiget consideratione, est quod nos videmus formas cor-

porum inanimatorum, sive sint simplicia, sive composita, omnino esse in materiæ potestate, et ad nihil umquam movere et agere corpora, sed quasi quiescere in ipsis tamquam satis sit ipsis esse ipsum, etiamsi nullam aliam acquirant perfectionem. Quasdam autem invenimus non movere quidem materias suas secundum locum, sed tamen agere ea quasi ad quantitatem perfectam, et ad speciei conservationem per generationem, sicut sunt formæ plantarum, et illæ de quibus ante fecimus mentionem, sicut formæ lapidum et metallorum nullam omnino agunt quantitatem a natura inter maximum et minimum determinatum, sicut in libro de *Anima* ¹ diximus. Neque iterum agunt aliquid ad suæ speciei conservationem per generationem, tamquam eis non sit cura, utrum aliquid post ipsas simile in specie mansurum sit vel non. Quasdam autem videmus movere quasi dilatando et constringendo, non autem de loco ad locum, ita quod primum movens in eis habeat potestatem imperandi motum, et ad sui imperium solum omnia ad nutum moventur et obtemperant quæ sub ipso sunt, et istius causam non oportet nos inquirere, si de movente locali in motu perspectam debemus reddere causam et rationem.

Democritus autem qui omnem formam ab anima orbis derivari dicit, sicut et Plato, dissimiliter in hoc Platoni dicit, quod non idem dicit esse causam movendi. Dicit enim Democritus ² omnem formam corporum esse quamdam animam apprehendentem et desiderantem et habentem movendi facultatem, sed tamen prohiberi inquit eam ab his operibus per corpulentiam suæ materiæ et defectum organorum. Ad hoc autem inducit rationem quam certissimam esse dicit, a principio universitatis omne esse rerum derivari. Constat autem, ut dicit, quod simile simile sibi producit, sicut lux lucem, vita vi-

¹ II de Anima, tract. II, cap. 4.

² Ibid. et melius II Mineralium.

tam, et movens moventem, et intelligens intelligentem. Omne igitur quod procedit a primo hujusmodi, habet esse : et quod non agit secundum harum potestatum facultatem, impeditur per accidens, quod est corpulentia et inhabilitas materiæ in qua est talis essentia fluens a causa prima. Sed hæc stultitia est, quia licet omnis essentia causetur a prima causa, tamen educitur de materia : et ideo nec essentiam nec facultatem accipit, neque agit nisi secundum materiæ congruitatem in qua est : neque enim causa prima sola, sed lux ejus per multa agentia diffusa venit usque ad particularia in qualitatibus elementorum agentia, quæ secundum materiæ agunt congruitatem et determinationem : et ideo contingit, quod vita producit non vitam, et lux non lucem : et intelligentia non intelligentia producit. De his autem dictum est in *VIII Physicorum* ¹, qualiter scilicet diversitas esse procedit ab uno simplici primo et immobili, sed tamen ad plenum dici non potest nisi in philosophia prima.

Oportet igitur, quod inductæ quæstionis alia sit solutio, et dicemus cum Avicenna in quarta sexti *Naturalium* ², quod quædam sunt formæ adeo impressæ suis materiis quæ dictæ sunt ab eis in tantum quod eis in nullo provident, neque regunt eas, sed tantum esse quoddam mortuum et immobile dant eis : et hæ dicuntur formæ omnino materiales : et nulla prorsus causatur forma movens in materia aliqua, eo quod propter nimis distare a primo principio nullam habent operationem divinam. Aliæ autem sunt, quæ propter multam conjunctionem quam habent ad causam primam, non imprimuntur suis materiis, quin potius neque dividuntur divisione corporis, neque moventur motu corporis, et in toto sunt separatæ, præter hoc solum quod movent

corpus instrumentaliter, et illæ habent multas operationes divinas. Divinam autem voco operationem illam potissime, quæ est in intellectu inducere formas ad esse rerum. Hanc solus Deus habet : sed intellectuales substantiæ quæ sunt juxta eum, et distant per parum ab ipso, habent formas intellectuales per instrumentum motum ab eis in materiam totius mundi inducere, quod est per motum materiæ tales formas ex ipsis educere etiam quando non tangunt easdem, ut dicit Avicenna, licet hoc ultimum aliquam habeat dubitationem quam inferius solvemus.

Sunt autem formæ mediæ inter has, et quæcumque quidem viciniore sunt substantiis separatis, plus habent de operatione divina. Quæcumque autem distantiores et materiæ viciniore, aut nihil, aut parum habent de operatione divina. Hinc est quod anima intellectualis quæ separata est magis inter animas mortaliū, et format formas simplices et intellectuales, et per solum imperium producit eas in materiam cujus regimen providet, sicut experimur in nobis ipsis, quod cum concipit delectabile corpus, movetur ad induendum, et spiritus et sanguis et etiam membra exteriora ad ipsam extenduntur in toto corpore. Et experimur hanc transmutationem esse fortiolem in movendo corpora nostra, quam eam quæ est a calido et frigido, humido et sicco : nulla enim illarum virtutum corporalium et elementarium totum corpus concuteret ad aliquid, sicut concutit forma intellectualia vel imaginativa suam materiam sui corporis. Sic enim videmus in corpore causari calorem a non calido, et frigidum a non frigido, et siccum et humidum a non sicco et non humido, per omnia sicut in arte medicinæ fit aut architectonicæ : quoniam ibi per imperium causatur forma intellectualis in materia,

¹ VIII Physic. tract. I, cap. 13

² AVICENNA, VI. Naturalium, part. IV, cap. 5.

et non est dissimilitudo nisi in hoc quod forma artis indiget corporalibus instrumentis : et hoc non est propter sui indigentiam, sed propter ineptiam materiæ, ut alibi diximus. In nobis autem experimur istas formas in nos transduci sine instrumentis per solum imperium ab intellectu vel phantasia factum : et hæc verissime est operatio divina quæ forma sua quam agit, movet conjunctum sibi ut inducatur in ipso. Quædam autem mersa magis est a materia et juncta, ita ut habeat quasi hanc operationem, scilicet materialem, et secundum corporis potentiam, et non animæ tantum, sicut vegetabilis quæ facit generando formam speciei, sed non specialiter habet eam, sed potius per spiritum qui est in semine educit eam, neque per solum imperium substantiæ incorporeæ, sed per instrumenta corporea, quæ sunt calidum et frigidum, et humidum et siccum, et in tali operatione fit quasi aliquid ex non existentes, sicut homo ex semine hominis, sed transmutantes materiam qualitates non fiunt sic. Sed materia calida fit ex calido, et frigida ex frigido, et humida ex humido, et sicca ex sicco. Quæcumque igitur formæ sic elevatæ sunt super materiam, ut per imperium regere possint et divina in ea operari, illæ sunt quæ per hanc ipsam suam naturam movent, et aliæ movere non possunt. Et hoc quidem Avicennæ dictum est verissimum.

CAPUT III.

De solutione dubitationis circa prædicta.

Sed dubium oritur magnum quod reliquimus insolutum. Cum enim videamus substantias in cælis habere divinam operationem, non tantum movent corpora sua ad has formas, sed etiam materiam omnium generatorum et corporum : et si hoc faciunt per solum imperium, ut dicit Avicenna, videbitur quod non indigent ad hoc motu cælesti.

Dubium.

Adhuc autem secundum hoc aliqua forma induceretur in materiam generabilem, quæ non educeretur per motum cæli. Et si hoc erit verum, tunc non omnis actio erit per contactum, nec omne movens immediatum est ei quod movetur. Et tunc non valebunt illæ demonstrationes quæ in septimo *Physicorum*¹ adductæ sunt.

Ad hoc autem dicunt Avicenna et Algazel et Adamidin, quod in veritate ab intellectu separatarum substantiarum multa fiunt in inferioribus per solum imperium, et non per motum cæli : et hæc sunt quæ monstra et prodigia vocantur, et mirabilia quæ per nullum contactum fiunt nisi solius imperii voluntatis eorum, cujus causa proprie non est contactus aliquis, et hujusmodi rationem ad

Solutio.

¹ VII Physic. tex. et com. 8.

ducunt dicentes, quod cuicumque obedit corpus superius, illi etiam obedit quidquid illi subjectum fuerit corpori in natura. Constat autem, quod his substantiis obediunt corpora cœlestia, quæ regunt et movent omnia corpora generabilia et corruptibilia. Obediet ergo etiam eis illa materia istorum corporum sine illis moventibus.

Similiter autem dicunt esse hujusmodi in omnibus et corporibus hominum, ubi scimus experimento per solam imaginationem vel intellectum corpora moveri ad formas conceptas induendas et inducendas in corpus : et quod valde admirabile videtur omni bene consideranti, in philosophia, dicunt quod tales animæ tantum possunt esse separatæ et exaltatæ super corpus per modos illos quos cum de *divinatione* loqueremur, determinavimus, quod anima illa per solum intellectum et imaginationem movebit etiam corpus sibi non conjunctum in formam conceptam, sicut fit in fascinatione et præstigiis magorum. Potest enim esse in tantum elevata et separata, quod conceptu mentis et imaginationis non solum corpora movebit aliorum hominum, sed etiam elementa, ut elevet nubes, et producat pluvias et ignes, et faciat coruscare per solum imperium, per obedientiam quam habet materia generabilium ad hujusmodi animam : et hanc dicunt esse potestatem prophetarum, qui signa et portenta ostendunt. Certissime enim, ut inquiunt, est quosdam sic nasci ut mira faciant, et quosdam sic quod hujusmodi facere nequam possunt : et hujus non est dubium aliquam causam esse : et cum omne corpus animati causetur ab anima ipsius, oportebit, ut dicunt, causam horum operum esse in anima movente per intellectum et imperium. Exempli autem causa potest induci quod apparuit multis vi-

Exemplum
mirabile.

dentibus duobus geminis in Germania natis, quorum unus dum ferretur juxta ostia, omnia ostia versus suum latus sinistrum aperiebantur quantumcumque serrata fuissent : et hanc virtutem quam ille habuit in sinistro, habuit frater ejus in dextro : et in brevi spatio temporis ambo defuncti sunt.

Hæc enim philosophia videtur mihi a ^{Contra}tramite veritatis aliquantulum oberrare : ^{cennam} si enim hæc essent ex solo animæ imperio vel motorum cœlestium sine motu orbis, non esset scientia per artem inventa unde prognosticarentur talium natiuitates. Habemus autem scientiam nobis a multis physicis traditam, ex qua talia prognosticamus ex situ stellarum et motu orbis. Oportet igitur quod ista fiant per motum orbis, et non tantum per conceptum mentis intellectivæ.

Amplius autem secundum dicta oporteret, quod conceptus intelligentiæ orbem moventis variaretur secundum diversa concepta : omnis autem intellectus sic per diversa concepta variatus, movet inordinate secundum diversam inordinationem conceptorum : tunc igitur substantiæ separatæ aliquando moverent inordinate et exorbitarent, sicut dixit Plato, quod non concesserunt Peripatetici. Propter hæc igitur et multa his similia dicimus falsa esse omnia quæ inducta sunt, præter hoc solum, quod intellectus et imaginatio movent corpora sibi conjuncta et unita per formam intellectus vel imaginationis, sicut in scientia de *Anima*¹ dictum est.

Intelligentiam autem aliquid inducere in materiam generabilium nisi per motum orbis non opinamur. Intelligentia enim illa practica est, sicut sæpius diximus, et una forma descendens et procedens a causa prima forma est, quæ explicatur ab omnibus : et hæc forma est essentia esse præbens, et est per lucis mo-

¹ III de Anima, tract. iv, cap. 3.

dum in omnibus intelligentiis : et determinatio et obumbratio ipsius et diversitas et numerus et differentia in specie et genere est ex determinatione quæ fit per diversa magis et minus particulariter et universaliter moventia. Et ideo non variatur intelligentia separatarum substantiarum sicut movens ad diversa, non tamen aliquid movetur, cujus suus motor non sit immediatus, nec aliquid patitur quod suum agens non contingat, aut per se, aut per medium proximum movens : sicut cælum movet per lumen aërem, et per ignem et per aerem movet terram : et universaliter loquendo primus motor in ordine naturæ et artis movet tertium per secundum, et quartum per tertium et secundum, et sic venit virtus primi moventis usque ad ultimum quod movetur, ita quod nihil movet. Hæc autem probata sunt in *Physicis*¹.

De fascinatione autem et præstigiis nos omnino aliam diximus esse causam. Dicimus enim ex virtute constellationis innasci virtutem his omnibus, quæ motu cæli producuntur, quæ cum constellatio prodigiosa est, similem virtutem inducit in natum. Quod autem hæc aliquando ad imperium talium natorum fiunt, non habet aliam causam : quia tunc conatus est ad hoc faciendum, et virtus conjuncti efficitur instrumentum animæ ut hoc perficiat. Nec fit hoc sine contactu : quia virtus illa quæ mutat materiam ad formam præstigiis vel fascinationis, per medium venit ad hoc ut tangat id quod mutat, sicut venit virtus magnetis ad ferrum quod trahit. Sic enim videmus operari imagines et annulos quæ fiunt ad stellas, quæ tamen nullam formam imaginari vel intelligere possunt, et nihil omnino valent imperare. Diximus enim in scientia de *Somno et Vigilia*, quod hujusmodi formæ cælestes fortissimæ sunt et efficaces valde in transmovendis rebus, præ-

cipue cum nos videmus tantam esse efficaciam earum, quod omnia alia moventia inferiora eisdem formis organice et instrumentaliter deservientia sunt.

Ex eodem autem sequitur, quod si anima in quantum est anima, moveret, oporteret quod moveret omnis anima, quod iterum falsum est. Et ideo cum confortantur a stellis, tunc movebunt corpora quasi violenter, non valente repugnare anima quæ in ipsis est aliquando : sed tamen voluntatem non movent violenter. Redit ergo hæc sententia, quod animæ sunt moventes corpora sua sibi conjuncta per naturam, et eas habere hanc facultatem ex similitudine ad substantias cælestes moventes in operatione divina, et per hoc quod sunt corporibus non omnino immersæ quin etiam habeant motionem propter corpus omnino, ut est intelligere, aut actionem quæ magis est animæ quam corporis, sicut est imaginari, et æstimare, et memorari et hujusmodi. Illas autem animas quæ nullas habent omnino actiones plus suas quam corporis, sed potius plus corporis quam suas, ut est nutrire, et augere, et generare per divisionem materiæ.

Amplius autem illas essentias quæ non nisi quiescunt in materia, et agere separata nullo modo possunt, omnino motivas esse impossibile est.

¹ VIII *Physic.* tract. II, cap. 5.

CAPUT IV.

Rationes Peripateticorum ad hoc quod anima movet in quantum est separata.

Anima qualiter movet?

Ut autem perspicacius ea quæ dicta sunt, appareant, inducamus rationes Peripateticorum, per quas demonstramus animam movere, non in quantum est forma, neque in quantum est anima, sed in quantum est aliquo modo separata, et ostendamus quare substantia formalis separata habet movere præ aliis formis separatis.

Dico igitur, quod si forma in quantum est forma, vel etiam si anima in quantum est forma quædam corporis, moveret, tunc oporteret quod omnis forma moveret localem motum. Hoc autem ostendimus esse falsum in octavo *Physicorum*. Ex eodem autem sequitur, quod si anima in quantum est anima, moveret, oporteret quod moveret omnis anima : quod iterum falsum est, cum anima vegetabilis nullo modo moveat. Si igitur movet aliqua anima, hoc non habet in quantum est perfectio materiæ sui corporis : quia omnis forma est perfectio suæ materiæ, et tamen non movet. Si autem sic, patet quod etiam non habet movere in quantum est perfectio corporis organici physici potentia vitam habentis : quia hæc diffinitio convenit animæ omni, et non omnis anima movet. Igitur anima nullo modo movet per hoc quod

est perfectio corporis vel partis corporis. In anima autem nihil invenimus nisi quod est perfectio, et quod est separata secundum aliquid sui. Oportet igitur quod moveat in quantum est separata, et non conjuncta corpori.

Amplius autem non idem in essentia et esse est movens et motum : igitur ab eo quod distinguitur, magis est virtus movendi, quam ab eo quod mutatur cum corpore. Distinguitur autem per hoc quod est aliquo modo separata. Per hoc igitur quod est separata, habet movere anima.

Amplius autem potentiam quæ est omnino separata, motivam invenimus etiam secundum hoc quod nihil accipit a corpore : et hoc est signum, quod aliquæ partes et etiam ipsa anima movet secundum quod est aliquo modo separata.

Amplius autem substantiæ intelligentiarum quæ separatæ sunt, et substantiæ separatæ vocantur, ipsæ sunt quæ primi sunt motores corporum. Omnis igitur substantia quæ est actus movens, movere habebit per aliquid simile illius. Scimus enim quod si aliquid univoce inveniatur in pluribus, oportet quod sit causatum per aliquid unum, quod est in omnibus illis, sicut dicitur in secundo libro *primæ philosophiæ*. Cum igitur intellectus cælestes moveant motum localem per id quod sunt separatæ, oportebit igitur, quod omnis substantia movens localem motum, sit separata per hoc quod movet localem motum.

Dubitabit autem fortasse aliquis dicens inter motorem et id quod movetur, nihil esse medium, et sic separata nullatenus videntur posse movere. Sed ad hoc solutio est facilis valde : localis enim distantia non est inter motorem et id quod movetur, eo quod in his quæ per se moventur, id quod movetur, componitur ex motore et mobili : quando autem non per se moventur, tunc ea quæ moventur, sunt in potentia ad motum, aut per se, aut per accidens. Et si sunt in potentia ad motum *per se*, moventur a generante per se : et est idem

Dubitatio.

Solutio.

movens ad locum et ad formam, et eodem motu moventes : licet forte non sit idem motus secundum quod motus est actus et perfectio mobilis. Si autem sunt in potentia ad motum *per accidens*, tunc habent motorem per accidens, qui est removens impedimentum. Et in his omnibus motibus motor est immediatus mobilium per substantiam aut per virtutem quæ multiplicatur per media moventia usque ad id quod ultimo movetur. Nihil autem repugnat quod motor separatus sit secundum substantiam et separationem, et tamen sit immediatus ei quod movetur, ex quo unum compositum est in cœlestibus ex tali motore et tali moto : non enim separatur per locum, sed per essentiam et operationem, et conjunctus sibi per virtutem motivam et etiam per substantiam : non tamen sic quod ipsa substantia sit impressa in materiam ejus quod movetur, sed libera existens conjungitur ei in quantum motor tantum. Hæc autem omnia manifesta sunt ex dictis a nobis in *Physicis*, et in libro de *Cælo et Mundo*.

Si quis autem mirabitur quomodo substantia cœlestium motorum sit separata, et convenit cum cœlis, advertat ea quæ in prædictis libris determinata sunt : quoniam forma non dicitur esse separata per locum ab eo a quo separata esse dicitur. Sed dicitur ideo separata, quia cum insit alicui subjectæ materiæ corporis, non est obligata eidem ut in aliquo subjaceat proprietatibus ejus. Et ideo quæ nec dividitur divisione corporis, nec movetur motu corporis, nec operatur instrumentis corporis, illa separata est, non per locum, sed a corporalis materiæ quantumcumque simplicis obligatione. Hæc autem omnia competunt substantiis cœlorum : propter quod separatæ sunt et moventes : et aliæ substantiæ formales eo magis sunt moventes, quo fuerint magis separatæ. Et ideo intellectus qui separatus est, magis movet quam phantasia : et sunt motus sui magis diversi : et hujus signum est, quod homo est

multorum motuum et multarum operationum, et ad intellectum fiunt omnes illi. Alia vero animalia sunt paucorum motuum et paucarum operationum, et non diversificantur, sed uno modo operatur una species animalium : eo quod moventur potius ad naturæ instinctum, quam ad formam apprehensam, sicut in libro de *Anima* dictum est. Ex his igitur omnibus pro certo scitur, quod nulla substantia forma existens et actus, movet motum localem, nisi in quantum communicat in aliquo cum formis primis cœlestibus separatis. Hoc autem est in quantum ipsa aut secundum quid aut simpliciter separata est, et ultra materiæ sui corporis obligationem elevata.

CAPUT V.

Qua de causa separata substantia formalis movet plus quam omnes aliæ formæ.

Hoc autem habito, elucidemus quare substantia separata movere habet plus quam aliæ formæ omnes corporum physicorum.

Sumamus igitur propositiones a nobis in *Physicis* libris probatas, quarum una est, quod omne movens per se movet ad formam aliquam quæ est per aliquem modum in seipso movente. Generans enim movet ad formam suam si univoce movet in generatione, et movendo ad formam suam movet ad locum.

Similiter autem primus motor et om-

nes inferiores movent ad formas quæ sunt in ipsis.

Similiter autem est in omni arte, ita quod medicus movet ad sanitatem quam habet in anima, et architector ad formam domus quam habet in anima. Aliter enim non tres in unam coinciderent causam, sicut probatum est in II *Physicorum*. Si autem sumamus propositionem a nobis probatam in *Physicis*, quod scilicet omne quod movetur ad formam vel aliquod non habet secundum quod movetur ad formam vel ubi : cujus veritas patet per inductionem et per syllogismum : quoniam si jam haberet, tunc esset in actu secundum illam formam vel ubi : et tunc non moveretur : quoniam motus est exitus de potentia ad actum. Ex hoc autem sumitur, quod omne quod movetur, movetur ad aliquid quod est extra ipsum secundum quod movetur ad illud. Sumamus autem istam quartam propositionem, quod omnis forma quæ in nullo est separata, secundum se tota est in materia, et secundum omne quod est in ipsa. Cujus veritas patet, quoniam si secundam aliquid non esset impressa materiæ, secundum id esset separata, sed nos ponimus eam in nullo separatam esse. Ad hanc autem si adjungimus secundam, jam concludimus, quoniam nullum mobilium potest moveri ad formam quæ jam impressa est materiæ, neque ad aliquid quod est in ipsa.

Accipiamus ergo resumendo paulisper primum, quod scilicet movet movens ad formam quæ est ipsum vel in ipso secundum quod movet, et sciemus quod nulla formarum impressarum jam in materia potest movere id cui inest : et est hæc vera causa per quam demonstratur, quod nullum corpus per se movetur : et hanc visus est Plato omnino ignorasse, et fere omnes Antiqui ante sectam Peripateticorum. Redeuntes ergo dicimus, quod si nulla formarum impressarum movere

potest, destruemus consequens et inferens oppositum antecedentis, sic quod si aliqua formarum movet materiam et corpus cujus ipsa forma est, oportet quod secundum quod movet, sit ab ipso per aliquem modum separationis separata. Cum igitur moveatur ad formam quæ est in ipso movente, oportebit per secundam propositionem inductam, quod illa etiam sit in movente secundum quod est aliquo modo separationis separatum. Et hoc quidem est verum.

Sed, sicut supra diximus, duo modi separationis in mortalibus sunt, et tertius est in immortalibus. Modus autem primus qui est in mortalibus, est quod id quod movet, neque sit corpus, neque actus alicujus organi corporalis : sit tamen virtus in corpore per aliquid a quo accipit, sicut intellectus est separatus in hominibus. Et hoc modo movendi habet facultatem intellectus, quod sic est in ipso quod est extra id quod movetur, et ideo movetur ad illud. Secundus autem modus est sub illo, scilicet quod aliquid sit in corpore, et sit actus alicujus partis corporis, tamen agat actione quæ magis est sua quam corporis, et quæ secundum quod est in ipso, non est in corpore : et hunc modum habet phantasia et æstimatio et aliæ animæ sensibilis potentiæ moventes quæ concipiunt intentiones convenientis vel inconvenientis, quæ non sunt in corpore secundum quod sunt in ipsis : et ideo corpora possunt moveri ad ipsas. In cælestibus autem sunt modi existentiae omnium : et ideo omnia quæ sunt, modo sibi proportionali moventur ad illa, sicut dictum est in secundo *Cæli et Mundi*¹.

Hæc autem quæ dicta sunt hic de movente in animalibus, debent conjungi cum his quæ dicta sunt in octavo *Physicorum*, et cum his quæ dicta sunt in tertio de *Anima*. Et tunc habebitur perfecta scientia de eis quæ movent ea quæ per

¹ II de Cælo et Mundo, tract. II, cap. 5.

se moventur. Superfluum enim et longum esset ea quæ ibi dicta sunt, hic repetere. Colligamus igitur quæ dicta sunt, dicentes quod substantia formalis movens corpus motu quo aliquid per se movetur, movet ex convenientia aliqua quam habet cum substantiis separatis omnino, sicut hic probatum est. Et ideo inanimatorum nullum habet moveri per se, nec etiam ea quæ participant tantum anima vegetabili, sed ea quæ habent animam sensibilem vel intellectualem tantum, et quod causa movendi est ista principium motus esse per modum per quem movent esse extra id quod movetur : et quod id quod movetur tali motu, movet ad formam quæ est in movente per aliquem modum, et extra id quod movetur : et ex hoc sumpsit occasionem dicti sui Avicenna, qui putavit quod ex quo oportuit esse separatum movens in his quæ moventur per se, quod quanto magis esset separatum, quod tantum ad plura et ampliora extenderetur suus motus, ita ut si quis habet animam multum agenti intellectui similem et elevatam, quæ multum haberet in natura de splendore intelligentiæ, quales diximus esse sapientes veteratos in libro de *Divinitione*, quod ille moveret materiam, non corporis sui tantum, sed etiam mundi, sicut videmus totam mundi materiam moveri ad splendorem intelligentiæ cælestis. Et ideo finxit talem posse producere nubes, et facere pluvias et coruscationes et tonitrua quando vellet, et secutus fuit eum in hoc Algazel, et Moyses Ægyptius videtur consentire in idem, et Avendavid expresse dicit hoc, et multi aliorum. Et videtur mihi quod hic sit error, propter causas quas supra diximus. Dixeruntque hoc esse primus gradum physicæ, sed in physicis pro hæresi accipiuntur. Sed nos de his jam alibi locuti sumus quantum pertinet ad physicas rationes. In astronomicis autem adhuc quædam determinari habent, et quædam alia in magicis scientiis.

CAPUT VI.

Quod in anima sensibili et intellectuali sit movens, et qualiter se habet hic motus ad motum eorum quæ non per se moventur ?

Relinquitur autem quoad præsens negotium adhuc investigandum, utrum in illa particula animæ sit facultas movendi, et facultas apprehendendi sensibiliter vel intellectualiter idem in eodem : sed hoc citius expediri potest per ea quæ in III de *Anima* dicta sunt, et per ea quæ hic modo dicta sunt a nobis : quoniam oportet quod in omni motu fiat nuntium de movendo, sicut diximus in libro de *Anima* : et ad hoc si fieret nuntium, et aliquid moveret, non hoc esset, sicut si mihi fieret nuntium, et tu exsequereris motum. Et hoc non potest esse. Oportet igitur quod idem sit qui fit nuntium de motu, et quod exsequitur motum. Nuntium autem non fit nisi per apprehensionem delectabilis vel indelectabilis per sensitivam vel intellectivam animam. Oportet igitur quod intellectiva moveat et sensitiva non, aliamque movens et apprehendens per subjectum existens, si per aliquid quidem est esse movens et apprehendens : et moventia enim esse non est esse apprehendentis secundum quod est huiusmodi. Et hæc omnia patent in III de *Anima* determinata.

Idem autem habetur per ea quæ dicta sunt modo : quoniam si ad formam mo-

vet sensitiva et similiter intellectiva, oportet quod formam illam aut semper secum habuerit naturaliter, aut apprehenderit eam. Non autem semper secum naturaliter habuit formam illam : apprehendit ergo : eadem ergo erit facultas animæ et apprehendens et movens : sed ejus esse aliquid est secundum quod apprehendens, et secundum quod movens est. Ex his autem ulterius concluditur, quod sicut in his quæ non per se sed a generante moventur, motus secundum quod est actus moventis, idem est et ad formam et ad locum, sed secundum quod est actus mobilis, est diversus : ita etiam in his quæ per se moventur, motus secundum quod est actus moventis idem est ad formam et ad locum : quoniam movens in talibus per formam et ad formam movet delectabilis : sed secundum quod est actus ejus quod movetur, est alius, sed est conversus ordo : quoniam

in his quæ non per se moventur, in eo quod movetur motus ad locum, est secundum naturam consequens ad motum qui est ad formam : locus enim et ubi datur formæ, et similiter motus ad illa, sicut dictum est in *Physicis*. In his autem quæ per se moventur, motus localis est ante motum ad formam delectabilis secundum tempus : quoniam motus localis in talibus non est nisi inquisitio et acquisitio delectabilis, in ratione tamen et diffinitione est prior in talibus motus ad formam delectabilis quam motus localis : quia est causa ejus. Quid autem in anima sit movens, et utrum unum, vel duo, vel tria, et quomodo unum, vel duo, vel tria, satis in libro de *Anima*⁴ dictum est. Similiter autem et quid est movens recte, et quid non recte, et quis ordo moventium, totum dictum est.

Hæc igitur de movente motum in animalibus dicta sunt.

⁴ III de Anima, tract. iv, cap. 5 et 9.

TRACTATUS II

DE PRIMO ORGANO MOTUS.

CAPUT I.

De rationibus eorum qui dicunt postremum capitis esse principium.

Est autem inquirendum cujus particulæ corporis primo sit motus. Cum enim sit de operibus communibus animæ et corporis, oportet quod sicut inquisivimus cujus sit facultatum animæ, ita etiam cujus particulæ corporis primo sit inquiramus.

Et invenimus super hac quæstione valde diversificari eos qui de physicis scripta reliquerunt. Galenus enim et om-

nes sequaces ipsius, posterius capitis ubi nucha descendit a cerebro, id quod movet ex parte corporis primum esse dixerunt, et ad hoc multas dederunt rationes, quarum tamen quinque aliis videntur esse fortiores.

Una quidem est : quoniam ubi est virtus et facilitas animæ movens, id videtur esse primum organum movendi ex parte corporis : sed cum sensitiva et intellectiva sint solæ moventes, et illæ operentur in capite, videtur quod in capite sit primum organum motus. Cum autem anterior pars sit humida valde et mollis, sicut competit sigillationi formarum sensibilibus in sensibus, motus autem per humida et mollia membra expleri non possit, eo quod illa tracta a motore resolverentur, oportet quod ex opposito sit anterioris capitis : et sic posterior pars capitis erit principium motus ex parte corporis : sicco enim perficitur motus magis quam humido. Motum autem dico motum processivum, qui est motus animalium.

Alia autem ratio datur a quibusdam posteriorum, sic : diversarum virtutum et non subalternatim positarum diversa

Prima ratio.
Secunda ratio.

sunt organa. Cum igitur motiva et sensitiva sint diversæ virtutes, et non subalternatim positæ, habebunt organa diversa : et cum sint eadem moventes et apprehendentes subjecto, oportet quod sint vicariæ : et ideo apprehendentibus antè capitis, moventibus autem posterius attribuerunt.

Tertia ratio. Tertiam autem ponunt ex rationibus anatomiciæ : quia cum rescinditur corpus, nervi motivi omnes continuari videntur, aut ad nucham quæ est vicarius posterioris partis cerebri, ex qua descendit, aut ad posterius capitis. Cum igitur nervi motivi et chordæ per quas fit motus, non continentur ad principium motus ejusdem, certum esse inquiunt in posteriori parte capitis esse organum, quod primum est principium hujus motus.

Quarta ratio. Quarta vero sumitur ab expertis, ut dicunt : quoniam mollificantia nervos et infrigidantia quæ stupefaciunt et immobilitant nervos motivos, et resolvunt, descendunt a posteriori parte capitis, et cum ibi tangunt nervos, tollitur motus a membris, et fiunt contracta. Relinquitur igitur quod id sit principium motus in toto corpore.

Quinta ratio. Quinta autem est ratio similiter ab expertis : quoniam in incisus aliquibus nervis jam quidem contractionem et immobilitatem incurrunt quorundam membrorum : quod non esset, nisi esset ibi primum motus principium. Eadem autem sententiam videtur tenuisse Plato, qui, sicut narrat Apuleius in libro de *Platonis dogmate*, totum hominem in vultu esse dicebat : eo quod omnes animæ virtutes originaliter erant in capite, et præcipue motiva quæ habet movere per imperium. Justum enim esse dicit hanc arcem corporis tenere, sicut et in mundo quæcumque superiora sunt, inferioribus, ut asserit, habent imperare.

Adducunt autem quidam, sicut Rasis, et alii, inductive argumentantes, quod si cor et hepar essent principium motuum, tunc haberent et ab ipso et ad ipsum instrumenta motus derivari. Hoc

autem non est verum : et in hoc esset maximum nocendum : quoniam extendendo nervos et ossa frequenter commoverentur et fortiter a basi sua solverentur : et hoc induceret mortem, præcipue cum etiam nos experti simus, quod cadentes vel percussi in posteriori capitis, statim obrigescunt et incurrunt membrorum immobilitatem. Consentiant autem omnes isti Platoni, quem fere omnes Antiqui sequebantur, exceptis admodum paucis, qui concupiscentiam et appetitum posuit in hepate esse tamquam in infimo alvi et abdominis, audaciam autem sive irascentiam in corde, et rationem omnia pro nutu moventem cum omnibus sibi in movendo deservientibus dixit esse in cerebro. Caput autem propter hoc esse sphæricum ut organum motus in animalibus etiam in figura videretur congruere corporibus, quæ primo in cælestibus moventur, et sunt causa motus inferiorum : esse autem distinctum, ut mediam arcem tenerent imperantia, et altrinsecus distribuere illis deservientia : quando quidem ea quæ motum esse faciendum vel non faciendum denuntiant : retro autem ea quæ eundem mandant executioni.

Addunt etiam quidam Socraticorum Philosophorum, quod si concederetur principium motus animalium cordi, in quo est irascentia, vel hepati, in quo est latebrosa sedes libidinum, numquam esset habens modum nisi inordinatum. Causa enim inordinationis in motibus est quando hæc prima movent, et non ratio. Esse autem tunc dicunt ordinatos motus, quando motus ab arce descendunt dignitatis, hoc est, a sede rationis in capite. Omne enim animal asserunt quamdam cognitionis scintillam habere in capite, quæ causa est ordinationis motuum ipsorum secundum naturæ indigentiam, quamvis non habeat rationem.

Amplius autem addunt his quæ dicta sunt, quoniam et læsiva arcis in capite motuum faciunt inordinationem, non autem læsiva in corde vel hepate : cordiaci

enim et hepatici motus habent ordinatos : non autem his quibus corrupta est media cellula capitis, quam *logisticam* primus Socrates appellavit : et hoc est signum, quod principium motus a capite sit, et non ab aliquo alio organorum.

CAPUT II.

De rationibus Peripateticorum per quas probatur cor esse principium motuum animalium.

Hæc autem sententia Peripateticis omnia per rationem investigantibus, nullo modo placuit : propter quod et Averroes, ubi loquitur de *movente* super librum Aristotelis de *Anima*, et Avicenna, in quinta parte sexti *Naturalium suorum* ¹, et alii quam plures, cor et non caput primum movens inter organa corporis esse tradiderunt. Quod sex fortissimis rationibus virtutem demonstrationis habentibus confirmatur.

Prima ratio
Peripateticorum.

Una quidem est, quod omne quod movetur in mundo, necesse est quod ad primum corporis primi motum reducatur sicut ad causam. Est autem in movendo, sicut in VIII *Physicorum* ² demonstratum est, animal sicut mundus minor : oportet igitur quod omnis motus totius corporis animalis reducatur ad primi or-

gani motum sicut ad causam. Non autem est dubium apud aliquos, quin primum membrum motum sit cor. Hoc igitur erit principium omnium motuum qui sunt in corpore.

Amplius secunda ratio est, quoniam Secunda ratio. non dubitamus cor esse principium facturæ omnium aliorum membrorum, et non caput : formativa quippe virtus in semine existens primo format cor sibi in sedem et domicilium, et ex illo porrectis lacertis et venis et arteriis superiora fabricat et inferiora. Quod autem est principium substantiæ, ipsum est etiam principium operationis et motus aliorum membrorum. Oportet igitur cor esse principium omnium motuum.

Tertia autem ratio est a signo, quod Tertia ratio. tamen cum causa convertitur : quoniam omnis motus animalium fit in mutando vel fugiendo : et his duobus sensibilibus percipitur cor secundum diastolem quidem in uno, et secundum systolem in alio moveri. Videtur igitur et indubitanter constat cor horum motuum esse primum principium.

Quarta ratio est, quoniam Quarta ratio. passiones quæ faciunt motus istos, omnes sunt a corde, sicut timor, tristitia, spes, gaudium, delectatio, et amor, et omnia hujusmodi. Cum igitur sint effectiva motus et ad cor referant, constat cor esse membrum quod organice movens in motibus animalium est principium.

Quinta autem ratio est a spiritibus et Quinta ratio. sanguine sumpta : quoniam per calorem et spiritum et sanguinem præparantur organa ad motum : hæc autem in omni motu animalium videmus aut a corde protendi, aut ad cor refugere : quoniam in amando, sperando, gaudento, delectando, a corde procedunt et protenduntur in organa mobilia. In timendo autem et tristando et verecundando et dolendo sentimus ista ad cor refugere, sicut

¹ AVICENNA, in libro sexto Naturalium, pars v, cap. 6.

² VIII Physic. tract. II, cap. 11.

infra ostendemus. Cum igitur faciant motum et accelerent eum confortata, videtur inevitabili ratione concludi cor esse principium primum eorumdem motuum animalium.

Sexta ratio. Sexta autem et ultima ratio est, quoniam omnia opera vitæ necesse est principiari a primo organo vitæ. Est autem motus animalium principium inter opera vitæ. Oportet ergo quod a sede et domicilio vitæ principientur. Multa autem talia alia sunt, ex quibus idem probatur, sed propter prolixitatem hic dimittimus: quia sufficiunt hæc. Est autem et convenientissimum cor esse motus principium. In ordine enim universi cœli et mundi scitur idem esse motus principium et aliorum operum, nisi quod suo modo continuum habet motum: scitur autem hoc non nisi cor esse.

Adhuc autem est alia ratio convenientiæ: quoniam cum motus animalium sit de dextro in sinistrum, convenientissime refertur ad medium inter dextrum et sinistrum: hoc autem non est nisi cor: quoniam licet declinet parumper ad sinistrum, tamen hoc non fit nisi per accidens ut scilicet a nocumentis hepatis quæ ascendunt in dextrum subducatur, et etiam sinistrum aliquantulum calefiat, quod ex absentia hepatis calidi, et præsentia splenis frigidi in frigidatur: aliter enim nimis in frigidaretur.

Hæ igitur et similes rationes sunt Peripateticorum.

CAPUT III.

Quid veritatis sit in utraque inductarum opinionum?

Harum autem duarum sectarum medicorum vulgus secundum plurimum rationis expers eligit viam Platonis: Philosophorum autem peritissimi consenserunt in viam Peripateticorum, dicentes cor esse principium vitæ spiritus, sensus, et motus, et omnium eorum quæ sunt in corpore. Ego autem consentio Philosophis, tamen aliquid veritatis dico esse in opinione Platonis, Socratis, et medicorum.

Dico enim, quod cor est principium, eo quod ab ipso procedit, et ad ipsum refugit spiritus movens: spiritus enim primum est, quod post cor movet cum motum sit. Sicut autem dicimus spiritus esse directos ad cerebrum, et ibi determinari in organis sentiendi ad hoc ut fiant sensitivis ministrantes et præsentantes formas sensibilium, ita videtur hic dicendum, quod in veritate inevitabiliter conclusum est cor esse motus principium, sed tamen spiritus extendi et retrahi per nervos cerebri, et ipsius posteriores partes et cellulas, et ibi induere formam motorum plene: et ideo ab illa parte sentiuntur extendi nervi et chordæ ad ipsius motus perfectionem. Et videtur mihi, quod non est contradictio in verbis Antiquorum: quoniam Peripatetici optime concludunt cor esse principium pri-

num inter omnia organa animalis motus : proximum autem et determinativum est posterior pars cerebri, quæ per spiritum illuc protensum movetur a corde. Motor autem non semper ad se ducit ligamenta et chordas moventes, sed ad locum ubi convenienter fit motus : quoniam si viæ istæ omnes sigillatim perfringerent ad cor, una impediret aliam. Et ideo cum substantialiter oriuntur a corde, derivantur ad cerebrum, et inde dividuntur per corpus, ut totum per musculos moveant. Cor enim esse principium nervorum ostendit ipsa ejus durities, quæ non est aliunde causata, nisi quia ex carne nervosa tota est causata substantia cordis plus quam caro alicujus alterius membri. Ex substantia igitur cordis derivantur, licet hoc medici dicere non videantur. De hoc tamen nos in libris *Animalium*¹ trademus, et ostendemus dictum Aristotelis esse verum, quod scilicet tam venæ quam nervi deriventur a corde sicut et arteriæ, et quicquid est aliorum in corpore.

Hujus autem talem possumus assignare rationem. Scimus enim quod omnis diversitas quæ est in organis animalium, est propter diversitatem particularum animæ. Oportet igitur quod talis ordo sit organorum ad unum aliquod organum, qualis est ordo particularum animæ ad unam animæ substantiam, ex qua fluunt hujusmodi animæ potentiæ : aliter enim, ut dicit Averroes, nec anima, nec corpus esset unum. Cum igitur alibi ostensum sit animam esse in corde, videtur omnium organorum resolutio esse ad cor sicut ad principium primum : principium quippe primum est, ex quo sunt alia, et ipsum non est ex aliis. Caput enim scimus crescere ex aliis membris, et etiam quasdam capituli partes ultimo compleri in generatione : sed cor sic est, quod non est ex aliquo aliorum : oportet igitur esse prin-

Cor est principium motus et vitæ.

cipium motus et vitæ et sensus et omnium aliorum operum vitæ. Sed sicut prima semper universalis sunt et confusa et indistincta et indeterminata, determinantur autem quando applicantur secundis, ita de istis viribus et motibus, quod non habent plenam determinationem et distinctionem secundum quod a corde procedunt et applicata aliis organis principalibus accipiunt formas et virtutes illorum : et ex his distinctas et determinatas habent propositiones : et ideo sentiendi operatio dicitur perfici in prima capituli parte, et movendi in ultima capituli parte, et naturalis virtus dicitur perfici in hepate, formativa vero in testiculis. Sic autem dicendo per conformitatem respondent ea quæ microcosmi sunt, his quæ sunt microcosmi : quoniam esse naturæ quanto altius refertur ad principium mundi est indistantius et simplicius, et descendendo per principia moventia ad esse, quæ tamen omnia non participant nisi virtutem primi accipiant distinctionem et quamdam compositionem. Aliter enim, ut videtur, frustra esset inventus locus secundorum, si etiam esse eorum et distinctionem acciperent ea quæ sunt a primo universitatis motore : propter aliquid enim est secundum, et propter aliquid est tertium, et sic deinceps : et eadem ratio est de membris principalibus in corporibus animalium : secundum enim aliquid confert ad id addens quod nuntiavit primum, et tertium iterum aliquid addit, et sic deinceps donec id quod procedit in opus, universaliter et sufficienter distinctum et determinatum sit. Per hoc etiam patet solutio omnium eorum quæ in prioribus generabant dubitationem.

¹ Cf. III *Animalium*, tract. I, cap. 7; et XIII *Animalium*, tract. I, cap. 4.

CAPUT IV.

De primis duabus passionibus generalibus cordis, quæ disponuntur ad motum.

Quia vero jam determinatum est, quod cor omnium horum principium est quæ antecedunt animalium motum, ut scilicet gaudii et tristitiæ et delectationis et hujusmodi, superest determinare habitudinem et compositionem cordis in his passionibus : quoniam sine hoc nequam bene cognoscemus animalium motus.

Passionum genera, tristitia, et delectatio.

Dicamus igitur, quod genera omnium passionum sunt tristitia et delectatio : timor enim quædam præconcepta tristitia est, et spes quoddam præconceptum gaudium et delectatio, oportet nos causas physicas horum determinare in animalibus. Quid enim ista sint secundum essentiam et diffinitionem, dimittendum est ethicis scientiis.

Omnia autem in motibus cordis, ut dicit Andronicus Peripateticus, perficiuntur cordis constrictione vel cordis dilatatione, quos motus Græci *diastolem* et *systolem* vocant. Resumentes igitur quædam eorum quæ in libro de *Anima* dicta sunt, dicimus omnem sensum dissimilitudine perfici : quando enim organum perfectæ rei sensibili assimilatum est, tunc non sentitur amplius : et ideo contingit, quod ethicus suum non sentit calorem, cum tamen major sit aliquando quam febrici-

tantis. Causa autem hujus est, quod calor ethicus infusus factus est habitudinalis : et ideo non sentitur : quod et nomen ejus ostendit, quia *ethicus* morem sonat vel consuetudinem : febricitans autem eo quod calor ejus circumstat membra, sentitur multum : propter quod etiam cum passio ejus per dissimilitudinem naturæ patientis fiat, et omnis hujusmodi passio fiat quadam sensus passione, Andronicus Peripateticus diffiniens passionem dicit eam esse irrationalis animæ motionem, et præter naturam motui appropinquantem : non enim passionibus subjacet rationalis pars animæ quæ nullius partis corporis est actus, cum passio sine passione corporis nullo modo perficiatur. Appropinquat autem motui qui est præter naturam : quoniam si esset habitualiter redactus ad naturam cordis et corporis, absque dubio nullam faceret omnino sensus perceptionem, et ita per consequens non faceret motum.

Est igitur prima causa passionis moventis dissimilitudo quæ est inter potentiam et actum : differentia autem potentia passionum et secundum Andronicum et secundum omnes Peripateticos sunt quatuor, scilicet timor, et tristitia, et concupiscentia, quam quidam spem vocant, et delectatio sive gaudium, quæ quidem licet quatuor sint, tamen in causis naturalibus et motibus ad duo reducuntur quæ nos angustiam et delectationem possumus appellare. Angustia enim est ex præsentem et futuro, et delectatio similiter : et in primo quidem movetur cor secundum systolem constringendo et fugiendo in seipsum, et in delectatione movetur secundum diastolem dilatando se extra seipsum et procedendo bonum conceptum in totius corporis perfectionem. Cujus signum est, quod cum homines sunt in angustia, constringuntur et suspirant : et cum sunt in delectatione multum immensa, tunc extenduntur brachia, et totum corpus, quasi non in potestate sui ipsorum existentes. Causa enim primi est, quod cor retrahit ad seipsum sanguini-

nem et spiritum ut calefaciat, et postea calida et subtiliata extendat in adjutorium corporis et membrorum : propter quod etiam plurimi primum in præliis pavidi et timentes, post audaces et feroces inventi sunt. Cujus causa et hic aliquantum patet, et infra melius patebit. Causa autem secunda est, quod cor expellendo dulcedinem conceptam, implet membra spiritu cum impetu a corde propulsato in subtili sanguine : et hæc compellunt membra distrahi et extendi. Scimus enim quod nihil omnino fugit quod naturale est sibi et conservativum sui, sed potius quod suæ naturæ est contrarium.

Angustia est contra naturam. Motus delectationis est secundum naturam.

Oportet igitur, quod omnis motus angustiae et ipsa angustia sint ex hoc quod sunt contra naturam : per eandem autem necessitatem convincitur motus delectationis esse secundum naturam propter id quod est naturæ conferens apprehensum per sensum : et ideo hæc imitatur natura et prosequitur : et totum spiritum et corpus extendit in illud. Licet autem angustia sit, sicut dictum est, et similiter delectatio ex conjunctione convenientis cum convenienti, ut dicit Dionysius, tamen hic secundum Platonem et Aristotelem, diversimode accepta inveniuntur. Plato enim considerans passiones non esse nisi secundum corporeas et cordis virtutes, dicit quod omnis delectatio est generatio in sensibilem animam, et tristitia similiter, cum opposita nata sint fieri circa idem. Aristoteles autem vult in *Ethicis*, quod virtus sensibilis animæ et intellectualis non habens impedimentum in propria et naturali operatione : et ideo per causam diffiniens delectationem, dicit quod delectatio est operatio propria et connaturalis non impedimenta : et hunc frequens Avicenna, in epistola de *Dispositionibus cordium et speciebus eorum* ¹ dicit, quod omnis delectatio sive delectatio est apprehensio per-

Delectationis definitio.

fectæ acquisitionis propriæ virtuti, sicut sentire dulce et odorem bonum. Delectatio est sensui percipere vindictam virtuti irascibili, et percipere speciem virtuti cogitativæ et æstimativæ, et theoremata virtuti intellectivæ. Cum enim omnis perfectio sit naturalis, oportet necessario, ut dicit Avicenna, delectationem innasci cum quælibet virtus perceperit quod naturale est sibi. Istæ igitur sunt duæ primæ causæ imitationis vel fugæ in omni motu animalium.

Si quis autem forte dubitet de his dicens, quod sæpe naturalibus et conferentibus bonæ habitudini quosdam contristari videmus et angustiari, sicut de absentia meretricum vel vini superflui tristantur fornicatores et potatores, advertat ea quæ dicta sunt, quod scilicet habitus innaturalis transponit animal extra perceptionem sensus, et quod sentit contrarium illi habitui innaturali, movet tristitiam, et quod conveniens illi senserit, movebit delectationem. Et ideo delectationes fornicatorum et potatorum tristitiæ sunt, sicut delectationes ægrotatorum et tristitiæ sunt. De his autem in *Ethicis* jam dictum est : nunc enim non intendimus de his nisi secundum quod ad cordis dispositiones reductæ, faciunt motum animale in fugiendo vel prosequendo.

¹ AVICENNA, VII Ethic, lect. 12.

CAPUT V.

De diversis dispositionibus cordis ad systolem motum et diastolem in tristando vel gaudendo vel hujusmodi.

His igitur sic habitis, oportet scire quod potentia angustiandi et delectandi habet quidem omne quod movetur animalis motu, sed non una omnium hujusmodi naturalis habilitas et aptitudo : quoniam differentia inter potentiam passivam et habilitatem sive aptitudinem est, quoniam potentia æqualiter est inter opposita : habilitas autem et aptitudo inclinata est magis ad alterum oppositorum.

Oportet autem nos has aptitudines determinare ex dispositionibus primi organi motus, hoc est, cordis cujus complexionones multæ sunt sicut et totius corporis animalium. Est autem omnis æqualitas naturalis, et egressus ab æqualitate est innaturalis, aut ad innaturalia appropinquans. Dico autem æqualitatem proportionis geometricæ medietatis, sicut sæpe dictum est in antehabitis libris. Quot sint autem qualitates complexionum in communi, alibi diximus in libro de *Natura locorum*.

Dicamus igitur hoc in communi, quod cor proportionaliter in medietate consistens habet sui complexionem respondentem spiritum et sanguinem, et præcipue si-

nistri thalami cordis, in quo est subtilior spiritus et sanguis clarior. Possunt autem ista secundum egressum ab æqualitate et secundum æqualitatem multis modis variari. Aut enim est multum subtilis et clarus temperatæ complexionis humidus calidus, et talis spiritus maxime accedit ad dispositionem cœlestium : aut est habens omnes proprietates his contrarias, quod scilicet est paucus, grossus, obscurus, intemperatæ complexionis, aut in frigore excedens, aut in calido vel in humido vel in sicco, et æqualitatem suæ complexionis derelinquens : propter hoc quod cor et corpus similiter recedunt ab æqualitate : aut est deficiens in aliqua qualitate ab illo, vel in quantitate, et alias retinens. Et hoc est multis modis : aut est paucus, subtilis, clarus, et temperatus : aut est multus, grossus, clarus, et temperatus : et hoc raro contingit : grossities enim illa procedit ad aliquo obscurante eum, et ideo frequenter comitantur subtilitas et claritas et grossities et obscuritas. Contingit tamen aliquando obscuritas ex ipsa spiritus compressione, licet sit clarus in seipso : et hæc compressio aut contingit ex frigore accidentali, aut ex revolutione spiritus in seipsum : aut est etiam spiritus multus subtilis, sed non clarus, sed niger et fuliginosus et intemperatus. Et sunt tot modi spirituum, quoties dictæ spiritus conditiones possunt componi et dividi, et in quolibet modo sunt multi particulares modi, qui quidem aptitudinem cordi faciunt ex naturali compositione : et tunc perdurant hujusmodi habilitates. Et si aliquando studium ponat aliquis in contrarium, tamen redeunt et vincunt frequenter, sicut dixit Horatius¹,

Naturam expellas furca, tamen usque recurret.

Aliquando autem causantur ex consuetudine aut studio, et illæ etiam durant

¹ HORATIUS, I Epist. ep. x, 24.

diu. Aliquando etiam fiunt ex nutrimento sumpto, et illæ non durant diu, nisi assidue tur talis sumptio nutrimenti.

Quis sit ap-
tus gaudio?

Dicamus igitur, quod si in corde est multus spiritus, clarus, subtilis, calidus, et humidus temperate, hic est aptissimus gaudio et delectationi : et non tristabitur nec angustiabitur nisi ex magna causa. Et hæc est optima dispositio quæ quasi vitam florentem facit : et tamen hoc propter conjunctam sibi dissolutionem impedit studium scientiæ et virtutis, sicut Aristoteles in libro de *Problematibus* ¹ dicit, asserens quod omnes excelsi in sapientia et heroicis virtutes habentes, fere fuerunt melancholici. Talis igitur in cujus corde generatur spiritus hujusmodi, in omnia membra corporis emittit spiritus : quia multi sunt qui non deficient : et ideo perseverant in eo gaudium et delectatio : et talis clara et jucunda habet conceptas formas, quia tales repræsentat clarus spiritus : et talis intime gaudet, quia in medullas ejus penetrat subtilis spiritus : nec removetur a deliciis propter hoc quod nihil intemperatum est excutiens spiritum extra statum quem habet. Si quis autem est pauci subtilis et clari spiritus et humidi, facile gaudebit ex qualibet occasione, et vehementer, sed cito deserit : quia spiritus deficit ex paucitate, et facile dimittit quod concipit ex humore : et talis est puerorum spiritus : et ideo facile jucundantur, et facile cadunt a jucunditate. Si quis autem est pauci spiritus et tenuis et non clari, sicut sunt spiritus convalescentium ex ægritudinibus et macilentorum siccorum, hic non gaudet de facili : eo quod spiritus vix sufficit principio vitæ : et ideo in corde retinetur, et non effunditur in delicias corporis.

Quis sit ap-
tus iræ?

Hi autem quorum spiritus est multus quidem grossus, calidus et obscurus, erit fortissimæ iræ : et diu tenebit eam, nec de facili sedabitur et non delectabitur de

facili : quia spiritus grossus repugnat diffusioni : et ideo pondere suo comprimit cor, et obscuritate terribilia ingeret, et grossitie diu tenebit : et ideo tales sunt memores injuriarum cum tempore. Tales enim sunt habentes, ut dicit Aristoteles, proprietatem rubei vini, quod fumosum est, et habet vaporem spissum et calidum, et caput semper spiritibus replentem : et ideo sunt studiosissimi et constantes in maturitate et gravitate heroicæ virtutis, et magis attendunt his quæ sunt rationis quam his quæ sunt sensuum, propter longam moram formarum in cellulis capitis, super quas non sensus, sed intellectus convertitur. Si autem sit spiritus paucus et non clarus, sed tamen subtilis et calidus, talis erit brevis iræ et ferventis : sed non diu tenet eam, tum propter spiritus paucitatem, tum propter subtilitatem ejusdem. Fervet autem in ira ex calido, et non de facili gaudent ambo isti.

Si autem sit spiritus paucus et grossus et obscurus et frigidus, hic erit de conditione melancholiæ et senii : et hoc tantum excedere potest in his, quod nunquam gaudebit, sed semper tristabitur : et si non excedit multum, tunc tamen non facile gaudebit, sed facile tristabitur, et erit pavidus ex qualibet causa, et fugiens, et etiam, ut ita dicam, formidans : et ideo senes tristes sunt et melancholici de melancholia naturali. Simile autem judicium est de aliis hujusmodi.

Quis sit ap-
tus tristitiæ?

Quando autem ista sunt ex cibo et potu, tunc habent etiam secundum complexionem ciborum et potuum varietatem. Et idem est quod medicorum sapientes dicunt, quod boni cibi bonos generant humores, et boni humores bonos spiritus, et boni spiritus bonos mores et delectabilem vitam. Hinc etiam est, quod vinum dicitur bonæ spei facere hominem : quia est calidum naturaliter, et habet hu-

¹ ARISTOTELES, Lib. de Problematibus, part. 30, probl. 1.

morem actualem subtilem, ex quo generantur multi et boni spiritus : sed tamen talis non gaudet nisi in sensibus : quia vinum sui vapore obscurat cellulam logicam : et discurrunt spiritus inter organa sensuum, et per mediam capitis vacuitatem, et non repræsentant nisi sensibilia. Et hæc est causa, quod ebrii videntur quod moveantur ea in quibus sunt propter spirituum discursum ex calore vini.

Ex his autem advertere quiddam quod multi minantur : et hoc est quod intellectualia et divina et rationalia et honesta minus sentiuntur delectantia, et contraria earum minus tristantia quam sensibilia et humana et utilia et aliquando inhonesta : cum tamen illa incomparabiliter et multo secundum se magis delectabilia sunt quam ista. Causa autem huiusmodi est, quod sensibilia et humana particularia et universalia sunt corporaliter in spiritu qui a corde procedit, repræsentata, et ideo afficiunt fortiter, et compatitur eis secundum delectationem et tristitiam corpus : eo quod corporaliter et corporali spiritu movent : sed in intellectualibus et rationalibus et honestis non compatitur corpus, eo quod hæc non sunt in spiritu corporeo : et ideo parum movent, maxime eos qui circa abstracta et simplicia et incorporalia nesciunt attendere : et hæc est etiam causa quare ut frequenter vincunt delectationes corporales, et evertunt delectationes virtutis et honesti et divinas.

CAPUT VI.

De differentia motuum cordis, angustiae scilicet et vigoris, sive audaciae et læticiae.

Inveniuntur autem quædam dispositiones cordium in fuga vel imitatione, quæ videntur valde similes, non tamen sunt eadem, et sunt præcipue quatuor. Debilitas enim cordis videtur esse valde similis coangustationi cordis, et vigor cordis videtur esse valde similis dilatationi et ampliationi, cum tamen eorum differentia non sit incognita. Et prima quidem differentia est in hoc quod unum eorum non semper concomitatur vel sequitur ad alterum : non enim omnis qui corde est debilis, est tristis vel angustiat : nec omnis tristis est timidus, vel corde debilis : sicut nec omnis qui habet cor vigorosum, est lætus : nec omnis qui est lætus, habet cor forte et vigorosum.

Secunda autem differentia est in diffinitionibus eorum : timiditas enim quæ est cordis debilitas, diffinitur per res formidatas, etiam quando non sunt sufficiens causa timoris sive formidationis, et tamen tolerari non possunt : formidosus enim vel timidus est, qui ea quæ timenda et non timenda sunt tolerare non potest. Angustia vero cordis diffinitur per contristans : angustiosus enim est quem angit in corde id quod modicam habet causam tristitiæ, ex eo quod tolerari non

Debilitas.

Vigor.

Timiditas.

Formidosus.

potest propter apparentem injuriam illatam.

Tertia autem differentia est sumpta ex concomitantibus : fuga enim sequitur semper cordis debilitatem, quæ est timiditas : et ideo cor in timore non movetur, nisi secundum systolem. Angustia autem sequitur vindictam, cum non potest tolerare injuriam : et ideo in ea cor quidem primo movetur secundum systolem, et postea secundum diastolem, quando vindicat.

Quarta autem differentia est effectus eorum in corpore : debilitatem enim cordis quæ est timiditas, sequitur remissio caloris naturalis et dominium frigiditatis. Angustiam cordis sive tristitiam sequitur accensio caloris et fervor spiritus.

Quinta autem differentia sumitur in præparantibus cor ad utrumque istorum : nimia enim tenuitas spiritus et paucitas parat cor timiditati : sed spissitudo spiritus et attenuatio parat cor angustiae et tristitiae : et ideo animalia habentia magnum cor et spiritum paucum et sanguinem frigidum, sunt timida multum, sicut lepus. Habentia autem cor magnum et spiritum multum et spissum et sanguinem calidum, sunt valde ferocia et audacia : et de hominibus est simile. Causa autem hujus est, quod cum spiritus sit tenuis et paucus recurrens ad cor magnum, retinetur in eo, et non calefit propter hoc quod sanguis est frigidus : et remanent illa animalia constricta. Cum autem cor magnum est et spiritus multus et calidus, quando sanguis et spiritus ad cor recurrunt, ibidem calefiunt et subtiliantur : et tunc cum impetu egressa implent totum corpus, et movent ad audendum. Et hæc eadem est causa, quod quidam (sicut supra diximus) sunt in principiis aggressionum bellorum vel aliorum terribilium trementes et pallidi, et postea calefacto sanguine et spiritu in corde sunt audaces ultra modum et irati : omnis enim ira per hoc quod tristitia quædam est, primo quidem habet motum secundum systolem cordis, postea autem in

vindictam movet cor secundum diastolem.

Quod autem multum considerandum est in his, est consuetudo. Consuetudo enim sibi facit succedere in corde similes passiones, ita quod tristitia sequitur tristitiam, et timor timorem, et vigor cordis sive audacia audaciam : et ita est de omnibus aliis, sicut locus qui calefieri consuevit, citius calefit, et in canthaphora sive siphonibus sequitur aqua aquam primo attractam per inspirationem sive suctionem : et ita tristitia sequitur tristitiæ consuetudinem, et gaudium consuetudinem gaudii : et ideo solitarii frequenter melancholici et tristes efficiuntur, et conversantes cum jucundis et lætis mutantur ad sanguinis naturam.

Sed quod præcipue pertinet physicae speculationi, est quod gaudium naturaliter duo conservant, quorum unum est temperantia spiritus in sua compositione. Secundum autem larga materia reparantium spiritum loco ejus quod dissolutum est, spiritum restaurans : et quod conservetur ab his quæ dissolvunt ipsum per modum violentiæ, sicut facit labor et motus immoderatus et balneum longum et calidum et hujusmodi. Dissolutionem etiam spiritus præcipue duo causant, quorum unum est, quod forte sua subtilitate et mobilitate et caliditate nimis præparatus est ad dilatationem : et ita dilatando se evaporat et deficit. Secundum autem est, quod forte nutrimentum quod eum restaurare debuit, natum est moveri ad aliam partem quam ad eam ad quam dilatatur spiritus : et tunc non restaurabit eum, et dissolvetur. Tristitiam autem frequenter duo sequi consueverunt : unum quorum est debilitas virtutis naturalis : alterum autem est spissatio spiritus, quæ accidit ex frigore comprimente ipsum in corde : tunc enim incipit exstingui in eo calor naturalis propter multam ipsius retractionem et spissationem, sicut etiam aer spissatus mutatur ad naturam aquæ vel terræ.

Nota de consuetudine.

Solitarii.

Conservantia spiritus.

Dissolventia spiritus.

Tristitiam sequentia.

CAPUT VII.

De dispositionibus cordis in movendo ex diversitate sanguinis causatis.

Sicut autem ex differentia spiritus causas dedimus diversarum dispositionum cordis in movendo, ita est etiam diversitas eadem sumpta ex diversitate complexionis sanguinis. Sanguis enim multus clarus temperatus inter tenuitatem et spissitudinem aptat cor gaudio, sed est causa remota. Causa enim propinqua huiusmodi est, quia spiritus splendens purus temperatæ complexionis inter tenuitatem et grossitudinem, quia hunc spiritum ante diximus esse gaudii causam.

Sanguis
aquosus.

Sanguis autem aquosus, tenuis, clarus, frigidus aptat cor debilitati et formidini et timiditati. Cujus causa est, quia spiritus qui fit ex tali sanguine gravis est ad movendum ad exteriora membra : est autem hic spiritus parvæ accensionis, eo quod sit frigidus, et quod aptatur ad gaudium vel ad iram et in parvo valde motu : ex sua autem tenuitate talis spiritus facile dissolvitur : et ex sua frigiditate contingit ei quod est valde paucum.

Sanguis cla-
rus.

Sanguis vero clarus distemperatus in calore qui est gracilis spumæ citrinæ, est multum accensus : et ideo cor aptat iracundiæ ferventi propter spiritum similis complexionis qui generatur ex eo : hic enim est cholericus et habens cholera

ferventis et mobilis proprietates. Sed Sanguis grossus, turbidus, distemperatus in calore aptat cor tristitiæ et iracundiæ pertinaci : sed tristitia fit propter spiritum turbidum, qui generatur ex tali sanguine. Ira vero fit propter velocitatem accensionis ipsius circa cor : pertinacia autem iræ fit ex eo quod est spissus, spissum enim calefactum non cito frigescit.

Sanguis
grossus.

Tristitia.

Ira.

Sanguis autem flavus et tenuis aptat iræ non ferventi nec duranti, qui spiritus generatus ex tali sanguine accenditur cito, et cito exstinguitur : est enim calidus ex tali sanguine generatus spiritus, et ideo cito accenditur, et propter hoc est tenuis, et ideo cito exstinguitur.

Sanguis fla-
vus.

Cor autem habens sanguinem grossum non turbidum cum fuerit multi caloris : quod tamen rarissime evenit propter calorem qui subtiliat et non permittit sanguinem in grossitie sua permanere : cum tamen evenit aliquando, erit cor illud non contristabile, et audacissimum et fortissimum, et minoratur ira ejus, eo quod lætitia ejus constringit. Nam sicut e converso tristitia cor iræ adaptat, ira enim est in repellendo, lætitia secundum aliquid sui comparatur delectationi : et delectatio propter appetitum quem habet, comparatur attractioni cuidam. Ira igitur talis cordis non fit nisi ex magnis causis : et tunc est rigidum in ira propter spissitudinem sui spiritus : et ideo est parvi vel nullius timoris.

Cor autem quod est habens sanguinem grossum non turbidum distemperatum in frigiditate, erit nec multum contristabile, nec multum lætum, nec multum itarum, dum est timor ejus non multus. Cujus causa est, quia cor tale stolidum est in omnibus : spiritus enim generatus ex ipso, similis est ei in complexionione : et hoc facit stoliditatem.

Cor autem quod est habens sanguinem grossum turbidum distemperatum in frigiditate, erit triste, solitudinem amans et quietem, et segnis iræ, nisi sit ex magna causa : et ira ejus erit minus permanens

quam ira habentis calidum sanguinem, dummodo sit similis in omnibus aliis: erit autem permanentior ira ejus quam ejus qui habet spiritum tenuem: erit autem memor hoc injuriarum, licet non ulciscatur sæpe: et hoc contingit propter firmam impressionem formæ nocentis in æstimatione propter grossitiem spiritus retinentis eandem. Ira enim aliquando est permanens: sed tamen motus ejus imaginationem vindictæ non multus et fortis: ira enim est talis dispositionis, quod cum cito recedit, tunc forma ejus non quiescit in imaginatione, sed deletur statim, et tunc de cætero non accidit ei imaginatio injuriæ. Cum enim vindicta jam facta est, tunc sequuntur duo quæ impediunt injuriarum recordationem. Quorum unum est retractio totius animæ a motu vindictæ. Secundum autem est, quia tunc non imaginatur et revolvit recolendo injuriam illatam et commendando eam memoriæ. Cum enim quiescit in vindicta illata, tunc non imaginatur de cætero, nec appetit: et virtutes appetitivæ et motivæ retrahunt vires apprehensivas et e converso: et exterior vis re-

trahit interiorem, et e converso, sicut diximus alibi. Accidit autem aliquando, cum motus valde intenditur ad vindictam, et nihil omnino obstat ei, tunc reputat se quasi obtinuisse quod voluit: et ideo sedatur impetus, et tunc deletur forma injuriæ ab imaginatione et a memoria injuriarum: et ideo nemo ulciscitur in pueros, quia non reputatur ultio sumenda, quæ tam facilis est ac si jam sumpta sit.

Hæc igitur sunt quæ dicenda videntur de dispositionibus cordis in movendo secundum imitationem vel fugam. Alia enim sunt, sicut diximus, ex consuetudine et cibo: quia consuetudo movet per modum naturæ, et cibus generat sanguinem et spiritum: sed de illis est simile judicium cum his quæ dicta sunt. Hæc autem omnia secundum aptitudinem dicta sunt, et vinci possunt per studium et medicinas disponentes corpora, et exercitia liberalia, quæ optime disponunt animum: *passiones.* passiones enim sunt principia quædam et seminaria tam boni quam mali secundum quod aptantur per studia bona et mala.



DE MOTIBUS ANIMALIUM

LIBER SECUNDUS

TRACTATUS I

DE IPSIS MOTIBUS ET PROPRIETATIBUS IPSORUM.

CAPUT I.

De motu constrictionis et dilatationis animalium, et de proprietatibus ejus.

Quia autem determinata sunt quæ ex parte primorum moventium dicenda videbantur tam in anima quam in corpore,

superest ut de ipso motu determinetur.

Est autem animalium motus duplex in genere. Unus quidem qui in omni animali invenitur, sive perfectum sit, sive imperfectum, et hic est motus constrictionis in præsentia timoris et tristitiæ, et generaliter in præsentia nocentium : et motus dilatationis in præsentia conferentium et voluptatis : per hunc enim motum animal cognoscitur esse animal. Alius autem motus est, qui est de loco ad locum, qui tamen non omni convenit animali. Est autem motus cordis primus in constrictione et dilatatione secundum systolem vel diastolem, vel ejus membri quod est loco cordis : quamvis enim hoc aliquando occultum sit, tamen non convenit hoc esse necessarium in omni ani-

Duplex motus animalium.

mali : quia aliter non transmutaretur spiritus ab uno membro ad omnia membra, quod est principium aliorum, sicut in aliis libris et in isto dictum est. Hic autem motus qui est dilatationis et constrictionis, invenitur in omnibus animalibus. Si enim pungantur actu, constringuntur : et hunc motum etiam embryones habere inveniuntur antequam alius sensus vel motus deprehendi possit in eis.

Propter hoc igitur prius loquendum est de illo : et primum quod consideratur in ipso, est quod iste motus a phantasia est et appetitu confusus et debilibus valde. Quod patet per hoc quod nisi talia apprehenderent nocumentum et delectantia, non constringerentur ab illis fugientia, neque dilatarentur ad illa persequentia quæ æstimant sibi conferentia esse. Quia autem, sicut in libro de *Anima*¹ diximus, talia propter imperfectionem sensuum suorum sunt confusæ phantasie et appetitus, propter hoc non movent in eis phantasia et appetitus nisi apud sensibilem præsentiam : et propter hoc est quod aliquando hujusmodi phantasia et appetitum non habere dicuntur : quoniam cum spiritus eorum pauci sint et obscuri et spissi, propter frigiditatem repugnant mobilitati quæ exigitur a sensuum organo per cellulas capitis : et iterum si moverentur, propter obscuritatem non bene repræsentarent formas, et propter modicitatem suam cito deficerent. Cooperatur autem his, quod talia animalia raro habent capita distincta, et ideo habent organum phantasie et appetitus cum sensu imperfecto conjunctum. Propter quod etiam phantasia et appetitus non movent in eis nisi ad præsentiam sensibilis. Omnino autem necessarium est per ea quæ in libro de *Anima*² de movente dicta sunt, aut phantasia et appetitum, aut intellectum et appetitum, aut forte

tria hæc aliquando esse moventia in omni animalium motu.

In hoc etiam motu valde considerandum est, quia videtur esse compositus ex duobus motibus. Uno quidem qui est a circumferentia ad centrum, qui motus est constrictionis. Alio autem qui est a centro ad circumferentiam, qui est motus dilatationis. Et primus quidem horum est motus fugæ, secundus autem prosecutionis. Propter quod ambo isti ab appetitu esse et fieri probantur : et per consequens oportet eosdem esse a phantasia : quia nihil habet appetitum nisi quod habet phantasia aliquam determinantem de delectabili vel de nocivo. Si enim sensus solus in his sufficeret, tunc oportet esse motum sine determinatione convenientis vel nocivi. Hæ enim intentiones non accipiuntur per sensum, licet cum sensu sint, et ab eo eliciantur per potentiam altiore quam est sensus.

Cum autem dicimus istum motum animale esse compositum ex motu ad centrum a circumferentia, et e converso, non possumus tamen dicere quod isti sint motus recti : quia si essent motus recti, tunc non essent lineares, et in motu ad centrum describeret id quod movet, duos angulos rectos super centrum. Et similiter omnino esset in motu qui est a centro, ita quod id quod movet, describeret duos angulos rectos in circumferentia : et nos videmus oculis nostris, quod hoc non est verum : quia cum movetur animal motu constrictionis, retrahitur tota ejus superficies versus unum punctum in medio, et figuratur concavum dimidiæ spheræ : et cum dilatatur, iterum extenditur in una parte plus quam in alia, et effingit convexum dimidiæ spheræ. Causa autem hujus pro certo est, quod motor non est aliqua forma elementaris, sed est aliqua resultatio et vestigium motoris cælestis. Si enim esset motor forma ele-

¹ II de Anima, tract. i, cap. 10.

² III de Anima, tract. iv, cap. 5 et 9.

mentalis aliqua, sicut grave, et leve, vel quævis aliarum, absque dubio in ipso motu invenirentur proprietates motus recti : sicut videmus quando cadit aliquod animal : tunc enim describit in loco super quem cadit, duos angulos rectos. Motor autem cœlestis non sic movet, sed motus ejus est in gyro et circulo : et hic motus est mutans id quod movetur secundum formam semper, sed non secundum subjectum, sicut ostendimus in sexto *Physicorum* ¹. Cum autem motor inferior necessario deficiat semper in aliquo a motore superiore : tunc motor animalium qui non est cœlestis, sed est quoddam remotum vestigium ipsius, in multis necesse est quod deficiat, et præcipue in animalibus imperfectis : cum tamen conatus ejus sit ad imitationem ipsius. Et ideo cum cœlestis mobile situm mutat secundum diversas formas sphaerarum, motor qui est vestigium ipsius, mutabit secundum primas formas semisphaeræ sive hemisphaerii : quia hæc est dimidia sphaera. Primæ autem formæ quæ sunt substantiales hemisphaerio, sunt concavum et convexum, quod illæ conveniunt eidem et ex linea ambiente quæ est diversarum formarum in diversis positionibus suis intus et extra : extra enim est convexa, et intra concava : et similiter conveniunt ei istæ formæ ex figura, quæ similiter intus et extra has habet formas. Secundum has igitur mobile suum movebit motor qui est vestigium aliquod motoris cœlestis. Sunt autem isti motus etiam secundum formam luminis et spiritus : quoniam lumen motum habet pyramidalem, sicut diximus in libris præcedentibus istum.

Hoc autem modo moventur etiam spiritus : eo quod sunt hi instrumenta motus quibus motor cœlestis movent materiam sibi subjectam, et ille qui est vestigium ipsius. Constat autem quod pyramis

retracta retrahitur in punctum, et dilatata dilatatur in circumferentiam : cujus tamen in medio est linea quæ vocatur *sagitta pyramidis*, et cujus punctum extremum est ultima dilatatio, et ad cujus principium est ultima constrictio.

Oportet igitur quod iste motus sic compositus sit ab uno, et ad idem unum : non autem esset ab uno ad idem unum, nisi hoc esset secundum illum modum motus in mobile. Oportet igitur, quod hic modus motus sit ab uno ad unum immobile primum. Et si quæritur, quid sit illud ? non est dubium quin illud sit centrum cordis, vel membri quod est loco cordis. Cum autem motus iste sit compositus compositione quam diximus, oportet necessario interciderere duas quietes, propter ea quæ diximus in antehabitis libris : et hoc repetere non oportet. Quibus autem fiat instrumentis dicendum erit in libris *anatomix animalium*, quos nos faciemus in libro *Animalium*, ubi de nervis et lacertis et chordis quibus omnium animalium motus perficiuntur, sermo habebitur ².

Fuerunt autem quidam rudes et stolidi, qui dixerunt in tali motu et in aliis animalium motibus esse quidem circumulum. Sed hunc circumulum dixerunt esse appetitum : quoniam appetitus primo movetur a re ipsa, et postea prosequendo delectabiliter venit in rem quam appetit : et sic concluditur circumulus in re exteriori : aut etiam appetitus motus extra se ad appetibile revertitur in seipsum cum fruetur illo : et tunc dicebant concludi circumulum in anima appetente : et hoc stolidum et falsum, quoniam secundum hos motus fugæ non haberet circumulum in re exteriori conclusum. Præterea iste motus non habet figuram circuli vel partis circuli nisi metaphorice. Et talis sermo non est physicus, sed potius est peccatum in problematibus transferre ad

¹ VI Physic. tract. III, cap. 3.

² Cf. Lib. I Animalium, tract. II.

proprietas positas locutiones, ut dicitur in *Topicis* Aristotelis. Hæc igitur de motu dilatationis et constrictionis dicta sunt.

CAPUT II.

De motu qui vocatur processivus animalium, et de proprietatibus ejus.

Motus autem animalium perfectorum est valde multiplex. Unus est ille qui vocatur *processivus*, quo animal procedit de loco ad locum. Secundus autem est *motus membrorum*, sicut manus et capitatis et aliorum, quæ licet a corpore non moveantur, tamen in corpore manentia movent secundum diversa loca et ad diversos situs.

Inter hos autem motus perfectior est processivus, et etiam communior : quoniam videmus hunc motum quibusdam animalibus inesse, ut limacis, et ostreis quibusdam quæ motum membrorum aut parum aut nihil habere videntur. Primo igitur de ipsis dicentes accipiamus divisionem Platonis, qui dicit septem esse differentias hujus motus, sicut et in mundo septem dicit genera motus localis inveniri, sicut narrat Apuleius in libro de *Platonis dogmate*. Est enim ante et retro, et dextrorsum et sinistrorsum, et deorsum et sursum, et in gyrum : hæc

enim omnes differentiæ in motibus cælestibus inveniuntur, sicut in *Cælo et Mundo*¹ est ostensum. Inveniuntur autem et in lumine quod est instrumentum et quasi spiritus emissus ab orbe in materiam generabilium sibi subjectam. Motus enim cæli incipit a dextro, et regyrat per sinistrum : motus autem latitudinis vocatur in astronomicis cum est ab ante in retro, et motus luminis est a summo in deorsum. Motus autem formæ cælestis est in gyro. Cum igitur, sicut sæpe dictum est, motor animalium, ut ait Plato, a fonte cælestium exortus sit, non movebit nisi cælestes imitando motores : et sic oportet in motu processivo istas differentias inveniri.

Dicamus igitur, quod sicut est in animalibus perfectissimis et nobilibus, sicut in homine, et leone, et aliis hujusmodi : ita etiam est in aliis vel aliquid simile illi, sive sint bipedia, sive quadrupedia, sive multipedia. In omnibus autem animalibus perfectis sic est, nisi per accidens fiat contrarium, quod ambulando præponunt dextrum, et trahunt sinistrum : eo quod ista duo sunt principia latitudinis, et ambulatio est motus secundum latitudinem. Movens autem in hoc motu est vis sensibilis, cujus motus est ab ante retrorsum, primum in apprehendendo nocivum vel conveniens, et imitando et fugiendo per appetitum vel delectationem fit a retro in ante : et hic est motus vel virtus movendi, et desiderium, et spiritus qui ab intus ad extra ubi sunt sensus, et expanditur in organa anteriora præcipue. Motus autem a deorsum in sursum et e converso, competit etiam secundum processum qui est a sursum in deorsum : et hic est motus motivæ virtutis, quæ affixa est nervis et musculis quibus fit motus : hæc enim a sursum capitatis est exiens usque ad ultima organa pedum deorsum, per quæ motus deam-

¹ II de Cælo et Mundo, tract. I, cap. 1.

bulationis perficitur. In gyro autem motus est ipsius organi per quod fit ambulationis motus : sic enim optime quæ sunt in microcosmo, macrocosmo secundum tam Peripateticorum quam Stoicorum congruunt doctrinam, ut motus primi moventis per imperium in anima et exsequentis ipsum, sit a sursum in deorsum, et non e converso : sic nec motor cœli aliquid movet de suo corpore a deorsum in sursum, sed e converso influit virtutes motivas omnibus quæ moventur in terra. Motus autem primi organi quod est cor, et sui instrumenti quod est spiritus, fit a retro in ante, cum initium factum est ab ante in retro, et ipsa principia motus proxima sint a dextro per sinistram regyranzia motum : et ipsum crus et pes quæ sunt instrumenta facientia motum ipsum, mota sunt in gyro quantum possibile est ipsis.

Ut autem liquidius videantur, resumamus paulisper ea quæ supra bene probata sunt, quod scilicet motor non movet nisi per similitudinem aliquam cœlestis motoris. Oportet igitur, quod etiam motor animalium quantum possibile est, cœlestem motorem imitetur. Scimus autem ex his quæ in *Cœlo et Mundo*¹ dicta sunt, quod tota virtus movendi a supremo in omnes inferiores motores descendit : et scimus per prius habita, quod secundum Platonem et medicos, et etiam secundum veritatem aliquam quam supra expressimus, virtus motiva ab occipite procedit per nucham in membra inferiora : quod omnino similitudinem habet cum illo quod fit in cœlo. Motus igitur virtutis motivæ quæ complete et distincte procedit movendo descendit ab alto in inferius, sicut et virtus motiva procedit a cœlo in elementa et elementata. Similiter autem per antedicta scimus, quod primum organum motus est cor, et movet exsufflando a se spiritum. Et hic

motus est similis ei qui fit in cœlo, qui est secundum circulum declivem : quoniam in illo lumen et radii subtrahuntur generatis et corruptis : quoniam sol est retro apud Capricornum, et expanduntur radii ejus et calor et lumen cum sol movetur ad Cancrum, quod vocatur ab ante in retro, et a retro in ante motus proprie : et per eundem modum spiritus subtrahuntur, quando ad cor posterius redeunt, et immobilitantur tunc organa. Cum autem fit motus a retro ubi est cor, ad ante ubi est sensus, tunc expanditur spiritus, et etiam calor ad ante in sensuum organa, et mobilitantur. Talis autem est motus sensibilis ad animam, et fugæ, qualis est motus ab ante in retro : et talis est motus appetitus ab anima sive a corde, et imitationis, qualis est a retro in ante. Observat igitur in hoc etiam motor animalis motus modum cœlestis motus.

Amplius autem dextrum in cœlo scimus esse, unde est motus, et ubi est virtus motoris major. Sinistram autem est in cœlo quod est in eo quasi tractum ubi est virtus minor motoris. Per omnia autem simile est in animalium motu, nisi sit impedimentum per accidens. Dextra enim pars est, in qua est abundantia caloris propter duo, quorum unum est, quod licet cor declinet ad sinistram propter causam supra dictam, tamen ventriculus suus major aperitur contra dextrum, et exsufflat in dextrum quasi recta diametro spiritum et sanguinem influens : sicut etiam videmus in mundo in omni loco calorem multiplicari, ad quem recta diametro incidunt radii cœlestes.

Alia autem causa est, quam supra diximus, præsentia hepatis. Cum igitur virtus moventis et cordis sit major in dextro, illud erit principium ambulationis. Et ideo animalia perfecta præponunt pedem dextrum, et post trahunt sinistram :

¹ II de Cœlo et Mundo, tract. II, cap. 5.

et si homo inobservate debeat ferre grave onus, parabit humerum dextrum : et si debeat facere expeditum opus, parabit manum dextram : et secundum hunc modum principia latitudinis sunt proxima principia expedita ad motum tam in cœlo quam in animalibus. In gyro autem est formalis motus cœli, sicut ostensum est in sexto *Physicorum*¹, et secundum gyrum formas conversionis mutat, licet substantia maneat in eodem loco. Hic autem motus est organorum sicut crurium et pedum : quoniam scimus horum quæcumque moventur, sunt fabricata radicaliter in aliis membris quæ recipiunt ea in concavo suæ sphaeræ, quod membrorum a medicis vocatur *pixis*, et receptum in illo intrat per convexum sphaeræ merobri quod movetur : et virtus movens est sita in musculo ante membrum quod movetur, sicut movetur pes in cruris pixide habens convexum vertebra sui, et movetur in pixide coxæ in genu impingens suum convexum sui vertebra, et coxa habet vertebra in pixide femoris. Talis autem figura mobilium non admittet motum nisi illum qui aut est circularis, aut imitatur circulum, et maxime cum ipse musculus, in quo est sita virtus movens, sit compositus ex nervis motivis qui extenduntur ex ipso ad membrum quod movetur, et procedit ab ipso in acumine musculi retro chorda quæ ex nervis concurrentibus conflatur, per quam membrum ad suum situm retrahatur : expellit enim virtus musculi membrum per nervos extensos ad ipsum, et retrahit per chordam quæ procedens a fine musculi, alligatur membro. Talis autem expulsus et retractus ad minus faciunt semicirculum. Constat enim quod si pes circini mobilis, immobili alicui in una parte sui quæ est altera pars vocata, alligetur, et inferior pars extrudatur et retrahatur, circulum vel aliquam portio-

nem circuli describet. Sic autem est per omnia de cruribus et aliis mobilibus membris animalium, quæ in una parte extruduntur, et in alia parte in motibus manent alligata.

Manifestum igitur ex dictis, quod organum ipsum motus imitatur motum cœlestem qui est circularis. Hæc autem prudentia primo inventa est a Pythagora, postea consenserunt in eam Socrates et Plato, dicentes animæ motus esse cœli motus : et hanc etiam sententiam corroborant dicta Peripateticorum, tam Aristotelis quam aliorum.

CAPUT III.

Qualiter omnis motus processivus est motus sicut circini, et qualiter est cum labore et pœna?

Non autem prætermittendum videtur quod etiam in libro de *Anima*² nos dixisse meminimus, quod omnis talis motus est ab immobili aliquo primo : et hoc non solum probatur per inductionem in membris animalium : eo quod pes motus movetur a pixide tibiæ immobili, et movetur in ipsa, et tibia movetur in pixide coxæ immobili, et coxa movetur in pixide femoris immobili : et sic est de manibus et brachiis et omnibus aliis membris. Sed probatur etiam hoc

¹ VI *Physic.* tract. III, cap. 3.

² I de *Anima*, tract. II, cap. 5.

per syllogismum : quoniam nos scimus per ea quæ in VII *Physicorum* ¹ probata sunt, quod omne quod movetur, movetur ab alio quodam, et deducitur hoc in VIII *Physicorum* ² usque ad immobile primum, quod est causa totius motus : et si hoc non esset, iretur in infinitum. Oportet igitur simile esse in moventibus et motis in motu processivo : et hoc pro certo est motus sicut circini motus : quoniam non potest habere animal omnino circulare corpus propter hoc quod suus motor non est simplex, sed triplex. Et ideo etiam ipsum oportet multiplex esse, et oportet ipsum esse commixtum et complexionatum ex corporibus quæ recta sunt vocata a nobis in *Cælo et Mundo* ³ : eo quod sint rectorum superficierum et recti motus. Inter autem omnia recta corpora non est quod circum suo motu describat directe nisi circinus.

Cum igitur motor animalium in recto corpore imitetur circum, oportet quod organa sui motus habeant aliquo modo facturam circini. Et scimus quod circinus cum movetur secundum formam et facturam circini quæ dat ei esse et speciem, tunc per motus in sua parte alligatus est cuidam centro immobili, circa quod circum motus circinus describit circum : et si sequeretur circinus motum suæ materiæ quæ forte est lignum vel ferrum, non describeret circum. Ita per omnia est in organis processivi motus : quoniam membrum motum est sicut pes circini mobilis, cujus centrum contra quod movetur, est pixis, in qua est suum vertebra. Cum igitur extrudatur et extrahitur contra centrum illud, non est dubium quin imitetur circum.

Ex his plane manifestum est, quare labor et lassitudo incidunt in animalium motu processivo : hoc enim est ideo,

quia duo motores contrarii sunt in membro, et uterque impedit alium. Motor enim formæ membri vult ire per circum : et motor materiæ membri vult moveri linealiter deorsum : et ideo incidit pœna et lassitudo in eo quod habet sensus iste contrarietatis : et hic motor est anima quæ movet membrum secundum suam formam contra motorem qui movet ipsum secundum suam materiam. Qualiter autem in tali motu duas quietes incidere necesse sit, in tertio de *Anima* ⁴ satis declaratum est, et etiam ex supra habitis satis constat.

CAPUT IV.

Qualiter omnes species motus violenti secundum naturam sunt in motu animalium, et qualiter dicatur processivus et perfectus ?

Est autem mirabile advertere de naturæ solertia, quod cum videret hunc motum duplicem habere motorem : unum quidem qui respondet ei quod movetur secundum formam, alterum autem qui respondet ei quod movetur secundum materiam, ne dissolveretur facile quod compositum est, primum motorem membri fecit imitari cælum et cæli motores per quos est conservatio eorum quæ con-

¹ VII Physic. tract. 1, cap. 1.

² VIII Physic. tract. II, cap. 6.

³ III de Cælo et Mundo, tract. 1, cap. 4.

⁴ III de Anima, tract. IV, cap. 2.

servantur secundum formam. Ne autem esset nimius labor in altero, miscuit eum ex omni specie motus violenti : ut si unus generaret difficultatem, alter faceret levamen.

Quatuor genera motus violenti.

Adhuc autem quod hoc liquide videatur, ad memoriam revocentur quæ in VII *Physicorum*¹ de speciebus motus violenti dicta sunt. Sunt enim quatuor genera motus violenti, ad quæ omnes alii motus violenti reducuntur, pulsus scilicet, et tactus, vectio, et vertigo. Horum autem tres sunt magis simplices, et quartus ex duobus componitur : ex pulsu enim et tractu componitur vertigo : eo quod primus tractus expellitur, et secundus retrahitur ad moventem. Scimus enim, quod dextrum inchoans ambulationem expellit primo membrum ambulationis, et post expulsionem retrahit ad virtutem musculi moventis, ut dictum est in *Physicis*. Ex his autem propter membrorum figuras, quæ sunt concavum pixidis et convexum vertebra, componitur vertigo. Et in taliter motis membris vehitur animal ad desideratum quod quærit per motum. Vehitur igitur corpus, sed tribus aliis motibus movetur organum motus : nec tamen ideo dicitur iste motus violentus : quoniam in VII *Physicorum*², sicut dictum est, animatorum motus assimilantur motibus violentis, cum tamen naturales sint, non quidem materiæ mobilium, sed ipsis animatis secundum quod animata sunt. Et qui simpliciter vult dicere esse eorum, dicit quoniam sunt appetitus et voluntatis motus : quia voluntas et appetitus ipsa sunt moventia in his motibus : quibus etiam omnia alia moventia subserviunt.

In omnibus etiam his motibus advertendum est, quod omnia quæ videntur habere similitudinem cum violentis motibus, sunt subservientia his quæ movent,

ut cælestes motores : aliter enim contingeret error in motibus animalium. Et ideo pulsus non fit nisi secundum præceptum decernentis motum, et comparatur ad tractum, tractus et vertigo membri totius et vectio corporis animati. Quod autem non in toto revolvitur, in eodem loco et centro manens sicut cælum revolvitur. Sed cum gyratione ipsum animatum movetur recte et linealiter, sicut currus totus linealiter movetur, licet tota moveatur circulariter circa axem. Hinc est, quod imperfectum necesse est deficere a perfecto. Imperfectum autem est, cujus perficientia et conferentia sunt extra ipsum : perfectum autem cujus perficientia et conferentia omnia sunt in ipso secundum substantiam. Et ideo cum cælum sic perfectum sit, movetur in eodem loco et situ permanens. Et ideo cum animatum corpus sit indigentius et imperfectionibus subjacens, et tamen cæleste corpus secundum formam imitans et non secundum materiam, ideo oportet quod habeat in toto suo, hoc est, secundum se totum motum qui circularis secundum aliquid, et linealiter de loco ad locum procedens secundum aliquid : sic enim convenientibus quæ in pluribus locis sparsa sunt, apte conjunguntur : et secundum hoc iterum habet motum ex tribus compositum quæ in vectione esse dicta sunt in VII *Physicorum*³. In motu enim vertebrorum habet motum expulsionis, et in motu corporis habet motum tractionis ad rectam lineam, sicut trahitur plaustrum, et in motu formæ organi motus totius ad ambulandum, sicut totius cruris habet motum gyrationis sive ejus quod dicitur vertigo, sicut movetur id quod circumducitur in rota molendini.

Sic igitur facile quis advertere potest ea quæ sunt in motu processivo : propter quæ etiam solus ille processivus a

¹ VII Physic. tract 1, cap 4.

² VII Physic. ubi supra.

³ VII Physic. tract. 1, cap. 4.

Pythagora dictus est, et perfectissimus motuum qui sunt in corporibus mortali-um. Processivus quidem qui non in locum unum nec una specie motus procedit, sed in omnem locum et in omni loco et omni specie motus cœlestis et violenti : qui tamen animato violentus esse nullo modo dictus est. Perfectissimus autem, quia ex omnibus fere componi videtur : et hæc est causa quare Socrates et Plato omnem animam animalium sic moventem a fonte cœlesti derivari dixerunt, et ipsam esse moventem seipsam, opinantes quod id quod est omnis motus causa, movet seipsum, et ideo sibi obedit in omnem motum.

CAPUT V.

Qualiter motus animalium est in aliis membris corporis ?

Est autem hic motus fere omnium membrorum exteriorum corporis motus, sicut apparet in capitis motu et manus et brachii et aliorum exteriorum membrorum : omnia enim hæc habent hujusmodi motores quales dicti sunt, et motus tales quales jam ante prædiximus : sed tamen motus eorum non vehunt totum corpus, sed aliquam partem : eo quod ipsa membra non sunt organa motus processivi, sed sunt motus deservientes

ad facilius consequendum id quod desideratur. Ideo etiam manus dicitur organum organorum et species aliorum organorum : quod licet in libro de *Animalibus* ¹ plene determinandum sit, sicut et cætera quæ spectant ad naturam partium corporis animalium, tamen hic oportet dici, quod in manibus et brachiis plus apparet de motu isto quam in aliis membris, eo quod manus et brachia formata sunt ut impediencia removeant ab omnibus aliis membris, et conferant expediencia.

Et ideo cibus in os manu portatur, opera artis aptius manus exsequitur, pedes parant ad ambulandum : et ideo quæcumque sunt expediencia, aptissime præbent organis. Caput autem mobile et in his quæ collum habent simili modo motus : ad hoc autem ut circumductum citius utatur sensibus et maxime visu : quia visus non perficitur nisi ad lineam rectam. Quæ autem collum non habent, non possunt habere talem capitis conversionem, quia incideret corruptio et mors propter separationem cerebri a nucha descendente. Et ideo talia quando visu uti contingit, totum corpus ad illam partem ad quam visus dirigendus est, convertunt. Similiter autem illa quæ habent aures in summo vertice capitis ultra situm oculorum elevatas, oportet quod curva foramina valde habeant auditus in auribus : quoniam si pori auditus statim directe transirent in summum capitis eorum, ex motu corrumperetur cerebrum. Cujus signum est, quoniam natura ossa dura valde, quæ *petrosa* vocantur, ponit circa auditum. Quia igitur necesse est pars auditus, oportet esse aures magnas quæ multum aerem capiant, et mobiles ut undecumque soni veniant, ipsos colligant antequam refringantur in aere. Licet enim per circulum fiat sonus,

¹ III de Animalibus, tex. et com. 38.

tamen melius percipitur ex directo primi sonantis.

Signum autem ejus quod dictum est, potest accipi in anatomia capitis. Animalia enim quæ habent aures (ut dictum est) eminentes, integri ossis inveniuntur sub auribus ex directo propter quod foramen descendit inferius. Hæc igitur est causa quare talium aures moventur et non hominis, vel simiæ quæ figuram aurium inferius sitam habet super foramen auditus. Sic etiam est de ore et de maxillis, et omnino quibuscumque natura motum dederit, quod conditiones motus quæ supra dictæ sunt, observant, non quidem tantum quantum pedes, eo quod illi sunt organa motus processivi, sed unumquodque secundum modum possibilem et congruentem sibi. In omnibus autem his motus procedit ab immobili et in toto animali et in partibus: in toto quidem, quoniam centrum cordis est a quo procedit primo totus motus, et ad id retrahitur: et cum ex illis componatur vertigo, oportet quod totus motus gyra-

tive perficiatur circa centrum cordis revolutus. In partibus autem similiter est, sicut diximus superius: quoniam unumquodque vertebrum mobile movetur in pixide membri proximi immobilis eo motu quo movetur membrum quod movetur in ipso.

Sic igitur patet qualis sit motus processivus tam in toto animali, quam in partibus animalis acceptus. Ex prædictis etiam innotescit, quod ea quæ moventur violenter, violentiam non patiuntur quæ sit omnibus modis contra naturam. Licet enim motus dicti sint violenti secundum quod sunt corpora rectorum superficialium et recti motus, tamen in quantum ipsa eadem sunt corporum animatorum, elementa habent potentiam, quod illis mixta moveantur non contra naturam primis dictis motibus. Dico autem *non contra naturam* formæ eorum secundum quod constituunt animatum corpus, et accipiunt formas taliter moventium, qualiter movent superiora, sicut planum est intelligere ex his quæ præmissa sunt.



TRACTATUS II

DE DISPOSITIONE EORUM QUÆ MOVENTUR MOTU PROCESSIVO.

CAPUT I.

De dispositionibus eorum quæ moventur motu processivo.

Consequenter autem hic videndum est qualiter fiant motus ipsi, utrum uno organo, vel duobus. Cum autem per quatuor modos in genere istius varientur, eo quod quædam sunt gressibilia, quædam volatilia, et quædam natantia, et quædam reptilia, eorum quæ localiter animali motu moventur, oportet nos de omnibus his modis facere mentionem : et præmittimus primo in communi de

omnibus his quantum spectat ad præsentem intentionem.

Dicamus igitur, quod nihil omnino motum processivum perficit uno tamen organo motus : et hoc contingit ideo, quia animal habet dextrum et sinistrum : et nisi uteretur dextro et sinistro, oportet quod altera pars decideret, cum in nullo juvaretur ad motum. Et ideo quæcumque moventur, duobus moventur instrumentis ad minus. Et si quis objiciat de saltantibus in pede uno, nihil valet objectio : quia talis motus est cum tanto labore, quod ipsum animal non potest sufferre diu : motus autem processivus inventus est a natura propter salutem animalis. Ex hoc autem patet mentiri Mappam mundi et Solinum, qui unipedes homines quosdam esse affirmant et ambulantes : hoc enim est impossibile propter rationem inductam.

Amplius autem et propter hoc quod de ratione motus localis animati corporis hoc est quod movetur a substantia incorporea, sive sit corruptibile, sive incorruptibile quod fit a dextro in sinistrum gyrans in dextrum : dextrum enim

Contra Solinum et Mappam mundi.

nulli inest, nisi etiam cui inest et sinistrum : eo quod opposita nata sunt fieri circa idem ¹ : et ideo nihil omnino intantum tantum uni organo processivi motus potest moveri : et ideo nihil ambulat tantum uno pede, neque volat tantum una ala, neque natat tantum una pinna, neque reptat tantum uno annulo corporis sui.

Ad hoc autem notandum, sicut et in *Physicis* nos dixisse meminimus, quod uliquando ea quæ moventur motu processivo, uno quidem instrumento extenso ad movendum alterum sustentat : et cum illud extenditur ad processum, oportet alterum figi ad sustentandum id quo fertur animal, et numquam duobus simul nituntur ambulare, ita quod simul extendantur, aut simul figantur, sicut sunt omnia ambulancia bipedia. Et ideo non habent nisi unum modum procedendi qui jam dictus est. Ambulancia autem quadrupedia aut multipedia possunt simul duobus niti diversimode. Oportet enim necessario quod duo extendant, et duo figant simul : quoniam si unum tantum figerent, sive hoc esset ante, vel retro, caderet pars residua : et hoc ideo contingit, quia talia non sunt erecti corporis : et oportet quod corpus eorum in quatuor situ differentiis sit portatum, dextrorsum scilicet, et sinistrorsum, et ante, et retro. Et ideo uni non possunt niti, sed duobus. Sed hoc contingit multis modis, ut inferius in proprio capitulo de *motu quadrupedum* ostendemus. Volantia autem necesse est niti duobus simul organis, quorum unum sit a dextris et alterum a sinistris : et necesse est quod hoc simul extendat et simul retrahat : aliter enim necessario caderet in opposita parte in quacumque parte niteretur. Similiter autem est de natantibus, quod necesse est duobus niti simul a dextris et a sinistris dispositis organis : quia volatus

et natatio fiunt per elementa in quibus non quiescit corpus animalis. Et ideo nisi ex utraque parte suspendatur, cadit.

Ambulatio autem fit in terra in qua quies est animalium : et ideo in illa oportet altero pede sustentari, et sufficit ambulationi propter hoc quod totum corpus sustentatur super unum. In alis autem non est, quia ala non est basis corporis gravis, sed potius est impellens et trahens sicut remus navem et non basis ejus. Similis autem ratio est de natantibus. De multipedibus autem oportet necessario fieri multas bases : quando-cumque enim corporis pondus tantum procedit, quod a basi pedum fixorum portari non potest, tunc oportet figere alias bases ad sustentationem corporis. Talia enim ut in pluribus, sunt mollia, et non habent ossa se tenentia exceptis generibus cancerorum et testarum : et ideo oportet ad corpora illa multas parare bases. Similiter autem est de his quæ sunt multarum alarum, sicut vermes volantes. Si enim illa movent extendendo et retrahendo alas, tunc duas extendunt, et duas retrahunt : et hoc contingit, quia corpora talium non sunt plumosa et pennata, ut pennis illis portentur : et ideo oportet semper aliqua extensa esse : cum autem continue hoc fieri non posset, tunc oportet quod quando duæ alæ extenduntur, aliæ duæ retrahantur, et e converso. Talia autem sunt ærucæ volantes, et bombices volantes, et hujusmodi. Si autem ea quæ sunt multarum alarum plus quam duarum, sunt extendentia omnes alas ad volandum, sicut sunt scarabæi, et hujusmodi, tunc duæ sunt ad custodiam, et non ad volatum. Ordinavit autem natura duas ad custodiam propter debilitatem alarum quæ creatæ sunt ad volandum. Talia autem continuo nituntur alis extensis, eo quod lenia sunt et ad modicum sustentaculum

¹ Cf. X Metaphys. tex. et com. 14.

feruntur super aerem : nec necesse est reflecti alas earum. Cujus signum est, quia aves bene plumosæ et bene alatae diu volant extensis alis, et raro retrahunt eas.

CAPUT II.

De motu gressibilium super terram qualiter perficitur ?

Dicamus autem nunc de ambulatione eorum quæ sunt bipedia, et videamus qualiter ipsa perficiantur. Constat autem, quod illorum motus non est nisi tribus modis. Quorum unus est ambulatio, et alter est saltus, et tertius cursus. *Ambulatio* autem non perficitur nisi sicut dictum est, quod scilicet alter pes figatur, et alter expellatur ad accipiendum spatium propter causam quam diximus. *Saltus* autem fit utroque pede simul fixo : et fit saltatio per multam spiritus emissionem in organa motus, et per motum corporis per pedes in aerem, sicut movetur id quod est projectum. *Cursus* autem fit in talibus sicut ambulatio præter hoc solum quod est velocior : et sic moventur ambulando omnia bipedia : bipedia tamen pennata magis apta sunt saltui quam alia propter sui corporis levitatem, et propter plumarum suarum elevationem : plumæ enim totum corpus elevant. Hoc igitur modo bipedum perficitur ambulatio.

Quadrupedum autem perficitur motus tribus modis, scilicet ambulatione, troctatione, et cursu. Quando autem ambulant

secundum aptitudinem, tunc elevant unum de prioribus in dextro, et unum de posterioribus in sinistro, et e converso : et sic procedentia ambulant et incedunt aliquando velocius, et aliquando minus velocius secundum diversitatem talis motus. Quia autem super basim fixam cadit totum corpus ante et retro, ideo taliter incedens animal si velociter incederet, incommodum vehit sessorem, qui continue cadit de latere in latus ante et retro : et illi casus faciunt collisionem : et ideo docentur equi et muli et asini duos pedes in uno latere, ante et retro in eodem latere simul extendere et simul figere, et in alio similiter : tunc enim totum corpus animalis figitur ante et retro æqualiter, et extenditur æqualiter, et ideo tunc non facit collisionem. Et talis motus incedendi a vulgo vocatur *ambulatio*. *Troctatio* autem perficitur in uno ante extenso et altero posteriorius in oppositis lateribus : propter quod incommoda est valde vectio propter casum collidentem de latere in latus. *Cursus* autem talium perficitur extensis primis cruribus ante simul ad accipiendum viæ spatium, et posterioribus impingentibus ad saltum : et quæcumque quidem hoc simul faciunt, velociter currunt.

Est autem generale in omni quadrupede, quod non movetur nisi valde male, uno pede læso, sicut bipes non movetur nisi male, altero amputato vel læso pede. Et hoc ideo est, quia corpus oportet portari ante et retro et in utroque latere : et ideo oportet esse quatuor portantia ad minus. In bipedibus autem anterior pars est vecta super posteriorem : nec oportet quod posterior portetur nisi a duobus lateribus, dextro scilicet et sinistro. Sed multipedia diversimode valde moventur propter diversitatem corporum eorum : quoniam quædam inveniuntur multipedia valde parvi et curti corporis, sicut aranea et formica : et alia quædam inveniuntur valde longi corporis, sicut æruca, et alia quædam de natura vermium. Omnia autem conveniunt in hoc

quod oportet ea simul niti dextro et sinistro, et antèrius et posterius: talia enim ossibus carent: et in quacumque parte corporis non sunt fulcita, in illa decidunt: non autem moventur omnibus pedibus simul, sed quosdam extendunt in spatium quod peragunt, quosdam autem figunt propter corporis fulcimentum: sed de natura istorum in libro de *Animalibus* ¹ dicitur. Conveniunt autem omnia pedibus gradientia in hoc quod non habent aliquid dirigens in motu isto et gubernans, nisi imaginationem: et quæcumque inter ea sunt frigida, sunt pigra. Quæcumque autem sunt calida, sicut formica, sunt velocia et agilia: et quæcumque eorum sunt multipedia, habent vertebra et pixides in quibus est motus aut ante pectus, aut sub ventre. Quæcumque autem sunt bipedia, aut quadrupedia, habent membra hæc versus dorsum continuata.

CAPUT III.

De motu volantium et natantium.

Volantia autem et natantia in multis communicant, eo quod natatio quidam volatus est, sicut et volatus est quædam natatio. Quæcumque autem talia sunt, eo quod non egent in motu tali fulcimento, sed impellente tantum sicut remus impel-

lit, oportet omnibus simul niti instrumentis ad motum pertinentibus: et ideo pisces omnes pennas simul extendunt et simul retrahunt. Et similiter volantia alas, præter erucas quæ multas alas habent, ut supra diximus. Similiter autem quæcumque natantium pedes habent, et pedibus natant, oportet simul omnes extendere, et omnes simul retrahere ante et retro: et hæc est ars natandi. Causa autem est, quia natatio est tractus quidam sicut tractus navis. Diximus autem in *Physicis* ², quod unum solum in talibus non movet, sed collecta virtus ex omnibus in talibus movet: et ideo oportet omnia simul extendere ad motum, et omnia simul retrahere.

Conveniunt autem natantia et volantia in motu suo in hoc quod gubernaculum habent. Cauda enim est eis pro gubernaculo: et illa reflexa se sistunt: et ideo aves quando cadunt ad terram, reflectunt caudam versus verticem ut sistant motum volationis. Natantia autem non sic possunt reflectere: quia cauda eorum disponitur secundum profundum corporum suorum, hoc est, a dorso versus ventrem. Et ideo quando se sistunt, tunc reflectunt eam aliquantulum ad latus. Cauda enim in omnibus talibus habet vicem gubernaculi dirigentis et sistentis motum volationis et natationis: sed cauda in volantibus disponitur in latitudine corporis, hoc est, a latere in latus: et ideo reflexio ejus est ad dorsum et ad ventrem propter hoc ut dirigant et sistant motum suum, ut diximus. Quæcumque autem volantium sunt multipedia et plus quam duarum alarum, non habent caudam: et hoc ideo est, quia frequenter longi corporis sunt vel rotundi, sicut æruca volans, et sicut bombices, quæ longa habent corpora, vel sicut scarabæus qui habet rotundum: et talibus esset cauda magnum impedimentum, eo quod sunt

¹ XIV de Animalibus, trac. II, cap. 2.

² VIII Phys. tract. II, cap. 1.

pigra et debilis volatus. Et alia causa est hujusmodi, quod residuæ alæ quæ non extenduntur, sunt eis interim pro gubernaculo : cum enim duæ alarum suarum extendantur in spatium ad motum, duæ aliæ retrahuntur ad corpus, et sunt vice gubernaculi in tali motu.

Quædam autem sunt quæ neque perfectum habent gressum, neque perfectum volatum : sed primo dant saltum : et ut saltus prolongetur, utuntur motu alarum sicut locusta. Et illis omnibus natura dedit crura longa et fortia posterius, ut ex his totum corpus impingatur. Si enim hæc essent ante in corpore, non immineret eis totum corpus : et ideo cum impingerent terram, illis cruribus non elevaretur corpus æqualiter ad saltum : et ex hoc perpenditur, quod æqualiter in omnibus animalibus multipedibus natura ordinavit pedes posteriores fortiores quam anteriores : quia his incumbit pondus corporis : et per illa impingitur ad motum. Priora autem crura præponuntur ad motum chordarum trahentium. Talia enim sunt carentia sanguine, et sunt frigida et pigra et ponderosa.

Non inveniuntur autem aliqua natantia quæ primo saltent, et post natando saltum perficiant. Et hujusmodi causa est quia natura non operatur frustra : saltus autem in aqua fieri non potest propter spissitudinem elementi, sed in aere potest propter ejus raritatem. Sed inveniuntur in aqua quadrupedia gradientia, sicut lupo marinus : et multipedia, sicut cancri : et genera quæ vocat Aristoteles *Karabo* Græce, quod apud nos sonat *locusta maris*, et est de genere cancri non differens in figura a cancro fluviali, sed in quantitate : quia est karabo valde magnus. Causa hujusmodi est, quia aqua non impedit ambulationem : pigram tamen propter hoc quod ea quæ natant in aqua, quiescunt in terra in fundo aquæ,

et in illa motum habent : et hæc aliquando non natant pennis, sed potius parte posteriori corporis sui quæ cauda vocatur, licet in veritate cauda non sit. Cauda enim est post anum. Sed illis animalibus pars illa est inter anum suum et corpus : et quidquid ante est, pro ventre videtur esse in talibus. Talia enim omnia quæ sic natant retrorsum, natant sicut cancri secundum omne genus suum. Et hoc ideo fecit natura, quoniam ante habent multos pedes omnia talia quibus tenent se in fundo contra motum aquæ et quibus apprehendunt cibum : et ideo ibi locus pinnarum : propter quod magis necessaria organa sunt ante, et illa quæ faciunt ad bene esse, sunt retro : et hæc non poterant esse reflexibilia ad dorsum, ut sic recurvata motum darent ad ante : quoniam talibus per dorsum non descendit vis motiva, sed per ventrem antierius et subtus in corpore. Et ideo ad istam partem oportuit ea moveri ubi recipiunt virtutem motivam. Hoc autem modo motus remi corporis sui motus non potuit esse nisi retrorsum.

¹ ARISTOTELES, Lib. IV de partibus animalium.

CAPUT IV.

De motu repentium animalium.

Repentia autem generaliter tribus modis repunt. Frigidiora enim et pinguiora, ut sunt lumbrici qui nascuntur in ventribus animalium, repunt ore et annulis, et hæc vocantur proprie trahentia. Quædam autem costarum mobilitate repunt, sicut serpentes quidam. Quædam autem repunt semicirculis quibusdam in latere suo dispositis ex utraque parte. Quæcumque autem trahentia sunt inter hæc, habent principium sui motus in medio sui corporis : et est ei loco cordis : et cognoscuntur per hæc loca illa in eis : quia est ibi annulus magnus, et aliquantulum croceus magis quam reliqua pars corporis sui, et est spissior multum quam aliæ partes corporis : et ex illa ejicit primo totam anteriorem sui corporis medietatem in rugas : et tunc in anulum medium qui loco cordis est, attrahit similiter in rugas sequentem sui corporis medietatem. Hæc enim animalia sunt multum frigida et sicca potentialiter, et ideo difficilis motus. Et si natura dedisset eis pedes vel alas, essent inutilia : quoniam oporteret elongari et distare ea a principio vitæ, et tunc obstupescere per frigus, et contraherentur propter siccitatem. Quod autem vehementer sicca sint, signum est, quod pulverizata vulnera exsiccant, et caneros, et alia hujusmodi apposita quæ

vix exsiccantur. Hæc igitur talem habent motum propter ea quæ diximus.

Sed ea quæ vi costarum repunt, nunquam simul eodem latere nituntur moveri, sed extendunt unum latus, et figentia costas illius, trahunt alterum, et trahunt etiam illud, et sic de latere in latus moventur. Hujus autem signum est, quia valde habent curvum incessum, et non curvantur ad unam partem tantum, sed modo in unam, et post in alteram, sicut homo qui ponit se ad ventrem, et sine adjutorio manuum et pedum nititur moveri. Ille enim omnino moveri non potest nisi extrudendo latus unum primo, et trahendo aliud post illud. Costarum autem mobilitas juvat ad motum : quia per illas figitur quocumque latus est extrusum. Costæ autem non sunt directe ossa : quia talia animalia frigida pauca habent ossa nisi in capite solo, sed sunt quædam inter cartilaginem et carnem existentia in duritia. Sic autem non costis, sed mobilitate pinnarum parvarum in posteriori parte corporis existentium videntur natate quædam, quæ curvam habent natationem, sicut anguilla, et murena : sed anguilla plus quam murena habet curvum modum natandi.

Quædam autem quasdam circularum habent portiones in lateribus extra, et sunt quasi quædam squamæ, et his moventur, non quidem motibus existentibus cum sint insensibiles partes illæ, sicut ungulæ animalium et squamæ piscium : sed moventur extrusione laterum, ut diximus : et latus extrusum figunt portionibus circularum, quæ sunt in lateribus suis. Et sunt talia multa serpentium genera quæ sic moventur. Omnia autem talia crura et alas non habent nisi valde raro propter suam extremam frigiditatem, quæ crura et alas sibi a natura datas stupesceret et immobilitaret : et ideo essent in eis otiosa talia organa. Si autem sunt serpentes volantes, sicut dicit Solinus esse in Ægypto, quos ipse *Ibes* vocat, oportet illos esse calidiores, ut alas possint habere mobiles.

CAPUT V.

De causis ordinationis et inordinationis motuum animalium.

In omnibus autem dictis animalibus motus est ordinatus aliquando, aliquando inordinatus, sed est quasi dementis alicujus qui non ordinat actus et motus suos. Hujus autem causa est ex parte motoris et ex parte organi. Quando autem spiritus discurrens inter sensum et organum phantasie, aut etiam ipsum organum corruptum est, tunc efficitur motus inordinatus. Diximus enim in libro de *Anima*¹, quod virtus motiva, sive sit intellectus, sive phantasia, nihil accipit in corpore secundum quod est hujusmodi, sed potius utitur corpore ad exsequendum formam illam quam apud se jam habet: et diximus iterum in eodem libro, quod licet bruta non habeant rationem, tamen habent quamdam cognitionem conferentem sensibilia et intentionem sensibilem, quæ est loco rationis, quæ a quibusdam Philosophis *cogitativa* vocatur improprie, sed melius dicitur *æstimativa*.

In homine igitur sine dubio sunt duæ motuum ordinationes et duæ eorumdem motuum corruptiones. Quotiescumque enim motus in homine incipit a forma

quæ secundum rationem est in intellectu et eandem formam induit sensibilibus phantasia, et eandem sic particulatam appetit voluntas, et sic impetum facit in opus vel motum: tunc sunt motus ordinati secundum rationem virtutis et honesti, et tunc, testante Platone, propter ordinationem primi motoris in homine directe subduntur ei alii motores inferiores. Et hoc est principium boni et moris et honesti.

Si autem forma movens non incipiat ab intellectu, sed sit aliqua de his quæ discurrunt in spiritu sensibili inter organa sensus proprii et æstimativæ, et super eandem feratur appetitus et impetus ad opus: hoc opus non est ordinatum secundum rationem honesti, sed secundum rationem boni ut nunc. Et hoc est principium vitii et perversitatis: quia sic movetur homo secundum delectabilia sensus. Hæc igitur est una inordinatio, et opposita sibi ordinatio, quæ non est nisi in homine: est autem alia ex corruptente aliquo et impediente spiritum in organo æstimativæ. Illa enim ordinata, et in statu existente, est ad minus ordo in motibus ad bonum ut nunc, qualis est omnium animalium. Corrupta autem ipsa, secundum quod diximus, fertur animal inordinate, sicut navis sine gubernaculo: et in hac etiam communicat homo. Talia animalia enim dicimus furiosa, et amentes vocamus tales homines. Hujus autem causa est, quoniam in motore qui est vestigium cælestis motoris, oportet observare quæ in cælestibus observantur. In cælestibus autem sic est, quod primus motor forma sua practica movet: et hac eadem movet inferior qui est sub ipso, et tertius, et quartus, et sic deinceps: sed appropriat eam magis et magis et determinat. Et quia corruptio in cælis accidere non potest, ideo non accidit in eis inordinatio: fit enim quilibet inferior cum

¹ III de Anima, tract. iv, cap. 3.

motu suo proprio quo formam explicat appropriatam : habet etiam motu sui superioris quo movet ad eandem et ad quam movet superior : et ideo *canonicus* dicitur esse motus superior : et quando proportio ejusdem servatur in motibus animalium, tunc est ordinatio motuum. Quando autem deflectuntur ab ipsa, tunc est motuum inordinatio.

Oportet autem in homine observare quod observat natura. Natura enim particularis, quæ est in commixtione qualitatum elementalium movens primum, induit formam cœlestem communem, approprians quidem ad fieri hoc vel illud : et huic formæ subministrare facit omnia instrumentaliter secundum rationem recte perveniendi ad finem totius generationis : et ubicumque aliquod elementalium exorbitaverit, egreditur monstrum, aut ex defectu, aut ex superfluitate, aut ex inordinatione figuræ causatum. Similiter

Monstrum
unde causatur ?

autem fit in motibus continentiæ et incontinentiæ : continentis enim generaliter vocamus, qui morantur in forma mente concepta : et siquidem huic inferiores motores subministrent organice, tunc omnia fiunt ordinate et bene. Ubicumque autem aliquis inferior egreditur formam ordinis hujus, incidit incontinentiæ vitium ex superfluitate, vel diminutione, vel alia inordinatione operum. Unde sapiens fuit dictum Platonis quando dixit quod « monstra morum fiunt sicut monstra naturæ : » monstruositas enim naturæ, eo quod indicium est corruptionis organorum in quibus sunt spiritus moventium, sæpe causat monstruositatem morum : et ideo dixit Moyses Ægyptius, quod « monstrum in corpore, est etiam monstrum in anima et in moribus. »

Sic igitur de motibus animalium determinatum sit a nobis.



INDEX

Librorum, Tractatum et Caputum in Libris de Motibus animalium.

LIBER I.

TRACTATUS I.

De eo unde anima habet movere hunc motum ?

CAP. I. De ordine et modo dicendorum, et de sententia Platonis, et natura movendi.

257

- II. Ex qua natura anima potest movere in comparatione ad corpus accepta ? 259
- III. De solutione dubitationis circa prædicta. 261
- IV. Rationes Peripateticorum ad hoc quod anima movet in quantum est separata. 264
- V. Qua de causa separata substantia formalis movet plus quam omnes aliæ formæ ? 265
- VI. Quod in anima sensibili et intellectuali sit movens, et qualiter se habet hic motus ad motum eorum quæ non per se moventur ? 267

TRACTATUS II.

De primo organo motus.

- CAP. I. De rationibus eorum qui dicunt postremum capitis esse principium. 269

- II. De rationibus Peripateticorum per quas probatur cor esse principium motuum animalium. 271
- III. Quid veritatis sit in utraque inductarum opinionum? 272
- IV. De primis duabus passionibus generalibus cordis, quæ disponuntur ad motum. 274
- V. De diversis dispositionibus cordis ad systolem motum et diastolem in tristando vel gaudendo vel hujusmodi. 276
- VI. De differentia motuum cordis, angustiae scilicet et vigoris, sive audaciae et lætitiæ. 278
- VII. De dispositionibus cordis in movendo ex diversitate sanguinis causatis. 280

LIBER II.

TRACTATUS I.

De ipsis motibus et proprietatibus ipsorum.

- CAP. I. De motu constrictionis et dilatationis animalium, et de proprietatibus ejus. 283


- II. De motu qui vocatur processivus animalium, et de proprietatibus ejus. 286
- III. Qualiter omnis motus processivus est motus sicut circini, et qualiter est cum labore et pœna? 288
- IV. Qualiter omnes species motus violenti secundum naturam sunt in motu animalium, et qualiter dicatur processivus et perfectus? 289
- V. Qualiter motus animalium est in aliis membris corporis? 291

TRACTATUS II.

- II. De motu gressibilium super
terram qualiter perfici-
tur? 295
- III. De motu volantium et na-
tantium. 296
- IV. De motu repentium anima-
lium. 298
- V. De causis ordinationis et
inordinationis motuum
animalium. 299

*De dispositione eorum quæ moventur motu
processivo.*

- CAP. I. De dispositionibus eorum
quæ moventur motu pro-
cessivo. 293



D. ALBERTI MAGNI

RATISBONENSIS EPISCOPI, ORDINIS PRÆDICATORUM,
PARVA NATURALIA.

DE ÆTATE, SIVE DE JUVENTUTE ET SENECTUTE LIBER.

TRACTATUS I

DE ÆTATE IN COMMUNI, ET DIFFERENTIIS EJUS.

CAPUT I.

De ætate in communi et de ordine et causa dicendorum.

Jam explevimus omnia quæ de passionibus et operibus animæ videbantur esse

dicenda, sive essent animæ propria, sive etiam essent communia animæ et corpori, secundum omnem rationem communitatis. Quia tamen virtutes hujus non sunt infinitæ, ut in primo *Cæli et Mundi*¹ probatum est, ideo adhuc nos oportet quærere de initio et statu et declinatione harum virtutum, et de fine quæm habent secundum naturam. Et ideo adjungemus omnibus habitis adhuc duos libros, quorum primum de *Juventute et Senectute* vocant Peripatetici, in quo de incremento et statu et declinatione virtutum et operationum animæ in corpore determinaverunt Antiqui. Secundum autem de *Causis longioris et brevioris vitæ* vocaverunt, in

¹ I de Cælo et Mundo, tract. II, cap. 3.

quo consideraverunt causas fructificationis operum et virtutum animæ in corpore, in omnibus viventibus. De masculino autem et foemino non potest in scientia de *Animalibus* determinari, eo quod hoc ad corporis tantum pertinet naturam et complexionem.

Determinantes autem de his, dabimus causas generales omnibus viventibus secundum quod pertinet naturali scientiæ, et accipiemus illas in notioribus apud nos. Et arguemus quod proportionaliter sint in omnibus aliis. Non enim potest esse, quin ea quæ communicant in incremento virtutum et operum vitæ et statu et declinatione ad minus secundum proportionis communitatem, communicent etiam in animis eorundem : et cum scitur causa in quibusdam, sciretur in omnibus aliis secundum proportionem ad illa comparatis. Commune autem in quo sunt omnes conditiones virtutum animalium et generaliter vivorum, vocatur *ætas*, sive periodus vitæ. In hoc enim communis virtus vitæ crescit et stat et declinat et deficit omnino : et tunc est finis periodi et ætatis.

Quid sit
ætas ?

Dicamus igitur incipientes a communi, quod ætas est spatium temporis in vivente relictum, in quo virtus vitæ omnem perficit suæ mensuræ modum, nisi per accidens impediatur. In hac enim notificatione *spatium* ponit ætatem in genere : et quod additur, *temporis*, distinguit ab his quæ sunt in aliis spatiis loci, vel secundum Platonem, *perennitatis*. Plato enim dicit perennitatem esse spatium stans ex quo et generatur tempus et in idem corrumpitur, sicut narrat Apuleius in primo libro de *dogmate Platonis*. Quod autem additur, *in vivente relictum*, propter duo additur : quorum unum est, quod temporis spatium in se consideratum non est ætas, sed temporis quantitas, sed ætas vocatur secundum statum qui relinquitur ex tanto spatio in re temporali viva. Secundum autem est, quod non viva non proprie habent ætatem : quia virtus eorum non ita variatur secundum periodum

sicut aliorum, sicut sunt elementa et mineralia : et elementa minus participant ætatem quam mineralia : eo quod longius recedunt a vita et periodo : et ideo diximus in libris *Mineralium*, quod habent periodum mineralia. Quod autem additur, *in quo virtus vitæ omnem suæ mensuræ perficit operationem*, dicitur propterea quod omnibus vivis communiter diffinitio congruat. Vita enim in animalibus et plantis communiter, licet inæqualiter inventa est, et tam plantæ quam animalia variantur in operationibus vitæ secundum ætatem. Quod autem ultimo additur, *nisi impediatur per accidens*, ideo dictum est, quia et modus vitæ et terminus aliquando breviatur, et aliquando prolongatur ex accidentalibus causis, et alias etiam ex accidentibus recipit varietates, sed secundam naturam habet periodum determinatam. Convertibilis igitur ætatis est inducta diffinitio.

Mineralia
periodum
habent.

CAPUT II.

De divisione ætatum, et penes quid sumitur earum differentia ?

Ætas autem in omnibus ætate participantibus in quatuor ætates dividitur, scilicet in ætatem congregantem tam substantiam quam virtutem, et in ætatem standi tam in substantia quam in virtute, et in ætatem diminuendi virtutem sine diminutione substantiæ, et in ætatem minuentem tam substantiam quam virtutem. Hæ autem in homine magis notæ sunt :

et ideo in homine nomina specialia receperunt : quoniam prima vocata est puerilis, secunda autem juvenus sive virilis : rectius autem vocatur virilis quam juvenus, quia juvenus ad pueritiam videtur pertinere. Tertia vero vocata est senectus. Et quarta et ultima senium sive ætas decrepita.

Nota causas quare luna habeat dominium in hæc corpora inferiora.

Dicit autem Ptolemæus has ætatum differentias sumi ad lunæ circulum : eo quod luna maxime principatum habeat in corporibus terrenorum : propter duas causas vel tres. Duæ siquidem principales causæ sunt. Una quidem vicinitas : ea enim quæ non distant multum, efficacius movent. Et alia causa est quæ et principalis est : quia cum sit infima, congregatæ sunt in ea omnes virtutes moventium superiorum : et ideo mare et omne humidum movet ex seipsa. Ex virtute autem luminis quod mutuatur a sole, efficitur quasi sol secundus, breviter operationes solis explicans, et ideo movet calores inferiorum. Dico autem *breviter explicans operationes solis* : quia quod sol facit in anno secundum variationem luminis et caloris, luna facit in mense, ut dicit Aristoteles in libro suo de *Animalibus*. Tertiam autem Aristoteles videtur adjungere dicens, quod luna terrestris naturæ sit : et ideo obscuritatem, ut inquit, aliquam retinet, etiam postquam illuminatur a sole : propter igitur connaturalitatem terrena magis variat, ut dicit, quam aliquod corporum aliorum quæ sunt in cælo.

A differentia circulationis lunæ sumitur differentia ætatum in homine.

Differentia autem circulationis ejus est differentia ætatum. Primo enim cum accenditur, est calida et humida per effectum sicut prima ætas, et currit hæc usquequo efficitur dimidia, et talis est prima ætas. Et deinde calido paulatim extrahente humidum efficitur calida et sicca sicut est ætas secunda. Tertio autem cum humido egrediente deficit calidum, eo

quod humor erat proprium subjectum caloris : et talis est ætas tertia, scilicet frigida et sicca. Et talis luna cadens a plenitudine usque ad hoc quod efficitur dimidia secundo : et tunc frigiditate invalescente inducitur humidum extraneum non nutriens, vel augens, sed humectans extrinsecum quod est humidum phlegmaticum : et talis est ætas ultima. Non autem æstimare debemus ita esse in luna : luna enim qualitates elementales non habet, neque patitur : sed debemus imaginari ista esse ex lunæ motu et lumine in viventibus terrestribus, et lunæ non nisi per effectum attribui.

Verumtamen licet hoc principaliter faciat lunæ motus iteratus propter causam quæ secunda fuit inter superius assignatas causas : tamen quia virtutes et lumina superiorum non ita uniuntur in inferioribus stellis, quin etiam immediate ad vivorum corpora attingant : coadjuvant ad hoc et impediunt aliquando aliæ stellæ et spatia cæli non stellata, quæ gradus vocantur : et ideo diximus in fine secundi *Peri geneseos*¹ periodum accipi secundum totius cæli reductionem in circulum duodecimum domorum, in quibus virtutes et debilitates inveniuntur stellarum, ex hoc quod adjuvant se invicem vel impediunt ad movendum ea quæ generantur in inferioribus : et sicut ibidem diximus, quod multum facit in istis differentiis diversa materiæ dispositio, sicut expresse videtur in masculo et fœmina. In fœmina autem propter humidum multum dilatabile etiam terminabile, citius pubescit fœmina quam masculus. Et quia humidum citius terminatur quam siccum, quod calori terminanti magis repugnat, sed diutius tenet calorem siccum quam humidum : et ideo vir diutius generat quam fœmina concipere possit. Propter quod dicitur statutum fuisse regis Persidis, quod nullus nisi juniorem

Nota quare vir diutius generat quam fœmina.

¹ II de Generatione et corruptione, tract. III, cap. 5.

se, duceret uxorem : ne si vetustiore duceret, citius impediretur filiorum procreatio, qua impedita terra non bene popularetur, nec patria defensionem haberet, nec Reipublicæ esset status bonus.

CAPUT III.

De ætate augendi et differentiis ejus.

His autem sic habitis, loquamur de prima harum ætatum, quæ ut generale vocabulum habeat, vocatur *ætas augens* substantiam et virtutem. Cujus nominis ratio est : quia, sicut et nos alibi determinavimus, virtutes in quibusdam vivis sunt tantum vegetabiles, et in quibusdam cum his sunt animales : et illæ quidem quæ sunt vitales, sunt sicut alens, et augens, et generans. Et alentes quidem in principio talis ætatis sunt diminutæ : propter tres causas, quarum una est incompletio organorum. Secunda autem est multæ humiditatis ex hoc quod non est diu quod viva fuerunt humor et evaporatio quædam fumalis in semine. Tertia autem causa est defectus quantitatis : quia omnis virtus crescit, proprio subjecto crescente, et decrescit illo decrescente. Et hujus signum est, quod infantes abundant humore phlegmatico indigesto, et vomunt et non sanguinant frequenter ad nares, et alia hujusmodi quæ in omnibus vivis proportionaliter inveniuntur : animales autem tunc confortari nullatenus possunt propter multum fluxum humidi et debilitatem organorum anima-

lium virtutum, quæ non permittunt fieri fortem animæ sensibilis conversionem ad formas conceptas : nec ipsæ formæ puræ sunt, neque permanentes, propter multitudinem humoris et fluxum ejus.

Hæc autem ætas dividitur in quinque alias partes, quarum prima est ætas fluens humido et vapore multo. Secunda autem est quasi plantativa quorundam organorum ex humido quod exsiccatur et paulatim terminatum est. Tertia autem est, quæ concutit et quasi subjicit et domat humorem universaliter ab inordinato motu ejus, ut stet ad facturam substantiæ et quantitatis. Quarta autem est quando jam calor prævalere incipit, ita quod rescindat, et rejiciat superfluum. Quinta autem est quando jam calor plene convaluit et convertit humidum ad principium siccitatis : et hoc est quando est in statu fortitudinis in ultimo suæ quantitatis perfectæ.

Istæ autem differentiæ in homine magis notæ sunt quam prima quæ vocatur in homine *infantia* : eo quod propter fluxum multum humidi, tunc creatura nec significationes verborum attendat, neque formare possit, mollitie organorum et humiditate impedita, debilitata *cratere lacteo*, ut dicit Plato, eo quod nuper fuit humor lacteus spermatis et sanguinis menstrui, et spiritus quidam vaporatus in partibus spermatis invisatus.

Secunda autem *dentium* vocatur *plantativa*, quæ est quando gingivæ implentur dentibus : eo quod calor fortior est, eo quod ex natura ascendit in superioribus, et jam incipit conducere partes siccas sparsas in humido seminali et nutrimentali : et ex eis incipiunt indurare partes ossium et dura formare : et ideo sapientes medicorum præcipiunt, ne pueris permittatur quod mastigent in illa ætate aliquid durum : quia in illa sciunt, quod calor incipit jam apprehendere partes siccas, et in ipsis acui, et ita exsiccare prurimum in gingivis. Propter quod pueri omnia quæ apprehendunt, ori suo

Nota quare
prima ætas
in homine
vocatur in-
fantia ?

applicat ut fricent pruriturum gingivarum : et quando duris diu et sæpe confricant gingivas, evaporat materia dentium : et aut fiunt edentuli, aut debiles dentes habentes, aut in prima, aut in secunda dentium plantatione : et quamvis hoc nocumentum forte in juventute non perpendant, tamen percipient in senectute, quando virtus deficit et substantia. Similiter autem est in omnibus vivis : eo quod omnia viva ex humido terrestri permixta habent generationem per calidum, quod est humidi radicalis formativum et terminativum et exsiccativum.

Tertia autem in hominibus vocatur *concussiva ætas*: eo quod in hac concutitur humidum et incipit subjici et acui calidum, ex quo generatur pruritus, præcipue in locis ad quæ declinat cibus, sicut in inguine : et cum adhuc nihil ex humido rescinditur et reseatur.

Quarta vocatur *ætas pubertatis* in homine, quando jam calore vincente, et expelli et descendere incipit superfluum humidum per pollutionem nocturnam, maxime quando propter somnum inciditur caliditas interius. Est autem hoc in aliis sicut in plantis, ut dicemus postea.

Quinta autem et ultima est, quando semen est jam maturatum, et quantitas venit in staturum, et incipit jam notabiliter exsiccari humidum : quæ vocatur *ætas juventutis*, et a quibusdam vocatur *ætas crinita*, eo quod tunc pili tam in barba quam in aliis partibus ut in inguine scilicet et subascellis nascantur : propter humidi enim exsiccationem vapor ex illis locis egrediens facilliter cum aere tangit, exsiccatur : et ideo ad formam pilorum convertitur : pilus enim nihil aliud videtur esse nisi vapor de poro corporis exspirans, et ad aerem exsiccatus et induratus. Sed de natura pilorum, et quare citius in quibusdam locis nascantur quam in aliis, et quare in capite statim nascantur, et quare quædam pilosa tota nascantur, et quædam in toto sine pilis, ut aves quædam, alterius est speculationis.

Quid sit pilus ?

In plantis autem et plantarum partibus has quinque differentias expresse invenimus : quoniam primo sunt molles valde et tenerimæ, ita quod si parum manu comprimantur, effluunt humorem : et tunc videntur esse quasi herba minuta, etiam illæ quæ postea crescunt in arbores maximas : deinde autem vincente calido super humidum plantantur ramusculi et folia plura et radices. Tertio autem subjicitur eis humidum, ita quod compressæ non ita libertim ut prius fundunt humorem. Quarto autem durescere incipiunt resudantes humidum superfluum, cujus pars resudat, et pars consumitur a naturali calore circumdantis. Quinto autem durescunt in toto et maturantur et ad staturum perveniunt suæ quantitatis.

Proportionaliter autem hæc sunt in omnibus vivis. Sed est diversitas temporis in qua hæc fiunt in eis secundum diversitatem caloris et humoris eorum : parvus enim humor citius terminatur quam multus aliis paribus existentibus : et subtilis humor citius terminatur, quam grossus terrestris aliis paribus : et per naturam calidus humor, sicut aereus, citius terminatur quam aquosus frigidus per naturam existens : et sic est de aliis differentis quas facile est in omnibus proportionaliter invenire, quæ ex humore et calore recipiunt generationem et vitam.

Hæc autem ætas secundum omnem sui differentiam convenit virtuti augmentativæ, secundum scilicet quod procedit in tempore, ita debilitatur augmentum et minoratur. Causa autem hujus est, quoniam molle et humidum facilius extenditur quam siccus et durus. Nos autem videmus, quod cum calor intrat in humidum, citius movetur calore humidum subtile et simplex quam grossum aliquo terrestri inspissatum : et cum movetur, dilatatur et crescit. Et per omnia simile est in augmento. Cum enim calor est in humido subtile, cito dilatatur humidum : et cum inspissatur humidum, tardius movetur. Et hæc est causa, quod pueri

frequentur plus quam dimidium suæ quantitatis expleant in primo septennio : tunc enim, sicut diximus, incipit misceri partibus acutis et pruritus fortiter facere calidum : propter quod in illa ætate frequentissime puerorum moventur genitalia tam masculorum quam fœminarum : et ideo legislatores dederunt hoc tempus primæ desponsationi, eo quod tunc incipiunt placere sponsalia. Secundum autem quod magis procedit hæc ætas, sic magis debilitatur actus augmentativæ virtutis, nisi hoc sit per accidens et in paucis. In his enim in quibus multa humiditas impedit caloris excedentis actionem, aliquando est status quidam staturæ brevioris usque post pubescentiam, usquequo calor liberatus a superfluo humido, confortatus tunc incipit velociter extendere membra ad incrementum.

In plantis autem quibusdam videmus, quod in primo anno non accipiunt plantationem organorum vel debitam quantitatem, sed in secundo : et hoc contingit eis propter ipsarum humiditatis interminabilitatem : aliquæ enim per multum tempus crescunt, sicut dicitur de palma, quod crescit tempore centum annorum : et hoc contingit propter sui humidi viscositatem, quod et diu permanet non evaporans, et ideo potest diu extendi, et est multum vale calidum ejus et retentum in viscositate humidi : et ideo non potest sensibiliter minui per evaporationem. Quod autem Plinius dicit, plantas omni tempore crescere, omnino falsum est, et præter rationem dictum : sed nos infra de hoc faciemus inquisitionem post differentias ætatum.

Recolligendo igitur summatim, dicimus hanc ætatem esse augmenti propter duas causas, quarum una est ex parte materiæ humiditas et mollities facile obediens extensioni : et altera est ex parte agentis caliditas potens et conservare substantiam et extendere eam ad augmentum. Observandum autem valde est, quod in vivo omnis hujus ætatis tempora sunt distincta, sed sunt inæqualia, pro-

pter humidorum et calidorum eorum diversitatem. In homine autem magis notæ sunt istæ distinctiones : et prima est usque ad annum communiter, secunda autem usque ad septimum, tertia autem usque ad duodecimum vel undecimum annum, quarta usque ad decimum sextum, et ultima est usque ad vigesimum quartum, et in quibusdam usque ad trigesimum, vel etiam finis ejus est usque ad trigesimum quintum, secundum complexionum diversitatem.

CAPUT IV.

De ætate quæ dicitur stativa, et proprietatibus et differentiis ejus.

Ætas autem standi tam in virtute quam in substantia sine aliqua declinatione est, quæ dicitur in hominibus *ætas virilis*, quando etiam materia partium corporis virorum confortata est, et virtus in ea resedit et quievit liberata ab humido defluente : et hæc est ætas calida et sicca, temperate quidem sicca propter vicinitatem ætatis humidæ, sed plus calida propter confortationem caloris ex elongatione ab humore spermatis et menstruis sanguinis : vel ut generaliter loquamur ab humore seminaliter concepto et vaporoso, sicut diximus supra. Hæc enim ætas stat adhuc, quia non deficit humidum ex vicino statu augendi relictum : et ideo non cadit adhuc in substantia : siccitas enim causa est dissolutionis substantiæ :

et hæc est causa ex parte materiæ : nec cadit iterum calor istius ætatis, eo quod adhuc habet materiam multam in radicalibus membris quæ non evaporavit, sed est subjectum et nutrimentum ipsius : deficit tamen in hac ætate virtus augmentativa.

Cujus veritas constat ex ratione duplici. Una quidem probans est statum substantiæ et virtutis, et alia defectum probat augmentativæ virtutis. Prima autem harum rationum est hæc : quoniam omnis virtus faciens in uno eodemque subjecto in statu uno duas operationes, et in alio statu deficiens ab utraque illarum, habet necessario medium statum in quo deficit ab altera illarum operationum, et retinet alteram, nisi ita sit, quod una illarum operationum sit causa alterius et non immediate æqualiter sint a virtute prima. Sunt autem duæ operationes caloris naturalis in augendi statu : quarum una est conservatio substantiæ in natura : secunda autem augmentatio ejusdem : quarum utraque deficit in statu senii et senectutis : oportet igitur, quod in medio statu retineat alteram illarum operationum. Non enim potest dici, quod una istarum operationum sit causa alterius : quia videmus istas operationes et in eodem subjecto et in diversis diversas esse ab invicem : medius autem status viro- rum non est nisi ætas standi. In hac igitur ætate retinet alteram illarum operationum : aut igitur retinet augmentativam sine conservativa substantiæ, aut e conservo conservativam sine augmentativa. Sed primum horum est impossibile : quia nihil augetur, cujus substantia non conservetur : erit igitur secundum necessarium quod retineat substantiæ et virtutis conservationem sine augente operatione : et ideo etiam vocatur *ætas standi in substantia et virtute*. Causa autem defectus augmenti est ex duobus, quorum unum est durities inducta in membris et siccitas, quæ non obedit extensioni : et secundum est aliquis defectus calidi causatus ex sumpto alimento extraneo, et non suf-

ficienter decocto per digestionem. De hoc autem alibi satis dictum est.

Dubitabit autem aliquis in comparatione duarum dictarum ætatum in qualitate in qua communicant, quæ est caliditas, quæ istarum sit calidior? Et super hac quæstione multum Antiqui dissidere inveniuntur. Antiqui enim dixerunt ætatem augendi esse magis frigidam, et ætatem juventutis et status esse magis calidam et siccam. Hoc autem Antiqui probare videntur ex ratione, et ex signis. Ratio autem ipsorum est, quia calidum in simplicibus non est adeo intensum cum humido sicut cum sicco, sive sit spissum siccum, sive rarum : cum sicco enim raro est in igne, cum sicco autem spisso est in lapide ignito. Cum humido autem non est ita intensum sicut est in his quæ dicta sunt, et præcipue cum humido aqueo : quia et in utraque contrariatur qualitate. Cum igitur, ut inquirunt, humidum seminale sit aqueum, et hoc abundet in ætate augendi, sicut patet per ante dicta, videtur illa ætas frigidior esse quam ætas juvenilis, quæ ætas augendi pars ultima, et quam ætas status. Signa autem hujus plurima ponunt antiquissimi veterum Philosophorum et medicorum. In hac enim ætate abundat superfluitas aquosa, et febres sunt phlegmaticæ talis ætatis, et similiter quod vomunt : et est ætas gulosa ultra modum : gulositas autem canina non provenit nisi ex frigiditate superflua, et non emanat sanguis de naribus eorum, et sunt egestionem talis ætatis humidæ, quod non esset si in ipsis dominaretur calidum. Et talia hujus multa signa adducunt, quæ licet appareant in hominibus, magis tamen proportionaliter sunt in omnibus vivis.

Econtra autem multi Peripateticorum qui hos in naturali disciplina secuti sunt tempore, dixerunt calidiorum esse ætatem primam quam secundam, et ideo calidiores esse primæ ætatis anteriores partes quam ultimas. Cujus rationem dicebant, quia non potest inveniri aliqua causa quare non sit calidior aliis ætatibus

æcas quæ principiis vitæ quæ sunt calidum et humidum est vicinior, quam aliæ quæ minus sunt vicinæ : cum constet ex prima ætate aut nihil aut parum exspirasse de calido quod fuit in vitæ principio. Ex aliis autem ætatibus non potest esse quando multum exspiraverit : et ideo alias ætates frigidiores dicunt quam primam.

Signa autem hujus esse dicunt : quia appetitus puerorum est melior, et incrementum eorum fortius, et mobilitas multa, et digestio bona et frequens : dicentes quod si ex frigido proveniret appetitus eorum, non essent bonæ istimbræ. Nunc autem meliores istimbræ sunt, quam esse possunt. Istimbra autem est appetitus cibi naturalis cum bona digestionem. Et addunt quia hoc quod aliquando facit pueris nauseam et abominationem, non est defectus caloris, sed potius superfluitas nutrimenti et humoris. Addunt etiam adhuc quod est magis naturale signum, quod membra eorum superiora sunt majora porportionaliter loquendo inferioribus. Scimus autem quod membra superiora primæ ætatis sunt multo majora inferioribus, et in aliis ætatibus hoc non ita invenitur. Addunt etiam quod prima ætas, sicut in libro de *Sommo et Vigilia* dictum est, est somnifera : cujus causa esse non potest nisi multum calidum evaporationem faciens sit ex multo humido. Istæ igitur sunt rationes duarum sectarum Antiquorum.

Istimbra
quid sit?

Galenus.

Post ambas autem istas sectas venit Galenus, et dixit quod istæ ætates sunt qualiter calidæ : sed prima ætas excedit in quantitate caloris, et secunda in qualitate. Et similiter finis primæ ætatis excedit in qualitate partes primas ejusdem. Et hujus exemplum esse dicit, quod si nos imaginamur aliquid calidum vel corpus aliquod calidum et subtile primo ingredi in corpus humidum sicut in aquam : et postea tantum quantum est illud, ingredi in corpus siccum spissum minus in quantitate quam sit humidum, sicut in lapidem vel ferrum : tunc enim non est

differentia in essentia corporis calidi. Hoc enim est unum et idem in utroque : et tamen differentia est in qualitate calidi, quia acutius est in sicco quam in humido : et differentia est in quantitate, quia magis dilatatur calor in humido quam in sicco, cum tamen in utroque sit æqualis secundum essentiam caliditatis, et sic est in comparatione caloris primæ ætatis ad ultimas partes ejusdem, vel ad secundam ætatem, quæ sunt calidæ et siccæ, cum primæ ætatis primæ differentiæ sint calidæ et humidæ. Et ideo dicit pueros optimæ esse istimbræ : quia illa perficitur calido et humido, et multæ gulositatis ex appetitu et incremento multo. Si autem appetitus esset ex frigiditate, essent malæ istimbræ. Quod autem febres non habent ita acutas sicut juvenes ut secunda ætas, contingit ex humore remittente acumen caloris, et non dimittente qualitatem ejusdem. Et ex eodem dicit provenire tenuitatem superfluitatum egestarum.

Ista est sententia Galeni : et si quis eam subtiliter considerat, vera est valde, licet secundum superficiem videatur aliquid falsitatis continere. Videtur enim secundum superficiem omnino impossibile esse, quod in corporibus tenellis in prima ætate nihil de calore exspiraverit : et cum nihil sit de calore in secunda ætate nisi quod transmissum est ab ætate prima, videtur calor etiam in essentia esse diminutus in secunda ætate, et major esse in prima. Sed Galenus reliquit, quod secundum digestionis bonitatem primæ ætatis digestio quæ vocatur *epse-sis*, perfecte assimilatur nutrimentum ei quod nutritur : et ideo si quid de calore naturali evaserit, restauratur per nutrimentum : quia omnis forma activa multiplicatur multiplicata materia sua : acumen autem secundæ ætatis majus est quam primæ : quoniam magis sentitur calor in sicco quam in humido : et ut dicit Democritus, acutioribus angulis pungit tangentis tactum. Hæc igitur dicta sunt de ætate secunda.

CAPUT V.

Quæ dicitur diminutiva virtutis et non substantiæ, et de proprietatibus ejusdem.

Ætas autem tertia est ea quæ *senectus* dicitur : licet enim secundum Latinam linguam *senectus* non conveniat nisi viro, ut dicunt Grammatici, tamen de hoc hic non curamus, appellantes *senectutem* omnem ætatem virorum, quæ est cum defectu virtutis et non substantiæ, vocabuli defectu. Contingit autem hoc ideo, quia cum evaporat continue humidum, necesse est etiam ut exspiret calidum : et cum hic duæ sunt causæ virtutis et vigoris, oportet in aliquo deficere virtutem. Cum autem dicitur quod est sine defectu substantiæ, debet intelligi quod est sine defectu substantiæ membrorum : quia nec in qualitate, nec in quantitate sentitur defectus membrorum similium, sive etiam heterogeniorum : sed non potest esse sine diminutione substantiæ humiditatis naturalis : quia si illa maneret, maneret etiam calidum : quia hoc est proprium subjectum caloris naturalis, et quoad illam in aliquo deficit substantia. Sed cum nervi non adhuc contrahantur, neque corrugetur pellis, neque incurventur spondiles dorsi, neque aliquod aliorum membrorum diminuatur vel curvetur, dicitur non deficere substantia.

Contingit autem hoc propterea quod calor antecedentium ætatum optime re-

stituit deperdita quæ adhuc manent, ita quod non potest deprehendi in membris similibus si quid est diminutum : virtus autem remissior est, ut diximus : et hoc percipitur propter exsiccationem frigidam in humido radicali : hujus enim diminutio non statim sentitur in membris, licet subtrahatur in seipsa. Cujus exemplum est, quod oleum in lampade et imbibitum in licinio, et videtur evaporare de licinio : non tamen sentitur defectus ejus in lampade, sed tunc primum sentitur, cum multum fuerit evaporatum per ignem. Tamen etiam in hac ætate duo sunt sicut in omni medio quod est inter duo extrema : prima enim pars participat secundum aliquid proprietates ætatis quartæ, et secundum aliquid est in medio per æquidistantiam : unde secundum aliquid habet proprietates ætatis virilis quæ est calida et sicca, et secundum aliquid participat proprietates ætatis senii et decrepitæ ætatis, et secundum aliquid stat in medio, et in illo medio directe est frigida et sicca propter humiditatis, ut diximus, evaporationem : et ideo talibus attribuitur constantia et fortis apprehensio et sapientia : constantia quidem ex hoc quod est frigidum, bene retinet et siccum : apprehensio autem propter defectum calidi commiscentis operationes rationis : sapientia autem propter multam experientiam et multorum memoriam, quæ ex frigido et sicco confortatur. In talibus enim cessant dissolutio jocorum et venereorum propter immobilitatem frigidi abscidentis motum, et sicci quod non de facili movetur extra seipsum. Hoc autem proportionaliter hæc ætas operatur in omnibus vivis sicut et in hominibus, ut diximus. Est autem sicca hæc ætas proprie inter omnes ætates : quia ex evaporatione longa duarum ætatum destituta est humido interiori membrorum : et ideo quia non adhuc dominans frigus induxit humidum alienum, non habet humiditatem exteriorem : et ideo est sicca ætas illa intus et extra.

CAPUT VI.

De senio et proprietatibus ejus.

Senium autem sive *ætas decrepita* est, quæ est frigida et humida, non quidem intrinseca humiditate et naturali, sed extrinseca et accidentali.

Quod ut intelligatur, revocanda sunt ad memoriam quæ in quarto *Meteororum*¹ dicta sunt. Cum enim extrahatur continue de profundo humidum evaporante calido, remanet humidum in superficie, et est viscosum phlegmaticum propter suam frigiditatem a destitutione caloris causatam : eo quod calidæ partes evolaverunt. Adhæret igitur primo membris similibus intrinsecus de medullis membrorum exspirans cum calido antequam ad superficiem ætatis educatur : et ideo membra similia efficiuntur in tali ætate humida aliena humiditate, non naturali, sed corrupta : et hæc vocatur humiditas phlegmatica adhærens et non au-gens.

Hæc autem ætas est cum diminutione substantiæ et virtutis, eo quod tunc membra destituta sensibiliter intrinseco humido contrahuntur et obrigescunt, et pellis corrugatur frigore, et induratur, et nervi exsiccati, et quasi spasmatici contrahuntur, et post se trahunt membra

quibus colligantur sicut spinam dorsi : et tunc incurvatur dorsum : et ex frigido sicco spiritus deficiunt, et pauci qui remanent, inspissantur et ingrossantur : et ideo non penetrant in poros : et tunc obsurdescunt aures, et caligant oculi : et hæc est corruptio naturalis in omnibus viventibus : et ideo egregie dicit Aristoteles in quarto *Meteororum*², quod « omnis corruptio naturalis est in via vetustatis et senectutis. »

Cum autem comparata fuerit hæc ætas ad senectutem præcedentem, tunc est interiorius siccior, et exteriorius humidior in membris humiditate innaturali : et hæc est causa, quod multas corruptas humiditates ejiciunt senes, et sunt multæ egestionis et multæ comestionis : et egestio multa eorum causatur ex multa comestione eorum indigesta. Comestio autem eorum multa causatur ex frigido et pondere cibi, quod semper tendit ad fundum per portanarium stomachi ad secessum, sicut de melancholicis diximus in libro de *Somno et Vigilia* : et sunt eorum egestionis quasi fluxus lienterici, et sunt malarum operationum animalium, ita quod incipiunt tandem puerilia amare et facere : quod contingit propter spirituum animalium grossitiam et pigritiam, qui non penetrant ad cellam logisticam, sed remanent in interiori capitis cum defectu : et ideo non prohibetur apprehensio phantastica in eis per actum rationis : et tunc sunt deliri, eo quod distemperata est harmonia virtutum animalium eorum, sicut lyra dissona. Sunt etiam tunc memoriæ eorum malæ ad recipiendum, propter frigus et interiorem siccitatem. Hæc autem, sicut diximus, in homine magis apparent : sed imaginari nos oportet, quod proportionaliter sint in omnibus aliis vivis. In omni enim eo in quo agit calidum et humidum, tandem necesse est induci talem exitum vitæ et induci corruptionem.

¹ IV Meteororum, per multa capitula.

² Ibid. tex. et com. 3.

Hæc autem ætas habet etiam differentias tres, sicut omne medium quod est inter duo extrema: ea enim pars quæ est juxta ætatem priorem, magis accedit ad frigidum siccum: et ea quæ est in ultimo vitæ, magis accedit ad frigidum rigens, et humidum extraneum valde viscosum extrinsecum inhærens: propter quod omnes fere tussunt senes, et respirant cum quodam cantu anhelitus. Cujus causa est, quia pulmonos eorum implentur superfluo viscoso phlegmate.

Ea autem pars ætatis hujus quæ est media, medias etiam habet proprietates: sed in medietatibus istarum duarum ultimarum ætatum differentia est ad priorum ætatum medietates: quoniam medietates duarum primarum ætatum accedunt ad temperantiam complexionis secundum veritatem: medietates autem duarum ultimarum accedunt ad intemperantiam: una quidem est secundum siccitatem, et altera secundum frigiditatem, quæ sunt duæ causæ mortis.



TRACTATUS II

DE CONSEQUENTIBUS ÆTATEM.

CAPUT I.

De his ad quæ redit juvenus eorum.

Videtur autem non prætereundum, quod quædam sunt de numero animatorum, ad quæ post senectutem redeat pristina juvenus eorum in toto : et quædam sunt ad quæ redit in parte : quædam autem ad quæ nullo modo redire potest. Ex plantis enim multæ sunt ad quas redit juvenus post senectutem. Ad animalia autem quæcumque sunt valde similia in partibus corporis, redit juvenus secundum aliquid. Sed ad ea animalia quæ

valde sunt dissimilis corporis, nullo modo redire potest juvenus ipsorum. Et in his oportet investigare modum et causam.

Modus autem est, quod postquam senuit planta, durescit cortex ejus, et ex frigiditate clauduntur pori radicis ejus : et si tunc præscindantur arefacta superius, et findatur radix ejus inferius, scissuris multis, trahet succum per lignum radicis, et non per corticem, et incipiet emittere surculos et ramos, sicut jam primum pullulaverat : sed tamen non durabunt ista diu sicut illæ quæ in toto de novo pullulant. Alter autem modus est per insitionem, sed iste non est adeo verus sicut ille : quia dubium est utrum sit una planta vel duæ : et si esset una, dubium esset utrum esset eadem cum prima vel alia. Hæc autem in libro de *Vegetabilibus* determinari habent. Tertius autem modus est, quod amputantur rami superiores plantæ, et fit nova pullulatio de stipite. Sed neque hic modus adeo efficax est sicut primus.

Causa autem in omnibus est una, quæ est similitudo corporis : ideo enim facilis est transmutatio ex uno in alterum. Quod enim in nutrimento est simile naturæ ra-

Nota modum qualiter plantæ post senectutem redeunt ad juvenutem.

Utrum arbor crescens seu nascens per viam insitionis, sit eadem cum prima ?

dicis, hoc etiam simile est naturæ stipitis, et naturæ ramorum, et naturæ virgarum, et ut generaliter dicatur, omnibus partibus plantarum : ideo in radice coquitur nutrimentum et terminatur, unde fiunt omnia plantarum organa.

Sic autem non est in his quæ valde sunt heterogenia : quod enim in illis simile est ossi, non est simile carni : et quod est simile venæ, non est simile nervo, et sic de aliis : et ideo in talibus oportet nutrimentum in quolibet membro novam accipere assimilationem : propter quod cum corrupta sunt per senectutem nutrimenta vel amputata, non potest redire juvenus per generationem majorum organorum ex stomacho, vel corde, sed remanet vetusta et corrupta. In animalibus autem multum similibus, sicut in cancris, et serpentibus, et lacertis, et vermibus similibus, aliquando recrescunt partes descissæ, vel testæ depositæ recrescunt, sicut in cancris et ostreis quibusdam : testa enim in talibus est pro pelle, et non est membrum animalis, sed est sicut ungulæ in animalibus : et ideo recrescit de fumo terrestri generato in corporibus eorum : propter quod est etiam dura valde ac sit optesi decocta : terrestre autem assatum constituit eam : et quia talis fumus est multus in corporibus eorum, ideo recrescit juvenis, et deponitur vetus : quia aliter nimis duresceret, et impediret animales operationes.

Membra autem talium animalium recrescunt et juventutem accipiunt propter similitudinem corporis eorum, sicut de plantis dictum est : præcipue autem recrescunt ea quæ longe distant a principio vitæ, sicut caudæ in quibusdam. In generationibus autem cancrorum recrescunt pedes : et hoc ideo fit, quia si abscinderentur membra principalia, non remaneret vita in talibus. In aliis autem fit iterata receptio juventutis : quia propter

similitudinem ipsorum nutrimentum factum in membris principalibus ex illis eisdem sufficit formare ea. Neque oportet ad hoc speciale vas habere in quo nutrimentum digeratur et assimiletur : nullum autem talium animalium invenitur, quod in toto mutatum recrescat successive, sicut planta quæ successive accipit novas radices, et novum stipitem, et novas virgas, licet non simul : quando enim accipit unum, non accipit alterum : quia si simul hæc omnia nova acciperet, tunc non esset aliquid unum in quo formaretur et assimilaretur materia nutrimenti, unde generari habent : et hoc est impossibile.

Sic autem non est de animali : oportet enim quod in animali remaneant membra principalia, et præcipue cor, non renovata : quia ex illo formantur omnium organorum restaurantia sufficienter : sum enim restaurativum non potest formati ex aliquo alio : et hæc est causa quare diximus, quod ad talia non redit juvenus eorum nisi secundum partem. Sed in heterogeniis animalibus, quæ multum dissimilia sunt in membris, ex nullo membrorum restaurativum sufficienter formatur ad alterum : et ideo oportet quodlibet salvari et ad hoc quod nutrimentum in ipso formetur : et ideo etiam unum non recessit ex alio : caro enim materialis, ut diximus, et non formalis, refluit et influit nova succedens veteri, sicut sufficienter in libro de *Generatione*¹ determinatum est.

Fuerunt autem quidam de secta medicorum, qui inconvenienter assignaverunt dictorum causam et rationem, dicentes quod ea quæ formantur de humido seminali, non recrescunt abscissa : sed ea quæ crescunt de humido nutrimentali, abscissa recrescunt. Si enim hoc esset verum, aliqua caro in quolibet membro numquam recresceret : quia constat quod tota caro quæ primo formatur in corpore, de hu-

¹ I de Generatione et Corruptione, tract. III, cap. 8.

mido fit seminali : et hæc tamen sicut alia et influit et effluit secundum materiam accepta. Adhuc autem constat, quod omnia membra cancrorum et serpentium prima et ipsa pellis et testa de humido formantur seminali, quæ tamen recrescere videmus oculis nostris. Amplius ratio ista non est nisi in parte materiæ accepta : humidum enim, sive sit seminale, sive nutrimentale, materia formabilis est, et non causa formans. Deberet autem causa quæri, quæ esset principium operationis talis formaliter. Et ideo standum est primæ rationi inductæ et non secundæ.

CAPUT II.

De causis necessitatis, quibus probatur quod necesse est incurrere senium.

Quod autem valde attendendum est in his ætatis differentiis, est quod nullum generatorum ex contrariis evadere potest, quoniam secundum naturam veniat ad terminum exitus per senium quantumcumque temperate nutriatur et custodiat : cujus causæ sunt multæ.

Una quidem est, quia quod ingeritur extraneum est et dissimile, et quantumcumque assimiletur, tamen in principio dissimile est quando intrat in membra : sanguis enim frigidus est, qui generatur ex lactuca, licet postea calescat in corpo-

re : et sic est de omni eo quod extraneum corpori ingeritur. Oportet enim aliquid suæ extraneitatis retinere, et postquam membris incorporatum est per aliquod tempus : per illam autem extraneitatem alterat virtutes membrorum : eo quod in physicis omne agens patitur, et omne patiens aliquo modo agit¹ : alterationes autem virtutum sibi continue succedentes, debiles faciunt virtutes membrorum et organa eorum, vel eorum quæ sunt qualitates complexionales membrorum hebetant et confundunt : his autem sæpe et diu sibi succedentibus necessarium est incurrere putrefactionem per senium ipsum membrum.

Secunda autem causa hujus est ex cælo et mundo. Omne enim quod est ex contrariis, distabit in suis componentibus, aliquando ita quod levia erunt sursum, et gravia deorsum : antequam autem distent secundum actum, inducuntur dissolutiones complexionis ligantis ea paulatim : et sic virtus membri et qualitates incipiunt retardari et impediri per spatium temporis : et hoc vocamus senium. Necesse est igitur, quod omne membrum senium incurrat.

Tertia autem causa hujus est, quia etsi ponamus non nutriri membrum nisi nutrimento ultime assimilato, tamen illud non unitur membro nisi per calorem aperientem membri substantiam et dividendam substantiam nutrimenti per poros membri. Omne autem quod sic calore sæpe dividitur, necesse est quod aliquo substantiali humido evaporato per calorem inspissetur et induretur : et quanto magis induratur, tanto minus est ipsum susceptibile restaurantis. Necesse est igitur tandem attrahi et rigescere membrum humido substantiali educto, et tunc inhabile efficitur ad aliud simile sibi recipiendum.

Quartus etiam est calor aeris circumdantis : quia necesse est quod a circum-

¹ Hæc multoties probata sunt in libro de Generatione, et alibi.

datione illius quod tangit nos, dissolvantur corpora commixta, et educatur humidum, et cum ipso calidum : et ideo remanent membra intus arida et gelida, et exterius humida aliena humiditate : et hoc est senium, sicut patet per ante dicta.

Quinta etiam causa est, quod animal aut quiescit, aut movetur : et si quidem quiescit animal, invalescit super ipsum frigus complexionis, et inspissat humidum ipsius, et exstinguit calidum, et inducit mortem et dissolutionem. Si autem movetur, tunc ex motu frequenti accenditur calor, qui cum circumdantis calore humidum educit et inducit senium, sicut dictum est.

Sexta autem causa est, quia cum animal non possit vacare a motibus animalibus, qui exercentur per animales virtutes, sicut imaginari, et sentire, et cogitare, et hujusmodi, etiam illi distrahendo ad exteriorem spiritum et calorem, paulatim resolvunt humidum et inducunt senium, sicut patet per dicta in libro primo de *Somno et Vigilia*. His igitur de causis inducitur necessario et inevitabiliter senium in corporibus inanimatorum.

Quidam autem his addiderunt causam temporis, propter hoc quod dicit Aristoteles¹, quod tempus per se est causa corruptionis, et per accidens causa generationis. Sed isti dicta Philosophi non intelligunt. Tempus enim non est causa corruptionis per seipsum : et tamen ex hoc non sequitur quod propter hoc per accidens sit causa generationis, quod est causa corruptionis, eo quod est in tempore per motum qui non accidit tempori, sed est ejus substantia vel causa, hoc modo quo potest habere essentialem causam, cum sit accidens debilissimum inter omnia quæ habent accidentale esse. Motus enim cælestis, cum sit causa mutationis eorum quæ sunt, facit distare omne quod sub ipso est, a suis principiis primis : et cum elongaverit illam distantiam per modum qui dictus est in gradibus ætatum, faciet distare omne generatum a primis, scilicet calido et humido, secundum quod sunt causa generationis vitæ : et sic non aliter tempus est causa corruptionis et senectutis et senii, sicut patet ex his quæ nos determinavimus in quarto *Physicorum*.

¹ ARISTOTELES, IV *Physic.* tex. et com. 128.

INDEX

Tractatum et Capitum in Libro de Juventute et Senectute.

TRACTATUS I.

TRACTATUS II.

De ætate in communi, et differentiis ejus.

De consequentibus ætatem.

CAP.	I. De ætate in communi et de ordine et causa dicendorum.	305
	II. De divisione ætatum, et penes quid sumitur earum differentia?	306
	III. De ætate augendi et differentiis ejus.	308
	IV. De ætate quæ dicitur <i>STATIVA</i> , et proprietatibus et differentiis ejus.	310
	V. Quæ dicitur diminutiva virtutis et non substantiæ, et de proprietatibus ejusdem.	313
	VI. De senio et proprietatibus ejus.	314

CAP.	I. De his ad quæ redit juven- tus eorum.	316
	II. De causis necessitatis, in quibus probatur quod necesse est incurrere senium.	318

D. ALBERTI MAGNI

RATISBONENSIS EPISCOPI, ORDINIS PRÆDICATORUM,
PARVA NATURALIA.

LIBER DE NUTRIMENTO ET NUTRIBILI.

TRACTATUS I

DE NUTRIMENTO ET NUTRITO PER SE.

CAPUT I.

Quæ sit libri intentio, et quid est nutrimentum ?

De anima secundum seipsam in sequenti libro dicemus : sed quia non tan-

tum secundum seipsam quærimus cognoscere naturam, sed et opera ejus et passiones, et ea circa quæ operatur, et a quibus passionem recipit propriam, ideo iterum tamquam a principio incipientes, de ipsa opera ejus quæ activis suis agit potentiis, declarare intendimus. Diximus autem in libro de *Anima*¹, quod activæ potentiæ nihil similitudinis cum passivis habentes, sunt nutritiva et augmentativa et generativa, quæ etiam secundum naturam sunt potentiæ propriæ, eo quod speculatio naturalis incipit a magis communi, et devenit in particulare determinatum². Magis enim commune physice sumptum, etiam secundum nos prius est, sicut sæpe ostendimus. Et ideo de

¹ II de Anima, tract. II, cap. 5 et 6.

² ARISTOTELES, I de partibus animalium, cap. 4.

his operibus animæ in hoc libello speculabimur. Quia vero subjectum præjacet operi, ideo oportet agere de *nutrimento* : quia ex ratione illius sciemus opera nutritionis.

Nos autem jam ostendimus, quod nutrimentum et augens, et ex quo est generatio, idem est subjecto, secundum esse alterum est. Et ideo tribus operibus quæ sunt nutrire, augere, et generare, idem subjicitur, circa quod operantur, et ex quo oportet omnia hæc tria opera cognoscere. Quæremus igitur et quid est quod nutrit et auget et generat, et cujus est nutrimentum proprie, et quomodo est, et qua de causa, et usque ad quem terminum. Et supponimus omnia quæ in libro *Peri geneseos* ¹, et in libro de *Anima* ² de nutrimento jam diximus.

Dicimus igitur quod *nutrimentum* est potentia simile ei quod nutritur : hoc autem vocamus *potentia simile*, quod unico motore agente actu assimilari potest. Propter quod nihil simplicium nutrimentum animati esse potest : quoniam cum omne nutrimentum sit commixtum ex elementis, si debeat nutrito assimilari simplex, oportet quod uno quodam motore moveatur ad hoc quod fiat mixtum, et ab aliquo ab illo in genere moveatur ad similitudinem ejus quod nutritur. Movens enim ad mixtionem est aliqua primarum qualitatum cum motu cæli. Sed movens ad similitudinem animati est anima. Qui motores ejusdem generis non sunt, nec ejusdem potestatis. Patet igitur nihil simplicium posse nutrire aliquod corporum animatorum.

Si quis autem objiciat duplicem esse potentiam, remotam scilicet, et propinquam : et si simplex non potest nutrire potentia propinqua, tamen potest nutrire potentia remota. Sciat potentiam remotam non esse proprie potentiam ad hoc vel illud : quia nihil habet in se unde

determinetur. Sed potentia nutrimenti est potentia ad actum nutriendi determinata. Et ideo non est nutriens potentia quod non est nutriens potentia propinqua.

Amplius potentia passivorum ex suis activis habent diffiniri et determinari. Et ideo potentia uni activo et motori non proportionata, non proprie est potentia una, sed est potentia confusa : et ideo cum motor in nutrimento sit anima, quæcumque illius motoris actione non sunt nutrientia secundum actum, hæc non possunt dici potentia nutrimentum : et ideo solum commixtum potentia est nutrimentum.

Non autem omne commixtum nutrimentum est animati. Sunt enim quæ sunt species terræ vel aquæ coagulationis habentia formam, sicut lapides qui sunt species terræ, et metalla quæ sunt ex aqua coagulata, quæ nullum videntur nutrire animalium vicinitatem eorum ad elementa. Hæc enim non uno motu digestionis in corpora animata possunt transmutari : sed est totum quod in eis est, impurum et incongruum animalium et plantarum corporibus. Et ideo talia non nutriunt.

Cujus in communi tres sunt causæ : quarum una est talium ad elementa vicinitas : et ideo non sunt substantialiter commixta, sed potius dominantur in eis qualitates terræ et aquæ sicut in simplicibus. Et ideo frigida sunt omnia talia in genere, non habentia humidum calidum quod incorporabile sit in eis quæ nutriuntur. Signum autem, quod hæc vicina sunt elementis, est quod facilis est eorum transmutatio ad invicem sicut et elementorum : quod patet in operibus alchimicis, in quibus de facili unum metallum alterius recipit colorem et proprietatem. Alia autem causa est, quia talia nutrire non possent nisi solverentur.

¹ I de Generatione et Corruptione, tract. III, cap. 13 et 15

² II de Anima, tract. II, per multa capita.

Non solvitur autem a calido humido complexionali. Sed metalla quidem ab excellenti calido et sicco : lapides autem non omnino solvuntur, sed aduruntur in calcem propter humidi extractionem. Et tertia causa est, quia talia ut in pluribus et maxime metalla ex sulphure componuntur, quod omnino contrarium est complexioni animatorum, sicut patet per foetorem sulphuris quando resolvitur. Talia ergo non nutriunt aliquod animalium. Si autem quaedam animalia videantur glutire lapides, sicut struthio, et quaedam aliae aves, absque dubio indigesta emittunt, et non ex eis capiunt nutrimentum. Patet autem hoc in elixatione in calido humido ad ignem, ex quo lapides nullam omnino recipiunt alterationem : digestio autem elixationis similis est. Et ideo id quod nullo modo elixabile est, nullo modo nutrimentum esse potest. Quae autem elixabilia sunt, in IV *Meteororum* ¹ est determinatum.

Cætera autem omnia plus et minus nutrientia sunt, et eo sunt plus nutrientia quaecumque habent naturale humidum facile convertibile in naturam ejus quod nutritur. Minus autem nutrientia sunt, quaecumque habent tale humidum minus separabile a terreo quod est in eis. Et ideo quaecumque habent parvam humiditatem, parum nutriunt, sicut ossa et pili : sed ossa plus nutriunt quam pili, quia pili sunt sicut fumus exsiccatus, et humidum in eis est valde paucum. Et ideo nullum omnino animal pilis et penis nutritur : sed potius quaecumque pilos aut pennas in cibo recipiunt, aut evomunt, aut indigesta emittunt. Quedam tamen calida animalia ossibus aliquando nutriuntur : eo quod ossa per separationem humidi aliquid immutentur elixata. Ligna autem eo quod sunt non elixabilia, non nutriunt, nisi sicut

recentes palmites adhuc teneri et molles. Illa enim elixantur absque dubio, et ideo calido complexionali immutantur per digestionem. Et ut generaliter dicatur, quaecumque elixata constant, et sicciora efficiuntur, et immutantur a calido humido, illa etiam quaedam animatorum nutrire possunt : quia calidum digestivum est quoddam simile elixanti calido cum humido.

Oportet autem generaliter scire, quod quanto nutrimentum similis est ei quod nutritur, tanto efficacius nutrit et citius convertitur. Et hujus signum est desiderium : quia animatorum unumquodque desiderat suae complexionis simile, sicut id quod est de cholera adusta, desiderat sicca adusta aliquid amaritudinis habentia, sicut fortiter assa. Et complexio sanguinis desiderat temperate calida et humida, sicut carnes leves, et ova tremantia, et vinum rubeum, et panem album frumenti. Et complexio phlegmatis desiderat frigida humida, sicut pisces, et hujusmodi ². Causa autem quod hæc melius nutriuntur, est quia habentium symbolum facilior est transmutatio ad invicem. Licet enim nutrimentum primo sit dissimile, non tamen ad ultimum est dissimile : et quanto fuerit similis, tanto est nutrimentum convenientius. Et hac de causa fructus generaliter male nutriunt hominem : eo quod est in eis virtus terræ, et elongati sunt ab hominum complexionem temperatissima : propter quod nutrimentum generatum ex talibus, putrescit aut in stomacho, aut in venis. Hæc est etiam causa quare plantarum nutrimentum conveniens est fimus : quia fere ejusdem commixtionis est fimus cum plantis, cum fimus sit quasi terra commixta elementis aliis : omnes enim vires plantarum a terra commixta causantur.

¹ IV *Meteororum*, tract. II, cap. 12.

² Cf. II de Generatione et Corruptione, text. et com. 25.

Omnia autem hæc habent differentias secundum quas sunt magis et minus similia eis quæ nutriuntur, de quibus non oportet dicere : quia in genere scire sufficit secundum hujus scientiæ proprietatem, quod nutrimentum est commixtum habens humidum aerem cum aqueo, ita quod utrumque subtili terreo sit terminatum. Si enim habeat humidum aqueum tantum, hoc erit humectans et non nutriens et augens. Si autem humidum tantum habeat aereum, hoc non erit incorporabile, propter hoc quod est spirituale, et evolabit : et ideo ut sit subintrans subtile, oportet esse aereum : et ut sit non evanescens, et sit incorporabile ei quod nutritur, oportet quod sit in ipso natura aquæ : ut autem recipiat et teneat formas et figuras nutritorum, oportet quod sit per siccum subtile terreum terminatum. Signum autem hujus quod dicitur, est quoniam taliter commixta optimi saporis sunt et dulcissima : propter quod etiam indigesta, ut mustum, et fructus, evaporant primum ut adunetur vaporosum humidum aereum cum humido aqueo, et ex his fiat sapor.

Hæc igitur sunt quæ consideranda sunt in proprietatibus nutrimenti. Est autem nutrimentum conversum habens modum cum sensibili : quoniam sensibile per se est ex qualitate quæ agit in sensum, et substantia est sensibilis per accidens. Nutrimentum autem per se est secundum substantiam, et per accidens nutrit quale. Hujus autem causa est, quoniam substantia non fit nisi ex substantia. Fit autem substantia nutriti per nutrimentum. Et ideo oportet illud quod nutrit per substantiam, per se nutriat. Dulce ergo et hujusmodi per accidens nutrit : eo quod substantiam nutriti ipse sapor ostendit esse convenientem vel inconvenientem.

Dictum est igitur de nutrimento, quod sit potentia nutrimentum, et quod commixtum est quale commixtum, et quod sit convenientis cuilibet nutrimentum, et

quod ipsum per substantiam propriam nutriat.

CAPUT II.

De modis eorum quæ nutriuntur.

Id autem quod nutritur, est corpus animatum. Non enim conveniens est sermo illorum qui dicunt quædam simplicium nutriri, ut ignem, et cœlestia corpora : sed ea quæ nutriuntur, animata sunt omnia. Cujus causa est, quoniam omne quod nutritur, debet habere poros per quos ingressum habeat nutrimentum. Poros autem facit calidum. Oportet etiam partes esse molles per quas possit resudare humidum nutrimentale : et tales partes non habent metalla et lapides : et ideo non nutriuntur. Sed si talia augeri hæc aliquando videntur, hoc contingit per generationem qua materia vicina convertitur ad speciem ipsorum et non per nutrimentum.

Sed differens est valde motus in plantis et in animalibus : quoniam plantæ, eo quod terrestres sunt, primam nutrimenti convenientiam accipiunt ex terra : et terra est eis pro ventre et pro stomacho : quia ex terra surgens radix impurum dimittit et purum attrahit : propter quod plantæ nullum habent organum nisi poros, et non stomachum, nec viscera. Cum enim trahant convenientis de ipsa terra et sint similibus partium, quod convenientis est uni, est et alteri : et ideo per poros fit digestio in eis juvante solis

calore. Sed in animalibus non sic est : quia oportet in eis propter membrorum diversitatem nutrimentum in diversa divergentia dirigi : propter quod vias oportet habere nutrimentum in omne membrum.

Sed tamen generaliter tres in plantis inveniuntur diversitates nutrimenti, quarum una est ex poris directe ascendentibus a radice : et per hos poros cursus est nutrimenti : et similis fere in tota planta digestio : et si quid est impuri, expellitur ad corticem. Et omnia talia sic vias nutrimenti habentia, sunt ut frequenter magis scissibilia quam frangibilia. Secunda autem diversitas est ex poris transversis ex medulla ad superficiem venientibus : et hæc divisa sunt radiosa sicut stella : quia viæ nutrimenti per circuitum veniunt ex medulla ad superficiem sicut ex quodam centro : et talia ut frequenter sunt, quorum medulla est multa, ut sunt ligna gulosa vel aliæ plantæ multam trahentia humiditatem nutrimentalem : et hæc sunt magis frangibilia quam scissibilia, sicut est vitis, et sambucus, et quædam alia. Et ingenita est natura in illis : quoniam si haberent poros directos, cum sint pori eorum ampli, non retinerent humidum nutrimentale ubique, et arescerent : nunc autem ubique in corporibus eorum nutrimentum retinetur. Tertia vero diversitas est ex nodis, et nodi sunt talium plantarum quæ sunt concavæ multum, vel multæ et raræ medullæ : quia in talibus radix rara nutrimentum impurum trahit. Et ideo melius oportet ipsum in nobis depurari. Hujus autem est etiam alia causa : quoniam virtus plantæ convertens nutrimentum in substantiam quæ est in radice, convalescere non valet in stipite plantæ concavo et sicco : eo quod propter tenuitatem de facili siccatur a sole et ab aere. Ideo sagax natura multiplicat in eis nodos, in

quibus virtus plantæ sustentata convertit nutrimentum ut nutriat plantam.

In animalibus autem omne nutrimentum necesse est variari secundum diversitatem partium nutritarum. Propter quod omnia similia animalia in corpore nulla habent viscera, velut lumbrici terræ, et quædam alia. In aliis autem secundum quod sunt majoris diversitatis in compositione corporis, sunt etiam majoris varietatis in alteratione et digestionem nutrimenti. Sicut enim in primo libro *Peri geneseos*¹ dictum est, oportet nutriri quodlibet secundum formam, licet non quodlibet secundum materiam nutriatur. Cum igitur formæ partium similes fuerint, erit nutrimentum non distributum per dissimilia. Quando autem formæ membrorum fuerint valde dissimiles, tunc oportet plurima in corporibus nutritorum esse vasa, in quibus nutrimentum per digestionem diversas ad plurimas formas alteretur.

Et est generale in omni eo quod nutritur, quod oportet ipsum habere quatuor, quorum primum est virtus nutriens quæ speciem dat nutrimento, et per diversitates specierum partium nutriti diversas largitur species nutrimento. Secundum autem est instrumentum ipsius virtutis, quod est calor digestivus, qui terminat et complet nutrimentum, removens ipsum a contrajacentibus qualitatibus et passionibus, sicut determinatum est in quarto *Meteororum*². Tertium autem est receptaculum nutrimenti intra seipsum, quod receptaculum aliquando est manifestum, sicut est in habentibus viscera : aliquando occultum, sicut in plantis et in aliis habentibus similia corpora, sicut sunt quædam animalia in genere vermium repentium vel immobilium animalium. Quartum vero est spongiositas et porositas corporis : quia aliter calore dividente corpus nutrien-

¹ I de Generatione et Corruptione, tract. 1, cap. 15.

² IV de Meteoris, tract. 1, cap. 2 et 3.

dum, non haberet nutrimentum vias ad singulas partes secundum speciem determinatas in corpore : quodlibet enim secundum speciem in corpore determinatum nutritur, sicut alibi determinatum est a nobis.

Cum autem fiat in nutrimento nutriti ad quodlibet secundum speciem determinatum distributio, fit hæc distributio secundum medietatem geometricam et non arithmetica, tam in qualitate nutrimenti, quam in quantitate. Hoc autem probatur, de quantitate quidem : quoniam plus dirigitur ad magnum, et minus ad parvum : et tamen proportionem distributionis servata : quoniam unicuique tantum dirigitur, quantum suæ quantitati debetur, sicut in digitis manus apparet : quoniam medius plus accipit, quam auricularis. Et si hæc proportio non servaretur, converteretur alicubi nutrimentum in tumorem, et putresceret, et faceret quantitatem enormem, eo quod ad membrum plus attraheretur quam sibi deberetur : et siquidem illud in speciem membri converteretur, efficeretur quantitas enormis. Si autem non, tunc tumesceret, et postea in pus converteretur. Ad majus autem membrum attractum nutrimentum minus, faceret arescere et deficere membrum, cum deperditum sufficienter non restauraret.

Secundum qualitatem autem eandem oportet servari proportionem : quoniam cum ejusdem membra non sint ejusdem complexionis, et oporteat nutrimentum assimilari nutrito, oportet quod nutrimentum in diversa qualitate distribuatur membris, servata tamen proportione illa qua dirigitur unicuique quod sibi secundum propriam complexionem debetur.

Quid autem vocetur distributio secundum proportionem geometricam, in antehabitis libris est determinatum, in arith-

meticis autem cum subtilitate dictum est. Causa autem hujus distributionis duplex est. Prima quidem est quæ est naturæ sagacitas et sollicitudo, quæ nisi ordinaret nutrimentum per hujusmodi distributionem, non salvaretur in specie et virtute et figura individuum. Proxima autem est virtus propria et instrumentum proprium uniuscujusque secundum speciem determinati membri : quoniam virtutes differunt secundum membra, sicut in his quæ de *Anima*¹ dictum est : quoniam si quodlibet membrorum esset animal, virtus animæ quæ est in ipso, esset actus ejus et anima ejus. Sicut autem differunt virtutes, sic differens est instrumentum : et est calor nutriens in toto corpore substantia quidem unus et idem, sed secundum esse et rationem differens, et proportionatus virtuti quæ est in membro : et ideo non trahit nutrimentum, neque convertit, nisi secundum quod proportionatum est quantitati, qualitati, et formæ, et figuræ uniuscujusque membri : et a tali tractu sequitur, quod nutrimentum proportionem geometricam per membra distribuatur.

Hæc igitur de modis nutrimentorum in communi dicta sunt : quoniam per singula de ipsis dicendum erit in libro de *Vegetabilibus*.

¹ II de Anima, tract. 1, cap. 3.

CAPUT III.

De modo nutriti et nutritionis.

Nunc autem restat investigare quo modo fiat nutrimentum, et oportet nos esse contentos modis communibus : quoniam per singula non potest modus nutritionis sciri, nisi cognoscantur naturæ corporum nutritorum per singula. Est igitur modus communis omni nutritioni, quod oportet fieri assimilationem in nutrimento per calidum digestivum, sive fiat hæc decoctio in poris, sive in vasis, sicut in his quæ habent viscera. Est autem assimilatio completa, et assimilatio incompleta, et media inter completam et incompletam. Hujusmodi autem causa est, quia necesse est in omni motu medium esse in quo mutatur id quod mutatur, antequam sit in extremo fine, et postquam separatum est a principio : et cum motus sit actus imperfectus ejus quod est in potentia, secundum quod est in potentia, oportet quod mutatur de substantia ad substantiam, habere tres status, quorum unus est vicinus principio motus, et alter secundum medium, et tertius secundum finem complementi : omnis enim mutatio de extremo ad extremum est per medium, sicut in *Physicis*¹ est determinatum. Propter quod etiam digestio cum sit

completio nutrimenti per motum quo transmutatur a passionibus contrajacentibus ad speciem ejus quod nutritur, erit primo juxta dissimilitudinem, in qua tamen inchoata est similitudo : postea autem in quo similitudo adaucta est : et postea in completa similitudine.

Hoc autem patet in animalibus perfectis : quoniam in illis prima alteratio cibi cocti est per separationem succositatis magis puræ a fæce impura, et purior succositas trahitur ad hepar : et quia aquosa est valde, et aqua humectat plus quam nutriat et augeat, et quasi submergit membra, ideo secunda fit depuratio in hepate ab aquositate superflua, quæ fit separatione aquei humoris ab eo qui magis aereus est terminatus subtili terreo. Et in quibusdam animalibus aquea superfluitas attrahitur per renes ad vesicam, in quibusdam redit ad stomachum, et fluidam facit superfluitatem siccam, et exit cum ipsa. Tertia autem est in venis a qua etiam separatur superfluitas, quæ redit ad humidam et aquosam superfluitatem per vias nutrimenti, et hypostases facit in urinis. In aliis autem animalibus conjungitur stercori, et emittitur cum ipso, sicut fit in his quæ vesicam non habent. Et istæ tres sunt generales digestiones et præparationes nutrimenti, quæ faciunt nutrimentum simile non huic vel illi membro, sed toti corpori.

Et similes quidem his sunt in plantis et animalibus similibus : sed perficitur prima statim in tractu nutrimenti a terra, et secunda in radice, tertia autem in stipite et ramis : et aquositas superflua resudat ex radice et ramis : quia in his sunt generales virtutes nutrimentum alterantes. In membris autem et partibus specialiter consideratis perficiuntur singulares digestiones, quæ uni membro in se et non alteri assimilant nutrimentum :

¹ V *Physic. tex. et com. 22.*

quæ quarta est præparatio nutrimenti qua efficitur nutrimentum nutriens partes speciales : et assimilatur hoc secundum Platonem virtutibus cœli, quæ sunt universales moventes secundum universi congruentiam. Virtus autem membrorum assimilatur virtutibus particularibus, quæ sunt in materia determinata moventes. Iste igitur est modus communis omnis nutrimenti quo præparatur et assimilatur ei quod nutritur.

Sicut autem diximus in his quæ de *Anima*¹ scripta sunt, motor in his est anima nutritiva quæ speciem influit nutrimento sibi congruam, qua efficitur subjectum animæ, in quo operationes vitæ vegetabilis valet exercere. Cum enim actus activorum sit in patientibus secundum congruentiam patientium et non secundum congruentiam agentium, substantia nutrimenti formam accipit ab ipsa, non quidem animæ ita quod fiat anima vel pars animæ, sed per quamdam analogiam quam habet ad animæ partem, cujus efficitur proprium organum. Analogiam enim habent motor et motum ad actum unum quem anima agit essentialiter. Organum autem et subjectum sicut instrumentum, sicut diximus analoga esse ad opus, artificem et dolabrum : et talis organi speciem ab anima recipiens nutrimentum accipit motum, qui consequitur speciem et formam illam. In omni enim natura sic est, quod quantum generans generato dat de specie sua, tantum dat ei de consequentibus speciem, quæ sunt locus, et motus ad locum, sicut diximus in VIII *Physicorum*². Cum igitur substantia nutrimenti speciem recipiat animati ab anima, movetur ad locum virtutis animæ, quæ sita est in organo, cui est per digestionem assimilatum. Et hinc est quod diximus in septimo *Physicorum*³, quod tractus non est motus nu-

trimenti, sed motus nutrimenti est similis tractui, qui est motus ad virtutem, qui dat formam corporis, et ad locum ejus in quo ut in membro cui assimilatur, est sita : fit autem operatio hujus virtutis per instrumentum quod est calor naturalis.

Necesse est autem quod virtus hujus caloris quo terminatur nutrimentum ad similationem, ex quinque virtutibus componatur, quarum una est virtus simplicis calidi ignei per quam habet alterare. Altera autem est ex subjecto proprio calidi, quod est humidum complexionale membri, in quo calor operatur : et per hanc virtutem congregatam facit digestionem, quæ est epsesis, quæ elixatio naturalis vocatur. Tertia autem est virtus quam habet calor ex membro secundum quod est membrum compositum, qua virtute calor movet ad finem determinatum, qui est forma membri. Quartam autem habet virtutem a cœlo, qua virtute calor aliquando intus movetur cum sol occidit : aliquando extra, cum sol oriens signum accipere incipit : aliquando ad superiora nutriti spiritus, et humorem ducit quando sol medium cœli ascendit. Quintam autem virtutem principalem habet ab anima cujus est nutrimentum. Sicut enim virtus artificis communiter est artis et instrumenti, ita etiam virtus animæ et sua est et instrumenti sui : et per hanc virtutem imprimit substantia nutrimenti speciem vitæ, ut in ipso sicut in proprio subjecto operationes vitæ exercentur.

Has enim quinque operationes caloris in nutrimento generaliter invenimus : et occurrunt ultra proprietates nutrimenti intuentibus : propter quod nutrimentum non transmutatur ad formam novam de potentia eductam, sed potius ad formam quæ est secundum esse novum, accipit

¹ II de Anima, tex. et com. 24.

² VIII Physic. tex. et com. 32.

³ VII Physic. tract. I, cap. 3.

sub ipsa: quoniam accipit esse ossis et carnis et nervi, quæ formaliter ante fuerunt, licet substantia nutrimenti nunc addita novum esse habeat sub forma ejus quod nutritur. Et ideo generatio motus nutrimenti esse non potest, et tamen est motus substantialis: quia in generatione quidem nova forma de potentia educitur, et esse novum habet id quod generatur. Hic autem nulla nova forma educitur de potentia: quia manens secundum formam nutritur: et illam formam accipit nutrimentum. Sed nec alteratio dici potest: quoniam in illa manet subjectum idem actu sub diversis accidentibus secundum idem esse substantiale. Nutrimentum autem aliquid esse substantiale accipit quando membrum unitur. Simile autem iudicium est de eo quod nutritur: hoc enim idem manet secundum formam, non autem omnino idem secundum materiam: et ideo non generatur, quia generatum quidem manet idem secundum materiam, et secundum formam non idem. Neque alteratur, quia alteratum secundum substantialia quæ sunt materia et forma, manet idem: nutrimentum autem varietatem habet per influxum et effluxum materiæ. De his autem in primo libro de *Generatione et Corruptione*¹ satis dictum est.

Est autem adhuc considerandum de modo nutritivæ, quod omnis præparatio nutrimenti est similis aut elixationi quæ vocatur epsesis, aut assationi quæ optesis appellatur, et nulla omnino nutrimenti decoctio similatur pempasi. Omnis enim decoctio nutrimenti est a caliditate quæ nutrimento est aliena, et nutritio propria. Et illa quæ fit in assimilando nutrimentum mollibus, ut carni, et hujusmodi, similis est epsesi, eo quod illa fit a caliditate quæ est in humido, quæ est humidum evocans ab eo quod decoquitur. Illa autem quæ assimilat nutrimentum par-

tibus duris terrestribus animatis, ut ossibus, similis est assationi quæ est optesis. Et ideo omnino illa intus rigantur medullis, et exterius sunt siccata. Medius autem modus est in mediis, sicut in chordis et cartilagine, qui quandoque est similior epsesi, quandoque optesi, secundum quod partes ad quas nutrimentum convertitur, fuerint duriores vel molliores.

Sic igitur dictum est, quod triplicem modum habet nutritio, scilicet ex digestionem quadruplici, et ex motore, et instrumento, et ex modis elixationis vel assationis.

CAPUT IV.

Qua de causa nutriuntur ea quæ nutriuntur?

Qua autem de causa nutrimentum fit, facile est scire ad memoriam revocantibus ea quæ in secundo de *Anima*² dicta sunt: quoniam nutrimentum accipit omne quod nutritur ad permanendum in esse individui: contingit autem hoc ideo, quia sicut in præcedenti capitulo dictum est, mixtum est omne animatum, et sunt caloris operationes in ipso. Spiritus enim vehiculum est virtutis animæ, et spiritus a calido generatur, et ipsi sunt calidi. Calidum autem omne consumptivum est

¹ I de Generatione et Corruptione, tract. III, cap. 8.

² II de Anima, tract. II, cap. 6.

substantiæ et deperdens per evaporationem aliquid ex ipsa substantia. Necessè est igitur, si debeat salvari individuum, restaurari deperditum. In mineralibus autem et lapidibus non dominatur calidum, sed potius frigidum coagulans et terminans siccum. Et ideo cum motus frigiditatis sit constrictio partium rei ad interiora, non fit aliqua in eis deperditio: propter quod nutrimento non indigent. Testatur autem hoc, quod animalia frigida viscosos et superfluos humores habentia, tempore frigido non quærunt nutrimentum, eo quod in illis nulla vel parva et insensibilis fit deperditio. Nutrimentum igitur est ad deperditi restaurationem: nec deperditio tantum est necessaria in partibus propter calidi consumptis virtutem, sed etiam est utilis, quoniam sicut in respirantibus diu tentus aer non efficitur utilis ad operationem respirationis, ita etiam in animatis materia diu tenta duratur et efficitur inhabilis ad vitæ organicæ operationes: propter quod restaurari et innovari oportet. Testantur autem hoc animalia duræ testæ, quæ per abjectionem testæ renovantur, sed materia forma et specie manente eadem. Signant etiam hoc aves per mutationem plumarum exteriorum, quod abjectio et deperditio et restauratio interioris materia est signum deperditionis et renovationis. Propter quod etiam id quod restaurant, debilius et ignobilius efficitur propter extraneitatem: eo quod ab extrinseco assumitur. Ideo per multum tempus durescunt corpora et rigescunt, et infrigidatur in eis calidum, et non est in eis nisi extraneum et aqueum et humidum, non nutriens, sed phlegma viscosum, sicut est in corporibus senum: propter quod rugantur pelles eorum propter frigus contrahens et inspissans, et siccum inducens et arescere faciens. De his autem quædam dicta sunt in libro *Peri geneseos*.

Non autem verum est quod quidam dicunt, nutrimentum fieri ad caloris impedimentum, ne consumat substantiam:

qua secundum hoc nutrimentum non oportet membris uniri, sed tantum superfundi vel infundi: et ad hoc magis esset idonea humiditas aquea, quam nutrimentalis. Et hoc falsum esse constat ex dictis. Adhuc secundum hoc nutrimentum non nutriet ex hoc quod potentia est caro, vel os, vel aliquod membrum nutriti, sed potius ex hoc quod alteraret et remitteret intensionem caloris qui est in ipso: quæ omnia sunt absurda.

Si quis autem objiciat, quod oculis videmus consumi vehementer corpora per famem quando subtrahitur cibus, et impediri consumptionem quando abundanter cibus sumitur, et sic nutrimentum videtur in hoc nutrire quod impedit caloris naturalis violentiam. *Dicemus*, quod cibus quando unitur membro abundanter, fortificat membrum, ne cito consumatur ejus materialis substantia: et ideo nutriendo et restaurando impedit, et non ita quod superfundatur tantum vel infundatur.

Est igitur per se causa nutrimenti (ut dictum est) restauratio deperditi in eo quod nutritur. Calor enim qui agit et spiritus in omnibus animatis perforantia sunt partium animati, et exsiccativa humidi radicalis quod est in eis. In perforatione autem perforantis continuam necesse est esse deperditionem. Similiter deperditio est consumptio et exsiccatio humidi: et propter hæc duo, natura sollicita ne periret opus ejus antequam perveniret ad perfectum nutrimentum, cogitavit ut ex alieno assimilato sibi deperditum restauraret.

Cum autem deperditorum continuum effluxum, et restaurantium continuum influxum multa sit in partibus materiæ animatorum variatio, non tamen sic omnia effluunt successive, ut nihil maneat de substantia radicali, quæ primitus formata fuit ex substantia seminis infusa humido seminali, sed potius hoc paulatim deperditur: et in animalibus quorum corpora sunt multæ diversitatis, non restauratur: et cum siccat, moritur ani-

mal. In plantis autem et animalibus quæ habent corpora multum similia, sicut vermes, et cancri, humidum nutrimentale sicut seminale efficitur, et virtus nutritiva est sicut formativa propter operationis similitudinem : quoniam formationi in talibus sufficit assimilatio. Et ideo in talibus membra abscissa regenerantur. Cancræ enim non habent diversitatem in componentibus, nisi quoad figuram testæ exterioris. Et in plantis propter hujusmodi redit ad plantam frequenter juvenus ejus : quia virtus assimilativa per idem opus regenerat juvenes palmites vigorem primæ plantationis habentes.

Hoc autem in his animatis quæ multum sunt diversa in membris, fieri non potest : propter diversitatem virtutum assimilantium, quarum quælibet non operatur nisi in organo suo : et si abscindatur organum, amittit calor terminans nutrimentum duas virtutes quibus assimilare et convertere debebat, quæ sunt virtus organi, et virtus potentiæ animæ in organo sitæ, quæ fuerunt duæ virtutes ex quinque virtutibus caloris supra enumeratis. Cum autem non nutriat nisi potentia caro, et potentia os, et non potentia quanta caro, aut potentia quantum os, ut in primo *Peri genesios*¹ determinatum est, patet quod nutritio non nisi restaurat substantiam deperditam, et non quantitatem auget vel diminuit secundum quod hujusmodi : et in hoc distinguitur ab augmento.

Cum autem nutritum secundum prædicta non nisi in materia recipiat variationem, et omnis motus per formam determinetur, secundum quod nutritio est mutatio nutriti, non potuit nutrimentum in aliquo genere tamquam motus vel mutatio poni. Et ideo cum aliis mutationibus et motibus non potest cadere in numerum. Secundum autem quod nu-

tritio est mutatio nutrimenti, est motus ad formam ejus quod præexistit in quo novum accipit, sicut prius diximus. Et ideo iterum quoad hoc non perfectam habet rationem motus et mutationis. Nutritur enim omne quod animatum est, ad deperditi restaurationem. Et hæc est causa principalis quare fit nutrimentum.

CAPUT V.

Quamdiu nutritur animatum ?

Tamdiu autem accipiunt de nutrimento secundum naturam, quamdiu in eis deperditum potest restitui.

Positio autem hæc consistit in duobus. In uno quidem effective, in alio autem materialiter operante. Illud autem quod effective operatur, est calidum quod potest id quod nutritur dividere, et nutriens inducere, et convertendo unire. Hæc enim tria in omni nutrimento sunt operationes calidi : propter quod cum calidum debilitatur ne possit hujus operationes perficere, tunc stat nutrimentum, et deficit animatum secundum naturam. Et hujusmodi quidem causæ accidentales sunt plurimæ, et per artem non determinabiles.

Causæ autem essentielles et naturales sunt tres congregatæ in unum, et unum veram perficientes causam. Harum autem

¹ I de Generatione et Corruptione, tract. I. II, cap. 13.

una est exsiccatio humidi radicalis, quod est subjectum caloris : evanescente enim illo evanescit et calidum, et tunc non valet dictas perficere operationes. Secunda autem causa est mortificativa in frigidatio, quæ inspissat radicale humidum ne sit mobile, et actum ut vehat calidum digerens et convertens ad membrorum interiora : et tunc etiam dictas amittit operationes. Tertia autem causa est multa inductio extranei humidi nutrimentalis non conveniens : humidum enim nutrimentale aliquid semper retinet nutrientis naturam : sanguis enim lactucae frigidus est, et nutrimentum ex piscibus frigidum et viscosum, et simile est in aliis : propter quod fit, quod omne nutrimentale humidum secundum aliquid suae naturae extraneum est ei quod nutritur. Cum ergo multum de illo ingeritur et congregatur, vincit radicale humidum, et suffocatur in ipso calidum : et tunc deficit ab actibus nutrimenti, et moritur animatum.

Ex humido autem defectus est fere eisdem modis, sicut jam patuit. Habet autem modos proprios ex multitudine et paucitate permixtionum et qualitate : prima quidem tria jam dicta sunt : qualitates autem ipsius humidi sunt, quæ faciunt ipsum aliquando facile siccabile, et aliquando difficile siccabile. Id autem quod facit ipsum difficile siccabile, est si fuerit multum subtile subtili terreo paucio subtiliter commixtum : tunc enim ubique erit cum ipso terreum tenens ipsum ne evaporet. Et quia ipsum est subtile ubique intus vel extra terreum, et contrajacent hæc duo sicut ansæ catenarum. Tale autem humidum cum multum fuerit, non egrediens, tamen proportionem complexionis, diutissime tenet calorem, et diu perficit nutritionem, et diu durabit antequam siccet. Si autem paucum fuerit, vincet super ipsum calidum, et incendet ipsum, et post convertet animatum in maciem,

deinde siccabit secundum totum. Ex dictis autem patet, quod omne nutrimentum necesse est esse actu humidum, eo quod aliter sequeretur primo, quod radicali humido quod sibi dat virtutem nutrimenti, non esset simile. Adhuc autem nisi esset actu humidum, non reciperet figuras et formas membrorum quæ nutriuntur. Amplius autem cum omne nutrimentum terminari debeat ad formam alienam, quæ est ejus quod nutritur, oportet ipsum esse in actu humidum : quia hoc male determinabile est in seipso, et bene movetur ad terminum alienum. Est tamen humidum a sicco bene passum, sicut jam dictum est superius. Et quia humidum currere oportet ad membrum per similitudinem qua movetur magnes ad ferrum, et quælibet res ad locum ubi est suum generans, et ideo oportet in actu esse humidum, quamvis forte potentia sit siccum.


Et ideo duplex est in sensibilibus desiderium, fames scilicet et sitis¹. Fames quidem per se desiderium est restaurantis deperditum. Sitis autem est desiderium humidi, quod dat nutrimento facilem ad membra motum : quia quamdiu ad membra moveri potest, et calor membrorum potest illud convertere, tamdiu durat animatum. Signum hujusmodi est, quod periti medicorum per signa digestionis vigorem perpendunt naturæ, ex quo dicunt sanandos infirmos. Econtra autem in secundum naturam corruptis, sicut in senibus decrepitis propter debile calidum et siccatum humidum radicale quod erat in eis, parum vel nihil de cibo sumpto adducitur ad membra. Et ideo quasi continuum desiderium cibi est apud eos : emittitur enim cibus eorum indigestus : et ideo sunt multæ comestionis, et multi stercoris, et continui desiderii. Cibus enim eorum paucio calido elevari non potest, ut superius stomachi impleat et ad venas derivetur. Et ideo desiderium non

¹ Cf. II de Anima, tex. et comm. 28.

tollitur ab eis comedendi, nec tamen multum delectantur in cibis propter hoc, quod non penetrant interiora membrorum et linguæ. Eadem autem causa est quare melancholici non multum delectantur in cibis, et tamen sunt multæ comestitionis. Est autem hoc proportionabiliter in omnibus animatis propter eandem causam. Videmus enim in arboribus decrepitis ar-

ctari poros, unde sugunt fructus: et ideo imminui fructus eorum, et folia non esse lata et citius fluere: humidum enim inspissatum ex frigido et pori arctati impediunt penetrationem et assimilationem nutrimenti.

Hæc igitur a nobis de nutrimento et nutritio dicta sunt.



TRACTATUS II

DE NUTRIMENTO ET NUTRITO.

CAPUT I.

In quo differt et convenit cum nutrimento ?

Est autem idem subjecto nutritivum et augmentativum, sed esse non idem : quoniam nutrit in eo quod potentia est substantia membri : auget autem in eo quod potentia est quantum quantitate addente aliquid super quantitatem nutriti

et augmentati. In hoc enim differunt augmentum et nutrimentum. Cum enim substantia nutriti sit potentia non tantum caro, vel os, sed etiam quanta caro, vel quantum os, augmentem perficit quando fuerit actu quanta caro, et actu quantum os : per hoc enim addit aliquid quantitatis præexistenti in eo quod nutritur et augetur. Non enim potest esse materia physica sine quantitate, sicut ostendimus in libro *Physicorum* ¹. Quantitas tamen secundum quod subjicitur materia transmutationi secundum substantiam, est quantitas indeterminatarum dimensionum, et sub illis indeterminatis dimensionibus est materia nutrimenti : quoniam ipsa mutatur substantialiter a forma in formam. Hæ autem indeterminatæ dimensiones non efficiuntur determinatæ, nisi quando actu habet formam ad quam convertitur et mutatur. Non accipit autem formam quæ sit terminus suæ mutationis, nisi illam quæ est ejus quod nutritur præexistens in ipso : igitur non accipit

¹ I Physic. tract. III, cap. 11.

quantitatem determinatarum dimensionum, nisi illam quæ est ejus quod augetur præexistens in ipso. Sed quia omnis forma situatè existens in materia crescit crescente materia, ideo multiplicatis partibus materiæ sub forma quarum quælibet efficitur actu quanta, necesse est augeri eo, cui tale potentia quantum additur nutrimentum. Cum enim dicitur potentia quantum nutrire, non intelligitur ita potentia esse quantum, quod nullo modo sit quantum secundum actum.

Est enim materia physicorum corporum non subjecta motui et nutritioni, licet sit actu quanta : sed hoc quantum est indeterminatarum dimensionum, sicut diximus, et est potentia quantum divisibile dimensionibus, quantitatis ejus quod nutritur : et quia est indeterminatarum dimensionum, oportet quod divisibilitas ejus non sit determinabilis : quia nihil dividitur determinate, nisi quod habet dimensiones determinatas. Et ideo cum additur, licet addatur cuilibet secundum formam, crescit id quod augetur in duplum : quia additur in quantitate aliqua determinata : sed potius in additione accipit quantitatem determinatam quæ ejus est cui additur : divisum enim nutrimentum additur, et additur partibus divisim ejus quod nutritur secundum formam minimis quibuslibet : et licet secundum formam non sit minus, et ita videtur minimum nutrimenti esse æquale minimo nutriti, et ita cuilibet tantum addi quantum est ipsa, et ex hoc omne augmentum crescere in duplum : quoniam duplum causatur a duobus æqualibus, quarum utrumque est dimidium. Tamem hoc non sequitur propter causam jam inductam : quoniam in veritate divisum indeterminatarum dimensionum est in potentia habens determinatas dimensionis ejus quod nutritur. Et ideo aliquando fortis

nihil omnino auget quando advenit, et aliquando auget : quoniam in *Physicis*¹ determinatum est, quod si aliquid augetur ad cubiti mensuram in uno anno, non oportet quod continue in horis anni et momentis proportionaliter secundum tempus augetur. Solvinius autem istam quæstionem in libro *Peri geneseos*² : sed hæc solutio concordat cum illa, licet subtilius indagata et magis explanata.

Sed objiciunt quidam dicentes, quod si augens penetret in id quod augetur, tunc oportet quod duo corpora sint in eodem loco, quod est impossibile. Nos autem ad hoc in aliis libris respondimus, et ostendimus omne id quod nutritur et augetur, esse porosum et quasi spongiosum : et ideo in concavitatibus ejus nutrimentum contineri. Habet autem insuper in animalibus nutrimentum vias quæ venæ vocantur, vel ea quæ sunt loco venarum in animalibus non habentibus venas, a quarum extremitatibus resudat ad nutrienda et augenda membra.

Habet autem quæstionem quare ante tempus mortis stat augmentum, et non tamen nutrimentum ? Cum enim materia nutrimenti sit semper potentia quanta, sicut potentia substantia ejus quod nutritur, videtur forte alicui semper debere facere augmentum, sicut semper facit nutrimentum. Sed ad hoc intelligendum, notandum est quod non omnis additio quanti facit augmentum prout augmentum est motus ad perfectam quantitatem animatorum : febricitantibus enim aliquibus vel aliter extenuatis restituitur pinguedo et quantitas : et non dicimus tamen eosdem augmentatos tali augmento quod diximus. Omne enim corpus, sicut in libro de *Anima*³ dixisse nos meminimus, habet tres diametros se ad rectos angulos secantes in ipso : quarum una quidem est mensura longitudinis, secun-

¹ VII Physic. tract. I, cap. 4.

² I de Generatione et Corruptione, tract. III, cap. 1 et 2.

³ II de Anima, tract., 1 cap. 11 et alibi.

da autem latitudinis, et tertia spissitudinis. Augmentum autem animatorum præcise secundum longitudinem determinatur, eo quod illud fit in partibus radicalibus proportionaliter. Augmentum autem secundum spissitudinem et latitudinem fit per totam vitam animatorum, et fit magis in supplementis, quæ sunt præcipue caro, et adeps, et illa sunt partes maxime in animatis secundum materiam determinate influentes et effluentes continue. Radicales autem magis sunt in ossibus, et arteriis, et nervis, et chordis, et ligamentis, et corde, et hepate, et pulmone, et cerebro, et testiculis, et aliis hujusmodi partibus, in quibus et per quas anima exercet vitæ operationes, sicut per organa : horum enim augmentum secundum longitudinem determinatur : et si crescit horum profunditas et latitudo, hoc est proportionaliter longitudini : quia aliter protracta longitudine, necesse esset ipsam extenuari et stringi secundum profundum et latum, sicut fit de corio quasi protracto : et tunc anima in eis vitæ operationes non exerceret. Augmenta autem quæ ista recipiunt proportionabiliter sunt et manentia per vitam, licet non continue augeatur, sed tempore juventutis.

Causam hujus alibi diximus. Fortissimi enim calor est extendere hujusmodi partes duras : oportet quod tunc extendantur, quando partes earum sunt humidæ. Et fit hoc sicut videmus in ferventibus metallis, quæ prolongantur ad partem ad quam ebullit calor fervidus humidi soluti in eis : et hoc modo fit in augmentatis, quoniam necdum exsiccatis et radicalibus propter hoc quod vicina sunt. Adhuc humido seminis unde procreata sunt calido, solvitur humidum quod in eis est : quod quia incorporatum est sicco, secum trahit siccum : et sic ambo simul calido bullienti extenduntur in longum, eo quod per longitudinem ejus in quo est, semper est motus calidi incorporati, licet calidum per se non incorporatum moveatur semper sursum. Hujusmodi autem rationem et causam in

Cælo et Mundo diximus : quoniam calidum incorporatum in motu suam propriam sequitur materiam et substantiam, sicut videmus flammam in cremabilibus aliquando moveri deorsum. Quamdiu igitur secundum naturam est movere calidum et hujusmodi extensibile et solubile humidum in organis, tamdiu durat augmentum secundum naturam. Hoc autem non semper fieri potest : quoniam calidum fervens continue educit aliquid de humido, et indurat et siccatur. Et ideo tempore determinato efficitur humidum radicale partium non solubile per calidum, sed tantum stat in sicco continuando ipsum : et cum diminuitur humidum, diminuitur etiam calidum, eo quod diminutum est ejus proprium subjectum : et tunc stat augmentum : et cum diu steterit, veniet in siccitatem magnam : et tunc non extenduntur, sed contrahuntur et incurvantur radicalia.

Et hæc est causa quare corpora senum sunt incurvata, et membra eorum quasi tepida. In aliis autem fit augmentum per totam personam et per totam vitam : quia talium augmenta magis fiunt calore debili quam forti. Calor quippe convertens et non consumens, multum addit de hujusmodi supplementis : et talis calor debilis quasi superfocatus est : propter quod pinguedo debilis calor est indicium. Augmentur autem plantæ frequenter plus quam animalia, quod contingit propter causam superius dictam, quod scilicet partes, quæ sunt quasi supplementa, quasi in nullo differunt a poris radicalibus : et ideo quamdiu pori non sunt obturati, et calor potest trahere, tamdiu augentur, et in supplementis non patiuntur maciem et amissionem, sicut animalia : eo quod omnia dura sunt et non facilis resolutionis.

Hæc igitur de augente cum his quæ in libris de *Anima* et *Peri geneseos* dicta sunt, generaliter et figuraliter dicta sunt.

CAPUT II.

Qualiter semen sumitur de superfluo nutrimenti ?

Quoniam autem generatio fit ex nutrimento secundum substantiam, licet alterum sit secundum esse, oportet considerare etiam de semine. Semen enim tam in plantis est quam in animalibus, et non invenitur nisi in animatis : propter quod illa sola de se sunt generantia. Alia autem generant species suas in materia aliena : oportet enim animati materiam esse præparatam operationibus animati et animæ : quia aliter non reciperet formam et substantiam quæ est anima. Cum enim, sicut in libris de *Anima*¹ diximus, et in *prima philosophia* probatur, anima agat et imprimat in corporum natura, etsic corporum natura est instrumentum animæ, non potest anima causari ab actionibus qualitatum activarum et passivarum corporalium, sicut causantur aliæ formæ. Propter quod reprehensibiles sunt harmoniam animam esse dicentes, vel aliquid ex qualitatibus corporum consequens. Oportet autem operationem animæ fieri semen animati, ut potentiam habeat ad animam : propter quod

oportet semen accipi de substantia nutrimenti, in quo actus et operationes et vires suas impressit anima. Declaratum enim est in scientia divina, quod ante omnem potentiam præcedit actus, non tamen in eodem : et ideo potentia animatum necessario habebit ante se actum animatum, quod contulit eidem hujus potentiam².

His igitur demonstrationibus oportet semen esse sumptum de nutrimento, quod sufficienter passum est ab anima. Non autem passum est sufficienter, quod non sufficienter assimilatum est. Et ideo ab ultimo digesto nutrimento oportet esse seminis decisionem antequam tamen corpori unia-tur. Hoc autem est quando quarta digestio completa est in ipso. Et ideo tradunt Peripatetici, quod semen est superfluitas quartæ digestionis a toto corpore decisa, et maxime a capite³ : a toto quidem corpore quod sit potentia totum et quodlibet membrum. A capite autem plus descendit, quam ab aliquo uno et singulari membro : propter hoc quod anima in ipso efficitur non ut actus primus corporis, sed ut artifex operans sibi habitaculum. Et quia in capite virtutes sunt, quibus animatum differt ab inanimato, hoc est, motus et sensus, ideo maxime a capite descendit. Signum autem hujus est, quod maxime operationes cerebri debilitantur ex multo coitu : eo quod venis quibusdam juxta tempora, quæ spermaticæ vocantur, abscissis, amplius non accidit spermatizare.

Sic autem resoluta a toto corpore semine, dicit Constantinus quod habet speciales venas duas per quas ad testiculos descendit, quæ fricatione coitus per calorem apertæ illud emittunt in coitu. Quod quidem non est verisimile. Quia enim necesse est a toto corpore decidi se-

¹ II de Anima, tract II, cap. 2.

² Cf. IX Metaphys. tract. IV, cap. 3.

³ Cf. de hoc XVI de Animalibus, tract. I, cap.

4, et alibi quæ dicit ipse D. Albertus Magnus, et ARISTOTELEM, I de Generatione animalium, cap. 17 et 18.

men, necesse esset has duas venas ad omnia membra terminari. Adhuc autem cum ortus venarum sit a corde vel ab hepate, oportet primo ad hæc membra spermatis esse redundantiam, et postea ad vasa seminaria distillare, quæ quidem convenientia experimentis esse non videntur. Et ideo verius est, quod per ipsam corporis spongiositatem distillet, et a testiculis attrahatur, sicut attrahit ventosa, et sicut trahitur nutrimentum ad membra, sicut tradit Aristoteles. Calore vero corporis excitato per coitum, pori aperiuntur ut descendat, quod cum descenderit, in ipsis testiculis virtutem formativam accipit, quæ sita est in eis, quæ virtus formativa est in calore et spiritu seminis, quæ retinetur in spermate per ipsam spermatis viscositatem. Hæc autem virtus formativa vocatur *anima spermatis* : eo quod ut anima operatur. Et huic est simile sicut si diceremus artem artificis esse in ipsis lignis et lapidibus, et per ipsam ligna et lapides moveri ad figuram domus sine operatione exteriori. Tunc enim artificem domus diceremus esse in lignis et lapidibus, et domum diceremus in eis effective domus fore quæ est figura lignorum et lapidum. Similiter autem dicitur virtus formativa, non quod sit anima proprie, sed quia est forma potens facere operationes animæ convertendo et formando. Quod enim non sit anima, ex his patet quæ in secundo de *Anima* ¹ tradidimus : quia anima non est nisi organici corporis et non ejus quod potentia est corpus organicum. Propter hanc autem virtutem Constantinus et Avicenna vocant sperma esse animatum.

Est autem differentia de spermate viri et fœminæ : quoniam sperma viri, ut dicit Constantinus, est sicut operatio et artifex et substantia radicalium membrorum. Sed sperma mulieris est sicut cibus assumptus in supplementum. Aristoteles

autem comparat hæc duo spermata coagulo et lacti, viri quidem sperma coagulo, mulieris lacti. Viri quidem enim sperma omnia facit, et mulieris sperma est in quo fit quod facit sperma viri : et sunt sicut sigillum et cera. Et ideo in virtute quidem viri sperma calidum est et siccum ut moveat et sigillet : mulieris autem sperma virtutem habet frigidi et humidi, ut recipiat ex humido, et teneat ex frigido.

Est autem in omnibus animalibus quidem masculus et fœmina præterquam in anguilla in qua adhuc discretio sexus non apparuit. Sed in animalibus quæ valde similia sunt in corporibus, ut pisces, et serpentes, virtus assimilativa nutrimenti habet virtutem formativam : et ideo talia non habent testiculos attrahentes semen. Nec oportet ipsum a toto corpore descendere : quia in illis quod simile est parti, simile est toti : eo quod totum et pars substantiæ ejusdem sunt naturæ. Et ideo in talibus lac quod loco spermatis est, non longe a loco primæ digestionis nutrimenti generatur, et per confrictionem emittitur, sicut patet in piscibus et vermibus et serpentibus. In plantis autem omnino nulla est discretio sexus, sed ubique imprægnant et imprægnantur ubique. Et hujusmodi causa est, quia ultimo animæ vegetabilis est generativa, et ab ipsa diffinitur. Et ideo virtus generativa talium non est tantum in semine, sed in radice et ramis : succus enim in talibus propter similitudinem corpori eorum ubique habet virtutem seminis : et ideo ubicumque est generationis principium, est in talibus multifaria generatio, sicut in his quæ de *Anima* ² sunt dictum est.

Quod autem sciendum est, præcipue est hoc, quod complexio et digestio seminis præcipue fit digestionem quæ est pempansis : eo quod illa fiat a naturali et proprio calore, et non elixando, vel as-

¹ II de Anima, tract. II, cap. 2.

² II de Anima, tract. I, cap. 3.

sando. Propter quod etiam semen proprio calore operatur et spiritu contento in ipso, sicut tradunt Aristoteles et Averroes et Avicenna. Propter quod mentitur Constantinus dicens ipsum operari a spiritu qui est in exteriori matricis : matrix enim non ad esse facit in conversione seminis, sed ad bene esse : quia est proprius locus in quo semen calescit.

Qualiter autem et quo instrumento operetur, ad scientiam pertinet libri de *Animalibus*, ubi de generatione animalium habet determinari. Sed hoc est sciendum hic, quod animalia quæ intrinsecus habent testiculos, sicut aves, et præcipue aves parvæ, sunt velocis coitus propter velocitatem trahentis et tracti. Animalia autem quæ extrinsecus habent, prolixioris sunt coitus propter illius oppositum.

Apparet igitur in omnibus animatis sperma generari a superfluo quartæ digestionis cibi, et sic nutrimentum esse spermatis materiam. Dicitur autem *a superfluo generari*, eo quod generatur a superfluo individui : et ideo quamdiu magno incremento indiget individuum, semen non descendit. Et hujusmodi signum est, quia animalia multi cibi multum desiderium habent ad coitum, sicut homo et equus et animalia parva, quæ proportionem suorum corporum multum accipiunt cibum, sicut passer, et perdix. Similiter autem et mus et vermes multum ponunt in semine.

Hæc igitur de nutrimento et nutrito secundum suum diversum esse, et secundum Peripateticos dicta sunt.



INDEX

Tractatum et Caputum in libro de Nutrimento et Nutribili.

TRACTATUS I.

De nutrimento et nutrito per se.

CAP.	I. Quæ sit libri intentio, et quid est nutrimentum?	33
	II. De modis eorum quæ nutriuntur.	326
	III. De modo nutriri et nutritionis.	329
	IV. Qua de causa nutriuntur ea quæ nutriuntur?	331
	V. Quamdiu nutritur animalium?	333

TRACTATUS II.

De nutrimento et nutrito.

CAP.	I. In quo differt et convenit cum nutrimento?	336
	II. Qualiter semen sumitur de superfluo nutrimenti?	339



D. ALBERTI MAGNI

RATISBONENSIS EPISCOPI, ORDINIS PRÆDICATORUM,

PARVA NATURALIA.

DE MORTE ET VITA.

TRACTATUS I

CAPUT I.

Et est DIGRESSIO declarans qualiter hic liber ad alios ordinatur, et de utilitate hujus scientiæ.

Probatum est in fine primi *Cæli et Mundi*, quod nulla virtus rei generatæ movet per tempus infinitum. Sunt autem absque dubio omnes illæ virtutes præci-

pue vegetabilium et sensibilibus, quæ sunt animata mortalia, virtutes generatorum. Ex quo relinquitur eas nullo modo movere per tempus infinitum: propter quod motus ipsarum est terminus secundum naturam, qui terminus est quando non potest moveri plus animatum ab anima. Et hic terminus est mors naturalis. Propter quod non sciuntur virtutes animæ in animato corpore, nisi sciatur ad quem terminum secundum naturam possint movere.

Oportet igitur nos post omnia prædicta in quibus de operibus communibus animæ et corporis egimus, et de statu et profectu secundum naturam et defectum virtutum in operando, adjungere hic librum hunc, in quo investigemus de morte animatorum. Sed quia nulla ratione de morte scientiam habere possu-

mus plenam, nisi sciamus de vita, quia privationes non agnoscuntur nisi per habitus, et mors est privatio vitæ, ideo etiam de vita oportet nos facere mentionem. Et quando illa scientia tradita fuerit, tunc omnia scientur opera et passionnes a quibus natura animæ et virtutes ejus dependent, exceptis his quæ concernunt honestum et inhonestum, de quibus oportet esse magnam philosophiam per se, quæ *moralis* vocatur, de qua hic modo nullam facimus mentionem.

Cum autem de vita quærimus et de morte secundum quod sunt mensuræ potentiae, qua potest anima movere corpus secundum naturam, oportet nos præcipue dare causas naturales longitudinis vitæ, et causas brevitatis vitæ eorum quæ vivunt : quia aliter non sciremus virtutem potentiae moventis, qua movere potest ipsum quod movetur secundum naturam. Sicut enim in *Cælo et Mundo*¹ ostendimus esse motorem virtutis infinitæ, qui ipsum quod movetur per se movere potest sine termino temporis secundum naturam : ita nunc quando pertractamus de eo quod movetur per se et est mortale, oportet nos ostendere rationem et proportionem motoris ad id quod movetur secundum quantitatem longitudinis, in qua secundum naturam movere potest : et postquam longitudinem corrupta proportione mobilis ad motorem, motum deficere est necesse.

Hæc igitur causa est quare hunc ultimum librum inter eos qui sunt de communibus animæ et corporis ponimus, licet pluribus conveniat mori et vivere, quam sentire et intelligere et moveri secundum locum.

Cum autem quærimus causas longitudinis vitæ et brevitatis, non faciemus aliquam indagacionem de causis per accidens longioris vitæ vel brevioris, nec

particulariter uni vivorum convenientes assignabimus, sed in communi omnibus vivis convenientes et per se : quia ex illis cognoscitur quantitas secundum quam anima potest movere corpus, et secundum quam corpus potest moveri ab anima.

CAPUT II.

Et est DIGRESSIO declarans essentialem diffinitionem vitæ, et explanationem ejusdem.

His ergo sic prælibatis, accipiamus ex probatis a nobis in *physicis libris*², quod vita est actus primus et essentialis et continuus animæ in corpus, non per modum somni, sed per modum vigiliæ existens ab anima in ipsum. Dico autem *actum* perfectionem quam *endelechiam* Græci vocant. Sicut enim cujuslibet essentialis formalis quæ dat esse et rationem ei in quo est, proprius et *primus actus* est esse quod dat ei cujus est forma : ita formæ determinatæ et specificatæ quæ ultima est et convertibilis, est dare determinatum et specificatum esse quod est ab ea essentialiter, sicut actus lucere essentialiter convenit luci. Cum ergo anima sit quædam formarum specificantium, sibi essentialiter convenit dare animato corpori specificatum et determi-

¹ II de Cælo et Mundo, tract. II, cap. 6.

² Scilicet in II de Anima, tract. I, cap. 2 et 3.

natum esse. Et hoc esse vocatur *vita* in viventibus : et ideo egregie dictum est, quod vivere viventibus est esse ¹.

Sensibilis autem anima cum dicat ulteriorem determinationem, etiam ulterius determinatum esse donat : et hoc est sentire, quod est quoddam vivere specificatum. Et sic sentire sentientibus est esse, et ulterius intelligere per eundem modum intelligentibus est esse. Propter quod Aristoteles bene dixit, cum dixit quod est solus intellectus. Quia nihil dat esse hominis in quantum est homo, nisi solus intellectus. Omnis enim forma dat esse in eo quod est forma, sive sit concepta cum materia, sive separata. Sed nobilior esse donat, et vicinior causæ primæ separata, quam concepta cum materia.

Et quia sic *essentialis* animæ *actus* est dare esse vitæ, propter hoc dicitur esse actus corporis organici physici potentia vitam habentis. Et sicut diximus de tota secundum se anima, ita est de potentiis in comparatione ad organa. Et ideo videre est esse oculi, sine quo non est nec vocatur oculus nisi æquivoce : et sic est in omnibus aliis animæ partibus. Hæc autem ex dictis alibi satis patent : quia jam habemus quod est actus esse essentialis et ante hoc esse nihil omnino est dare, et post ipsum est virtus et operatio, et quidquid aliorum convenit ei quod sic est per formam, constat quod est actus primus. Et cum non sit animæ per aliquam quaecumque potentiam ejus conveniens, sed secundum omne genus animæ, et secundum quamlibet partem ejus, oportet quod sit essentialis.

Cum autem et alii actus sint quidam essentialis, sicut imaginari, et nutrire, et hujusmodi, quæ non per accidens ali-quod conveniunt animæ, eo quod anima a natura in hoc differt, quod essentialiter facit multa, et hi tamen actus non sunt

continui uno modo existentes, sed interceptantur quiete somni propter laborem qui est in eis. Et ideo in descriptione vitæ ponitur, quod est *actus continuus*.

Quia vero et ipsa est actus continuus sicut forma, vita autem est actus, sicut esse illius formæ in eo quod est per formas, quod quidem esse nihil aliud est nisi diffusio qua se diffundit forma in eo cui dat esse, ideo additur *animæ in corpus*. Et sicut lux, lumen, et lucere, eandem naturam nominant, differenter tamen, quia lux nominat eam secundum se, et lumen diffusam in luminoso, sive in luminato, et lucere nominat ejus essentialis agere : ita anima, vita et vivere, dicunt unam naturam : sed anima nominat secundum se hanc, et vita diffusionem ipsius in eo quod est animatum, et vivere dicit ejus essentialis actum : quia anima non est quidam actus, sed semper diffusa in vivo. Sed anima non diffinitur secundum se, sed potius ut vita quædam, quando dicitur quod est endelechia ejus quod potentia vivit. Melius tamen dicitur, quod est hujus vitæ causa vel principium, sicut in secundo de *Anima* ² disputatum est.

Ex his patet, quod *non est per modum somni, sed per modum vigiliæ existens ab anima in corpus*. Et ideo dixerunt quidam, quod vivere est fieri quoddam, sicut et lucere. Quod quidem dictum licet non per omnia sit verum, tamen habet aliquam verisimilitudinem. Dico autem *non per omnia verum esse* : sicut enim dictum est ante, idem est vivere quod animæ diffusio in vivo : non enim seorsum quidem est anima, et seorsum vita : sed vita est ipsa anima diffusa in eo quod vivit et in toto et in partibus, sicut prius diximus : quia si oculus esset animal, visus esset anima ejus. Habet tamen similitudinem in operibus vitæ quocumque modo exerceantur : quia illa

Lux, lumen
et lucere,
quomodo
conveniunt ?

Animatum,
et vivere
quomodo
dicunt unam
naturam.

¹ II de Anima, tract. III, cap. 7.

² II de Anima, tract. II, cap. 2.

continue fluunt ab anima. Hujus autem vitæ, sicut in physicis demonstratum est, subjectum primum et proprium est cor, vel id quod est loco cordis in his quæ sunt animata¹: et ex ipso opera vitæ vehiculo spiritus vecta fluunt in totum corpus.

CAPUT III.

Et est DIGRESSIO declarans diffinitionem mortis, et ejus explanationem.

Mortis diffinitio.

Vita triplex. Prima.

Secunda.

Tertia.

Sic autem vita determinata, facile scietur quid est mors. Est enim mors hujus vitæ privatio ex corruptione proportionis, quæ est inter vivificans et vivificatum procedens. Vita enim secundum prius habita, licet non sit circa quædam separata, tamen implicite intelligitur in causa vitæ: sed hoc est in anima: et huic vitæ non opponitur mors. Et vita quæ est in fluxu ab anima ipsa: et nec huic vitæ directe opponitur mors: eo quod illa et magis est animæ quam corporis, sicut fluxus luminis plus est solis quam aeris recipientis. Et est tertia vira participata a corpore, adhærens ei sicut forma formato: et hæc est cui mors opponitur: hanc enim privat, et non aliam universaliter. Si enim quædam anima perit cum corpore, hoc tamen universaliter non convenit omni

animæ. Licet autem sic tripliciter varietur vitam, in hoc non est nisi secundum intellectum, et non secundum rem: quia secundum rem pro certo non est nisi una et eadem: et sic in quibusdam est corruptibilis secundum substantiam et actus suos quos habet in corpus. In quibusdam autem secundum actus tantum, et non secundum substantiam, sicut in hominibus. In quibusdam autem nec secundum actus, nec secundum substantiam, ut in celestibus, si illa secundum Peripateticorum et Stoicorum opinionem, animam habere dicantur. Quid autem sit vivere, vel quale animæ separatæ in seipsa, in hoc præsentis negotio nullo modo potest determinari: oportet enim de substantiis separatis cognoscere principia antequam aliquid certum ad hoc tradi possit. Ex his tamen quæ dicta sunt, scimus cui vitæ, vel potius in qua consideratione mors vitæ opponitur private, et in qua non.

Quod autem dicitur hæc *privatio* procedere ex *corruptione proportionis quæ est inter vivificans et vivificatum*, ideo dictum est, quod falso intelligitur ex omnibus quæ in VIII *Physicorum*² dicta sunt, quod inter omnem motorem et suum mobile est proportio quam habet motor ad mobile, et e converso mobile ad motorem. Qua salvata motor movet mobile, et mobile movetur a motore, et ea corrupta cessat movere motor. Et hæc proportio est in motore secundum aliquid, et in eo quod movetur secundum aliquid. Nauta enim navi plene præparata aliquando non movet: quia forte non concipit necessaria ad motum in animo suo, vel alia dispositione impeditur: et aliquando non est impedimentum in eo, sed in navi quæ corrupta est, vel non habilis: et tunc iterum non movet: et sic est inter animam et corpus, ex quo jam scimus quod animatum movet seipsum,

¹ Cf. Lib. XVI de Animalibus, tract. II, cap. 3.

² Vel melius in VII Physic. tract. II, cap. 6.

et movetur a seipso, et quod omne tale componitur ex motore et mobili. Tunc enim procul dubio non cessabit motus vitæ animæ in corpus, nisi corrupta proportione.

Scimus autem jam, quod vita essentialiter est ab anima in corpus. Essentia igitur animæ movente, non est impedimentum motus ex parte motoris, sed essentia de se movet eodem modo et in juvene et in sene. Quoniam jam scimus per ea quæ in libro de *Anima*¹ bene considerata sunt, quod si senex accipiat ocu-

lum juvenis, quod videbit sicut juvenis. Non ergo impeditur motus animati ex aliqua corruptione animæ. Oportet igitur quod corruptio tota hujus proportionis sit ex parte moti. Mors igitur erit, ut dictum est, privatio vitæ in corpore ex corruptione proportionis corporis prout est ab anima mobile, procedens et causata: et hoc est quod probare volumus.

Ulterius autem patet ex dictis, quod etiam causæ vitæ longioris et brevioris non ex parte animæ, sed ex parte corporis sunt inquirendæ.

¹ I de Anima, tract. II, cap. 9.

TRACTATUS II

DE CAUSIS LONGIORIS VITÆ ET BREVIORIS.

CAPUT I.

De quærendis in hoc negotio.

Considerandum est igitur de eo quod est esse quædam animata : alia scilicet longæ vitæ, sicut elephantes, et homines : alia vero brevis vitæ : quare scilicet hoc sit secundum naturam. Et non solum de animalium vita est hic considerandum, sed inquirendum est de tota universaliter vitæ longitudine et brevitate in omnibus animatis.

Principium autem istius intentionis est

sicut in omni scientia, quod prius exponamus de ipsis in communi, scilicet quid sit vivere, et quid corrumpi sive mori, et quot modis. Et quia commune debet esse univocum ad ea quæ sunt sub ipso, ideo primum determinemus de univocatione communitatis ipsius. Non enim manifestum est, utrum una et eadem sit causa omnibus animalibus et plantis omnibus, quod quædam eorum sunt longæ vitæ, et quædam brevis. Inter plantas enim quædam habent vitam brevem, sicut herbæ : quædam habent vitam multo tempore durantem, sicut quercus, et palma, et multæ aliæ arbores. Videtur enim forte alicui, quod sicut anima quæ est causa vitæ, et ipsa vita omnibus animatis, ab una in genere causa est vitæ et vivendi : ita una communis causa esse debet omnibus longæ vitæ vel brevis. E contra autem cum consideramus diversas esse complexionibus, vivorum, et ex complexionibus scimus causam longitudinis vivendi et brevitatis, videbitur non una esse causa vitæ longæ et brevis in omnibus, aut non uno modo se habens : et ideo hoc diximus non esse manifestum, sed potius dubium, vel ambiguum, eo

quod habet rationem ad utramque partem contradictionis.

Amplius autem dubium est, utrum eadem sint secundum substantiam et causam quæ sunt longæ vitæ, et quæ sunt secundum naturam sana, an sint diversa subjecto et causa, et ab alia parte, utrum sint eadem ægrotantia subjecto et causa cum his quæ sunt brevis vitæ? Hoc enim forte videtur alicui, cum vita sit in æqualitate complexionativum, et similiter sanitas corporis omnis non disponitur ad vitam. Et ad hæc quod ab anima moveatur nisi secundum æqualitatem complexionis, quia in illa franguntur excellentiæ contrariorum : et cum removetur ab harum excellentiis, acquirit ad cælum quamdam similitudinem. In mixto enim licet sint contraria secundum essentiam, non tamen sunt in excellentiis et actibus contrariorum. In eadem autem æqualitate videtur consistere sanitas : propter quod forte videtur alicui, quod essent eadem subjecto et causa sana cum longam vitam habentibus, et ægrotantia cum his quæ brevem vitam habent. Sed non tamen ratio hæc sufficiens est : et ideo dubium est an ægrotantia quædam ita immutant corpora, quod in quibusdam inducant brevem vitam, et quædam ita immutant quod inducant longiorem vitam : eo quod scimus quasdam ægrotantia esse purgativas complexionum et consumentes humores superfluos aptos putrefactioni, qui si non consumerentur, mortem procul dubio inducerent in brevi. Somnus autem et vigilia etiam breviant et elongant vitam : et ideo in libro de *Somno et Vigilia* diximus, quod semper homo debet esse medius inter somnum et vigiliam : ne aut nimis exsiccet et spiritibus destituatur, aut nimis humescat et infrigidetur. Sed de his dictum est prius. Sed etiam de ægrotantia et sanitate quantum confert scientiæ naturali, satis dictum est, ubi egimus de complexionibus in libro de *Natura locorum*.

Nunc autem in hoc libro speculandum est circa causas, quare hæc quidem ani-

mata sunt longæ vitæ, illa vero sunt vitæ brevioris. Si autem comparamus animata secundum has differentias, invenimus ea differre secundum quod comparantur tota genera quorundam ad tota genera aliorum, et similiter differre secundum has differentias ad invicem ea quæ sunt sub una et eadem specie quando ad invicem comparantur. Dico autem *secundum genus* quidem *differre*, sicut dicimus genus esse generationis principium. Nunc enim differt genere homo ad equum, et in genere loquendo, homo longioris vitæ est quam equus. In eadem autem specie differentia sunt sicut homo comparatus ad hominem : unus enim homo longæ vitæ est, et alter brevis secundum naturam. Cum tamen homines isti in aliis modis suæ communis speciei sint convenientes. Quidam enim homines qui sunt de numero degentium in calidis regionibus, sunt longioris vitæ, et alii ab his in complexionem qui in frigidis degunt regionibus sunt vitæ brevioris.

Hic autem sermo est Aristotelis, cui fere ab omnibus Peripateticis scientibus naturas contradicitur : quoniam aer calidæ regionis est calidus, et hic educit calorem naturalem continue, et aperit et lavat corpus. Calor autem eductus secum humidum trahit, et sic inducit putredinem, et exsiccationem, et mortem : propter quod nos etiam distinximus qualitates habitantium secundum modum, qui in libro de *Natura locorum* dictus est : propter quod locus frigidus et siccus sanior est : et longioris vitæ sunt in eo homines quam in loco calido, sive sit humidus, sive sit siccus. Sed si debet salvari quod dictum est, tunc oportet quod locus calidus intelligatur temperatus, sicut medium tempus veris inter hyemem et æstatem dicitur calidum et humidum. Tale autem calidum est calidum fovens, et non calidum educens calorem naturalem. Frigida autem regio dicitur, quæ respectu hujus mediæ est frigida, et hæc habet frigiditatem glaciale et congelantem humores, et exstinguentem calorem

Contra dicta Aristotelis.

Locus frigidus et siccus est sanior. Quomodo salvantur dicta Aristotelis?

naturalem, sicut hyems dicitur frigida : et tunc verum est quod hic dicitur. Et inde etiam habitantes in eodem loco communi, sicut homines ejusdem climatis habent longitudinem et brevitatem vitæ, si ad invicem comparentur. Sed de locorum et locatorum comparatione, sicut jam diximus, perfecte scitur ex scientia libri de *Natura locorum* quantum ad naturalem spectat doctrinam et universalem : particularia enim in his omnibus medicinæ relinquent.

CAPUT II.

De diversis modis quibus corrumpuntur diversa.

Quia vero mors est corruptio quædam, oportet nos determinare modos corruptionis primum, ut ex his sciamus causam mortis naturalis. Oportet enim causas quærere ex ipsis corruptibilibus et mortalibus : et has scire non possumus nisi corruptibile secundum quod corruptibile investigemus. Sic igitur oportet accipere primo quid proprie est corruptibile in rebus illis quæ naturaliter subsistunt, quia de numero illarum sunt ea quæ participant vita et morte.

Dicimus igitur ex his quæ in libro *Peri geneseos*¹ determinata sunt, quod corpora simplicia quæ sunt prima gene-

rabilium et corruptibilium, sicut ignis, et aqua, quæ in ambabus qualitatibus contraria sunt, et sicut his proxima in altera qualitate cum eis convenientia, quæ sunt aer, et terra, sunt primæ causæ generationis et corruptionis tamquam ea quæ non habent eandem potentiam ex qualitatibus activis et passivis, sed contrariam ad invicem. Similiter autem est unumquodque aliorum quod non est ejusdem facultatis sive potentiæ in agendo et patiando cum altero. Similia enim non agunt neque patiuntur, sed contraria : eo quod non est eis potentia una agendi. Et quia sic se habent ad invicem illa simplicia, rationabile est quod similiter constantia ex his participant naturam simplicium in causa generationis et corruptionis. Quia scilicet tam in simplicibus quam in compositis ex simplicibus primis contrarietatem habentibus, causetur corruptio ex actione et passione contrariorum : quamvis enim excellentiæ contrariorum in medio actu mixtionis fractæ sint, tamen adhuc manent essentiæ contrariorum in ipsis. Et ideo cum nihil ad æqualitatem arithmeticam misceri possit, ut alibi probatum est, ideo contingit aliquando vincere aliquod contrariorum, et inducere corruptionem in omnibus talibus commixtis. Hac igitur de causa tam simplicia elementa quam commixta ex eis, secundum naturam sunt corruptibilia.

Quæcumque autem sunt non commixtione, sed compositione constantia, in qua componentia secundum suas formas et qualitates salvantur, sicut domus, et alia artificiata, de omnibus talibus est altera ratio corruptionis tamquam de aliis ab his quæ natura existunt. Existentibus enim multis eorum quæ sunt, insunt propriæ corruptiones quæ non aliis conveniunt. Et ideo oportet illos modos corruptionis distinguere, antequam sciri possint causæ velocis aut tardæ corruptio-

¹ II de Generatione et Corruptione, tract. II, cap. 15.

nis. Talia autem sunt sicut scientia, sanitas, et ægritudo : quorum nihil corrumpitur ex communi causa corruptionis quæ causatur ex contrarietate elementorum, ut supra diximus. Hæc enim corrumpuntur aliquando etiam quamvis non corrumpantur subjecta in quibus sunt, quæ secundum alterationis mutationem suscipiunt ea. Licet enim subjecta sint ea salvantia in esse, sicut et cætera accidentia omnia salvantur in subjectis quæ suscipiunt ea, tamen aliquando corrumpuntur subjectis salvatis et manentibus, sicut ignorantia quæ est malæ dispositionis, quæ quidem qualitas corruptio quædam est.

Et est duplex ejus corruptio. Si enim ignorantia talis causata fuerit ex oblivione principiorum verorum, etiam acceptione contrariorum, tunc corrumpitur per reminiscibilitatem verorum principiorum. Si autem ignorantia hujusmodi causatur ex simplici acceptione, qua aliquis accipit contraria principia pro principiis, tunc corrumpitur docibilitate quæ fit per demonstrationem. Talis autem ignorantia est falsigraphia in geometria, et est similiter in aliis scientiis, licet forte non in omnibus sit nominata. Ignorantia autem quæ *nescientia* vocatur, et est pura negatio scientiæ, non habet contrarium, neque proprie corrumpitur, sed ipsa est in se corruptio quædam. Est igitur ista quæ dicta est, propria ignorantie corruptio, quæ non est alicujus aliorum entium.

Similiter autem scientiæ propria corruptio est oblivio principiorum, vel corruptio contra vera principia ex contrariis eorum contingens, sicut patet per ante dicta. Hæc autem talia licet proprias habeant corruptiones per sua contraria, cum etiam habent corruptiones, non sunt per se convenientes, sed per accidens : nec sunt eis propriæ, sed communes. Omnia enim quæ insunt subjectis ut accidentia, corrumpuntur una communi corruptione, eo quod talium corruptio consequitur ad físicas corruptiones sub-

jectorum. *Physicas* autem voco *corruptiones* quæ fiunt actione qualitatum elementalium, ut supra diximus. Quod autem consequatur corruptio accidentalium formarum ad físicas corruptiones subjectorum, patet ex hoc quod corruptis animalibus, corrumpuntur pariter doctrina et sanitas et accidentia cætera quæ sunt in ipsis ratione conjuncti. Et si salvatur aliquod accidentium, illius non fuit subjectum animal per se, sed corpus ejus tantum, non in quantum animatum, sed in quantum est corpus quantitatem habens.

CAPUT III.

De dubitatione quæ sequitur ex dictis circa corruptionem et incorruptionem.

Propter prædicta autem et de anima utique aliquis dubitando ratiocinari potest ex his quæ dicta sunt. Si enim anima non est secundum se existens præter corpus, sed potius est in corpore sicut forma materialis, et sicut scientia est in anima, sicut dicebant hi qui harmoniam quamdam omnem esse dicebant animam, tunc secundum prædicta oportet, quod quædam alteratio naturaliter propria et non per accidens sit sui corruptio, sicut est ignorantie et scientie, præter illam communem omnium formarum materialium corruptionem, qua corrumpitur anima secundum istam opinionem corrupto corpore.

Contra Ale-
xandrum.

Et hæc argumentatio est contra Alexandrum, qui dixit intellectum possibilem esse formam materialem elementa continentem, quam *reparationem* vocavit in materia vel in corpore: propter quod cum non videatur hujusmodi esse vera corruptio animæ præter subjecti corruptionem, tunc necessario sequitur, sive corruptibile sit, sine incorruptibile, quod aliter se habeat ad corporis communionem quam accidens se habet ad subjectum: aliter enim assignari oporteret propriam ipsius corruptionem. Et hæc corruptio non potest inveniri, cum circa animæ corruptionem fortasse aliquis considerans propriam animæ naturam et diffinitionem, rationabiliter potest dubitare, ad utramque partem contradictionis fortes inveniens rationes. Ex quo enim diffinitur ut perfectio corporis materialis, et talis perfectio educitur de materia, et non est nisi materia ipsa existente, licet non habeat proprium corrumpens, tamen non est cujus proprium esse sit incorruptibile esse.

Quæramus igitur, si ex hoc sequitur, quod ipsa sit corruptibilis? Sed statim occurrit, quod non utique proprie erit corruptibilis corruptione talium formarum, nisi proprie dicatur quod est aliquid contrarium. Et tu debes scire, quod si dicatur anima per se esse incorruptibilis, quod tunc sequitur quod habet virtutem ad esse infinitum et semper movendi: quod est contra ea quæ in primo *Cæli et Mundi*¹ non solum probata, sed etiam demonstrata sunt. Si autem dicatur, quod est corruptibilis per se, tunc sequitur quod habeat contrarium, sicut hic probatum est. Et hæc est necessitas hujus questionis: nos enim videmus quod quædam corrumpuntur, ideo quod substantiæ eorum contrariæ, aut ex contrariis sunt, sive sint simplicia, sive composita. Corrumpuntur autem ex eo quod

contingit contraria corrumpi ab invicem. Contraria enim ipsa quæ sunt activa et passiva, ab invicem auferuntur, et corrumpuntur ab invicem: sed secundum accidens communi corruptione corrumpuntur quæ sunt in substantiis contrariis, vel ex contrariis compositis. Et illis corruptis, necesse est et illa corrumpi quæ sicut accidentia sunt in ipsis. Sed substantiæ præcipue quæ sunt forma substantialis et substantia materialis, etiam composita secundum se intellecta, corruptionis habent modum: accidentium vero non habent ideo quod substantia his modis dicta de nullo subjecto tamquam accidens prædicatur. Propter quod etiam contrarium non habet. Si igitur non est ei aliquid contrarium, et in quocumque generum non est contrarium, impossibile est aliquid in illo genere corrumpi per se propria corruptione. Si enim verum est quod hic et in libro *Peri geneosos*² dictum est, quod omnis corruptio proprie et per se dicta est a contrario, impossibile est corrumpi aliquid talium quæ non habent contrarium. Hic autem in proposito de anima quod nunc quærimus, non est omnino contrarium, neque per se, neque per accidens: eo quod anima non est composita ex contrariis: neque etiam habet contrarium, aut ad minus non habet contrarium hoc quod per se est contrarium. Et sic ipsa videtur non esse corruptibilis.

Si enim est substantia per se existens et hoc aliquid, sicut dixit Plato, et Socrates, et multi alii Philosophi, tunc non habet contrarium secundum hoc quod sit composita ex contrariis. Si autem non est sic substantia composita ex contrariis et hoc aliquid et per se existens, tunc non habet contrarium hoc quod per se contrarium est, sicut scientia ignorantiae, et ægritudo sanitati. Et tunc sequitur ex dictis, ut videtur, quod nullo modo sit

Ratio ad
probandum
animam esse
incorrupti-
bilē.

¹ I de Cælo et Mundo, tract. II, cap. 4.

² I de Generatione et corruptione, tex. et com. 18.

corruptibilis per se et propria corruptione vel secundum accidens. Ex hoc autem sequitur, omnem animam esse immortalem et incorruptibilem. Et hoc quidem dixit Plato et Socrates et multi alii Philosophi.

Anima quomodo intelligitur habere contrarium?

Quæramus autem, utrum hoc quod modo dictum est de animæ incorruptibilitate, ut sit quidem uno modo verum, alio autem modo non verum. Anima enim uno modo habet contrarium per accidens ex eo quod subjectum factum est ex contrariis. Quæcumque enim anima est forma in materia, absque dubio corruptibilis est, subjecto suo corrupto, sicut est vegetabilis, et sensibilis. Anima autem quæ non est forma in materia, sed est separata, cum non habeat contrarium per se, neque sit in materia sicut forma materialis, absque ullo dubio neutro modo est corruptibilis.

Dico autem, quod quæcumque est forma in materia est corruptibilis : eo quod impossibile est habenti materiam (hoc modo quo in *physicis libris*¹ demonstratum est, quod materia est subjectum motus et mutationis) non esse contrarium per accidens, licet non per se. Mox enim quando nominatur potentia materialis quæ absque dubio est ad motum, oportet quod insit contrarium illi materiæ quæ possibilis et transmutabilis esse ponitur. Hoc patet ex hoc quod undique, hoc est, in omni materia calidum illud quod est corrumpens, eo quod habet contrarium, et est activum : et similiter quod rectum quod habet contrarium, et non est activum, semper inesse contingit alicui. Sed tamen vere demonstratum est passiones et accidentia non esse separabilia : hæc autem omnia plane disputativa sunt et determinata ante finem primi nostrorum *Physicorum*². Si igitur quodcumque inherens sic materiæ, sit activum et passi-

vum, tunc impossibile est subjectum illud non mutari. Omnis autem actio et passio magis factæ abjiciunt aliquid a substantia. Et si subjectum animæ sit compositum ex contrariis, sicut in scientia de *Anima* demonstratum est, tunc absque dubio ipsa corrumpitur subjecti sui corruptione : et ideo causas longitudinis vitæ et brevitatis ex parte subjecti quærimus : non enim potest esse quod unum contrariorum non semper agat, et alterum non semper patiatur.

Amplius si dicatur ex parte subjecti esse contrarium, oportet quod omnis forma quæ est in subjecto, habeat aliquid excellens in corporibus simplicibus : eo quod compositum ex contrariis recedit per mixtionem ab excellentia contrariorum. Hoc ergo sic supposito, necesse est excellere calidum, vel frigidum, humidum, vel siccum in subjecto aliquod simplicium quæ sunt extra subjectum. Superfluum autem sive excessum semper agit et facit in id quod excellitur : excellens enim sive superfluum est contrarium : quia medium comparatum extremo, contrarium est, sicut se habet tepidum ad frigidum, ut dictum est in *V Physicorum*³. Mutatio enim omnis est ex contrario in contrarium, et est mutatio ex tepido in fervidum. Superfluum autem voco excellens, quod est excellens a receptione priori ejusdem formæ magis remissæ prius acceptæ, sicut fuscum se habet ad album, et tepidum ad calidum.

Si autem omne quod est activum, alicui contrarium est, ut in *Physicis* probatum est, oportet ut omne tale sit utique corruptibile : et sic videbitur quædam anima et vita corruptibilis utique esse contrarietate subjecti, quæ et excellitur simplicium qualitate, et in se habet contrarium. Si autem dicatur quod

¹ Cf. I *Physic.* in fine, et I de Generatione et Corruptione, tex. et com. 24.

² Ubi supra.

³ V *Physic.* tract. II, cap. 2.

non corrumpitur a seipso quod in se non habet excellens contrarium propter mixturam quæ frangit excellentias contrariorum. Si dicatur corrumpi subjectum ab aere continente : si quidem erit sufficiens nostra ratio ex dictis accepta. Aer enim non corrumpit nisi excellat calidum, educendo naturale calidum et humidum cum ipso : et tunc habet contrarium. Si autem hoc non concedatur, quod ab excellenti corrumpitur continente : tunc oportet relinquere quodlibet aliquid contrarium in toto, sicut frigidum contrariatur calido non per modum excellentis tantum. Et cum sit superfluum sive excellens in virtute respectu ipsius, et vincit in ipso et corrumpit. Nihil enim corrumpit alterum, nisi excellat ipsum, sive sit ejusdem generis, sicut fervidum et tepidum, sive sit in toto contrarium, sicut calidum et frigidum. Et ideo minor flamma comburitur et consumitur a majori per excellentiam quam habet ad ipsam. Quia humidum quod pluri tempore nutrit parvam flammam, comburitur et consumitur a majori in brevi tempore, et ita absorbetur minor flamma. Et hæc est causa, quod omnia quæ sunt in quodam motu, fiunt et corrumpuntur etiam in quodam motu, et etiam in motu sunt, scilicet quoniam omnia naturalia habent contrarietatem, et quædam habent contrarietatem qua excellunt se. Quædam autem in toto contraria sunt, et cum hoc excellunt in virtute, continue agunt in ipsa, et illa continue patiuntur. Et hæc est causa, quod continue abbreviatur vita eorum et duratio, et tendunt continue ad corruptionem. Et ex hoc accipitur, quod anima in subjecto tali existens, licet neque in se sibi immixtum habeat contrarium, neque habeat contrarium extra se existens, tamen non semper vivificabit, propter causas supra dictas ex parte ejus quod vivificabitur, sicut patet ex prædictis.

Cum enim sic duplex subjectum animatorum habeat contrarium, excellens scilicet, et in toto contrarium, aer conti-

nens simul cum excellenti calido, agit si calidus est : aut e contrario agit si in toto habet qualitatem contrariam, et ita ad corruptionem juvat. Et hujusmodi signum est, quod transposita de locis frigidis in calido tempore quo frigidus est aer, et de locis calidis in frigido tempore, quo aer est calidus, ut sic fiat temperatio aeris, sunt in vivendo pluri temporis : aut etiam sunt minoris temporis, si tempore calido fiat transpositio in locum calidum, et tempore frigido in locum frigidum. Quibuscumque enim animatis contraria insunt, illis nequaquam est materiæ facultas in infinitum existendi et vivendi : materia enim cum sit subjectum transmutationis, mox nomine suo contrarium habet in seipsa. Et si mobilis est secundum ubi, habet contrarietatem in ubi acceptam. Si autem est mobilis secundum quantitatem, tunc habet contrarietatem secundum augmentum et decrementum, et est passibilis secundum passibiles qualitates : tunc erit aliquid contrarietatis alterans eam secundum contrarias qualitates.

Ex omnibus autem his est accipere, quod anima quæ est virtus in corpore, licet non sit ex contrariis, nec habeat contrarium secundum seipsam, est tamen forma corporis in se contrarietatem habentis : quam contrarietatem excellit aliquid simplicium quod est extra ipsam. Et ita corrumpitur corruptione contrarii in seipso et agente continente quod est extra ipsum. Propter quod et animam et vitam in animalibus et plantis corrumpi est necesse : propter quod tota causa brevis et longæ vitæ quærenda est in eo quod est subjectum animæ, et non in ipsa anima. Utrum autem omnis anima sic corrumpatur corruptione subjecti, alibi in parte est dictum, et iterum certitudinaliter in ipsa philosophia tractabitur, ubi de substantiis separatis faciemus mentionem.

CAPUT IV.

Et est DIGRESSIO declarans qualiter ex parte corporis et non animæ quærendæ sunt causæ brevioris vitæ et longioris?

Ad faciliorem autem intellectum omnium quæ dicta et dicenda sunt, oportet scire quod omne vivum participat calore vivifico: et si vivere debeat, oportet quod calor in ipso excellat: quia aliter non faceret humidi digestionem et terminationem. Fatuum enim est omnino quod quidam dicunt, omne animatum æqualiter ex elementis et elementorum qualitatibus misceri quoad commixtionem, et inæqualiter quoad complexionem. Hoc enim dictum est, quod intelligi et verificari nullo modo potest: quia in talibus non est commixtio nisi complexionis solum tam in toto quam in partibus, sicut ex diffinitione complexionis manifestum est. Sed de hoc locuti sumus in alio libro.

Oportet igitur, quod calidum domineatur et sit in agendo: et ideo illud excellens semper aliquid educit de humido. Cum autem juvatur a calore continentis aeris, tunc citius corrumpit. Et hæc est causa corruptionis et mortis corporum animatorum. Humidum autem cum sit

materia spiritus in animatis quæ sunt sensibilia, excellit post calorem. Et ideo molles sunt partes animalium principales, et molles sunt partes animalium cibi et potus: propter quod molles sunt partes earum exceptis his quæ quasi sunt corporis fundamenta, ut ossa. Dominatur ergo in his post calidum terminans et dirigens humidum. Siccum autem et frigidum, sicut alibi ostendimus, in omnibus sunt qualitates mortificativæ et præcipue frigidum: et ideo in nulla vivorum cum aliis adæquantur, sed potius alia sunt dantia substantiam. Sed tamen humidum est a sicco aliquid passum: quia aliter non cibaret neque constitueret substantiam carnis vel alterius membri quod est loco carnis. In plantis etiam dominantur: sed plus est in eis siccum et frigidum quam in animalibus: sed tamen non prævalent: propter quod in omni animato necesse est esse calidum terminans, et humidum terminatum, sicut patet ex his quæ in principio quarti *Meteororum*¹ dicta sunt de effectibus primarum qualitatuum activarum, et de his quæ de passivis qualitatibus sunt determinata in eodem.

Quod autem quidam dicunt quod hoc calidum cum sit excellens, non possit esse calidum ignis: quia si esset calidum ignis, consumeret substantiam, et destrueret alia contraria, et sic induceretur mors, omnino nullam habet veritatem. Et hujusmodi homines omnino ignorant quid dicere debeant: est enim hoc secundum Averroem, et Avicennam, et alios Peripateticos calidum ignis: aliter non congregaret homogenia, et separaret heterogenia, sicut ostensum est in secundo *Meteororum*, si hoc calidum ignis non est excellens, sicut in elemento simplici, sed est proportionatum humido et complexionali, et est animæ instrumentum, et habet in se virtutem cœlestem. Et ideo

¹ IV Meteororum, tract. I, cap. 2 et 3.

licet continue consumat et desiccet de humido, et tandem in toto finiat ipsum, tamen non statim consumit, sed paulatim, sicut infra dicitur. Et ideo non in anima, sed in corpore quærenda est causa vitæ longioris et brevioris. In quibuscumque autem dominatur frigidum et siccum, in his est nulla omnino vita. Et ideo in illis non quæritur causa longioris vitæ et brevioris.

Utrum autem anima corruptibilis est, vel non, alterius est negotii. Sed quod hic induximus de ipsa, ideo factum est, ut perscrutaremur utrumne aliqua causa vitæ longioris vel brevioris quærenda esset in ipsa, sicut dictum est etiam prius.

CAPUT V.

Quæ non possunt esse per se causa universaliter longæ vitæ?

Cum autem non quamlibet causam vitæ longioris et brevioris inquiremus hic, sed causam per se et universalem in omnibus, planum est quod magnitudo corporis vivorum non est causa quare sint incorruptibilia sive longioris vitæ quam minora corpora sive parva. Equus enim qui major est multo quantitate corporis quam homo, tamen brevioris vitæ est secundum naturam quam homo. Proverbio enim dicitur, quod « tres vitæ canis faciunt vitam equi, et tres vitæ equi faciunt vitam hominis. » Per eandem autem rationem neque parvitas est causa

Prover-
bium.

generalis vitæ longioris viventibus: quia multa animalia parva valde, quæ annulosa vel rugosa dicuntur, sunt vitæ peridealialis quæ est citra annum. Quædam enim eorum sunt in vere tantum apparentia tempore quo mollia et tenera sunt folia plantarum et statim resolvuntur. Quod non fieret si parvitas per se causa esset generalis longæ vitæ.

Neque iterum plantarum vivere quod est esse duri corporis et sicci, non est causa longæ vitæ per se et generaliter: quia multæ plantarum non habent periodum unius anni, sed citra annum resolvuntur, cum multa animalia mollia habentia corpora vivant multis annis.

Neque iterum sanguinem habere secundum se est causa longæ vitæ per se et universaliter. Apes enim quæ sanguinem non habent, vitæ sunt longioris quam multa sanguinem habentia.

Neque iterum sanguine carere per se et universaliter est causa longæ vitæ. Multa enim sanguine carentia, sunt valde debilis vitæ, et quasi stupida, et periodus vitæ eorum finitur citra annum.

Neque iterum illa quæ simul sunt viva et sensitiva, scilicet habentia super vitam vegetabilem sensum, et cum hoc pedibus gradientia existentia, sunt propter hoc longæ vitæ. Quædam enim plantæ unum istorum tantum habentia, sunt longioris vitæ quam multa animalia quæ simul tria inducta habent.

Neque iterum esse aquatica vel marina est causa longioris vitæ. In mari enim multa sunt ostrea debilis vitæ, et conchilia quæ in conchis habitant, quæ sunt multo brevioris vitæ multis in mari non existentibus sive aquaticis.

Universaliter autem loquendo ut in pluribus in plantis inveniuntur quædam longioris vitæ quam in animalibus. Et similiter ut in pluribus quædam inveniuntur longioris vitæ esse in his quæ sanguinem habent, quam in his quæ sanguinem non habent. Et similiter in eis quæ pede gressibilia sunt, inveniuntur quædam longioris vitæ ut in pluribus,

quam sint non gradientia pede, sicut sunt volantia, vel natantia, vel repentia, sicut homo et elephas longioris vitæ sunt multis volatilibus, natatilibus, et reptilibus. Sic autem iterum ut in pluribus majora longioris vitæ sunt quam minora. Accidit enim longitudo vitæ ex eadem causa in animalibus magnitudinem habentibus, ex qua accidit longitudo vitæ in prædictis, scilicet homine et elephante. Causam enim de his omnibus ab hoc sive ab his quæ statim dicentur, utique aliquis sufficienter considerabit : non enim quærimus causam per accidens, sed per se universalem in omnibus vivis, sicut inferius patebit.

CAPUT VI.

Et est DIGRESSIO declarans calidum et humidum secundum quod sunt principia vitæ.

Nos autem ad eorum quæ dicta sunt et quæ dicentur intelligentiam, oportet hic digredi parum, et determinare causas vitæ. Ex prius ergo habitis habemus, quod omne vivum abundat calido et humido super frigidum et siccum, et præcipue id quod vivit vita animalis. Hoc enim habet duplex calidum intraneum, quorum utrumque habet in se triplicem virtutem. Unde quoddam est calidum

originale quod est in ipso semine : et cum membra fiunt ex semine, est per omnia membra transfusum. Alterum autem est quod jam formato et consistente corpore transfunditur a corde principaliter, et per consequens ab hepate, et tertio a testiculis in totum corpus. Et illud quidem quod a corde est, influentiam habet ad formandum omne aliud calidum, sive sit originale, sive sit a cæteris membris.

Quodlibet autem istorum calidorum triplicem habet virtutem : habet enim principaliter virtutem sui motoris qui est anima, sicut alibi explanatum est : et quoad hoc operatur ad operationem vitæ. In quantum autem est calidum complexionale, coaccedit ad aliquam cœli conformationem, et sic habet in se, ut dicit Aristoteles, virtutem cœlestem, et sic agit ad consistentiam et continentiam substantiæ. Sicut omnis virtus cœlestis facit constitui et in esse contineri substantias mixtas et generatas, quæ remotæ sunt ab excellentia contrarietatis quæ est in simplicibus elementis. In quantum autem est calidum assimilans, ex contrajacentibus passionibus nutrimentum dissimile convertens et digerens et complens, sic est calidum ignis, sicut clare demonstratur in principio quarti *Meteororum*¹. Hi ergo sunt calores vivifici animatorum, et per dictas virtutes operantes.

Humor autem qui est subjectum et pabulum hujus calidi, principaliter quidem est duplex, seminalis scilicet, qui constituitur ex tribus humoribus, seminis scilicet maris, et seminis fœminæ, et sanguinis menstrui. Sed in his semen masculinum est operatorium et factivum : fœminium autem factum et operatum : et humor sanguinis menstrui est assumptus in supplementum et augmentum. Ex isto igitur humore sic confecto

¹ IV Meteororum, tract. 1, cap. 2.

formatur radicalia membra, in quibus infunditur anima, et diffunditur in eis, ut mediante ipso retineant mollitiem et cibum, et recipiunt per hujusmodi nutritionem cum nutrimentali humido. Secundum autem humidum est nutrimentale: et hoc est duplex: plene assimilatum, et non plene assimilatum, quod tamen in membris et ad membra tractum est. Hoc autem est restaurativum et augmentativum humidi radicalis. Est autem utrumque istorum humidorum aereum et aliquantulum pingue, non quidem sicut adeps pinguis, sed potius sicut humor ex carnibus assis vel elixis ebullentia, quæ non ebulliunt ex aqua superflua, sed ex ipso carnis humido: hæc enim sunt albam pinguedinem non inflammabilem habentia. Horum igitur humorum primum est caloris supra dicti subjectum in quo salvatur. Secundum autem et tertium sunt caloris prædicti pabulum. Et primum quidem est pabulum conveniens. Et secundum est pabulum aliquantulum inconueniens et dissimile.

Hujus autem dat Avicenna validum exemplum et conveniens in lampade quæ est plena oleo, in qua est licinium ardens. In illa enim lampade triplex est humidum: unum quidem quod continet flammam cum licinio, et hoc est quod est quasi ignis materia, et subjectum ex licinio continue eductum in ignem per calorem ignis. Secundum est quod jam licinio imbibitum, quod quidem est jam sufficienter igni præparatum, sed nondum ab igne attractum in ignis materiam: et hoc est quod primo humido est assimilatum sufficienter. Tertium autem est id quod est licinio in tota capacitate lampadis transfusum, quod calor neque adhuc calefacit neque attraxit in licinium: et ideo non est assimilatum adhuc, sed est assimilandum in proximo. Primum autem istorum humidorum est simile illi radicali humido in quo sicut in subjecto proprio hæret calor naturalis, qui dispersus est

in membris radicalibus, ex calore seminali procreatus. Secundum autem simile est illi parti nutrimentalis humidi, quod jam assimilatum est in membris ad cibum imbibitum et attractum. Tertium est simile illi quod nondum plene assimilatum est, sed est adhuc transfusum membris in vasis nutrimento deservientibus, quod tamen per calorem digestivum in continuo tempore assimilatur.

Est autem ex omnibus his, quæ in aliis libris dicta sunt, planum, quod cum calor naturalis agat congregando homogenium sibi, et separando heterogenium, quod calor continue humidum in quo est, depascit: et ideo secundum humidum datum est in succursum primi humidi. In duobus enim sunt auxilium: quorum unum est, quod miscendo se primo humido impedit calorem, ne tantum agat in primum quantum faceret si secundum sibi mixtum non esset. Secundum autem est, quod mixtum ei restaurat id quod jam deperditum est ex ipso propter calorem consumentem. Tertium autem secundo fert auxilium in uno, scilicet in hoc quod attractum assimilatur sibi, et subintrat loco ejus in membris, quod ultimum transivit in restaurationem primi humidi. Secundum autem et tertium habent auxilium et juvamentum speciale in eo quod de hoc non sic restaurat deperditum, sed est ultimum hoc etiam in membris: et de ipso nutriuntur membra et augmentantur in tempore augmenti, sicut alibi diximus.

Oportet autem humidum sicut materiam proportionatum esse calido sicut formæ agentis. Est enim formaliter et ad formam membrorum agens calidum propter tres virtutes quas diximus sibi inesse ex anima, et cælo, et igne. Proportio autem hæc est, ut quidem vincatur et apprehendatur et convertatur humidum a calido, quod vocatur terminatio et complexio humidi in IV *Meteororum*¹: non autem sic quod consumatur et accenda-

¹ IV *Meteororum*, tract. 1, cap. 4.

tur. Et hanc proportionem corrumpit calidum duobus modis. Uno quidem cum materia, alio autem sine materia. Cum materia quidem, quando aliqua est in corpore intensa quæ sui calore incendit cor, et cor incensum æstum efflat super cætera membra : et fit calor immoderatus, qui consumit humidum, sicut est in febribus putridis : et tunc oportet medicos peritos studere, ut aut materia illa educatur, aut aliter consumatur. Sine materia autem corrumpit proportionem, quando non est aliqua materia in corpore mala, sed tantum excedit in qualitate caloris vel in remissione. Et tunc studere oportet non ad educendum, sed ad alterandum solum, ut reducatur ad æqualitatem quæ complexioni viventis debetur.

Hæc autem eadem proportio corrumpitur, et hoc dupliciter, scilicet quantitate et qualitate. Sed utrumque istorum est cum materia et sine materia. Quantitate autem sine materia corrumpitur, quando humidum qualitate quidem est conveniens et non est in materia aliena, sed in humido quod competit corpori ipsius viventis, sed est nimium : et tunc nisi succurratur, nimietate sua suffocat colorem naturalem, sicut flamma lampadis suffocatur per nimium sibi superfusum oleum. Et tunc oportet juvare per desiccantia aliquantulum. Si autem præter hoc fuerit per diminutionem quantitatis solius et sine materia desiccante, tunc oportet studere ad humectantia paulatim, ne calor non habens materiam evanescat, sicut ignis lampadis quando deficit oleum. Si autem peccat in qualitate sine materia, tunc quidem materia est quæ convenit : quia illud peccatum semper est ex debilitate caloris non convertentis. Si autem accidit aliquando, tunc oportet studere per alterantia ipsum et reducenda ad qualitatem debitam, quæcumque sit illa.

Duo tamen sunt frequentius impedientia, scilicet quia aut aquosum est quod est calido in duobus qualitatibus

oppositum et exstinguit ipsum. Et tunc studium occurrens est per desiccantia calida : aut est forte nimis inflammabile sicut pinguedo sulphuris, et non sicut pinguedo carnis, de qua supra diximus, et tunc statim spirat per calidum : et tunc oportet quod occurratur per auferentia ab eo tale pingue. Et hæc sunt acuta separantia duo pinguia, quæ sunt in ipso, illud scilicet quod est commiscibile substantiæ sine vehementi et subita inflammatione, et illud quod superenatat illi quod facile inflammat et exspirat. Quando autem peccat ex materia admixta, quæcumque est illa, oportet quod educatur per aliquam purgationem.

Causæ autem horum omnium peccatorum in calido et humido sunt valde multiplices. Aliquando ex membris quidem corporis existentis : aliquando autem ex locis, vel temporibus, vel exercitiis, aut cibis et potibus, aut ex accidentibus animæ quæ sunt gaudium, et tristitia, et hujusmodi : sed de his in medicina intenditur, et non spectat ad scientiam universalem naturalem.

Hæc igitur duo in statu existentia sunt duo principia vitæ. Frigidum autem et siccum sunt quidem cum his principia commixtionis et complexionis et humorum, sed nullo modo sunt principia vitæ. Siccum enim in viventibus non est nisi sicut materia tantum, qua non indiget nisi ut terminetur humidum, et figuram recipiat, et teneat, et statum fortitudinis habeat corpus. Frigidum autem per se qualitas mortificativa est, ut alibi diximus, et juvamen suum est in aliqua retentione humidi, ne nimis calefactum occurrat : et in aliquo temperamento calidi, ne fervidum existens nimis incenderet. Agendo igitur et patiendo proprie vitæ principium et causæ sunt calidum et humidum dictis modis ad invicem terminata et proportionata.

CAPUT VII.

Et est DIGRESSIO declarans, quod spiritus non est causa longioris vitæ per se : et quibus modis calidum et humidum sunt causæ longioris vitæ et brevioris ?

Sunt autem quidam qui principium tertium vitæ spiritum esse dicunt : eo quod vident hunc esse vitæ et operationum instrumentum, et virtutis quasi portitorem, sicut diximus in libro de *Spiritu et inspiratione* : et dicebant hunc esse principium vitæ et longioris et brevioris vitæ causam. Quoniam hic aliquando est paucus, aliquando vero multus, aliquando autem grossus, aliquando subtilis ultra æqualitatem debitæ complexionis. Et quando quidem est paucus, tunc debilitate abbreviat vitam, sicut est in melancholicis. Quando autem multus, tunc exsufflando exstinguit calorem, sicut ventus exstinguit lampadem. Quando autem grossus, tunc impedit operationes virtutum vitalium et naturalium, et præcipue animalium. Et quando est nimis exilis, tunc de facili exspirat, et mortem inducit.

Et licet hoc verum sit quod dicunt, tamen secundum rei veritatem, et secundum Aristotelis sublilem intellectum, spiritus nequaquam est principium vitæ, neque etiam longioris aut brevioris vitæ causa, nisi per accidens : cujus probatio est quod supra diximus, quod spiritus

materialiter generatur ex humido, et active generatur ex calido naturali. Et ideo paucitas et multitudo spiritus, similiter autem et cæteræ dispositiones ejus sunt causatæ aut ex calido, aut ex humido, aut ex utroque. Et ideo causa prima et per se vitæ in calido est et humido, et non in spiritu.

Scire etiam oportet, quod calidum et humidum, de quibus dictum est, sunt causæ longioris vite et brevioris secundum naturam. Et est mensura vitæ secundum quantitatem virtutis calidi in humidum, et e converso secundum quantitatem virtutis humidi in calidum. Quanto enim tempore calidum valet subsistere in humido non consumpto, neque aliter depravato secundum naturam, et quanto humidum deduci potest et converti a calido, tanto tempore secundum naturam durat vita calidi, aut virtus in humido : et mensura virtutis ejus attenditur in multis : sed tria sunt potissima, quantitas scilicet et qualitas ipsius calidi, et qualitas membrorum in quibus operatur. Sæpe enim optimus artifex deficit in opere propter corruptionem vasorum in quibus operatur. Vasa enim alterantur continue et corrumpuntur : et ideo non pervenit intentum opus in qualitate et bonitate in qua intenditur. Et sic est de calido naturali, quod procul dubio propter continuitatem temporis remittitur : et ipsa vasa in quibus est, per multam ipsius actionem sæpe divisa et assata alterantur, et ad priores dispositiones siccitatis et frigiditatis : et tunc etiam si calidum insit, non permittit effectus nobiles operationum ejus producere, et sic ducitur ad terminum virtutis suæ. Ostendunt autem hæc senectus et senium, ad quæ deducitur initium, quæ sunt signa proxima terminationis ejus.

Similiter etiam humidum, licet sit multis modis causa longioris vitæ et brevioris, quos modos considerat medicus, tamen tres sunt principales, scilicet ex quantitate, qualitate ipsius, ex dispositione vasorum in quibus decoquitur et com-

pletur : quoniam quantitas ipsius impedit calidum, et est quod calidum vincere non possit : et tunc relinquitur frigidum non assilatum, et remanet circa locum digestionis constans tantum, et facit phlegmaticam pinguedinem, in qua tandem suffocatur calidum : cujus signum est, quod omnes excellenter pingues et ventrosi multum moriuntur subito, suffocato calido a quantitate calidi humidi. Minor autem quantitas ipsius non sufficienter pabulat calidum radicale humidum consumendo inducit maciem, et consumptionem, et mortem. Et hujus signum est, quod omnes macilenti secundum plurimum moriuntur calore peracuto consumente substantiam. Qualitate autem causat vel longam vel brevem vitam per modum supra dictum. Vasa enim corrupta corrumpunt humidum quod in ipsis decoquitur, sicut senium et vetustas omnium aliorum. Et ideo humidum fit viscosum membris extrinsecus adhærens et non nutriens. Et ideo tunc calor modicus intraneus evanescit : et hujus signum est, quod senes omnes tali abundant humore in sputis et excreationibus, et abundant multo stercore liquido, propter indigestionem, et frequenter moriuntur immediate post cibi sumptionem, quando multum senes efficiuntur : eo quod superfluo et indigesto nutrimentali humido operatur et exstinguitur in eis modicum calidum.

Hæc autem quæ dicta sunt probant, quod primum humidum radicale nunquam accipit restaurum per omnia simile, et præcipue in senibus. Et ideo succedunt sibi ætates in his qui vivunt et sic post calidum humidum, calidum siccum, et post hoc frigidum siccum, et tandem intus siccum et extra alienam humiditatem in senio putrescente. Hæc etiam est causa, quare non amara est mors senum, cum calidum pungens in eis sit quasi nullum : et quod est, est ab alieno humido suffocatum, et ideo impotens ad pungendum, et membra sunt jam quasi putrida et insensibilia. Hæc igitur sint dicta ad intelle-

ctum eorum quæ supra inducta sunt. Scimus enim ex dictis causam longioris vitæ et brevioris non in anima esse quærendam, sed in corpore. Inter ea autem quæ sunt in corporibus vivorum, non esse quærenda nisi in calido et humido, et non in spiritibus, vel in sicco, vel frigido, nisi per accidens, sicut diximus.

CAPUT VIII.

De probatione quod calidum et humidum sunt causa longioris vitæ per se.

Redeamus igitur ad dicta Aristotelis, quæ per omnia nobis bene intellecta concordant. Dicamus igitur, quod primum oportet accipere, quod animal naturaliter est calidum et humidum, et quod hæc sunt principia vitæ ejus, et proportionally est hæc in omnibus viventibus. Vivere enim in omnibus est in calido et humido. Et ideo contrarium ejus quod est senium, est siccum intus et frigidum, et ideo moribundum cui non succurritur per auxilium medicinæ. Tale enim videmus oculis nostris in omnibus viventibus esse senium. In omnibus autem animalibus et vivis universaliter corporum compositorum videntur esse quidem calidum et humidum et frigidum et siccum ad æqualitatem complexionatorum reducta diversis modis. Et quia senium siccum est per naturam et frigidum, tunc necesse est siccare senescens omne, cum in aliis præcedentibus ætatibus eductum sit humidum, cum quo et exspiravit calidum. Si ergo

debeat differri senium et prolongari vita, oportet quod humidum quod est vitæ causa et principium, sit tale, quod non ex levi causa siccet per epotationem calidi.

Oportet igitur habere pinguedinem talem qualem supra diximus. Hæc enim imputribilior est, et minus educitur per calidum propter duas causas : quarum una est viscositas : et ideo non est elixabile oleum, ut diximus in IV *Meteororum*¹ : quia humidum ejus non est facile separabile a sicco ipsius. Secunda autem est, quia tale humidum fertur ad circumferentiam sicut calidum : et ideo sequens calidum semper retinet ipsum. Et hæc est causa, quod pingua minus putrescunt quam alii liquores. Causa autem est, ut diximus : quia humidum illud est aeris fluens extra seipsum. Aer autem respectu inferiorum in motu suo est ignis. Ignis autem non est sicut aer vel aliquod elementum respectu alicujus : quoniam ignis est simpliciter levis et activus : et ideo gravis esse non potest respective ad aliud.

Neque iterum oportet esse minus paucum humidum naturale vel nutrimentale : quia paucum non sufficienter restaurat deperditum, et non sufficienter pabulat calidum, et insufficiens est nutrire membra. Et tunc siccat et breviatur vita. Et hæc est causa quod omnino ratio dicit, quod in pluribus verum est, quod animalia magni corporis et similiter plantæ magnorum corporum longius vivunt, sicut diximus supra. Est enim rationale, quod majora corpora plus habeant humidum, quod in tantam quantitatem extendit calidum : et sic in eis est utrumque vitæ principium in abundantia causa virtutis utriusque.

Neque tamen sequitur ex hoc quod semper longioris vitæ sunt quæ relinquuntur sive supponuntur esse multæ hu-

miditatis. Verbi gratia, si quæ sunt plurimæ humiditatis secundum quantitatem humoris, non sunt longioris vitæ : propter hoc quoniam si excellant secundum humoris qualitatem solum. Si enim excellant secundum quantitatem, remitteret primo calidum, et tandem suffocabit, sicut supra dictum est : quia remisso calido crescit humidum et opprimit calidum. Similiter autem excellens humidum secundum qualitatem, frigidum scilicet et aquosum, exstinguit calidum : eo quod non est cibus ejus, sed contrarium. Et ideo neutro modo excellens humidum est causa longioris vitæ, sed per accidentia dicta inducit et accelerat mortem. Convenit autem quibusdam viventibus calidum pingue non inflammabile. Et hoc pingue similiter duo facit, quod scilicet non contingit ipsum cito siccati propter viscositatem ipsius, et quod non contingit ipsum cito frigere, propter hoc quod aereum est, et ex natura calidum, et quia est subiectum caloris. Quibusdam vero convenit ex corruptione complexionis habere quendam humorem alterum ab isto, et contrarium isti. Et forte convenit quibusdam ex natura tam in animalibus quam in plantis : et ille humor est aquosus frigidus.

Iterum autem oportet, quod humidum quod est causa longioris vitæ, sit firmum sive constans secundum proprietates supradictas, et quod non sit leviter corruptibile, et quod non sit superfluum innatum, scilicet facile putrescens et corruptibile, et quod non sit cito convertibile in ægritudinem aliquam per materiam putrescentem, quæ scilicet interimatur, et vincitur et exsiccat naturali calido.

Superfluitatis autem humidi potentia et virtus est contraria vitæ, et corruptiva naturæ aut in toto, aut forte in parte aliqua : et in illa breviatur vitam. Et hæc est causa, quod illa quæ sunt humiditatis superflue supereffuse quæ membris non

¹ IV Meteororum. tract. 1, cap. 22.

imbibitur propter sui impletionem, cito senescunt : quia talis humiditas cito putrescit et ducit ad mortem. Similiter autem de his quæ habent multa semina : semen enim est superfluum humidi. Similiter autem est quando semen amplius quam sustineri possit ejicitur per coitum vel infirmitatem desiccando abbreviat vitam. Et hæc est causa, quod muli sunt longioris vitæ quam equi vel asini ex quibus generantur : quia mulus parum vel nihil seminat, neque concipit. Et hæc est causa, quod gallinæ multum ovantes cito moriuntur, et similiter mulieres multum concipientes et parientes. Similiter autem fœminæ maribus ex hac causa efficiuntur longioris vitæ, si masculi in coitu excedant fœminas, ita quod fœminæ sint castæ et viri luxuriosi. Etiam hac de causa et castratus diutius vivit quam non castratus luxuriosus. Ex hac autem causa, quod passeret masculi citius moriuntur quam fœminæ : quia frequentius coeunt ad unam fœminæ conceptionem. Et ideo masculi passeret non vivunt ultra duos annos.

Amplius autem ex causa eadem breviant vitam quæcumque masculinorum animalium sunt nimis se fatigantia propter laborem et exercitium : hæc enim senescunt per calidum excellens quod educit humidum et evaporat cum ipso : et remanet corpus frigidum et siccum, et in hoc est senium. Labor enim excellens exsiccat, et senium est siccum, et ideo senium est effectus laboris. Oportet igitur tantum exercitari moderate, quod calor exsiccatum moveret et converteret humidum, et non intenderet et consumeret ipsum. Naturaliter autem loquendo in hominibus mares sunt longioris vitæ quam fœminæ, nisi per accidens aliquod exercitii vel luxuriæ et hujusmodi abbreviet eorum vitam.

Amplius autem alia causa est ejusdem, quia masculus in hominibus calidior est secundum naturam quam fœmina. Et ideo calor ejus sufficit terminare et complere humidum : sed in fœmina humidum suffocat calidum. Signum hujus est,

quia fœminæ sunt multi phlegmatis, quod ejiciunt per os et nares.

CAPUT IX.

De vita eorum quæ in calidis et frigidis degunt locis.

Ea autem quæ sunt in calidis locis quæ hoc modo calida sunt, sicut supra diximus, diutius vivunt quam ea quæ sunt in frigidis propter eandem causam quæ dicta est.

Calidum enim in his locis fovet et reducit humidum quod in frigidis locis congelatum et exspissatum exstinguit calidum. Si tamen animalia sint frigida secundum naturam, et sanguinem non habentia, tunc in calidis etiam locis et temperatis diutius vivunt, sicut in primo, secundo, et tertio climate : tamen in secundo minus, propter hoc quod ille locus est adustivus semel in anno. Sed tunc talia animalia sub terra habitant sicut etiam homines. Et propter eandem causam habent parva corpora naturaliter talia animalia, sed in dictis locis magnificantur : cum omne frigidum sit naturaliter parvum et breve : et hoc manifestum est, quod est ex natura loci magis quam ex natura ipsorum animalium. Et propter hoc serpentes et talpæ et ea quæ pelle varia sunt in ventre, quæ vocantur *stelliones*, et sunt frigidissima et sunt pigra animalia, et vespertiones, et omnia talia magna sunt supra modum suæ naturæ in calidis regionibus. Et similiter

ex eadem causa quæ sunt in mari Rubro quod natura calidum est, sicut indicat rubor ejus, sicut ea quæ vocatur *ostricodomata*, quæ figuram habent ostricolium in frigidis locis existentium, sed sunt minoris valde quantitatis : et sicut cocodrilli qui figuram lacertarum habentes, magna valde excedunt ea quantitate. Sed et ipsæ lacertæ talium locorum magnæ valde sunt et curti corporis respectu suæ grossitudinis. Hujus autem augmenti in corpore procul dubio causa est humiditas calida ex loco.

Et hæc eadem causa est eis longioris vitæ, præcipue cum hæc animalia in humidis conversantur locis : humidum enim quod est in talibus locis, est aquosum : cujus signum est, quod leviori causa corporis frigoris densatur, et etiam causa caloris elixantis quam humidum aereum quod est in aliis animalibus et in aliis locis. Hæc igitur etiam est causa, quod hæc omnia, maxime de numero istorum animalium, non generantur in locis septentrionalibus ultimis sub polo arctico positis, vel juxta polum sub circulo Ursæ minoris vel majoris. Neque gressibilia sunt ibi hujusmodi frigida animalia : neque etiam aquosa sive aquatica generantur istius generis in mari septentrionali. Hæc enim animalia quæ diximus, in locis et maribus septentrionalibus fiunt minora et brevioris vitæ. Gelu enim illorum locorum aufert eis augmentum constringendo, et aufert eis vitam congelando nimis et inspissando humidum. Cujus signum etiam est, quia quædam istorum animalium, sicut quidam serpentes, in locis illis non ovant : eo quod congelarentur ova eorum : sed concipiunt in utero sicut gressibilia, et complent in utero partum. Et compertum est hoc ab experimentatore nostri temporis, qui in mari Ionico baculo pressit serpentes parvos, et de ventre eorum

plures serpentes parvuli exierunt : quia tamen sunt stricti corporis valde, ideo frequenter rumpunt in partu : et ex hoc credit vulgus, quod juvenes morsibus perforarent uterum matris et exirent, cum tamen non sit verum. Propter difficultates in pariendo *viperas* vocaverunt.

Scias etiam, quod in maribus septentrionalibus sunt cete et balenæ et serpentes marini et alii pisces quam maximæ quantitatis existentes, et multo plus quam in maribus meridionalibus. Et hoc est ideo, quod talia animalia sanguinem habent, et aqueam pinguem valde humiditatem : et calidum quod est in eis retentum in ipsa humiditate, et ideo auget corpora eorum valde. Sunt tamen omnia talia sanguinem habentia, et ideo animalibus supra dictis dissimilia : et sunt hæc pilosa et magna ossa habentia. Quæ omnia indicia sunt magni caloris eorum, et retenti in humido, quod est augmenti materia. Sunt etiam plura eorum coeuntia et non ovantia : quod magni caloris est indicium et infallibile : et sapor etiam et calor carni eorum indicant ea esse calida et humida valde. Et ideo augentur multum : humidum enim eorum est dilatabile multum propter mixturam aqueitatis. Et calor eorum est non excellens potentiam humidi, sed potius convertendo et consumendo se habet ad ipsum. Et ideo dilatantur et crescunt valde, pauca consumpta in eis humiditate. Cujus signum est, quod frequenter inveniuntur dormiendo et pausantia ad humidi digestionem faciendam. Et inveniuntur multi adipis et abdominis corpora eorum. Et quæ omnia significant calorem non excellentem, qui non consumit aliquid, sed multum convertit. De natura autem talium calidorum et humidorum satis in libro *Meteororum* ¹ dictum est.

¹ IV Meteororum, tract. 1, cap. 4.

CAPUT X.

*De comparatione diversorum diutius
et brevius viventium*

Quæcumque autem viventium alimentum sufficiens non accipiunt, aut omnino nullum accipiunt, sive sint animalia sive plantæ, cito corrumpuntur : talia enim consumunt seipsa, quia calidum consumit humidum eorum. Sicut enim multa flamma consumit parvam escam in alimentum sui accipiendo et attrahendo, sic etiam calor præhabitus istorum consumit primum digerendo cibum digestum modicum qui consumptus est, et demum consumit etiam substantiam animalis ejus cujus est digestio illa, et naturam radicalis humidi in qua est sicut in subjecto. Est tamen in his magna differentia : quoniam quæcumque talium frigidioris humidi sunt et viscosioris et spissæ pellis et nutrimenti humidi et frigidi, per tempus sunt sine cibo, ut digerantur superfluitates quæ sunt in ipsis, sicut ursus, et ciconia, et hirundo, et cugulus, et hujusmodi. Et in eodem genere animalium sunt quædam aliis diutius sine cibo, sicut in hominibus fœmina quam masculus, et melancholicus diutius abstinet quam cholericus, cum tamen melancholicus sit vorax. Horum autem omnium causa est calor debilis et humiditas spissa et aquosa, quæ continue hausta crescit ad extinctionem calidi. Et ideo necesse est fieri interpolationem, et quie-

ti corpus dare totum, ut a calido digeratur et vincatur humidum. De his autem in libris *Animalium* prolixius tractabitur.

Ut in pluribus autem aquosa sunt brevioris vitæ quam pedibus ambulancia. Hoc autem non ideo fit quod aquosa sint magis istis humida, sed quoniam talia ut in pluribus aquosam habent humiditatem. Hujusmodi autem humidum velociter corrumpitur, non quidem in se putrescens, sed potius corrumpitur secundum quod erat complexionale : quia frigidum nimis inspissatur, et exstinguit calorem, et destruit complexionem. Eadem autem de causa ut in pluribus id quod est carens sanguine, est brevioris vitæ, nisi sit protensæ in corpore magnitudinis. Hæc enim habent calidum complens humidum, licet non consumat ipsum, sicut supra dictum est. Talia autem sanguine carentia ut in pluribus, neque pingue habent humidum, sed aquosum : neque habent ipsum dulce, quoniam dulce est calidum et humidum, et est conveniens nutrimento. Et ideo in sanguinem non habentibus pinguedo raro invenitur. In animali enim pinguedo humidi dulcedo est, quæ indicat convenientiam nutrimenti : pinguis enim sapor proximus est dulci, ut in libro de *Sensu et sensato* diximus. Propter quod apes longioris vitæ sunt aliis animalibus sanguine carentibus : humor enim dulcis qui est nutrimentum ipsarum, indicat in eis calor actionem in humido nutrimentali.

Sed et in plantis est aliquod genus plantarum, quæ longius vivunt et magis quam animalia. Et hoc est propter plures causas. Primum quidem contingit hoc ideo, quia plantæ sunt minus aquosæ secundum actum, et ideo magis duræ. Et ideo non cito densatur humidum earum : et ideo etiam cremabilia sunt ligna plantarum propter humidum æreum quod est in ipsis. Postea autem est alia causa : quia habent humorem pinguem et dulcem per calorem naturalem et solis decoctum, qui non leviter est exsiccatus, præcipue cum sint sicca terrea,

ex quorum partibus non potest fieri de facili evaporatio, propter duritiam et constantiam ipsarum. Animalia autem in compositione habent partes molles, quæ de facili evaporant : et habent humidum magis aqueum, quod de facili exsiccabile est et evaporativum : et per consequens oportet esse infrigidabile calidum. Et cessante utroque principio vitæ, deficit ipsa vita tota : propter quod diutius vivunt plantæ quædam magnæ et duræ quam animalia.

CAPUT XI.

De causa longioris vitæ arborum.

De eo autem quod multo tempore contingit esse et durare arborum naturam non comparatione facta ad animalia, sed in seipsis, oportet nunc aggredi dicere causam naturalem. Hanc autem causam arborum sumemus ex eo quod plantæ habent proprium, quando ad animalia comparantur. Non enim contingit animalibus, sed solum plantis, nisi forte commune sit incisis animalibus quæ rugosa vel annulosa vocantur, ut sæpe diximus.

Causa igitur quam ex hoc proprie plantis convenire sumimus, est quod ideo multo tempore plantæ sunt in esse et vita durantes : quia sunt semper novæ ad

quas juvenus earum redit, sicut diximus in libro de *Ætatibus* ¹. In plantis enim in omnibus partibus suis sunt continue alteræ novæ productiones, ita quod radix radicem, et stipes stipitem, et ramus producit ramum. Et iterum radix stipitem, et stipes radicem, et utrumque horum ramos, et sic de aliis, ita quod semper novum exit de veteri : et ideo non senescunt. Rami autem plantarum in hac virtute radicibus similes sunt : eo quod vis et natura pullulativa est in eis, et in radice, et in stipite, et in ramis. Non autem simul fiunt hujusmodi productiones novorum, sed successive uno senescente alterum productum pullulat ex illa, et sic successive se planta totam renovat, et totam abjicit vetustatem. Cum enim productio est per pullulationem, tunc rami novi primo producuntur : et cum isti senescunt, alteri germinant renovati ex ipsis. Cum autem sic faciunt et generant sibi organa, tunc etiam novæ radices fiunt pullulantes ex eo quod est jam vetus. Et sic plantæ semper proficiunt ad dies juventutis earum : sed una pars vetus est tota et abjecta et arefacta tota. Altera vero pullulans est tota nova et juvenis facta. Et causa est similitudo corporis et naturæ arborum, ut diximus in libro de *Ætate*.

Hæc igitur est causa longioris vitæ arborum multarum : plantæ enim quantum ad similitudinem corporis comparantur animalibus decisis, sicut dictum est. Illa enim actu decisa et divisa vivunt, et ex uno fiunt per divisionem vel duo vel multa, secundum quod partes facit divisio ex eis. Et omnes partes vivunt et sentiunt et moventur secundum locum. Sed in hoc differentia est, quod annulosa similia decisa et divisa non perveniunt nisi ad hoc quod vivere contingit partibus abscissis, et non salvantur in esse : multo enim tempore salvari non

¹ Cf. superius, Lib. de *Ætate*, sive de Juven-

tute et Senectute, tract. II, cap. 1.

possunt in vita. Hæc enim decisa in partibus divisis neque organa habent salvantia, ut os, et cor, et digestionem operantia : neque etiam principium vitæ quod est in ipsis, organa talia producere potest per pullulationem ex partibus decisæ factam in unaquaque partium dividendum, sicut determinatum est in fine primi de *Anima*¹. Sed decisio facta in planta, potest producere organa salvantia ex qualibet parte propter majorum arborum similitudinem, quam fit in corporibus animalium. Planta enim undique in suis partibus potentia pullulationis habet in se radicem et germen et granum seminale ex quo pullulat. Et ideo ab hac virtute pullulandi provenit semper in qualibet parte unum novum, et aliud vetus : et vetus quidem siccatum cadit, novum autem viret et germinat et tenet vitam plantæ. Et est quidem planta secundum totum eadem, secundum partes autem diversa. De hoc tamen subtilius in libro de *Plantis*² disputabitur.

Istæ igitur differentiæ sunt viventium diu et breviter. Et paucæ et parum inveniuntur aliæ differentiæ, quibus differant ea quæ semper iterant juventutem, et quæ sunt vitæ longioris præter eas quæ a nobis hic tractatæ sunt. Et ideo sufficit quod nunc de ipsis dictum est in communi : et in speciali enim de vita viventis scietur ex libris *Plantarum* et *Animalium*. Sed unum solum videbitur esse in prædictis adjiciendum, quod scilicet inquiramus de mensura vitæ viventium, et quæ sit comparatio mensuræ vitæ istius ad illam quam determinavimus in fine secundi de *Generatione et Corruptione*.

CAPUT XII.

Et est DIGRESSIO declarans mensuram vitæ, et in quo differt mensura vitæ a periodo ?

Dico igitur, quod longitudo vitæ uniuscujusque vivi ex virtute activi super passivum ejusdem vitæ principium accipienda est. Oportet enim in omni vivo excellere calidum, et esse operativum et activum et formativum terminativum sive completivum. Quemadmodum calidum quod est in semine, operatur et agit et format similia, et terminat humidum ad species homogeniorum membrorum, et ex operatione illorum complet animatum corpus, ita procul dubio calor qui vocatur physicus, omnia prædicta facit in utroque humido superinducto. Sicut autem humidum menstrui non est formabile, nisi misceatur humido seminali in animalibus, cui est humidum pluviale in plantis proportionabile : ita etiam humidum nutrimentale non efficitur formabile et terminabile, nisi per assimilationem ad humidum radicale, et penetrationem in ipsum.

Consideratur igitur quantitas virtutis caloris physici ex quatuor, scilicet ex subjecto in quo est, et ex virtute cœlesti, et ex virtute elementi ignis, et ex

¹ I de Anima. tract. II, cap. 18.

² Tom. X. Lib. I de Vegetabilibus et Plantis, tract. I, cap. 13 et 14.

virtute animæ : et consideratur proportio istarum virtutum inter se, quod scilicet virtus animæ apprehensam teneat cœlestem, sicut motor vincendo tenet suum instrumentum quod non divertit ab operationibus artis suæ. Et iterum, quod cœlestis apprehensam teneat eam quæ est elementi, quod non nisi sub ipsa et ea influente operetur : et subjectum ejus neque sit excedens in quantitate virtutem talis actionis, neque sit in qualitate contraria repugnans. Et quanta est proportio talis potentiæ ad sic agendum, tanta est procul dubio vita viventis secundum naturam. Hujus autem signum est, quod medicorum sapientes dicunt, quod magnitudo capitis cum parvitate colli et aliorum vicinorum membrorum parvitatem signat materiæ humidi quæ formari poterat a quantitate virtutis nisi defecisset. E contra autem magnitudo colli et aliorum membrorum cum parvitate corporis signat debilitatem virtutis et materiam abundare super virtutem. Proportio autem utriusque significat utriusque proportionem. Hæc igitur vitæ mensura est per se.

Quotiescumque autem hæc qualitas actionis impeditur ex quantitate vel qualitate humidi, toties brevitur vita per materiam proprie loquendo, et non per agentis debilitatem. Si autem brevitur vita per cibum vel exercitium vel aliquod aliud accidens, tunc abbreviatur per accidens, et sunt multa accidentia variantia ipsum : sicut etiam diximus de periodo quam multa variant et corrumpunt et non sinunt ordinabiliter finire secundum quod virtus cœlestis tali generato influxa exigeret, ita quod contingit et hic proportionem istam agentis ad patiens multis accidentibus ex confusione materiæ corporis, et læsione, et aliis impediri, quod ad terminum debitum vita viventis concludi non possit.

Hæc autem mensura vitæ sic accepta est illa quæ per modum lineæ rectæ protrahitur per gradum ætatum usque ad decrepitem senium et delirum quod est ultimum vitæ. Et in hoc a periodo differt : Quid sit periodus? periodus enim est mensura cœlestis quæ completur in vita, juvantibus eam cœlestibus per circuli virtutem et eorum quæ in circulo sunt siderum. Et ideo illæ virtutes continue influuntur generato ex ortu et occasu siderum continue super vitam stillantium ad juvandum vel infirmandum virtutem primam cœli quæ influxa est nato in casu primi seminis : et hoc quod expletur per circulum, *periodus* vocatur. Hæc autem mensura quæ hic determinata est, eo quod est mensura virtutis agentis in suum subjectum, procedit diminuendo et restaurando, et aliquando plus addit quam diminuat, sicut in ætate prima. Aliquando autem æqualiter, sicut in ætate secunda. Aliquando autem plus diminuit quam addit, sicut in ætate tertia et quarta. Et sic patet, quod secundum motum augmenti et diminutionis de contrario vadit ad contrarium. Similiter autem observat viam de contrario ad contrarium in materia sua quæ est humidum : quoniam illa sub ipso primo est calida et humida in ætate prima, et post calida et sicca in ætate secunda, et tandem frigida et sicca in tertia, et in fine ætatum erit frigida et humida destituta. Motus autem qui est de contrario ad contrarium, scimus quod omnis talis motus est rectus per demonstrata in *Physicis* ¹.

Si autem intelligere volumus quæ dicta sunt, scimus ex prima parte hujus libri ², et ultima parte libri de *Cælo et Mundo*, quod vita secundum quod est actus animæ quæ est motor corruptibilis et generabilis substantiæ, mensuratur mensura finita. Sed non habemus ex hoc, utrum mensuretur circulari vel recto. Ex

¹ VIII Physic. tract. III, cap. 8.

² Cf. superius, tract. I, cap. 2.

eo autem quod ostensum est in fine secundi *Peri genesios* ¹, scimus quod mensuratur periodo.

Ex his autem quæ dicta sunt hic, scimus quod mensuratur recto sibi aliquo adæquato. Et si conferamus hæc ad ea quæ dicta sunt de calore physico in proportione ad humidi potentiam, ita dicemus, quod calor prout habet virtutem animæ, est finitæ potentia, et non semper movebit et formabit humidum. In quantum autem habet virtutem cœlestem, habet virtutes circuli et eorum quæ in circulo continentur et oriuntur,

et occidunt, et accedunt et recedunt. In quantum autem est calor elementi, est alterativus et conversivus, et augmentativus et diminutivus, et mensuratur recto : et mensura quædam removens infinitatem, virtutem suam influit circulo. Et circulus vires suas influit lineæ rectæ. Et sic proprie mensura accipitur ætatis et vitæ, exclusis eis quæ impediunt ex confusione materiæ, et ex multitudine accidentium quæ sunt infinita.

Hæc igitur de causa brevioris vitæ et longioris dicta sufficiant.

¹ II de Generatione et Corruptione, tract. III, cap. 3.

INDEX

Tractatum et Caputum in libro de Morte et Vita.

TRACTATUS I.

- CAP. I. Et est DIGRESSIO declarans qualiter hic liber ad alios ordinatur, et de utilitate hujus scientiæ? 345
- II. Et est DIGRESSIO declarans essentialem diffinitionem vitæ, et explanationem ejusdem. 346
- III. Et est DIGRESSIO declarans diffinitionem mortis, et ejus explanationem. 348

TRACTATUS II.

De causis longioris vitæ et brevioris.

- CAP. I. De quærendis in hoc negotio. 350
- II. De diversis modis quibus corrumpuntur diversa. 352
- III. De dubitatione quæ sequitur ex dictis circa cor-

ruptionem et incorruptionem. 353

- IV. Et est DIGRESSIO declarans qualiter ex parte corporis et non animæ quærendæ sunt causæ brevioris vitæ et longioris. 357

- V. Quæ non possunt esse per se causa universaliter longæ vitæ? 358

- VI. Et est DIGRESSIO declarans calidum et humidum secundum quod sunt principia vitæ. 359

- VII. Et est DIGRESSIO declarans quod spiritus non est causa longioris vitæ per se: et quibus modis calidum et humidum sunt causæ longioris vitæ et brevioris? 362

- VIII. De probatione quod calidum et humidum sunt causa longioris vitæ per se. 363

- IX. De vita eorum quæ in calidis et frigidis degunt locis. 365

- X. De comparatione diversorum diutius et brevius viventium. 367

- XI. De causa longioris vitæ arborum. 368

- XII. Et est DIGRESSIO declarans mensuram vitæ, et in quo differt mensura vitæ a periodo? 369



D. ALBERTI MAGNI,

RATISBONENSIS EPISCOPI, ORDINIS PRÆDICATORUM,

PARVA NATURALIA,

LIBER

DE NATURA ET ORIGINE

ANIMÆ.

MONASTICAT DU SACRE-COEUR
LIBRET, SASK

TRACTATUS I

DE NATURA ANIMÆ IN CORPORE.

CAPUT I.

De tribus propositionibus super quas fundatur inquisitio de animæ generatione, et quæ inquire debeant de anima?

De anima quidem secundum quod est perfectio corporis, et de partibus ejus se-

cundum quas est actus corporis, et de intellectu secundum quem nullius partis corporis est actus, similiter autem et de passionibus animæ et corpori communibus jam in libris de *Anima et operationibus animæ* determinatum est a nobis. De natura autem animæ et substantia secundum seipsam et partibus ejus quas secundum seipsam habet, et de passionibus ejus, et operationibus, et statu, quæ conveniunt ei secundum seipsam, in hoc libro est investigandum.

Intentio auctoris.

Quæremus autem de anima tria, generationem videlicet, et substantiam ipsam sive naturam, et de permanentia, utrum sit perpetua vel corruptibilis: et si est incorruptibilis, quis sit ejus status secundum

Prima conclusio.

dum naturam absque corpore, et quod sit ejus opus proprium. Quæcumque autem jam in multis libris naturalibus a nobis disputata sunt de anima, supponamus hic, et utamur eis tamquam probatis, ne ultra modum evagari cogamur si singula repetere et probare vellemus, quæ satis perspecta ratione in aliis libris sunt discussa.

Secunda conclusio.

Probatio secundæ conclusionis.

Incipientes igitur a generatione animæ accipiamus propositionem quam sæpe probavimus, scilicet quod omne opus naturæ est opus intelligentiæ. In omni autem opere quod intelligentia motum corporis exercet, necesse est actum corporis esse rectum et informatum forma intelligentiæ corpus illud moventis. Et est exemplum ejus tam in natura quam in artibus: quoniam in physicis calor naturalis motus ab anima, movet ad formam vitæ hoc quod digerit et alterat, et vita non est forma caloris, sed animæ. Similiter etiam videmus in arte quæ imitatur naturam: dolabrum enim movet ad formam domus trigonæ vel heptangulæ, vel alterius figuræ, quæ non est forma dolabri, sed animæ architectonici qui fabricavit domum. Igitur omne opus naturæ est ab aliqua forma illius intelligentiæ quæ primus et universalis motor est in tota natura.

Tertia conclusio.

Forma autem quæ inducitur a movente composita de necessitate est in gradu triplici: quædam enim est propinquior materiæ, et quædam propinquior motori et efficienti, et quædam est per æquidistantiam sive per aliquam medii rationem inter utrumque istarum.

Verificatio tertiæ conclusionis.

Et hujus exemplum est in naturis et in artibus. Cum enim spiritus et calor naturalis sint absque dubio corpora digesta et mota ab anima, ea quæ fiunt ab eis, aliqua sunt sequentia plus materiam in qua sunt, sicut forma ossis, quæ nullum sensum accipit, et similiter forma chordæ et ligamenti: et aliqua sunt juxta animam, sicut est imaginari et recordari et æstimare per spiritum et formas animales quæ sunt in ipso: quædam autem sunt

quasi mediæ inter utrasque, sicut est forma nervi et carnis, quæ sentire accipiunt materialiter et non in absentia rei sensibilis, sed præsentialiter.

Similiter autem in artibus videmus quædam operata quæ secundum se nullius omnino sunt proprietatis animæ quæ operatur ea, sed potius mechanice deserviunt et ancillantur universalibus servilibus ad necessitatem hujus materialis vitæ ordinatis: et hæc vocantur ab antiquis Græcis sapientibus *apotelesmata*, et artes ipsæ vocantur *mechanicæ*, animam quæ gignit eas adulterantes et ad materiam trahentes, sicut est dolabrum quod secundum se nihil omnino habet desiderii vel pulchritudinis animæ, sed applicatur ad usum domus, qui est operimentum a frigore et caumate, necessitati hujus materialis vitæ providens. Quædam autem faciunt ea quæ licet sint in materia, pulchritudinem tamen et libertatem animæ ingerunt: et ideo *liberalia* dicuntur et *artes liberales*, eo quod ipsa volumus sui causa, etiamsi nihil omnino utilitatis habent adjunctum: sicut enim sonus harmonicus in cantum musicis instrumentis, sicut est nigella, cithara, et tibia, et his similia. Quædam autem sunt quasi media horum quæ deserviunt quidem mechanice, sed inducunt libertatem, sicut est militia, et pugillatoria, et sagittatoria, et hujusmodi, in quibus usus est apotelesmatum operatorum a mechanicis: sed exercitium inducit libertatem patriæ et reipublicæ statum, et virtutis et felicitatis fructum: quæ propter se volumus etiamsi nihil omnino alterius nobis utilitatis cum his accrescat.

Probatio ejusdem in arte.

Sic igitur in totius mundi productione quædam erunt formæ juxta intelligentiam vel intellectum moventem, quædam autem juxta materiam in qua sunt, et quædam mediæ per diversam medii ad alterum extremorum propinquitatem.

Amplius quandocumque inducuntur formæ in materiam per actum qui est intelligere corpus moventis, nulla omnino forma inducitur in materiam, quæ non

sit in lumine intelligentiæ. Et huic exemplum est in formis artium, quæ omnes prius existunt in intellectu pratico artificis, qui causa est omnium artificiorum : quia aliter non esset finis intentionis in operante primo : et si careret fine quem in opere sibi præstituere deberet, sequeretur error in opere, nec attingeret finem nisi casu : et hoc non potest esse, sicut probatum est a nobis in secundo *Physicorum* ¹. Est autem omnino idem de naturalibus formis : propter quod æterni natura forma est finis.

Colligendo igitur dicimus, quod omnis forma naturæ est forma inducta ab intelligentia, quæ primus naturæ motor est. Neque est differentia utrum per multa, aut pauca, aut unum medium inducatur : sicut etiam in formis artis non est differentia quoad hoc quod sit forma artificis, utrum per unum instrumentum, aut plura, sicut per media inducatur forma, quæ inducta differentias habet secundum propinquitatem et materiam, et secundum affinitatem ad motorem, et secundum mediam distantiam et propinquitatem ad utrumque : ita tamen quod omnis forma quæ inducitur, sit in lumine intellectus ipsius qui primo movet in natura.

CAPUT II.

Qualiter colligitur natura formarum et diversitas secundum propositiones præ-inductas secundum Platonem, Pythagoram, Aristotelem, et Democritum?

Ex hac igitur et hujus consideratione <sup>Platonico-
rum opinio.</sup> Platonici dederunt duas formarum differentias, quarum una est ante rem, quæ est sicut rei exemplar et paradigma, quæ est forma intellectus moventis in natura, quæ forma est universaliter et materialiter et simpliciter præhabens omnes formarum differentias, quæ secundum materiæ diversificantur differentias. Diversitas enim materiæ causat diversitatem formarum secundum esse materiæ in qua est forma : et ideo illas quæ primæ sunt formas a formatione et virtute formandi vocaverunt : eas vero quæ sunt in materia, illarum verarum formarum imagines, sicut est imago sigilli ab annulo in cera : eo quod, sicut inquit Plato, formæ quæ sunt in materia ex separatis intellectus formis, sicut ex quodam egrediuntur ethimaggio : et licet formæ secundum Peripateticorum sententiam de materia educantur, tamen virtus formativa uniuscujusque rei formatæ non est ex materia : eo quod idem non potest esse movens et motum, neque formans et formatum : sed

¹ II Physic. tract. II, cap. 6.

potius formativa virtus ex efficiente et movente est primo : hic enim solus ex se movet, et quilibet secundorum moventium movet ab ipso et virtute ipsius.

Et tunc resultant tria formarum genera. Unum quidem ante rem existens, quod est causa formativa rerum, præhabens simpliciter et immaterialiter et immobiliter omnes diversitates formarum factarum materialiter et cum motu tempore existentium. Aliud autem est ipsum genus formarum quæ fluctuant in materia, et materiæ sunt perfectiones. Tertium autem est genus formarum, quod abstrahente intellectu separatur a rebus secundum modum speciei et generis et generalissimi in quolibet genere rerum. Et horum trium generum primum quidem est ante rem, ut diximus. Secundum autem est in re, et terminus potentiæ materialis, et finis quem attingit generantis operatio. Tertium autem est post rem. Propter quod Aristoteles, in septimo *Metaphysicæ*¹ suæ probat, quod universale non est aliquid de substantia rei, sed potius accidens ipsius, sicut forma abstractionis accidit ei a quo abstrahitur.

Adhuc autem primum genus formarum maxime est simplicitatis et maxime virtutis. Secundum autem differentias materiæ. Et tertium differt per modum separationis : quoniam separatum ab individuo est species : separatum autem a differentiis potestatis et potentiæ ad formam comparatæ est genus. Genus enim potestate continet omnes specierum formas, et deducitur ad species secundum differentias illarum potestatum ; quoniam licet potestates illæ in natura generis uniuntur, sicut lineæ exeuntes a centro circuli uniuntur in centro, tamen si intelligantur potestates extensæ ad formas specificantes, alia est potestas generis ad hominem, et alia ad asinum, et sic de aliis : sicut etiam alia est potentia materiæ

ad unam formam, et alia ad aliam. Cum enim istæ potentiæ sint inchoationes formarum, extensiones earum ad formas erunt exitus inchoativæ formæ ad formam completam et distinctam : et tunc manifestum est, quod differunt proportionaliter sicut et ipsæ formæ : forma igitur generis et natura accipitur per abstractionem hujusmodi potentialium extensarum ad actum formæ determinatæ : et talis fit abstractio usque ad generalissimum : et sicut principium inchoativum est in centro omnium linearum quæ potentia exeunt ab ipso quantumcumque simpliciter accipitur, ita in genere remanet potestas inchoativa non ad actum extensa quantumcumque a differentiis separaretur per intellectum.

Hæc igitur hoc modo determinata tria sunt genera formarum, et hoc modo unum simplex in binarium et multitudinem agi dixit Pythagoras, videns formam puram quæ causa et principium est rerum, esse unam et simplicem et mobilem et immaterialem : eas autem quæ in materia sunt, esse numeratas primo numero inchoationum in potentia materiæ in dualitatem : eo quod omnes differentiæ primæ duæ sunt oppositæ : et deinde dixit agi in multitudinem finitam per extensionem inchoationum et determinatam formam et completam : et postea in innumerabilem numerum per multitudinem esse materialis, quem habent in individuo. Et hoc modo secutus est eum Plato dicens unum esse principium a quo tota exit naturæ multitudo finita et infinita : et sicut exit ex uno, ita per intellectum resolvitur in unum modo quem prædiximus.

Nec est differentia inter Platonem et Aristotelem in re aliqua, sed tantum in modo : quoniam Aristoteles probat, quod omnes formæ naturales sunt ab intellectu conferente virtutem formativam, quo

Potentia materiæ ad formam est inchoatio formæ.

Pythagoræ opinio.

Platonis opinio.

Plato et Aristoteles quomodo conveniunt et differunt

¹ ARISTOTELES, In VII *Metaphys.*, tex. et com.

ad formam formantem educuntur de materia : eo quod in ipsa sunt omnes per inchoationem. Sed Plato et Pythagoras idem quidem dicere intendebant, sed nescierunt exprimere materiæ potentiam, quæ est formæ inchoatio, et ideo dixerunt a datore primo dari formas, et non esse in materia, sed tamen materiam mereri formam : meritum materiæ vocantes id quod Aristoteles vocat inchoationem formæ, sive potentiam, sive privationem. Et de his multum late disputatum est in libris nostris physicis.

Democriti
opinio.

Democritus autem videns omnium formas exire ab intellectu primo, et arbitrans formas semper recipi secundum illam potestatem qua sunt in intellectu, in quo sunt vita et intellectus et lumen intellectuale, putabat omnia esse intellectualia, lapides et omnia metalla alia : sed quod non exercet intellectus opera intelligentiæ, dixit esse causam oppressionum materiæ corporalis et victoriam super ipsum : et fuit sibi causa erroris, quod non aspexit in natura nisi ad primum formans, et non ad inchoationem formarum eductarum de materia : si enim hoc vidisset, pro certo scivisset formas genere et specie esse diversas, secundum hujus inchoationis diversitatem. Propter quod minus convenienter dixit quam Plato : eo quod nec meritum materiæ dixit facere differentiam quam Plato ponebat.

Anaxagoræ
opinio.

Anaxagoras autem optime dixit primum movens a quo tota virtus formativa est, esse intellectum immixtum et purum et separatum cum nullo quod aliquid commune habentem : non autem bene dixit, quando posuit omnia in omnibus latere. Inchoatio enim rei non est res neque aliquid rei, sicut punctum quod est centrum, non est linea neque aliquid lineæ, sed principium inchoativum ipsius.

Ex omnibus igitur his accipitur quod formæ duas habent uniones, et duas diversitates. Et una quidem unionum est in eo quod præhabent omnes simpliciter et immaterialiter et immobiliter : et alia

est in eo ad quod colliguntur per resolutionem compositi in simplex. Una autem suarum diversitatum est secundum multiplicationem inchoationum ipsarum in materia aut in genere : et altera secundum numerositatem esse ipsarum in materia aut in individuo. Gradus autem ipsarum formarum sunt in multitudinibus his quas diximus secundum propinquitatem vel distantiam accedentem ad primum formans vel recedentem ab ipso.

CAPUT III.

De propinquitate et distantia vegetabilis ad intellectum moventem qui est primus motor in natura, et de causa distantie et propinquitatis, et de differentia naturæ vegetabilis, et de origine vegetabilis animæ.

His ita determinatis, oportet scire quod inchoatio formæ aliquando est in sola corporum commixtione, aliquando autem ex sola ad generans et movens distantia vel propinquitate secundum situm, aliquando autem inchoatio cum virtute primi formantis manifesta.

Et ut hoc perspecte intelligatur, ponemus primo exemplum de secundo. Probavimus enim multoties in libris nostris physicis, quod generans primum est cælum motum ab intellectu divino et separato et puro, et ostendimus in libro de

*Natura locorum et locatorum*¹ motum cœli in duo in materiam, et ex materia formas elementorum, ex solius situs comparatione ad cœlum esse movens et generans : in libris autem nostris *Meteororum* et de *Mineralibus* ostendimus formas mineralium et coagulatorum et liquefactorum esse inchoatas in mixtione miscibilium, et ideo esse ad unum tantum, sicut et ipsa natura est mixtorum : et hæc esse materialia valde, eo quod in ipsis occumbit virtus et lumen intellectus primi moventis : et ideo istæ sunt remotissimæ ab ipso : et hæc Democritus operi a materia appellavit. Et si manifestantur in aliquibus eorum cœlestes virtutes vel formæ, hoc est in eo quod participant illas a corpore moto non ab intellectu movente : et ideo sunt quasi paralyticæ fixæ ad unum, neque vitam, neque motus localis facultatem, neque sensum, nec intelligere secundum aliam facultatem demonstrantes : adeo enim materiæ immersæ sunt, quod splendor primi intellectus prout intellectus est in eis quasi penitus occumbit : sicut lux ingressa thecam multum opacam et obscuram. Ad hanc tamen formam ignobilem numquam solius corporis virtus deveniret : eo quod si sola esset virtus corporalis, neque moveret, neque ad aliquam naturæ formam materiam umquam deduceret : eo quod in ipsa præhabens forma esse non posset, quam semper oportet præexistere : quia aliter casui totum naturæ opus subjaceret, et non esset virtus veniendi ad hanc vel illam formam : nec esset quod ad eam determinate dirigeret quod formam causaliter non præhaberet, sicut patet ex prædictis. Hoc igitur modo formæ fiunt in materia omnes, quas absolute et simpliciter veras naturas rerum appellamus, nihil habentes ultra naturæ nomen et rationem : propter quod etiam illæ aut harmoniæ

quædam sunt, aut harmoniam consequentes.

Et si quis subtiliter hæc quæ dicta sunt, inspiciat, tria vel quatuor invenit ex dictis formarum materialium genera. Ex quibus primum sunt formæ elementorum, quæ sunt omnino materiales et primæ, quod significat ipsum nomen elementi, quod quasi materiæ habet rationem, cum dicitur quod elementum est in compositione primum, et quod non resolvitur ad formam aliam : nihil enim est componibile et commiscibile nisi materia : et quod non resolvitur, est quasi materialiter stans in mixto secundum esse primum non repugnando alicui formæ. Et hoc jam certa et perspecta ratione probavimus in fine primi *Peri geneseos*, ubi locuti sumus de *mixtione*.

Secundum autem genus formarum materialium est quædam mixtorum secundum qualitates miscibilium primas passio, sicut est coagulatio, et liquefactio, et hujusmodi, quæ a nobis in IV *Meteororum* determinata sunt.

Tertium autem genus est formarum substantialium oppressarum et immersarum materiæ, in quibus parum quid de luce offuscata intellectus puri simplicis apparet : et hæc est forma substantialis eorum quæ tantum commixta sunt, nullam habentia ulterius complexionem aut compositionem, sicut est forma lapidis et metalli, quæ in uno et minimo cum intellectu erit, quod est esse totaliter potentiam suam in tota materia et omnibus partibus ejus : quælibet enim pars lapidis lapis est, et quælibet pars auri est aurum, sicut intellectus purus et immixtus qui prima causa est omnium, est ubique et semper. Cum his autem aliquando resultat aliquid de virtute instrumenti quo intellectus primus movet generabilium materiam, sicut est cœlum vel cœli imago, cujus virtus vel figura

Primum genus formarum materialium.

Secundum genus.

Tertium genus.

¹ De Natura locorum, tract. 1, cap. 4.

quandoque resultat in lapide vel metallo, sicut late et exquisite in libro nostrorum *Mineralium*¹ est determinatum.

Facile autem ex inductis manifestatur, quod omnes istæ formæ fiunt et inducuntur, ubi occumbit lumen intellectus puri et separati ex opacitate et victoria materiæ terrestri. Propter quod etiam istæ formæ ab omnibus Peripateticis et Stoicis non tantum formæ in corpore existentes, sed etiam corporales formæ vocantur. Ex corporea enim obumbratione fuscantur et ex materiæ terrenæ obligatione detinentur, adeo quod non nisi remota resultatione potius quam imitatione formarum quæ in intellectu sunt primo, parvam retinent resonantiam. Et ideo tales Socrates obscuras verarum formarum resonantias et resultationes vocavit. Cum enim intellectus qui est activus et formativus omnium per formam operativam quæ ipse est et in ipso, sit esse vitæ cognitionis et intellectus et motus localis principium, in his non resultat nisi secundum esse : et hoc ipsum est esse obumbratum et particulatum et obligatum materiæ. Hæ igitur et hujusmodi formæ ex materia sola educuntur, et ad ultimam distantiam recedunt ab intellectu puro et immixto, qui est causa et motorum primus in omni generatione universitatis.

Est autem adhuc in hoc formarum genere notandum, quod universitas formarum ab hujusmodi forma non dependet, neque procedit ab uno. Et ex hoc duo consequuntur necessario, quorum unum est, quod hæc non generantur ab invicem, sed unum quidem per se habet suam formam absque affinitate quam ad aliud habeat, et habet generationem, eo quod potentia in qua est hujusmodi formæ inchoatio, non est in eo quod ejusdem cum generato est speciei et formæ, sed potius est in elementorum quadam

permixtione : propter quod divisas ab invicem hæc habent generationes in diversis locis et diversis elementorum commixtionibus : et talis generatio non est in aliis quæ magis cum intellectu primo conveniunt.

Aliud autem quod consequitur ad id, quod diximus esse partes ejus quod hac forma perfectum est, a toto divisas, non æquivocari in nomine, sed univoce, sicut prius, recipere nomen et rationem : pars enim divisa a lapide lapis est, et pars divisa ab auro aurum est : non enim hæc conveniunt cum primo motore illo de quo diximus in VIII *Physicorum*² : totum enim quod ab ipso movetur cælum et partes ejus ad unum ordinantur quod unit motum et contentum facit in ipso, sicut omnia membra organici corporis ordinantur ad cor et motorem cordis : talis enim unio tam secundum Peripateticos quam etiam secundum Stoicos, est in omnibus cælis ad cælum primum, cujus motum omnes cæli alii obtinent, et ad motorem primi cæli ordinantur et reducuntur. In prædictis igitur formis occumbit lux intellectus primo moventis et harmonia sui motus : propter quod formæ inchoatæ esse virtutem et operationem et permanentiam non habent nisi in materia, et sine ipsa nec incipiunt, nec sunt, nec possunt, nec operantur, neque permanentiam aliquam habent.

Sunt autem et aliæ formæ gradu uno a materia corporali discedentes, et motori primo appropinquantes : et hæc sunt quorum generatio est ex invicem, eo quod ad unum ordinantur : et postquam ipsum generatum esse acceperint, ordinantur partes ejus ad unum, ex quo etiam primo formantur et producuntur : et hæc sunt vegetabilia vocata, quorum generatio est ex semine quod ex vegetabili perfecto producitur. Et cum semen ipsum germinare et pullulare incipit, pri-

Quantum
genus.

¹ II Mineralium, tract. III, cap. 5.

² VIII Physic. per multa capita.

mo format unum ex quo formantur omnia alia : et hæc est radix quæ est vice oris et cordis, sicut in libro de *Vegetabilibus* clare satis a nobis est ostensum¹.

Propter quod etiam duo consequentia sequuntur hanc formam, quorum unum est quod principium generans et formans unius est in alio : et ideo tota eorum quæ unius naturæ sunt communitas, secundum originem proficiscitur ex uno. Et secundum est, quod divisa pars a toto nomen et rationem totius non habet propter ordinem quem habent partes ad primum ex quo formantur : ramus enim divisus ab arbore, non est arbor, neque ramus proprie : sicut nec manus divisa ab homine est manus, nisi æquivoce : et in his incipit generatio proprie esse, quæ est generis processio. Non enim procedit genus nisi ex aliquo, nec procedit nisi in ea quæ ex uno in quo est genus, exeunt : et ideo non unius rationis est generatio in his quæ non sunt animata, et in his quæ animata sunt. Cujus signum est, quia virtus generativa est animæ et non naturæ : eo quod natura corporum nunquam procedit ex uno et eodem, sed potius ubique, et communicatur materiæ mixtione et alteratione. Et generatum non est secundum potentiam in aliquo generante, quod sit ejusdem naturæ et speciei.

Si quis autem objiciat plantas non semper ex semine et ex plantis generari, sed frequenter ex terra, planum est solvere per ea quæ late in *Vegetabilibus* nostris disputata sunt. In his enim, sicut bene dixit Pythagoras, sol est pater et terra mater : propter quod adusta a Phaetonte clamavit ad Jovem, ne hoc quod remanserat, omnino aduri permitteret, sed adustionem Phaetontis ad humorem converteret hoc idem² : et ideo vis sementina in terra fit, ex qua plantæ procreantur : et hæc productio plantarum

est sicut ex semine et ejusdem rationis. Non autem sic est in mineralibus quæ numquam ex seminibus, neque ex virtute simili seminibus procreantur, sed potius ex simplici commixtione, aut coagulatione, aut liquefactione materiæ elementalitis.

Accedunt igitur hæc formæ ad motorem et elevantur supra materiam corpoream, præcipue in quatuor, quorum et primum est, quod actus hujus formæ non est esse simpliciter. Cum enim perficit materiam, non facit ipsam esse in actu tantum, sed confert ei vivere, quæ tamen vita est occulta et imperfecta ex animæ parte, non ex perfecta anima, sicut probatum est in principio *Vegetabilium* nostrorum. Dico autem *vivere* actum et perfectionem quæ viventibus est esse, quæ absque dubio non est secundum aliquam materialis et corporeæ formæ potentiam, sed secundum eam potentiam quæ est animæ, secundum quam corpus ab anima movetur ad vitæ operationes, quæ sunt vivere, nutriri, augeri, et generare, ex se, et hujusmodi, quas potentia non habet aliqua forma corporalis.

Secundum est, quod substantiali et naturali potentia operatur hæc forma multa, cum naturalis et corporea forma non operetur nisi unum : multa enim sunt quæ jam diximus vegetari, alimento uti, et generare, hujus operationes multas in nullo naturalium quæ corporeas tantum formas habent, invenimus. Et propter hæc duo forma hæc non natura, sed anima vocatur.

Tertium autem est, quod hanc formam est consequens, locus videlicet ejus cuius est forma ipsa. Si enim omnia quæ per naturam tantum consistunt, considerentur, omnia locum habent alicujus elementorum in ipsis viventium, deorsum, vel sursum, vel locum medium : hæc autem quamdiu vegetantur, in vita radi-

Formæ super materiam elevatæ prima nobilitas.

Secunda nobilitas.

Tertia nobilitas.

¹ Cf. etiam II de Anima, tract. II, cap. 3.

² OVIDIUS, In II Metamorph.

cantur inferius, et sursum diriguntur, cum tamen in ipsorum corporibus vincat terræ materia.

Quarta nobilitas.

Quartum est, quod virtus hæc vegetans ex uno influit omnibus partibus effectum et motum vitæ, et ab illo construit vias in omnes partes per quas discurrunt spiritus et alimentum, virtutem primi in se habentia et formam quæ dat eis motum ad omnem situm partium, sicut adamas movetur ad ferrum in quocumque sibi situ objiciatur. Hoc autem in plantis est radix a qua pori extenduntur in omnes partes plantæ, sicut diximus.

Primum corollarium.

Ex primo autem horum necessario concluditur hujusmodi formam non esse corporalem, ita quod sit simplicis corporis forma, aut harmonia compositi, aut aliquid corpoream harmoniam consequens: nihil enim omnino hoc corporeum operatur secundum vitæ potentiam, sed tantum operatur secundum potentiam formarum corporalium quæ sunt calidum, frigidum, humidum, siccum: aut secundum potentiam mixturæ harum formarum, quæ aut est ex ipsa mixtione, aut virtute corporum cælestium quæ movent ad speciem mixtorum, sicut in scientia *Mineralium* diximus.

Secundum corollarium.

Ex secundo autem necessario concluditur, quod hæc forma non potest vocari natura, eo quod natura secundum se non est nisi ad unum hæc autem: forma de se multa facit: propter quod etiam ipsa in substantia corporis sui exigit partes dissimiles in forma, sicut est radix, folium, stipes, ramus, et hujusmodi.

Tertium corollarium.

Ex tertio concluditur, quod non omnino est immersa materiæ et victa ab ea: si enim victa esset, non haberet locum nisi materiæ. Nunc autem extendit partes suas in locum alium, sicut diximus.

Quartum corollarium.

Ex quarto autem habet, quod in aliqua similitudine est ad motorem primum, in hoc videlicet quod ad unum refert totum

suum universum, sicut ad unum refertur omne quod movet motor primus.

Hæc autem quatuor simul accepta efficiunt, quod tale corpus animatum non generatur nisi ex eo quod virtutem habet formativam ex eo quod est ad speciem digestum hujus formæ: et hoc vocatur semen sic formatum et digestum in planta, aut vis sementina, si contemperatio quædam elementorum et hoc virtute stellarum est reducta, et habet in se generati materiam et sementinam naturam efficientem: sed de materia habet parum, sed continue acquirit eam per tractum humoris a terra, fere tota alia substantia quæ in eo ex generante, resolvitur in spiritum, qui ingreditur in materiam, quæ est et qua trahitur primo inter corticem seminis: et cum in spiritu illo sit virtus animæ plantæ et virtus cæli, format humorem in plantæ organa.

Ex his igitur cognoscitur in quo elevatur anima vegetabilis supra naturam: quoniam quatuor quæ diximus, nulla habet natura, sed sunt effectus primæ animæ. Patet etiam quod hæc vegetabilis anima educitur ab interiori virtute seminis, propter quod in XVI libro de *Animalibus*¹ probavimus, quod est in semine sicut artificis forma est in artificiato, quod illam formam artis incipit induere: propter quod etiam quidam hanc animam ex traduce dixerunt, licet hoc omnino sit falsum. *Ex traduce* enim dicitur, quod sicut pars quædam traducitur de toto aliquo: virtus autem formativa quæ inducit animam, non venit in semen sicut pars quædam animæ plantæ cujus est semen, sed potius sicut similitudo quædam suarum virtutum. De his autem perfecte dicitur in nostro libro XV de *Animalibus*², ubi de seminum natura in animalibus et plantis late disputatum est.

Oportet autem scire, quod hæc anima super naturam elevatur, et in quantum

¹ XVI de Animalibus, tract. i, cap. 44.

² XV de Animalibus, tract. ii, cap. 3.

supra naturam elevatur, sit natura ipsa, et virtutes formarum naturalium efficiuntur instrumenta ejus : et ideo dicitur a Philosophis, quod anima hoc imprimit in naturam tamquam in materiam suam, et movet naturam sicut suum instrumentum. Cujus exemplum est quia nisi calor naturalis digestivus esset impressus a forma animæ, numquam digestum ab ipso converteretur ad speciem vini, sed potius ad speciem ignis vel cineris qui est ignis reliquæ. Et ideo sicut forma architectonici est in dolabro, virtute cujus dolabrum dolatum terminat ad formam artis : ita forma animæ est in calido, frigido, humido, sicco, complexionatis, virtute cujus terminatur ad speciem vivi et animati.

Amplius in semine plantæ vel in eo in quo est vis sensitiva, est principium effectivum et formativum plantæ : et hoc est permixtum cum materia quæ formatur : et ideo diximus in libro *Vegetabilium*, quod virtutes sexuum activi et passivi in plantis unitæ sunt in uno, et idem est in planta imprægnans et imprægnatum : sed non secundum idem : quoniam pars seminis subtilior et magis digesta quæ convertitur in spiritum, est formans et imprægnans : et pars materialis quæ augetur per humorem qui a terra trahitur in alimentum, est formata et imprægnata : et sunt conjuncta tam in planta germinante quam etiam in semine, quod se habet ad plantam sicut se habet ovum ad animalia ovantia : et sicut in ovo sunt agens et patiens conjuncta sub una testa, ita sunt in semine. Sed in hoc est differentia : quia in ovo sperma maris et gutta fœminæ sunt distinctæ substantiæ, quarum una convertitur in spiritum, et ille ingreditur in guttam fœminæ, et conformat eam : sed in semine sunt permixta et unita, eo quod magis immersa materiæ est vegetabilis quam sensibilis, sicut inferius patebit.

Ex dictis igitur colligitur, quod anima vegetabilis ex materia educitur per virtutem formantem, et quod in materia

immergitur, sicut et substantia in qua est virtus formativa ipsius, et quod non operatur nisi instrumento aliquo naturali et materiali, quod est calor, vel frigus, vel humor, vel siccitas : et hæc tria faciunt quod non est perfecta anima, sed vocatur animæ quædam pars. Ex primo autem horum trium patet, quod est materiæ obligata hæc anima. Ex secundo, quod nullam formam concipit separatam a materia. Et ex tertio, quod est virtus operans in corpore, etsi non sit virtus corporea : sicut enim in *Physicis* diximus, virtus corporea est forma corporis, aut ejus quæ consequitur corpoream harmoniam : sed virtus operans in corpore, vocatur a Peripateticis virtus quæ non nisi per instrumentum corporeæ virtutis operatur. Et hoc contingit dupliciter, ad formam videlicet quæ est in materia, et non operatur nisi prout est in materia, sicut operantur omnes virtutes vegetabilis animæ ad formam, quæ quidem est corporis : est tamen operatio animæ circa eam prout non est in corpore, sicut est imaginatio, et sensus, et hujusmodi, de quibus postea dicemus.

Ex his igitur vere scitur natura vegetabilis animæ, et in quantum elevatur supra naturam, et in quantum accedit ad intellectum primum moventem, et in quantum injungitur vel deprimitur in materia : et hoc præsentī sufficit speculationi ad sciendum naturam et originem vegetativæ animæ.

CAPUT IV.

De generatione et natura sensibilis animæ, et quantum elevatur super vegetabilem, et qualiter unitur, et quantum appropinquat intellectui primo moventi in tota natura ?

Originem autem et naturam sensibilis animæ scire non possumus, nisi ex propria generatione sensibilibum et propriis operationibus et passionibus sensibilibum. Sunt autem, ut in genere loquamur, generationes sensibilibum tres. Quædam autem generantur non in se distincta per marem et fœminam, sicut ostrearum genera, quæ *duræ testæ* vocantur. Quædam autem generantur ita quod in genere ipsorum non nisi fœminæ plenæ ovis inveniuntur, sicut sunt quædam genera piscium parvorum, de quibus in libro de *Animalibus* determinatum est a nobis. Quædam autem generantur ex mare et fœmina. Ea autem quæ sine coitu generantur, imperfecta sunt et similem cum plantis accipiunt ex seminali virtute et per stellæ formationem : et ideo omnis anima ipsorum de materia et virtutibus quæ in materia sunt, modo quo prædiximus, educitur. Ea autem quæ nascuntur ex fœminæ et maris commixtione, omnia sic generantur, quod gutta maris resolvitur

aut tota aut fere tota in spiritum, qui penetrat in guttam fœminæ, pulsando eam et distinguendo et formando eam per virtutem formantem quæ est in ipso : et quia virtus animæ patris et intellectus cœlestis est in spiritu illo, de sui materia educitur sensibilis anima, quæ efficitur spiritus ejus de quo dictum est, quod motor est, et per ipsum vehit virtutes suas in corpus organicum quando formatur. Non enim oportet omne ex univoco sibi secundum speciem generari, sicut dixit Plato : sed sufficit quod generetur ex convenienti secundum subjectum materiæ : et hoc est quando materia habet in se inchoationem speciei et formæ, quæ *virtus* ideo *formativa* vocatur, quia speciei et formæ habet virtutem informando ad determinatam et perfectam formam speciei. Utrum autem hæc virtus universaliter formans animal ex concepto semine, ex hoc sit in semine, quia semen egressum sit ex omnibus membris patris, aut ex hoc quod assimilatum sit membris patris, quamvis non sit egressum ex eis, late disputatum est a nobis in *XV Animalium* libro ¹, et non est de intentione præsentis. Sed hoc est hic considerandum, quod secundum ea quæ dicta sunt, anima sensibilis educitur ex materia suæ generationis habente virtutem formativam ex assimilatione cum virtutibus membrorum generantium : et ideo est virtus operans et patiens naturaliter in corporis organo, et nullas omnino præter ipsum habens proprias operationes aut passiones.

Amplius oportet scire quod ordo est in formis, et quæcumque earum est prior, ut natura subjecta se habet ad sequentem, et sequens ut determinans et in numerum ponens se habet ad priorem, sicut patet si consideremus has formas quæ dicuntur esse, vivere, sentire, et intelligere, et movere secundum locum : prior enim erit secundum naturam quæcumque

¹ Cf. *XV Animalium*, per multa capita.

supposita, non necessario ponit aliam ante se priorem : et hoc non est nisi esse. Si autem vita ponatur, necessario esse ponetur ante vitam, et esse erit sicut natura essentialis vitæ, quæ per vitæ formam ponitur in numerum, eo quod differentia est causa numeri, et jam numeratur esse vivum, et differt ab eo quod est non vivum. Et similiter habet se tertia ad secundam, et quarta ad tertiam : semper enim sequens distinguit præcedentem et ponit eam in numerum : quidquid autem in aliquo est sicut distinctum et in numero positum, in ipso est sicut potentia naturalis et essentialis, et non sicut actus et complementum : et quidquid est in aliquo sicut terminus formæ et in numerum naturæ ponens, ipsum est in eo sicut constituens et complens et terminum tribuens essentialem.

Et hoc manifestum est in omnibus definitionibus essentialibus. In omnibus enim illis per modos dictos diffinitionibus se habent ad invicem priora ad sequentia, et sequentia ad priora : et in omnibus talibus prius est in posteriori, sicut potentia essentialis et naturalis, in quo per inchoationem est sequens : et ideo sequens additur præcedenti, et est in ipso sicut actus in potentia, et finis sive terminus naturalis in eo quod inchoatum et indeterminatum habet esse : propter quod hujus additio sequens ad præcedens facit unum et non multa. Idem enim penitus est quod est in potentia et quod est in actu. Ex hoc igitur necessario concluditur, quod vegetativum est in sensitivo, sicut potentia in suo actu in omnibus sensitivis, et quod non habet esse distinctum vel substantiam distinctam ab ipso, et quod vegetativum non est actus et perfectio et forma sensibilis, sed potentia ipsius, et sensibile est actus et perfectio. Scitur etiam ex hoc ratio quare vegetativum loco et subjecto separatur a sensi-

tivo, sed sensitivum loco et subjecto numquam separatur a vegetativo : et cum vegetativum separatur a sensitivo, tunc potest esse finis et perfectio : sed numquam potest esse perfectio ultima, quando est in sensitivo : numquam enim in sensitivo potest esse sicut actus, sed sicut potentia quæ nullius potest esse perfectio aut terminus sive forma ultima substantialis ponens in numerum.

Et ex hoc necessario falsitatis arguitur opinio quorundam sensibilem dicentium et vegetabilem duas esse substantias in animali sentiente, quæ ambæ substantiæ uniuntur in uno actu animandi, et ideo hæc duo unam esse animam manifestissimum est. Jam enim ex prædictis constat non posse esse hæc duo in sensibilibus nisi unam substantiam secundum esse naturale et substantiale. Et hæc est causa, quod Aristoteles dixit, quod vegetativum est in sensitivo sicut trigonum in tetragono. Sed de hoc multa et bene considerata in II de *Anima* dicta sunt a nobis. Amplius hic elucescunt multa quæ in XVI libro *Animalium* diximus. Ibi enim dictum est quod non est vivum et animal simul, et non est animal et equus simul : ex quo enim id quod est potentia prius est natura, et generatio est continuus egressus ejus quod est in potentia ad actum, necessario oportet quod prius manifestetur in embrione operatio potentiæ, et postea operatio ejus quod in actu est permixtio potentiæ secundum omnem motus quantitatem, et quod tandem stet generatio in complemento ultimo : et cum omnem motum mensuret tempus continuum, oportet necessario quod non sit vivum et animal simul, nec animal et equus simul : est enim motus forma post formam, sicut in III *Physicorum* ostendimus, et in quolibet fieri sunt infinita facta esse, sicut ostendimus in VI *Physicorum*¹. Sed ex

¹ VI Physic. tract. II, cap. 7.

hoc non sequitur, quod vegetativum non idem in substantia est sensitivo in animali : sicut non sequitur in motu alterationis in quo non est fuscum et pallidum simul, et non est pallidum et album simul, quod sint tres formæ in fine alterationis, scilicet fuscum, pallidum, et album.

Dubitabit forte aliquis de dictis, dicens quod in formis substantialibus quæ non sunt majores in majori quantitate, et minores in minori quantitate, non est talis formarum in motu divisio, cum sint indivisibiles et simplices : sed hoc nihil est : quia sufficienter in fine primi *Physicorum* a nobis ostensum est, quod generatio formarum substantialium non dividitur ab alteratione : eo quod qualitates primæ informatæ formis substantialibus, sunt alterantia instrumenta, quibus materia a potentia ad actum deducitur. Et ideo patet, quod verum est quod diximus : et error est contra omnem veritatem naturæ, vegetativum et sensibile esse diversas substantias in animali. Nec umquam hoc dixit aliquis Peripateticorum, sed quidam philosophiam ignorantes hic errantes confinxerunt : de hoc tamen causa est a nobis dicta in undecimo *primæ philosophiæ*.

Amplius autem ostenditur hoc ex operibus. Nutritivum enim et augmentativum non nutriunt et augent ad speciem et operationem vegetativi, sed ad speciem et formam sensitivi. Caro enim et nervus facta sunt ex nutritiva virtute animæ vegetativæ perfectæ, sed potius in quantum stant sub forma sensibili sive sensitivi. Et per hoc probatur quod sensibilis anima imprimit in vegetabilem, quæ in ipsa est sicut in potentia, sicut forma in materiam, et sicut motor est in instrumentum, sicut superius diximus, quod vegetativum in plantis imprimit in naturam formarum corporalium et in ipso esse.

Ex omnibus dictis colligitur, quod sensitivum se habet ad vegetativum sicut actus ad potentiam, et sicut informans movens ad instrumentum quod movetur ab ipso, et quod ipsum educitur de materia per virtutem formativam habentem similitudinem virtutem membrorum patris : et ideo dicemus in XVI libro *Animalium*¹, quod gutta fœminæ, sive sit menstrualis sicut in ovo venti, separata ab humore maris, non est in potentia ad vegetabile, et ad hoc numquam educitur sine semine maris : eo quod in talibus vegetabile est in potentia, et non movet nisi per aliquid quod est in actu : et hoc non est nisi sensitivum, et ipsæ virtutes vegetabilis non vegetant nisi ad formam sensus, eo quod in sensitivo complentur. Ex omnibus igitur prædictis patet qualiter sensitivum se habeat ad vegetativum.

Restat igitur nunc considerare opera et passiones ejus, ut sciatur natura propria ipsius. Ostendimus autem, quod sensus qui naturam sensitivi habet simpliciolem visus in perfectis animalibus : et hoc in secundo de *Anima* a nobis determinatum est, et in illo primo considerabimus sensitivi naturam. Est autem videre in illo quod in medio sensibile visus quod est color, est secundum esse spirituale, cui conveniunt tria, quorum unum est subito et non in tempore transire ad visum per medium. Secundum est universaliter in medio visibile generari quocumque extenditur recta linea. Tertium autem est visibile non afficere medium qualitate et figura ipsius. Non enim possumus dicere aerem esse trigonum vel album, eo quod trigonum album videntur per ipsum. Ex his autem tribus convincitur perspicuum quod est medium in visu, in quo sicut in medio fiunt visibilia, non esse materiam subjectam visibilibus, nec se ad visibilia habere sicut potentiam materiæ : esse enim spirituale

¹ XVI Animalium, tract. I, cap. 1.

quod subito fit in medio materiæ et in extremo, et esse ubique in materia subito et non infici vel informari, numquam contingit materiæ ex aliqua forma quæ est in materia.

Amplius perspicuum et color sunt ejusdem naturæ : quia color est esse quoddam perspicui in corpore terminante visum et terminato per opacum, sicut ostendimus in libro de *Sensu et sensato* : materia autem et forma numquam sunt ejusdem naturæ : et ideo potius perspicuum ad visibilia se habet sicut locus connaturalis eorum ad quem moventur, et cum quo connaturalitatem habent, et ubique in ipso existunt secundum quod esse habent sensibile. Cum autem oculus secundum naturam non habeat nisi perspicui compositionem, erit eadem ratio de oculo quæ est de perspicuo medio secundum illam cooperationem qua se habet oculus ad visibilia. Determinatum autem est a nobis in scientia de *Anima*, quod perspicuum non convenit elementis ex hoc quod elementa sunt, sed potius ex hoc quod communicant cum corpore superiori quod est perpetuum et cæleste : et cum eodem convenit natura oculi per eandem rationem : visus autem forma est oculi organica, sicut in secundo libro de *Anima* ¹ ostensum est. Visus igitur licet sit forma in organo operans, in quo dominatur elementum, tamen non est forma organica illius et harmonica secundum communicationem cæli : propter quod etiam quia cælum est superius elevatum ab alteratione et effectione formarum alterantium et materialium, forma quæ est in ipso, nec materiale esse habet, neque vere alterat ipsum, nec vere induatur in ipso, sed potius secundum quemdam modum universalis ubique est in ipso, nec vere afficit nec figurat ipsum. Idem autem est de sensu omnium sensi-

bilium, in quantum sensus solius formæ sensibilis est susceptivus sine omni materia, sicut cera suscipit formam sigilli.

Et ex his facile patet cuilibet qui subtiliter intuetur naturam animæ sensibilis, eam nec esse formam corporalem sive corpoream, nec esse eam aliquid quod consequens est harmonicam corporum compositionem, sed multam cum movente intellectu habere propinquitatem et affinitatem, licet cum ipso in forma non conveniat. Propter quod nec visus nec imaginatio affecta dicuntur formis sensibilibus materialibus : quia visus albi non est albus, nec imaginatio calidi est calida. In vegetativæ autem animæ passionibus et operibus non eodem modo se habet : quia digestio fit a calido naturali : et ideo digestio calidi est calida, et hepar est calidum, et cor calidum, et stomachus calidus, quæ sunt organa quibus perficitur digestio : et hæc fuit causa quam assignavimus in *XVI Animalium* ² : propter quam sensitivum oportuit aliud formalius et melius digestum et distinctum habere principium seminale quam vegetativum : et ideo diximus ibidem, quod corpus sentientium est a matre, et anima a patre.

Ex omnibus autem hic et ibi dictis constat, quod anima sensitiva non est patiens et operans sine organo : sed hoc organum non se habet ad sensibilia omnino sicut materia, sed potius ad formam sensibilem habet connaturalem : et hoc planum est in omnibus, secundum quod forma fit in ipsis sicut forma sigilli in cera : propter quod etiam tactu nihil sentitur nisi quod est in formali ejus compositione, et excellens compositionem ipsius. Et hoc dicere voluerunt sed nescierunt exprimere illi qui dixerunt quod non sentitur nisi simile simili.

De natura igitur animæ sensibilis et origine ipsius et affinitate cum primo

¹ II de Anima, tract. III, cap. 7 et 9.

² XVI Animalium, per multa capita, et alibi

hoc idem.

movente intellectu, et distantia ejus a materia, tantum dictum sit a nobis.

CAPUT V.

De origine et natura animæ rationalis et elevatione sui super materiam et similitudinem ad intellectum purum, et de unitate quam habet cum sensibili et vegetabili in homine.

His ita determinatis, facile est invenire originem et naturam animæ rationalis : de hæc enim constat per ea quæ in III de Anima ¹, et in libro de *Intellectu et intelligibili* determinata sunt, quod ipsa non est actus alicujus corporis, nec est forma corporalis, neque virtus operans in corpore. Propter quod impossibile est, quod per aliquas qualitates seu formas quæ in semine sunt, educatur de semine : sed cum intellectus separatus sit primus motor in natura sicut a principio istius libri diximus, anima rationalis est similitudo lucis intellectus agentis in generatione. Non enim potest intelligi, quod aliqua virtus in corpore operans, vel corporea, quin virtutem habeat formandi et formam illam quæ nullo utitur corpore.

Et ideo cum tria sint in omni genere operantia in conceptus formatione, elementi virtus videlicet, et animæ, et intellectus, qui est cum cœlesti virtute, eo

quod ipse cœlum movet, et movet virtutes cœlestes, quæ sunt in materia generabilium, et est intellectus purus et primus movens et informans omnia alia sub ipso instrumentaliter agentia. Contingit enim formam esse animam rationalem, quæ transcendendo materiam et virtutes materiæ, in similitudinem prorumpit motoris primi in natura : et hic intellectus movens est, quem Anaxagoras purum et primum et immixtum esse dixit, sicut diximus in VIII *Physicorum* ². Et hoc est quod quidam vocaverunt causam primam, eo quod in causando non habeat aliquid prius se quod causet ipsum vel moveat. Et cum ipse sit intellectus purus activus et productivus rerum naturalium sicut intellectus artificis producit artificialia, dixerunt quidam animam rationalem ab intelligentia fieri : et verum dixerunt, si intelligentia dicatur intellectus primus separatus et immixtus, nulli nihil habens commune, sicut dixit Anaxagoras. Si autem intelligentia dicatur intellectus secundus motor alicujus orbis inferioris, non potest esse verum quod dicunt : quoniam quæcumque sit secundarum intelligentiarum, non movebit nisi in virtute primi intellectus : et ideo tota virtus causandi est intellectus primus in causato illo quod ad similitudinem intellectus producit.

Alii autem videntes formam hanc, quæ anima rationalis vocatur, esse ad imaginem et similitudinem intellectus primi qui auctor est et opifex primus in toto naturæ opere, dixerunt eam esse exemplum primæ causæ. Ex dictis autem elucescit quod in XVI scientiæ de *Animalibus* ³ libro dicemus, quod intellectus in animæ rationalis natura ingreditur in conceptum ab extrinseco, non ita quod intellectus primus causet ipsum extra naturæ opus, sed quia educit eum de luce sua, et non de aliquo materialium prin-

¹ III de Anima, per multa capita.

² VIII Physic. circa finem.

³ XVI Animalium, tract. i, cap. 11.

cipiorum : et si esset de aliquo materialium principiorum, oporteret quod speciale semen haberet præter semen maris et fœminæ, et quod semen fœminæ haberet in se vegetativum, et semen maris haberet in se sensitivum in potentia : et neutrum horum sufficit ad intellectum et rationem. Nec potest habere semen quod est in potentia : omnis enim virtus quæ est in semine, sive sit animalis, sive cœlestis, sive elementalis, aut mixtionis elementorum, virtus est operans in corpore, nec educere potest formam nisi quæ est actus corporis, sicut jam dictum est.

Adhuc autem quod vere animæ intellectualis sive rationalis cognoscatur origo, revocetur ad memoriam quod supra dictum est, quod videlicet vegetativum est in sensitivo, et non terminatur exitus vegetativi de potentia ad actum nisi ad esse et ad naturam sensitivi : eo quod motivum in generatione animalis est sensitivi habens virtutem formativam. Est tamen in motu ipso embryo prius vivum quam sensibile animal, et prius sensibile animal quam equus, vel leo, aut in specie et forma animalis determinatum. Ita omnino ubi secundum propriam virtutem est movens intellectus, et omnia quæ sunt in materia, sunt instrumenta ipsius in virtute intellectus moventia : ibi procul dubio vivum prius est in materia quam sensibile, et sensibile prius quam intelligibile, et intelligibile confusum quam intelligibile sive intellectuale determinatum et adunatum habens intellectum : eo quod virtute intellectus agentis prima operatio est secundum principia materiæ matris, et secunda operatio est intellectus ejusdem secundum ea quæ sunt in semine patris, et terminus generationis est secundum lucem propriam tantum. Et sicut quando vegetativum est in sensitivo, terminat vegetativum suas operationes ad congruentiam sensi-

tivi : ita quando vegetativum et sensitivum sunt in rationali, terminantur organa formata ad opportunitatem rationalis animæ. Et ideo loco anteriorum pedum in quadrupedibus formantur homini manus quæ sunt organa intellectus, sicut in libro de *Animalibus*¹ ostenditur : et sicut dixi de manu, ita est de aliis, sicut lingua, quæ in homine congruit interpretationi, quæ non est nisi actus rationis, et auris qui est auditus disciplinalis, quod non competit nisi intellectui : et sic facile est considerare in omnibus aliis organis sensuum. Propter quod etiam in figura organa hominis ab omnibus differunt animalium organis : eo quod sensitiva in homine conjuncta rationi, multo est majoris virtutis quam sit in aliis animalibus.

Oportet autem scire, quod sicut in aliis, ita etiam in homine inchoatio vegetativi est in materia et in esse primo substantiæ animandæ, et inchoatio sensibilis est in vegetativo, et inchoatio rationalis in sensitivo est : quia aliter homo constitutus, sicut ante probatum est, esset multa et non unum : sed quia nihil horum fit, nisi per virtutem intellectus, et non ex materia aliqua efficitur, ideo oporteret quod terminus esse hominis ad similitudinem intellectus primi qui divinus est, ex nulla materia fieri prohiberetur, sicut patet ex prædictis.

Ex his igitur patet, quod falsa est opinio Abubacher, qui dicit intellectum esse non de natura animæ, sed continuari sibi eum ab extrinseco. Si enim hoc verum esset, non esset homo id quod est esse habens hominis nisi a sensibili. Quod enim non nisi extrinsecus continuatur, non est terminus exeuntis de potentia ad actum, nec per ipsum aliquid ponitur in numerum : sed per rationem et intellectum homo est homo, et ponitur in numerum. Et igitur rationalitas esse

¹ XIV Animalium, tract. II, cap. 2.

hominis, et una substantia erit vegetativum et sensitivum in ipso, sicut necessariis probationibus patet quas induximus per ea quæ dicta sunt.

Ulterius patet, quod non potest esse unus intellectus in omnibus hominibus, cum secundum esse distinguatur per vegetativum et sensitivum, cum quibus est una et eadem substantia. Ostensum est etiam per ante dicta, quod substantia illa quæ est anima hominis, partim est ab intrinseco, et partim ab extrinseco ingrediens: quia licet vegetativum et sensitivum in homine de materia educantur mediante virtute formativa, quæ est in gutta matris et patris, tamen hæc formativa non educeret eas hoc modo prout sunt potentiæ rationalis et intellectualis formæ et substantiæ, nisi secundum quod ipsa formativa movetur informata ab intellectu universaliter movente in opere generationis: et ideo complementum ultimum quod est intellectualis formæ et substantiæ non per instrumentum, neque ex materia, sed per lucem suam influit intellectus primæ causæ purus et immixtus.

Propter quod etiam non ex præjacenti aliquo creare rationalem dicitur Deus animam: et hoc modo intellectus ingreditur in embryonem ab extrinseco materiæ, non tamen ab extrinseco agente: quia intellectus qui est auctor naturæ, non est extrinsecus naturæ, nisi hoc modo quo extrinsecum rebus dicitur, quod est separatum ab eis per esse et non commixtum cum eis: sed hoc modo a rebus generatis separatus intellectus universaliter agens non distat ab eis per situm et locum, cum potius sit intimior rebus naturalibus quam aliqua naturæ principia: nec principia naturæ aliquid agunt, vel agere possunt, nisi mota ab ipso et informata per ipsum.

Hæc igitur de origine animæ rationalis, et unione ejus cum vegetabili et sensibili, et affinitate ejus cum lumine primæ causæ dicta sunt.

CAPUT VI.

De eo quod rationalis sola est perfectio, et qualiter perficit hominem et membra, et qualiter est perfectio vegetabilis et sensibilis, et qualiter est inseparabilis ab illis, sed illæ separantur ab ipsa?

Non autem prætereundum, quod anima ista licet sit una substantia hominis, habet tamen multas potentias, eo quod ipsa est in se colligens omnium formarum se ordine naturæ præcedentium potentias: quæ omnes in intellectuali natura complentur tamquam in ultimo termino et fine, quæ sunt esse substantialium hoc modo quo forma est substantia et vivum et sensibile, post quæ consequitur intellectuale: et cum generatur homo, sicut diximus, propter continuitatem motus continue exeuntis de potentia ad actum, non erit esse et vivum simul, nec vivum et sensibile simul, neque sensibile et rationale simul. Et ad vivum et sensibile operantur virtutes quæ sunt in semine per virtutem animæ et intellectus primi: sed ad complementum quod est rationale esse et intellectuale, non operatur nisi solus primæ causæ intellectus, ad cujus imaginem et similitudinem substantia producitur rationalis: et hac de causa ipsa etiam tota substantia animæ viribus potentiarum vegetabilis et sensibilis conjungitur organis corporalibus, et non agit sine illis, sed viribus comple-

menti ultimi rationalis et intellectualis, nulli omnino parti corporis conjungitur, nec est actus alicujus partis corporis.

Et ex hoc contingit, quod istæ partes animæ differenter sua informant animata : anima enim vegetabilis eo quod magis vicina est materiæ, tota quidem materiam informat, et partem in qua ipsa ultima est perfectio : quia etiam totam plantam vocamus plantam, et quælibet ejus pars non divisa ab ipsa planta vocatur, sicut ramus, et stipes, et hujusmodi. Et hujus causa est, quia secundum totum suum potestativum quod est universitas suarum virium, est in qualibet parte. In qualibet enim plantæ parte nutrit, auget, et generat. In his autem in quibus anima sensibilis est perfectio ultima, totum quidem denominat et perficit, eo quod in toto est universitas suarum potestatum tota : sed quia secundum potentias distribuitur partibus, et non in qualibet parte est quælibet sua potestas, ideo non denominat partes nisi a particularibus partibus suæ potestatis : et ideo totus leo est animal et leo, sed oculus ejus non est animal vel leo, sed est pars ejus visu perfecta, et sic de aliis partibus.

Anima autem rationalis eo quod quædam est forma hominis, facit hominem esse hominem totum. Sed quia secundum particulares potestates non distribuitur membris, et ideo membra non denominantur ab ipsa, nec a viribus ejus : et ideo oculus hominis nec est homo, nec intelligit, nec ratiocinatur : propter quod constat ipsam esse separatam a partibus corporis secundum quamlibet suam potestatem : et ideo inter omnes magis accedit ad causæ primæ similitudinem : sed vires quæ conveniunt ei ratione naturarum, quæ potentiæ sunt in ipsa et completæ per ipsam, sicut sunt vires vegetabilis et sensibilis, distribuit partibus corporis. Et ideo rationalis anima in quantum rationalis est, secundum esse naturæ conjuncta est toti, et non alicui parti ipsius. Nisi enim conjuncta esset

toti, non esset homo, sed animal tantum quod constituitur per ipsam : hoc autem absurdum est. Et nisi esset in generatione accepta, non esset forma naturalis hominis, quod iterum est absurdum. Talis igitur est in quantum est rationalis secundum illum modum quo est substantia colligens in se sicut in complemento et fine essentiali ultimo esse, vivere, et sentire : et ipsa substantia ex qua emanant quædam potestates affixæ partibus corporis, et quædam non affixæ partibus corporis, et illæ quæ sunt affixæ corpori, sunt sicut instrumenta quibus regit et movet corpus anima rationalis : et ideo sicut vegetabilis in plantis imprimit in naturam, et ideo natura in vegetabili agit ad formam vegetabilis sibi impressam : et sicut sensibilis in animalibus imprimit in vegetabilem, et per vegetabilem in naturam, ut agat ad formam sensibilis : ita in homine rationalis anima imprimit in sensibilem, et per sensibilem imprimit in vegetabilem, et per hanc imprimit in naturam, ut omnis actio corporis ad formam rationalis perficiatur : propter quod carnes hominis et ossa et hujusmodi non conveniunt in forma et specie et ratione cum carnibus et nervis animalium brutorum.

Amplius ex hoc patet, quod ipsa vegetabilis et sensibilis non sunt ejusdem rationis in homine et in plantis et in animalibus brutis : quoniam istæ potentiæ sunt in homine secundum esse rationalis animæ. Sola enim ultima forma dat esse speciei et formæ, et antecedentes omnes sunt potentiæ essentielles determinatæ per ultimam formam, sicut jam sæpius dictum est. Ex hoc etiam manifestum est, quod vegetabilis et sensibilis separantur quidem a rationali loco et subjecto : sed rationalis nec intellectu, nec loco, nec subjecto separari potest a vegetabili et sensibili : sicut nec forma posteriorum numquam intelligi potest esse separata ab ea quæ prior est in ordine naturæ, quam perficit et ponit in numerum : prior enim in ratione subje-

cti habet se ad sequentem, sicut in ante habitis diximus: quod quia probatum est in ante habitis, hic supponatur.

Contra
Averroem.

Et hoc solum est ex quo totus dissipatur error Averrois et Abubacher dicentium unum numero intellectum esse in omnibus hominibus. Si enim unus numero intellectus secundum esse est in omnibus, oportet quod una numero natura vegetabilis sit in omnibus hominibus: et per consequens oportet, quod una numero digestio et unum numero augmentum, et unus numero visus, et imaginatio, et memoria sint in omnibus hominibus: quod absurdum et derisione dignum est: igitur constat non unum numero intellectum esse in omnibus hominibus.

Ex prædictis enim constat quoddam quod antiqui dixerunt Stoici, Platonis dogmata sequentes, quod videlicet natura quidem per principia quæ sunt in semine, operatur ad animam intellectualem, sed non operatur ipsam animam: quæ, sicut dictum est, ex principiis moventibus in semine, quæ informata virtute intellectus movent in generatione hominis, prius est vita quam sensus, et prius sensus quam intellectus: et complementum intellectus non inducitur virtute alicujus principiorum moventium in materia, sed potius ipsa luce intellectus moventis, qui est causa prima. Et hac ratione dixit Aristoteles in libro de *Causis proprietatum elementorum et planetarum*, quod anima rationalis creatur in hominis embryone jussu Dei, et est quædam resultatio suæ lucis.

Amplius jam patet qualiter inter omnes naturales formas anima intellectualis verior forma est: eo quod est magis separata et nobilior omnibus, eo quod in se colligit omnes alias sicut potestates, quæ sunt esse, vivere, sentire, movere secundum locum, et intelligere. Et cum istæ sint bonitates nobilissimæ, a prima causa ad perfectiones rerum naturalium fluentes, constat ipsam nobilissimam esse, quæ omnes istas non sparsim, sed

unitive colligit ad esse intellectualem, sicut ex antecedentibus est manifestum, et est ipsa juxta primam causam et immediata ei inter omnia communia quæ per generationem esse accipiunt. Hæc est igitur vera animæ hominis natura.

CAPUT VII.

De natura possibilis et agentis intellectus in homine, et qualiter se habent ad animam?

Status autem hujus naturæ est secundum intellectum et vires appetitus intellectum consequentes, et de his de quibus de partibus animæ in diversis libris nostris disputavimus, satis dictum est: nunc ad sciendum naturam animalis rationalis, nihil aliud oportet hic dicere, nisi quod in anima duo sunt intellectus, quorum unus est quo est animam omnia intelligibilia fieri, et vocatur intellectus possibilis: et alter quo est animam omnia intelligibilia facere, et vocatur intellectus universaliter agens.

Et primus quidem se habet ad intelligibilia sicut perspicuum in medio et in oculo se habet ad visibilia. Ostensum autem jam est, quod perspicuum formaliter connaturale est visibilibus, et confert eis esse spirituale, secundum quod sunt in ipso, et visibilia in illo individua in materia, ubique efficiuntur in perspicuo, et in omnibus his excellenter se habet intellectus possibilis ad intelligibilia: est enim connaturalis formis intelligibili-

bus, et ideo se habet ad intelligibilia sicut tabula rasa ad picturam : quoniam in tali habitudine superficies tabulæ est substantia imaginis terminata : et hoc modo colores in perspicuo sunt natura terminata dimensionibus colorati quod videtur : et formæ intelligibiles in intellectu sunt intellectus terminatus finibus et quidditatibus rerum. Propter quod nullam materiæ comparisonem habet iste intellectus, sed potius locus est specierum intelligibilium, ad quem moventur lumine intellectus agentis intelligibilia, sicut colores lumine solis moventur in perspicuum : propter quod cum separatus sit secundum quod est virtus animæ rationalis, erunt omnia quæ sunt in ipso, ubique et semper in ipso : forma enim non est nisi individua vel universalis, et individua est per hic et nunc : et cum abstrahitur ab his, est ubique et semper : et tunc est in esse intellectus qui non dat hic et nunc esse, sed ubique et semper.

Intellectus autem universaliter agens comparatur ad intellectum possibilem et ad intelligibilia sicut lux solis comparatur ad perspicuum et ad colores. Est autem lux de natura perspicui et connaturalis perfectio ipsius, et similiter colorum, ut patet per ante dicta : et per excellentiorem modum erit intellectus agens connaturalis perfectio intellectus possibilis et intelligibilium, ita quod sicut colores non moventur ad perspicuum nisi actu luminis, ita intelligibilia non movent intellectum possibilem nisi actu luminis intellectus agentis.

Et hoc est quod multi dicunt, et pauci intelligunt, quod omnia intelligibilia fluunt in animam ab intelligentia separata et non a rebus, quarum ipsa intellecta sunt quidditates et formæ : et in his tamen tota natura intellectualis animæ se habet magis in ratione formæ et loci

quam in ratione materiæ, sicut patet per ante dicta. Et ideo dicitur, quod universale est intelligibile quod est in ipsa habens universalitatem a separatione quam facit intellectus agens : et in hac universalitate movetur ad intellectum possibilem, et est in eo ubique per rationem simplicis, et semper per hoc quod non concernit aliquam temporis differentiam : et hoc est esse suum quod habet in intelligendo.

Propter quod mentiuntur omnino qui dicunt, quod forma quæ est in anima, duplicem habet comparisonem : unam quidem ad rem cuius est forma, et sic dicunt ipsam esse universalem : et aliam ad intellectum, et sic dicunt individuum esse per intellectum in quo est : forma enim ex comparisonem quam habet ad rem, numquam est universalis : et ex comparisonem ad intellectum in quo est, semper est universalis : eo quod in eo ubique est et semper, sicut patet per ea quæ hic et in libris nostris de *Anima* et *Intellectu et intelligibili* diximus ¹. Est autem hic intellectus aliter individuus per esse ad quod terminat hominem et vegetabile et sensibile, quod est in ipso, sicut et perspicuum unum et individuum est per aerem, aut aquam, in quibus est : et tamen est locus universalis ad quem abstracti moventur colores, et lumen unicum et individuum per luminare in quo est, et tamen est universale colorum abstractivum, et sic intelligens naturam intellectus liberatur ab omnibus erroribus diversorum hominum circa naturam intellectus errantium, quorum errores jam determinavimus in libro de *Anima* ² : sed complete ibi dici non potuit nisi prius animarum et intellectus sciretur origo.

¹ Cf. tres libros de *Anima* et duos libros de *Intellectu et intelligibili* per multa capita.

² I de *Anima*, per multa capita.

CAPUT VIII.

De natura animæ, utrum sit composita vel simplex, et unde habeat movere secundum locum et motu progressivo?

Id autem quod solerter ex prædictis est sciendum, hoc præcipue est, quod cum anima in intelligibilibus super se reflectatur, intelligens ea quæ in ipsa sunt et seipsam, convincitur procul dubio esse composita. Si enim non esset composita, oporteret quod totus intellectus esset activus qui progreditur extra se faciendo intelligibilia non in ipso : aut esset possibilis in quo fierent tantum, et non esset faciens ea, nec convertens se super ea facta, sicut lumen convertitur super colores. Neutrum autem horum solum est in anima intellectuali, sed utrumque simul : et ideo habet compositionem : et hæc sola ratio est, quare Peripatetici probant animam esse compositam.

Neque est composita ex materia et forma : quia possibilis intellectus non est materia vel materialis, sicut est inevitabiliter probatum ex ante habitis. Non enim ut materia se habet ad intelligibilia, sed sicut locus : neque ut materia se habet ad agentem, sed potius sicut connaturale ad ipsum, sicut est connaturalitas perspicui ad lucem, eo quod lucens non lucet, nisi per naturam perspicui, cujus partes conjunctæ sunt : et ideo lucens et perspicuum potius differunt per

positionem suarum partium, quam differant sicut materia et forma. Quotiescumque enim constant partes perspicui, tunc habent formam lucis : et ideo compositio nulla est in anima per rationem formæ et materiæ. Propter quod etiam Aristoteles non dicit animam esse hoc aliquid, sed formam eam absolute dicit esse.

Sed melius dicitur intellectualis natura esse composita ex eo quod est de natura sua intellectuale, et ex eo quod est perfectio intellectus. Ex intellectu enim possibili, sicut jam ostensum est, est natura intellectualis id quod est : sed ex agente est perfectio ipsius secundum esse intellectuale in actu : sicut enim perspicuum in tenebris, quas visibiles non facit in actu, non est nisi perspicuum in potentia, et per lumen cujus actu veniunt ad ipsum colores, efficitur perspicuum secundum effectum. Talis igitur est animæ compositio : propter quod omnes concorditer Peripatetici negant in natura animæ intelligentiæ esse materiam et potentiam materialem.

Ex his autem quæ dicta sunt, clarum est qualiter hæc anima sola perfecta est et nobilis : eo quod tres habet operationes, divinam videlicet, et intellectualem, et animalem : *divinam* quidem in formas faciendo tam intelligibiles, de quibus diximus, quam naturales, quibus ipsa informat omnes vires sensus et vegetationis, ut ad speciem intellectualem agant, sicut superius dictum est. *Intellectualem* autem habet intelligendo et intellectu reflectendo se super seipsam. *Animalem* autem habet in animando : eo quod ipsa est forma hominis, sicut jam probatum est superius.

Amplius ex præhabitis scitur, quod errant omnes, qui dicunt animam movere motu processivo ex hoc quod est composita : quoniam hoc nullo modo est verum : nullum enim compositum movet vel movetur ex hoc quod est compositum, sed potius ex hoc quod est simplex, movet hoc quod movet secundum locum. Primus enim motor (sicut osten-

dimus in octavo *Physicorum*) est omnino simplex, et impartibilis, nullam penitus habens magnitudinem, sed potius ex hoc movet omne quod movet localiter, quod inseparatione et universalitate accedit ad similitudinem primi motoris simplicis : ex hoc enim quod separatur, elevatur supra materiam, et materia sequitur ipsam, ex hoc quod efficitur universale modo sibi convenienti : et hoc est quod appetitus ejus non est unius, sicut appetitus materiæ, sed est multorum quæ cum uno loco non sint, consequitur per motum ad diversa loca ea quæ desiderat. Quæ autem sint moventia in hoc motu, diximus in libro de *Anima*, et in libro

de *Motibus animalium* ¹ : sed sufficit hoc dicere, quod anima movet habens motum triplicibus potentiis. Quædam autem sunt determinantia ea ad quæ movetur animal, sicut sensus, et phantasia, et intellectus, et hujusmodi, sicut prudentia et ars. Quædam sicut impetum facientia, sicut appetitus, et voluntas, et desiderium, et ira, et concupiscentia. Quædam autem complectuntur utrolibet, sicut prohæresis, synderesis, et liberum arbitrium, et hujusmodi.

Quæ autem nunc dicta sunt, ad cognoscendam naturam animæ secundum seipsam, sufficiunt ad præsens.

¹ Cf. tres libros de Anima et duos libros de Motibus animalium per multa capita.



TRACTATUS II

DE NATURA ANIMÆ NON CONJUNCTA CORPORI SECUNDUM QUOD
IPSA EST IN SE, RESOLUTO CORPORE POST MORTEM.

CAPUT I.

*De rationibus Platonis ad Phædrum,
quibus animas probat esse perpetuas.*

Prælibatis autem his, facile est nobis cognoscere, utrum anima remaneat corpore resoluto post mortem animalis vel non. De hoc autem Plato in *Phædro* conatus est dicere, sed secundum aliquos

non sunt sufficientia quæ dicit : ipse enim videtur ponere, quod hoc sit motus principium in his quæ per se aut a se moventur, quod ipsum movet seipsum : hoc autem quod ipsum movet seipsum, perpetui est motus : et hujus exemplum dicit esse in majori mundo, in quo scilicet id quod movet seipsum, est causa perpetui motus.

In octavo autem *Physicorum*¹ declaratum est a nobis, quæ sunt illa quæ moventur a se, et quæ non. Ostensum est enim ibi, quod in minori mundo, qui est animal, est similitudo ad majorem mundum in hoc quod est moveri a seipso et movere seipsum. Et ideo cum in majori mundo motor primus sit incorruptibilis et æternus, concludit Plato quod in minori mundo motor est incorruptibilis et perpetuus. Sicut enim in majori mundo motus reducitur in primum motorem, qui non movetur primo ab alio, neque per se, neque per accidens, sed sibi es-

¹ VIII Physic. per multa capita.

sentiale est movere in quantum est motor: nec postquam movere cœpit, unquam desistit: et ita illud cui essentialiter est movere, movet semper. « Itaque, inquit Plato ad Phædum discipulum suum, in minori mundo quando animal movetur non per accidens, sed per motorem connaturalem sibi et conjunctum, oportet quod unum sit primum movens quod in his quem per se et a se moventur, non est per accidens movens: quoniam si esset per accidens movens, posset non movere, et sic cessaret motus, animali permanente, quod esse non potest ad minus propter motum cordis, et propter motum spiritus quo vehitur vita et virtus per corpus. »

Amplius primum movens in talibus non est per aliud movens: quoniam secundum hoc in eadem natura animalis esset aliud movens ante ipsum, et sic ipsum non esset primum movens. Quod autem est sic primum movens, non per accidens, nec per aliud ante se est movens, ipsum est essentialiter movens: et quod est essentialiter movens, est semper movens, quantum in se est: ergo anima animalium motivorum semper prompta est movere, et semper est movens quantum in ipsa est. Constat autem quod non semper est movens corpus, quoniam tempore determinato distabunt levia et gravia ex quibus componitur corpus: et similiter calida, humida, frigida, sicca: ergo cum primum movens essentialiter habeat movere, et semper moveat, quantum est in se, convincitur primum movens esse seipsum movens in omnibus quæ naturaliter per se, et non ab alio, neque per accidens moventur: sicut gravado plumbi essentialiter est movens plumbum ad centrum, licet non semper actualiter moveat ipsum ad centrum: et impossibile est talem vim motivam separari ab ea, licet aliquando separetur actus.

Amplius in majori mundo primum movens est sicut unitas, sicut in ante habitis ex dictis Platonis ostendimus: hic autem inductum est, quod primum movens essentialiter movet: quod autem essentialiter movet, seipso et seipsum movet. Cujus probationem esse dicit Plato: quia nisi seipsum moveat in id quod movetur ab ipso, id quod ab ipso movetur non movebitur, sicut patet in cœlestibus et terrenis: quia nisi primum movens cœlum moveat seipsum, cœlum non movebitur ab ipso: et nisi primum movens quod est in animali, seipsum moveat in corpus animalis et in membra ejus, non movebitur animal: ergo, ut inquit Plato, primum movens in quolibet ordine habet essentialiter movere seipsum. Aut enim seipsum movet in id quod movetur, aut aliquid aliud movet seipsum. Si seipsum: ergo habetur propositum, quod primum movens seipsum est movens. Si aliud aliquid movet ipsum in id quod movetur, sequitur necessario quod per aliud movet: et sic movebitur cœlum et animal per accidens, et non per motorem primum, cui essentialiter est movere: quod ostensum est esse inconveniens in VIII *Physicorum*¹.

Si autem dicatur, quod primum movens in quolibet ordine motus habet movere se in substantiam ejus quod movetur: sed si non sit ita, non movebit se: hoc autem esse non potest, ut dicit Plato. Si enim detur quod aliquid non potest movere se, sequitur quod non movebit se in aliquid aliud a se: et ideo movere se est ante id quod est movere se in aliud a se: id quod est prius non causatur a posteriori: ergo movere se non causatur ab eo quod est movere se in aliud: igitur tam in cœlo quam in terra, in omnibus quæ a se moventur primus motor movebit seipsum, etiam deficiente sibi corpore quod movet.

Si autem aliquis dicat, quod primum

¹ VIII *Physic.* per multa capita.

movens non movet seipsum intra id quod movetur ab ipso: hoc stare non potest, quia id quod movetur naturaliter et primo, non movetur ab eo quod extra ipsum est: quia sic moveretur violenter, et motus violentus non potest esse naturalis et primus, sicut in *Cælo et Mundo*¹ est demonstratum. Cum igitur moveatur ab extrinseco sibi motore, oportet quod aliquid faciat motorem intrinsecum ei quod movetur: et cum hoc non possit esse violentum aliquid, oportet quod sit naturale. Et hoc non potest esse nisi altero duorum modorum: qui videlicet aut ex generatione est intra naturam ejus quod movetur: aut quod ipse moveat seipsum. Sed quod generatione sit intra id quod movetur, est impossibile: quia sic esset forma materialis, quæ est virtus in corpore, quæ non potest esse prima causa motus, sicut consequenter probabitur: ergo relinquitur quod primus motor in motu secundum locum seipsum moveat intra id quod movetur ab ipso, et per consequens quod ipse moveat seipsum, in omnibus his in quibus est vere primus motor motus localis, sicut est in cælo. Animarum enim natura secundum Platonem in *Timæo*, est duplex: quædam enim conformis est cælestibus justitiam et pietatem colens, a diis cælestibus data, et fœnus eorum existens, tradita naturæ corporeæ: et hoc quia virtutem habet divinam et virtutem intellectualem, separata est, non mōta ad motum quem movet, sed potius agens motum sui et non alterius causa moventis: et hoc quia ex se movet, est prima causa motus. Alia autem anima non ex fœnore cælesti, sed ex se mente materiali educta, acta a natura corporea potius quam agens, quæ numquam potest esse libera in movendo, ut ex se et sui causa moveat quod movetur: et ideo non nisi intellectualis anima est seipsam movens: et horum probatio plene habita est a nobis alibi.

His igitur dictis ad explanationem verborum Platonis, videamus Platonis conclusiones. Habitum enim est, quod id quod per se movet, seipsum movet. Adhuc autem quod seipsum movet, est primum non dependens ab alio. Primum autem non dependens ab alio est incorruptibile: eo quod ipsum non habet contrarium intus vel extra. Et ulterius sequitur quarto, quod talis motor sit motor simplex: quia si esset compositus, dependeret ab alio, et non esset primum: quia omne compositum a suis dependet componentibus, et utitur illis, et si movet, ab illis habet quod movet. Et hæc omnia aliena sunt a primo motore. Igitur primum quod movetur a se in minori mundo, ad similitudinem ejus quod in majori mundo a se movetur, est perpetuum et incorruptibile. Istæ igitur quatuor propositiones consequuntur se, quod primus motor essentialiter movet, et quod primus motor semper seipsum movet, et quod primus motor incorruptibilis est, simplex, et perpetuus. Cum autem motor sit unus simplex, movet se in id quod movetur in dextrum ubi incipit motus, et secundo in sinistrum per quod regyrat omnis motus eorum quæ a seipsis moventur, sicut diximus in libro de *Motibus animalium*. Sic igitur ab unitate simplici procedit binarius, et cum agit in dextrum et in sinistrum sicut centrum medium unde est motus per linearum exitum, quæ sunt nervi et chordæ, procedit simplex unitas in binarium, et binarius in multitudinem: et sic perficitur tota motus processivi multiplicitas.

Hæc igitur sunt quæ ex scientia Platonis colliguntur, et ex his dicit animam rationalem esse numerum seipsum moventem semper perpetuo motu vitæ et incorruptibili. Hæc autem non satis perspecte dicta sunt. Probatum enim est in *Physicis* nostris per demonstrationes infallibiles, quod nihil indivisibilem move-

¹ I de Cælo et Mundo, per multa capita.

tur, et quod non movetur, non movet seipsum, et quod primus motor cui essentialiter est movere, ita est movens, quod nullo modo movetur, sed est immobilis, et quod anima rationalis non movetur: quæ omnia videntur esse contra Platonem. Et probatum est in scientia de *Anima*¹, quod ipsa non est numerus, et quod ipsa non est seipsum movens, et longum et inutile esset omnes has hic repetere demonstrationes.

Sed attendendum est, quod cum dicit Plato primum motorem in motu locali et processivo movere seipsum, et moveri a seipso, non intelligit quod eodem genere motus moveat se quo movet illud quod movetur a se: quia sic moveret se localiter: et hoc non potest esse. Nec intelligit, quod secundum aliquam aliam speciem motus moveat se, secundum quam motus est exitus de potentia ad actum. Sed dicit illud movere se, quod in actu existens continue exierit et emittit actum: sicut sol in actu existens continue exierit et emittit lucem sine sui mutatione. Per hunc enim modum dicit motorem primum ex se exerere et emittere motum: eo quod essentialiter est sibi movere, sicut probatum est: et hoc vocat movere se, et moveri a se. Non enim intellexit hoc nisi secundum quod motus est actus moventis, et non secundum quod est actus mobilis. Propter quod dixit nihil movere se, nisi quod est essentialiter movens, et cujus actus essentialis est ipse motus, et dicit motum esse in movente sicut lux est in lucente. Aliter autem sumimus nos motum, quando dicimus motum esse actum mobilis sive ejus quod movetur secundum quod est in potentia exeunte ad actum: et sic demonstratum est nihil indivisibilium moveri, et primum motorem non moveri, et nihil indivisibile a seipso moveri, et alia hujusmodi quæ in *Physicis* et in scientia de *Anima* de-

monstrata sunt. Sic autem correctis dictis Platonis, probatio sua est necessaria, et inevitabiliter concludit animam rationalem vivere et manere post mortem, nec perire eam pereunte corpore.

CAPUT II.

De separatione animæ rationalis a corpore secundum probationes Avicennæ et Algazelis.

Avicenna autem in suo libro de *Anima*² ex multis et per alia media concludit idem. Hic enim primo ostendit, quod anima rationalis non est virtus in corpore, ita quod secundum esse vel operationem vel utrumque a corporis harmonia dependeat: et per hæc ostenditur, quod non destruitur corpore destructo. Si enim esset virtus in corpore, juvaretur bona habitudine corporis ad actum, et impediretur ab actu ex discrasia corporis generaliter. Hoc autem non convenit generaliter intellectui secundum quod est intellectus: eo quod etiam viribus animæ sensibilis hoc non per se convenit, sed in quantum esse habent in organo formæ ipsius, promoventur bona cordis habitudine, et impediuntur mala habitudine corporis, sicut dictum est ab Aristotele in libro de *Anima*³, quod si senior

¹ I de Anima, tract. II, cap. 3 et 6.

² AVICENNA, de Anima, parte v, cap. 2 et 4.

³ ARISTOTELES, In I de Anima, tex. et com. 65.

accipiat oculum juvenis, videbit utique sicut juvenis.

Signum autem aliud ejusdem rei est, quod virtus in corpore operans suum non apprehendit instrumentum : quia nec visus, nec auditus, nec imaginatio, nec aliqua alia virtus in corpore operans, se vel suum apprehendit organum. Intellectus autem et seipsum et omnia apprehendit organa¹ : propter quod liber et separatus ab omnibus esse dignoscitur.

Adhuc autem quia nullum instrumentum est, cujus harmonia et proportionalis commixtio sit omnibus corporalibus et incorporalibus. Intellectus autem est omnia fieri. Non igitur est in aliquo corporeo instrumento, sed separatus est ab omnibus. Adhuc autem quia omne operans in organo, læditur ab excedenti harmoniam organi sui, sicut visus a claritate solis. Intellectus autem a maxime intelligibilibus non læditur, sed confortatur. Separatus igitur esse dignoscitur et non conjunctus alicui organo.

Adhuc quia omnis organica virtus animæ primum est in potentia materiæ, et per generationem educitur de illa : et hoc impossibile est dicere de natura intellectuali, sicut in superioribus hujus libri, et in XVI de *Animalibus* ostensum est. Est enim intellectualis natura divinum quoddam, et a materia generabili separatum.

Adhuc etiam ætas quæ est corruptio naturalis, debilitat quæcumque sunt organica, sicut sensus et imaginationes corrumpuntur in senibus : et tamen in his sunt fortiores et certiores intelligentiæ : non enim juvenes æqualiter judicant sensibus presbyteris : et sic iterum est clarum intellectum organicum virtutem non esse.

Adhuc autem quæcumque sunt virtutes organicæ, homini communes sunt

cum brutis. Intellectus autem nihil omnino habent quæcumque sunt irrationalia.

Adhuc quæcumque est virtus operans in corpore, non est apprehensiva nisi corporalium formarum, figuras scilicet et intentiones qualitatum sensibilium habentium. Intellectus autem, sicut in scientia de *Anima* et de *Intellectu et intelligibili* probatum est, apprehensivus est simplicium infigurabilium et insensibilium sive hic et nunc existentium. Non igitur est virtus in corpore operans.

Amplius dat esse intelligibile simplex formis intelligibilibus, quod non potest perficere aliqua virtus in corpore operans.

Amplius potest intellectus tam corporea quam incorporea incorporaliter et quasi intemporaliter intelligere : quod non potest facere aliqua virtutum operantium in corpore.

Propter quod concludit hic Philosophus, et Algazel qui eum in omnibus sequitur, animam intellectualem genus alterum animæ esse a vegetabili et sensibili : et quia divinum genus animæ est, dicunt hoc solum separari a corpore sicut perpetuum a corruptibili. Non enim sequitur ut si perfectio corporis, quod non separetur a corpore cujus est perfectio, eo quod non perficit ipsum sicut forma per esse educta de materia, sed potius ab extrinseca causa esse accipiens, quæ est causa prima : et perficit corpus sicut nauta navem, qui est motor in nave existens, et per esse substantiale non dependens a nave, licet per operationem nauticam a nave dependeat : et ideo separatus nauta a nave, licet non nautice agat, est tamen, et alias operatur operationes : et similiter anima separata a corpore est quidem, sed non vegetat, neque significat corpus, sed alias operationes

¹ Cf. III de Anima, tex. et com. 18.

sibi convenientes secundum intellectum operatur.

Amplius tres hæc anima nobilis habet operationes naturaliter, divinam videlicet, et intellectualem, et animale. *Divinam* quidem, sicut dicunt Philosophi, eo quod ipsa est causatum habens similitudinem et imaginem causæ primæ. *Intellectualem* autem, eo quod ipsa in esse progreditur sub lumine intellectus intellectualium substantiarum, sicut in præcedentibus habitum est. *Animalem* autem habet ex suis potentiis quæ sunt vegetativæ et sensitivæ, quæ tamen secundum esse suum et non secundum esse illarum sunt in ipsa, sicut jam habitum est ex superius determinatis : et ideo cum in esse suo proprio et naturali sit divina et intellectualis luminis forma quædam, constat quod secundum essentiam suam et esse proprium non dependet a corporeo organo aliquo : et sic ipsa non est virtus in corpore, sed separata ab ipso.

His omnibus ita suppositis, adhuc obicit Avicenna sic, quod si anima destruitur destructo corpore, aut hoc est ideo quia ipsa destruitur per seipsam, quia scilicet in sua substantia est corruptibilis : aut quia destructo corpore destruitur, cum secundum se non sit corruptibilis, sicut destruuntur formæ corporales et formæ quæ sunt virtutes in corpore.

Si autem destruitur ideo quia ipsa secundum se est corruptibilis, tunc sua substantia corruptibilis est. Quidquid autem per substantiam est corruptibile, in se habet aliquid in quo est potentia destruendi, et aliquid in quo est actus permanendi : et hæc non insunt ei secundum idem : quoniam potentia destruendi inest secundum materiam et privationem, quæ machinatur ad maleficium, et actus permanendi est secundum formam quæ dat esse et permanere secundum actum. Oporteret igitur quod anima esset composita ex materia subjecta privationi, et ex forma actum et esse conferente, quod sæpissime improbatum

est. Igitur non est corruptibilis anima secundum seipsam.

Si autem corrumpatur corrupto corpore, tunc hoc est ideo quia habet dependentiam ad corpus : aut igitur dependet ad ipsum sicut se ad id quod est simul cum ipsa, aut sicut ad prius se, aut sicut ad posterius se existens. Si dependet ad ipsum sicut ad id quod est simul : aut hæc simultas est ipsum esse animæ et corporis, ita quod hoc ipsum quod sunt, simul sint : aut per accidens est adveniens animæ et corpori. Si autem hoc ipsum quod sunt, simul sunt, tunc anima et corpus secundum esse suum totum sunt relativa, et non sunt substantia aliqua, nec partes componentes substantiam aliquam, quod falsum est apud omnes. Si autem accidit ea simul esse, tunc dato quod auferatur hoc accidens, manebit anima secundum substantiam sine corpore : et tunc habetur propositum. Si autem dependet ad ipsum quantum ad suum esse sicut ad id quod est prius, hoc erit aut secundum quod prius dicitur prius tempore, et causa, aut prius natura. Si corpus prius est anima tempore, tunc anima non dependet a corpore, nec corpus ab anima : et sic habetur propositum, scilicet quod anima rationalis non corrumpitur sicut dependens a corpore : quoniam constat quod ea quorum unum est prius altero tempore tantum, aut dignitate tantum, neutrum dependet ab altero secundum esse. Si autem corpus est prius anima ut causa, constat quod illa nec est efficiens, nec forma, nec finis, quod falsum est : anima enim forma et finis est corporis, et non e converso : oportet igitur quod corpus sit prius sicut materia. Ergo oporteret quod anima rationalis educeretur de corpore, sicut de materia. Et hoc supra improbatum est : quia scilicet si ita esset, esset anima forma in corpore, et intellectus esset alicujus partis corporis actus, quod falsum esse constat.

Si autem dicatur quod corpus prius est anima, sicut dicitur id quod natura

est prius, tunc corpus esset de ratione animæ, et fieret anima ex corpore et differentia aliqua constitutiva, quod absurdum est. Si autem dicatur, quod dependet ab ipso sicut a posteriori, sive hoc posterius dicatur, sicut causatum posterius est causa, sive sicut natura posterior opponitur priori secundum naturam, sive posterius tempore, facile cuilibet patet quod numquam prius secundum esse dependet a posteriori : igitur anima rationalis non corrumpitur sicut dependens a corpore : ergo nullo modo corrumpitur.

Amplius si corrumpitur anima, aut corrumpitur aliquo agente et corrumpente eam, aut corrumpitur per seipsam distantibus his quæ componunt eam : aut si simplex est, corrumpitur per potentiam materiæ procedentem se ad maleficium : aut corrumpitur corpore corrupto. Si aliquo agente in ipsam, oportet quod illud sit contrarium¹ : et constat quod anima rationalis nullum penitus habet contrarium. Si autem corrumpitur distantibus componentibus eam, oportet quod esset composita ex contrariis, quod iterum omnibus videtur absurdum. Si autem tertium modum habet corruptionis, sicut elementa corrumpuntur : tunc iterum oportet quod habeat contrarium secundum unam, vel duas qualitates, vel plures, si sequamur Empedoclem dicentem quod simplicissima multarum et contrariarum sunt qualitatibus. Si autem corrumpitur corruptione corporis, tunc non est separata, sed est aut corporalis forma, aut virtus operans in corpore ex principiis corporis harmonicis ad esse deducta, et operans per corporis harmoniam : et hoc est improbatum per ante dicta : anima igitur rationalis non destruitur destructo corpore.

Et his rationibus consentiunt Avicenna et Algazel et Constabenuce, et plures alii philosophi Arabum.

CAPUT III.

De solutione objectionum quæ sunt contra dicta Avicennæ et Algazelis.

Dubitabit autem forte aliquis circa ea quæ dicta sunt, quando potest hoc esse, quod inceptio alicujus esse dependeat ad inceptionem alterius, et destructio ipsius non sequatur illo destructo. Multi enim sapientium concorditer in hoc consenserunt, quod esse animæ incipit cum generatione corporis, et ante ipsius generationem non est. Et ex hoc surgit difficultas imaginandi et intelligendi multis, qualiter esse habeat anima post destructionem corporis.

Amplius anima est forma et perfectio corporis : perfectio autem nec ante materiam quam perficit habet esse, nec post eam. Nec potest dici, quod anima non sit perfectio corporis. Si enim quæretur quid sit illud quod homini in quantum homo est, dat esse et rationem et ponit eum in numerum specierum animalium? Non potest dici nisi quod anima rationalis hoc facit. Oportet igitur quod sit in materia, et esse habeat in ipsa : et si esse habeat in ipsa, mirum videtur si quis dicat eam habere esse sine ea.

Amplius constat quod anima rationalis continet corpus hominis : quia egrediente anima marcescit corpus et exspirat, sic-

¹ I Physic. tex. et com. 80.

ut in libro de *Anima* ¹ probatum est. Quod autem continet corporis materiam, esse habet in ipsa materia : et videtur totus usus formæ esse in continendo materiam et dando sibi esse et speciem : et ideo sine materia videtur et inutilis forma, et non posse videtur esse sine ea.

Vulgariter autem etiam instant quidam quærentes, si anima habet esse sine corpore, quod illud esse liberius et nobilius est eo esse quod habet in obligatione corporis, ad quid anima incorporatur materiæ? Videtur enim quod hoc sit perversum et inutile : propter quod etiam Stoicus nomine Prothymus cum audiret *Phædrum* Platonis, in quo anima immortalis esse probatur, interfecit seipsum, ut de hac misera vita animam corpori obligatam redimeret, et vivens sine corpore anima felicioribus contemplationibus ab intellectibus divinis perficeretur.

Ad has et similes dubitationes omnes respondent Avicenna et Algazel et similes Philosophi, quod non oportet si aliquid dependet ad aliquid secundum suum incipere esse, quod propter hoc dependeat ab ipso secundum sui esse desitionem. Et hujus causa est, quia etiam anima rationalis in inceptioe non produci-tur in esse complete ex materiæ principii : quia sicut habitum est et in XVI de *Animalibus* libro, et in hujus libri antecedentibus, complementum esse animæ rationalis est ex causa prima intellectuali et agente in generatione hominis. Et ideo cum secundum esse quod habet a causa prima nullo modo dependeat ad materiam corporis humani, tamen secundum incipere dependet ad generationem, non secundum quod generatio est ex principii materialibus, sed secundum quod causa prima intellectualis agit in ipsa, et producit eam in esse in generatione corporis, sicut ex antecedentibus constat.

Nec ipsa est forma et perfectio corporis sicut formæ naturales, sed potius in talibus perfectionibus sunt gradus, sicut ex antehabitis hujus libri constat. Et ideo quia hæc forma est juxta motorem primum, et ei proxima inter omnes formas naturales existentes, non est mirum si multa conveniunt ei ex primo motore cujus proprietates plures habet quam materiæ, quæ non conveniunt alii formæ naturali.

Vulgus autem loquitur sicut vulgus imperitum et nesciens distinguere naturas rerum : quoniam proprius gradus animæ rationalis est accipere facultatem contemplandi intellectualia per continuum et tempus, sicut ostendimus in scientia de *Anima* et in scientia de *Intelligibilibus* : et hanc facultatem anima non acciperet, nisi esset una animatum quæ conjunctæ sunt sensibilibus et imaginationibus. Hæc autem licet in præinductis libris plane constet, tamen ut perfectior sit hæc doctrina, etiam in sequentibus breviter et compendiose istud, Deo donante, explicabimus.

Nec intelligi debet secundum dictos Philosophos, quod anima rationalis maneat post destructionem corporis tantum in natura intellectuali sine vegetabili et sensibili potentiis : quia sicut in *Physicis* dictum est, numquam intellectus prout est forma animæ, separatur a vegetativo et sensitivo, sed e converso illæ potentiæ separantur ab ipso. Ex quo enim in intellectuali anima sunt secundum esse intellectualis animæ, et non secundum esse proprium, sicut natura generis in specie est secundum esse speciei, constat quod sunt fundamentum esse intellectualis et rationalis : et ideo non est intellectualis natura in genere animæ sine vegetativo et sensitivo : propter quod ista manent in anima rationali sicut fundamenta, et secundum esse rationalis ani-

¹ III de Anima, tract. III, cap. 12.

mæ in potentia, et non in actu operationum quas habent in corpore. Sed actum habent sine corpore illum tantum qui est actus fundamenti, hoc est, ut in ipsis fundetur esse animæ intellectualis.

Et si quærat quis, quomodo hoc fiat, quod in anima rationali manent post corpus vegetativum et sensitivum, et non in animalibus aliorum animatorum? plana est responsio per ante dicta, quod videlicet hoc contingit propter duas causas: quarum una est, quod non solum materiales causæ educunt in homine vegetativum et sensitivum, sed potius primum agens quod est intellectus divinus, et ab illo informatæ agunt omnes qualitates quæ sunt in materia. Secunda autem causa est, quia causæ agentes in materia hominis non terminant actionem suam nisi in formam et in esse intellectualis naturæ: et hoc in nullo contingit nisi in homine in quo calor digerens et spiritus formans in semine magis movent et formant secundum virtutem cœlestem et secundum virtutem animæ, scilicet secundum virtutem intellectus, quam secundum qualitatem elementi vel secundum qualitatem materiæ. Propter quod etiam ipse spiritus seminis ab Aristotele in suo libro decimo sexto de *Animalibus* spiritus et intellectus vocatur, sicut diximus in *Physicis*, ubi locuti sumus de *hominis generatione*.

Hæc igitur inductarum objectionum est solutio secundum Avicennam et sequacem suum Algazelem.

CAPUT IV.

De solutione inductarum objectionum secundum Averroem et Abubacher et Avempace, et de improbatione erroris qui est in solutione eorum.

Averroes autem et Abubacher et Avempace, et quidam alii Philosophorum Arabum alia via incedunt. Horum autem sententia est, non ejusdem substantiæ esse animam sensibilem et intellectualem in homine. Propter quod dicunt ex virtutibus quæ sunt in semine, non educi per generationem nisi animam sensibilem: esse autem hanc plurium operationum propter corporis æqualitatem quam in aliis: intellectualem autem naturam dicunt esse separatam, et irradiare super animam hominis, sicut irradiat lux solis super perspicuum: et ex illa irradiatione dicunt fluere formas intelligibiles in animam, sicut ex lumine solis fluunt visibilia in perspicuum, sicut diximus superius: et hoc modo continuari dicunt lumen intelligentiæ animæ ipsius, sicut continuatur lumen solis perspicuo: et per hanc continuationem dicunt hominem esse intellectualem. In generatione autem hominis incipit hujusmodi continuatio luminis intelligentiæ cum anima: et est primo sicut lumen immissum nubibus propter multum fluxum nutrimenti in organa apprehensivæ animæ. Et ideo intellectus in pueris est sicut in ebrio vel epileptico: deinde residente fluxu illo

clarificatur et serenatur intellectus, sicut serenatur lumen in aere, remotis nebulis.

Horum igitur dictum redit ad hoc quod intellectualis natura non generatur, nec incipit esse secundum substantiam suam in generatione, sed incipit esse secundum expansionem luminis sui super animam : et quia hæc expansio sui luminis super animam est ab extrinseco, dicunt hoc modo intelligi, quod intellectus ingreditur ab extrinseco, et hoc modo multiplicare se dicunt intellectum, sicut multiplicatur lumen solis secundum illuminata quibus immittitur et cum quibus continuatur : et sicut illuminatis subtractis non remanet nisi unicum lumen solis, ita pereuntibus hominibus dicunt unum intellectum perpetuum et incorruptibilem ex omnibus relinqui. Et ideo dicunt non esse mirum si intellectualis natura non destruitur destructo corpore : quia non incipit, neque generatur incipiente corpore, nisi per accidens hujus continuationis quam diximus : hanc autem continuationem dicunt fieri ad imaginationem et phantasiam, eo quod ab illis potentiis lumen intellectuale universale primum abstrahit : et hic error a nobis in tertio libro de *Anima*¹ quem fecimus, tactus et improbatus est : sed sufficienter ibi tangi non potuit : quia non nisi per generationem hominis, et mortis ejus scientiam perfecte poterat intelligi.

Est autem hic error omnino absurdus et pessimus et facile improbabilis. Quod enim statim ex hoc sequitur error, est quod intellecta omnia semper sint extra nos : vires autem animæ nostræ secundum dictum errorem sunt a quibus lumine intellectus fit universalis abstractio et separatio. Non est autem intelligibile quod ejusdem formæ ab eodem fiat separatio, et per abstrahens ad idem conjunctio, sicut in exemplo quod ponit, est

manifestum. Lumen enim abstrahens colores a coloratis corporibus non conjungit eos abstrahendo coloratis, sed potius perspicuo in quo secundum esse spirituale salvantur. Igitur intellecta ab imaginibus animæ abstracta, similiter alicui alii conjungetur extra animam et animæ potentias : non autem fit umquam intellectus ab aliqua anima vel intelligentia per hoc quod est extra ipsam : ergo anima hominis nihil omnino intelligit, neque considerat de formis intelligibilibus : quod cuilibet patet esse absurdum.

Amplius omnis susceptio formæ est secundum potestatem suscipientis, sicut sæpe probavimus in libris *physicis*. Constat autem ex his quæ in libro de *Anima* bene tractata sunt, non esse de potestate sensibilis animæ suscipere formas secundum esse intellectuale, secundum quod sunt ubique et semper : ergo secundum hoc esse non sunt nisi intelligentia aliqua : hoc autem (ut isti dicunt) nihil animæ est : ergo anima nihil intelligit vel cognoscit eorum quæ sunt intelligibilia.

Amplius oculus in accipiendo visibilia non habet potestatem colorati terminati, sed potius perspicui : et si haberet potestatem colorati, non acciperet visibilia omnia, sed unum : nec acciperet visibilia nuntiando et mittendo visibilia sensui communi, sed retinendo materialiter tantum. Sic igitur simile est in aliis potentiis animæ, quantumcumque illuminatur phantasia in homine, quamdiu phantasia est, numquam habebit facultatem aliam receptionis nisi particularis formæ : et facultas receptionis universalis semper erit in natura altioris facultatis : et si illa natura non est de animæ partibus, non erit in anima facultas aliquid intelligendi vel considerandi ex illa.

Amplius homo non est homo nisi per intellectum. Intellectus igitur est aliquid

¹ III de Anima, tract. II, per multa capita.

quidditatis hominis. Oportet igitur quod sit aliquid de essentialibus hominis, et sic non erit hoc modo continuatus homini, quo illi dicunt.

Sunt autem et alia multa quæ huic errori sunt contraria, quæ alibi prosecuti sumus: hic enim non dicemus nisi ea quæ aliquo modo ostendunt naturam materiæ secundum quod ipsa est anima hominis, secundum quod homo est quoddam animalium, cujus natura non scitur, nisi anima ejus secundum generationem et naturam ejus et statum ejus post mortem cognoscatur.

CAPUT V.

De errore Alexandri de statu animæ post mortem et dissolutionem corporis.

Alexander autem Peripateticus Græcus, cujus doctrinam multi Peripateticorum scholæ sequuntur, solus inter Philosophos animos rationalem concedit perire pereunte corpore: eo quod ipse dicit intellectum esse formam harmonicam, quæ ex complexione elementorum educitur per generationem, sicut dictum est a nobis in tertio libro nostro de *Anima* ¹. Dicit enim intellectum possibilem solum esse in anima, et hunc esse formam corporis complexionati plus inter corpora ab excellentia contrariorum re-

cedentis, et ad convenientiam cœli accedentis: propter quod etiam nobilior in ipso resultat convenientia perpetui corporis, quam in perspicuo quod est forma simplicis corporis, ex convenientia quam habet cum perpetuo superius corpore: et cum in perspicuo aeris resultet forma secundum esse spirituale, quæ esse materiale habet in corpore terminato, qua resultabit in forma corpus hominis cum cœlo, convenit forma intellectualis ex luce intelligentiæ irradiantis super animam.

Hæc autem phantasia omnino est erronea: quoniam nos videmus perspicuum tanto clarius esse in corporibus, quanto ipsa corpora fuerunt magis rara et tenuia: corpus autem hominis densitatem habet multam, et est terminatum: patet igitur, quod convenientiam cum cœlo in perspicuitate minus habet quam elementum simplex.

Et si dicatur, quod in spiritu animalis est illa receptio formarum intellectualium, constat per omnia quæ subtiliter indagata sunt in libro tertio de *Anima* ² et in libro de *Intelligibilibus*, quod nulla formarum secundum esse naturalis est in spiritu, sed potius est in eo particularis sub materiæ intentionibus: et ideo in illa non completur intellectus aliquis.

Amplius enim secundum istum ab intellectu agente qui prima causa est in tota natura, nulla inducitur forma quæ aliquid similitudinis habeat cum ipso in separatione: et hoc videtur absurdum per hoc quod omnia agentia in generatione aliquid suæ similitudinis in generato consequantur: et illud principium quod omnibus prius et excellentius est, nihil omnino suæ aliquid consequatur similitudinis. Nec hoc sensu locutus est Stoicorum aut Peripateticorum aliquis. Plato enim dicit, quod rigor necessitatis materiæ consiliis cessit intellectus, et sic deductus est ad

¹ III de Anima, tract. II, cap. 2.

² Ubi supra.

optimos actus: et in hoc consensit totus cœtus Stoicorum. Separatam autem animam formam intellectualem esse probavit Aristoteles, cujus felicitas sit contemplatio firmam et puram et admirabilem habens delectationem theorematum: et huic consensit tota schola Peripateticorum. Hic autem solus ex schola Peripateticorum degenerans, pravas intelligentias sequens, transit ad Epicureorum opinionem, hominem et id quod solum in tota natura generabilium divinum est, corruptibile esse docens, et formam harmonicam corporis cum corporis dissolutione perituram. Et solus iste deficit in hoc, quod causa motus localis ab eo non potest inveniri in corporibus animalium et hominis: omnino enim demonstratum est in VIII *Physicorum*¹, nullam formarum corporalium movere motu locali, sed potius omnium talium corporum, quæ tales habent formas, motum esse a generante aut removente prohibens: nullam autem talem formam posse facere motus in suis materiis et corporibus in quibus sunt. Scimus autem quod animalia multa et præcipue homines moventur a seipsis: quæramus ergo ab isto, quod det homini motum, si anima sua non est nisi forma harmoniam consequens corporis? et non poterit causam motus assignare. Si enim dicat æqualitatem istam compositionis movere corpus secundum locum, quæramus a quo mobili secundum locum procedat iste motus, cum omnem motum oporteat ab aliquo immobili procedere?

Amplius æquale in complexione potest movere processive, et æquale etiam movetur: ergo idem erit movens et motum: quod est absurdum apud omnem hominem recte philosophantem. Si autem dicat æqualitatem movere, et æquale moveri, hoc est absurdum: quia forma corporalis accepta in abstractione, non

movet, neque movetur. Si ergo aliquid movet, oportet quod hoc sit æquale.

Amplius secundum istum cum cœlum maxime sit æquale et a contrarietate separatum, non debet cœlum habere motorem sui secundum locum, nisi per hoc quod ipsum est æquale: quod est omnino absurdum. Hæc autem et alia plurima sequuntur ex errore istius hominis, et ideo ab omnibus refutantur Philosophis.

CAPUT VI.

De octo demonstrationibus necessariis ex quibus anima rationalis immortalis esse convincitur.

Ea autem ex quibus necessario concluditur animam cum corpore non destrui, sunt quæ in hoc inducimus capitulo. Sed præmittendum est, quod aliquando nos demonstramus effectum per causam, et aliquando e converso causam per effectum: sicut demonstramus planetas non scintillare per hoc quod sunt prope, et e converso demonstramus planetas esse prope per hoc scilicet quod non scintillant: et sicut in scientia de *Anima* superius induximus demonstrationem, scilicet quod anima non destruitur corpore pereunte, per hoc scilicet quod ipsa essentialiter est imago et simi-

¹ VIII *Physicor.* per multa capita.

litudo causæ primæ, et similitudo lucis intellectuum cœlestium, et non est deducta nisi de materia generabilium per virtutes aut qualitates corporeas corporaliter super materiam operantes : hæc enim demonstratio fuit per causam : nulla enim, ut videtur, propria causa est permanentiæ animæ, nisi ea quæ nunc dicta est. Hujus autem causæ effectus sunt proprii et convertibiles cum ipsa esse separatum, esse causam suarum operationum ex seipsa et actuum, esse et subjectum incorruptibilium, esse et causam generationis corporis, absque eo quod a corpore aliquid accipiat, esse et imaginem et sigillum quoddam intellectus divini et substantiarum angelicarum separatarum et intellectarum, esse et animam inventricem honestorum et piorum, quorum ratio perpetua est et indestructibilis, esse et animam ejusdem operationis cum intellectibus angelicis perpetuis et cum causa prima, et esse animæ idem bonum et optimum quod est causæ primæ bonum et intellectuum Angelorum et divinorum : et ex quolibet istorum inevitabiliter concluditur animæ immortalitas et perpetuitas. Quod qualiter fiat, demonstramus per quodlibet istorum rationem demonstrationis deducendo.

Prima demonstratio.

Dicimus igitur primo, quod id quod est separatum ab aliquo per essentialem operationem, necessario separatum est ab illo eodem per esse et essentiam. Si enim detur per esse et essentiam conjunctum esse, sicut actus corporis conjungitur cum corpore cujus est actus, non operabitur essentialem operationem nisi ad harmoniam corporis illius cujus est actus, sicut visus non operatur nisi ad harmoniam et debitam compositionem ac temperantiam ipsius oculi, sicut constat ex omnibus quæ hic et in scientia de *Anima* in diversis libris probata sunt. Destruamus ergo hoc consequens dicendo, quod id quod non operatur ad alicujus corporis harmoniam, necessario per esse et essentiam est separatum.

Quod autem per esse et essentiam est separatum ab aliquo, nullo pacto perit destructo illo a quo separatum est per esse et essentiam. Anima igitur intellectualis ad destructionem corporis non destruitur.

Si autem diceretur quod per naturam propriam destruitur, hoc est absurdum : quia tunc haberet contrarium, quod omnino est falsum. Si vero dicatur quod ipsa est forma corporis, et sic est conjuncta corpori, adhuc dicimus quoniam conjungitur corpori per quædam quæ ut potentiæ sunt in ipsa, hoc est per vegetationem et sensum, et non conjungitur per id quod dat ei essentiam et esse et rationem et poni in numerum animæ intellectualis, sicut est ipse intellectus, qui nullius partis corporis est actus, sicut patet per ante dicta.

Amplius quidquid ex seipso causa est suarum operationum et actuum, nullo modo dependet ad aliud secundum essentiam suam. Detur enim dependere ad aliud secundum esse et essentiam, tunc causæ operationum proportionales erunt operationibus et actibus. Si ergo sic sint conjunctæ causæ secundum scilicet esse, tunc et actus erunt conjuncti. Causæ igitur erunt conjunctæ, et non erit id quodcumque est ex se causa operationum et actuum. Destruitur ergo hoc consequens per hoc quod id quod est causa ex seipso solo operationum suarum et actionum, non est dependens ad aliud : et hoc vocavit Plato esse seipsum movens. Anima autem intellectualis in quantum intellectualis ex seipsa est causa operationum intellectualium, ita quod a natura ad has non agitur neque impellitur, sicut patet in artibus et in omnibus quorum principium est secundum intellectum operativum et prudentiam : igitur non dependet ad corpus secundum esse et essentiam. Si autem hoc ita se habet, etiam apud temerarium, non est dubium eam non destrui destructione ejus ad quod secundum esse non dependet.

Secunda demonstratio.

Tertia de-
monstratio.

Amplius quidquid secundum sui naturam est subjectum incorruptibilium, nec secundum se, nec per dependentiam ad alterum est corruptibile. Detur enim illud esse corruptibile in seipso : tunc igitur incorruptibile quod est in ipso, secundum esse quod habuit in ipso sicut in subjecto corrumpitur. Datum autem erat quod esset incorruptibile : idem enim est esse incorruptibile et esse incorruptibile secundum esse : quia nihil corrumpitur nisi secundum esse : essentialis enim simplices non corrumpuntur ex hoc quod simplices essentialis sunt, sed potius secundum esse quod habent : et propter hoc magnus dixit Dionysius, quod « non corrumpitur quid existentium, sed circa existens corrumpuntur modi et commensurationes et harmoniæ, quæ esse et non essentialis rerum conveniunt. » Omne enim corruptibile aut est ex contrariis, aut delatum super id quod est ex contrariis, sicut forma defertur super substantiam, et utrumque istorum corrumpitur secundum esse.

Ex his igitur constat nihil esse corruptibile nisi secundum esse : et si essentialis forte destruitur, hoc est per accidens : quia videlicet non habet essentialis aliud esse, nisi esse quod habet in subjecta materia : materia autem non corrumpitur. Accipiat igitur id quod jam probatum est, scilicet quod id quod est subjectum incorruptibilium, nullo modo est corruptibile : ostensum autem est in III de Anima¹, et in libro de *Intellectu et intelligibili*, quod universalis quæ sunt in anima, sunt sine motu et tempore, et incorruptibilia etiam secundum esse secundum quod sunt in intellectu : quia aliter non essent ubique et semper : igitur anima intellectualis est incorruptibilis et indestructibilis destructione naturali et corporis in quo est. Si enim dependeret ad corpus, non esset subjectum universalium.

Quarta de-
monstratio.

Amplius quidquid est causa gubernationis et motus alicujus corporis, absque eo quod accipiat virtutem gubernationis ab eo, secundum esse et essentialis separatur ab eo quod sic gubernat. Et hujus probatio est, quia quidquid gubernat et movet aliquod corpus, absque eo quod accipiat virtutem et gubernationis et motus formam a gubernato et moto corpore, ex seipso est causa gubernationis et motus, non dependens in aliquo ad corpus illud secundum potestatem gubernandi, licet actus gubernationis non expleatur sine corpore : omne autem quod secundum esse et facultatem sive potestatem non dependet ad aliud, separatur ab ipso secundum esse et potestatem sive facultatem : et hoc patet in omnibus nautis et militibus gubernantibus naves et equos, et prefectis gubernatoribus civitatum vel provincialiarum et omnibus aliis.

Si enim daretur quod non separaretur ab ipso secundum naturam et potestatem, tunc necessario sequitur quod dependeat ad ipsum in gubernando secundum esse aut secundum potestatem gubernandi : et datum erat in hypothesei oppositum hujus per contradictionem. Est igitur hæc necessaria, quidquid ex seipso solo causa est gubernationis et motus corporis, absque eo quod facultatem gubernationis et motus et formam a corpore accipiat, secundum suum esse et facultatem gubernandi et movendi est separabile ab eo : est autem anima intellectualis in quantum intellectualis est, hoc modo gubernans corpus, quando scilicet intellectualiter gubernat ipsum in omnibus virtutibus intellectualibus, in quibus non gubernatur corpus nisi ad rationem rectam factorum, sicut in artibus mechanicis, aut ad rationem rectam in prudentialibus agibilibus per nos, in quibus gubernatur in honestis : aut ad rationem rectam investigativam causæ essentialis

¹ III de Anima, tract. i, cap. 7.

alicujus effectus, in quibus movetur in scientia : aut ad rationem quæ est ipsa prima ratio eorum quæ sunt in tota rerum natura speculatione intellectualium et communium, sicut in sapientia : aut in complexione principiorum in quibus movetur secundum virtutem intellectualem, quæ intellectus vocatur. In nullo enim horum anima in gubernando corpus et movendo causam vel formam motus accipit a corpore. Ergo quamvis actus gubernationis corporis non expleatur sine corpore, anima tamen intellectualis secundum esse et facultatem a corpore separatur.

Si autem aliquis dicat, quod in quadam gubernatione et motu accipit formam gubernationis a corpore, sicut in videndo, vel comedendo, et hujusmodi, hoc non obstat separationi ejus : sicut et in omnibus gubernationibus sunt aliqui qui aliquas semper faciunt gubernationes secundum formam eorum et facultatem quæ gubernantur ab ipsis : non enim sequitur si secundum hoc vel illud non separatur gubernator ab eo quod gubernat, quod nullo modo separetur.

Iste igitur est intellectus Aristotelis et omnium Peripateticorum dicentium animam non esse sic perfectionem corporis sicut forma est materiæ, sed potius sicut nauta est perfectio navis gubernatæ et motæ ab ipso : cujus forma sumitur ab arte nautica, quæ ars nautica est in intellectuali anima gubernatoris, et non a nave : eo quod artifex formam operis non sumit ab instrumento, sed potius per instrumentum ponit eam in operatione.

Quinta demonstratio.

Amplius quidquid secundum unam rationem formæ est sigillum intelligentiarum separatarum, secundum esse et potestatem non dependet a corpore. Detur enim quod secundum esse dependeat a corpore : cum igitur omne quod recipit aliquam formam, recipiat eam secundum propriam ipsius recipientis potestatem, recipiet illud impressam sibi formam corporaliter et materialiter, et erit in ipso

aut sicut forma corporalis, aut sicut forma operans in corpore et per corporis harmoniam : et hoc est contra hypothesim, quia positum est esse verum sigillum intellectus separati.

Est igitur hæc propositio necessaria, scilicet quod quidquid secundum unam et eandem rationem formæ sigillum est et similitudo intellectuum separatorum, non dependet a corpore secundum esse et operationem et potestatem : formas autem intellectuum separatorum per hoc esse intellectuum separatorum, quod scilicet sunt ubique et semper, non est qui dubitet Philosophus existens : per eandem autem rationem recipiuntur in anima intellectuali : ergo ipsa nullo modo secundum esse suum et potestatem dependet a corpore. Et hæc demonstratio est super quam fere omnes innixi sunt Philosophi de anima intellectuali loquentes : et est ista fundata fere super totum id quod de intellectu in diversis libris nostris tradidimus.

Amplius quidquid de se rationes invenit honestorum et piorum ad religionem et honestatem pertinentium, ad corpus non habet dependentiam : quod probatur per hoc quod scilicet honestum est id quod propria et sua sive sibi essentiali vi nos trahit, et propria et sua sive sibi essentiali dignitate nos allicit : et hoc est quod propter se appetimus, quamvis nihil utilitatis vel alterius delectationis haberet adjunctum. Religio autem est scientia et cura cerimoniarum divinarum : horum autem appetitus et inquisitio et inventio non est nisi secundum aliquid his simile in anima. Dico autem *simile*, sicut id quod est in potentia est simile ei quod est in actu : omnis enim appetitus et inquisitio per aliquid simile perficitur : nec umquam aliquid appetitur nisi per hoc quod est simile appetenti : et hoc alibi probatum est a nobis.

Sexta demonstratio.

Illud igitur ad quod similitudinem et connaturalitatem habet honestum et pium et religiosum, aut dependet ad cor-

pus, aut non. Si dependet, tunc per omnia ante habita ipsum erit similitudo ad virtutem operantem in corpore, et non ad virtutem separatam : virtus autem operans in corpore, nec appetit, nec operatur, nisi secundum inclinationem et harmoniam corporis. Igitur omne quod appetit, est secundum convenientem conjuncto : quidquid autem appetitur secundum convenientem conjuncto tali corpori, appetitur et quæritur secundum rationem utilis, aut secundum rationem delectabilis : ergo honestum pium et religiosum appetitur et quæritur secundum rationem utilis, aut delectabilis : et hoc est contra definitionem honesti, pii, et religiosi : ergo impossibilis fuit illa positio, qua scilicet ponitur, quod honestum et pium ac religiosum appetantur et quærantur a virtute dependentiam habente ad corpus. Et hujus signum est, sicut in libro de *Anima* nos dixisse meminimus, quod nullum aliorum animalium præter hominem aliquid umquam appetit vel quærit honestorum vel piorum vel religiosorum.

Accipiatur igitur ex omnibus præmissis ista propositio, scilicet quod quidquid appetit et quærit et invenit ea quæ sunt honesta et pia et religioni convenientia, non habet dependentiam ad corpus : animam autem rationalem hæc appetere et quærere et invenire non est qui ambigat : igitur ad corpus non habet secundum esse et operationes hujus dependentiam : et quod ad corpus non dependet, non destruitur illo destructo : anima igitur rationalis non perit pereunte corpore. Et super hanc rationem fundat Plato hoc quod dixit in *Timæo*, ubi diis deorum injungit, quod ad se sumant omne illud quod in genere mortalium simile perspexerint : et hoc esse dicit illud quod pietatem et religionem colere viderint. Et super hoc etiam fundat Macrobius intentionem suam de *Somnio Scipionis*, ubi

ostendit quod « justitiam et pietatem colens, non perit pereunte corpore, sed ad sedes transfertur sidereas, immortalibus similis, cum diis regnaturus. »

Confirmatur autem hæc ratio per alia quæ sumuntur a dictis Socratis et Hermetis Trismegisti, cujus avus fuit Prometheus præcipuus Philosophus, a quo primam scientiam philosophandi acceperunt Stoici : hujus enim philosophiæ Prometheus dicitur pater fuisse. Et fuit ratio eorum, quod sicut in *Somno et Vigilia* probatum est, quædam sunt in somniis veræ intelligentiæ quæ non somnii habent rationem, sed potius oracula sunt, ab intellectibus supernis et intellectui animæ influxæ. Constat autem quod horum receptio non est nisi secundum conformitatem animæ humanæ ad intellectus supernos cœlestes, et non secundum aliquam dependentiam ad corpus : et ideo nec perire potest hujusmodi substantia talia recipiens oracula, corpore pereunte.

Amplius cujuscumque essentialis et propria operatio formaliter et essentialiter Septima demonstratio. convenit cum operatione divina et cum operatione intellectuum angelicorum, nullam secundum esse et naturam et operationem habet ad corpus dependentiam. Detur enim consequentis oppositum, quod videlicet ad corpus debeat, sequitur inevitabiliter, quod opera ipsius erunt virtutis quæ operatur secundum harmoniam corporis : hæc autem operatio nec in genere, nec in forma, convenit operationi divinæ et operationi intellectuum superiorum : animam autem intellectualem non solum intelligere cum continuo et tempore, sed etiam intelligere secundum spiritualissimum ac divinissimum modum intelligendi ea quæ sunt separata a materia et ea quæ per seipsa sunt intelligibilia, hoc in libro de *Anima* ¹ demonstratum est : et hoc habet per essentialem

¹ III de Anima, tract. III, cap. 6.

operationem. Sicut enim operatio lucis est lucere, sic intelligere et emittere intelligentias est naturæ intellectualis : et cum ista operatio sit divina et intellectuum superiorum, secundum hanc non dependet anima intellectualis ad corpus : ergo secundum naturam et esse illius substantiæ a qua exit hæc operatio, ad corpus non dependet : non igitur dici potest quod intellectualis anima pereat pereunte corpore.

Ex hac autem ratione sequitur, quod intelligi non potest quod anima pereat pereunte corpore. Detur enim quod intelligatur, sequetur aliquod esse principium hujus intelligentiæ : hoc autem esse non potest nisi quod aut illa natura ex contrariis composita sit, aut quod unita sit corruptibili : et horum utrumque est contra intellectum naturæ intellectualis : hoc enim de se dicit naturam separatam a materia et contrarietate. Igitur nec composita est ex materia et contrarietate, nec unita materiæ : et sic patet quod intelligens quid est natura intellectualis, non potest intelligere quod pereat pereunte corpore.

Octava demonstratio.

Amplius quorumcumque idem est bonum et optimum secundum naturam eorum, est una et communis natura genere, vel specie, vel ad minus secundum analogiam ad boni vel optimi illius proportionem. Detur enim non esse eandem analogiam ad illud optimum participandum, sequetur ipsorum non esse unum bonum et secundum naturam optimum : et hoc est contra hypothesim. Vera igitur et necessaria est hæc propositio, scilicet quod quorumcumque est unum secundum naturam optimum, eorum est una analogia ad optimum illud participandum. Est autem omnis intellectualis naturæ secundum naturam optimum, et illud est ipsa contemplativa felicitas, sicut in X *Ethicorum* demonstratum est. Et ratio hujus est, quia hoc est optimum secundum naturam, quod in somno ponit naturam secundum quod ipsa est propria natura :

et hoc est quod non contingit secundum genus quod est potentia naturæ, sicut in antehabitis probatum est, et quod non convenit per accidens, et quod non convenit naturæ per corruptionem, sed secundum esse animalis naturalis habitus : secundum commune enim genus convenit homini virtus moralis : eo quod est aut circa passiones quæ secundum sensum sunt innatæ vel illatæ, aut est circa communicationes operum sicut justitia : per accidens autem multa conveniunt homini, nec illa sunt terminabilia per artem, eo quod infinita possunt accidere per corruptionem habitam innaturalem, quæ naturæ animæ sunt contraria, sicut ferales et bestiales operationes, sicut bibere sanguinem, delectari fœtoribus, delectari meretricio, et hujusmodi : sed delectari in propria et naturali operatione non impedita non convenit nisi secundum naturam. Si enim est propria, est essentialiter conveniens secundum formam quæ dat esse et rationem : et si est connaturalis, non est per accidens : et si est non impedita, non habet contrarium.

Taliter autem felicitas contemplativa se habet ad intellectum : est autem felicitas illa contemplatio divinorum, non tamen continuo et tempore, sicut in scientia de *Anima* probatum est et de *Intellectu et intelligibili*, quæ Deo convenit et intellectibus divinis omnibus cœlestibus et homini. Propter quod Aristoteles dicit quod homo non est nisi intellectus, eo quod bonum intellectus sibi solum proprium et connaturale est : igitur una analogia erit Dei et intellectuum supernorum et hominis ad hoc optimum.

Constat autem quod hæc analogia non potest esse nisi secundum facultatem et operationem talem essentialem separatam et perpetuam, qualis scilicet est operatio intellectualis, nihil habens commune cum corpore corruptibili in quantum est : ergo anima intellectualis in quantum hujusmodi, separata est et esse perpetuum habet, nihil commune habens cum corpore corruptibili pereunte in quantum

est hujusmodi. Est autem anima intellectualis per naturam hujus quod est intellectualis, ita scilicet quod totum aliud quod est in ipsa, est ut potentia in ipsa : ergo per naturam est separata et perpetua, non destructa destructione corporis.

Hæc igitur est natura qua omnes homines scire desiderant : et cum omne scire ordinetur ad scire divinum quod est intellectuale sine continuo et tempore, finale desiderium omnis hominis est ad illud sicut ad optimum secundum naturam : eo quod admirabiles delectationes habet hujusmodi scire ex puritate ejus quod intelligitur et firmitate sapientiæ quæ primorum et manifestissimorum est secundum naturam. Et hæc ultima ratio est efficacissima, si quis eam bene intelligat, et dependet intellectus ejus ex his quæ de intellectu scripsimus in III de *Anima*, et in libro de *Intellectu et intelligibili*. Et hæc ratio est quæ multos Philosophos præcipue in Academia et Germania studentes effecit eremitas, ut separati ab hominibus hoc solum colerent : et ad id quod est et optimum secundum naturam, deducerent illud quod est in eis quid divinum et perpetuum, sicut testatur Didymus Bragmanorum rex in epistola quadam quam scripsit Alexandro regi Macedonum.

Hæc igitur sunt ex quibus inevitabiliter concluditur immortalitas animæ, quæ conjuncta cum his quæ alibi a nobis dicta sunt, secundum præsentem sufficientem intentionem. Si quis enim mentem in his exerceat, cognoscit absque dubio, quod dicentes animam mori cum corpore, non intelligunt quod sit anima nobilis et intellectualis.

CAPUT VII.

De statu animæ post mortem secundum Platonem, cui præmittitur generalis divisio, quid diversi Philosophi de hoc statu tradiderunt.

His sic exsecutis, manifestandus est status animæ post mortem corporis : et hic quidem status apud diversos Philosophos est valde diversus.

Omnes enim Socratis et Platonis et Speusippi et academiæ dogmata sequentes, et animas hominum ad stellas compares post mortem redire dixerunt : et de hoc quærendum est quid intendant, et quid veritatis, et quid falsitatis contineat dictum eorum.

Pythagoram autem sequentes dixerunt animas transcorporari, quod et Plato aliquando sensisse videtur, licet non de omnibus animabus hominum hoc dixisse videatur, sed de his tantum quæ justitiam et pietatem in prima incorporatione colere voluerunt.

Sequentes autem Anaxagoram ex omnibus hominum animabus nihil omnino relinqui dixerunt nisi lumen intellectus primi, qui universalis est causa generationis et naturæ : et hanc viam tenuisse videtur Abubacher Maurus, et Averroes Cordubensis, et quidam alii Arabum Philosophi.

Avicenna autem et Algazel et alii quidam dicunt animam humanam post mortem converti ad lucem intelligentiæ agen-

tis, et hanc sibi largissimam esse in omni formarum intelligibilium influenza et manifestatione, et hanc sibi esse summam delectationem et vitam optimam.

Isaac autem antiquissimus sequens Epicureorum Hesiodum et Cecinnum, tradit esse animas justitiam colentes in orbe supremo et psalmodia et cantu et jucunditate permaxima : eas autem quæ obscœnis actibus deditæ sunt, dum manent in corpore, deprimi post mortem sub orbem tristem tenebrosum, et esse in tenebris et tristitia et igne magno perpetuis incendiis concremari.

Nuper autem novellum dogma quorundam apparuit, omnem animam animalis quod secundum locum movetur, dicens esse separabilem a corpore, et manere post mortem.

De omnibus igitur his inquirere oportet ut veritas melius eluceat eorum quæ dicturi sumus.

Quæramus igitur primum de Platonis et Socratis et Speusippi sententia, quam tota suscepit scola Academicorum et Bragmanorum. Horum enim communis est sententia, animas a comparibus stellis descendere et post mortem iterum ad comparēs stellas redire. Videtur autem hoc accipi ex quatuor rationibus præcipuis. Ostensum est enim in præhabitis, quod anima secundum originem causatur ab intellectu et luce intelligentiæ moventis universaliter in tota natura. Non autem perficitur hic motus nisi motibus stellarum. Omnis enim figura quæ est in inferioribus, causatur a figuris constellationum in cœlestibus : sed non omnes redibunt in stellas comparēs : quia non omnes formæ generatorum similitudinem formæ cœlestis prætendunt et sortiuntur : sola enim forma speciei hominis ad similitudinem cœlestis formæ pertingit. Cum igitur forma cœlestis sit motor cœli, et ad illius similitudinem pertingat anima quæ

est forma hominis, sicut motor ipse stellæ motæ est compar, ita similitudo ejus compar eidem stellæ efficitur in terrenis. Propter quod etiam ipse Plato semen animæ humanæ similis diis deorum asserit esse : et quorum est una natura, eorum est idem locus : igitur sicut stella compar datur motori stellæ, ita stella compar datur animæ hominis.

Amplius habitum est a nobis in libro hoc et in libro de *Anima*¹, quod corpus non est susceptibile animæ hominis nisi per hoc quod secundum æqualitatem ad similitudinem cœli appropinquat. Constat autem quod proportio est inter animam et corpus. Cum igitur anima non debeatur corpori hominis nisi propter cœli similitudinem, anima rationalis magis debetur cœlo quam corpori terrestri : igitur secundum naturam magis habet comparitatem ad stellam quam ad corpus proprium. Et hæc ratio fuit causa, quod dixit Plato animam a cœlesti corpore ad corpus terrenum descendere.

Amplius motorum quorum una est corporis natura, eorum est eadem ad unum et idem mobile proportio. Constat autem cum anima sit semen deorum stellas moventium, ut dicitur in *Timæo*, quod una natura est communis Dei moventis stellam et animæ : eadem ergo erit et ad idem quod movetur utriusque proportio et comparitas.

Amplius eadem est utriusque similitudo in opère : sicut enim deorum opus est per intellectum practicum eorum quæ natura sunt, ita anima rationalis per intellectum operativum principium est multorum artificialium quæ naturam imitantur : eadem igitur deorum et animæ rationalis ad eandem stellam comparitas. Propter quod Plato tradidit notanda esse opera puerorum : quia statim a principio nituntur ostendere, ad quæ exercitia scientiarum et artium ex natura compa-

¹ II de Anima, tract. I, cap. 3.

ris stellæ magis sunt habiles, et quando applicantur in illis, perfecti fiunt in hujusmodi. Fundat autem intentionem suam Plato in duobus, quorum unum est, quod motores orbium quos Plato *deos* vocat, sint in stellis potius quam in aliis partibus orbis : eo quod ipse stellas et non orbem moveri opinatus est, sicut dixerunt omnes illius temporis et Ægyptii et Chaldæi Philosophi. Et *comparem* vocavit stellam eam, a cujus motore quem aliquem deorum intellectualium esse dixit, semen intelligentiæ in animam hominis transfusum est : quamvis enim plures stellæ unam faciant constellationem, et omnes stellæ fixæ et erraticæ ad quamlibet respiciant nativitatem, eo quod cujuslibet nativitatis circulus duodecim signorum contineat circulos, in quibus omnes cæli stellæ sunt, tamen una aliqua principatur in eis, et illius motor per influentiam luminis intellectualis in animam spargit intelligentia semina sibi proportionata : propter quod unus filius dicitur Jovis, alter autem Saturni, et alter Martis, sicut Paris dicebatur esse Veneris et Adonides, et Hector dicebatur esse Martis, et Jovis proles ab aliquibus dicebatur esse Priamus : et resolutio corpore semina intellectualia a motoribus harum stellarum seminata, dicebantur recipi in omnes sinus orbium stellarum illarum. Ad sinus enim orbium dicebat transire animas diis conformes : et hoc dictum a multis erat acceptum Ægyptiis et Chaldæis, ubi mathematicæ floruerunt scientiæ. Itaque usque hodie in circulis nativitatum ponitur ab eis una stella quam *iles* et *alcacodem* vocant, quod Latine *vita* sonat et *intellectus* : eo quod vitam nato et intellectum conferre deberet. Ad hoc ergo horum redit dictum, scilicet quod *stella compar* vocatur ea cujus motor in nato scientiam dat vitam et intellectus in circulo nativitatis, qui conficitur ex duodecim circulis duodecim signorum in omnibus stellis quæ in eis sunt : reditus autem ad stellam comparem fit reditus vitam et intellectus ad si-

num circuli cujus stellæ motor dedit vitam et intellectum nato, et reditus iste tantum habuit hanc naturam, quod unumquodque redit in resolutione ad suam originem : et ideo sicut elementa corporis distantibus levibus et gravibus ad suas revertuntur origines, sic etiam ipsum fœnus quod traditum est a diis deorum, recipitur ad suam originem cœlestem : et sicut circulus distat a stella, ita distat vita et intellectus animæ a vita et intellectu Dei illius qui credidit ipsam corpori. Quæcumque tamen animarum ibi recipitur, inter deos translata dicitur esse, et ad orbem cœlestem assumpta.

Hæc igitur fuit opinio Socratis et Platonis et omni in academia philosophantium : et super hoc multæ fundantur fabulæ poetarum. Ex qua opinione hoc habemus, quod animæ post mortem cœlestes sedes accipiunt.

Quod autem dicunt de stella compare, et rationem fundant super hoc quod sit dator vitam et intellectus, non habet satis convenientem rationem : non enim potest dici quod non sit unum et idem principium universitatis, ad cujus primam causalitatem omnia generata reduci est necesse. Iste ergo intellectus primæ causæ sua virtute producit omnes formas in quocumque gradu producantur : quod et Plato vidit. Dixit enim formas omnes ideales esse in mente divina antequam prodirent in corpora, sicut formæ ideales artificialium sunt in mente artificis antequam in materias artium traducantur : propter quod etiam dicit in *Timæo*, « Horum sementem ego faciam vobisque tradam, vestrum erit par exsequi. » Determinationem autem ejus quod factum est a primo intellectu, ad vires ut ad corpus, dicebat fieri Plato per inferiores intellectus et orbem : propter quod ab una dixit accipere intellectum, et ab alia memoriam, et a tertia imaginationem, et a quarta sensum, et iterum ab aliqua aliarum appetitum, et sic de aliis. Hoc autem voluit dicere, quod anima quidem sit a causa prima ad similitudinem lumi-

nis intellectuum cœlestium : sed inductio ejus in corpus est per motum orbis : et ideo post mortem redit ad cœlum.

CAPUT VIII.

Quid veritatis opinio Pythagoræ contineat?

Pythagoras autem cum Platone convenit in hoc quod animam dixit esse immortalem, et non destrui eam morte corporis : aliter enim non dixisset quod transcorporaretur : sed differebat in hoc quod dixit ipse omnes animas esse unius rationis et naturæ, sed impediri a quibusdam operationibus in quibusdam corporibus, a quibus non impediuntur in alio : et hujus causam esse dixit defectum organorum. Propter quod dixit quod anima in cœlo et stellis, facit res naturæ ex virtute corporis quod est organum ejus, et in corpore hominis facit multa artis opera et ratiocinatur ex virtute cerebri, quod est organum ejus. In corporibus autem brutorum non facit hoc ex defectu congruentium ad has operationes organorum. Rationem autem habuit, quia vidit quod artificialia imitantur naturalia : et ideo putavit unam esse animam hominis et cœli : bruta etiam in operibus suis imitantur artem faciendo foveas, et nidos, et hujusmodi : et cum imitatio hujus ad unum non fiat nisi ratione similitudinis naturæ, putabat omnes animas unius et ejusdem esse ra-

tionis : et ideo in legibus suis dixit « sacrilegium esse animalia occidere et carnem comedere : quid enim meruere boves et animal sine fraude dolisve ? O quantum scelus est viscera in viscera condi ! »

Et ideo Aristoteles arguit eum : quia sicut se habet artifex ad organa suæ artis, sic se habet anima quæ est motor corporis, ad organa naturalia : sed nos videmus quod quilibet artifex habet diversa ab alio artifice organa artis : et diversitas organorum artificum est propter diversitatem artium, et non e converso : et ideo nihil proficeret ad opus artis si tibicen assumeret et aptaret sibi organa artis tectonicæ sive ædificatoriæ : quia securi et dolabro numquam perficeret melodiam tiliarum : sed fistulam quærit tibicen, et securim et dolabrum quærit architectonicus. Similiter igitur omnis diversitas quæ est in organis naturalium corporum, probatur esse propter diversitates animarum vivificantium illa corpora : et sic non potest dici quod ars tectonica transcorporetur et ædificet fistulis, aut etiam canat fistulis : eo quod non habet rationem et scientiam canendi, neque ex talibus principiis est ars ædificandi. Ita non potest dici quod transcorporetur animæ.

Plato autem qui hanc alicubi videtur sequi opinionem, non in toto sequitur eam : sed quia dixit in corpore hominis plures esse animas, quatuor enim dixit inesse, sicut alibi diximus : intellectualem enim sive rationalem dixit esse in cerebro, concupiscibilem autem dixit inesse hepatis, et irascibilem felli, et aliquando visus est dicere sensibilem inesse medullæ anteriori cerebri, et huic conjunxit materiam in nervis posterioris partis cerebri sitam. Aliquando etiam diversas animas dicere videtur esse animam sensitivam, et motivam, et aliquando præter omnes has dicit esse vegetativam : propter quod dicit rationem aliquando gravari in infernum a dominis, et concupiscentiam sequi, et tunc

non posse eam elevari ad cœlestem sinum, nisi prius a forma concupiscentiæ separaretur, quæ orbi non congruit. Similiter autem dicit aliquando eam exagitari furiis : et tunc iterum quia formam canis vel leonis accepit, non elevari dicit eam ad cœlestem sinum, nisi hac exuta imagine pecorina : et hunc modum metaphorice transcorporationis Plato intellexit. Pythagoras autem secundum veritatem in diversa et naturalia corpora transcorporari dixit animas. Ab his hoc accipitur, quod animæ immortales esse dicuntur, et quod non nisi forma adulerina intellectum impediatur : nullus enim congruit locus post mortem corporis nisi cœlestis.

CAPUT IX.

De opinione Anaxagoræ et Abubacher et Averrois de statu animæ post mortem.

Anaxagoras autem qui totius universitatis genitorem dixit esse intellectum purum et immixtum, nulli habens aliquid commune secundum naturam, dicebat omnes formas esse ex hoc quod intellectus ille lumine suo adunat similia in natura et componit ea irradiando super ea : et ideo cessante hoc super quod hujusmodi fit irradiatio, non relinquitur nisi unitum et simplex lumen irradiantis intellectus ex omnibus. Cujus dictionem emendare voluerunt Abubacher Maurus et Averroes Cordubensis civis, dicentes

animam intellectualem unicam et separatum lumen esse intellectus primi, et ideo esse ubique et semper et continuari per modum irradiationis cum purioribus animabus corporum organicorum in potentiis spiritualibus quæ sunt imaginatio et phantasia : et quia separatum est ubique et semper, nec potest dici hujus vel illius, eo quod forma non est hujus vel illius nisi per conjunctionem ad materiam, propter hoc deficiente eo super quod irradiat, unicum et idem remanet ex omnibus irradiatis.

Contra quam opinionem satis in antehabitis disputatum est a nobis, ubi ostendimus vegetativum et sensitivum intra substantiam intellectivi contineri, sicut potentia et actus sunt una substantia : et alibi etiam contra hunc errorem disputatum est a nobis. Tamen id quod ex his accipitur, est quod omnes ab ipsa veritate coacti animam intellectualem naturam perpetuam et indestructibilem esse dixerunt, et locum ei post mortem corporis cum motoribus cœlorum dederunt, sicut et ipsi motori primo substantiæ intellectus secundum naturam est conformis.

Licet ergo erraverit Anaxagoras dicendo omnia corpora ex similibus genere componi, et omnia in omnibus esse dicendo, tamen in hoc non erravit, quod intellectum dixit esse primam causam omnium generatorum, et quod anima sit similitudo sui luminis : sed in hoc peccavit, quod hanc non dixit habere esse distinctum, sed esse reflexionis luminis intellectus agentis super sensibilem animam hominis, et subtracto eo super quod fit reflexio, redire ad intellectum primum lumen ipsius incorruptum et immixtum et purum : sic enim vegetativum et sensitivum in rationali, sicut potentiæ in actu, sed potius sicut speculum in lumine quod reflectitur super ipsum. Quod esse non potest, sicut patet ex prædictis.

Amplius secundum hoc homo non esset homo ab aliqua natura intellectuali, quæ esset in ipso, sicut actus et coessen-

tialis ei : sed potius esset homo ab eo quod secundum esse et naturam est extra ipsum, et radiatione esset super ipsum tantum : et hoc est absurdum.

Adhuc autem lumen profundatur in anima, aut non, sicut lumen solis profundatur in perspicuo corporeo : aut anima profundatum in se lumen intellectus primi tenet, aut non : sicut videmus quædam retinere lumen solis, sicut carbunculus : quædam autem non tenere, sicut aer non tenet nisi præsentem illuminantem. Si tenet, igitur habet intraneum lumen tamquam forma sui anima hominis : ergo ipsa est rationalis et intellectualis a lumine intellectuali connaturali sibi, quod est forma ejus : et hoc dividitur secundum participantia ipsum : ergo quælibet anima habet suum intellectum distinctum : et hoc est quod nos dicimus. Si autem non tenet, sicut aer non tenet lumen solis, tunc toties transmutatur secundum intellectum, quoties objicitur et subtrahitur præsentiam illuminantis : et hoc est absurdum valde. Et tamen hoc jam concesserunt quidam Arabum dicentes intellectum in anima non esse nisi per hoc quod se ad intelligentiam separatam anima convertit : et propter hoc quæramus ab his, quid convertat animam ad intelligentiam? Omne enim quod non semper ad aliquid conversum est, sed aliquando convertitur, et aliquando non, non nisi in potentia conversum est : et id quod est in potentia, oportet quod habeat aliud aliquid a se, quod reducat ipsum ad actum. Constat autem quod hoc non est intelligentia, quia illa non irradiat animam nisi jam ad se conversam : neque etiam anima, quia secundum hoc idem esset convertens et conversum, quod est impossibile. Et constat etiam quod illud convertens non est corpus : et non erit assignare quid sit ex quo non est aliquid istorum trium.

Amplius quid est converti animam ad intelligentiam? non enim anima habet situm vel partes situ distantes ut conversionem situs ipsi animæ attribuamus. Si

autem conversio ista est ordinis in eo quod anima sub intelligentia ordinata est, cum hunc ordinem semper habeat nec umquam amittat, semper erit conversa : et tunc nihil est dictum, quod aliter sit conversa, et aliquando non. Si autem aliquis dicat quod hæc conversio ad intelligentiam est secundum animæ voluntatem, hoc omnino nihil est dictum : irradiatio enim intelligentiæ est in naturam et substantiam animæ a lumine intelligentiæ : et si hoc est in voluntate animæ, oportet quod voluntas aliquando claudat naturam et substantiam animæ a lumine intelligentiæ, et aliquando aperiat eam, et hujusmodi clausio et aperitio non est intelligibilis : et sic patet quod absurdum est sic dicere de animæ natura et substantia.

Nec potest dici, quod irradiare et non irradiare sit ex parte intelligentiæ : quia illa secundum istos Philosophos uno modo se habet ad animam, licet anima non uno modo se habeat ad ipsam. Hæc ergo et similia sunt abusiones : per hoc enim quod tres substantiales operationes sibi habet anima nobilis, constat, sicut ostensum est in præhabitis, quod intellectus est de substantia ipsius. Præ omnibus autem mirabilibus videtur hoc esse mirabile, quod aliquis dicat quod ex eo quod individuum est secundum esse et potestates habet determinatas, relinquatur quiddam quod secundum esse et substantiam est commune omnium. Communia enim non habent esse nisi in particularibus : et cum non sunt in illis, non habent esse aliquid in natura, sicut et Aristoteles confitetur, quod destructis primis impossibile sit aliquid aliorum remanere. Si ergo intellectualis natura remaneret ut commune omnibus, oportet quod non haberet nisi naturam universalem : et hoc modo non plus remaneret intellectualis natura quam ligni vel vermis vel pulicis natura communis : et hoc omnino absurdissimum est. Cum enim probatum sit supra intellectum possibilem omnia fieri, et intellectum agen-

tem omnia facere, constat quod intellectua-
lis natura dividitur per potentiam et actum,
et agens et patiens, quæ divisiones num-
quam alicui conveniunt in universali.

Amplius nullum omnino universale se-
cundum esse separatum est a materia et
particulari : intellectualis autem natura
jam sæpius probata est esse separata se-
cundum esse et agere a particulari et
materia. Patet igitur hoc modo non esse
separabilem intellectum, quo ex omni-
bus participantibus eum unum univer-
salem relinquatur.

Propter quod et similia hæc opinio non
ut opinio, sed ut error pessimus, ab om-
nibus rationes philosophiæ intelligentibus
est cavenda et rejicienda alibi, aut quod
præcipue in tertio de *Anima* plura de hoc
errore sumus locuti.

CAPUT X.

*De his quæ contingunt opinioni Avicennæ
et Algazelis.*

Traditio autem Avicennæ et Algazelis
videtur esse magis conveniens, licet et
ipsa aliquid contineat imperfectionis. Hi
enim videntur tradere animam separatam
post mortem intellectum possibilem ha-
bere, et per hunc ad intelligentiam agen-
tem ab ipsa separatam converti, et acci-
pere ab ipsa formarum intelligibilium
lumina et speculationes : et quia post
mortem est libera a sensibus nec retra-
hitur a curis et sollicitudinibus vitæ, tota
convertitur ad lumen intelligentiæ. Prop-

ter quod largissimo impletur lumine ip-
sius et formis intelligibilibus rerum : om-
nium enim rerum formas dicunt illi esse
in intelligentia per hunc modum quo for-
mæ artificiatorum sunt in artificibus. Hu-
jusmodi igitur formarum contemplatio est
jucunditas et vita perpetua, eo quod non
participat eas prout sunt obtenebratæ in
rebus, sed prout sunt lumina intelligen-
tiarum agentium, et in lumine ipsarum
intellectus existentes. Dicunt enim hi
quod et in antehabitis dictum est, quod
intellectus animæ se habet ad intelligen-
tiam, sicut perspicuum se habet ad lu-
men solis. Ex qua opinione sicut et ex
aliis hoc accipimus, quod anima secun-
dum istos immortalis existens intellectum
habet post mortem, quamvis non habeat
intellectum agentem qui intelligibilia agit
in intellectum possibilem.

Huic autem opinioni quædam contin-
gunt quæ et antecedenti contingere jam
dictum est : quoniam si quæramus de
irradiatione intelligentiæ agentis separa-
tæ super intellectum possibilem animæ
post mortem et utrum in profundum na-
turæ irradiet, aut non, et quid convertit
animam ad intelligentiam agentem, et
utrum lumen agentis receptum maneat ut
habitus quidam in anima, vel sic conti-
nue inferri in præsentia intelligentiæ.
Omnia hæc æqualiter contingunt huic et
præcedenti opinioni : habet autem hæc
opinio etiam propria dubia et objectiones,
quorum unum quidem est, quod non vi-
demus in aliquibus formis esse et ratio-
nem conferentibus his quorum formæ
sunt, potentiam esse sine actu, sed in
omnibus intra naturam ipsarum rerum has
esse differentias, sicut et in libro tertio de
Anima diximus : potentia enim non est
finis et terminus essentialis rei, sed actus :
quomodo ergo potest esse potens omnia
fieri intellectus terminus et finis essentia-
lis animæ sine eo intellectu quo est
anima facere intellecta? mirabile enim
satis videtur, quod natura stet in imper-
fecto sicut in ultimo et esse naturali ter-
mino.

Amplius neque in vegetativo neque in sensitivo videmus hujusmodi imperfectionem : quoniam natura complens vegetativum, dat ei finaliter id quod est perfecte agens et operans vegetationem. Et similiter est de sensibilibus : in sensitivo enim completio est in apprehensio interiorius per imaginationem et æstimationem et memoriam, ad quorum iudicium et acceptionem sine alia substantia ad quam se convertat, sufficit anima sensibilis : et ideo irrationabile videtur si anima rationalis hanc patiatur sola imperfectionem, sic quod ad aliam quamdam substantiam extra eam existentem, eam intelligendo, oporteat eam converti.

Si quis autem dicat quod in sensibus quibusdam quædam operantur exteriora, sicut in visu et auditu : hoc nihil est omnino : hæc enim non operantur nisi in deferendo sensibilia usque ad animam, sed cognitionem et iudicium in anima et collationem de sensibilibus ista non faciunt, et talibus ad intelligendum mediis intellectualis anima non indiget.

Adhuc autem formæ quæ sunt in intellectu agente, sicut isti dicunt, sunt in ipso sicut in operante cognoscente formam operis sui : istæ aut non sunt formæ contemplationis, et illæ formæ quæ sunt in anima, sunt formæ contemplationis : videtur igitur quod non a tali intelligentia istas recipiat formas sive species.

Amplius forma fluens ab intellectu practico sive operativo, fluit in opus suum, et tunc est forma dans esse et rationem operato : numquid igitur hujusmodi species, quales isti dicunt, esse dant animæ et rationem ? non enim per aliam quamdam virtutem istæ intelligentiæ has formas influunt animæ et aliis rebus quas causant. Si autem dicant quod ista diversitas est propter potestatem diversam recipientis : quia videlicet materia naturalis accipit eas materialiter, et anima intellectualiter : accipit hoc esse non potest : duobus enim patientibus secundum diversam potentiam, passio secundum naturam non proportionatur.

Amplius cum intelligentiæ separatæ sint multorum ordinum, ut dicunt Avicenna et Algazel, debuissent determinasse ad quam illarum convertitur post mortem : etiam si convertitur ad omnes, utrum eodem modo, vel diverso, et quæ sit causa diversitatis ? hoc quidem enim determinare secundum istam opinionem est necessarium, non autem leve.

Omnia autem prosequi quæ dictis contingunt opinionibus, longum esse valde : sed hic non oportet istis immorari, *primæ* enim *philosophiæ* magis est hoc proprium : hic enim non loquitur de his nisi ad ostendendam naturam animæ rationalis secundum quod ipsa est natura et forma hominis.

CAPUT XI.

De opinione Isaac et Cecinnæ et Athali et aliorum Epicureorum Philosophorum.

De opinione autem Isaac Israelitæ Philosophi, qui antiquissimos Epicureorum Hesiodum et Athalum et Cecinnam sequi videtur, cum aliis convenit, animam ponens immortalem, et ponit statum felicitatis ejus in statu summæ contemplationis, sicut jam ante diximus : eo quod delectatio contemplationis non habet contrarium, et est secundum habitum contrariam et propriam, et non est impedita : et hoc vocat esse in psalmodia et cantu. Cantum enim vocat jucunditatem in contemplatione æternæ veritatis

habitam : psallere autem in Latino idem est quod cantare : hoc ergo dicit esse animæ felicitatem. Æternam autem vocat veritatem quamlibet necessariam veritatem, sicut est veritas theorematum : præcipue tamen sunt ea pura et firma quæ accipiuntur in lumine causæ primæ, et in illis est status summus, sicut patet per ante dicta.

Cum autem in anima rationali sunt potentia vegetativæ et sensitivæ, dicebat hic Philosophus passionum turpium remanere habitus in his potentiis etiam post mortem : et illi habitus innaturales et ægrotativi cum defectu luminis, quod acquirendum erat in corpore, sunt tenebræ et incendium ipsarum deprimentes eas sub orbem tristem et umbrosum. Tradiderunt enim isti, sicut diximus in libro de *Anima*¹, quod in anima propter potentias inferiores remanent passionum affectus, sicut et in diis manent cœlestibus, licet non sint mortales, sunt tamen in multis mortalibus similes. Epicurei enim omnia spiritualia ad similitudines corporum referebant. Passionum ergo affectus in animabus exardescentes intendunt desideria ipsarum, et cum a delectabilibus sunt separatæ, incidunt tristitiam gravissimam hoc modo quo etiam causa tristitiæ magnæ causa est incontinenti quod a delectabilibus separatur, ita quod etiam tales quasi furere videntur ex delectabilium subtractione : et hoc vocaverunt *incendium animarum*.

Dicebant etiam hi, quod animæ quæ intellectum habent ad sensum reflexum, non accipiunt nisi vera lumina intelligibilem, sed potius umbras temporalium et imaginabilium sequuntur, quæ propter sui permixtionem cum potentia et materia et privatione non cognoscuntur nisi hic et nunc : et ideo post mortem non sunt apud hujusmodi animas nisi umbræ corporalium cognitionum, in quibus um-

bris remanentes dicunt eas incidere tenebras quæ sunt privationes veræ et intellectualis lucis. Non enim propter aliud dicunt animam poni in corpore, nisi ut veniat ad lucem intellectualium, et ut vincat passiones, veniendo per virtutes morales et intellectuales et heroicas ad felicitatis contemplativæ felicitatem : quæ quia Dei deorum est potentissimi et deorum incorporealis, cum ad illos venerit, inter deos translata esse dicitur, et regnabit cum eis sine fine in lumine intellectuali. Quæ autem victæ passionibus et umbris sensibilium detentæ sunt, non ascendunt, sed sub orbem obscurum terræ deprimuntur, remanentes in tristitia : cum ex hoc quod delectabilibus sunt destitutæ, tum ex hoc quod perfectione ad quam secundum naturam sunt omnino institutæ, caruerunt : nec possunt regredi ad eas, eo quod non nisi in corpore has possunt accipere, cum sint corporum perfectiones et motores.

Ex hac igitur omnium Epicureorum opinione habetur, quod anima immortalis est, et secundum ea quæ in corpore gessit, felicitatem vel infelicitatem habebit. Videtur autem Epicureus non satis convenienter dicere ea quæ tradit de orbis tristium : quoniam inferior locus orbis non potest habere nomen, eo quod ipse potius locus sit elementi oppressi et centri quam orbis. Sed ad hoc dicit Epicureus, quod orbis iste continet comprimendo et in angustiam ponendo hujusmodi animam : et sicut videmus deprimi cœlestia, cum aliquod terrestre accipiunt a nebula ad ea evaporante, ita quod etiam hujusmodi animæ ab effectu passionum cœlo incongruo sub orbem hunc tristium deprimuntur, quasi fascis congregatione et ignis æstuans earum desiderium est æstuans et furens ad delectabilia, cum tamen impossibile sit ea consequi.

Dubitabit autem aliquis fortasse dicens,

¹ I de Anima, tract. 1, cap. 12.

quod animæ exutæ corporibus, hujusmodi desiderii non subjacent, eo quod ad corpora hujusmodi referuntur delectabilia quibus tunc carent. Sed ad hoc dicit Epicureus, quod non corporum delectationes manent, sed potius similes illis, sicut in artifice carente materia et instrumentis manent habitus et formæ similes his quæ per instrumenta exercentur et in materia introducuntur : cum enim anima naturaliter sit perfectio corporis ut motor, et per potentias substantiales et naturales sibi moveat corpus, remanent in ea et in potentiis ejus habitus et passionem inclinantes ad motum corporis, sicut manent in natura imaginationes navis etiam postquam a navi separatur.

Hæc igitur sunt, quæ dicunt antiquissimi Epicureorum Philosophorum et peritissimi : et attestantur his ea quæ fiunt insanis, in quibus per cælicolas et sacrificia animæ ipsæ tales de se et de diis dederunt rationes, et usque hodie faciunt in operibus necromanticis imaginum, et in arte inventionis thesaurorum, et in multis aliis operibus quæ ab Hesiodo et Hermogene tradita sunt.

Ex his igitur et similibus jam aliquis concipere poterit, quod tam Peripatetici, quales fuerunt Anaxagoras et Abubacher et Averroes et Avicenna et Algazel, quam Stoici, quales noscuntur fuisse Plato, Socrates, Pythagoras, et Speusippus, et omnes Academici, et Bragmanici Philosophi, quam etiam Epicurei, quos ultimo induximus, concorditer ab ipsa coacti veritate animam post dissolutionem corporis immortaliter vivere perpetuo tradiderunt.

CAPUT XII.

De opinione novella, quæ omnium animalium motivorum post mortem dicit remanere animas.

Post omnes autem dictas opiniones, quorumdam nova nobis inducitur opinio, dicentium omnes animalium quæ secundum locum moventur, animas post corporis permanere dissolutiones : et hæc opinio partim antiquum sequitur Democritum, et partim Orpheum quantum potest perpendi ex carminibus Orphicis.

Democritus enim dicebat omnium corporum formas esse animas : opprimi tamen plus et minus a terrena materia, aliquando usque ad intellectus amissionem, aliquando autem usque cum intellectu ad sensus amissionem, aliquando autem etiam usque ad amissionem nutritionis cum sensus et intellectus amissione.

Orpheus autem mundum plenum diis immortalibus esse dicebat, qui attrahuntur respiratione, et fiunt animæ corporum, sicut in libro de *Anima*¹ diximus. Et uterque istorum animas post separationem a materia remanere dicebat.

Sed hæc novella opinio non omnes remanere dicit animas, sed eas solas quæ in corporibus suis motum faciunt locali-

¹ I de Anima, tract. II, cap. 12.

ter processivum, forte ex hoc persuasio- nem accipiens, quod motor separatur a mobili : et videtur quod omnis perfectio corporis alicujus quæ ut motor conjungitur mobili, separari potest ab ipso : hæc enim in omnibus videmus supercœlestibus, in quibus motores sunt separati, per nullam virtutem vel potentiam quæ sit in ipsis actus corporis existentes sicut actus est forma materiæ, licet actus sint sicut motor est actus corporis moti ¹. In artibus autem quæ imitantur naturam, sicut est nautica, et hujusmodi artes, etiam motor separatur : et ideo videtur his quod etiam in natura in quibus est motus a seipsis, motor universaliter separetur a corpore quod movet, et cum non sit per naturam corruptibilis, quod post corporis permaneat dissolutionem.

Ad hoc autem videtur esse ratiocinatio Phædri : quoniam in omnibus per se et a se motis necesse est esse unum primum quod sit causa motus illius : et hoc non potest esse compositum ex motore et moto, sicut alibi demonstratum est a nobis : igitur hic ex seipso exerit motum in mobile : et quod ex seipso exerit sic motum, per suam naturam et essentiam est causa movens, quia aliter non esset primum : et quod per essentiam est movens, virtutem movendi non accipit a corpore quod movetur et per eam non dependet ad ipsum : quod enim convenit per essentiam alicui, hoc non habet nisi a seipso et non ab alio : et quod non dependet ab alio, separabile est ab ipso, sicut demonstratum est in antecedentibus : ergo omnis anima motiva videtur esse separabilis a corpore.

Sed hoc dogma philosophiæ non congruit, nisi forte Pythagoræ et Democriti et Orphei dictis : eo quod nos jam in XVI libro *Animalium* ² ostendimus omnes animas præter rationalem educi de materia : et quod de materia educitur per generationem,

non potest remanere dissoluta materia. Non enim remanet aliquid, cujus principia tenent iaipsum in esse non remanent : et distinximus in præhabitis, quod alia est virtus corruptibilis, et alia virtus operans in corpore secundum corporis harmoniam, et alia quæ secundum essentiam suam et secundum suam substantialem opinionem non dependet a corpore. Nec oportet repetere quæ bene in antecedentibus et aliis libris nostris probata sunt, ubi ostendimus nullam formam esse separabilem, nisi eam solam quæ etiam in corruptibili materia secundum substantias et potentias sibi essentielles et operationes jam in corpore manens, separata est. Propter quod etiam quidam dixerunt onimam rationalem in corpore adhuc existentem, esse per se ubique et semper, licet per accidens sit hic et nunc : quod tamen dictum ego non approbo.

Sed de hoc satis constat per ea quæ in III de *Anima* a nobis sunt disputata : quoniam anima rationalis fundamenta habet, scilicet vegetativum et sensitivum, per quæ determinatur et individuatur, licet lumen intellectus sit separatum : et hoc modo ubique et semper : quia sine differentia loci et sine differentia temporis omnia intelligibilia fiunt in ipso, sicut in perspicuo fiunt omnia visibilia, et intellectus agentis est facere omnia intelligibilia sine differentia loci et temporis, sicut in lumine est principium activum omnium visibilium.

De his igitur satis in libris præhabitis et in isto dictum est a nobis : et quod de movente hæc opinio pro se inducit, jam in præhabitis est solutum : quoniam motor ille virtutes movendi accipit a corpore, et prævenitur a natura quæ impellit ipsum : et ideo non vere est primus motor et prima causa motus, sicut fingit hæc opinio : est enim virtus in corpore secundum corporis movens harmoniam :

¹ Cf. II Physic. tex. et com 78.

² XVI Animalium, tract. 1, cap. 11 et 12.

et ex virtute corporis causatus et eductus in esse : et ideo cum corporis dissolutione necesse est eum deficere : nihil autem talium est in anima rationali, sicut patet per ante dicta.

CAPUT XIII.

Qualiter anima perficitur intelligibilibus post mortem ?

Omnibus diligenter excussis, tangamus id quod secundum naturam probabilius dici potest, et non faciemus modo aliquam mentionem nisi tantum de his quæ per philosophiam tantum possunt probari.

Dicimus igitur, quod anima rationalis non quidem sit ab intelligentia, tamen ab intelligentia recipit illuminationes : et cum triplex sit intelligibile ipsius animæ, scilicet cum tempore, et continuo, et id quod secundum sui naturam est intelligibile, primum quidem est acceptum cum sensu, et secundum cum imaginatione, et tertium est per intellectum simplicem acceptum. Et est ordo in intelligibilibus : quoniam per hoc intelligibile quod est cum tempore, venit anima ad id quod est cum continuo : et per id quod est cum continuo, venit ad id quod est per seipsum intelligibile : et hæc omnia alibi jam a nobis determinata sunt.

Sed ut bene intelligatur status animæ optimus quid habet in intelligibilibus et felicitate, et qui est finis prosperitatis ejus, oportet scire quod intelligibile quod-

libet dicitur duobus modis, ita quod duplex sit intelligibile cum tempore, et duplex intelligibile per seipsum. Acceptum enim cum tempore est duobus modis, quorum unum est ratio formæ sensibilis, ita quod ipsa forma sensibilis sit accepta in se per se : cujus ratio intelligitur per abstractionem ab intellectu, sicut est intellectus albi vel calidi vel dulcis et aliorum quæ sunt hujusmodi. Alio modo dicitur intellectum cum tempore, quod non est simile nisi per accidens : et ratio ejus intelligitur concepta cum natura, et tamen intelligitur per se : sed tamen quia ratio ejus concernit mobilem materiam, ideo dicitur intellectum cum tempore, sicut est intellectus carnis et hominis et aliorum quodlibet, quorum nullum est sensibile nisi per accidens, et rationes illorum per quas sunt in intellectu, habent diffinientia et formam et materiam quæ concernunt tempus : sicut si quis diffiniat carnem, dicens quod caro est compositum complexionatum ex calidis et frigidis et humidis et siccis medians in tactu, quorum quodlibet tempus concernit. Et cum dico, quod hoc sentitur per accidens sensibilis, scilicet per accidens continentis secundum quod est sentiens : quia caro non accidit ei quod est album, sed e converso : sed per accidens dicitur sentiri : quia cum sensibili per se accipitur non a sensu, sed potius a ratione reflexa ad sensum, sicut diximus in libro de *Anima*.

Eodem autem modo dicimus, quod intelligibile cum continuo dicitur duobus modis : hæc enim est aut ratio continui, aut id quod accipitur cum continuo. Continui autem ratio intelligitur quantitatem et figuram imaginando : aut etiam discreti intelligitur ratio continui et figuræ et ratio discreti. Et similiter est de motu et quiete. Acceptum autem cum continuo est idem quod acceptum est cum sensu, quod est per accidens imaginabile, sicut per accidens sensibile, et hoc est homo, vel animal, vel Dionis filius, vel aliquid hujusmodi, quod accipitur per

intellectum ad imaginationem reflexum.

Eodem autem modo et intelligibile per se dicitur duobus modis : dicitur enim intelligibile per se, quod quidem ex propriis principiis essentialibus non nisi intelligibile est, tamen secundum esse est commiscibile temporali et continuo, sicut est substantia naturalis, ut homo, animal, et hujusmodi : propria enim et essentialia principia horum non sunt nisi intelligibilia, esse tamen habent in sensibilibus et imaginabilibus. Dicitur etiam intelligibile per se quod tam secundum suæ quidditatis principia, quam secundum esse non nisi intelligibile est, sicut Deus, et intellectus, sive intelligentia cœlestis, et hujusmodi.

His igitur sic determinatis, dicimus quod anima rationalis differt ab intelligentia cœlesti. Per intelligibilia enim quæ sunt cum tempore et continuo, pervenire habet ad intelligibile quod secundum esse et essentiam per se est intelligibile : et sic est ordo illis per se intelligibilibus habet devenire ad primum intelligibile quod est causa omnium aliorum, et in illo stat, sicut in virtute suæ sapientiæ et contemplationis finalis. Propter quod omnia intelligibilia adminiculantia sunt ad primum intelligibile, sicut dicit Alfarabius et Avempace : id enim quod est cum continuo et tempore, lumen habet ex parte qua est intelligibile : et id lumen illuminat intellectum, et sub ipso lumine duplicis illius intelligibilis efficitur intellectus amplioris capacitatis quam ante fuit, et disponitur ad altius per duplex lumen physici intelligibilis quod est cum tempore acceptum : et quando intellectus qui reflexus fuit ad sensum, revertitur ad seipsum, retinet lumen intelligibilis : eo quod hoc sibi et non sensui erat proprium, licet cum sensu secundum unum modum et a sensu secundum alium modum sit acceptum.

Quod autem intellectui et non sensui sit proprium, patet per hoc quod intelligibile primum incorruptibile est : quoniam ratio albi et ratio calidi quæ a sensu accipitur, perpetua est et incommutabilis.

Similiter autem ratio carnis et ratio hominis et ratio animalis quæ cum sensu accipitur, æterna hoc modo est quo æternum dicitur incommutabile. Incommutabilitas autem quæ æternitas vocatur in talibus, est a lumine intellectus agentis, per quod moventur in intellectum possibilem, sicut patet per hæc in præcedentibus et in libro de *Anima* ¹, et in libro de *Intellectu et intelligibili* dicta.

Omnino autem eodem modo dicimus de his quæ intelliguntur cum continuo ex intellectu reflexo ad imaginationem : hæc enim imaginationis non sunt propria, sed intellectus : et ipsorum æternitas est ab intellectu, sicut quod diameter est asimeter, et senarius numerus est perfectus, et alia quæcumque sunt talia. Hæc igitur lumina retinet intellectus ad se reversus, et ex his luminibus illuminatur, et sic illuminatus efficitur amplioris facultatis in intelligendo quam sit per seipsum. Et ideo licet per seipsum intellectus noster se habeat ad ea quæ per se intelligibilia sunt, sicut oculi vespertilionis ad lumen solis, tamen cum his luminibus fortioris efficitur luminis, ita quod jam proportionatur facultas ejus his quæ per se sunt intelligibilia : et sicut venit ab intellectu cum tempore ad intellectum cum continuo, ad intellectum intelligibilis per se, quod tamen secundum esse est cum tempore et continuo : ita venit ab intellectu primæ causæ, et stat ibi : quia ipsa est ultimum intellectum, quod est lumen omnium intellectuum.

Sic igitur proficit in contemplativam felicitatem verus et purus animus se-

¹ I de Anima, tract. 1, cap. 18. ..

quens et colligens id quod est puri intellectus in omnibus rebus, et exaltans se usque ad supremum intellectuum. Propter quod præ omnibus hi Philosophi studentes primo in physicis, venerunt postea ad mathematicam, et ultimo ad studium divinorum venientes in eis vitam finiverunt : et hanc felicitatem præ omnibus aliis Solo Atheniensis commendavit, dicens « animam post mortem in his felicitari. » Propter quod cum in ultimo spiritu esset constitutus, et Metrodorus et quidam alii coram eo conferrent de quodam intelligibili divino, supra vires collecto spiritu caput erexit : et cum a Metrodoro compatiendi sibi rogaretur caput ad cervical submittere, dixit : « Sinite, ut et hoc intelligibile de quo confertis, apprehendam antequam moriar, ut ampliori luce felicitatis elevetur intellectus. » Hic igitur est status animæ rationalis post mortem felicissimus in luminibus istis secundum naturam.

Econtra autem est de animalibus his quæ hanc negligunt intellectus perfectionem. Sicut enim intelligibile per lumen intellectus agentis movetur ad intellectum possibilem, ita per mixtionem materiæ et motus et quantitatis obscuratur : et contrarium non est nisi hic et nunc : et non accipit ipsum anima rationalis nisi prout est hic et nunc. Sic autem nec liberum est, sed umbrosum et materiale : et ideo nihil luminis accipit ex ipso taliter accipiens ipsum anima : propter quod per ipsum non habet viam ad verum intelligibile, in quo perfecte lucet anima : et ideo cum luce destitutus intellectus huiusmodi manet tenebrosus in seipso, nec est irradiabilis hic intellectus post mortem : quoniam sicut in antehabitis diximus, intellectus possibilis non est susceptibilis luminis quod vere est lumen intellectus, nisi confortatus luminibus his quæ a sensu vel cum sensu et ab imaginatione vel cum imaginatione sumuntur : ad sensum autem et imaginationem impossibilis est regressus post mortem : et ideo talis intellectus impossibilis est ad

illuminationem, sed remanet in perpetuis tenebris, quæ sunt luminis intellectualis privatio et destitutio.

Objectio.

Et si quis objiciat, quod in anima rationali post mortem remanent potentiæ vegetativæ et sensitivæ secundum ea quæ ante dicta sunt : et ideo per illas iterum possunt accipi huiusmodi lumina. *Dicendum* quod non sic remanent, quod possunt reduci ad actum : quia sicut diximus, hæ potentiæ organicæ sunt, et ideo non veniunt ad actum nisi per organi harmoniam : et organi tunc non potest esse resumptio secundum naturam : et ideo remanet in umbris et tenebris perpetuis secundum naturam. Et forte hæc fuit causa, quod quidam philosophorum dixerunt animas post mortem transcorporari, et tamdiu transfundi donec per lumina intellectualia quæ dicta sunt confortatæ lumine divino perficerentur. Hæc igitur est causa, quod etiam contemplatio huius pura et firma summum bonum hominis esse ponitur a Philosophis, in quo est status felicitatis ipsius : et hoc esse non posset, nisi secundum oppositum illius inesset infelicitas.

Solutio.

Amplius secundum contemplationem intelligibilis quod commune est intellectualibus substantiis separatis a mortali corpore et anima intellectuali nequaquam inesset felicitas, nisi hæc felicitas conveniret animæ secundum quod est separata et post mortem corporis remanens.

Hoc igitur est quod de statu animæ rationalis post mortem remanentis quantum ad intellectum ipsius dici potest.

CAPUT XIV.

De perfectione animæ post mortem secundum statum virtutis secundum Peripateticos.

De parte autem animæ qua vult et operatur, quæ *pars affectiva* vocatur, est alia via perfectionis secundum sententiam Peripateticorum. Hi animam perfecti dicunt virtutibus quadruplici virtute apud se solam, quæ sunt virtus moralis, et virtus intellectualis, et virtus quam vocant heroicam, et quarta quam divinam appellant. *Moralem* autem in duo dividunt: quoniam ea quæ in passionibus mediat, habet medium quoad nos: et ea quæ est in commutationibus et distributionibus secundum concivilitatem ad alterum, habet medium quod secundum rem ipsam æquale est, aut secundum rationem medii arithmetici, aut secundum rationem medii geometrici: quoniam in communicando sequitur medium arithmeticum, et in distribuendo sequitur medium geometricum. In *intellectualibus* autem medium virtutis est ratio recta, sicut patet in omni intellectuali virtute quæ est intellectus, scientia, prudentia, sapientia, et ars, et sub his contenta. Licet autem virtus moralis circa passiones medians habeat medium quoad nos, tamen participat ipsum determinata ratione prout sapiens et prudens determinat, sicut in *Ethicis* habet determinari: ratio autem determinata

per sapientem et prudentem perpetua est: virtus igitur ex parte illa perpetuum aliquid habet.

Amplius autem irascibile et concupiscibile non sunt susceptibilia virtutis, nisi eatenus quo participant aliquid rationis et intellectus: cum enim non sint in intellectuali substantia, nisi secundum esse potentiarum, persuasionem et ordinem a ratione et intellectu accipiunt: et in præhabitis ostensum est, quod ex parte illa etiam ipsæ potentiæ perpetuo manent in anima ipsa. Eodem modo est de medio justitiæ in communicando et distribuendo: quamvis enim omnino nulla sit communicatio vel distributio, semper necessarium et æternum et incommutabile est, quod æquale inter damnum et lucrum, sive inter minus habere et plus habere damni et lucri, medium est communicationis et distributionis.

Cum igitur sic gradus sint in virtutibus dictis, et venit per assuetudinem operum ad virtutem moralem, et ex perfectione moralis venit ad heroicam, et per heroicam venit ad divinam, et intellectuales sunt regentes et ordinantes in omnibus his. Est enim *virtus heroica* idem quod divinorum virtus: divinum autem dicit id quod super est. Insuper esse autem necesse est, quod per aliquid superponat, et aliquid superius contineat ne decidat. Superius autem in homine est id quod est mentis bene constitutæ et ordinatæ. Id ergo quod continet hominem in his quæ constituunt mentem, ita ut nec modicum deflectatur a mentis constitutione et ordine, dat ei virtutem heroicam. Continentia hujus et superponencia hominem super sensum et passiones non sunt nisi pulchra et bona mentis: et continens ne decidat non est nisi inflexibilis necessitas honestatis: propter quod duæ vel tres potissimæ sunt virtutes heroicæ. Ea enim quæ superponit passionibus, vocatur *continentia*: et ea quæ superponit parti animali qua communicamus cum brutis, vocatur *dominalitas* a quibusdam, et a quibusdam

libertas, et ab aliis *humanitas* : et hanc alii sub continentia comprehendunt. Ea vero quæ superponit communicationibus, vocatur *amicitia*.

Quod facile est videre per singula. Quoniam continentia est mora in mente, ut dicit Aristoteles, hoc est, quod homo in mente bene constituta sic permaneat, quod nullo modo exeat regulas mentis propter aliquam violentiam passionis inclinantis ad turpe : sic enim continens se in mente, omnibus dominatur passionibus. Similiter autem stans et attingens dignitatem intellectus et rationis, et regulas ejus inflexibiliter sequens, nullo modo dejicitur ad brutalia sive feralia, quæ sunt iræ et furisë et mœchiæ concupiscentiarum et turpitudines eorum, quæ impetu quodam concupiscentiæ vel iræ in brutis feris agi videmus : et hæc est dominatio quædam naturæ humanæ et libertas, quæ non est acta ab impetu naturæ, sed potius agit naturam, sicut diximus in antehabitis, et est vera a brutalitate exaltata humanitas : et ideo hæc sibi nomina attribuuntur. Amicitia autem fundatur super honestum, ut in omnibus non nisi honesta et propter honestum diligamus : et qualescunque sic diligimus, cum his optime communicamus : et ideo illa est summum omnium communicationum.

Si igitur hæc tria inflexibilem habeant vigorem, faciunt heroes per hoc quod sunt heroicæ virtutes. Et statim etiam cuilibet patet, quod omnia hæc sunt quæ infra limites mentis ponunt brutalia quæ nobis ex genere communi animalium conveniunt : passionibus enim quæ infra limites mentis, frænata continentia, secundum quod continentia est mora sive permanentia in mente et violentia passionis : non enim extrahuntur. Humanitas in mente quæ mensura est, intra mentis metas ponit ipsa animalia, ne impetu agant, sed potius ad normam obediunt rationis. Et hæc in seipso constituunt heroem. Amicitia autem perficit ad alterum, ut non purus aut libidine cæca fe-

ratur ad alterum, sicut bestiæ, sed potius amicitia honesti cum vitii indignatione. Sic ergo perfectio heroica secundum mentem non est in ultimo suæ felicitatis, nisi etiam hæc tripartita avertunt ad unum quod secundum simplicem intellectum est bonum. Cum enim virtus moralis sit circa delectationes habentes contrarium, et similiter virtus heroica contrarium habet, non possunt delectationes illarum virtutum esse perfectæ et omnibus modis firmæ et puræ, eo quod aliquid sit contrarium conturbans virtuosum : sed in simplici intellectu speculante verum simplex et purum et firmum, de quo vere est sapientia quæ non habet contrarium, est delectatio nullum omnino habens contrarium.

Et si quis diligenter ista consideret, virtus moralis est circa ea quæ innaturalia et ægritudinalia et corruptiva sunt materiæ, sicut est superfluum et diminutum tam in passionibus innatis quam in passionibus illatis, quam etiam in damnis et lucris communicationum et distributionum civilium : omnia enim hæc sunt innaturalia et corruptiva naturæ, et tamen per virtutes morales ad naturam reducuntur. Propter quod etiam has innatis sumus suscipere, cum tamen insint secundum naturam communis generis : eo quod casta et fortia et communicativa et civilitatem custodientia inveniuntur animalia bruta, sicut nos ostendimus in libris antehabitis istius scientiæ. Rectificata autem sic natura communis generis per virtutem moralem, reducitur totum istud bonum ad bonum superioris naturæ, quæ est mens mensurans, et aliquando ratio dicitur, secundum quod ipsa consideratur ut regens inferiora, quæ secundum commune genus conveniunt : et hoc autem fit optime per virtutem heroicam : hæc autem fit perfectio totum rationis regentis bonum, sicut sui summum ordinatur ad bonum divinum quod est intellectus bonum, qui solus divinus est in nobis. Primum ergo bonum est naturæ communis, secundum spiritualis, et

tertium divinæ. Propter quod dicit Socrates, « deos hoc bonum facit, cum immortalibus diis maximam habent convenientiam. »

Cum igitur id quod est perpetui ordinis ab anima, accipitur a bono morali : et quod est rationalis regulæ, accipitur ex bono heroico : et ex his suffultus animus intellectualis, conjungitur bono divino, admirabiles et puras et firmas et quales Deus habet, habens delectationes, tunc perfecte felix est anima intellectualis : et cum omnia hæc in anima remaneant, et non sint nisi in anima, quæ talia secum extra corpus habuerit anima, felix esse perhibetur a philosophis, et in hoc perpetuum gaudere felicitate.

Propter quod Aristoteles in libro de *Natura deorum*, dicit quod Socrates, cui inter omnes morales cum diis immortalibus maxima communio, factus est divinus, divina in singulis colligendo. In moralibus adeptus medium quod sapiens per sapientiæ rationem determinavit : hoc enim divinum est et perpetuum. In intellectualibus autem rationem rectam in scibilibus et intelligibilibus et sapientiæ subjectis, et factibilibus per artem, et agibilibus per voluntatem et prudentiam. In heroicis autem mensuram omnem adeptus est mentis. Quæ omnia divina et perpetuas et inconcussas habentia rationes et virtutes et essentias. In divinis autem sibi quantum possibile fuit adeptus est lucem et delectationem divinam. Ex quibus divinus effectus, ut tradit Plato, felix vivit secundum intellectum in eo quod mortale fuit in ipso deposito. Econtra autem hi quibus nulla est cura pulchritudinis id quod divinum est in ipsis, convertunt ad sensum et rationem, et lumen mentis extinguunt impetu brutali, et tota brutalitate meis et passionum excellentiis corrupta, cum animæ ipsorum resolvuntur a corpore, remanent in eis desideria passionum et tristitiæ, quod a passionum insecutione sunt præcisæ : et in hac tristitia et desiderio destitutæ, tristes ma-

nent in æternum, eo quod intellectuale ipsorum non illuminatum et vigoratum in corpore, post mortem nullius bonitatis est susceptivum.

Et hæc quæ in capitulo continentur, sunt quæ de immortalitate animæ tradidit Socrates, sicut de ipso recitat Plotinus Philosophus in quodam libello suo quem de *Differentiis virtutum* composuit, et solum divinum factum sapientem esse dixit, et in hunc probavit non posse cadere perturbationem. In talibus igitur bonis est status animæ puræ post mortem secundum effectum.

CAPUT XV.

De sententia Platonis circa felicitatem et infelicitatem animæ post mortem.

Plato autem in *Moralibus* suis, ut de ipso Apuleius narrat, aliquantulum deviat ab hac via. Dicit enim intellectum inesse in anima ejus intelligibilium omnium formas, et esse animam harum immemorem propter undam lactis qua concipitur et nutritur. Cujus signum esse dicit, quia cum fluxus lactis sive nutrimenti fortis fit in superiora in pueris, est intellectus in eis sicut in ebrio est vel epileptico, qui licet multa sciat, tamen tunc uti nullo potest nisi prius cesset motus vini in superiora. Signum autem ejus quod dicit, est in omni somno in quo propter fluxum nutrimenti in superiora patitur homo aliquid epileptiæ simile, et in somnio quod est somni passio, mo-

vetur perturbata anima sapientis ad phantasmata, sicut facit anima ebrii et pueri : cum tamen constet animam sapientis in somno et ebrietate et epileptia habere habitum sapientiæ, licet non utatur eo. Tunc et similiter dicit esse in omni anima omnium habituum virtutis moralis intellectualis et heroicæ, licet non utatur eo antequam per studium erudiretur virtus intellectualis, et per assuefactionem virtus moralis. Virtutem autem heroicam Plato hoc nomine non nominat, sed vocat *virtutem purgatoriam*, quæ delectationes et tristitias non modo non sequitur, sed etiam omnino non sentit : et hanc dicit enitescere in mente per longam a delectabilibus aversionem. Simile autem hujus ponit in flamma, quæ in viridi quidem est obscura et fumosa, et per solam aquosi humoris rarefactionem efficitur clara et lucens. Similiter autem quod per solam asperitatem superficiali est umbrosum, et per torsionem simplicem efficitur politum et nitens sive fulgens.

Ad hoc ergo redit dictum Platonis, quod studia et assuefactiones non aliquid conferunt intellectibus aut effectibus, sed tantum removent contrarium impediens : et tunc anima per hoc quod habet apud se de habitibus intellectualibus et moralibus, agit perfecte et operatur tam circa intellectualia, quam circa moralia. Et hoc videtur etiam sentire Boetius in libro de *Consolatione Philosophiæ*, ubi dicit, quod « si Platonis musa personat verum, quod quisque discit, immemor recordatur. » Quia autem de hoc alibi in scientia de *Anima* disputatum est, sufficiant ea quæ nunc dicta sunt.

Sed hoc quod oportet accipere ex verbis istis, hoc est, quod Plato animam ex eisdem felicem dicit esse et infelicem, ex quibus et nos secundum Peripateticos diximus eam esse felicem et infelicem, licet alium modum ponat Plato quam nos posuerimus. Ex virtutibus enim moralibus et intellectualibus et heroicis et divinis dicit inesse felicitatem

animæ, et ex contrariis harum dicit eidem inesse infelicitatem : sed dicit has naturaliter inesse animæ, et per studium enitescere eas et per assuefactionem. Nos autem per studium et assuefactionem dicimus has acquiri. Sed hæc disputatio alterius scientiæ magis est propria.

Amplius Plato propter hoc quod hæc virtus clausa dicitur esse in anima, dicit animas ita diu de generatione in generationem transcorporari, donec in aliquo enitescant corpore. Nos autem imperfectam et turpitudini deditam animam dicimus secundum Peripateticos perpetuo manere obscuram et tristem et destitutam. Quod autem his pœnis addatur secundum leges divinas, quarum iudicium animam post mortem sustinere oportet, non potest determinari per philosophiam aliquam : et ideo hoc alii scientiæ et alterius modi investigationi est reservandum.

CAPUT XVI.

De operatione animæ quam agit post mortem.

Ultimo autem in hac scientia de animæ natura, intelligere oportet quid agat et quid operis habeat post corporis depositionem anima immortalis quæ rationalis est. Dico autem utrum agat in potentiis nutriendi et augendi vel generandi secundum potentiam vegetabilem ipsius. Licet autem quædam legum Epicureorum Philosophorum animas post mortem dicebant cibos appetere, et ambro-

siam in alimentum, et nectar deorum accipere in cibum : quia tamen hoc nulla ratione probari potest, his non est consentiendum : et ideo non est credendum, quod aliquid talium agat anima vel operetur post mortem. Hæ enim potentiæ, et similiter illæ quæ sunt secundum sensibilem partem animæ, sunt in anima intellectuali secundum esse intellectuale participatum, sicut actus participatur ab eo quod est potentiæ : et ideo non habent actus proprios, nisi quando conjunctæ sunt organis, quorum sunt perfectiones. Cum autem resolvuntur organa, stant sub actu intellectus, et bonum intellectus est per redundantiam in ipsis : sicut enim modo dum in corpore manemus, aliquando sentimus delectationes divinas, quæ secundum simplices intellectus sunt in tantum profundatæ nobis, quod avertunt nos a sensu et imaginatione et nutritione : ita multo magis tunc tota anima usque ad fundamenta sua repletur Dei delectationibus contrarium non habentibus : et sic tota felix et deliciis plena permanet : et ideo solus tunc operatur intellectus, et ad operationem ipsius connaturalem et propriam et in nulla parte impeditam tota redundat anima in delectatione et diffusionem : et hoc est eam gaudere gaudio pleno, cui nihil admiscetur de contrario.

Est autem opus suum secundum dicta sapientium duplex. Theophrastus enim, et omnes qui Aristotelis sequuntur doctrinam, dicunt opus suum esse in conversione ad lumen intelligentiæ et causæ primæ, ex qua fluunt ei formæ intelligibiles lucidæ et puræ, in quibus continue speculantur bonitates intelligentiarum et causæ primæ : est enim anima, ut dicunt, sub intelligentia, sicut natura est sub anima : et ideo sicut anima formas suas imprimit in naturam, ita ut natura acta ab anima agat ad formam animæ : ita intelligentia imprimit in animam sic quod anima rationalis agit in contemplando ad formam intelligentiæ. Et iste modus non est improbabilis : et

hoc modo etiam intelligentiæ separata omnino sua lumina et suos conceptus ingerunt animabus in oraculis et aliis modis divinationum, sicut dicunt Epicuri Philosophi.

Alius autem motus est secundum supra dicta, quod videlicet anima jam illuminatum et confortatum intellectum habens per se possit ad intellectus rerum : videmus enim, quod intellectus potest ad res intelligendas abstrahendo a phantasmate modo dum est in corpore, et confortatus potest ad intellectum divinorum : et hoc modo dicimus, quod sicut modo ordinatur super res, et ideo lumine suo abstrahit a phantasmatibus rerum, ita separatus omnino potest super ipsas res extra animam existentes, ut lumine suo abstrahat a rebus ipsis et intelligat eas : et tunc omnis talis intellectus determinatur per comparisonem sui intelligibilis ad rem, sicut et nunc determinatur per reflexionem sui intelligibilis ad imaginationem et sensum. Et hoc modo apud intellectus separatos magnus dixit Dionysius esse rerum sensibilibus cognitiones insensibiliter et immaterialiter.

Nec aliquid invenitur quod huic positioni repugnet. Si enim dicat aliquis quod non sit intellectus nisi per abstractionem, dicimus hoc verum esse : sed nos ponimus quod potest fieri abstractio a re per intellectum sicut a phantasmate : et addimus, quod quamdiu intellectus est obumbratus corpore, indiget adjutorio sensus et imaginationis : eo quod intelligit cum continuo et tempore. Separatus autem et confortatus luce intellectuum, sicut diximus in antehabitis, per seipsum sufficit a rebus ipsis facere abstractionem.

Et hunc modum intelligendi posuit Theophrastus : sed in hoc differt a nobis, quod ipse in anima non dixit esse nisi intellectum agentem : nos autem dicimus esse in anima et intellectum agentem et possibilem, et formam abstractam per lumen agentis moveri ad possibilem sicut ad suum locum in quo est ubique

et semper, sicut enim formæ generatæ in materia cum ipsa forma datur motus ad locum, et ipse locus, sicut determinatum est in VIII *Physicorum*: ita formæ simplici cum hoc quod facta est simplex, datur locus in quo est esse simplex, sive hoc fiat particulariter a luce corporea, sive a luce intellectuali: sed a luce corporea efficitur in perspicuo, et a luce intellectuali efficitur in intellectu possibili: et iste motus est facilis et planus inter alios modos intelligendi.

Si autem quis quærat quam communicationem habeat intellectus agens cum re in quam agit abstrahendo, dicunt quod tale habet lumen intellectus agentis cum formis rerum, qualem habet lux corporea cum coloribus: quædam enim luces incorporatæ sunt coloribus, similiter quædam lumina incorporata intellectus agentis sunt formæ rerum, sicut patet per antedicta, in quibus ostensum est intellectum agentem esse primum movens et agens in tota natura: et hæc communio sufficit abstractioni: hoc enim modo quo abstractum est in potentia est abstrahens in actu et connaturale sibi, et hæc principia tali sufficiunt actioni, qualis est abstractio formarum quæ nihil aliud est quam explicatio earum ab esse materiali et corpore et acceptio earum secundum esse simplex.

CAPUT XVII.

De operatione intellectus secundum eos qui sequuntur Platonem

Omnes autem moderni temporis existentes modum tenent Platonis circa intellectus operationes. Dicunt in omnibus separatis a corpore intellectibus esse formas omnium rerum ideales concausatas ipsi intellectibus, quas dicunt esse similes ideis æternis et formis artis, et per has esse intellectus rerum apud intelligentias separatas, dicentes quod illæ formæ habent species similes toti ordini causarum naturæ universæ in superioribus et in inferioribus causis. Qualiter autem istæ formæ ad res comparentur, isti non possunt dicere. Adhuc autem qualiter hæ formæ efficiantur propriæ, cum nihil omnino accipiant a rebus, isti dicere non possunt. Propter quod etiam quidam Philosophorum consenserunt non esse apud animas separatas et intellectus separatos nisi universalia rerum, ita quod de nullo habent scientiam in natura propria, nisi in universali. Hæc autem scientia est valde imperfecta, qua habita non scitur res, sed ignorata ea ignoratur res: et secundum hoc eorum intellectuum qui sunt omnis scientiæ principia, potissima scientia, imperfectissima erit omnium scientiarum, et nullam rem scient nisi solum in potentia: et hoc videtur mihi esse absur-

dum. De his tamen omnibus primo Philosopho determinare opus est. Sed ea quæ hic diximus, cum naturalibus metaphoricam composuimus, ut perfectior sit doctrina, et facilius intelligantur ea quæ di-

cta sunt. Hæc enim est consuetudo nostra in toto hoc physico negotio.

De generatione igitur et distinctione et natura et statu animæ et incorruptione et opere tantum dictum est a nobis.



INDEX

Tractatum et Capitulum in Libro de Natura et Origine Animæ.

LIBER DE NATURA ET ORIGINE ANIMÆ.

TRACTATUS I.

De natura animæ in corpore.

CAP. I. De tribus propositionibus super quas fundatur inquisitio de animæ generatione, et quæ inquiri debeant de anima? 375

II. Qualiter colligitur natura formarum et diversitas secundum propositiones præinductas secundum Platonem, Pythagoram, Aristotelem, et Democritum? 377

III. De propinquitate et distantia vegetabilis ad intellectum moventem qui est primus motor in natura, et de causa distantiae et propinquitatis, et de differentia naturæ vegetabilis, et de origine vegetabilis animæ, 379

IV. De generatione et natura sensibilis animæ, et quantum elevatur super vegetabilem, et qualiter unitur, et quantum appropinquat intellectui primo moventi in tota natura? 385

V. De origine et natura animæ

rationalis et elevatione sui super materiam et si- militudinem ad intelle- ctum purum, et de uni- tate quam habet cum sensibili et vegetabili in homine.	389	Avicennæ et Algaze- lis.	403
VI. De eo quod rationalis sola est perfectio, et qualiter perficit hominem et mem- bra, et qualiter est per- fectio vegetabilis et sen- sibilis, et qualiter est inseparabilis ab illis, sed illæ separantur ab ipsa?	391	IV. De solutione inductarum objectionum secundum Averroem et Abubacher et Avempace, et de im- probatione erroris qui est in solutione eo- rum.	405
VII. De natura possibilis et agentis intellectus in ho- mine, et qualiter se ha- bent ad animam?	393	V. De errore Alexandri de sta- tu animæ post mortem et dissolutionem corpo- ris.	407
VIII. De natura animæ, utrum sit composita vel sim- plex, et unde habeat movere secundum lo- cum et motu progressi- vo?	395	VI. De octo demonstrationibus necessariis, ex quibus anima rationalis im- mortalis esse convinci- tur.	408
		VII. De statu animæ post mor- tem secundum Platonem, cui præmittitur generalis divisio, quid diversi Phi- losophi de hoc statu tra- diderunt.	414
		VIII. Quid veritatis opinio Py- thagoræ contineat?	417
		IX. De opinione Anaxagoræ et Abubacher et Averrois de statu animæ post mor- tem.	418
		X. De his quæ contingunt opinionem Avicennæ et Al- gazelis.	420
		XI. De opinione Isaac et Cæ- cinnæ et Athali et alio- rum Epicureorum Philo- sophorum.	421
		XII. De opinione novella, quæ omnium animalium mo- tivorum post mortem dicit remanere animas.	423
		XIII. Qualiter anima perfici- tur intelligibilibus post mortem?	425
		XIV. De perfectione animæ post mortem secundum sta- tum virtutis secundum Peripateticos.	428
		XV. De sententia Platonis circa felicitatem et infelici- tatem animæ post mor- tem.	430
		XVI. De operatione animæ quam agit post mortem.	431
		XVII. De operatione intellectus secundum eos qui se- quantur Platonem.	433
TRACTATUS II.			
<i>De natura animæ non conjuncta corpori secun- dum quod ipsa est in se, resoluto corpore post mortem.</i>			
CAP. I. De rationibus Platonis ad Phædrum, quibus ani- mas probat esse perpe- tuas.	397		
II. De separatione animæ ra- tionalis a corpore se- cundum probationes Avi- cennæ et Algazelis.	400		
III. De solutione objectionum quæ sunt contra dicta			

D. ALBERTI MAGNI

RATISBONENSIS EPISCOPI, ORDINIS PRÆDICATORUM,
PARVA NATURALIA.

LIBELLUS

DE UNITATE INTELLECTUS CONTRA AVERROEM.

CAPUT I.

Contra eos qui dicunt, quod post separationem ex omnibus animabus non remanet nisi intellectus unus et anima una.

Quia apud nonnullos eorum qui philosophiam profitentur, dubium est de animæ separatione a corpore : et si separatur, quid ex ea remaneat : et si remanere concedatur secundum intellectum, qua-

liter intellectus remanens ex una anima se habeat ad intellectum remanentem ex anima alia, utrum sit idem illi, vel diversus ab eo : oportet nos de his duobus per rationes et syllogismos videre, quid sentiendum sit et tenendum. Et ideo quæcumque dicit lex nostra, non omnino præterimus, tantum ea accipientes quæ per syllogismum accipiunt demonstrationem. Quæcumque autem jam probata sunt in libris nostris de *Anima*, quod intellectus separatur a corpore, et de statu ejusdem post separationem, subjaceant. De his autem jam in libro de immortalitate animæ sufficientes posuimus probationes, et in III de *Anima*¹, et in II de *Intellectu et intelligibili*², ubi si quis subtiliter advertat virtutem syllogismorum, puto quod de partis intellectualis separatione nullam habebit dubitationem.

De hac igitur sola quæstione, utrum videlicet id quod remanet ex una anima, sit idem illi quod remanet ex alia, et sic idem sit quod ex omnibus remanet animabus, debemus facere disputationem.

¹ II de Anima, tract. 1, cap. 28.

² II de Intellectu et intelligibili, cap. 1 et per totum ipsum librum.

Ad hoc autem quod bene hæc disputatio intelligatur, oportet primum perfecte scire positionem eorum qui hoc dixerunt. Ad positionem enim simul et ad rem disputatio erit in hoc opere. Positio enim Philosophorum de substantiis separatis quæ intellectus agentes proprie vocantur, et a quibusdam vocantur intelligentiæ, est duplex, sicut ostendimus summatis in libro undecimo *primæ philosophiæ* ¹.

Una quidem harum positionum est, quod omnis intellectus universaliter agens in materia quæ sibi subjicitur, sit substantia movens aliquod cælum, ita quod motus cæli est immediatus actus ejus, et cælum est ipsum instrumentum, cujus motu virtutes et formæ ipsius intellectus veniunt ad materiam, et educunt ex ipsa in actum id quod est in potentia in ipsa : quia id quod est in potentia, non educitur in actum, nisi per id quod est in actu : eo quod omnis generatio est a convenienti in forma.

Et hi dicunt, quod motus est proportionalis mobili quod movet, et quod huic motui nihil accedit per substantiam, nec aliquid recedit de substantia ipsius.

Dicunt etiam isti, quod nullus est intellectus separatus qui non sit alicujus perpetui corporis motor. Et ideo nullus est intellectus qui moveat elementa et elementata in actionem et passionem et mixturam qua moventur ab invicem, sed quod iste totus motus ad motum cæli reducitur sicut ad causam.

Dicunt autem motum cæli esse intellectualis substantiæ motum : et ideo facere omnia ad modum intellectus moventis. Et propterea in spermatibus et seminibus dicunt fieri non unum, sed diversa : quia virtus intellectus agentis quæ distinctiva virtus est in spiritibus spermatum, operans est cum distinctione intellectus

agentis. Et hæc *virtus formativa* vocatur a quibusdam. A quibusdam autem vocatur *intellectus* propter operationis similitudinem, quia distincte multa operatur sicut intellectus. Quidam etiam vocant eam *animam*, non ut animam operantem, sed dicunt eam esse animam ad modum artificis : nec tamen ex hoc sequitur quod semen sit animatum : quia intellectus artificis est in multis diversimode, et similiter anima. Est enim in corde et in manu, et in dolabro et in ligno. Nec tamen sequitur, quod manus sit animata intellectu artificis, vel quod dolabrum sit animatum : cum tamen intellectus operans sit in omnibus illis.

Dicunt etiam isti, quod nulla est substantia separata, nisi sit movens actu et sempiterno motu : quia si aliqua esset substantia separata, non movens, illa esset frustra. Frustra autem non potest esse in natura, et præcipue in rebus perpetuis, quæ sunt uno modo semper : quia si in illis esset aliquid otiosum, sequeretur confusio in toto natura : quia tota natura causatur a substantiis primis separatis, et motus ipsarum est tamquam vita existentibus omnibus. Sed de hoc satis in *prima philosophia* ² dictum est.

Horum sententia est ³, quod anima nobilis quæ est hominis quantum ad intellectualem ejus partem, ingreditur ab extrinsecis, et nulli aliquid habet commune, et adipiscitur seipsam in corpore. Et ideo id quod ex ea remanet post separationem, substantia est intellectualis consona substantiis separatis, et remanens in contemplatione ipsorum, sicut nos satis determinavimus in libris de *statu animæ post mortem*, et de *perfectione animæ*. Et ideo quoad istos nulla est quæstio ista : quia secundum istos intellectuali substantiæ moventi nihil unitur per substantiam,

¹ XI Metaphysic. tract. II, cap. 12.

² Cf. totum librum undecimum Metaphysicorum.

³ Cf. *Aristotelem*, II de Generatione animalium,

cap. 3, et *Alexandrum* in libro suo de Anima, cap. de Intellectu agente, et *Themistium* et alios, et adhuc *Alexandrum*, in tract. speciali de Intellectu.

Et si quandoque in libris eorum inveni-
tur quod dicunt, quod anima post mor-
tem unitur motori cœli, non refertur hoc
nisi ad objectum, sicut alibi satis clare
est ostensum. Et si quid est dubitationis
quod remanet indiscussum, est hoc du-
bium secundum rem, et non secundum
positionem. Quia secundum rem ipsam
dubitari potest, quod differat id quod re-
manet ex uno homine post separationem,
ab eo quod remanet ex alio.

CAPUT II.

*Hæc igitur est istorum positio, in qua
omnes fere fuerunt Peripatetici.*

Est autem alia quorundam Arabum
positio, videlicet quod præter intellectus
qui movent orbem, sit intelligentia agens
inferioris ordinis quam cœlestis, et hæc
sit quæ agit in activis et passivis, et lar-
gitur formas in eis. Dicunt enim isti,
quod omne quod largitur formas, est in-
tellectus agens : quia agere formas pro-
prius et substantialis actus est intellectus
agentis. Hoc enim ab antiquo Anaxagora
verificatum est : nec est contradictio ad
hoc, quin omne quod movetur ad for-
mam, oporteat reduci ad tale movens cui
substantiale est formas agere et distin-
guere in omnibus. Et quia isti dicunt ta-
lem esse intellectum diffusum in tota
sphæra activorum et passivorum, et lar-
giri eam in omnibus istis, dicunt quod
lux istius intellectus ingressa in homi-

nem, facit intellectum hominis, et hunc
adipiscitur in formas intellectivas : quia
formæ intellectivæ sunt in luce ejus. Et
quia idem est quod adipiscitur unus ho-
mo cum eo quod adipiscitur alius homo,
ideo sublato eo quod est unius divisum
ab alio, idem est quod remanet ex om-
nibus. Dicunt autem constare, quod intel-
ligentia sive intellectus est, quæ dat for-
mas, cum primus fons formarum sit in-
tellectus.

Adhuc autem cum motor sit proportio-
natus ei quod movetur, dicunt quod non
potest dici, quod eadem substantia moveat
cœlum et materiam generabilium : quia
illæ duæ materiæ non sunt univoce ma-
teriæ vocatæ. Et sic oportet aliam esse
substantiam quæ movet istam inferiorem
generabilium materiam.

Et ut summatim colligatur hoc quod
dicunt, asserunt isti unam esse intelligen-
tiam agentem in omnibus generabilibus.
Unam autem dico in substantia, multi-
plicem vero in formis, hoc modo quo in-
tellectus agens multiplex est in formis :
hæc enim multiplicitas non est in habendo
formas, sed in agendo. Dicunt autem
agere formas secundum materiæ distin-
ctionem, et in materia magis recedente a
contrariorum excellentiis effici intelle-
ctum ipsum. Et rationem adhibent dicti
sui : quia quod est causa formarum in es-
se formali, est etiam causa earum in esse
minus formali : quia causa formæ in
quantum est forma, non potest esse nisi
una, quando reducuntur causæ in suas
causas passivas. Nullus autem dubitat,
quin intellectus agens sit causa formæ ma-
xime formalis : quia intellectus agens per
essentiam suam causat formas in esse for-
mali primo acceptas : hoc enim videmus
intelligendo et in operando per artem.
Cum ergo idem intellectus sit etiam cau-
sa formarum in esse minus formali, mi-
nus autem formale esse habent formæ in
materia quam in anima. Et ideo in mate-
ria etiam causatur ab intellectuali sub-
stantia. Hac igitur de causa dicunt, quod
largitur hujus inferioris intelligentia om-

nes formas generabilium, per se autem irradiat in animas hominum.

Ex his autem duobus sic colligunt suam opinionem dicentes, quod si idem lumen ponatur esse causa omnium colorum, ille qui resolvit colores in causam colorum, cum reliquerit esse quod est uniuscujusque coloris proprium, non remanet ex omnibus coloribus nisi unum indifferens lumen. Quod si per situm non esset distributum, esset per substantiam et subjectum unum et indivisum. A simili igitur cum ex omnibus intellectibus speculativis, quando relinquitur id quod unicuique speculanti est proprium, non remanet nisi unum quod est causa formarum : et hoc per situm non est distributum : igitur est idem per substantiam et indivisum : et hoc adipiscitur continue omnes intelligentias secundum actum. Hoc idem est quod irradians super animam facit in eam intellectum. Sublato ergo eo quod est hujus animæ proprium, non remanet nisi id quod est intellectus agentis : hoc autem est idem quod remanet ex omnibus animabus separatim, est idem et indivisum.

Hæc opinio dicit intellectualem substantiam non immediate movere cælum, sed anima et intelligentias omnino esse separatas, et quod hujus intellectualis actus non est motus, sed potius motus est actus animæ, ut assimilet se huic intellectuali substantiæ. Et ideo dicunt, quod movent sicut desideratum tantum omnes substantiæ intellectuales. Et quia dicunt sic intellectuales substantias esse, dicunt quod non proportionantur mobili secundum vigorem movendi. Et sicut dictum est, ultimi ordinis intellectualis substantia non est cœlestis, sed ipsa per essentiam luminis sui irradiat in animam sicut per instrumentum suum in quo agit formas secundum esse formale, et irradiat super materiam sicut super subjectum sibi, in quo agit formas secundum esse materiale. Ideo cessante eo quod lucem ejus determinat, non est nisi unum quod remanet ex omnibus illis.

Hæc igitur est positio ad quam est disputandum, tamen elargabimur disputationem, disputantes etiam ad rem, et inquirentes utrum secundum utramque istarum positionum, idem vel diversum sit quod remanet ex omnibus animabus.

CAPUT III.

De difficultate quæstionis disputandæ, et de modo veritatis indagandæ.

Est autem hæc disputatio difficilis valde, nec ad eam admittendi sunt, nisi qui nutriti sunt in philosophia : quia quicumque alii sunt, verba quidem audire possunt, sed ad intellectum eorum non sunt idonei. Totus enim cœtus fere loquentium de anima, transtulit se ad loquendum de ea secundum imaginationem qua imaginantur animam ut compositam quamdam substantiam, quæ est sicut quoddam particulare compositum in seipso ex materia et forma, et quod est subjectum accidentibus, sicut virtutibus et scientiis et etiam potentiis naturalibus quæ sunt vires animæ. Et nullo horum modorum loquuntur de ea Philosophi : quia licet anima vires habeat, istæ tamen vires ejus sunt sicut formæ. Sicut enim omnis forma ex additione se habens ad aliquam aliam formam quam præsupponit, sicut vita supponit esse, et albedo supponit lucis diffusionem, habet illius formæ quam præsupponit virtutem, nec tamen propter hoc est particulare compositum secundum se : sicut etiam superficies omnis

longitudinem habet, nec tamen est composita ex linea et alio quodam : et sic in multis potest aliquis facile invenire. Jam autem ostendimus in aliis locis, quia anima dum accipit scientiam et virtutem, suam essentialem accipit perfectionem, nec alteratur in talibus, sed perficitur. Et ideo non sequitur, quod virtutibus et scientiis sicut subjectum compositum subjiciatur.

Adhuc autem in ista disputatione, eo quod volumus loqui nisi ad sapientes, nihil volumus fingere, sed omnia ad veritatem rei cogere virtute demonstrationis : scitum autem est, sicut in duodecimo *primæ philosophiæ* dictum est, quod coactum est ad disputationem.

His ergo sic prælibatis ad disputationem, attingamus primo rationes adductas, quod quidquid ex omnibus remanet animabus humanis, est idem unum.

CAPUT IV.

De triginta argumentationibus quas pro suæ opinionis confirmatione erronei inducunt vel inducere possunt Averroistæ.

Sunt autem multa valde ex quibus probare videntur isti, quod ex omnibus animabus humanis remanens est unum et idem.

1. Et primum quidem quod inducunt, cui etiam maxime innituntur, est quod jam

in parte est superius inductum. Dicunt enim, quod unius effectus indifferentis secundum essentiam, quamvis differat secundum modum suscipientis, et non secundum naturam ejus quod efficitur, est una causa essentialis. Forma autem est ad effectum, eo quod de non esse procedit ad esse, et est effectum quoddam in anima et in materia, non differens nisi secundum modum suscipientis. Igitur est effectus unius causæ essentialis primæ : quia causæ formales et efficientes resolvuntur ad unam causam primam.

Hinc ergo objiciuntur sic : Prima causa operans per essentiam, est una in omnibus effectibus suis : et si tollatur totum quod est de proprietate qua distinguitur effectus, non remanet nisi id quod est de causa et essentiali actu ejus. Cum igitur intelligentia sic causet animas in corporibus, cessante eo quod est corporum diversificantium eas, non remanet nisi id quod est de prima luce intelligentiæ : et hoc non est nisi unum : igitur unum est quod remanet ex omnibus animabus. Hujus autem dant simile, quia videmus ignem in lignis causare calorem, et fumum, et rubeam flammam. Et si aliquis tollat quidquid est in tali effectum ex parte lignorum, non remanet nisi clarus ignis. Et si tolleretur quidquid per materiam dividitur in toto mundo, non remaneret nisi ignis unicus : et quod remaneret ex omnibus ignibus, esset idem et unum. Sic igitur cum constat animam rationalem nihil aliud esse quam intellectualis substantiæ : et dicunt quod sublato eo quod facit eam esse hujus et illius, cum non sit nisi intelligentia una ex qua resultat, erit unum et idem quod ex omnibus remanet animabus.

Unde per hanc viam etiam isti concedunt, quod anima corrumpitur secundum esse animæ : et id quod remanet ex ea, est id quod est secundum substantiam substantiæ intellectualis et lucis ejus, quæ constituit animam in hoc corpore et in illo.

2. SECUNDA VIA est : quia dicunt quod omne quod distinguitur ab alio, aut distinguitur per materiam, aut per formam. Traditum est enim in V *primæ philosophiæ*, quod omne quod dividitur, dividitur aut per formam, aut per quantitatem. Scimus autem, quod intellectus unius animæ ab intellectu alterius animæ non distinguitur per aliquam formam, quæ sit differentia essentialis : aut igitur distinguitur per materiam, aut est idem ipsi : quia idem est a quo non differt differentia. Quod autem non differt per materiam, planum est omnibus scientibus philosophiam : quia ab omnibus est scitum quod intellectus a materia penitus est separatus. Et alibi nos jam probavimus, quia si daretur esse ex materia, non acciperet nisi illa cum quibus in materia habet communicationem, sicut facit oculus, et auris et omnes aliæ virtutes quæ sunt in materia : modo autem omnia accipit. Et si dicatur quod illa materia est spiritualis et intellectualis, nihilominus sequitur propositum : quia secundum hoc non intelligeret nisi spiritualia : quod falsum esse videmus.

Adhuc autem quidquid est ex materia, non recipit nisi receptione materiæ. Intellectus autem nihil eorum quæ recipit, recipit receptione materiæ, sed potius receptione loci. Igitur intellectus non est ex materia aliqua.

Adhuc autem quidquid est ex materia aliqua, hoc quod recipit, non recipit nisi receptione subjecti, ita quod receptum distinguit ipsum secundum aliquid esse receptum. Intellectus autem species est eorum quæ recipit sicut locus, et locans est species ejus quod recipitur in ipso : et non efficitur aliquid esse in eo quod sic recipit a recepto, sed potius e converso a recipiente datur esse recepto : ergo intellectus non est ex materia aliqua.

Si dicatur, quod hæc quidem omnia sunt ex virtute formæ quæ est intellectualitas perficiens materiam ex qua est intellectus, sicut est manifestum quod ex virtute perspicuitatis multa sunt in

aere, quæ non sunt ex potentia materiæ aeris : sicut verbi gratia, quod colores sint in ipso secundum esse spirituale. Et sic velit dicere, quod illius materiæ ex qua est intellectus, multa sunt ex parte formæ quæ perficit eam. Et hoc modo tunc receptio ejus est elargata, quod ea quæ recipiuntur in ipsa, aliter recipiuntur quam in materia. Sed contra hoc est, quod nulla forma quantumcumque sit nobilis, tollit a materia modum receptionis materiæ in toto. Modus autem receptionis est recipere secundum esse : et ideo etiam quidam dicunt animam compositam ex materia et forma. Dicunt quod illa forma illi materiæ dat esse. Ergo si intellectus est compositus ex materia et forma, oportet quod illius materiæ sit recipere secundum esse omnes formas, ut videtur.

Et quod dicitur de perspicuo et coloribus, non est simile : quia etiam colores secundum esse spirituale potius sunt in aere sicut in medio locali, quam sint in materia : propterea quod omnino omni scienti philosophiam constat hoc quod materia quæ individuatur formam substantialem, per hoc quod est in ea, individuatur etiam formam consequentem per hoc quod est in composito ex ea et ex forma individuata. Igitur a destructione consequentis quæ non individuatur formam consequentem, non individuatur formam substantialem. Sed in intellectu universalis non sunt individuata : quia si essent individuata, non essent universalis : ergo non est ibi materia individuans formam substantialem : et sic sequitur quod prius.

3. TERTIA VIA est, quod omne quod habet materiam, est in potentia ad aliquid : quia etiam in cælo in quo est materia est potentia ad ubi. Si ergo est materia in intellectuali anima, oportet quod secundum aliquid sit in potentia. Constat autem quod non est in potentia ad actum perfectum nisi mediante actu imperfecto qui est motus : quia omne quod de po-

tentia venit ad actum, per motum venit ad actum : hoc autem non oportet probare, quod anima intellectualis non subiciatur motui : ergo non habet materiam : et si non habet materiam sublato eo quod attribuit eam huic corpori et illi, non remanet aliquid quod dividat id quod separatur ex omnibus hominibus. Igitur id quod ex omnibus remanet, est idem et unum.

4. QUARTA VIA est quasi logica. Dicunt enim, quod quidquid ex se non diffinit aliquid nec determinat, remanet universale et idem et unum ubique : intellectus autem separatus ex se non diffinit nec determinat aliquid : igitur videtur quod remaneat universalis idem ubique. Si enim aliquid diffiniret et determinaret intellectus ex se, illius esset sicut materiæ propriæ : nullius autem est sicut materiæ propriæ : ergo nihil ex se diffinit vel determinat. Sublato igitur eo quod per se refertur ad hunc vel ad illum, quod est id quod respicit continuum et tempus, et hæc est imaginatio et sensus, remanens in se nihil sibi difiniens neque determinans. Ideo igitur est ubicumque sit et ex quocumque. Et illi rationi multum innititur Averroes, sed aliis verbis tormat eam. Sed quia fortior apparet, sicut hæc formata est, ideo sic induximus eam.

5. QUINTA VIA est : quia non fit oculus omnium colorum susceptivus et harmonia quædam, nisi per id quod est colorum substantia et hypostasis quod est perspicuum : nec agit color in oculum, nisi per id quod est actus et perfectio colorum secundum actum et species ipsorum. Igitur eodem modo nos de occultis non possumus iudicare nisi per manifesta. Intellectus non fit susceptivus omnium formarum tam eorum quæ sunt corporalia,

quam eorum quæ sunt intellectualia tunc, nisi per id quod est hypostasis omnium formarum secundum hoc quod formæ sunt : nec movent intellectum tales formæ, nisi per id quod est species omnium. Intellectus autem accipit formas físicas et mathematicas et divinas, sicut in III de Anima¹ a nobis est probatum, et in multis aliis locis. Oportet igitur quod accipiat eas, et sit acceptivus ipsarum per hoc quod in ipso est aliquid quod est formarum omnium hypostasis, et quod formæ moveant per eam per hoc quod est species formarum omnium. Neutrum autem horum est aliquid materiale, sed formale. Oportet igitur intellectum esse de se immaterialem, et esse formarum omnium quamdam hypostasim. Et speciem oportet esse alteram ab intellectu quæ moveat ipsum, vel potius moveatur ad ipsum sicut ad locum et ad speciem. Nihil igitur penitus in intellectu est aliquid materiale, nisi aliquis velit fingere. Et diximus jam, quod hoc non licet. Igitur quod ex omnibus manet, est forma indistincta. Et hæc ratio valde est notabilis et bona : quia ex ea sequitur quod idem est quod manet ex omnibus corruptis post mortem.

6. SEXTA VIA est : quia dicunt quod id quod per se est causa simplicitatis et separationis a materia, maxime est simplex et separatum in seipso. Simplicitatis autem et separationis non causa est in rebus nisi intellectus. Igitur secundum se maxime est simplex et separatus. Quod autem maxime est simplex et separatum, non distinguitur per hoc quod est in multis. Igitur intellectus sive intelligentia secundum se non distinguitur per hoc quod est in multis. Quod autem non distinguitur per hoc quod intellectus, si accipiatur absque multitudine, remanet indivisum et unum. Igitur intellectus remanens ex omnibus intellecti-

¹ III de Anima, tract. III, cap. 5.

bus remanet intellectus indivisus et unicus.

Hæc autem via est cui multum innituntur illi qui hunc errorem invenerunt. Per istam enim viam habere videntur, quod una sola intelligentia quam decimi ordinis vocant, est quæ irradiat super animas, et facit in eis operationem intellectualem, et quod hæc sola est quæ remanet post mortem, sicut fuit ante mortem.

7. SEPTIMA VIA est quæ fundatur super propositiones logicas. Dicunt enim quod species accepta sine materia est una natura indivisa, et non dividitur nisi per materiam. Et hoc accidit ei in quantum est in materia, et non secundum se : hæc autem multo magis convenit ei quod est species specierum. Est autem intellectus species specierum. Igitur non dividitur nisi participatione materiæ. Sed participare materiam est contra naturam intellectus et contra diffinitionem ipsius. Igitur intellectus materiam non participat : manet igitur indivisus in omnibus. Quod igitur ex ipso relinquitur post mortem ex omnibus, est unum et indivisum. Et hæc ratio est cujusdam Mauri qui vocatur Abubacher.

8. OCTAVA VIA est hæc : quia id quod est in aliquo, est in eo secundum potestatem ejus in quo est. Exemplum ejus autem hoc est : quia si colores sunt in corpore terminato, sunt in ipso secundum potestatem corporis terminati. Si autem sunt in perspicuo, sunt iterum in ipso secundum potestatem perspicui. Et si sunt in oculo, iterum secundum aliud esse sunt in ipso quod est secundum potestatem oculi. Et sic est in omnibus : hæc enim propositio non habet instantiam, dummodo bene intelligatur. Nos autem jam prædiximus, quod non loquitur hic nisi bene intelligentibus. Si ergo sic est, assumamus hanc, quod universale est in intellectu et non alibi : et intellectus est qui agit in ipso universalitatem, et reci-

pit ipsum ut universale. Nec est aliquid quod recipiat universale ut universale, nisi intellectus. Hæc igitur receptio est secundum potestatem qua intellectus est intellectus. Hæc autem potestas non fundatur nisi in eo quod est universale existens ubique et semper. Ergo intellectus est universale ubique et semper. Quod autem ubique est et semper, unum et indistinctum est apud omnes. Et quod ex ipso relinquitur ex omnibus, est unicum et idem. Igitur intellectus et est unus in omnibus, et quod ex ipso relinquitur ex omnibus, est unum.

9. NONA VIA est : quia dicunt, quod ab omni Philosopho scitur, quod intellectus quia vere est hominis intellectus, est ille qui est adeptus. Adeptus autem intellectus non est nisi qui acquiritur per resolutionem omnium attrahentium et determinationem luminis puri intellectualis, quod relinquitur ex hujusmodi resolutione. Constat autem quod non est illud lumen nisi lux intelligentiæ separatae et agentis. Hæc autem lux secundum se accepta sine contrahentibus et determinantibus eam, est una et indistincta relicta ex resolutione omnium. Intellectus igitur adeptus est unus qui relinquitur ex omnibus. Hic autem est intellectus humanus. Igitur quod relinquitur separatim ex omnibus animabus hominum, est unum et idem.

Huic etiam rationi multum innituntur : et est ratio Alfarabii, sed non inducit eam ad hoc ad quod illi utuntur ea, sed ad hoc quod ostendat quod anima ideo est in corpore posita, ut intellectum continue adipiscatur.

10. DECIMA VIA est probationis qua dicunt, quod omnis forma quæ per esse distinguitur et multiplicatur in materia, potentia est in materia, et per mutationem vel motum educitur de ipsa. Intellectus autem nec per substantiam, nec per operationem est talis forma. Igitur nec potentia est in materia, nec per motum vel

mutationem educitur de illa. Igitur non est forma per materiam multiplicata. Si sic est, sequeretur necessario quod id etiam quod relinquitur post materiæ corporalis resolutionem, quod hoc non est multum, nec plura, sed unum solum. Huic etiam rationi multi multum innituntur.

11. UNDECIMA VIA sumitur a quodam quod est intellectus propria passio. Hoc autem est quod dixit Anaxagoras, quod videlicet intellectus nihil nulli habet commune : quod enim nihil nulli habet commune, remanet indistinctum et unum : eo quod omnis distinctio fit per divisionem ex aliquo communi. Quod autem remanet indistinctum et unum et idem in omnibus, et post separationem ab omnibus remanet unum et idem. Igitur intellectus post separationem ab omnibus non est nisi unus numero et idem : cessante enim eo quod facit numeratum, non manet nisi commune.

12. DUODECIMA VIA est sumpta similiter a passione intellectus, quæ est quod separatus est intellectus : sed nihil est distinctum per hoc a quo est universaliter separatum. Intellectus autem universaliter est a materia separatus. Ergo per materiam nullo modo est distinctus. Constat igitur, quod per materiam non dividitur intellectus unius hominis ab intellectu alterius. Et iterum palam est, quod formaliter per differentiam aliquam non distinguitur unus intellectus ab alio. Ergo nullo modo distinguitur : et quod est indistinctum in omnibus, remanet unum et idem separatum ab omnibus : ergo unus numero intellectus et est omnium et unus et idem remanet post separationem ab omnibus.

13. TERTIA DECIMA VIA est sumpta a quibusdam similibus. Scitur enim quod virtus cordis una est universalis in omnibus membris : et si per intellectum tollantur omnia membra, remanet una virtus cordis numero indistincta. Si autem virtus

cordis esset non organica, tunc id quod remaneret ex omnibus membris, esset indivisibile unum et non organicum. Est autem una virtus intelligentiæ, ut dicunt, cujus instrumentum est omnis anima. Cujus signum est, quia diversimode sentiunt quæ sentiunt, et diversimode imaginantur quæ imaginantur : tamen omnes qui intelligunt per intellectum purum et simplicem, omnes eodem modo intelligunt : quod non posset esse, nisi una intelligentia esset, cujus instrumentum est omnis anima. Si igitur subtrahatur anima hujus et illius, relinquitur quod idem est unum quod remanet ex omnibus ipsis.

Et hæc ratio supponit quod intellectus non sit pars animæ, quod fere supponunt omnes Arabes, qui hujus erroris primi sunt inventores.

14. QUARTA DECIMA VIA est : quia duplex est participatio unius naturæ communis. Aut enim participatur secundum esse, aut participatur secundum essentiam. Secundum esse quidem, sicut natura generis participatur a speciebus, et natura speciei participatur ab individuis. Et quod quidem participatur secundum esse, multiplicatur in his quæ ipsum participant, et secundum omnes potentias naturales, et secundum actiones diversificatur in illis : et unus melius et alter pejus se habet in his quæ ad tales pertinent potentias et operationes, et per defectum corporis deficient hujusmodi potentia et operationes. Id autem quod participatur per essentiam unam, non diversificatur in his quæ ipsum participant, nisi in potentia et operationibus quas habet in his quæ participant ipsum, et non in seipso. Cujus exemplum est in lumine solis, quod unum in substantia participatur a multis, et diversas habet potentias in illis : sed in se manet unum. Intellectus igitur aut participatur primo modo, aut secundo modo. Si primo modo, tunc oporteret quod secundum se deficeret deficiente corpore et putre-

sciente : quod falsum est, quia dicit Aristoteles quod non æqualiter judicant per intellectum juvenes senibus presbyteris. Si autem secundo modo participatur, tunc quidem in his potentiis hebescit intellectus, in quibus operatur in corpore deficiente per senectutem. Et illæ sunt in quibus non intelligit sine continuo et tempore, apud se tamen manens indeficiens. Sed quidquid sic participatur a multis per substantiam, manet unum et indivisum ab illis, et est unicum in substantia. Igitur esse quod manet de omnibus animabus, incorruptibile, est unum per substantiam et indivisum. Huic etiam rationi multum valde multi innituntur hujus erroris auctores.

15. QUINTA DECIMA via est subtilis valde. Dicunt enim quod forma lucis corporeæ non habet contrarium, et ideo dividi non potest, nisi per materiam in qua est. Cum autem sit prima inter formas corporeas, non applicatur alicui, nisi per naturam, qua illud cui applicatur, communicat cum perpetuo superius corpore. Quod autem lux et lumen non habeant contrarium, patet omni philosophiam scienti.

Similiter et hoc planum est, quod cum omnis divisio essentialis fiat per contrarias differentias, quod illud quod non habet contrarium, non dividitur ex aliquo communi quod sit ante ipsum.

Secunda vero pars dictorum plana est : quia sive lumen sit in cœlesti, sive sit in perspicuo elementalī, sive in corpore terminato, non est in aliquo nisi prout est actus perspicui aliquo modo. Et hæc communicat inferius corpus cum perpetuo superiori. Si autem sic est, ut inquirunt, in forma corporea nobilissima, necesse est ut hæc multo magis sit in illa quæ est omnium formarum prima et divinissima. Hanc autem constat esse intellectum : est enim intellectus primum post causam primam, et primus influxus lucis causæ primæ est intellectus. Igitur ista natura quæcumque est, non habet aliquod contrarium, nec participatur ab

aliquo, nisi per aliquod divinum, in quo id quod accipit ipsum, convenit cum causa prima. Hæc autem non potest esse materia. Igitur intellectus est natura quæ non contrarietate aliqua distinguitur ab aliquo, nec materia manet : igitur secundum omnem bene intelligentem indivisa et una in omnibus in quibus eodem modo participatur, et post separationem ab ipsis manet unum et idem ex omnibus relictum.

16. DECIMA SEXTA via est sumpta ex destructione responsionis quæ posset fieri, et quæ datur a pluribus. Dicunt enim, quod intellectus unius distinguitur ab intellectu alterius in numero per materiam in qua est, et non per materiam ex qua est. Et dicunt intellectum esse compositum ex materia, quæ non determinatur nisi tantum forma substantiali, quæ secundum esse est prima. Et hæc forma est intellectualitas : et materia illa nihil habet de proprietatibus materiæ, nisi duo prima, quorum unum est formam fundare, et secundum est formam fundatam per esse dividere. Et hæc est responsio Avicbron in libro de *Forma et materia*, sive de *Fonte vitæ* intitulato.

Sed contra hæc objiciunt, dicentes secundum omnem philosophiam hoc esse planum, quod ex hoc quod est hoc aliquid et materia, nihil fit unum. Si ergo anima intellectualis hoc modo est hoc aliquid per compositionem materiæ et formæ, non potest fieri secundum substantiam ex ea et corpore unum. Igitur homo non est unus per substantiam, quod falsum est. Falsum igitur est hoc, quod anima intellectualis habeat talem materiam, ut isti dicunt. Et si non habet materiam, nec fundatur, nec distinguitur : et sic redit quod id quod ex omnibus hominibus incorporale relinquitur, sit unum et idem.

17. DECIMA SEPTIMA via est sumpta ab hujus intellectus operatione. Agens enim universaliter et ubique non potest esse

distinctum. Si enim detur quod sit distinctum, tunc sequitur quod sit diffinite in loco uno per se vel per accidens : et extra locum illum non est operatio ipsius : quia operatio non extendit se extra id cuius est, nisi per aliquid medium continuetur ad id quod distat ab eo quod operatur. Intellectus autem est universaliter agens in cœlo et in terra, ad distans et ad id quod est prope, præter id quod per aliquid medium continuetur ad id circa quod operatur. Igitur intellectus non est natura determinata vel definita ad aliquid. Quod autem sic indefinitum et indeterminatum est, cum separatur ab his in quibus agit, remanet unicum separatum ab omnibus. Igitur quod de intellectu remanet separatum ab omnibus, est unum et indivisum.

Hæc ratio quibusdam indoctis videtur debilis, et est fortissima, et ad solvendum difficilis multum.

18. DECIMA OCTAVA via est sumpta a simili. Dicunt enim, quod intelligentia separata est quæ movet cœlum quodcumque sit illud : quia de hoc non hic est quæstio : et si consideramus formam quam largitur intelligentia corpori quod movet, una est ex parte moventis, et una est ex parte ejus quod movetur, licet forte distendatur in moto et in motu, quæ indivisa et indivisibilis est in movente. Si ergo motor qui est intelligentia, formam det ad modum moventis, et non mobilis, sive ejus quod movetur, illa manet simplex indivisa in omnibus illis quæ ipsam hoc modo participant. Talis autem forma quæ est ad modum primi motoris, inter omnes formas est intellectus et anima intellectualis. Ergo simplex et indivisibilis est in omnibus qui intellectum participant. Propter quod etiam nullius corporis dicitur actus. Quod autem simplex et indivisum est in omnibus, separatum ab omnibus remanet idem et unum. Igitur quod de intellectuali anima separatur ab omnibus, idem est et unum.

Hæc autem ratio fundatur super hoc, quod nulla forma dividitur per materiam, nisi alia sit in hac parte materiæ, et alia in alia, nisi quæ data a motore ei quod movetur, distenditur aliquo modo, ut virtus corporis in quantitate ejus quod movetur, et in quantitate motus ipsius, quæ quantitas secundum diversas suas partes particulariter movet materiæ unam partem et aliam : quia si physice loquamur, materia non est perceptibilis formæ quæ est in intellectu motoris, nisi per quantitatem moti et motus, nec est intelligibile quod forma aliqua sit per quantitatem moti et motus, nisi distensa per totam continuitatem qua potentia exit in actum. Et ideo si aliqua forma tali distensione est indivisibilis, illa non datur per id quod movetur, nec per motum ejus, sed fluit ab ipsa substantia motoris. Et ideo est immaterialis et indivisibilis in omnibus, et separata ab his in quibus est, remanet una numero et indivisa. Et hæc ratio est fortis.

19. DECIMA NONA via est sumpta ex hoc quod intellectus est locus intelligibilium et non subjectum proprie.

Sic autem arguunt, quod quidquid per unam et eandem rationem est locus omnium, unum est et indivisum, nisi per situm dividatur quoad omnia ista. Intellectus autem ut locus se habet ad omnia, et sic est esse omnia fieri unum secundum actum cum omnibus, quia omnium est locus. Tollendo igitur situm qui sibi non convenit, unus intellectus est in omnibus intelligibilibus et indivisus. Igitur est unus in me, in te, et in quolibet alio. Igitur post me et te et quemlibet alium, unum et idem est quod manet ex omnibus post mortem.

Et hæc ratio est fortis valde, si bene intelligatur qualiter intellectus est locus specierum intelligibilium, et nullo modo subjectum. Sed de hoc hic agere non habemus, sed in aliis hoc a nobis determi-

natum est, et ibi etiam probatum est ¹, quod intellectus et id quod intelligitur, unum sunt secundum actum.

20.

VIGESIMA via est sumpta a passione propria animæ secundum intellectum. Et hæc est, quod ipsa est imago omnium. Duæ enim sunt imagines omnium universaliter solum, quarum una est universaliter agens: illud enim necesse est esse conveniens omnibus: quia probatum est, quod omne quod fit, fit ab agente convenienti sibi in forma. Alterum autem est materia prima, quæ potentia est omnia, et habet omnium in se inchoationem formarum: et hæc est imago secundum potentiam. Prima autem imago est secundum actum: propter quod probatum est, quod actus perfectus omnium est ante potentiam. In his autem nec agens secundum, nec materia secunda sunt imagines omnium: quia nec agens secundum per potentiam activam, nec materia secunda per potentiam passivam ambit omnia, sed quædam: et illorum est imago. Anima autem per intellectum universaliter agentem intelligibilia, est imago omnium et actus: et per intellectum potentialem quo fit omnia, est imago omnium et actus: igitur natura illa intellectualis non potest esse determinata ad aliquid, sicut neque materia vel agens universaliter possunt esse determinata: quia sic essent secunda, non prima: nec ambirent omnia, sed quædam. Si autem hoc esse est necessarium, tunc intellectus indeterminata natura est in omnibus et indivisa: et sic quod relinquitur ex omnibus, est indivisum et unum solum.

21.

VIGESIMA PRIMA via est sumpta a proprietate primi agentis et ultimæ formæ. Agens enim universaliter est agens ad hanc intentionem, quod id quod agit, pertingat ad similitudinem ipsius in for-

ma ultima. Ergo forma inter omnes magis similis primo agenti sive efficienti, est forma ultima quæ se ex additione habet ad omnes alias formas in genere. Hæc autem non est nisi intellectus: quia illa se habet ex additione ad esse, vivere, sentire, et universaliter cognoscere cognitione distincta. Hic igitur inter omnes modos magis assimilatur eidem agenti, et magis participat de bonis ejus nobilibus. Divinas autem nobilitates ejus non contingit participare particulariter, sed universaliter: nec contingit participare per motum, sed per immobilitatem: quia quod participat particulariter, non participat divinas: et quod per mobilitatem participat, participat cum indigentia. Intellectus igitur erit natura quædam quæ nec particulariter nec mobiliter participat: sed talis natura nec est particularis, nec distans a primo fonte divinarum: igitur intellectus neque est particularis natura, neque distans, sed potius una intelligentia primæ causæ per seipsam conjuncta, et ex illis divinis influens super animas quæ lumen ejus participant, et si sic est una et impartibilis et immobilis in omnibus lumen suum participantibus, sequitur necessario quod post resolutionem omnium id quod remanet, non est nisi idem et unum. Et huic rationi fortiter nituntur.

22.

VIGESIMA SECUNDA via est sumpta per naturam ejus quod est universale. Natura enim communis est ipsa substantia ad quam refertur diffinitio, aut aliquid diffinitionis illius naturæ, et est simplex in se existens, et accidit quod sit universale vel particulare. Et similiter accidit ei, quod sit in intellectu, vel quod sit in sensu. Cum autem per accidens sit universale et in intellectu, tunc per hoc accidens fit universale, quod accipitur ut similitudo omnium eorum quæ ambit potentia vel actu. Et quando effi-

¹ Cf. III de Anima.

citur particularis in sensu, tunc fit per accidens quod est esse suum in hac materia sensibili. Si igitur nihil horum accidit alicui naturæ simplici, illa nec erit universalis, nec particularis, sed in se manens simplex substantia et indivisa. Talis autem est natura intellectualis, cui non accidit esse in materia, vel quod potius impossibile est esse in materia. Igitur per esse non multiplicatur, sed manet simplex et una. Quod igitur remanet post resolutionem omnium, est simplex et unum et non multa.

23. VIGESIMA TERTIA via fundatur super exclusionem falsæ responsionis Avicbron. Dicit enim, quod sustinere et recipere sunt passionēs materiæ, et ubicumque inveniuntur, in illis est materia: sed patet quod etiam forma sustinet et recipit, sicut linea rectum et curvum, et numerus par vel impar, et albedo claritatem majorem vel minorem: nec tamen propter hoc sunt composita ex materia et forma. Si igitur anima suscipiat potentias naturales et scientias et virtutes, non propter hoc sequitur quod sit composita ex materia et forma.

Et quamvis hoc sufficiat ad exclusionem ejus quod dicit, tamen alibi jam probavimus, quod anima non est subjectum scientiarum et virtutum proprie loquendo, nec formarum intelligibilium, sed potius talium est locus: et homo secundum aliquid sui, non est subjectum talium, nisi valde large de subjecto loquamur: et large loquendo de subjecto, possunt ea quæ non sunt composita, esse subjecta. Si ergo sic se habet intellectus, ut videatur esse natura simplex et indeterminata per subjectum et locum. Esse autem quod indeterminatum est per subjectum et locum, est idem in omnibus, et idem et unicum remanet resolutis illis in quibus est per aliquem modum essendi.

Ergo idem est intellectus qui relinquitur ex omnibus animabus.

24. VIGESIMA QUARTA via est sumpta per similitudinem omnium formarum. Omnes enim formæ talis naturæ sunt, quod post resolutionem posteriorum remanet unum quod fuit esse in omnibus. Et si formæ essent substantiæ separabiles, remaneret una substantia quæ fuit in omnibus, sicut dixerunt illi qui ponunt formas separatas. In hoc autem in quo deficiunt formæ illæ, non deficit intellectus qui perfectior est omnibus formis. A simili igitur quod remanet post resolutionem hominum, non est nisi numero per substantiam quando est separatum. Et sic idem est quod relinquitur ex omnium hominum animabus.

25. VIGESIMA QUINTA via est sumpta ex hoc quod est causa diversitatis numeri. Numerus enim non est inventus nisi per divisionem: quia divisio est causa numeri. Quæramus igitur, quomodo numeretur id quod remanet ex uno homine et ex alio? Et supponamus cum Philosophis, quod nihil remanet post mortem de his quæ sunt virtutes corporeæ, secundum hoc nihil manet nisi natura intellectualis. Constat autem, quod illa non cadit in numerum per formam substantialem qua una differat ab alia: quia sic essent diversæ species animarum illæ quæ remanent ex omnibus in specie convenientibus: quod est impossibile. Oportet igitur, quod si numerantur, numerentur per id quod est in anima sicut materia. Tale autem aliquid non invenimus nisi intellectum materialem, qui vocatur possibilis. Hic autem intellectus, ut probatum est in III de *Anima*¹, nec est corpus, nec virtus in corpore, nec materia aliqua, sed est separatus sicut intellectus agens. Igitur iste cum sit separatus,

¹ III de Anima, tract. II, cap. 14.

communis et omnibus unus in se existens. Igitur nec per illum numeratur id quod remanet post mortem hominum. Igitur nullo modo cadit in numerum : et sic unum et idem est, quod remanet ex omnibus, et secundum naturam incorruptibile.

26. VIGESIMA SEXTA via est sumpta ex propria separati passione : et est ratio quam facit Avempace in epistola quam vocavit de *Continuatione intellectus cum homine*. Dicit autem sic : Omne separatum ab aliquo respiciens aliquid præter se, quod movet sicut motor separabilis ab illo, est unum apud se, quod nec multiplicatur nisi virtute qua continuatur cum illo quo movet. Veritas hujus propositionis probatur ex omnibus motoribus cœli separatis, et ex omnibus motoribus civitatum et communitatum : quia quilibet illorum unus apud se manens movet multitudinem quamdam, nec multiplicatur nisi multiplicatione virtutis qua conjungitur his quæ movet.

Habita autem ista propositione, procedit sic omnis motor separatus unus apud se manens, et non multiplicatione virtutis qua conjungitur his quæ movet, relinquatur unicus, et nullo modo multiplicatus : sed anima intellectualis per naturam est hujusmodi motor separatus, sicut nauta a navi, et non conjunctus individuis nisi per virtutem qua movet ea : igitur separata ab individuis anima intellectuali, remanet una et eadem substantia apud seipsam, et nullo modo multiplicata.

27. VIGESIMA SEPTIMA via est Averrois super III de *Anima*¹, supponendo hoc quod demonstravit Aristoteles, quod intellectus possibilis non est materia, licet secundum aliquid sit materialis.

Elicitur autem sic argumentatio ipsius.

Quidquid recipit formam quæ est una non multiplicata in multis et omnibus in quibus est, ipsum est unum in omnibus illis. Intellectus possibilis sic recipit formam intelligibilem, ut dictum est. Ergo intellectus possibilis est unus in omnibus illis in quibus est forma intellectualis. Probatur autem prima pars primæ ex hoc quod forma recepta numeratur per numerum subjecti recipientis. Et ideo si receptum in omnibus vel multis est unum, oportet quod recipiens in eisdem sit unum et idem. Secunda autem probatur ex hoc, quod si daretur quod forma universalis recepta in me et in te, non esset una, sequerentur multa inconvenientia : sequeretur enim quod receptum in me esset singulare, et in te similiter. Et hæc duo singularia haberent unum universale abstractum ab eis, et sic intelligibile esset intelligibile. Et hoc de necessitate abiret in infinitum, sicut cuilibet patet qui scit philosophiam. Sequeretur etiam, quod receptio intellectus possibilis esset sicut receptio materiæ : quia quidquid recipit forma secundum esse singulis, est materia vel virtus materialis, et non operans nisi in materia. Et hoc est contra naturam substantiæ separatæ qualem probat Philosophus esse intellectum possibilem. Sequeretur iterum, quod cum discipulus accipit doctrinam a magistro, quod generaretur in ipso alia quædam scientia, sicut unus ignis generatur ab alio igne : quæ omnia sunt absurda. Habito igitur quod intellectus possibilis est unus in omnibus, sequitur necessario quod unum et idem est, quod relinquatur ex omnibus. Et sic habetur propositum sicut prius.

VIGESIMA OCTAVA via est sumpta a ratione possibilis intellectus in quantum ipse est potentia omnia, et est cujusdam Philosophi Mauri, qui vocatur Abuba-

28.

¹ AVERROES, Super III de Anima, tex. et com. 5.

cher, quem alio nomine quidam Haly vocant.

Objicit autem sic : Quidquid est potentia omnia, non est res in seipsa distincta ab aliquo : intellectus possibilis est potentia omnia : ergo non est res in seipsa distincta ab aliquo. Probatur autem prima per hoc, quod si detur quod id quod est in potentia omnia, sit res distincta ab aliquo, sequitur contradictio, quod videlicet non omnia sit in potentia : quia non distinguitur ab aliquo nisi per id quod est in actu : et quod est in actu, non est in potentia. Igitur non fuit verum quod esset in potentia omnia, et nihil omnium in actu : quod tamen probatum est de intellectu possibili.

Hoc autem sic habito, procedit sic : Quod non est distinctum ab aliquo, secundum se non numeratur quando est secundum se acceptum : intellectus possibilis non est distinctus ab aliquo : igitur non numeratur, quando secundum se est separatus. Post mortem autem est separatus secundum se acceptus : ergo tunc non numeratur, sed est idem in omnibus et per omnia, et non multiplicatur.

29. VIGESIMA NONA via est fundata super proportionem agentis intellectus et possibilis, et est Averrois in commento super III de *Anima*¹ extracta de verbis ejus sic : Agens enim omnia universaliter non agit nisi fundatum in aliquo : quia agens universaliter est forma, quæ nec esse habet, nec actionem, nisi fundetur in aliquo. Et sic oportet, quod intellectus agens fundetur in possibili : quia in alio fundari non potest universaliter agens, nisi in eo quod est universaliter receptivum actionis ejus. Et ideo dicit, quod si agens est æternus, quod necesse est quod possibilis sit æternus, loquens contra Themistium et Theophrastum. Et ideo quærit qualiter esse possit, quod si

agens est æternum et patiens æternum, quod factum ab agente in patiente sit generativum et corruptivum ? Si autem sic est, oportet quod tota natura intellectualis in homine sit separata et æterna. Quod autem est separatum et æternum, non numeratur numero materiæ cui per accidens conjungitur : hæc enim propositio per se patet cuilibet. Sed intellectus non conjungitur materiæ, nisi cum continuo et tempore per formas imaginatas. Igitur non numeratur numero hominum. Resolutis igitur omnibus, non remanet nisi unum solum ex omnibus nullo modo multiplicatum. Et est ratio quæ multum est fortis, licet quibusdam non videatur.

TRIGESIMA via est fundata super hoc in quo pendet homo ad intellectum primum qui est causa omnis intellectus. Et hoc iterum extrahitur de verbis Haly Abubacher.

Nos enim in aliis locis ostendimus, quod nihil est in natura sua perfectum nisi in tantum proveniat perfectum quod attingat aliquo modo suum movens primum. Cum igitur secundum Aristotelem, solius hominis sit intellectus, oportet quod primum movens hominem ad hoc quod ejus intellectus est, sit intellectus primus. Oportet igitur, quod per aliquod simile vel idem intellectui primo dependeat ad ipsum, et quod hoc sit maximum honorum suorum et nobilissimum. Illud autem per quod sic dependet ad intellectum primum, non potest esse nisi separatum. Igitur dependet per separatum. Non autem est in homine separatum, nisi quod est non determinatum huic et illi : igitur per hoc quod non est proprium huic et illi, dependet ad intellectum. Sed nihil remanet de anima post mortem, nisi id quod dependet ad intellectum primum : igitur quod ex om-

30.

¹ AVERROES, In commento super III de Anima, tex. et com. 5.

nibus hominibus remanet post mortem, quod non est alicui proprium : igitur unum commune est omnium quod remanet. Et sic habetur propositum.

Hæc igitur sunt quæ partim ingenio proprio, partim ex dictis Peripateticorum collegimus, et sunt difficilia valde ad solvendum. Sed antequam his respondeamus, disputabimus in contrarium. Et in hac disputatione sicut et in priori nihil secundum legem nostram dicemus, sed omnia secundum philosophiam.

CAPUT V.

De triginta sex rationibus potissimis in contrarium opinionis Averroistarum inductis.

Sunt autem plurima contraria illi opinioni quæ nunc probata esse videtur. Nec invenitur aliquis de Peripateticis antiquis qui hæc dixerit : sed illi qui fuerunt idearum auctores, aliquid simile dixerunt, sed illi fuerunt Stoici.

1. Primum quod est contra istos est, quod in omni specie est vera differentia constitutiva quæ de potentia educitur in actum. Quæ autem de potentia educitur ad actum, secundum esse multiplicatur in individuis, et est forma ultima. Ergo forma ultima secundum esse multiplicatur in individuis : forma autem hominis est anima rationalis : igitur anima rationalis et intellectualis secundum esse est multiplicata secundum numerum indivi-

duorum. Quod autem secundum esse vel numerum multiplicatum est, est multiplicatum secundum substantiam : igitur multæ sunt numero et substantia animæ rationales : igitur etiam post mortem remanent multæ : quia supponimus ex alibi probatis, quod anima rationalis sit immortalis.

2. SECUNDA RATIO adhuc est, quod sicut vivere viventibus est esse, et sentire sentientibus est esse, ita intelligere est esse intelligentibus. Id autem quod est esse his quæ sunt, multiplicatur ad numerum eorum, cum esse sit actus essentiæ, et diffusio in eo quod est : igitur numeratur in numero ejus quod est. Intellectualis igitur natura numeratur secundum numerum animalium intellectualium : et sic substantia ejus cadit in numerum secundum numerum intelligentium : nec potest intelligentia capere, quod ex his quæ sunt actu multa, non relinquatur nisi unum, cum multa secundum esse non resolvantur in unum secundum esse, nisi hoc fuerit genus eorum, et hoc non est hic.

3. TERTIA RATIO est ex conceptionibus communibus quæ *dignitates* vocantur, et est, quod multarum substantiarum individuarum multæ sunt naturæ secundum esse, sive natura dicatur forma, sive materia. Si autem hoc est verum, tunc non potest esse verum, quod una natura numero dans esse, sit mea, et tua, et cujuslibet alterius. Constat autem quod intellectus solus est natura hominis. Igitur intellectus non capit quod hæc natura una numero sit in multis. Et hæc est dignitas quæ multis obstat ad intellectum Trinitatis.

Nec potest dici quod intellectus secundum actum, sive secundum influentiam suæ lucis faciat hominem esse hominem in natura et substantia : quia nihil secundum agere est actus secundus alicujus, nisi quod secundum esse substantiale est actus primus ejusdem. Et hæc ratio meo

judicio est adeo fortis, quod ei non potest responderi.

4. QUARTA RATIO ad idem est. Esse uniuscujusque est actus formæ ultimæ. Aut igitur hic homo habet esse proprium, aut non habet. Si dicatur quod non habet esse proprium, cum ab esse proprio sit individuum hoc quod est, sequitur quod iste non sit individuum nec hoc quod est : et si non est quod est, sequitur contradictoria verificari de eodem : quia omne quod est, est hoc quod est : igitur iste est hoc quod est, et non est hoc quod est, quod est impossibile. Igitur oportet dari, quod iste ab esse proprio sit hoc quod est. Quod autem iste est, non est ille : igitur ultima forma istius non est ultima forma illius.

Si forte dicatur quod hæc appropriatio esse est ex parte materiæ, et non ex parte formæ. Contra : esse non est nisi formæ ipsius diffusio : et sic redit quod anima intellectualis numeratur ad numerum eorum qui sunt hoc quod sunt ab anima intellectuali.

5. QUINTA RATIO est ad idem, quod si homo non est homo per conjunctum sibi secundum esse intellectum, tunc sequitur quod non sit nisi unum et sensibile per ea quæ in anima secundum esse sibi conjunguntur. Igitur secundum esse non conjungitur sibi nisi genus. Habitum autem est in tota philosophia, quia genus nihil determinat ad esse, sed tantum dicit potentiam. Igitur homo non est aliquid ad esse specificum et perfectum determinatum. Ridiculum autem est, quod ea quæ sunt minus perfecta, sint determinata in esse : quia quod inter omnia genera est imperfectius, non est nisi in potentia : et hæc ratio est valde efficax.

6. SEXTA RATIO ad idem est, quod sicut in tota philosophia probatum est, quod ea quæ secundum esse separata sunt, et non sunt de esse singularis signati, nec possunt ad esse, nec ad scientiam, nec

ad generationem : quia nihil est quod est nisi per conjunctum sibi secundum esse, nec scitur aliquid nisi per id quod est natura sua secundum esse, nec generatur aliquid nisi per hoc quod tangit materiam et agit in eam. Si igitur intellectus est secundum esse separatus ab homine, ita quod ipse non est de esse ejus, ut dicunt isti, tunc homo non diffinitur per intellectualem, nec est per ipsum. Igitur non potest sciri quid sit homo perfecte.

Si forte dicat, quod sic est de esse hominis, quod ipse non est de esse alicujus in singulari, hoc non potest stare : quia hoc quod per se est existens, nullum est in re extra : sed homo est singularis et aliquis homo, et homo universalis non est nisi intellectu : aut incidamus in sectam eorum qui ponunt esse ideas. Igitur si intellectus est de esse hominis, erit de esse hujus hominis et illius. Quidquid autem est de esse hujus et illius, multiplicatur in illis : quia non potest intelligi, sicut supra diximus, quod aliquid unum numero sit de esse multorum non multiplicatum in illis. Et sic patet, quod etiam post mortem multi relinquuntur esse intellectus : et sic habetur propositum.

7. SEPTIMA RATIO est : quia omnis diversitas quæ est inter Auctores idearum et Peripateticos, est ex hoc quod illi qui dixerunt ideas esse, ponebant eas esse principium cognitionis et scientiæ. Peripatetici autem dicebant quod id quod non est esse rei, non potest esse principium cognitionis rei : quia omnis rei cognitio scitur ex his causis, principiis, et elementis, ex quibus est, et quod nihil horum habet esse separatum ab esse rei, nisi secundum quod est intentio per intellectum denudata ab illa.

Constat autem, quod cum homo sit solus intellectus, quod ipse est principium cognitionis hominis et elementum et causa. Elementum autem est quod est de compositione et esse. Igitur intellectus est de compositione hominis et esse.

Quod autem sic est de compositione et esse ut elementum, multiplicatur in compositis. Igitur intellectus multiplicatur in hominibus : et cum radix adversarii sit, quod non multiplicatur, patet quod destructa radice destructa est propositio dicens quod non est nisi unus intellectus qui remaneret ex omnibus hominibus.

Omnes autem rationes istæ sunt mathematicæ, et absque dubio demonstrativæ, et omnes fundatæ super actum et effectum causæ formalis quæ est unum elementorum compositum.

8. OCTAVA RATIO est : quia sicut jam in III de *Anima* probatum est, quoniam in omni natura in qua est aliquid factum et generatum, oportet aliquid esse agens et aliquid passibile, et illam actionem suscipiens. Constat autem quod omnes confitentur, quod in natura animæ est aliquid factum et generatum quod est speculativus intellectus, et est subjectum et generatum non actione et generatione naturæ, sed actione et generatione animæ simpliciter : quoniam nullum principiorum naturæ agit in tali facto, vel patitur. Igitur oportet, quod in ipsa natura animæ sit aliquid agens animaliter, et aliquid patiens animaliter, ut ita dicam. Cum autem speculativus intellectus qui est factus et generatus multipliciter secundum ea in quibus sit, necesse est quod subjectum ipsius quod est patiens, multiplicetur secundum eadem : quia speculativus non numeratur nisi numero subjecti. Igitur possibilis intellectus multiplicatur secundum numerum speculantium : ergo multiplicatur etiam secundum numerum aliorum. Igitur multi sunt possibiles intellectus relictæ ex multis hominibus.

Et hæc ratio sumitur ex propria natura animæ rationalis, et est fortis, et infra apparebit virtus ejus.

9. NONA RATIO est sumpta a speciali ratione animæ : quia sicut probatum est in secundo de *Anima*¹, eadem est ratio animæ quæ est figuræ. Sicut enim est trigonum in tetragono, sic vegetativum in sensitivo, et sensitivum in rationali. Trigonum autem est in tetragono, ita quod tetragonum non est separabile ab ipso, et sic nec intellectivum separabile est a sensitivo, nec sensitivum a vegetativo. Si autem sic est, tunc unam oportet esse substantiam intellectivam quæ sit sensitiva secundum potentiam animæ et vitæ et vegetativæ : nec est intelligibile quod aliqua substantia una sit propria alicui secundum potentiam unam, et secundum aliam sit communis omnium, et nulli propria : quamvis intelligibile sit quod ab una substantia fluant potentiæ, quarum quædam sunt separatæ, et quædam conjunctæ corpori, sicut virtutes operantes in corpore : ergo non est intelligibile quod intellectus qui est in sensitivo, non separabilis ab ipso, sit communis omnibus hominibus unus in numero existens. Ergo quod separatur de eo ex uno homine, non est illud idem quod separatur de aliis ex alio.

10. DECIMA RATIO. Adhuc ordo est in istis formis ita quod semper una est umbra et resolutio alterius secundum quod magis vel minus immergitur materiæ. Umbra enim intellectus est sensus, et umbra sensus est vegetabile. Hoc autem esse non posset, nisi essent a principio uno : illud igitur unum principium pro certo non est causa nisi unius : una igitur substantia vegetabilis et sensibilis et intellectualis anima : hæc autem substantia est forma. Cum igitur una et eadem forma secundum suum esse non possit in parte esse communis omnibus una numero existens, et in parte propria, non potest esse similiter, quod anima secundum intellectum sit communis, et secundum

¹ II de Anima, tract. i, cap. 11.

sensum propria : et sic iterum redit quod non est idem, sed diversum, quod de intellectu post mortem relinquitur ex omnibus.

11. UNDECIMA ratio fundata est supra ordinem eorum quæ secundum omnem modum causarum procedunt ab uno primo, in quo ordine impossibile est intelligere secundum nisi fundatum in primo, et tertium non intelligitur nisi fundatum in secundo, et sic in omnibus est usque ad ultimum tam in efficientibus quam in formis et in materiis et in finibus. Accipiamus igitur in formis : oportet igitur quod omnis forma secunda fundetur in priori, et tertia fundetur in secunda et prima : quia aliter non esset verum quod causa primaria plus influeret quam secundaria, et quod causa secunda habeat a causa prima et quod est et quod causa est ¹. Accipiamus igitur animatum vivum sentiens et intelligens, constat quod ista se habent ad invicem, sicut prius et consequens. Igitur intellectuale et intellectus in formis fundatur in sensitivo vivo, nec unquam separatur ab ipso. Si igitur sensitivo et vivo non convenit secundum esse uni numero existenti in pluribus, impossibile est quod hoc conveniat intellectui qui funditur in ipso. Constat autem quod sensitivo non sit esse commune. Igitur neque hoc ipsum convenit intellectui qui fundatur in ipso. Igitur intellectivum multiplicatur ad multiplicationem sensitivi. Et sic iterum sequitur, quod non est unum et idem quod de intellectu relinquitur ex omnibus. Non enim est intelligibile, quod multiplicato fundante, non multiplicetur id quod secundum esse fundatur in ipso.

12. DUODECIMA ratio est : quia in fine primi de *Anima* loquitur Aristoteles contra Platonem secundum expositionem Aver-

rois, qui ponebat diversas substantias esse animæ, scilicet aliam in cerebro, et aliam in hepate, et aliam esse in corde. Et dicit unam esse substantiam animæ : sicut enim corpus est unum, cujus partes sunt membra quæ *organa* vocantur : ita anima quæ est perfectio corporis, est una substantia quædam, cujus partes potestativæ sunt virtutes quæ *potentiæ animæ* vocantur. Si autem hoc est verum, tunc vegetativa et sensitiva et rationalis in homine sunt una substantia. Unum autem et idem secundum substantiam non potest partim esse numeratum secundum numerum eorum, quorum est substantia, et partim omnium in communi unum numero existens. Igitur cum vegetativum et sensitivum sint numerata ad numerum hominum in quibus sunt, erit etiam rationale numeratum ad numerum eorundem. Ac per hoc iterum sequitur, quod multa et non unum sunt quæ relinquantur ex animabus defunctorum.

Quod autem dicunt quidam, has tres esse substantias in homine, non reputo opinionem, sed ridiculum : et non dixerunt hoc aliqui Peripateticorum, sed quidam Latini naturam animæ nescientes hoc confinxerunt, et a nobis est in multis locis improbatum. Quia error pessimus est dicere unius subjecti possibles esse substantias, cum illæ substantiæ non possunt esse nisi formæ : sed unius substantiæ esse multas potentias, quando illa substantia fluit ex multis ante se potentiis, generari necesse est, sicut in *prima philosophia* est probatum.

DECIMA TERTIA ratio est : quia in omni eo quod procedit de potentia ad actum, est aliquid quod est primum efficiens in actu, cujus virtus in semine informat omnes alias, et sic informatæ sunt vires illæ in semine, sicut artifex in artificiatio.

13.

¹ Et hæc est propositio libri I de *Causis*.

Et convertitur substantia seminis in spiritum, et spiritus ille movet materiam ad similitudinem primi efficientis. Cum igitur homo generet hominem [ex spermate, est in spermate calor et spiritus animæ. Quærat ergo, cujus animæ? Si dicatur, quod animæ hominis : cum anima hominis non sit nisi rationalis, oportet quod illa ex potentia efficiatur in actu : et quidquid ex potentia efficitur in actu, numeratur numero generatorum, sequetur quod anima numeratur numero generatorum : et sic habetur propositum. Si autem generans est ibi spiritus animæ alterius, tunc sequeretur necessario, quod generatum non esset ex convenienti in forma et specie, quod est absurdum.

Si quis autem dicat, quod ista ratio videtur probare quod anima sit ex materia educta : anima, dico, quæ est rationalis : dicendum quod hoc non sequitur : quia sicut sæpe probavimus, opus naturæ est opus intelligentiæ : et spiritus qui est in semine hominis, est intelligentiæ instrumentum, vel etiam causæ primæ. Et ideo anima rationalis fit ibi ad similitudinem causæ, sicut ostensum est in libro de *Natura animæ*¹ : generatum enim ducitur ad actum similem principii generantis.

14. DECIMA QUARTA ratio super id fundatur : quia oportet esse in tota natura proportionem inter agens et patiens, ita quod omne patiens similiorem quam potest, suscipit actum agentis. Patiens autem quod agenti maxime appropinquat per dispositiones convenientiæ, suscipit actum univocum agentis. Cum igitur agens quod totam naturam informat, sit intelligentia secundum istos qui hunc errorem invenerunt, oportet quod in patiente quod maxime intelligentiæ appropinquat, educatur forma similis intelli-

gentiæ. Hoc autem patiens est corpus hominis maxime æqualitati cœli conveniens, cujus ipsa intelligentia est motor. Igitur in illo faciet similem sibi : et hæc est anima intellectualis. Igitur anima intellectualis numeratur ad numerum generatorum. Et sic iterum sequetur, quod non est una numero in omnibus.

DECIMA QUINTA ratio est. Detur quod intellectiva pars sit separata secundum esse et substantiam. Quod autem separatum est secundum esse et substantiam, non tangit, nec agit, ut probatum est in *XVI Animalium*² : et quod non agit, non alteratur. Igitur ad actionem intellectivæ partis nihil fit in homine : homo igitur per intellectum nihil penitus operatur.

Et si dicatur, quod ex influentia fiunt operationes tales et passiones. Contra hoc est, quod hujusmodi influentia non fit nisi per emissionem luminis usque ad animam. Quæritur igitur, cujus sit illa luminis emissio quæ procedit ad id quod sibi non conjungitur? Et oportet quod sit aliquid continuans inter illuminans et illuminatum, aut non potest intelligi qualiter lumen ejus veniat ad animam hominis. Et quærat, quid sit continuans illud? Et non erit assignare, quamvis enim aliquis velit fingere. Quia igitur separatum omnino non conjungitur, nec continuatur actio ejus cum homine, oportebit quod nullam actionem vel passionem inducat in homine : et sic homo nihil agit vel patitur per rationem.

Si dicat, quod elementa continuant, et illa deferunt actionem ejus ad hominem. Contra hoc est, quod sicut separatur ab homine et a substantia hominis intellectualis natura, ita et multo plus separatus a corpore quolibet alio, nec utitur alio corpore instrumentum. Et sic omnino sequitur, quod ad hominem nulla deveniat

¹ De Natura animæ, tract. 1, cap. 5.

² XVI Animalium, trac. 1, cap. 2.

actio intellectus : et sic nihil agere potest per intellectum, quod est absurdum. Igitur absurda est positio ponens intellectualem naturam omnino secundum esse separatam ab anima hominis : si vero conjuncta est animæ hominis, procul dubio numeratur numero hominum : et sic non est unum numero quod relinquitur ex omnibus hominibus de intellectu, sicut dicunt isti.

16. DECIMA SEXTA ratio est, quod nihil simile est huic in tota natura. Videmus enim in aliis animæ viribus, quod aliquid formale separatum est a viribus quas informat, sed tamen secundum esse non est separatum ab anima, sicut sensus communis qui forma est sensuum particularium, et separatus est ab ipsis, et tamen non secundum esse separatus est ab anima, sed potius particulares diriguntur ad ipsum sicut ad formam.

Similiter lumen formale est respectu colorum, nec tamen propter hoc separatum est omnino a perspicuo, ex quo colores generantur : et in omnibus ita videmus, quod id ad quod sicut ad informans diriguntur cætera, secundum esse est non separatum a subjecto eorum et substantia in qua fundantur quæ diriguntur ad ipsum : quoniam si esset separatum omnino, non esset ratio quare et qualiter dirigerentur ad ipsum.

Cum igitur omnia quæ sunt animæ hominis, ut vires, et operationes, et passionnes, dirigantur ad intellectum, sicut ad continens et ordinans et formans, non potest intelligi quod intellectualis natura secundum esse sit extra animam et penitus separata. Si autem secundum esse conjuncta est, oportet quod numeretur numero hominum. Igitur intellectus sunt tot quot sunt homines : igitur non erit unum numero quod relinquitur ex omnibus.

- DECIMAS SEPTIMA ratio est, quod sicut in octavo probatur *Animalium*, natura per media omnia progreditur usque ad extremum. Et ideo post marinum non statim fit agreste, nisi transeat omnia media quæ partim sunt marina, partim agrestia. Cum igitur videamus in perfectionibus naturalibus infima et media et altissima, natura attingit omnia illa per generationem : igitur ex vegetabilibus sicut ex potentia venit in sensitivam sicut in actum medium : et ex his sicut ex potentiis venit in rationabilia, sicut in actum altissimum. Oportet igitur quod anima rationalis sit actus primus alicujus naturæ materialis. Actus autem primus numeratur numero eorum, quorum est actus. Ergo tot sunt animæ rationales, quot sunt homines. Et sic iterum relinquitur, quod non est idem et unum quod remanet ex omnibus hominibus.
- 17.

- DECIMA OCTAVA ratio est fundata super hoc quod probatum est in XII *Animalium*¹, quod id quod organum habet proprium in corpore, conjunctum est, et non habet esse separatum ab anima. Intellectus autem habet organum in corpore, sicut ibidem probatur, quod manus est organum intellectus. Igitur intellectus non habet esse separatum ab anima² : quamvis enim manus sit organum intellectus, et ideo sit organum organorum, tamen intellectus non est virtus organica : quia nihil accipit a manu, sed potius movet manum conferendo ei speciem artis quam producit exterius in materiam : sed ex hoc patet, quod ipse intellectus non habet esse separatum ab anima : et sic relinquitur, quod numeratur numero hominum, et quod non potest esse idem et unum quod relinquitur ex omnibus hominibus.
- 18.

- DECIMA NONA ratio est : quia ordo est
- 19.

¹ XII *Animalium*, tract. 1, cap. 1.

² Cf. III de Anima, tract. III, cap. 12.

in formis naturæ. Videmus enim quasdam formas quæ sunt tantum formæ separatae penitus. Et videmus quasdam quæ non sunt nisi imagines, et sunt conjunctæ penitus, sicut sunt formæ corporum. Oportet igitur quod sint mediæ formæ, et sint illæ quæ dicuntur animæ.

In omni autem forma est aliquid sine quo forma non potest esse forma. Et est hæc ratio formandi et terminandi : quia forma est terminus esse, in quo res ponitur per formam : et ideo forma dat esse et rationem rei cujus ipsa est forma : formæ autem corporum et per esse et potentiam sunt immersæ materiæ : formæ autem separatae per esse et potentiam, sunt remotæ a materia, et sunt super ea. Formæ igitur mediæ sunt per esse conjunctæ, et per operationem et potentiam separatae, aut per operationem conjunctæ et per esse separatae, aut secundum aliquid sui conjunctæ, et secundum aliquid separatae, si hoc est possibile : quia non potest pluribus modis medium variari.

Sed primus modus medii est impossibilis : quia conjunctum per esse, non habet aliquam operationem quæ non sit conjuncti, neque potest habere. Similiter secundus modus medii est impossibilis per eandem rationem : quia cum operatio fluat ab essentia, non potest esse aliquid per esse et substantiam separatum, et per operationem conjunctum. Relinquitur igitur tertius modus solus. Oportet igitur, quod sint formæ partim conjunctæ, et partim separatae. Et tales non sunt nisi animæ hominum in quibus et separatarum et conjunctarum inveniantur operationes. Quidquid autem est quod in parte conjunctum est, et in parte separatum, numeratur numero eorum in quibus habet utrasque operationes : sed anima rationalis est tale aliquid : ergo numeratur numero hominum, in quibus habet utrasque operationes. Non ergo idem est

quod relinquitur ex omnibus, sicut jam sæpe conclusum est.

VIGESIMA RATIO est ad idem fundata super hoc quod sæpe probatum est in libris de *Anima*¹ et *Animalibus*, quod sicut se habent artes ad instrumenta, sic se habent animæ ad corpora. Unde sicut tibicines non possunt inducere instrumenta architectonicæ ad modulandum in musicis, ita non potest anima una uti alterius animalis corpore ad operationes suas animales proprias. Et ideo datur manus intellectui, et non alii potentiæ animæ : quia olfactus non exercet operationem suam per manum.

Unde etiam probatum est in secundo de *Anima*, quod omnis diversitas quæ est in corpore, est propter diversitatem potentiarum et operationum animæ. Videmus autem determinatam esse diversitatem in organis humani corporis, nec convenientem cum aliis animalibus in figura omnino. Cum igitur non possit hoc esse propter animam sensibilem in qua convenit homo cum brutis, oportet quod hoc sit propter opera animæ intellectivæ. Igitur intellectiva aliquo modo conjungitur corpori : et quocumque modo conjungitur secundum esse, ipsa numeratur necessario secundum numerum corporum : ergo erunt tot intellectus quot sunt corpora : et resolutis corporibus, sequitur quod non est idem et unum quod relinquitur ex omnibus, sicut jam superius conclusum est.

VIGESIMA PRIMA RATIO est fundata super hoc quod in tota natura sive generabilium, sive perpetuorum, numquam invenitur quod duo vel tria vel plura mobilia æque immediate motorem respicientia, moveantur ab una motore. Hoc enim nec in cælis est quæ moventur a substantiis separatis, nec in generabilibus quæ

20.

21.

¹ I de Anima, tract. I, cap. 3.

moventur a substantiis sibi per esse conjunctis, nec etiam in artificialibus invenitur hoc : nisi aliquis moveat plura, ita quod unum per aliud : sed quando sic moventur plura ab uno, tunc non æque respiciunt motorem ea quæ moventur ab ipso. Si ergo hoc numquam facit natura, nec intelligi potest qualiter fieri possit, cum anima intellectualis se habeat ad corpus, sicut motor, et sic hæc habitudo hujus animæ propria, non potest intelligi quod una anima sit movens omnia corpora quæ moventur, sed quod tot sunt animæ, quot sunt corpora mota : quia constat quod anima non movet corpus unum per alterum. Et sic iterum sequitur, quod tot relinquuntur animæ post mortem esse, quot erant corpora quæ movebantur ab ipsis.

22. VIGESIMA SECUNDA ratio est fundata super potentiam qua anima movet corpus. Aut enim movet per imperium, aut per conjunctionem et unionem sui ad ipsum. Si primo modo movet, tunc oportet quod per aliquod imperium animæ rationalis veniret ad corpus. Et hoc esse non posset nisi sensibilis : et hoc improbatum est in III de *Anima*⁴ : quia sæpe intellectus movet contra sensum, sensibili virtute reluctantem et moventem in contrarium. Igitur oportet quod moveat per unionem sui secundum esse. Quidquid autem unitur alicui secundum esse, numeratur numero illius. Igitur iterum sequitur, quod tot sunt intellectus quot sunt homines : et sic iterum sequitur, quod non est idem et unum quod relinquuntur ex omnibus.

23. VIGESIMA TERTIA ratio est deducens ad inconveniens. Si enim homo est solus intellectus, et homo non generat nisi habens animam sensibilem, et nihil de intellectu, sequitur quod homo non generat hominem, sed animal imperfectum :

quia generatio hominis non includit formam ultimam, nec ultima forma secundum esse est aliquid de homine : quæ omnia valde sunt absurda.

VIGESIMA QUARTA ratio est super hoc quod secundum dictum istorum sequitur, quod anima rationalis non sit anima, sed substantia separata : sive enim accipiamus diffinitionem animæ quæ est sicut conclusio, sive illam quæ est sicut demonstratio positione differens, semper hoc sequitur, quod sit separatum secundum substantiam et esse : quia nec est endelechia corporis organici potentia vitam habentis, nec est causa et principium hujus vitæ : quia separatum non tangit : et si non tangit, non agit, neque operatur, est causa operationis. Igitur non est anima. Quod autem est, omnes confitentur.

Si autem dicat aliquis, quod substantia intellectualis ita est in omnibus, quod in nullo per se : hoc ridiculum est, quia de rebus naturalibus nihil est in omnibus, nisi quod est in quocunque eorum : sed in rationibus attributionum aliquid potest attribui toti, quod non convenit partibus secundum se : sicut valor centum marcharum attribuitur alicui toti, quod non conveniret parti, vel sonus qui attribuitur cadenti modio milii, vel tractus navis qui attribuitur aliquot hominibus, ita quod nulli secundum se. Sed id quod est natura et forma, numquam est sic universitatis, nisi per hoc quod est cuilibet secundum se.

VIGESIMA QUINTA ratio est contra hoc quod dicunt, quod prima perfectio hominis non est numerata numero hominum, sed secunda perfectio est numerata numero hominum. Unus enim intellectus est, ut dicunt, in omnibus : sed tamen intelligere istius non est intelligere illius : et dum intelligo, non oportet ut intelligas

⁴ III de *Anima*, tract. iv, cap. 1, 2, et 3.

tu. Secunda enim perfectio sive actus secundus non est nisi essentialis actus, sive essentialis agere actus primi. Et secundus actus est propria operatio actus primi. Ubi igitur secundum esse non est actus primus, ibi non potest intelligi actus secundus. Ergo si actus primus non est in isto vel illo, actus secundus non potest intelligi esse in illo vel in te. Aut si actus secundus est in te vel in illo, erit in te actus primus, et numeratur numero hominum. Et tunc falsa est positio, et erunt multæ animæ rationales.

26. VIGESIMA SEXTA ratio est : quia si actus secundus sit proprius remanente communi actu primo, aut hic erit per se, aut per accidens. Constat autem, quod hic non est per se : quia is qui per se est actus secundus, non est nisi operatio exiens ab esse et essentia actus primi : neque aliquo indigeret ad hoc, nisi essentia actus primi. Et ideo si actus primus sit æternus, erit æternus actus secundus. Sicut se habent ad invicem lux et lucere, et calor et calere, et hujusmodi. Oportet igitur, quod hic sit per accidens : et hoc concedunt isti et dicunt hoc accidens esse continuationem luminis intellectualium imaginantis formas in anima. Continuari autem lumen cum imaginatis, et accidit hoc intellectui, et accidit imaginationi. Igitur iste homo in quantum est hic homo, est homo per duplex accidens. Cum igitur hic homo sit substantia, erit illa quæ verissime inter omnes substantias est substantia causata ab accidente, quod non est nisi ridiculum apud omnes philosophiam scientes.

27. VIGESIMA SEPTIMA ratio est fundata super hoc quod cum anima dicatur esse actus animati, dicitur actus animati sicut somnus : principium autem operationum animati est sicut vigilia. Si igitur non sit ac-

tus animati sicut somnus, non erit actus animati qui est sicut vigilia : igitur cujus non est primus, non est actus sicut somnus. Ergo cujus non est actus primus, non est actus secundus qui est sicut vigilia : sed hominis anima non est actus primus, ut dicunt isti : igitur hujus animati quod est homo, nulla anima propria sibi determinata est ut actus : igitur est animatum cujus anima non est actus. Et ad hoc sequetur contradictio : quia animati omnis anima est actus, et hujusmodi animati nulla anima est actus : quia si anima propria sibi determinata non est actus ejus, nulla anima est actus. Et sic anima est actus ejus, et non actus ejus, quod falsum est : igitur relinquitur, quod sit actus ejus primus. Et si sic est, numeratur numero hominum, et sic sequitur idem quod prius.

28. VIGESIMA OCTAVA ratio est, quod secundum istos motor æternus et separatus movet mobile generatum et corruptum : quod est contra communem scientiam naturalem : quia proportio est inter movens et motum, et motor incorruptibilis est motor mobilis incorruptibilis, et movet motum incorruptibilem, sicut patet ex omnibus demonstrationibus quas posuimus in VIII *Physicorum*¹, et in libro undecimo *philosophiæ primæ*. Nunc autem motor incorruptibilis et perpetuus movet mobile generatum et corruptum : et quandoque movet, et quandoque non movet. Quæ omnia maximæ sunt absurditatis apud eos qui philosophiam bene intelligunt. Igitur relinquitur, quod anima rationalis quæ movet corpus, sit unita ei quod movetur. Et sic sequitur, quod numeretur numero ipsius. Igitur quod relinquitur, non est unum, sed multa.

29. VIGESIMA NONA ratio est : quia si sicut isti dicunt, intellectus non conjungitur

¹ VIII Physic. tract. II, cap. 11.

per actum suum cum anima hominis per formas imaginationis, sequitur quod anima hominis nihil operatur per intellectum : quia lumen agentis quod lucet super formas imaginationis, abstrahit eas et facit universales, et ponit eas universales formas non in anima hominis, sed in intellectu possibili qui in toto separatus est ab homine. Igitur et ipsæ formæ universales ab homine sunt separatæ : nec intellectus igitur, nec intelligibile conjunctum est homini. Homo nihil operatur per id quod non est conjunctum sibi. Igitur homo nihil operatur per intellectum, quod est tam vile, quod tunc omnis homo debet ab hoc subtrahere auditum : quia tunc nullus curat intellectum proprium, et sic nihil est philosophia, nihil est virtus intellectualis.

30. TRIGESIMA RATIO est : quia sic homo non est in potentia sciens, et nulla potentia est in nobis ad scientiam, sicut nec in brutis : quia in nobis non est potentia, nisi ad formas imaginationis, et de illis non est scientia. Intellectus autem possibilis qui potentia est omnia scibilia, non est in nobis secundum eos. Igitur non est in nobis potentia ad sciendum : numquam enim erimus, cujus potentia non est in nobis : ergo numquam erimus scientes secundum actum : quod est contra id quod omnes experimur. Et est error Heracliti.

31. TRIGESIMA PRIMA ratio est : quia secundum hoc nullus est intellectus adeptus. Non enim possumus adipisci proprium intellectum, nisi ex intelligibili proprio. Intelligibile autem non est in nobis, nec aliquis adeptus est hoc quod semper manet separatum ab ipso. Intellectus autem omnis separatus manet separatus. Igitur intellectus numquam est adeptus : quod cum falsum sit, oportet intellectum esse conjunctum. Et sic iterum sequitur, quod numeratur numero hominum, et erunt multi intellectus, et non unus.

TRIGESIMA SECUNDA ratio est : quia secundum hoc quod isti dicunt, anima intellectualis nec ut actus primus nec ut actus secundus conjungitur homini. Et quod non ut actus primus, patet ex hoc quod intellectum possibilem ponunt separatum. Quod autem non conjungatur ut actus secundus, patet ex hoc quod licet universale abstrahatur a forma imaginationis, tamen non est forma quæ sit in imaginatione, imo, sicut dicunt, est idem apud omnes. Si igitur intellectus est idem apud omnes, et speculatum est idem apud omnes, speculatio non est conjuncta homini in aliqua parte : ergo per eam non est homo designatus in numero. Et sic intellectus in nulla sui parte cum homine continuatur. Cum igitur hoc falsum sit, patet quod est conjunctus, et numeratur numero hominum.

TRIGESIMA TERTIA ratio est, quod secundum hoc sequitur, quod anima moriatur cum corpore : quia ex quo non continuatur nisi per imaginationem, non remanente forma imaginationis, non continuabitur cum intellectu. Cessat autem imaginatio non existentibus organis sensuum. Igitur nihil penitus de anima hominis remanet : igitur pereunte corpore perit anima, quod alibi a nobis improbatum est : oportet igitur dicere quod intellectus sit pars hominis, et animæ hominis, et quod numeretur numero hominum : et sic non est unum quod remanet, sed multa numero,

TRIGESIMA QUARTA ratio est : quod si ponamus, quod omnes homines simul destruantur, sequetur iterum quod sit substantia separata, quæ nihil movet et nihil agit : et hoc est frustra esse in natura. Oportet ergo dicere quod non sit separata, sed numerata numero hominum, Tamen ad hoc solum videtur respondere Averroes, et dicere quod numquam cessaverunt nec cessabunt homines esse, neque philosophia. Et si cessaverint in una quarta cœli propter motum astro-

32.

33.

34.

num, non cessaverunt in alia, et sic semper fuerunt et erunt. Sed hoc nihil est penitus : quia quocumque modo sit populatio terræ, tamen positio est possibilis, videlicet quod omnes uno momento destruantur : et ideo quod sequitur, est falsum et impossibile : et tamen hoc sequitur ex hypothesi quam ponunt : igitur hypothesis est falsa et impossibilis.

35. TRIGESIMA QUINTA ratio est sumpta ex proprietatibus separati. Probatum est enim, quod nisi forma educatur de materia et secundum esse sit in ipsa, quod non fit unum ex ea et materia : quamvis etiam dicamus formam esse a datore formarum. Unde constat quod ex his quæ omnino sunt separata, quamvis postea materiæ conjungantur, non fit unum. Et hujus causa est, quia per esse sunt separata. Si igitur sint separata ante subjectum materiæ, et maneat etiam separata ipso subjecto manente jam et existente, tunc penitus impossibile est ex his fieri unum. Talis autem ponitur ab istis esse anima rationalis. Igitur ipsa penitus est separata ante corpus, et corpore jam existente : igitur numquam ipsa aliquam corpori et homini confert unitatem, neque esse in actu est per ipsam. Cum igitur nihil sit hoc per quod homo sit actu ens et unum, sequitur quod homo neque sit actu ens neque unum.

36. TRIGESIMA SEXTA ratio est : quia secundum hypothesim istorum substantia perpetua et separata est in potentia et imperfecta, et accipit aliquo modo perfectionem a rebus generatis : quia intellectus possibilis secundum istos est imperfectus, et perficitur formis imaginatis, quæ aliquo modo movent ipsum et educunt ad actum, secundum quod sunt sub lumine agentis : sicut colores movent visum secundum quod sunt sub lumine solis. Patet autem quod absurdum hoc sit, quod sit, quod substantia æterna sit in potentia, et efficiatur in actu in tempore, et per id quod est temporale, aliquo mo-

do scit omnis Philosophus. Absurdum igitur est ponere intellectum sic esse separatum : igitur numeratur numero hominum. Tamen Avempace dixit istam absurditatem in epistola quam vocavit de *Continuatione intellectus cum homine*. Unde dicit, quod cum dicitur quod puer in potentia est sciens, quod ibi triplex est potentia. Una qua puer est in potentia ad formas imaginationis. Secunda qua formæ imaginationis sunt in potentia ad lumen agentis. Tertia qua intellectus possibilis est in potentia ad formas separatas a lumine agentis.

Dum autem omnia inconvenientia istius erroris persequi volumus, nimis protenditur disputatio in prolixitatem. Hæc igitur sufficiant : quia ex istis alia his similia colligi possunt etiam a quolibet parum sciente, maxime qui legit libros de philosophia, quos edidimus de *Partibus animæ* et de *prima philosophia*.

CAPUT VI.

De manifestatione opinionis tenendæ de anima rationali.

Ad hoc igitur, quod iste error bene elidatur, dicamus breviter naturam intellectus explanantes, et nostram de eo opinionem ponentes : quia nos hæc quæ hic dicimus, alibi probavimus, et prolixè tradidimus.

Dicimus igitur in nostra anima partem esse intellectualem, et ipsam quæ dicitur anima rationalis, dicimus esse

substantiam, ex qua emanant potentiæ, quarum quædam sunt separatæ, ita quod non sunt corporeæ virtutes, neque virtutes in corpore : quædam autem emanant ex ipsa, quæ sunt virtutes operantes in corpore. Et illæ quæ non sunt virtutes in corpore, sunt in ea ex similitudine sua ad causam primam per quam est, et per quam stat esse ipsius. Illæ autem quæ sunt virtutes in corpore, sunt in ea secundum quod ipsa est anima, cujus proprium est esse actum corporis et agere in corpore et in natura : quia sic natura et naturales potentiæ ejus sunt instrumenta. Et ideo dicitur a quibusdam esse in horizonte æternitatis et temporis. Et intellectus est qui fluit ex ipsa secundum quod ipsa emanat a causa prima, et stat per ipsam in esse. Propter hoc variatur et efficitur varius in se et in speculatione : quoniam id quod fluit ab ea secundum quod ipsa est naturæ intellectualis primæ, conversa ad primam causam per lucis suæ participationem, est in ea sicut lux, et est intellectus agens. Quod autem fluit ab ea secundum quod ipsa est substantia per quam est natura corporalis stans et fixa et conjuncta, est intellectus possibilis.

Et ideo habet tres theorias : quoniam theoria sua secundum lucem agentis est philosophia prima, secundum autem conversionem ad imaginationem habet theoriam mathematicam, et secundum conversionem ad sensum communem habet theoriam physicam : omnium enim Peripateticorum est ista sententia, quod substantia intellectualis quam Arabes Philosophi vocant *intelligentiam*, est substantia stans et in esse fixa per causam primam, et ab ipsa habet in suo esse necessitatem.

Sed est intellectualis natura vicinior causæ primæ, et est intellectualis natura vicinior naturæ : et illa quidem quæ vicinior est causæ primæ, secundum suos ordines movet orbem, et est in quolibet orbe intelligentia ordinis alterius et alterius secundum naturam : quia si in orbe

uno essent intelligentiæ duæ, hoc esset sicut quod unum mobile haberet duos motores separatos, sicut si una navis haberet duos gubernatores, quorum uterque eodem modo simul totam navim gubernaret. Et hoc esse non potest. Si autem plures orbem haberet unus motor : hoc esse non potest, quia esset sicut si duæ naves omnino dissimiles gubernarentur ab uno gubernatore : quod est impossibile, quia oportet quod cuilibet mobili secundum naturam suam proponatur gubernator. Illa autem natura intellectualis quæ vicinior est naturæ, illa proponatur naturæ sicut motor ipsius, et illa natura corporis nobilissimi in genere corporum naturalium. *Naturam* autem voco prout est principium motus et status per se et non secundum accidens : sic enim corpora superiora potius sunt loca et principium naturæ quam naturalia. Et quia hæc natura intellectualis est motor naturalis corporis, et cum hoc est stans per causam primam, oportet quod secundum quod est motor, fluant ab ipsa potentiæ vitæ, quibus secundum opera vitæ movet naturam corporis : et secundum quod stat per causam primam, fluant ab ipsa potentiæ quibus pendet ad causam primam : et ideo ipsa una manens in substantia sic habet duplex esse, sicut patet per ante dicta. Cum autem per hoc quod pendet ad causam primam, nullo modo fit in potentia, sed actus purus, secundum hoc est in ea intellectus agens universaliter : et cum ipsa sit in potentia secundum seipsam, sicut et aliæ substantiæ intellectuales, secundum hoc est in ea intellectus possibilis : omnis enim intellectualis natura in seipsa considerata non est nisi in potentia, et similiter omne causatum in se non est nisi in potentia : sed quod est a causa prima, est in actu, et accipit sui esse necessitatem. Et de hoc late tractatum est in *XI primæ philosophiæ*.

His ergo duobus accipimus intellectum agentem et intellectum possibilem : quia omnis intellectualis natura necessi-

tatem habens a prima causa, et possibilitatem a seipsa, potest converti supra seipsam : et in conversione illa lux quæ est a causa prima, penetrat possibilitatem quam habet in seipsa. Ideo et anima convertens se supra se, accipit intellectum terminum, quod est informatio agentis qua informat possibilem luce sua, sicut oculus informatur per lucem corpoream, ut videat. Et hunc intellectum quidam vocant *formalem*, et aliquando improprie loquentes vocant eum *speculativum*.

Sic autem informatur intellectus possibilis apud se habens intellectum principiorum ex lumine illo, quo omnia quidem principia unum sunt et simpliciter, secundum quod pendent ex uno lumine intellectus : divisionem tamen habet et compositionem et intellectionem secundum quod lumen id determinatur et diffinitur ad terminos dignitatum : et ideo non naturaliter sunt in nobis principia, nec discimus ea nisi in quantum terminos accipimus. Sicut autem lumen solis se habet ad colores, ita quod non nisi sub actu lucis abstracti videntur : ita etiam est de formis imaginatis et in sensitivis acceptis a lumine intellectus agentis. Et ideo non accipiuntur ab intellectu possibili, nisi separatæ sint ab eadem luce quæ est actus et perfectio possibilis : et sub actu luminis agentis fiunt in intellectu possibili, non omnino sicut in materia, quia forma accepta in materia perficit eam secundum esse et speciem : et ideo quando accipit unam, non est possibilis ad eam quæ est opposita illi vel disparata : nec etiam cognoscit eam, quia accipit eam secundum esse individuum. Sed intellectus potius accipit intensionem formæ quam formam, nec accipit eam secundum intensionem individui, nec sicut in subjecto, sed potius sicut locus et species formarum, et est locus secundum quod est potentia ambiens tales formas. Species autem est per lumen agentis penetrans ipsum et perficiens : et ideo cum fiat unum tertium a componentibus,

quando aliquid componitur ex materia et forma, non fit sic unum quando componitur intentio universalis cum intellectu possibili, sed fit unum actu : quia idem est actus intelligibilis qui est actus possibilis intellectus.

Et sic intelligitur similiter quod in his quæ separata sunt a materia, cum non possint separari nisi per influxum eis lumen intellectus, idem secundum actum est intelligens et intellectus. Et hæc compositio singularis inest intellectui, quando alterum componentium efficitur unum in actu cum componente reliquo : et in hoc differt a compositione materiæ et formæ.

Et iste pro certo fuit intellectus Aristotelis in verbis suis de *intellectu*, et solus iste est verus et nullus alius. Et iste intellectus qui componitur ex intelligibilibus ad formam et actum intellectus mediantibus principiis quæ se habent ad operationem, secundum meam opinionem vocatur *speculativus* : et quia iste intellectus in omnibus quæ speculantur, invenit actum suum, ideo si resolvat speculata in actum suum, in omnibus speculativis intelligit seipsum, et adipiscitur sic se, et quanta sit virtus ejus, et quantum sit pulchritudo sua : et sic cognoscit et quid sit, et quantus sit, et quam speciosus : et hic vocatur *intellectus adeptus*, et non est nisi quando convertit speciositatem suam ad intelligentias unde venit primo ista speciositas : et sic per omnes deveniens ad causam primam unde dependet secundum esse suæ necessitatis : et sic continuabitur radici immortalitatis et felicitatis æternæ.

Et hoc est quod verius de intellectu dici potest, et natura ipsius : et disputavimus de hoc latius in libro de *perfectione animæ*, qui secundus est in libro de *Intellectu et intelligibili* quem scripsimus.

CAPUT VII.

De responsione et numeratione argumentationum suarum postpositarum.

His ergo prælibatis, respondemus ad objecta per ordinem.

Ad 1. Nec est modo difficile respondere, dummodo bene in mente habeantur ea quæ dicta sunt, ad id quod objiciunt via prima, quod una sit causa efficiens quæ sit intelligentia largiens formas, et quod cessante eo quod diversificat modum essendi ex parte suscipientis, non remanet nisi effectus unus simplex qui est lux intelligentiæ causantis, sicut exemplificatur in effectibus ignis.

Dicendum, quod hoc non probat tantum animam esse idem cessantibus corporibus, sed probat omnia esse idem cessante materia suscipiente: et supponit illa objectio, quod formæ sint a datore, et non educantur a materia: et ideo hoc est Platonicum, et non est de sententia Peripateticorum: et est objectio Avicennæ et cujusdam Theodori qui imitatur ipsum: et fundatur super propositiones istas, quod cum forma educatur de materia, modus essentialis quem habet essendi, est a differentia specifica et non ab efficiente: quæ cum causa efficiens sit extrinseca res ab ipsa, effectus naturæ est unus, non multus: sed est tantum ab ipsa sicut a movente: modum autem es-

sendi substantialem habet ab ea quæ est causa formalis in genere vel in actu, sicut differentia est forma.

Si autem dicatur, quod anima rationalis non educitur a materia, sed potius venit ab extrinseco. *Dicendum* quod hoc modo non educitur a materia, sicut aliæ formæ, ita quod exeat de principiis materiæ corporalibus: sed educitur in esse ex materia per principium primum operans in materia, quod, sicut diximus, anima est stans per causam primam juxta naturam. Et ideo in essendi modo operatur quidem causa prima, sed in naturæ et materiæ principiis: quia aliter inutile esset semen hominis in generatione, et homo non esset res naturæ, quod falsum est: et ideo etiam anima humana quædam habet quæ sunt virtutes in corpore, et quædam quæ non sunt virtutes in corpore.

Et licet hoc sufficiat ad solutionem objectionis, tamen si de hac quis multa velit, legat in libro nostro quem de *Natura animæ et generatione* fecimus, et multa expresse probata inveniet.

AD ID AUTEM quod secundo objiciunt, dicendum quod intellectus unius animæ distinguitur ab intellectu alterius animæ per numerum: et est ista divisio similis divisioni quantitatis. Hæc autem qualiter fit, potest intelligi: quia procul dubio si quis dicat intellectum esse ex materia, non poterit evadere inconvenientia illa omnia quæ concludit inducta objectio, et multa alia quæ de facili possunt concludi: quia nihil est dare intellectui materiam, et negare ab eo omnes materiæ proprietates. E contra autem si quis neget omnino ab intellectu potentiam materiæ, et ponit intellectum agentem, cum non sit in quo fundetur intellectus agens, ponit intellectum agentem nihil esse secundum esse ratum in natura.

Et ideo Aristoteles in tertio de *Anima* probat duo de intellectu possibili, quorum unum est, quod sit nec corpus, nec virtus in corpore. Secundum autem est,

quod sit in natura quæ est in potentia omnia fieri. Et per primum quidem habetur, quod nec materia sit, nec virtus materiæ. Per secundum autem habetur, quod sit subjectum quoddam in genere substantiæ. Et hoc modo accipiendo intellectum fundat et intellectum agentem et intellectum speculativum. Et secundum hoc quod fundat ut tabula rasa, sic particulat et individuat ea quæ sunt in ipso substantialiter: et nisi hoc modo determinetur ad esse, non potest determinari quid sit cum sit potentia omnia et nihil actu.

Et hoc jam ante me coactus est concedere Averroes quando solvit quæstionem qua quæritur, quale ens sit intellectus agens, cum sit potentia omnia? Quod enim omnia est potentia, nihil videtur esse secundum actum: unde ad esse quidem habet determinationem similem materiæ per aliquem modum, sed in potentia receptionis omnino est dissimilis materiæ. Et hoc decepit Theophrastum quando putavit, quod intellectus possibilis idem esset cum materia. Et per hoc patet solutio omnium eorum quæ in secunda objectione.

Ad 3. AD EA AUTEM quæ tertio objiciuntur, dicendum, quod si nos daremus quod intellectus possibilis esset materia, tunc sequeretur quod objicitur. Sed quia nos dicimus quod est virtus, quod nec est corpus, nec in corpore operans, et tamen est substantia fundans intellectum agentem, ideo non sequitur quod inducitur: quia ex hoc quod est immaterialis, non potest esse quod habeat actum imperfectum: ex hoc autem quod habet potentiam loci ad intelligibilia, non potest esse quin sit in potentia, et cum eo ad quod est in potentia, sit secundum actum suum unum: et fundat ipsum non omnino sicut materia, sed sicut locus et species aliquid habens de natura subjecti, sicut patet per ante dicta.

Ad 4. AD QUARTUM autem dicendum per jam

dicta, quod intellectus per hoc quod est in potentia, non diffinitur nec determinat aliquid intelligibilium ad quæ est in potentia: tamen aliquid determinat in natura: et ideo est ens determinatum in natura. Et ideo ad id quod est actu in natura, non est in potentia nisi per accidens: quia intellectus non intelligit, nisi per accidens fiat intelligibile, sicut et materia cognoscitur per aliquid cujus ipsa est fundamentum, et locus intelligitur per locatum, et sic est in multis. Scio autem, quod quidam dicunt intellectum intelligi per hoc quod per essentiam est ens præsens sibi ipsi: et hoc dictum non impugno, sed dico quod non est dictum secundum philosophiam. Secundum philosophiam enim non potest dici quod a nobis nunc dictum est. Hic autem non suscipimus dicere nisi quæ per philosophiam dici possunt in probari.

Ad 5. AD ID AUTEM quod quinto objicitur, dicimus quod illa objectio bona est de intellectu agente, cujus lumen est forma intelligibilium in actu quæ movent intellectum possibilem. Et ille est in parte sicut perspicuum immateriale, quod est locus intelligibilium, sicut perspicuum oculi locus est colorum sensibilium, et secundum esse quod habent in sensu acceptorum: sed sicut oculus licet habeat naturam et ambitum potentiæ ad omnia quæ movent ipsum secundum actum lucidi, tamen est aliquid determinatum in natura sensus, et sic est in se fundans ea sensibilia quæ recipit: ita intellectus licet habeat ambitum potentiæ ad intelligibilia, tamen est aliquid determinatum in natura animæ et substantiæ, et per id fundat in se intelligibilia et cognoscit et judicat: et hoc modo est natura determinata in uno, et non in alio, sicut dictum est.

Ad 6. AD ID quod sexto objicitur, dicimus quod hoc quod est causa simplicitatis alijus per se et non per accidens, non oportet esse simplex omni simplicitate,

sed ea solum qua ipsum est causa simplicitatis in alio : et sic est lux simplex ad colores quos facit simplices : et hoc modo etiam intellectus est simplex ad intelligibilia quæ simplicia facit. Tamen hæc objectio fundatur super actu intellectus agentis : et licet hoc modo sit simplex, tamen ex hoc non sequitur quin sit ens determinatum in natura : et hoc modo est substantia fundans et intellectum agentem et intelligibilia : et hoc modo aliquid est in uno, et aliquid in alio.

Ad 7.

AD ID QUOD septimo obijciunt, dicendum quod una species non dividitur nisi per accidens : sed hoc est verum de illa quæ est vere species et totum esse individuorum. Hoc autem modo non est intellectus species specierum quod det ei, sicut patet cuilibet etiam parum scienti : sed est species, quia sub actu suo species efficiuntur species intelligibiles : et ideo nihil prohibet quin sicut lux quæ est species colorum indistincte, sit aliquid individuum in natura cœlesti : ita sic etiam intellectus quamvis sit species specierum intelligibilium, sit aliquid individuum in natura animæ : et sic non oportet quod unus sit in omnibus.

Ad 8.

AD ID AUTEM quod obijcitur octavo, dicendum quod revera quidquid est in aliquo, est in ipso secundum potestatem ejus in quo est. Et bene concedendum est, quod universale ut universale non est nisi in intellectu, licet hoc quidam non concedant.

Sed universale dicitur duobus modis vel pluribus, sicut alibi determinatum est. Est enim universale in natura, et est universale ambitu potentiæ, sicut dicimus universale esse solem in ambitu luminis, et forte universale in natura quod per idem suæ naturæ sit in omnibus, ni-

hil est omnino, quamvis quidam hoc dicunt : et si universale in ambitu potentiæ et luminis est aliquid in corporalibus quæ habent materiam determinatam ad locum, multo magis est de incorporalibus. Unde sicut sol est aliquid determinatum in genere corporum, cujus tamen potentia secundum quod per lumen est regio visibilium, non est determinata vel individuata : ita dicendum quod in genere substantiæ intellectus est aliquid individuum, cujus tamen potestas luminis intellectualis, secundum quod est regio specierum intellectualium, nec est determinata, nec individuata : et hoc modo unus intellectus penetrat alium secundum lumen, sicut unum luminare aliud penetrat lumine suo : et hoc modo nihil prohibet unum universale esse in multis intellectibus, sicut in una intelligibilium regione, et sicut in uno intelligibilium loco : sicut si diceremus, quod videremus extra mittentes, nihil prohiberet unum sensibile esse in multis sensibus, et susceptum a quolibet sensuum : et sicut diximus in libro de *Anima* ¹ et in aliis locis, possibilis intellectus non est regio intelligibilium nisi perfectus lumine agentis, et sic radiat sicut luminare.

Tamen quidam solvunt hoc aliter : quia dicunt quod intentio recepta in intellectu potest considerari dupliciter, videlicet ut recepta, et ut comparata ad ea quorum est esse et forma : et primo modo est particularis, et secundo modo est universalis, et hoc modo judicatur ab intellectu : et hoc est quod dicitur, quod universale est dum intelligitur.

Ad 9.

AD ID QUOD nono obijcitur, dicendum quod ex illa objectione non habetur nisi quod unus est actus intelligibilium : et hoc est certissime verum, quod unus est actus intelligibilium secundum quem ipsa sunt intelligibilia : et ille actus est perfe-

¹ III de Anima, tract. II, cap. 17 et 18.

etio possibilis, et adepto actu adipiscitur quis intellectum ejus cujus ille est actus : quia omnia quæ sunt, non intelliguntur per se nisi actibus suis : sed si inferatur ulterius, quod sicut actus est universalis, ita et subjectum, non sequitur : quia omnis actus de se universalis est, et determinatur et individuatur per subjectum.

Ad 10. Ad id quod decimo objicitur, dicendum quod revera intellectus non est forma quæ multiplicetur per materiam : quia omnino est immaterialis : sed tamen substantia intellectualis habet duo, sicut diximus, quorum unum est, quia necessitatem sui esse habet secundum quod est ex causa prima. Aliud autem est, quia potentiam habet ad esse secundum quod est in se ipsa : et hæc potentia est fundamentum fundans esse et recipiens quod est a causa prima : quia quod omnino nihil est, non habet potentiam ad aliquid : et hoc modo intellectualis anima natura est ex hoc, et est esse ejus determinatum in genere substantiæ : et per hoc etiam patet, quod relicto corpore manet substantia determinata.

Ad 11. Ad id quod undecimo objicitur, dicendum quod quia hoc modo quo diximus, secundum ambitum suæ potentiæ intellectus nihil nulli habet commune, et ideo receptivus est omnium, et activus secundum speciem intellectus agentis : et quia sic nec materia est, nec forma proprie loquendo, et ideo probat Aristoteles duo de ipso ¹, scilicet quod non est corpus, neque virtus in corpore : et quod est potentia omnia, et sic habet aliquid formæ, et aliquid potentiæ, et quod nec est materia neque forma, nec compositum proprie, sed potius habet esse quod diximus, quod constat ex esse necessario secundum quod se habet ad causam primam,

et esse possibile secundum quod est in seipso, sicut prædictum est. Et hæc est natura omnis intelligentiæ secundæ quæ est post primam causam.

Ad 12. Ad duodecimum dicendum, quod in rei veritate nihil est distinctum per hoc quod est universaliter separatum a genere entis et substantiæ, sicut patet cuilibet : et ideo oportet dicere, quod intellectus secundum aliquem modum sit separatus, et secundum aliquem modum sit determinatus ad esse in genere entis et substantiæ : et hunc jam paulo ante determinavimus, et non necessarium est repetere.

Ad 13. Ad id quod decimo tertio objicitur, dicendum quod revera una est virtus cordis et universalis ad membra secundum quod est virtus : sed ipsa eadem est singularis secundum quod est cordis, et subtractis omnibus membris adhuc remanet singularis. Et si demus, quod tamen non est probatum, quod una est intelligentia separata, cujus instrumentum est omnis anima, tamen propter hoc non sequitur quin quælibet anima suum habeat intellectum, et quod non uno modo imaginantur, hoc est propter unitatem intellecti, et non propter unitatem intellectus.

Ad 14. Ad id quod decimo quarto objicitur, dicendum quod quidquid participatur a multis, divisum est in illis, sive secundum esse, sive secundum essentiam participatur. Et divisio ipsa nulla est omnino : quia quod secundum essentiam participatur, est ipsum esse participatum : unde etiam lumen solis quod participatur a multis, non idem numero participatur a multis : quia quod de lumine participatur ab uno, non participatur ab alio : quoniam etiam et quod de

¹ ARISTOTELES, In III de Anima, tex. et com. 18.

prima causa participatur ab uno, non participatur ab alio, sicut in undecimo *primæ philosophiæ*¹ a nobis est ostensum : et ideo nihil est quod objicitur. Et quia non est unum quod participatur secundum esse et secundum numerum, ideo etiam resolutum ex multis, non est unum, sed multa.

Ad 15. AD DECIMUM QUINTUM dicendum, quod id quod dicunt de luce, est verum, tamen lumen est forma quantitatem habens : et si dicatur quod intellectus est causatum luminis causæ primæ, est verum : sed recipiens ipsum est substantia potentialis quæ res est in seipsa, sicut diximus jam ante : et hoc nec vere materia, nec vere forma est, sed est fundamentum lucis intellectivæ, sicut patet ex prædictis. Et hæc substantia distincta est : quia intellectualis natura una est in uno, et in alio alia.

Ad 16. AD DECIMUM SEXTUM dicendum, quod in hoc male dixit Avicbron, quando dicit id fundans esse materiam : cum expresse probatum sit, quod ipsum non est materia, sicut jam ostendimus, sed tamen est aliquid in genere substantiæ : et cum non sit agens in natura intellectus, oportet quod sit fundans et tenens : et nisi hoc esset, non esset substantia natura intellectualis in separatis, sicut diximus : et cum hoc fundamentum non sit materia, non impedit quin ex tali composito et corpore fiat unum in natura : quia etiam omnis species quæ est actus materiæ, est ex potentia et actu, et tamen est alterum componentium in substantia designata et individuata : et hoc ideo est, quia substantia quæ est species, est totum esse, et materia non est de esse aliquid nisi fundamentum ipsius : et hoc scitur expresse ex scientia septimi et octavi *primæ philosophiæ*².

¹ XI Metaphys. tract. I, cap. 36.

² VIII Metaphys. tract. I, cap. 5.

AD DECIMUM SEPTIMUM dicendum, quod jam est responsum : quia nihil prohibet aliquid esse universale per ambitum potentia activæ, quod tamen determinatum est in esse.

Et quod quæritur, quid continet ipsum ad distans ? Dicendum, quod distantia in non localibus nihil operatur, nec impedit : omnia enim materialia corporalia subjiciuntur talibus, et sunt passiva respectu ipsorum : et virtus intelligentiæ penetrat ea, nec reguntur ab ipsa : et quod hoc non est in intellectu nostro, hoc est ideo quia non efficitur in actu nisi ex acceptis a sensu : et ideo quod impedit sensum, per accidens impedit intellectum : nostra enim intellectualis natura fit perfecta per hoc quod adipiscitur se : sed intelligentia separata omnino semper est adepta seipsam. Qualiter autem sint intelligentiæ separata, determinatum est a nobis in XI *primæ philosophiæ*³.

AD DECIMUM OCTAVUM dicendum, quod in veritate anima intellectualis est forma data ad similitudinem primi motoris, et non distensa per motum et quantitatem moti et materiæ, sicut sunt formæ corporeæ, et illa quæ dicuntur virtutes in corpore : et ideo etiam motibus astrorum et judiciis non subjacet nisi per accidens : sed tamen ex hoc non sequitur, quod non determinetur ad esse substantiæ intellectualis per esse alicujus fundantis ad quod largitur causa prima : quamvis hoc non sit materia corporea, tamen est principium fundans, quod oportet intelligi in omni substantia, quando intelligitur in hoc quod ipsa est in seipsa præter id quod habet ex causa prima : et hoc jam explanatum est prius.

AD DECIMUM NONUM dicendum, quod jam determinavimus, quod intellectualis natura per aliud est ens determinatum in

³ XI Metaphys. tract. III, cap. 6.

Ad 17.

Ad 18.

Ad 19.

genere substantiæ, et per aliud est locus : sicut et sol per aliud est substantia, et per aliud pater et regio sensibilium : et ideo illa objectio non probat, quod intellectus in uno per esse substantiæ non sit divisus ab intellectu qui est in alio per esse substantiæ, sed tantum quod ille intellectus sit locus unus et una species intelligibilium, secundum quod intelligibilia sunt in ipsis, sicut jam ante diximus. Et hujus simile est, sicut si ponamus quod visus egrediens ab oculo illuminet colores : tunc duo vel possibiles visus erunt unus locus et actus sensibilium visibilium.

Ad 20.

AD VIGESIMUM dicendum, quod absque dubio bene probatur, quod anima est imago omnium et per intellectum agentem et per intellectum possibilem : sed non probatur per hoc, quod non sit quoddam ens determinatum in genere substantiæ : sed secundum ambitum possibilis intellectus et agentis potentiæ est ens indeterminatum et omnia ambiens, ut dictum est : et hujus simile est in sensu communi, qui est ens determinatum in potentiis animæ, et tamen est ens indeterminatum per ambitum sensibilium, sicut patuit jam per ea quæ dicta sunt.

Ad 21.

AD VIGESIMUM PRIMUM dicendum, quod intellectualis natura, sicut diximus, est multorum ordinum : et hoc quod probat objectio, non potest esse verum de aliqua earum : quia, sicut diximus, quælibet est ens determinatum : quia non potest intelligi, quod sit aliquid habens esse ratum in natura, quod non sit ens determinatum ex potentia et actu, dummodo sit secundum et non primum : quia, sicut diximus in *prima philosophia*, ens per se necesse non est nisi unum, et est id quod est : secundum est ens in potentia in se, et necessitas ejus in esse est ex hoc secundum quod pendet ad ens necesse, quod est causa prima. Et hoc etiam compulit Averroes dicere, quod si intellectus agens esset sine possibili, non esset ali-

quid quod non esset ens fundatum : et ideo nihil est universale nisi secundum quod est in intellectu intentio abstracta ab hoc. Et ideo nihil est hoc, quod universales bonitates primi participet id ipsum universale : sed illa dicuntur participare universaliter quæ plures ex eis participant : tamen verum est quod anima rationalis est forma quæ inter formas generabilium magis accedit ad primi agentis similitudinem : et ideo nobiliter participat nobilitates primi, sed non participat nobiliter quam intelligentiæ cælorum.

AD VIGESIMUM SECUNDUM dicendum, quod per hoc non probatur, quod intellectualis natura non habeat aliquid fundans se in esse : sed probatur quod id fundamentum est materia : et ideo non est simile de universali : quia id abstrahitur ab omni se in esse fundante. Hujus autem ratio satis patet ex præinductis.

Ad 22.

AD VIGESIMUM TERTIUM solvitur eodem modo. Non enim consentimus cum Avicbron, quod anima rationalis composita sit ex materia et forma, sed potius dicimus eam componi ex potentia et actu. Prima autem potentia et actus primus non sunt materia et forma : sed potius si accipiamus omnia entia secundum quod fluunt a prima causa, prima potentia est ens possibile in seipso, et primus actus est ens necesse : et id quod est ens secundum primum modum consideratum, pendet in entitate ad ens necesse : et bene concedimus hoc quod suscipere, et hujusmodi non sunt propria materiæ, quia etiam locus suscipit, etc : sed suscipere per modum potentiæ exeuntis ad actum per motum est materiæ proprium. Et per hoc patet solutio ad id.

Ad 23.

VIGESIMUM QUARTUM solvitur per hoc quod unum particulare non solvitur in aliud : in illi qui ponebant formas separatas, non ponebant eas sic movere, quod aliæ resolverentur in ipsas : sed potius

Ad 24.

ideo quia secundum se dixerunt eas esse perpetuas. Et ideo licet intellectus sit separatus, sicut id quod non est corpus, nec virtus in corpore : non tamen est separatum ab esse hujus intellectualis substantiæ : et ideo numeratur secundum ea quæ movet, et secundum ea quorum ipse perfectio est, et in quibus adipiscitur seipsum contemplando : et illis destructis non remanet unus, sed multa.

Ad 25.

VIGESIMUM QUINTUM solvitur per hoc quod jam in parte habitum est, quod numerus substantiarum intellectualium causatur a numero ejus quo contrahitur et determinatur natura intellectualis, secundum quam quælibet earum dependet ad causam primam : hoc enim quo una substantia intellectualis possibilis est in se, non est illud idem quo alia possibilis est in seipsa. Et ideo quamvis ex parte lucis causæ primæ non causetur numerus, tamen ex parte ejus quo quælibet est in seipsa, causatur numerus : quia hoc non est idem. Causa enim multitudinis in illis est ordo ad primum secundum propinque se habere vel remote : sicut enim in cœlis et elementis diversitatis potentiæ in materia est causa propinque vel remote distare a nobilitate primi, ita etiam in potentia illa qua esse quod est possibile in seipso, causa diversitatis potentiæ est proprie vel longe distare a totius esse principio : et nisi ita dicatur, nulla invenitur in rebus diversitas.

Et si quæretur, quæ sit causa ordinis in possibilibus hujusmodi, non potest assignari causa, nisi quia intellectus primæ causæ distinctivus est et ordinativus entium universi, et causat complementum et ordinem in universo : quia sapientis est ordinare : et hoc quidem jam etiam ante me alii Philosophi tradiderunt.

Si quis autem objiciat, quod res numerantur per suas formas, et non per hoc quod sunt in potentia, dicendum quod unitas rei quæ dicit indivisionem in se, et divisionem ab aliis, est forma :

sed causa divisionis formæ secundum esse est potentiæ : et id quod est res ipsa, est subjectum : et hoc modo loquimur nos hic : et bene concedendum est, quod ab ipsa substantia animæ fluit potentia illa quæ vocatur intellectus possibilis : et sicut genus est designatio materiæ cum potentia ad esse, ita possibilis intellectus est designatio talis substantiæ in anima cum potentia, et intellectus agens est designatio illius naturæ sive substantiæ secundum quam aliquod ens necesse dependet ad primam causam per quam tenetur in esse necessario.

Et ideo, sicut est quælibet res in potentia in seipsa et in actu per hoc quod habet a causa potentia, ita etiam est in potentia ad ea quæ movet sub actu ejus quod est a causa prima : et sic intellectus possibilis designans substantiam animæ in seipsa, est in duplici potentia, quarum una est ad intellectum agentem secundum quem dependet ad causam primam : et secunda est ad intelligibile quod movet sub actu intellectus agentis : et tunc quamvis numeretur intellectus possibilis sic acceptus, tamen est separatus et materiæ non mixtus, et nulli nihil habet commune, ut dixit Anaxagoras. Sed hæc separatio, sicut diximus, non tollit ab eo quin sit aliquid designatum in genere substantiæ. Hoc autem necessarium est apud omnem hominem bene intelligentem : quia impossibile est quod idem sit principium actus et potentiæ secundum essentiam unam simplicem. Cum igitur in natura intellectuali, sicut et in omni alia perfecta substantia inveniamus actum et potentiam, oportet quod hæc ad diversa principia reducantur : et hoc etiam innuit Aristoteles qui hæc principia in animæ natura posuit. Sic ergo ut dictum est, tenendum est absque dubio.

AD VIGESIMUM SEPTIMUM non est difficile respondere secundum prædicta. Si enim concedere velimus, quod receptio universalis in intellectu possibili est re-

Ad 27.

ceptio universalis secundum esse universalis et rationem, dicemus quod illa receptio est loci et speciei potius quam materiæ : et quod nihil prohibet intellectum esse universalem in ambitu potentiae localis et speciei, et determinatum esse secundum esse subjecti : et si reciperetur universale in ipso receptione subjecti, tunc procederet objectio : et iste fuit aliquando error Theophrasti et Themistii. Et si hoc esset verum, bene concedo quod multa sequerentur inconvenientia quæ partim in objectione dicta sunt, et quæ adhuc possunt induci : et maximum unum inconvenientium est, quod secundum hoc pro certo intellectus secundum esse distingueretur : et una forma recepta impediret receptionem oppositæ, sive alterius.

Unde nulla potentia animæ recipit omnino receptione subjecti : minime tamen inter omnes hujusmodi receptiones recipit intellectus secundum hujusmodi receptionem, sed recipit receptione loci, qui ipse est in quo esse habent species rationales et salvari, et a quo habent generationem in esse intellectuali per actum suum qui est lumen intellectus agentis. Et hujusmodi simile est longinquum non per omnia in esse visibilium in perspicuo : si enim consideremus esse visibilium in perspicuo, non est esse coloris aliquid aliud nisi esse lucis cum intentione coloris. Unde lumen intentionatum intentione coloris, est esse visibile secundum quod in perspicuo est. Et ideo in perspicuo non est sicut in subjecto, quia non colorat ipsum, sed est in ipso perspicuo sicut in loco in quo salvatur secundum esse spirituale, et actus perspicui generans ipsum secundum tale esse spirituale, movet ipsum ad perspicuum multo simplicius : et hoc modo movet lux agentis species intelligibiles ad possibilem, et sunt in ipso non sicut in subjecto, sed potius sunt in ipso sicut lumen agentis intentionatum intentione rei cujus est species intelligibilis, et sunt in ipso sicut lux agentis, sicut lumen est in

perspicuo sicut actus perspicui, et sicut visibile secundum quod est in perspicuo, est unum in actu cum perspicuo, eo quod actus ejus dans ei esse, est lumen quod est actus perspicui : ita intelligibile in intellectu possibili est unum in actu cum possibili, quia lux agentis quæ est actus possibilis, est actus intelligibilis : et sicut lux agentis non particulatur per possibilem, quo minus sit universaliter agens : ita nec intelligibile particulatur per possibile quo minus sit universale : hæc enim receptio per actum qui est actus possibilis, est receptio speciei hoc modo, quod species specierum recipit species : et est receptio loci hoc modo, quod id quod recipitur, non particulatur per ipsum recipiens.

Hoc ignoraverunt multi, et ideo de intellectu et intelligibili magnos dixerunt errores. Intellectus enim est generans species intelligibiles per hoc quod intelligibiles sunt : et quia dat eis formam, ideo dat eis motum ad intellectum et locum qui est intellectus possibilis, qui habet se ad agentem, sicut se habet perspicuum ad lucem. Hæc igitur mente retineantur de intellectu, et non incident in errorem.

NUNC RESPONDEAMUS ad vigesimum sextum : quia hoc modo est facile solvere. Ad 25
Dicendum enim, quod anima secundum quod est motor separatus, non habet unitatem vel possibilitatem ab eo a quo separatur, sicut probat objectio, sed potius secundum rationem est unum vel multa a virtute motiva quam habet : tamen proportio ejus ad id quod movet, signum est quod est una in esse determinato : quia non est unus motor diversorum mobilium ad se invicem in virtute movendi non ordinatorum. Et ideo quando sunt plura mobilia, quorum unum non movetur per alterum, nec quorum unum non movetur a motore ipso et alterum per vicarium, oportet etiam esse tot motores, quot sunt mota : et sic est in corporibus humanis : et ideo oportet

esse tot animas quot sunt corpora : et hoc magis patet in objectione quadam quæ facta est in contrarium de proportionem motoris et moti.

Ad 28. VIGESIMUM OCTAVUM solvitur per hoc quod jam sæpius dictum est. Quia licet intellectus possibilis secundum quod est potentia, sit omnia, et non differat ab aliquo nisi quando actu est : tamen secundum quod determinatur ad ens in genere substantiæ, est ens determinatum. Et nisi ita dicatur, oporteret concedere quod intellectus possibilis esset sicut materia prima : et hoc jam dixerunt quidam, quorum viam secutus est Alexander non quidem in commento super librum de *Anima*, sed in quodam speciali libello quem de hoc composuit : et est antiquus error.

Et cum hoc modo quo dictum est, intellectus potentia et actu determinetur ad ens in genere substantiæ : quod patet, quia est ens distinctum a quolibet alio ente et numeratum. Hoc etiam modo non est in potentia ad se intelligendum nisi per accidens : quia licet sibi præsens sit secundum quod est natura, non tamen est sibi semper præsens secundum quod est intelligibilis : et hoc modo oportet dici secundum philosophiam, licet quidam theologi aliter dicant. His duobus diversis modis nihil prohibet intellectum respectu suiipsius esse in actu et in potentia : actus enim agentis est separare universale ab omni particulari.

Ad 29. VIGESIMUM NONUM solvitur per distinctionem separati et æterni. Si enim dicatur separatum, quod ab omni materia corporaliter existenti est separatum et abstractum, hoc modo intellectus non est omnino separatus. Si autem dicatur separatum, quod ab omni materia et conditione materiæ est remotum, sicut id quod non est corpus, nec virtus in corpore, hoc modo intellectus possibilis est penitus separatus. Et similiter si dicatur æternum, quod nec initium habet neque

finem per generationem quæ est super substantiam quæ est materia, et est ens simplex et immobile, hoc modo est intellectus æternus tam agens quam possibilis. Si autem dicatur æternum, quod nullo modo per potentiam et actum exivit in esse, nec cum tempore, nec post tempus, hoc modo sola prima causa est æterna et intellectualis natura, et substantia quælibet secunda non est æterna : quia illa potentia est in seipsa, et in actu et necessitate est per hoc quod habet a causa prima : et hoc modo incipit esse quidquid est, et incepit post tempus, et sua actio et sua potentia non est secundum motum mensuratum tempore, qui est actus imperfectus et imperfecti : sed sua actio et sua potentia est supra tempus et secundum motum qui est actus perfectus et perfectionis qui est actus contemplationis et felicitatis, sicut patet cuilibet scienti philosophiam primam. Et hoc dico de tempore nisi valde large sumatur tempus, quod est mensura vel potius numerus vicissitudinem intelligendi, quod tempus non est continuum, neque loquuntur de eo Philosophi. Nos autem hic non loquimur nisi secundum philosophiam Peripateticorum.

Ad 30. TRIGESIMUM solvitur per hoc quod in veritate conceditur, quod nihil est per quod dependeat homo ad primam causam, nisi per eundem intellectum quem habet a causa prima. Sed hic intellectus non habet aliquam diversitatem secundum numerum, nisi aliquid esset quod particularet ipsum : et nisi ita esset, omnes intelligentiæ essent una intelligentia : et omnia quæ sunt, essent idem nisi ita esset. Sed cum unaquæque res sit aliquid possibile in seipsa, tunc particulatur hoc esse quod est a causa prima, et fit diversitas. Unde licet hoc quod est a causa prima, de se separatum sit ab omni eo quod est hoc aliquid : tamen secundum esse non est separatum, sed determinatum aliquid in natura : et hoc modo primum quod est necesse, expan-

dit se in omne quod est possibile, et format et facit ipsum : et hæc est bonitas ipsius : et ista possibilia habent ordinem quem superius induximus.

Anima igitur est substantia talis ex qua fluunt potentiæ separatæ a materia, et

non separatæ : et secundum se est incorruptibilis et permanens, licet secundum esse quarundam potentiarum sit corruptibilis. Et hæc dicimus de anima humana, et non de alia. Hic ergo sit finis quæstionis ubi est finis dubitationis.



INDEX

Capitulum in Libello de Unitate Intellectus contra Averroem.

CAP.	I. Contra eos qui dicunt, quod post separationem ex omnibus animabus non remanet nisi intellectus unus et anima una.	437	roni inducunt vel inducere possunt Averroistæ.	441
	II. Hæc igitur est istorum positio, in qua omnes fere fuerunt Peripatetici.	439	V. De triginta sex rationibus potissimis in contrarium opinionis Averroistarum inductis.	452
	III. De difficultate quæstionis disputandæ, et de modo veritatis indagandæ.	440	VI. De manifestatione opinionis tenendæ de anima rationali.	462
	IV. De triginta argumentationibus quas pro suæ opinionis confirmatione er-		VII. De responsione et muneratione argumentationum suarum postpositarum.	465



B. ALBERTI MAGNI

RATISBONENSIS EPISCOPI, ORDINIS PRÆDICATORUM,

PARVA NATURALIA.

DE INTELLECTU

ET INTELLIGIBILI

LIBER PRIMUS

TRACTATUS I

DE NATURA INTELLECTUS.

CAPUT I.

De quo est intentio, et quis dicendorum ordo ?

Sicut a principio istius operis diximus, scientia de anima non satis complete habetur ex hoc quod de anima secundum

seipsam in libro de *Anima* determinatum est. Oportet enim cum hoc scire de objectis quæ proprias partibus animæ inferunt passiones. Horum autem objectorum quorum propria passiva pro partibus sive potentiis habet anima, quædam proprias passiones inferunt animæ, quædam autem communes animæ et corpori. Communes enim sunt passiones quæcumque sunt talia circa quæ operans anima instrumento utitur corporeo, ut quæcumque sunt circa vegetabilem et sensibilem animam. Propter quod etiam Peripatetici veteres scientias de talibus communibus animæ et corporis vocaverunt. Et de his in parte jam pro modulo nostro expediti sumus in libris de *Nutrimeto et nutribili*, et de *Sensu et sensato*. Re-

stant autem adhuc libri de *Somno et vigilia*, de *Juventute et senectute*, de *Inspiratiane et expiratione*, et de *Motibus* qui dicuntur *animales*, de *Vita et morte*, qui omnes sunt de operibus communibus animæ et corporis.

Sed quia nequaquam interpretatio somnii, et natura ejus bene determinabilis est, nisi prius scito de intellectu et intelligibili, ideo oportet nos hic interponere scientiam de *Intellectu et intelligibili*, licet intelligere animæ humanæ sit proprium præter corpus. Attendimus enim, sicut sæpe protestati sumus, principaliter facilitatem doctrinæ : propter quod magis sequimur in traditione librorum naturalium ordinem quo facilius docetur auditor, quam ordinem rerum naturalium. Et hac de causa non tenuimus in exsequendo libros ordinem quem prælibavimus in procemiis nostris, ubi divisionem librorum naturalium posuimus ¹.

Determinantes autem de intellectu et intelligibili, supponemus quæcumque in libro nostro tertio de *Anima* convenienter determinata sunt. Quæcumque vero hic inquirenda esse videntur, quantum per demonstrationem et rationem investigare poterimus, tractabimus, sequentes principis nostri vestigia, cujus librum de hac scientia, licet non vidimus, tamen discipulorum ejus plurimorum de hac materia quamplurimos et bene tractatos perspeximus libros et epistolas. Interdum etiam Platonis recordabimur in his in quibus Peripateticorum sententiis in nullo contradixit.

Cum autem secundum plurimos probabiliores Philosophos, intellectus faciat intelligibile in forma intelligibilitatis, oportet nos prius loqui de natura intellectus secundum quod est intellectus, et deinde de intelligibili secundum quod est de intellectu, et deinde de unitate et di-

versitate intellectus ad intelligibilia : quia his cognitis, satis perfecte habetur scientia de *intellectu et intelligibili*. Operæ autem pretium investigare est hujusmodi : quia his scitis, et proprie homo scit quid proprie ipse est, cum sit solus intellectus, sicut dixit Aristoteles in *X Ethicorum*, et scit insuper principium inter ea quæ faciunt in ipso felicitatem contemplativam. Incipientes igitur investigare naturam intellectus, in primis ponemus quæ secundum naturam sunt priora.

CAPUT II.

In hoc demonstratur, quod omne cognitivum animalium causatum est ex alio quodam cognitivo.

Dicamus ergo omnem naturam quæ habet potentiam aliquid cognoscendi, aut a seipsa virtutem cognitionis habere, aut ab aliqua alia natura quæ est ante ipsam. Constat autem quod non habet a seipsa : sic enim esset principium cognitionis in omnibus aliis, et esset sua virtus cognitiva non imperfecta, sed perfecta : neque esset passiva, sed activa : quæ omnia non convenire animabus animalium, clarum est per ea quæ in libro de *Anima* declarata sunt.

Si quis autem forte diceret, quod ani-

Ordo doctrinæ non semper a prioribus naturæ, sed quandoque a facillioribus addiscenti

¹ Vide pro hoc Aristotelem, V Metaphys. tex.

ma animalium habet a seipsa virtutem cognitivam, eo quod in natura sua est cognitiva ejus potestas : sicut triangulus a seipso habet habere tres angulos, etc., et propter hoc non est principium causans in aliis aliquid. *Dicemus* quod a seipso habere dicitur duobus modis. Uno quidem modo secundum causam efficientem, et alio modo secundum causam formalem. Nos autem hic quærimus de cognitivo a seipso secundum utramque causam, sicut in physicis primum movens est motivum a seipso : tum quia ante se non habet causam sui motus efficientem : tum quia a natura et essentia sua est movens : propter quod etiam omne quod movet, motivam virtutem habet ab ipso, et est sua virtus motiva fontaliter influens omnes virtutes motivas in omnibus aliis moventibus. Sic enim quærendo utrum anima animalium cognitiva sit a seipsa, et sequuntur quæ præinducta sunt. Cum enim omne creatum a nobiliori necessario deficiat a causa prima, defectus cognitionis qui est in virtute cognitiva animæ animalium, ostendit quod non solum ab alio quodam habet vim cognoscitivam, sed etiam quod multum distat ab illo quod est prima causa et fons cognitionis. Oportet ergo dici, quod habeat ab alio quodam quod est primum et perfecte cognitivum omnium. Si enim ab alio non primo et perfecte diceretur habere, de illo esset eadem quæstio, et abiret hoc in infinitum, aut stabitur in primum et perfectum cognitivum.

Amplius omne cognitivum animalium mortaliū, cum omni cognitivo mortaliū est idem genere : aut si diceretur per prius et posterius, hoc tamen est per respectum ad unum. Quæcumque autem talem habent generis vel naturæ convenientiam et unitatem, ab uno aliquo exeunt quod est causa convenientiæ illius in omnibus. Oportet igitur cognitivum animalium ab uno alio cognitivo primo causatum esse secundum efficientem causam simul et formalem.

Si autem quis dicat, quod hoc non concluditur nisi de causatis univoce, sicut homo generat hominem : cognitiva autem non habent univocam causam in genere, sed æquivocam. Convincemus adversarium veritatis per hoc quod omne æquivocum ad aliquod reducitur univocum, quod est ante ipsum. Hic ergo generans erit æquivocum, quod, ut dicit, habet aliquod univocum ante se, quod est prima causa hujus : et sic redibit idem quod conclusum est prius.

Amplius in omnibus ita esse videmus, quod quodcumque inveniuntur aliquæ virtutes et formæ in pluribus, et in quibusdam earum sunt imperfectæ, in quibusdam autem perfectæ, imperfecta causata sunt a perfectis, et imperfectio venit ex diversitate et imperfectione materiæ. Sic ergo oportet quod sic se habeat et in cognitivis naturis. Natura igitur qua cognitiva sunt alia animalia, erit ab aliqua prima natura cognitiva et perfecta.

Hæc autem disputatio tota trahitur ex epistola quadam Aristotelis quam scripsit de *universitatis principio*, cujus mentionem in *Metaphysica* facit Avicenna. Dicit autem Eustratius super sexto *Ethicæ* Aristotelis, omnem cognitionem animalium fluere a prima causa cognitiva.

CAPUT III.

Qualiter vegetabile et intelligibile imperfectum fluunt ab intellectivo primo et perfecto?

Quæramus igitur quæ sit illa natura? cum enim primum in ordine naturæ influit in secundum, et non e converso, prius autem in ordine naturæ sit vivere quam sentire, et sentire quam intelligere, videtur alicui fortassis, quod primus fons omnis cognitionis esset vivum solum et non sentiens et intelligens, præcipue cum prius in ordine naturæ sit per modum unius, et secundum per modum duorum, quorum unum additum est ad aliud tertium per modum trium sibi consequenter ordine naturæ additorum, si sentire additur ei quod est vivere, et intelligere ei quod est sentire, eo quod sicut in libro de *Anima* diximus, eadem est ratio animæ quæ figuræ. Sicut enim in figuris trigonum est in tetragono, ita vegetativum est in sensibili, et sensibile in intellectivo. Hoc autem erroneum esse probatur ex hoc quod numquam secundum naturam imperfectum causa est univoca perfecti: vivum autem separatum secundum esse a sensibili et intelligibili imperfectissimum est in genere vivorum, nec aliquam vitæ nobilitatem habet qua principium esse possit.

Adhuc in omnibus causatis univocis secundum naturam sic est, quodcumque essentialiter inest causato, hoc potentius

et nobilius et clarius prius et perfectius inest causæ illius causati: omnibus cognoscitivis essentialiter inest principium cognoscitivum: hoc ergo potentius, nobilius, prius, et perfectius inest causæ eorum quæ cognitiva sunt. Non ergo fluit natura qua cognitiva sunt aliquando, ab aliquo uno vivo, cujus vivere separatum sit a cognitivo.

Amplius inter causata est nobili primo propinquius, quod est causa quod pluribus bonitatibus et nobilitatibus appropinquat: sed intellectivum pluribus nobilitatibus et bonitatibus appropinquat primo cognitivo et perfecte: et hoc est magis intellectivum quam vivum solum vel sentiens et vivens tantum: oportet igitur, quod fons et origo cognitionis vitæ sit aliqua natura intellectualis.

Amplius quæ perfectiva sunt visus, videmus omnia causari ab eo quod per seipsum et perfectissime est visibile. Omnis enim diversitas colorum causatur a luce, et diversitas colorum provenit ex multiformi permixtione opaci et terminati corporis cum diaphano, cujus per se actus est lumen. Similiter igitur ab eo quod perfectissime est cognitivum, fluit omnis cognitio, et diversitas cognitionum provenit ex multiformi obumbrativo cognitivi luminis irradiantis super ea quæ sunt cognitiva in diversitate animalium.

Ex omnibus autem his probatissimi determinaverunt omnem cognitionem intelligibilem et sensibilem animalium effluere ab intellectuali natura perfecte et intellectualiter cognitiva. Cum enim dicatur causa prima plus influere quam secunda, hoc tradiderunt Peripateti esse verum de causa vera. Vivum autem separatum a cognitivo, causa non est cognitivi, et ideo non influit. Sed cum causa prima omnes suas bonitates influat super causatum, et bonitates in ipsa nullam habeant distinctionem et ordinem, eo quod ipsa simpliciter omnia prima habet ante causata: in causatis tamen ea quæ influuntur, ex ipsa influuntur sub ordine

et distinctione : et sic prius influit quod secundum ordinem intelligendi est generalius et prius, eo quod remota causalitate primi non influit aliquid secundorum, sed remota causalitate secundi adhuc influit primum. Similiter autem in causa quæ est fons vitæ et cognitionis, vivum non addit aliquid super alterum : quia suum vivere est suum intelligere : sed in causatis in quibus distinctionem habet vivum, vivum est in alio quasi fundamentum ipsius : quantum autem ad attributas nobilitates nihil est adeo multiplex, sicut causa prima : sed ista multiplicitas nobilitatum in causa prima nullam simplicitatem adimit, eo quod omnes simpliciter et unite has nobilitates præhabet ante causata : et ideo dicit egregie Philosophus, quod causa prima omnibus causatis suis prænominatur, et quod est dives in se, in quibus nulli causatorum datur et largitur, et est dives in aliis quæ proportionaliter causatis communicat.

CAPUT IV.

Quod ab intelligentia natura cognitiva sit causata, sicut dicit Plato.

His autem sic declaratis, oportet ulterius investigare quæ sit illa natura, quæ fontaliter effluit omnem cognitionem et vitam. Et videtur Plato velle, quod intellectualitas in homine et sensibilitas in brutis utrumque vitæ principium in vegetabilibus et brutis effluat a motoribus orbium et stellarum : inducit enim in

Timæo summum deorum ad motores cœlestium loquentem et dicentem : « Horum sementem ego faciam, vobisque tradam : vobis autem exsequi par est. » In idem autem consentire videntur quotquot animas animalium ab intelligentiis profluxas et causatas tradiderunt.

Confirmant autem isti dicta sua triplici ratione potissime, quarum una est, quod omne ultimum in ordine causatorum non exit a prima causa nisi per causas quæ in medio sunt. Ultima autem causata sunt formæ generabilium et corruptibilium. Mediæ autem causæ sunt motores orbium cœlestium, quos intelligentias cœlestes vocaverunt Philosophi. Proximum autem fundens animas est intelligentia ultimum movens orbem. Secunda ratio, quia intelligentia imprimat in animam, sicut anima in corporis animati naturam. Sicut ergo dicimus animam esse causam corporis animati et motuum et passionum ejus secundum quod est animatum : ita debemus dicere intelligentiam infimam esse causam animæ cognitivæ secundum quod est cognitiva, eo quod cognitio animæ quædam est resultatio luminis intelligentiæ. Tertia est, quod sicut corpus animatum est sub corpore cœlesti causatum et rectum ab ipso, ita anima corporis est sub intelligentia et recta ab eo.

Hujus autem contrarium videtur. Si enim cognitivum mortalium flueret et regeretur ab intelligentia ultimi orbis, vel alicujus aliorum orbium vel omnium, tunc ipsa in suis motibus et operibus cognitionis et affectus necessario subderetur motibus astrorum, eo quod omne effluens ab aliquo, continetur et restringitur ab illo in potentiis operationum. Quod autem anima præcipue sub motibus astrorum restringitur, contra omnes est Peripateticos et contra Ptolemæum. Ipsa enim et superiora in sphaeris apprehendit : et ab his ad quæ motus astrorum inclinatur, libere avertitur, et alia advertit per sapientiam in intellectum, sicut testatur Ptolemæus.

Amplius in natura ideo est ordo primi ad media, et mediorum ad ultima, quod aliquid causetur in ultimis a mediis quod a causa prima non sit perfectum. Et dico de his causatis quæ nomine suo important aliquam nobilitatem : aliter enim ex ultimis ad media non esset recursus ad primum : et hoc esse non potest, cum omne quod est, aliquam bonitatem causæ primæ desideret, et propter illam agat quidquid agit. Sive ergo dicamus media aliquid agere in ultimorum productione, sive non, semper bonitates ultimorum principaliter et efficaciter sunt a causa prima, et ea quæ intermedia sunt, operantur ut instrumenta si quid ad ea operantur.

Amplius autem in lumine quod est universalis causa colorum, videmus quod licet ultimos colores constituat per commixtionem priorum, tamen omnis constitutio coloris per naturam perspicui participantis lumen tamquam prima colorum hypostasis : et quidquid aliquis color de natura habet coloris, ab ipso habet, et si quid aliud est in ipso, potius est de privatione naturæ coloris quam mereatur dici coloris essentia.

Omnino igitur eodem modo cum primum effluit bonitates sua super media et ultima, si aliquid esset a mediis influxum super ultima, tamen constitutio ultimorum non erit nisi ex participatione bonitatum primi : et si quid aliud est in eis, est aliquid privationis : et hæc sententia optimorum fuit sapientium Græcorum Theophrasti et Dionysii et aliorum Philosophorum. Adducebant autem simile de lumine solis, quod infundit se aeri limpido et nubibus terrenis diversis : quod licet ab aere sit in nube, et a nube sit in terra, tamen quia media non dant nisi quod a sole receperunt, totum solis est quod est in ultimis : et si in mediis et ultimis distet lumen a limpiditate solis, hoc potius privationis materiæ est, quam alicujus causæ hoc efficientis.

His igitur consentientes, dicimus quod cum Plato dicat, quod proprium cæle-

stium sit exsequi bonitates primi, et sementes substantiarum cognitarum hoc modo consequuntur quod instrumenta inducunt ea quæ sunt in arte artificis illa instrumenta moventis : et constat quod instrumenta moventis ea non faciunt ea ex suo proprio aliquo influxo. Est enim in omnibus intelligentiis ordo formarum practicarum, quæ per ipsas in materiam generabilium descendit, et sunt formæ in omnibus eadem, sed in inferioribus magis et magis determinatæ, sicut forma lucis eadem in sole et in aere et nube et corpore determinato : licet lumen secundum quod magis descendit a sole, magis et magis coarctetur et determinetur ad naturam coloris. Eodem autem modo est de forma artis in mente artificis quam exsequitur manus, et cadit in instrumentum, et suscipit ferrum, quæ proportionaliter in omnibus est eadem : et tamen magis determinata ad materiam in manu, quam in mente artificis, et magis in malleo quam in manu, maxime autem in ferro est determinata, eo quod ferrum materialiter suscipit eam. Et esset hoc in multis simile intelligentiis et causæ primæ et materiæ generabilium, si manus intellectum haberet et malleus, quo conceptam formam a mente artificis explicarent et exsequerentur. Unde sicut nihilominus tali existente hypothesi in arte omnia erunt a mente artificis, sic omnia in præhabitis sunt a causa prima, licet intelligentiæ quasdam bonitates explicent : et per motum cælestem inducunt in materiam. De his autem plenius est tractare primi Philosophi. Ad propositum enim sufficit quod inductum est : quotquot tamen posteriorum Philosophorum animas ab intelligentiis causatas et profluxas esse tradiderunt, hunc modum fluxus qui dictus est, intellexerunt : et hac de causa et animam imprimi ab intelligentia posuerunt, et eam esse stramentum intelligentiæ et subjectum illuminationibus ejus, in hoc verum utique dicentes, sicut ostendunt divinationes somniorum et alia multa, de quibus in

aliis libris erit tractatus. Propter quod etiam in libro de *motu cordis*, anima illuminationum quæ sunt a primo, secunda revelatione dicitur esse perceptiva.

Per ista etiam quæ dicta sunt, satis patet qualiter motores inferiorum sphaerarum fundant, et qualiter non : prima enim et tota fusio animæ et omnis naturæ est a prima causa. Inferiores autem orbes operantur organice determinando et inclinando naturas ad materiam. Propter quod Plato dicit, quod in quolibet orbe anima aliquid accipit, memoriam in orbe Saturni, et alias in aliis, sicut in primo de *Anima* determinavimus. Et secundum hunc modum essentia animæ a prima causa tota et sola : applicatio autem et determinatio ad corpus est ab aliis instrumentaliter primæ causæ deservientibus : et quoad hoc regenda in illuminationibus, et movenda motibus temporalibus, subjicitur intelligentiis aliorum orbium : et quia sic totus cæli concentus refertur ad causam primam, ideo melius intelligentes Philosophi totum unicum motorem dixerunt habere, et inferiores motores ad sphaeras dixerunt esse virtutes et membra primi cæli et sui motoris. De his autem in secundo *Cæli et Mundi* fecimus mentionem¹. Erit autem de his perscrutatio completa in *prima philosophia*.

CAPUT V.

Unde provenit generum animæ diversitas, et vegetabile scilicet, et sensibile, et intellectivum ?

Consequens autem dictis est ut modum descensus animarum determinemus. Cum enim prima causa fundens luce sua animas sit natura una simplex intellectualis, videbitur mirum qualiter multa sunt genera animarum, vegetabile scilicet, et sensibile et intellectuale. Non enim hoc accidere potest ex motoribus intermediis : eo quod omnes illi intellectuales a Philosophis esse traduntur. Nec est verum quod dicit Pythagoras, omnes animas esse intellectuales, et omnia corpora esse animata : nec motus sensus vel intellectus posse exsequi inquit animam in quibusdam corporibus ob materiæ gravitatem. Lapis enim, ut ait, animatus est : sed propter terrestreitatem est in ea oppressa anima, ne ostendat motus vegetationis, vel intellectus, vel sensus. In plantis autem propter minorem terrestreitatem ostendit et operatur anima vegetationem, sed non sensum. In brutis autem minus terrestribus operatur unum vel duos vel omnes sensus, sed non intelligere. In humano vero corpore

¹ Vide pro hoc II de Cælo et Mundo, tex. et com. 42, et cap. 2 de Substantia, orbis, et etiam XII Metaphys. tex. et com. 44.

quod minus omnibus terrestre est, et incomplexione maxime recedens ab excellentia contrariorum, omnes complete habet anima operationes.

Hoc enim esse non potest, cum natura numquam deficiat in necessariis. Si enim fuisset anima perfecta sensibilis et intellectiva in lapide vel planta, dedisset utique natura organa lapidi et plantæ, quibus sensibilis explicare posset operationes animæ seusibilis, et intellectualis.

Adhuc autem omnis diversitas materiæ est propter diversitatem formæ, sicut prius sæpe in expositis libris est probatum. Quomodo ergo dici potest, quod in omnibus corporibus, quæ valde figuris differentia sunt et quantitate et natura, sit idem genus animæ.

Nec conveniens est ratio Platonis dicentis, quod secundum merita materiæ infundantur formæ : quia secundum hoc materialis diversitas esset causa diversitatis formarum, cum hoc non sit verum, eo quod materiarum diversitas non est causa sed signum diversitatis formarum. Si enim diceretur esse causa, tunc oporteret quod materia esset ante formam secundum naturam et intellectum, et esset causa formæ : quæ omnia absurda esse non dubitat quicumque bene instructus est secundum ea quæ probata sunt in *physicis* libris.

Remanet ergo quæstio unde provenit animæ generum diversitas, vegetabile, sensibile, et intelligibile ? ab uno enim eodem modo se habente non potest esse nisi unum, secundum quod communiter omnes Philosophi tradiderunt.

Sed quæstio hæc citius solvitur, si consideretur subtiliter secundum quem modum largitiones naturarum a prima causa procedunt. Omnes enim formæ ab ipso totius universitatis natura largiuntur : quæ autem magis ab ea elongantur, eo magis nobilitatibus suis et bonitatibus privantur : et quo minus recedunt, eo magis nobiles sunt et plures habent bonitatum potestates et virtutes : et sicut in *Physicis* diximus, quæ in ipsa indis-

tincta sunt, procedentia ex ipsa distinguuntur secundum esse et essentias et species diversas : sicut radii a sole venientes in aera et vitrum clarum et vitrum coloratum, diversum esse et diversas species accipiunt. Et secundum hunc modum provenit diversitas : eo quod unum fluit ab unico per diversa organice ipsum explicantia, et in diversa ab ipsa informata, sicut etiam in parte determinatum est in octavo *Physicorum*. Et sunt gradus dissimilitudinis in hoc descensu : quoniam descendens vitæ principium, quod est anima, usque ad corpus compositum ex contrariis organicum, cujus complexio proportionatur æqualitati cœli, manet nobilem habens operationem divinam et intellectualem et animalem : eo quod ipsum est formans, alias generans ea quæ illis reformantur : eo quod nihil generat aliud, nisi per divinum aliquid quod est in eo : intellectualem autem, eo quod operatur non utens corpore : animalem autem, eo quod organico utitur corporeo : sed tamen suum intellectuale obumbratur in eo quod est inquisitivum, non certum sicut est intellectuale intellectuum cœlestium non obumbratum ex turbationibus corporum. Recedens autem amplius in regione dissimilitudinis amplius obumbratur, ita quod intellectuale amittat in toto retinens solam sensibilibus cognitionem. Adhuc autem amplius distans retinet solam infimam potestatem animæ, quæ est vegetare, et hujusmodi. Exemplum est a lumine recedente a sole in aerem limpium et nubem subtilem et corpus coloratum albo colore vel nigro vel rubeo : hoc enim paulatim et paulatim clauditur, et vim suæ potestatis plus et plus amittit, donec venit ad privationem : in omnibus in quæ procedit, habet diversum esse et speciem : nec est unum nisi secundum processionem ab uno primo luminis fonte : et quia hic per omnia similis est processio formarum a causa prima, ideo Plato dicit formam primam esse unicam, et ex ipsa unius ideo omnia

feri. Sed et Democritus et Leucippus omnia dicebant esse unum et idem fieri diversitatem ordine et compositione.

Errabant autem ambæ sectæ : quia quod est unum processione ab uno simplici et multa secundum esse et figuram, tamen secundum relationem ad primam causam efficientem unicam est unum : et si considerentur naturæ animarum et formarum secundum hoc esse diversum, tunc sunt propriæ naturæ animarum et formarum, et diversitas materiæ est propter ipsas, et non e converso, et sunt distantia esse materiæ : et hæc consideratio propriæ earum est : et sic diffiniuntur et sciuntur secundum quod Isaac dicit in libro *Diffinitionum*, quod videlicet anima rationalis producitur in umbra intelligentiæ, et anima sensibilis in umbra rationalis, et anima vegetabilis in umbra sensibilis, et natura cœli in umbra vegetabilis : quoniam essentia dans esse procedit a causa prima : et sic cum distans per similitudinem accipitur, erit simplicissima in esse et potissima et nobilissima et universalissima natura quidem secundum abstractionem : sed secundum quod dicimus, quod universalis causat et pluribus influitur, propter quod hæc essentia est vegetabilis, intellectualis, causativa, motiva, et plures alias habens potestates bonitatum : et quoad hæc omnia datur primo causato, quod est ens intellectuale causativum motus orbis. Hæc autem essentia descendens privatur simplicitate et potestate plus et in plus, sicut dicimus usque ad ultimum ens quod minimam accipit entis differentiam et potestatem : et hæc privatio est ejus *obumbratio* vocata a Philosophis. Ex hoc patet verus intellectus ejus, quod omnia sunt ex ipsa unius idea : et qualiter idea in prima causa est unica non habens pluralitatem nisi processu et vicinitate causatorum. Non enim est verum quod vita in prima causa sit separata ab esse, sed a simplici esse primi simplex essentiæ est emanatio. Et sicut esse primi unum est et cognitivum

et motivum, ita est in eisdem potestatibus essentia emanans, quamdiu non obumbratur per distantiam dissimilitudinis.

Ex quo tria corollaria habentur. Unum, quod ubi est esse intellectivum et sensitivum et vegetativum et motivum, ibi est una essentia et substantia simplex, sed multiplex in potestate, utrumque horum habens ex propinquitate sui processus ad primum a quo processit. Secundum est, quod si aliqua forma substantialis sit motiva sui subjecti secundum locum, habet ex convenientia cum primo, quod movet secundum locum immobilis existens, et non ex hoc quod sit compositum, sicut quidam Latinorum asserebant. Tertium, quod necessario non recedens longe a primo per privationem nobilitatum, sicut intellectuale manet separatum et perpetuum : recedens autem longe, permiscetur, et mortale et corporale efficitur.

Ex his scitur qualiter animalia movent se, non alia, et qualiter anima intellectualis non est actus corporis, nec corrumpitur corrupto corpore, sicut mentiens dixit Alexander.

CAPUT VI.

Utrum intellectualitas animæ sit materia, vel ex fluxu a causa prima?

Facile autem nobis est determinare de natura intellectualis animæ : quoniam naturam habet hanc ex hoc quod est processio a causa prima, emanans autem non usque ad permixtionem materiæ : et ideo adhuc a quibusdam sapientibus nostræ legis *imago Dei* dicitur. Ex hujus enim assimilatione causæ primæ habet intellectum universaliter agentem, qui sicut lux est separata, sicut in tertio de *Anima* convenienter est ostensum. Ex hoc tamen quod hæc natura appropriatur corpori organico physico, natura sua intellectualis parum mergitur, et ideo habet intellectum possibilem accipientem ab imaginatione et sensu : et cum natura hæc separata et non mersa in materiam secundum se, oportet quod sit universalis : et ideo est anima universaliter omnium cognitiva intellectualiter, et non quorundam solum : quia quædam non efficiuntur determinata nisi per materiam : intellectum autem diximus esse separatum. Cognitiva autem sensibilis quæ est actus organi materialis, non est acceptiva nisi quorundam, sicut satis in libro de *Anima* est determinatum.

Ex quo constat mentitum esse eum qui scripsit librum *Fontis vitæ*¹, quem quidem de materia et forma vocant : quia ipse videtur velle, quod ex natura materiæ habet intellectus potestatem omnia intelligendi. Dicit enim, quod materia prima est quæ potentia est omnia : et quo plus determinatur formis, eo plus clauditur et determinatur potentia ejus : quoniam si addatur primæ materiæ hæc forma quæ est intellectualitas, tunc non est amplius in potentia ad intellectualitatem, sed ad omnia alia. Et si addatur ei forma sequens quæ est corporeitas, tunc iterum determinatoris potentiæ : et ideo tunc non erit in potentia ad intellectualia. Si autem corporeitati additur contrarietas, non erit in potentia tunc nisi ad ea quæ in potestate sunt contrariorum : et hæc sunt formæ generabilium et corruptibilium.

Hoc enim dictum erroneum est et omnibus Peripateticis : nullo enim modo intellectus est potentia omnia sicut materia prima est potentia omnia : quia formæ individuæ secundum esse materiale non separatum sunt illæ quæ sunt potentia in materia². Formæ autem quæ potentia sunt in intellectu, sunt universales separatæ ab individuantibus, et præcipue a materia, non hic et nunc, sed ubique et semper existentes.

Adhuc autem materia non facit formas esse in seipsa per aliquid quod sit ejusdem naturæ et generis cum materia. Intellectus autem habet aliquid sui, intellectum videlicet agentem, qui facit formas esse in anima intellectuali.

Adhuc autem intellectus qui potentia est omnia intelligibilia, se habet ad ea sicut tabula rasa : et hoc modo non habet se materia ad formas universales quæ potentia sunt in ipsa. Amplius materia nihil horum intelligit quæ potentia vel actu sunt in ipsa³ : intellectus autem in-

¹ Scilicet Avicbron.

² Cf. III de Anima, tex. et com. 5, et 19 et

28.

³ Cf. III de Anima, tex. et com. 14.

telligit universa. Hæc omnia hic breviter tanguntur : quia in libro de *Anima* ¹ hæc intentione exquisita sunt et probata.

Unde licet nos in natura animæ ponamus aliquid potentiale et aliquid quod est actus illius, non tamen possumus dicere, quod potentiale quod est in ipsa, materia prima sit : quia non habet proprietates ejus : sed multo congruentius dicitur, quod cum anima intellectualis esse nobile separatum retineat quod ex parte illa qua attingit continuum et tempus, efficitur possibilis : et ex parte qua omnimode manet separata, est activa et perfectiva ejusdem possibilitatis. Cujus congruum exemplum dicit Avicenna in flamma adhærente aridis lignis cremabilibus. Illa enim in ea parte quæ adhæret lignis, est aliquantulum fumosa : in ea autem parte qua evolat in aerem purum a lignis distans, est plena luce illustrans aerem, et etiam partem fumosam ejusdem flammæ. Sic enim est de anima intellectuali : eo quod ipsa aliquo modo sit perfectio corporis, et tamen separata : et ideo ex parte qua inclinatur ad corporeas virtutes organorum quæ sunt imaginatio, accipiens continuum, et sensus accipiens temporale et transmutabile, quasi fumosa est, et efficitur in potentia intelligentia, et non in actu : sed ex parte separata est in actu lucis perfectæ.

Hæc autem dimittantur nunc : quia, ut diximus, in libro de *Anima* sunt pertracta : sed hoc est quod intelligitur ex dictis, quod essentia emanans a prima causa, plenam habet virtutem vitæ et cognitionis et motus per hoc quod emanat ex ipsa quæ est fons vitæ et cognitionis et motus : et hoc essentialiter retinet nisi obumbretur per distantiam dissimilitudinis a causa prima, cum essentia prima quæ dat esse rationalibus et intellectualibus, non abierit in dissimilitudine lon-

gissima : ideo erit vitæ et cognitionis principium et motus in omnibus : et hoc est principale quod hic intendimus distinguere vel investigare.

CAPUT VII.

Utrum natura intellectualis sit universalis vel particularis secundum actum : quia non est dubium, quin sit universalis secundum aptitudinem, cum sit forma.

Quæreret autem fortasse aliquis, utrum hæc essentia divina quæ vocatur natura intellectualis, sit universalis vel determinata et particularis seu individua? de hoc enim licet in libro de *Anima* determinatum sit, oportet tamen et hic interponi : quia aliter naturam intellectualium ad plenum scire non possumus. Fuerunt autem nonnulli Peripateticorum, qui hanc naturam esse universalem dixerunt et perpetuam : et potissimæ rationum suarum sunt tres, quarum una est : omne quod suscipit aliquid, suscipit illud secundum suæ propriæ naturæ potestatem : intellectus autem in se recipit universale, neque est universale secundum quod hujusmodi nisi in intellectu : oportet igitur quod natura intellectus sit universalis : quia si esset individua, individuaretur omne id quod est in ipso :

omnis enim forma individuatur per individualitatem sui subjecti in quo est. Secunda ratio est, quia natura intellectualis est separata substantia a materia : omnis autem individualitas est per materiam : et ideo intellectum dixerunt universalem. Tertia autem est, quia si esset individuus, non esset individuus nisi ad materiam propriam : et tunc sicut visus qui conjunctus est cuidam materiæ propriæ, non recipit nisi proportionata illi materiæ et non alia, ita intellectus non reciperet nisi quædam materiæ suæ proportionata et non reciperet omnia. Hoc autem falsum est. Ergo ipse intellectus non est individuus. Nec stare potest, quod dicatur duplex esse materia : una spiritualis, et altera corporalis, et quod ad materiam spiritualem individuatur intellectus : quia illa materia spiritualis non efficitur propria intellectus nisi per aliqua appropriantia eam : et tunc redit idem quod prius, quod scilicet suæ compositioni non proportionatum non cognoscet intellectus. Nec potest dici, quod omnia proportionata sint tali compositioni : quia nullum est proprium nisi per ea quæ non conveniunt alii. Multa igitur alia erunt suæ propriæ compositioni non proportionata, et hoc non cognosceret intellectus. Et hæc potissima rationum est, quare Abubacher et Averroes et multi alii intellectum universalem esse posuerunt, nec appropriabilem nobis nisi per imaginationem et sensum, sicut diximus in libro de *Anima*.

Si autem intellectus universalis dicatur esse et in omnibus animalibus essentialiter idem, sequuntur multa absurda, de quibus in libro de *Anima* fecimus mentionem : et ideo nobis videtur, quod intellectualis natura sit in genere suo, sicut sol in genere corporum. Scimus enim solem esse unum numero individuum, et lucem quæ in eo est, dupliciter esse consideratam. Si enim consideretur prout in eo est, est forma solis una numero. Si autem accipiatur prout ab eo est emanans, sic est universaliter illumi-

nativa omnium diaphanorum, tam periorum quæ facit esse lucida, quam non periorum quæ facit colorata, sicut in primo libro de *Sensu et Sensato* determinavimus : et hoc modo considerata multa agit et facit.

Cum autem dicat Philosophus intellectum esse sicut lucem, videtur intellectus prout est aliquid naturæ animæ esse individuus : et tamen prout emittit actiones intelligendi, esse in virtute universalis : et hoc modo universalis sunt in ipso : quia sic est abstractivus et denudativus formarum, sicut lux corporalis colorum, licet individuus ponatur secundum quod est forma hominis, tamen secundum suam potestatem et quantum est potentia lucis spiritualis, universalis est. Hæc etiam universalis non sunt in intellectu quasi forma in materia vel accidens in subjecto : ens enim in anima potius est intentio rei quam res : et ideo sicut non individuatur color per esse quod habet in luce corporali, neque etiam specificatur, eo quod esse in luce convenit omni colori secundum quod est in actu color, ita intentio rei non specificatur neque individuatur per hoc quod est in luce incorporea intellectuali, sed manet universale : et in hoc est cognitio secundum congruentiam intellectus et facultatem, sicut visus secundum actum est secundum congruentiam lucis corporeæ et facultatem. Quod autem dicat naturam intellectualem esse separatam, in libro de *Anima* per multa est expositum : et ideo hoc prætermittendum.

Quod vero tertio objicitur, non concludit, nisi nos poneremus quod cognitio universalis esset in intellectu secundum quod ipse est individuus. Hoc autem non est concedendum : quia sic absque dubio sequeretur quod non cognosceret nisi quæ essent secundum congruentiam suæ compositionis. Nos enim in dicto libro diximus, quod tripliciter homini unitur intellectus. Uno scilicet modo ut natura dans esse : et sic est individuus. Alio modo ut potentia per

quam est operatio intelligendi : et sic est virtus universalis. Tertio modo ut forma acquisita ex multis intelligibilibus, sicut planius tractatum est de intellectu agente qui non unitur contemplativis ut agens tantum, sed ut beatitudo eorum est, quando perveniunt ad hoc quod in eis est ut forma : et secundo et tertio modis secundum prudentiam et sapientiam dictus intellectus non inest æqualiter omnibus hominibus, sed aliis plus, et aliis minus, et aliis fortassis nihil inest de intellectu.

CAPUT VIII.

In quo summatim colligitur natura intellectualis animæ.

Ut autem capitulariter perstringantur ea quæ dicta sunt, diximus cum Areopagita Dionysio, quod « omnis natura procedens a causa prima tanto simplicior est et nobilior et in potestate multiplicior, quanto fuerit illi intimior per instantiam similitudinis : et e regione e contra quanto fuerit distantior per dissimilitudinem, tanto est materialior et ignobilior et paucioris potestatis. » Hoc autem sapientissimi Peripatetici demonstraverunt ex cælo octavo, quod quantæ fuerit multipliciter, ostendit multipliciter suarum stellarum. Et cum illa multiplicitas sit in eo quod movetur, oportet quod respondeat per congruentiam mul-

tiplicitati potentiarum quæ sunt in motore. Propter quod etiam contingit, quod intellectualis anima multiplicior est quam forma lapidum vel mineralium, et sic de aliis : quo autem tales naturæ sunt magis separatæ, eo magis dictæ sunt formæ, sicut Antiqui dixerunt. Propter quod etiam Platonici formas omnino separatas asseruerunt : et quo magis erant conjunctæ materiæ, eo minus dicebantur formæ, sed materiæ immersas magis placuit eis imagines appellare, sicut tradit Boetius in libro de *Trinitate*.

Propter quod patet naturam intellectualem verius esse formam omnibus aliis formis consequentibus, eo quod maxime est separata : et quoad hoc fluunt ab ipsa luces separatæ incorporeæ secundum quas efficitur potens ad omnia cognoscenda, quæ obscuritate materiæ et privationis et materialium conditionum tenebris sunt abstracta et absoluta. Cum autem sit vicina causæ primæ multis similitudinibus ei, habet potestates plures quæ sunt naturales proprietates et potentiæ ipsius, sicut supra diximus : quæ tamen nec sunt idem quod ipsa, neque una potestatum suarum est idem cum alia, quia in hoc distant a prima causa quæ idem est cuilibet suæ potestati, et quælibet suarum potestatum est idem alii : et cum tam multæ sunt potestates ipsius, est ipsa secundum seipsam, et non per commune accidens operativa multorum : et in hoc differt a forma quæ simpliciter est natura et forma corporis et actus materiæ corporalis tantum, secundum quam corpus naturale non operatur nisi unum solum. Adhuc autem in his partibus una potestatum tanto excellentior est quam alia, quanto fuerit separatior : et ideo potentior est intellectus quam sensus communis, et sensus communis potentior quam proprius, et sensualis natura potentior quam vegetabilis : et eodem modo invenitur in omnibus aliis.

TRACTATUS II

DE PER SE INTELLIGIBILI.

CAPUT I.

Quod nihil intelligitur nisi universale.

Post hoc de *intelligibili* videtur esse dicendum. Est autem sententia fere omnium, quod solum universale sit intelligibile : eo quod tam Aristoteles quam Boetius et Averroes attestantur, quod universale est dum intelligitur, singulare autem dum sentitur : cujus potissimum assignant rationem eam, quæ communiter promulgata est, quod intellectus accipit nudatum et spoliatum a materia et a materiæ appendiciis. Cum ergo cum

suis appendiciis sit id quod individuat formas, erit sic nudatum ab individuantibus : et sic relinquitur quod sit universale objectum intellectus : et sic concorditer tradunt, quod sit universale objectum intellectus.

Amplius autem universale aut est in rebus, aut est in sensu, aut in intellectu, aut omnino nihil. Constat autem quod non sit in sensu. Cum autem nihil sit in rebus nisi secundum quod est singulare et proprium unicuique rei, constat quod universale non sit in rebus. Oportet igitur quod sit in intellectu.

Amplius traditum est ab Aristotele quod universale est ubique et semper, et quod est unum in multis et de multis : nulla autem rerum est ubique et semper : earum autem dico rerum quæ sunt in rebus naturalibus vel artificialibus extra animam : oportet igitur quod est ubique et semper, in anima existere et non in rebus.

Amplius propria operatio intellectus agentis est abstrahere, non quidem a materia tantum, sed universaliter ad hoc particulari, cujus intentio est in anima sensibili. Hoc autem abstrahere nihil

aliud est quam accipere universale ex particulari : propter quod tradit Aristoteles quod multis experimentis acceptis una fit universalis acceptio quæ est principium artis et scientiæ. Relinquitur ergo proprium objectum intellectus esse universale.

Sed quidam hoc concedere nolunt asserentes, quod in quibusdam tanta invenitur simplicitas et immaterialitas, quod abstrahitur a materia et materiæ appendiciis quæ non habent, nequaquam possunt, sicut ipse intellectus intelligit se et intellectuales alias naturas quæ non sunt tamen universales : in his ergo dicunt intellectum esse acceptivum particulare.

Amplius cum sola naturalia et mathematicalia secundum se sunt in materia et motu, divina autem omnino sine motu et materia sunt, nec tamen illa sunt universalia omnia, sed in ipsis est universale et particulare. Cum igitur, inquit illi, divina sola sint accepta in intellectu, oportet quod quædam particularia in intellectu accipiantur. Ad hoc etiam inducunt, nos unamquamque rerum tunc vere intelligere et scire, sicut in libro de *Physico auditu* dictum est, quando cognoscimus causas et principia et elementa ipsius. Causæ autem et principia et elementa rerum sunt particulariter constituentes res et particularia quædam. Videtur ergo intellectus verius esse particulare, quam universale. Alia autem quædam his similia dicunt, qui negant solum universale esse intelligibile.

Nobis autem consentiendum videtur primæ sententiæ, quod videlicet solum intelligibile sit universale, et nullum particulare omnino : quia sic tradit concorditer tota secta Peripateticorum. Utrum autem universale sit in solo intellectu et non in rebus extra, posterius et in hoc eodem libello erit inquirendum : sed nunc dicimus nihil puro intellectu intelligi nisi universale : et sicut tradunt, causa est, quia intellectus cum sit sim-

plex et purus, nihil ulli habens commune, et separatus ab omnibus, oportet quod objectum proportionatum habeat sibi : eo quod scire et intelligere non convenit ei nisi secundum potestatem et congruentiam ipsius, sicut fit passio in quolibet passivo : objecta enim non inferunt passiones nisi propriis passivis : ideo si particulare aliquam inferret passionem intellectui, oportet eum habere congruentiam ad illud particulare in genere : et tunc non pateretur nisi a rebus quæ essent de genere illius particularis : quod esse non potest, sicut sæpe diximus : et ideo denudatum a materia et appendiciis materiæ est objectum, quod propriam infert intellectui possibili passionem.

Nec est verum quod dicit adversarius, in rebus particularibus tantam inveniri simplicitatem quantam dicit : quia in omni re est universale ex parte formæ communicabilis, et particulare ex parte substantiæ illi formæ quod incommunicabile est et uni soli conveniens : et quia principium communicabilitatis invenitur in omnibus rebus perfectis in natura præterquam in causa prima, ideo dicit Boetius, quod « omnis res habet aliquid quod est, et aliquid quod hoc est, et omnis res est hoc et hoc. » Sæpe autem diximus, quod abstractio quæ est in intellectu, est a particulari, et non semper a materia secundum quod stricte sumitur materia quæ est subjectum transmutationis et motus, sicut abstrahitur lignum ab hoc ligno, et intellectus ab hoc intellectu. Cum autem dico *cælum*, dico formam prout est universale : et cum dico *hoc cælum*, dico formam in hac materia particulatam et contractam. Hæc autem abstractio in omnibus est, et intellectus intelligit se, sicut et alia intelligibilia, sicut in tertio de *Anima* determinatum est.

Ex his etiam manifestum et non solum materialia et mathematicalia esse separabilia, sed etiam divina omnia : aut quædam sunt separabilia prout univer-

sale a particulari separat intellectus. Quod autem dicunt nos omnem rem intelligere et scire cum causas et principia cognoscimus, quæ tamen particularia esse videntur, videtur considerandum esse quoad hoc quod secundum rei veritatem eadem sunt principia esse rei, et principia intelligendi et sciendi rem, sed non eodem modo accepta sunt causa scientiæ et rei existentis in natura : quia universaliter accepta causant scientiam, et appropriata et particularizata ad aliquam rem, sunt principia rerum in natura. Hoc autem qualiter fiat, in sequentibus erit manifestum.

CAPUT II.

*Utrum universale sit in solo intellectu,
an etiam in re extra ?*

Peripateticorum opinio.

Utrum autem universale in solis nudis purisque intellectibus sit, aut etiam in rebus, Porphyrius dicit esse altissimum negotium et magna egens inquisitione : et licet hoc ad metaphysicum spectet, tamen hic de hoc oportet fieri mentionem propter doctrinæ faciliorem modum. Cum autem omne quod in rebus est, unum solum sit et proprium, videbitur universale quod est in multis et de multis, non esse in rebus aliquid, præcipue cum Aristoteles tradat in *prima philosophia*, quod idem est esse universalis et particularis, et principia omnium rerum, quæ sunt principia essendi, sunt particularia et

non universalia, quemadmodum dicit Plato.

Amplius autem universale simplex est et purum a materia et materiæ appendiciis separatum : in eo autem quod est hujusmodi, non recipit ipsum materia. Cum ergo necessarium sit in aliquo esse, cum sit simplex forma, oportet quod secundum hoc esse sit in anima : et sic universale in eo quod est universale, non est nisi in anima.

Amplius si universale esset in re, oportet quod idem esset rei illi in qua est : quia aliter falsa esset prædicatio illius, cum diceretur, Socrates est homo, vel Socrates est animal : homo igitur vel animal prædicatum de Socrate idem est Socrati. Eadem ratione prædicatum de Platone, est idem Platoni. Sed quæcumque uni et idem sunt eadem, ipsa sunt eadem, sequeretur ex hoc quod Socrates et Plato essent idem : aut oportet dicere, quod homo et animal essent aliud et aliud universale prædicta de Socrate et Platone, quod est falsum, cum Porphyrius dicat, quod participatione speciei plures homines sunt unus homo : et Aristoteles dicat, quod isosceles et isopleurus sunt plures trianguli et una figura. Ex omnibus autem hujusmodi inconvenientibus concluditur, quod universale non est in re, sed in ratione. Propter quod etiam Joannes Damascenus dicit, quod « in talibus commune ratione et non in re consideratur. »

Amplius individuatur forma per materiam : forma autem individuata dat esse individuo : sic igitur et forma efficitur propria et materia : nihil ergo formæ et materiæ quod est in uno individuo, est in pluribus simul sumptis : ergo universale nihil est rei, sive secundum formam, sive secundum materiam accipiatur, cum ipsum sit in possibilibus simul sumptis. In hoc etiam consentiunt Peripatetici fere omnes, Avicenna videlicet, et Algazel, et Averroes, et Abubacher, et alii quamplures.

Latinorum
opinio.

Sed quidam non medioeris auctoritatis viri inter Latinos quibus ista sententia non placuit, asserunt universale secundum aliquid esse in rebus. Si enim in re non esset, de re vere non prædicaretur, præcipue cum hæc sit natura universalis, quod in quolibet suorum particularium est totum.

Adhuc autem res nulla intelligitur nisi per id quod vere est forma rei. Cum ergo universale sit quod intelligitur, oportet quod sit vere forma rei : et sic est aliquid in rebus.

Amplius autem nihil est verius in rebus, quam id quod est totum et unum in multis, et de multis : non enim amittit rationem essendi in rebus per hoc quod est in multis : per hoc autem quod est de multis, habet quod est in eis vera eorum essentia existens substantialis vel accidentalis : oportet ergo quod universale sit vere in rebus, cum ipsum sit unum in multis et de multis.

Opinio Doc-
toris.

Nos autem in ista difficultate mediam viam ambulantes, dicimus essentiam uniuscujusque rei dupliciter esse considerandam. Uno modo videlicet prout est natura diversa a natura materiæ, sive ejus in quo est quodcumque sit illud. Et alio modo prout est in materia, sive in eo in quo est individuata per hoc quod est in ipso. Et primo quidem modo adhuc dupliciter consideratur. Uno quidem modo prout est essentia quædam absoluta in seipsa, et sic vocatur *essentia*, et est unum quid in se existens, nec habet esse nisi talis essentiæ, et sic est una sola. Alio modo ut ei convenit communicabilitas secundum aptitudinem : et hoc accidit ei ex hoc quod est essentia apta dare multis esse, etiamsi numquam det illud, et sic proprie vocatur *universale* : omnis enim essentia communicabilis multis, universale est, etiamsi actu numquam dat esse nisi uni soli, sicut sol, et luna, et Jupiter, et hujusmodi : formæ enim substantiales talium communicabiles sunt : et quod non communicantur actu, con-

tingit ex hoc quod tota materia cui illa forma communicabilis est, jam continetur sub forma, sicut in *Cælo et Mundo* est determinatum. Per hanc igitur aptitudinem universale est in re extra, sed secundum actum existendi in multis non est nisi in intellectu : et ideo dixerunt Peripatetici quod universale non est nisi in intellectu, referentes hoc ad universale quod est in multis et de multis secundum actum existendi, et non secundum aptitudinem solam.

Prout autem jam participatur ab eo in quo est, adhuc duplicem habet considerationem. Unam quidem prout est finis generationis vel compositionis substantiæ desideratæ a materia vel eo in quo est cui dat esse et perfectionem, et sic vocatur *actus*, et est particularis et determinata. Secundo autem modo prout ipsa est totum esse rei, et sic vocatur *quidditas*, et sic iterum est determinata particularizata et propria.

Nec est putandum inconueniens, quod forma dicitur totum esse rei : quia materia nihil est de esse rei, nec intenditur a natura : quia si esse posset forma in operatione sine ipsa, numquam induceretur in materiam : sed quia hoc esse non potest, ideo requiritur materia non ad esse, sed ad ipsius esse determinationem. Hoc ergo ultimo considerata forma prædicatur de re cujus est forma, et sic separata per intellectum est universale in intellectu : et ideo aptitudo suæ communicabilitatis reducitur ad actum in intellectu separante ipsum ab individuantibus.

CAPUT III.

De solutione dubiorum quæ oriuntur ex prædeterminatis.

Sed forte quæreret aliquis ex his quæ determinata sunt, occasionem accipiens : quia talis consideratio formæ in se et in materia non videtur esse rei, sed rationis : et ideo cum aptitudo communicationis hoc modo convenit ei, non videtur eidem convenire nisi secundum rationem et intellectum : et sic iterum redit, quod universale et aptitudine et actu sit in solo intellectu, et nullo modo in re ipsa.

Sed ad hoc dicendum est, quod absque dubio, sicut in *Metaphysicis* determinatur, actus est ante potentiam, et non secundum rationem tantum sive in modo intelligendi, sed ipsa substantia et diffinitione, sicut causa est ante causatum, et habet esse causæ et essentiæ, sicut diximus, licet non habeat esse nisi in natura particulari : et hoc modo est una essentia, non quidem unitate numeri, sicut dicimus numerum esse unum, sed unitate esse et essentiæ in se et formæ, quæ unitas multitudinis secundum aptitudinem communicabilitati non repugnat : et hoc modo dicitur unum in multis et de multis.

Si autem quis objiciat, quod secundum dicta universale est ante rem et non post ipsam, cum Aristoteles dicat quod universale aut nihil est, aut posterius suis singularibus : *dicimus*, quod id quod

est universale, absque dubio est ante rem : sed actus suæ universalitatis quem facit agens intellectus, est ex eo quod est in re quidditas rei existentis, quæ vere prædicatur de re ipsa : et quoad hoc est consequens rem abstractum de re ipsa : et sic patet intellectus prædeterminatorum, et quod sectæ ambæ secundum aliquid dicunt verum.

Claret etiam ex his, quod cum materia nihil est de esse vero rei, nullo modo nulla res est intelligibilis per suam materiam, sed per suam formam : et tunc cum universale sit intellectus proprium objectum, quod esse universale est formæ, et non materiæ : forma enim omnis communicabilis est materia incommunicabilis : nec est materia per idem sui in multis secundum aptitudinem vel actum, sed per diversas partes, ita quod secundum partem hanc est in uno, et secundum aliam est in alio : et quia res nominatur secundum quod intelligitur, nominatur proprie a forma et materia : nec intelligitur nec nominatur nisi per analogiam ad formam, sicut etiam diximus in fine primi *Physicorum*. Cum igitur individuum sit individuum per materiam, non habebit nomen proprium proprie loquendo, nisi forte secundum quod est substantia per formam quæ proprie et principaliter et maxime substat. De omnibus autem his in primo *Logicæ* satis determinatum est.

Ex dictis autem adhuc accipitur, quod cum universale sit in essentia rei secundum aptitudinem quam habet ad existendum in pluribus tota : et cum illa aptitudo æqualiter sit respectu præteritorum et præsentium et futurorum, quod universale quod est substantia rei, vel fundatur in ipsa substantia, univocum est respectu omnium præteritorum præsentium et futurorum.

Adhuc autem cum sit de aptitudine essentiæ quæ est ante materiam et compositum, patet quod nullo existente homine particulari, adhuc est vera, homo est animal, et hujusmodi aliæ locutiones.

Ex his iterum intelligitur, quod licet destructis primis substantiis impossibile sit aliquid aliorum remanere, tamen scientia perpetuorum est, et perpetua est et incorruptibilis : eo quod non fundatur nisi super aptitudinem communicabilitatis formæ et essentiæ, et ea quæ sunt passiones et differentiæ ipsius : hoc autem perpetuum est et incorruptibile, sive particularia sint, sive non. Qualiter autem una scientia sit in omnibus, et qualiter non in his quæ de *Anima* dicta sunt, determinatum est.

CAPUT IV.

De falsitate opinionis dicentis omnem formam esse ubique et semper.

Licet autem hæc via sit rationabilior, tamen non placet aliquibus ita dicere, sed dicunt omnem formam, sive sit substantialis, sive accidentalis, de se esse communem : et quia in materia non est nisi per accidens, sicut diximus prius, eo quod materia non intenditur ad esse, sed formæ est totum esse rei, ideo dicunt quod omnis formæ de se est ubique et semper : non arctatur enim in loco aliquid esse nisi per contrarietatem materiæ, nec restringitur ad nunc nisi per ipsam materiæ contrarietate determinatam : ea enim quæ sunt extra contrarietatem et motum, sunt supra tempus et differentias temporis.

Dicunt etiam, quod cum essentia formalis de se sit ubique et semper, et per

accidens sit in materia, verius est ubique et semper quam hic et nunc : et verius est ubi est secundum esse formalis, quam ubi est secundum esse materialis quod dimittit suum esse et coarctat potentiam communicationis ejus : et ex hoc sequitur, quod verius est in intellectu quam in materia.

Et isti dicunt, quod si aliquæ formæ sunt separatæ, sicut intellectus, quod illæ sunt ubicumque operantur, et possunt esse in pluribus simul.

Et ex primo concludunt, quod unum universale sit quod in omnibus animabus intellectum, et in omnibus suis particularibus existens : et sic concedunt unam numero scientiam esse in omnibus animabus, sed diversas continuationes istius scientiæ dicunt esse ad homines propter diversitatem imaginationis ex qua accipit intellectus, sicut in tertio de *Anima* determinatum est.

Ex secundo autem concludunt causam vaticinationis quam ponunt necromantici et augures, qua de causa videlicet unus fascinet alium, et impedit operationes animales in ipso. Habent autem rationes primæ suæ positionis : unam quidem potissimam quam diximus, et alias quas in libro de *Anima* posuimus.

Et quia longum est omnibus talibus immorari, videtur nobis sine præjudicio melioris sententiæ dicendum, quod hæc opinio falsitati obnoxia est : quia esse verum et ratum in natura est illud quod dat formam materiæ particulari : esse autem formale non est nisi secundum aptitudinem in essentia formæ et secundum actum nisi secundum intellectum separantem, ut diximus : et ideo verissime loquendo, essentia formæ non est nisi secundum aptitudinem ubique et semper et non in actu. Et quod dicit verius esse rem ubi est secundum se quam ubi est per accidens, dicendum quod hoc esset verum si ubique et semper esse conveniret ei secundum actum : hoc autem non est verum : et ideo non sequitur illud quod concludunt, quod esse secundum

aptitudinem est esse secundum quid et potentiale : esse autem in materia est esse verum et perfectum et secundum actum. Et cum dicitur, quod hoc accidit formæ, dicendum quod hoc accidens non facit per accidens esse ipsum esse quod est actus materiæ et compositi a forma : hoc enim est substantiale et verum : sed per accidens dicitur ibidem, quod est gratia alterius, et non propter seipsum convenire : quia hoc verum est, quod esse in materia non convenit formæ et essentiæ gratia sui et propter seipsam.

CAPUT V.

De confutatione erroris Platonis circa determinata.

Adhuc autem oportet mentionem facere de philosophia Platonis, qui apud omnem facultatem hujusmodi solvendam triplex distinguit universale. Unum quidem ante rem quod est causa formalis præhabens virtute totum esse separatum et perpetuum ante rem existens : quia cum sit causa, oportet quod sit ante rem : et cum transmutatio et generatio et corruptio non sint nisi in subjecta materia, erit illud ante omnia hujusmodi : et ideo est ingenerabile et perpetuum, et cum hoc dat totum esse materiæ, et est esse individuorum, sicut sigillum dat ceræ figuram : figura autem erit præhabens totum esse et virtutem rei : hoc ergo universale dicitur esse separatum et mathematicum existens secundum seipsum et esse principium

scientiæ et generationis causam formalem in omnibus generatis et extra generata manere, sicut paradigma ligneum ad quod fiunt calcei manet extra coria, cum tamen ad ipsum formetur omnis calceus : et quia hoc perpetuum est, dixit esse principium scientiæ : et quia immateriale est, dixit esse semper et ubique in omnibus animalibus idem. Secundum autem universale dixit tantum in re, et hoc esse formam impressam rebus ex primo universali : et ex quo formæ rerum egrediuntur, sicut ex quodam etymagio, hoc est, sigillo : hoc autem secundum dicit subjacere motui et mutationi propter materiam in qua est. Tertium autem dixit esse post rem, quod est per considerationem acceptum a rebus : et per hoc dixit non quidem rem sciri, sed sciri in propria natura et per applicationem formæ ad particulantia eam et individuantia.

Aristoteles autem contradictum illud multis rationibus disputavit ostendens, sicut et verum est, principia rerum proxima particularium esse particularia, et corruptibilium corruptibilia, de quibus non est præsentis speculationis disserere. Sed hoc quod est ad propositum, est hoc, quod si esse et essentiæ rerum perpetuæ et incorruptibiles sunt tales, ut dixit, tunc illæ nihil omnino sunt de esse rerum naturaliter existentium, neque res cognoscuntur nisi per principia quæ sunt de esse ipsorum : igitur per universalialia præexistentia et præhabentia esse rerum nulla res cognoscitur : et sic inutiles sunt ad scientias rerum.

Adhuc autem et secundum hoc false universale prædicaretur de pluribus unum existens : quia secundum quod appropriatum est, non convenit pluribus : primum autem est nihil de esse rerum : et ideo ipsum prædicari de re aliqua non potest. Propter quod absque dubio inconvenientissima est philosophia Platonis in hac parte.

Adhuc autem naturalia differunt a mathematicis in hoc quod ipsa per rationem diffinitivam concepta sunt cum materia

mobili et sensibili : qualiter ergo potest fingi, quod talia existant separata?

Adhuc autem si essent separata, quid faceret ea tangere materiam et causare esse naturale in ipsa? Etymagium enim quod ponit, non tangit ceram ad sigillan-

dum nisi aliquo movente. Quid autem movens sit hujusmodi formas separatas, impossibile est dicere, etiamsi fingere velit aliquis.

Hæc igitur dicta sunt de natura et essentia intelligibilis.



TRACTATUS III

DE COMPARATIONE INTELLECTUS AD INTELLIGIBILE.

CAPUT I.

Qualiter intelligibile est in intellectu?

De comparatione autem intelligibilis ad intellectum secundum unitatem et diversitatem unius ad alterum post hoc dicendum est. Cum enim omnis intellectus fiat per assimilationem quamdam intellectus ad intelligibile, oportet unum fieri ex intellectu et intelligibili : hoc autem unum non est omnino sicut subjecti et accidentis : nec est omnino unum quod fit ex materia et forma unum, sicut con-

venienter ostensum est in tertio de *Anima* : et ideo oportet hic clarius inquiri quale unum sit illud.

Ad hoc autem sciendum, oportet nos videre ea quæ uniuntur luci ex coloribus qui abstrahuntur ex ipsa : inter omnia enim corporalia nihil est in quo tanta similitudo incorporeorum appareat, sicut est lux : propter quod etiam intellectus agens est sicut lux dictus in libro de *Anima*. Dicamus igitur quod in luce tria sunt, sunt quæ lux, lucere, et lumen : quæ si considerentur in se, differentiam nullam realem omnino vel parvam videbuntur habere. Si autem considerentur relata ad quædam alia, tunc magnam inter se habent differentiam : quia lux est forma luminis in corpore quod fundit lucem, et lucere est emanare formam illam in aliud, et lumen est jam recepta forma illa ab eo quod primo lucet. Color autem secundum quod abstrahitur a corpore et efficitur secundum esse spirituale in perspicuo sive diaphano est in eo non omnino sicut accidens in subjecto : quoniam accidens a subjecto non habet formam et essentiam accidentis, sed est tantummodo. Color autem a lumine habet essentiam et for-

mam coloris, sicut in primo de *Sensu et sensato* determinatum est.

Adhuc autem non est in eo sicut forma in materia: quia forma educitur per alterationem de materia, et fit generatio rei compositæ. Color autem non sic educitur de perspicuo pervio, sed sicut alibi dictum est, abstractione formali abstrahitur de colorato, sicut figura de sigillo.

Adhuc autem forma esse materiale habet in materia in qua est: color autem in perspicuo non habet esse materiale, sed spirituale: propter quod etiam subita est mutatio perspicui a coloribus et lumine: hæc autem omnia in aliis sunt declarata. Si autem solum intellectum diceremus lucem quæ in ipso est, tunc intellectus et intelligibile et intelligibilia sua recepta ab aliquo non differrent: et intelligendo id quod reciperet suam lucem intellectualem, intelligeret suum proprium intelligere: et intelligendo quodlibet intelligibile, et se et suam propriam actionem intelligeret.

Per omnem eundem modum nos imaginari oportet de intellectu et intelligibili secundum actum dicto, quod in ipso est: hoc enim abstractum est a rebus: et cum est in lumine intellectus, est in eo quod dat ei formam intelligibilitatis secundum actum, et non sicut accidens est in subjecto, neque sicut forma in materia: neque hoc est inconveniens, quia talia secundum esse spirituale quod habent in suis abstrahentibus accepta, neque sunt accidens, neque substantia secundum verissimas acceptiones ipsorum, neque sunt entis differentiæ vel species aliquæ, nisi accipiatur ens secundum quid: sed sunt quædam entium intentiones secundum potestatem suorum agentium accepta: potestas enim luminis est tale esse conferre coloribus: et potestas intellectus est tale esse conferre intelligibilibus secundum actum intelligendi acceptis.

Planum autem est ex his quæ dicta sunt, quod intellectus non alia operatione sive actione intelligit suum intelligere, quam intelligendo sua intelligibilia: et

quod intelligit se, quodlibet intelligibile intelligendo. Cujus causam jam diximus, quia intellectus sonat lucem incorpoream naturæ intellectualis, quæ sive accipiatur in natura ipsa intellectuali, sive manans ab ipsa, sive recepta, sive terminata super intelligibile, non habet in se formalem aliquam differentiam. Si autem ad alia referantur illa, tunc differunt secundum ea ad quæ referuntur.

CAPUT II.

De diversitate intelligibilium in genere.

Est autem in intelligibilibus diversitas quæ est in coloribus comparatis ad visum. Propter multam enim victoriam et permutationem perspicui clari in corporibus terminatis, videmus quosdam colores in luminis adventu effici scintillantes et spargentes lumen ad illuminationem aliorum: et aliquando si vere in toto sit perspicuum corpus coloratum, si lumen superveniat, illi colores colorant alia corpora sibi opposita, sicut videmus in vitro colorato, per quod lumen veniens secum trahit colorem vitri, et ponit eum super corpus cui per vitrum incidit lumen. Quædam autem sunt ita vincentia in puritate diaphani, quod adeo radiantia efficiuntur, quod vincunt harmoniam oculi, et videri sine magna difficultate non possunt. Quædam autem sunt spargentia tantum luminis et diaphani, quod vix discerni possunt visu propter parvitatem suæ compositio-

nis ex perspicuo, cujus proprius actus est lumen.

Similiter autem est in intelligibilibus : quoniam formæ illorum per hoc quod sunt simplices et universales, et nihil de privatione materiæ immixtum habentes, sunt intellectus quidam sicut colores clari sunt luminis quidem : secundum autem quod sunt magis secundum naturam priora et universaliora et simpliciora, sicut sunt intelligibilia et lucem intelligibilitatis aliis conferentia, sicut dignitates. Quædam autem luce sua nostrum intellectum qui cum continuo et tempore est, vincuntia sunt, sicut sunt manifestissima in natura quæ se habent ad nostrum intellectum, sicut lumen solis vel fortissime scintillantis coloris ad oculos noctuæ vel vespertilionis. Quædam autem non manifestantur nisi lumine alieno, sicut ea quæ ex primis et veris accipiunt fidem. Quædam autem ex nimia permixtione cum privatione, perfecto intellectu comprehendi non possunt, sicut motus, tempus, et materia prima.

Ex his clarum est, quod theologica maxime manifesta parum intelliguntur, et mathematica maxime intelliguntur, et physica certum et firmum raro habent intellectum. Hoc enim contingit ideo, quod divina sua luce nostrum vincunt intellectum et reverberant : mathematica autem intellectui nostro proportionata in se, et intellectui et lumini intellectus permixta sunt : physica autem propter privationem et materiam et motum, ab intellectualitate cadunt : hinc est, quod divina sunt super intellectum, mathematica in intellectu, et physica sub intellectu esse dicuntur.

Ulterius autem est advertere ex dictis, qualiter habitus principiorum dicitur esse intellectus et habitus conclusionis scientia, et ipse decursus ex principiis in conclusionem dicitur ratiocinatio : quoniam plurimum intellectus lucis et formæ habent principia, propter quod a forma intellectus nominantur : sed minimum et quasi per aliud medium de lumine in-

tellectus habet conclusio, propter quod aliud sortitur vocabulum, et dicitur scientia quæ semper est effecta secundum quod est scientia, et numquam causans lumen in aliquo alio nisi ut principium accipiatur. Ratiocinatio autem dicitur collationem, et quasi directionem per se lucentis super alterum : et ideo tali nomine censetur ipse decursus principiorum in conclusiones.

Ulterius autem ex his advertere, quod quædam in quibus quasi eclipsatur lumen intellectus ab interpositione obscuritatis materiæ et privationis, et venit supra ea lumen umbrosum et obscurum, sicut est in his quæ probabilia esse dicuntur tantum, sed omnino occumbit in his quæ tantum sunt sensibilia, sicut in primo hujus scientiæ libro determinatum est. Et ex hoc advertere quare in probabilibus sunt argumentationes imperfectæ et conclusiones acceptæ cum formidine : probabilia enim neque sunt prima et vera quæ luce intelligentiæ sunt plena, neque ex veris sumunt fidem, sed sunt quæ communiter inveniuntur extrinsecus in rebus, in quibus est quasi quædam resultatio luminis intellectualis cum multa umbra causata a materia et privatione : et ideo universales in talibus non sunt veræ, aut non sunt immobilis veritatis : et cum omnis perfectio argumentationis et certitudo sit ab universali et immobili veritate, oportet in talibus et argumentationes imperfectas esse et incertas : quare nec bene concludunt, nec conclusio erit accepta sine magna formidine contradictionis. De opinione autem et dubitatione et ambiguo diximus in aliis libris : adhuc locus erit de eis aliquid dicendi in *philosophia prima*.

CAPUT III.

De diversitate intellectuum tam secundum se, quam secundum intelligibilia, quam etiam secundum facultatem intelligentium accepta.

Est autem intellectus diversitas quam multi Philosophorum posuerunt quantum ad ipsas partes animæ, quod est intellectus possibilis et intellectus agens, de quibus in libro de *Anima* dictum est. Tertius autem est, qui est formalis intellectus, quando scilicet forma sciti vel operandi per lucem intellectus est apud animam : et hoc dividitur in practicum et speculativum, de quibus etiam in tertio de *Anima* est expeditum. Hic enim formalis dividitur in intellectum simplicem et compositum. Et simplex quidem intelligentia incomplexorum : componitur autem intelligentia complexorum, aut per modum enuntiationis, aut etiam per modum syllogismi vel alterius speciei argumentationis. Et ille quidem qui compositus vocatur, dividitur in intellectum qui vocatur principiorum, qui secundum aliquid innatus est nobis, eo quod principia non ab alio principio accipimus, sed per scientiam terminorum, qui mox innascuntur nobis : et intellectum ex aliis acquisitum, qui apud Philosophos vocatur adeptus, eo quod est acquisitus per inventionem vel doctrinam et studium. Et ratio divisionum istarum ex istis patet nominibus.

Secundum autem facultatem naturæ intellectualis quæ est in hominibus, causatur quædam intellectus divisio, de qua quidam Philosophi faciunt mentionem, et præcipue Aristoteles et Avicenna, et quidam alii sequentes eos. Est enim quidam intellectus plus continuo et temporali, hoc est, imaginationi et sensui immixtus : quidam autem plus separatus : quidam vero medio modo : quidam vero et vires imaginandi et aliquid accipiendi per sensus non habens. Et primus quidem est obscurus nihil accipiens nisi cum labore : et si docetur aliquid, oportet quod fiat per exempla sensibilia : et tales sunt aut impossibiles ad intellectum per se manifestorum et divinorum quæ in prima philosophia traduntur, et vocantur illi mali ingenii existentes a vulgo.

Secundi autem quasi per se aut ex parva doctrina nati sunt intelligere omnia : quia agentem non habent tamquam potentiam animæ, vel quasi efficientem per abstractionem intelligibilia in anima, sed habent eum quasi pro forma, per quam anima intellectualis cuncta operatur : quia in libro de *Anima* felicitatem esse diximus, ad quam intendit pervenire omnis Philosophus, et hæc vocatur intellectus sanctus sive mundus ab Avicenna. Ab Aristotele autem dicitur intellectus divinus, et hic intellectus de studio ad levi prophetias accipit illuminationem, et ad somniorum verissimam interpretationem.

Medius autem est, qui juvatur doctrina faciliter ad intelligendum tam prophetica quam divina. Sed tertius juvari non potest aliqua ratione : quia neque separatus est, neque habet instrumenta quibus juvetur per operationem animæ sensibilis : et hoc aliquando est ex vitio complexionis, sicut in morionibus : aliquando autem consuetudine non attollendi ultra sensibilem acceptionem, sicut est in his qui vocantur idiotæ. Ex his patet qualiter qui longo tempore studuerunt circa particularia, sicut circa actus humanos, sicut student hi qui legibus intendunt, et

in his ipsis causas et rationes non quærunt,
inhabiles efficiuntur ad philosophiam.

In tantum ergo dictum sit de natura
intellectus, et de natura intelligibilis, et

de comparatione unius ad alterum, et
distinctione utriusque. Et sic est finis
primi libri.

DE INTELLECTU

ET INTELLIGIBILI.

LIBER SECUNDUS.

TRACTATUS UNICUS

DE PERFECTIOE NATURALI INTELLECTUS.

CAPUT I.

*Unde habet forma, quod sit in anima
intellectuali?*

Post hæc autem de perfectione animæ intellectualis videtur esse agendum. Ex perfectione namque natura cognoscitur intellectus. Non est autem nostra intentio agere de felicitate, quæ est ultima

perfectio intellectus animæ, sed potius de gradibus perfectionis intellectus, et ostendere qualiter seipsum intellectus invenit, et intelligentiam primam, si recta via procedat in accipiendo perfectiones ipsius. Oportet autem nos inchoare a formis perficientibus intellectum, et per illas ostendere qualis perfectio intellectus sit.

Dicimus ergo supponentes ex his quæ in ultima parte *primæ philosophiæ* demonstrantur, omnes formas ab intelligentia prima universaliter materiam ambiente dari materiæ : et ex hoc omnem formam quæ in materia est, esse mediam inter duo, intelligentiam videlicet a qua fluit sicut formæ artificiorum ex intellectu artificis, et materiam in qua est per esse quod dat materiæ. Intelligentia autem quæ indivisibilis est et simplex substantia et essentia, cum ipsa sit causa prima, est indivisibilis forma et simplex, et non una forma post aliam,

nec est determinata ad esse hoc vel illud in individuo : nec etiam prout est in intellectu primæ causæ comitatur oppositio et diversitas et temporalitas et compositio et materialitas et hujusmodi. In materia autem est secundum esse divisibile successivum materiale, et comitatur eam compositio et diversitas et compositio et divisio per numerum vel per naturam materiæ, et hujusmodi multa, sicut in libro de *Natura animæ* nos ostendimus.

Quæramus igitur, cum forma habeat fieri in anima intellectuali, utrum hæc habeat ab eo quod fluit ab intelligentia, aut ab eo quod habet esse a materia? Constat autem cum nihil materialium comitetur formam secundum quod est in anima, sed potius habeat multas illarum proprietatum et conditionum quæ comitantur eam in intellectu intelligentiæ, quod ex hoc quod est notitia quædam intelligentiæ habet fieri in anima.

Et hoc maxime patet triplici ratione : quarum quidem una jam inducta est : quoniam nos scimus formas in intellectu animæ sequi proprietates et conditiones intelligentiæ et non materiæ. Secunda autem ratio, quæ formalior est : quia nos scimus ex his quæ in libro de *Anima* determinata sunt, quia forma non fit in anima nisi per hoc quod separatur a materia, et liberatur a materiæ conditionibus. Materiæ autem conditiones sunt ea quæ sequuntur prout est in esse materiali, et hæc sunt differentia loci et temporis, et oppositio, et compositio, et hujusmodi : liberari autem formam ab hujusmodi casibus est accipere eam prout est in lumine intelligentiæ. Patet ergo ab origine unde fluit forma, et hæc habet quod sit in intellectu animæ. Tertia ratio quæ efficacissima est, hæc est, quod ex quo forma in potentia est in anima et non in effectu, non efficitur in anima nisi actu alicujus agentis. Cum ergo hoc agens non sit aliquod eorum quæ sunt in materia, sed potius lumen intelligentiæ, non efficitur anima recipiens formam nisi per lumen intelligen-

tiæ. Quod autem forma sit in simplici intelligentiæ lumine, non habet a materia : quia antequam fuisset in materia, fuit in lumine : igitur quod forma efficitur in anima, non habet a materia, sed ab intelligentia : et hoc quidem est necessarium : quoniam sicut color non habet a colorato corpore quod efficitur in visu, sed ab actu lucidi quod secundum effectum est lucidum : ita forma non habet a materia quod efficiatur in anima, sed ab actu intelligentiæ agentis, qui secundum effectum intelligentia agens est. Et in hoc deprehenditur error dicentium formam esse in anima secundum esse individuum : quoniam illa individuum habet a materia, et non a lumine intelligentiæ in quo est forma secundum suæ originis naturalitatem : et sicut ad esse in materia indiget generantibus et alterantibus quæ tangunt cum transmutant materiam : ita ad esse in anima non indiget nisi lumine intelligentiæ agentis, quod fluit in animam, et esse intellectuale formarum generat in anima. Hæc autem primi Philosophi est determinare.

CAPUT II.

*Quare formæ fluunt ab intelligentia secundum quod ipsa forma mundi est ?
Et ex hoc habetur quod fiunt in anima.*

Si autem quærat qualiter intelligentia prima agens attingit animam, et qualiter attingit materiam in qua sunt formæ? Adhuc autem qualiter exeunt formæ ab ipsa in animam? Adhuc licet primi Philosophi sit determinare, tamen propter doctrinæ facilitatem hic breviter transeundo dicimus, quod quælibet intelligentia agens ambit lumine suo omne illud et totum, cui sicut materiæ et sicut ei quod movetur, ab ipsa supponitur.

Et hujus quidem exemplum est in semine hominis. Id enim quod operatur in semine hominis, non potest esse natura, cum non unum unius formæ et figuræ operetur, sed valde diversa tam in similibus membris quam in dissimilibus et officialibus: operans enim in semine est anima, non ut est endelechia corporis, sed ut artifex qui est virtus formativa, qui est in spiritu qui inter viscositatem seminis continetur et ambit totam materiam corporis intra virtutem et lumen suum: et formæ quas influit, non sunt in eo ut habitus quidam accidentaliter, imo sunt in eo hoc quod est ipse, qui licet unus sit in substantia, tamen multiplex est in virtute et sine medio aliquo a loco uno cordis fluit in omnia, et impri-

mit formas et informat omnia instrumentaliter agentia sub ipso, quæ sunt calidum et humidum et siccum et frigidum.

Sic oportet imaginari, quod virtus intelligentiæ supponitur his quæ movet, et ambit ea, et influit eis formas quæ sunt hoc quod ipsa est et non acquisitæ in ea, et continet omnia in lumine suo: quoniam sine medio jungitur omnibus his in quæ agit: et hoc lumen jungitur animæ, et jungitur formis in anima existentibus, et sub actu hujus luminis formæ movent animam, sicut sub actu lucis exterioris colores movent visum. Ab intelligentia autem prima descendunt hujusmodi formæ, et quo magis ab ipsa, eo magis efficiuntur materiales et ignobiles, ita quod ultima in descensu est forma elementalis et infima elementi quod est terra, quod esse dicitur fæx elementorum: et est descensus per modum compositionis formæ cum rebus in quibus sunt formæ, et est quasi moveantur formæ ab intelligentia ad materias in quibus sunt non in toto amittentes lumen intelligentiæ quamdiu formæ sunt. Et hoc est per contrarium in anima: quoniam anima cum sit forma quædam juncta materiæ, non potest accipere formas nisi incipiendo a materia quæ proxima est ei. Non igitur accipit nisi per resolutionem a materia, et continue procedit resolvendo donec veniat in causam primam: et ibi est ultimum perfectionis ipsius et finis intellectus. Et hujus iterum simile est in motu luminis a sole in colorata, et reditu colorum in perspicuum et in visum speculum animati, quod est oculus.

Quæreret autem fortasse aliquis, unde habeat intelligentia formas quas ut fons omni tempore exuberat in totum universitatis ordinem? Sed ad hoc, sicut jam diximus, non est difficile respondere: quæreret enim unde intelligentia alicujus ordinis habeat formas quas exuberat, idem est quæreret, unde habeat intelligentia, et quod est intelligentia? quia,

sicut jam diximus, sicut soli ex lumine sibi substantiali fontaliter convenit lucem emittē in mundum, ita et multo magis intelligentiæ agentis et maxime causæ primæ ex lumine suæ substantiæ convenit lucem emittē, quæ sunt formæ omnium eorum quæ formantur. Et sic animæ in suum universum membrorum convenit vitam emittē, quæ tamen vitæ secundum opera vitæ specialia determinantur in membrum, licet in anima sint omnes illæ vitæ una vita indivisibilis in substantia multiplex secundum virtutem : ita intelligentiæ primæ convenit lucem emittē in totum universum. Et ideo subtiliores Peripateticorum distinxerunt inter formas mundi et formas materiæ, formas mundi vocantes universaliter relatas ad universum, formas autem materiæ dicentes eas quæ sunt dantes esse materiæ. Formæ igitur mundi sunt ab intelligentia ex hoc quod ipsa est intelligentia, et quando fiunt in anima, fiunt magis in anima ex parte illa qua fluunt a forma mundi, quam ex parte illa qua per esse sunt in materia.

CAPUT III.

Qualiter intellectus agens in anima est sicut lux et sicut ars, et ideo est perfectus agens perfectiones ?

His quasi per modum prælibationis excussis, oportet nos determinare qualiter intellectus agens, sicut lux sit ad materiam comparata : his enim duobus bene explanatis melius sciatur modus perfectionis animæ humanæ.

Dicamus igitur cum dicitur quod intellectus agens est sicut lux, tria in ipsa attenduntur similitudine, quorum et primum est, quod sit primum agens esse intellectuale. Secundum est quod est universaliter agens intellectuale. Tertium autem quod est incessanter agens esse intelligibile. Et unumquodque istorum quædam alia sequuntur, quod qualiter sit verum, sic probatur. In omni enim universo in quo sunt quædam sicut acta tantum, quædam autem sicut acta et agentia, necesse est esse unum primum quod est agens tantum. Esse autem intellectuale est in omnibus quæ sunt intellectus et ratio eorum quæ intelliguntur. Esse ergo intellectuale est in omnibus intelligibilibus. Omne autem intelligibile quod intelligitur non nisi per formam suam, vel per seipsum, si forma est, intelligitur. Et constat quod hic intellectus sive intelligibile esse, ita est factum, quod ulterius non confert ad esse intelligibile præter seipsum : hoc autem totum

sub anima hominis est per hoc quod ipsa est imago formæ mundi, et non tantum forma materiæ. Est autem in anima in via cognitionis multa accipere phantasmata et facta secundum sensum, ad quæ reflectitur in his quæ intelliguntur concepta cum materia, et secundum imaginationem reflectitur intellectus secundum ea quæ intelliguntur mathematice et ad intellectum possibilem.

Oportet ergo quod in hoc ordine universi recurratur ad unum agens primum quod est primum agens esse intelligibile : non enim solum in universitatem omnium recurritur ad primum, sed in quolibet ordine uno necesse est esse primum in quo est status illius ordinis : et hæc est causa, quod in libro de *Anima* diximus in ipsa anima esse duas differentias universaliter agentis quo est omnia facere, et universaliter possibilis quo est omnia fieri : et per istam rationis necessitatem arguuntur falsitates illorum qui in anima dicunt nullum esse intellectum agentem. Isti enim non consentiunt Philosophis qui licet dicant intelligentias quæ sunt formæ mundi, irradiare super intellectum animæ humanæ, non tamen negant in ipsis animabus esse intellectum agentem universitati suorum intellectualium proportionatum. Aliter enim homo non perfecte esset minor mundus, nec esset imago formæ mundi : quæ tamen inconvenientissima scit esse omnis qui recte philosophatur. Per hunc ergo mundum quo universitas corporalium habet unum primum agens in his quæ faciunt et fiunt usque ad ultimum factum, quod est lux solis, super quam irradiat lux agentis primi intellectus : et nisi irradiaret super ipsum, lux solis non esset effectiva formarum corporalium. Ita est in quolibet universo : oportet etiam ita in anima hominis esse secundum multitudinem et universitatem intellectualis esse quod fit in ipsa et in intellectu ipsius. Jam autem facile est ostendere, quod agens est in eo sicut lux : quia est universaliter agens : sicut enim lux in-

fluit universaliter super omnia quæ sunt activa et passiva in materia, ita necesse est primum agens universaliter agendi formam et actum omnibus influere. In *prima* enim *philosophia* probavimus, quod omnis actus primi agentis per hoc universalis et finiens est : quia stat inter quoddam primum et quoddam ultimum per omnia extendens media. Esse autem quod a primo per omnia media pertingit usque ad ultimum, universaliter agit. Constat igitur primum agens in intellectualibus universaliter agere : aliter enim efficientia non starent.

Ex hoc patet, quod agens intellectus universaliter agit universalitatis ordine intelligibilium quæ sibi subjungitur. Ex his etiam concluditur, quod incessanter agit : non enim est primum agens nisi per hoc quod per essentiam agit, sicut lux per essentiam lucet : quod autem per essentiam agit aliquam actionem, semper agit eam et incessanter : intellectus agens semper incessanter agit. Et hæc veteres Philosophi intenderunt, cum dixerunt quod sit simplex, et quod essentialiter agit, et quod indivisæ sint intelligentiæ in ipso, et quod omnes in ipso sunt sua substantia et vita ex lux sua. Ex hoc autem quod universaliter agit, sequitur ipsum esse formam omnium intelligibilium, quæ tamen forma in unoquoque intellectu est secundum potestatem illius quod intellectuale esse participat, et non secundum potestatem primi agentis : et quod ipse est semen omnis intelligibilitatis, et quod sub actu suo omne intelligibile movet animam.

Et ideo nulla est quæstio eorum qui quærunt, quomodo formæ rerum possunt agere in animam, cum anima nobilior et altior sit illis : et id quod est nobilium et altius, potius agere videatur in id quod est sub ipso, quam quod recipiat ab ipso et patiat. Et est quæstio imperitorum in naturalibus. Formæ enim exteriorum non agunt nisi prout sunt intellectus quidam, et agunt sub lumine intelligentiæ agentis quod est in ipsis, et sic agere

possunt in possibilem intellectum. Patet etiam ex hoc quod cum inter omne agens et patiens debet esse communicatio, quæ communicatio est inter agentem et formam et possibilem intellectum. Et quod ipsa forma stans universaliter in lumine universaliter agentis, est agens quod proprie habet inferre passionem intellectui possibili. Ex hoc autem quod est agens essentialiter et incessanter, consequuntur ipsum sua acta per hoc quod in ipsa necessaria et stantia et quoad hoc æterna quod sunt immutabilia : hoc enim modo æterna dicuntur quæcumque Philosophi æterna vocant : et sic scientia est necessaria et æterna quæ est de huiusmodi formis.

Et hoc multi Stoicorum ignoraverunt : et ideo alias formas quam illas quæ in rebus sunt posuerunt : hic autem intellectus agens comparatur arti, et est comparatio quæ essentialiter convenit ei secundum quod præhabet in seipso omnia intellecta. Non autem hoc intelligitur de arte mechanica, quæ diversa est a mente artificis, et est scientia quædam operativa factorum cum ratione : sed intelligitur de arte naturali, quam omnis forma etiam corporea dicitur imitari : dicimus enim in *Physicis* in semine sive spiritu seminali esse animam ut artificem, quæ omnia cum ratione certa et infallibiliter operatur : cum tamen hæc ars non sit scientia quædam ab ipsa substantia formativæ virtutis : sed sicut ipsa prout in se formativa virtus habet omnium membrorum virtutes illas quibus operatur ad vitæ potentias universali ratione et cum certa finis intentione et ratione formæ. Et sicut est particulariter in semine, ita est universaliter in luce agentis intellectus respectu universitatis totius ordinis sibi subjectæ materiæ : ipsa enim lux sua scientia est, et sua ars est certa ratione omnia ad esse intelligentis producens, et omnia construere faciens in intellectu possibili. Ex his constat intellectum agentem esse perfectum, et supra perfectum perfectiones omnes habentem

et largientem omni ei quod secundum esse intellectuale perficitur.

Hæc autem conjuncta his quæ jam in anteriori hujus scientiæ libro diximus, et his quæ in tertio libro nostro de *Anima* dicta sunt, verum ostendunt intellectum agentem : omnia tamen hæc plenissime intelliguntur ex scientia *philosophiæ primæ* : quia ista in veritate pura scientiæ naturalis transcendunt.

CAPUT IV.

Qualiter intellectus possibilis sit potentia, et ut tabula rasa, et ut locus et ut species intelligibilium?

Dicamus autem nunc de perfectione intellectus possibilis. Huic autem quatuor attribuuntur a Philosophis, quorum unum est, quod ipse idem indivisibilis substantiæ existens potentia est omnia intelligibilia. Secundum est, quod se habet ad omnia intelligibilia sicut tabula rasa in qua non exigetur aliqua præparatio, quod imago sit in ipsa. Tertium autem est, quod ipse est potius locus intelligibilium quam materia. Quartum autem est species intelligibilium, sicut est sensus sensibilium species. Et de omnibus his necesse est determinare, licet sit valde difficile : sine his enim impossibile est scire animæ perfectionem.

Cum ergo intellectus possibilis dicitur quo est omnia fieri intelligibilia, intelligitur quod ipse in potentia sit omne intelligibile unus et idem indivisus et sim-

plex secundum suam substantiam : et ideo sua potentia qua fit intelligibilia, non est univoca ad potentiam materiæ quæ non est susceptibilis omnium una et indivisibilis existens, sed potius secundum sui divisionem in multa. Et cum dicitur quod in intellectu possibili in eo quod possibilis est, contingit omnia fieri, non intelligitur quod omnia sit sicut materia : non enim materia fit forma. Et cum dicitur quod possibilis intellectus sit omnia intellecta, intelligitur quod sit forma illa per quemdam modum.

Et hujusmodi simile dixit jam ante nos Alfarabius, quod est imaginandum, quod sicut cera intelligatur vel imaginetur tota transire in figuram sigilli, ita quod nihil ejus distinguetur ab ipsa figura sigilli : hoc tamen simile ego non omnino conveniens reputo. Sed ponam aliud quod est per omnia conveniens. Si enim colorem simplicem formam intelligamus, et potentiam perspicuum, per quam ipsum perspicuum est illius susceptibile : ita enim in potentia non distinguitur a suscepto in hoc quod unum sit subjectum et alterum forma : tunc sunt æquæ naturæ perspicuum suscipiens et color susceptus : color enim non differt a perspicuo secundum naturam, sed secundum esse quod est diversis unius naturæ et ejusdem. Unde perspicuum suscipiens lumen in profundum, est suscipiens perspicuum : et perspicuum in extremo participans actum luminis, est color : et planum est videre cujuslibet, quod illæ naturæ si sunt diversæ, sed esse perspicui in uno et in alio diversum est : et per unum et eundem modum ejusdem naturæ per diversum esse est susceptibile quod est oculus perspicui : ergo extremitas quæ est color si sumatur secundum esse spirituale quo est in medio, non est in perspicuo pervio, nec in perspicuo animato quod est oculus : sed sunt sic duæ naturæ distinctæ : et ideo non in eis proprie loquendo sicut in subjecto, sed potius sicut in re quæ est ejusdem naturæ diversitate secundum triplex

esse lucidi terminati, pervii, et animati.

Et per omnem eundem modum in corporibus ejusdem naturæ sunt lumen intelligentiæ terminatum quod est simplex forma rerum separata a materia, et lumen ejusdem quod est intellectus possibilis, sicut pervium quoddam, et lumen ejus in seipso simpliciter acceptum. Ex hoc enim quod intellectus possibilis ad corpus accedit, efficitur distans a lumine intelligentiæ, sicut perspicuum in aere distat a natura luminosi in seipso. Patet autem ex his, quod eadem forma est in possibili intellectu et in materia : sed ab intellectu nullam accipit individuationem. Et etiam, quod in omnibus talibus intelligens intellectus et forma intellecta idem sunt actu per esse habentia differentiam, sicut perspicuum in loco in quo est color abstractus, idem est actu cum natura coloris per esse differens, quod esse importatur per distinctionem utriusque, et quod intellectus possibilis non est materia, sed forma. Hoc ignoravit Theophrastus.

Tabulæ autem rasæ comparatur per hoc quod sicut tabula præter omnem præparationem se alterantem susceptibilis est figuræ : sic intellectus possibilis præter omnem præparationem separatam susceptibilis non est unius tantum, sed omnis intelligibilis. Et per hoc iterum patet, quod non est materiæ potentia ipsius : rasura enim tabulæ non est materia, sed potius sicut perspicuum una et eadem potentia luminis est coloris omnis susceptibilis, ita idem intellectus una et eadem potentia luminis agentis quod in ipso est, susceptibilis est omnis formæ intelligibilis : et ideo nullo modo potest esse forma corporalis : quia hanc impossibile est habere potentiam unam ad omnem formam suscipiendam : sed potius sicut tabula rasa est imago si solum suæ superficiæ addatur terminationis actio, ita ipsa intellectualitas animæ secundum possibilem intellectum est in ista secundum esse quod habet in intellectu, si addatur terminationis actio quæ

est rei terminus cuius ipsum est forma. Et sic iterum patet qualiter intelligens et intellectum sunt idem actu secundum esse differentia. Hæc autem quæ sunt dicta, nullo modo conveniunt materiæ.

Inter omnes autem comparationes magis apta est quæ est loci. Loci enim omnino eadem differentia est quæ est locati, et a locato accipit figuram, et exhibet continentiam, et est motus naturalis locati ad ipsum, et quies naturalis in eo : sicut enim in IV de *Physico auditu* est determinatum, eadem est distantia cubi et loci : cubi etiamsi lineæ protrahantur a centro loci ad superficiem, erunt eadem lineæ numero loci et locati : et hoc modo eadem natura est intellectuality in intellectu possibili, et in eo quod intelligitur secundum esse intellectuale, nisi quod limitibus ejus quod intelligitur ipse intellectus formatur, sicut locus figuratur ad locati figuram : et ejus quod intelligitur, quando sub actu luminis est intellectus agentis, motus naturalis est ad intellectum, sicut motus colorum : quia est ab actu lucis ad perspicuum per eandem naturam : quies enim naturalis est in ipso.

Quarta autem comparatio est, quod intellectus possibilis est species intellectorum, sicut sensus est species sensibilibium. Constat enim, quod perspicuum pervium est species et forma formæ intellectæ per esse quod habet in intellectu, et confert ei esse universale et simplex quod non habuit in materia. In his enim quæ incorporalia sunt, id quod est natura simplex, est species et forma ejusdem naturæ determinatæ, sicut sensus communis formalis est ad sensus proprios et determinatos.

Ex omnibus igitur hujusmodi comparationibus, patet quod sit perfectio intellectus possibilis secundum quod est possibilis.

CAPUT V.

De intellectu formali, et qualiter per ipsum perficiatur intellectus possibilis ?

His autem habitis, videndum est de perfectione ejus intellectus quem subtilissimi Peripateticorum *formalem* vocaverunt intellectum : eo quod ipse est forma omnis intellectus secundum esse quod habet intelligibile. Hic autem formalis intellectus, non est ille quem quidam formam rei intellectivam arbitrantur : quia, sicut jam ostensum est, ille non est formalis ad intellectum possibilem : eo quod species est possibilis intellectus talium specierum et locus, et omne formale esse potius accipit id quod intelligitur ab intellectu in quo est, quam quod det sibi esse formale, sicut species et locus formalia sunt ad ea ad quæ comparantur : sed sicut in coloribus lumen est formalis hypostasis et perspicui et pervii et oculi et perspicui terminati, ita lumen quod est actus intellectus agentis, est forma et intellectus possibilis et ejus quod intelligitur : hæc enim duo quantum ad esse intellectuale unius sunt naturæ et potentiæ, sicut patet per ante dicta. Et quia sunt unius potentiæ, sunt etiam unius perfectionis secundum formam : sicut etiam color et pervium tenebrosus unius : et ideo una forma agentis utrumque perficit : lumen ergo agentis est, quod formam rei quæ intel-

ligitur, ducit de potentia in actum, et quod possibile ducit in actum. Et sicut in colore viso videtur lumen quod de potentia coloris facit actu colorem, eo quod nihil aliud agit in visum nisi illud sit terminatum, et quasi sit luce incorporatum : ita in quolibet eo quod intelligitur de omnibus intelligibilibus, non intelligitur nisi lumen intellectus agentis, licet in aliquo intelligatur incorporatum in materia sensibili, et in aliquo intelligatur incorporatum in quantitate imaginabili, et in aliquo intelligatur clarum in esse simplici intellectuali : sicut lumen quod est colorum hypostasis, et in aliquo videtur candens, sicut in albo, et in aliquo submersum, et in aliquo fere extinctum, sicut in nigro.

Patet igitur ex dictis, quod intellectus possibilis in actu efficitur per lumen intellectus agentis, et quod in omni eo quod intelligit, hoc intelligit : et quando etiam seipsum intelligit in actu, se intelligit in lumine agentis. Ex inductis etiam ulterius ostenditur, quod cum lumen agentis secundum esse quod habet in intellectu possibili, et eo quod intelligit sic quo intelligitur omne quod et quo intelligit omne id quod intelligit : sicut lumen solis quo videtur id quod videtur, et quo videt illud quod videt. Quo autem intelligitur id quod intelligitur, et quo intelligit id quod intelligit, maxime intelligitur in omni intellectu secundum actum facto : eo quod illud est causa et ratio intelligendi lumen intellectus agentis, est maxime id quod intelligitur intellectu secundum actum facto.

Amplius cum lumen illud sit manifestatio intellectus agentis facti secundum proportionem ejus quod recipit lumen, patet quod intellectus agens manifestatur in quolibet intellectu secundum actum facto.

Amplius cum lumen, id est manifestatio sui et perspicui pervii, ostensum est quod lumen agentis est in intellectu possibili pervio, concluditur necessario quod intellectus possibilis invenit et intel-

ligit se in quolibet intellectu secundum actum facto, et quod seipsum intelligit quando id quod intelligit in qualibet re intelligibili intelligit, et quod suum intelligere est ipsum in actu esse. Et ideo dixerunt quod intellectus possibilis, et id quod intelligitur ab ipso, et suum intelligere, est unum et idem ratione differens secundum esse. Supra enim ostensum est, quod intellectus et id quod intelligitur actu, sunt idem : et cum suum intelligere non sit nisi actu esse, videtur alicui forte quod etiam ipsum intelligere sit idem cum ipso secundum substantiam : et hoc quidem est verum secundum quod intelligere dicit apud se intelligere : secundum autem quod dicit intelligere in agere esse intelligere, est super intelligibile converti et considerare, et sic penitus non est idem.

Ex omnibus autem inductis patet quod intellectus in homine tribus in genere perficitur, agente videlicet, et forma agentis in possibili intellectu, qui est locus intelligibilium et formalis intellectus. Patet etiam qualiter in omni intellectu secundum actum facto intelligitur possibilis intellectus et agens.

CAPUT VI.

De intellectu in effectu, et qualiter possibilis in effectu perficitur?

Nunc ergo restat inquirere de eo intellectu qui *intellectus in effectu* vocatur: hic enim etiam dicitur intellectus in effectu, eo quod in effectu efficitur potentia intellectus. Est autem hic intellectus qui est forma intellecta, quæ est separata a rebus: hanc enim diximus esse in potentia respectu intellectus agentis, et quando actu luminis ejus movetur ad intellectum possibilem, efficitur intellectus in effectu. Adhuc autem et ipse possibilis est in potentia antequam hæc forma efficiatur in ipso: et cum efficitur in ipso, est intellectus in effectu: et illæ potentia non sunt omnino unius rationis, nec sunt diversarum rationum.

Et quod non sunt penitus diversarum rationum, patet per ante dicta. Quod autem non sunt penitus unius modi et rationis, ostenditur sic. Intelligibile enim non dicitur in potentia nisi per esse quod habet in materia in qua ligatum est lumen agentis intelligentiæ, sicut lumen oculorum in tenebris: et hæc est potentia privationis cujusdam. Cum autem dicitur intellectus possibilis in potentia, non est in ea ligatum lumen, sed potius ligatum est in eo quod deberet movere ipsum et distinguere: et sic intellectus eodem agente educitur ad actum de po-

tentia, quo educitur ad actum intelligibile.

Et in hoc videtur peccare Alfarabius et quidam alii dicentes intellectum possibilem abstrahere formas: non enim æquæ potentia est abstrahere formas, et abstractas recipere quocumque modo recipiantur, sive per modum materiae, sive per modum loci: sed potius agentis per se est abstrahere, in cujus lumine est esse abstrahi: et sicut generans in natura conferendo formam dat ea quæ formam sequuntur, quæ præcipue sunt motus et locus: ita generans omnino formaliter in corporalibus dando esse sui luminis, dat consequentia id, quæ sunt motus ad intellectum possibilem et locum qui est intellectus possibilis, sicut in ante habitis dictum est. Sic igitur est de intellectu in effectu.

Sicut ergo colore eodem agente colores omnes fiunt in effectu, et facti in effectu, faciunt in effectu perspicuum et visum: ita formæ rerum uno lumine agentis fiunt in effectu, et factæ in effectu, faciunt in effectu possibilem intellectum sine medio. Et sicut visus quo fuerit clarior, eo clarius percipit in colore lumen candescens: ita intellectus possibilis quo fuerit a corpore sive carne separabilior, eo magis percipit lumen intellectus agentis diffusum in formam rei intelligibilis.

Istud tamen intelligibile in libro tertio de *Anima* sub triplici differentia esse diximus. Est enim conceptum cum materia secundum esse et rationem, et conceptum cum materia sensibili secundum esse et non secundum rationem, licet secundum rationem conceptum sit in quantitate, et est separatum a materia sensibili et quantitate et secundum esse et secundum rationem. Et hæc divisio intelligibilis est accepta secundum esse luminis intelligentiæ agentis, quod habet in rebus quibus dat esse et rationem. Si enim hic accipiatur diffusum in principii esse et substantiæ, tantum diffinitionem habet secundum illud esse non concep-

tam cum quantitate et qualitate sensibili: quoniam substantiæ esse est ante quantitatem et qualitatem. Si autem accipiatur secundum esse quod habet immersum principiis corporum secundum quod est corpus, habebit rationem conceptam cum principiis quantitatis. Et si accipiatur ut immersum quantitati et motui, habebit rationem conceptam cum materia sensibili. Et sicut diximus, quod intellectus noster plus conjungitur imaginationi et sensui quam intellectui primo agenti, ideo obscurus est, et ad ea quæ sunt separatæ penitus rationis, habet se sicut oculus vespertilionis ad lumen solis: et ideo prius est imbuendus in physicis, et deinde mathematicis, ut sic confortatus multis luminibus multorum intelligibilium, consurgat ad intellectum divinorum. In omnibus tamen istis intelligibilibus, cum ille fuerit in effectu quodlibet illorum, invenit seipsum et agentem per modum quem supra diximus. Licet autem ex obligatione corporis sit physicis et mathematicis propinquior, tamen divinis est per naturam similior: et ideo plus sui in his intelligibilibus invenit quæ divina sunt, quam in eis quæ mathematica sunt et physica.

Adhuc autem videtur, quod cum id quod est in potentia cognoscens, nihil penitus cognoscat, quod intellectus, nisi in effectu efficiatur, nihil penitus cognoscat: et ex hoc sequitur, quod nihil penitus scit qui philosophiæ non studet: nec enim scit se, nec aliquid aliud a se: sicut oculus in potentia existens, nihil penitus videt, quando per nihil visibillum sit in effectu: est enim in corpore visus, sicut in anima est intellectus. Si enim oculus per nullum visibillum sit in effectu, neque videt se, neque aliud, neque videt se non videre: quia impossibile est videre se non videre, sicut impossibile est videre nihil: ita etiam quamdiu intellectus in potentia est, et nullo modo in effectu, impossibile est scire aliud a se, vel seipsum, vel etiam scire se nescire: si vere et secundum

propriam rationem scire secundum intellectum accipiatur. Et ideo antiquissimos idiotas Hermes increpans, dixit « tales nulli humanorum in vita operam dedisse, sed more porcorum vitam expendisse. »

Est autem hujus exemplum et in perspicuo, cui in multis similis est intellectus possibilis: hujus enim nulla manifestatio est quamdiu est in potentia: sed cum est in effectu et actu esse perspicuum, manifestatur tunc per hoc quod manifestatur id quod videtur in ipso. Et hæc ratio convincit, quod homo numquam invenit seipsum, nisi contemplatione veritatis rerum: sed hæc sequentia declarabunt magis.

CAPUT VII.

De intellectu principiorum et instrumentorum per quæ intellectus possibilis efficitur in actu.

Oportet autem nos prius ostendere, quod in omni intellectu qui in effectu est, primo accipitur intellectus principiorum quæ accipiuntur sicut in priori istius scientiæ libro ostendimus, scilicet in quantum terminos noscimus. Principiorum igitur est acceptio prima et instrumentorum. *Instrumenta* autem voco quibus scientia rerum de ipsis educitur principiis: et ista sunt modi argumentationum. Propter quod egregie dixit Aristoteles, quod modum scientiarum oportet præscire ante ipsas scientias: quia non

potest esse quod scientia rerum accipiat nisi prius sciatur modus ipsius : vocat enim modum illum quo id quod est in virtute principiorum, educitur de ipsis : et tunc per illa duo, videlicet principia prima et scitum modum, possibilis intellectus aptissime ponitur in effectu secundum omne id quod est possibilis.

Fuerunt autem quidam ante nos de Arabum Philosophis, qui intellectum principiorum dividerunt in duo, dicentes principia philosophiæ theoreticæ essentialis esse apud nos, et non accipi ita per doctrinam : rhetoricorum autem et moralium fieri in nobis per longam experientiam, sicut diximus homines senes prudentiæ longam operam dantes esse intelligentes, ita quod consilium datum ab ipsis recipitur sine exigentia probationis tamquam sit per se notum : hoc fit etiam in rhetoricis civilibus : et hunc intellectum non habent juvenes passionum insecutores. In disciplinalibus meliorem intellectum videntur plerumque juvenes habere quam senes.

Similiter autem dicunt de modis argumentationum, quoniam est modus argumentationis imperfectæ : et hac omnes utuntur homines : omnis qui persuadere nititur, necesse est quod modo argumentationis utatur : et hic modus præcipue est in rhetoricis civilibus. Est autem modus argumentationis perfectæ, quo utuntur Philosophi. Primum dicunt innasci experientia et tempore potius quam studio. Sic igitur diversificant hunc intellectum qui principiorum vocatur intellectus, per quem intellectus in potentia, sicut per instrumenta efficitur intellectus in effectu. Ego commendo istam distinctionem : quia rhetorica et civilia non habent propositiones primas per se notas per quas sufficienter accipiantur : et ideo dicit Aristoteles quod in talibus conclusio opus est, eo quod finis practicæ scientiæ opus est.

Et quod quidam Latinorum dicunt, quod de scientia docente et de scientia utente, locum non habet hoc : quia

scientia docens semper est demonstrativa, et ex tali scientia rhetores et civiles non veniunt ad hoc quod in effectu sciunt gubernare judicia et regere civilia : propter quod etiam intellectus talis virtus est ethica experimento indigens et ipse, sicut et aliæ virtutes civiles quæ per eundem modum accipiuntur.

Hæc ergo de intellectu qui in effectu dicitur esse, dicta sint a nobis. Per antecedentia enim jam manifestum est qualiter forma rei per hoc quod est in intellectu possibili, efficitur in effectu intellectus, et qualiter differt ab eo in intellectu qui dicitur in actu : ille enim qui semper est in actu, agens vocatur intellectus.

CAPUT VIII.

De intellectu adepto, qualiter in eo anima perficitur, et per studium invenit seipsum ?

Jam autem relinquitur ut de *intellectu adepto* per studium disseramus, qualiter et ipse est de hominis perfectione : hoc autem congruentius fit si ipsam perspicimus nominis rationem. Sicut igitur in priori istius scientiæ libro diximus, adeptus est qui acquiritur per studium. Adeptus igitur intellectus est, quando per studium aliquis verum et proprium suum adipiscitur intellectum, quasi totius laboris utilitatem et fructum.

Hoc autem qualiter fiat, sic est acci-

piendum¹ : sicut enim jam ante diximus, id quod est in potentia, non manifestatur, nec acquiritur, nisi per actum suum proprium : et per id quod in effectu efficitur, in parte quidem accipitur, quod partem possibilitatis ejus ponit in effectu, et plus et plus accipitur, quando plus et plus per multa ponitur in effectu : et totum autem accipitur, quando per omnia ad quæ in potentia est, penitus fuerit in effectu. Diximus autem in *Phycicis*, quod intellectus possibilis unus et indivisus secundum potentiam existens, potentia est omnia intelligibilia : non ergo accipitur nisi per hoc quod efficiuntur ipsa intelligibilia in effectu, et totus adeptus et acceptus, quando in effectu positus est omnium intelligibilium quæ ipse est in potentia : et sic adipiscitur homo suum proprium intellectum.

Et ideo dixit Plato, quod verissima philosophiæ diffinitio est suiipsius cognitio : et dixit Alfarabius, quod anima posita est in corpore, ut seipsam inveniat et cognoscat : et hoc dicit Aristotelem dixisse : sed ubi dixit, ad me non pervenit. Demonstratio autem dicti vera est, quæ nunc est inducta. Causa autem hujusmodi est, quod prima imago lucis primæ causæ quæ conjuncta est continuo et tempori, est intellectus humanus : et ideo necesse est quod sit similitudo quædam omnium quæ fiunt per lumen primæ causæ, et ambiens omnia illa, et fit quorundam receptaculum per hoc quod est imago causæ primæ, et quorundam secundum quod est cum continuo et tempore, et in utrisque adipiscatur seipsam : hoc etiam quod omne verum consentaneum est intellectui, et falsum contrarium. Est enim mens humana ratio et similitudo quædam veritatis primæ quæ est semen quoddam omnis veritatis : et ideo similis per aliquem modum omnino vero, et dissonans a falso : et hæc est

causa, quod intellectus semper verorum est : deceptio autem et falsitas ingeruntur phantasticæ virtuti.

Scitur autem ex hoc quod contemplatio verorum admirabilium est summæ delectationis et naturalissimum, et quod in ea tota refloret natura hominis in quantum est homo, et præcipue contemplatione divinorum : eo quod secundum prædicta in illis maxime intellectus invenit se secundum naturam propriam, eo quod homo in quantum homo solus est intellectus. Hoc autem modo quo diximus in vero est et in bono. Est enim imago primi boni per idem quod est imago primi veri. Et ideo verum bonum quod est semper et ubique bonum et omni naturale bonum, est sibi connaturale bonum : et huic delectatur et gaudet ad ipsum, licet retrahatur a bono ut nunc per hoc quod continuo et tempori est conjunctus : et ex hoc tamen quod separatus est, nullius corporis actus, solus connaturale habet et verum simpliciter, et solus habet delectationes non habentes contrarium in corruptione boni et veri.

Quæreret autem fortasse aliquis, si intellectus possibilis in effectu efficitur per formam intelligibilem, et quod est in effectu, non est in potentia, qualiter in effectu existens ad unum, remanet secundum eundem intellectum in potentia ad alterum intelligibile ? Sed ad hoc et hujusmodi omnia jam patet solutio per ante dicta : quoniam diximus quod oppositio et disparatio et diversitas et hujusmodi non consequuntur formas nisi per hoc quod sunt in materia : sed secundum quod sunt in lumine agentis, simplices sunt, indivisibiles, et unitæ, eo quod sunt unum et idem in causa prima : et ideo in lumine suo sunt unitæ sibi invicem non cedentes, nec se invicem excludentes : et præcipue quia non sunt in

¹ Idem habet Averroes, III de Anima, com.

intellectu sicut in materia, vel subjecto proprie loquendo.

Ex his igitur patet qualiter per studium intellectus adipiscitur seipsum : et ex hoc patet verus intellectus ejus quod in septimo *Physicorum*¹ diximus, quod intellectus accipiens scientiam et veritatem, non est alteratus et perfectus.

CAPUT IX.

De intellectu assimilativo, et qualiter anima perficitur in illo?

Dicamus autem nunc de intellectu quem antiquissimi Philosophorum *assimilativum* sive assimilantem vocant, et in hoc etiam animæ perfectionem declaremus : hæc autem oritur ex omnibus intellectibus inductis.

Est autem intellectus assimilativus, in quo homo quantum possibile sive fas est proportionabiliter surgit ad intellectum divinum, qui est lumen et causa omnium. Fit autem hoc cum per omnia in effectu factus intellectus perfecte adeptus est seipsum et lumen agentis, et ex omnium luminibus et notitia sui extendit se in luminibus intelligentiarum ascendens gradatim ad intellectum simplicem divinum : devenit ergo ex lumine sui agentis in lumen intelligentiæ, et ex illo extendit se ad intellectum Dei.

Hoc autem quomodo fiat sic est intelligendum. Oportet enim scire, quod lumen causæ primæ generaliter loquendo, sui quatuor habet manifestationes narrabile per nomen et diffinitionem. Unus autem inferior est, quo manifestatur inferiorum rerum terminatum ad terminos essentielles uniuscujusque rei. Secundus est, quo manifestatur in imagine sua quæ est intellectus potentialis, quæ potentia est omnia illa quæ abstractionis vel potius separatim esse habent in lumine. Tertius autem est, quo manifestatur in lumine agentis universaliter in ordine minoris mundi. Illi enim conjungitur, non sicut lumen tenebris vel privationi vel potentiæ, sed potius sicut lumen lumini inferioris ordinis : et secundum quod plus conjungitur et limpidius eapponens in intellectum possibilem : et hæc est irradiatio de qua multum locuti sunt Philosophi, et ordinaverunt propter illam supplicationes et orationes. Quartus autem modus manifestationis est, quo manifestatur in ampliatione luminis sui intelligentiis moventibus orbes, licet e converso melius dicatur : quia lumen inferius secundum dicta Philosophorum applicatur superiori. Superius autem non applicatur inferiori, eo quod est simplex et uno modo se habet ad ipsum : unde applicatio quæ plus et minus fit, potius inferiorum et non superiorum est. Quod enim intellectus lumini suo applicentur, patet per motum quem faciunt : quia nullatenus moverent orbes nisi tales fierent ad lumen primæ causæ applicationes : hoc autem logum est hic demonstrare : sed a *prima philosophia* hoc hic supponatur. Hic tamen intellectus intelligentiarum universaliter activus est, et agit omnes formas sui ordinis in materiam suæ sphæræ subjectam. Intellectus autem agens in animam et in suo ordine est universaliter agens, sicut jam ante

¹ VII Physic. tex. et com. 20.

determinatum est : sed possibilis activus non est, sed factus in effectu per agentem : ille autem qui est in rebus, non est nisi actus, et non agens secundum esse intellectualitatis.

Anima igitur humana concipiendo lumen cui applicatur intellectus agens in ipsa illustratus, applicatur lumen intelligentiarum, et amplius clarescit in illo : et sicut dicit Alfarabius, in ipso efficitur sicut stellæ cœli, et intellectus huic lumini beate et pure permixtus, peritissimus efficitur astrorum, et prognosticationum quæ sunt in astris. Et ideo dicit Ptolemæus, quod « scientia astrorum facit hominem pulchritudinem cœlestem amare. » In illo autem lumine confortatus consurgit intellectus in lumen divinum, quod nomen non habet et inenarrabile est : quia proprio nomine non innotescit : sed ut recipitur, innotescit : et primum in quo recipitur, est intelligentia quæ est primum causatum : et cum enarratur, nomine illius enarratur et non nomine proprio, sed nomine sui causati. Et ideo dixit Hermes « Deum deorum non proprie percipi nomine proprio, sed vix mente attingitur ab his qui a corpore per longum studium separantur : » jungitur igitur illi ultimo et lumini suo, et mixtus illi lumini aliquid participat divinitatis. Propter quod dicit Avicenna, quod aliquando illi lumini vere permixtus intellectus futura præordinat et prædicat, et quasi Deus quidem esse perhibetur. Iste igitur est intellectus assimilativus.

Et attende, quod in omnibus his intellectibus possibilis est quasi fundamentum et primus : lumen autem agentis in ipso est dispositio et quasi stramentum ad intellectum principiorum, et intellectus principiorum est stramentum ad intellectum qui dicitur in effectu, et intellectus in effectu est stramentum ad intellectum adeptum, præcipue in quo adipiscitur anima notitiam suiipsius, et iste intellectus adeptus ad intellectum assimilativum, qui per gradus applicationis lu-

minis inferioris ad lumen superius ascendit usque ad lumen intellectus divini, et in illo stat sicut in fine : et ideo cum omnes homines natura scire desiderant, finis desiderii est stare in intellectu divino : quia ultra illum non ascendit aliquis nec ascendere potest.

Hic autem hoc notandum, quod cuiusque superiorum intellectuum intellectus applicatur humanus, qui est una de formis mundi, a lumine istius influunt in ipsum formæ et species sui ordinis : et ideo quædam notitia illius ordinis efficitur in ipso per analogiam cujus potest illa recipere. Et quia omne quod fit in aliquo, fit in eo secundum potestatem suscipientis ipsum : et ideo tales intellectus denuntiant subtilius de ordine illo, vel ut semper, vel ut frequenter, ita quod a quibusdam prophetizare putantur. Qui autem simplici primo et divino intellectui conjunctus est, divinus est et optimus in scientiis et virtutibus, ita quod sicut dixit Homerus, « non videbitur viri mortalis filius esse, sed Dei. » Et ideo dicit Hermes Trismegistus in libro de *Natura Dei deorum*, quod « homo nexus est Dei et mundi : » quia per hujusmodi intellectum conjungitur Deo, et stramentum hujus intellectus sunt alii intellectus de quibus diximus, qui quidem in quinque sunt per modos applicationum et assimilationum diversarum, et intellectus adepti modos, et ejus qui est in effectu : sed tamen in genere sunt quinque, possibilis videlicet, et formalis et principiorum, et ille qui in effectu, et adeptus, et assimilativus et divinus. His ergo intelligibilibus et intellectibus, ut breviter dicatur, perficitur anima. De omnibus autem his subtilius determinatur in *philosophia prima*.

CAPUT X.

De sanctitate intellectu et de creatione quadruplici.

Permanet adhuc dicere de intellectu sanctitate et munditia de qua Philosophi sunt locuti : hic autem non addit novum genus perfectionis et intellectus, sed modum quemdam puritatis dicit circa intellectum.

Hæc autem puritas ex quatuor efficitur, quorum unum est studium pulchritudinis. Secundum est acquisitio multæ illuminationis. Tertium autem excessus separationis a continuo et tempore. Et quartum, applicatio cum lumine superioris ordinis. Studium enim pulchritudinis ordinat et componit ab avertentibus. Acquisitio illuminationis facit quod intellectus ex multis scientis vel scientiæ gradibus ascendit in scibilia luminibus, ita quod sistit in intelligibilibus. Excessus vero separationis intellectus removet a detinentibus continuo et tempore. Sed applicatio intellectus cum superioribus proportionabiliter nititur perfici summis et divinis.

Inter autem quatuor ista primum est purgatio ab impedimentis, et secundum illuminatio in his quæ inferiora sunt homini proportionata. Tertium autem est purgatio ab impedimento quarto : quia nisi quis excedat mente continuum et tempus, non consurgit ad concipienda

divina. Quartum est summa perfectio quæ in hac vita contingere potest homini. Contingit autem plus et plus secundum quod anima est perceptiva illuminationum, quæ sunt a prima causa plus et plus. Solum enim primum non habet plus et plus : et ideo est id quod vocatur, necesse est esse : omnia autem alia plus et plus habentia sunt possible secundum aliquem modum, licet non habeant proprie loquendo possibilem intellectum : hoc autem in *prima philosophia* erit determinatum.

Ex his autem quæ dicta sunt et hic est advertere, quod mundissimorum hominum sunt pulchriora phantasmata, quam quorundam aliorum, sicut in *Ethicis* dicitur : ita sunt eorum lucidissimi intellectus. Quoniam sicut in mundo exteriori turbulentæ tempestatum limpidum lumen recipi impediunt in perspicuo, ita in anima passiones turbulentæ non permittunt lumina intelligentiarum limpide recipi in animalibus : et ideo dixit Apuleius sententiam esse Platonis, quod « deorum quorum ratio absorpta est in inferno a dæmonibus, non est intellectus clari luminis receptivus : quorum autem intellectus depuratus a passionibus et occupationibus vitæ per applicationem luminis cælestium intellectuum continue sublevatur a carne, et efficitur sicut speculum clarissimum cælestis ordinis et pulchritudinis, et in his imbutus tandem vestitur lumine divino, et divina quantum fas est secundum facultatem incipit videre : licet innominabiliter ea participat, et quodammodo infinite, eo quod talia ut in Deo sunt, inferiorum intellectuum nullus comprehendere potest : eminenter tamen accipit, percipiendo quod nihil eorum quæ in Deo deorum sunt, univocum est cum his quæ sunt in inferioribus. » Et ideo ipse solus est id quod vocatur necesse esse, de quo in *prima philosophia* probavimus, quod non potest habere plus nec habere aliter et aliter : et hoc est sibi soli proprium : et ideo est immobile cuncta movens, et

simplex, et impartibile, et innominabile, lucem habitans inaccessibilem.

CAPUT XI.

De modo per quem anima humana per intellectum applicabilis est lumini intelligentiarum.

Quæreret autem aliquis per quem modum anima humana per intellectum applicabilis et quasi immissibilis, ut ita liceat loqui, est lumini intelligentiarum : non enim videtur attingere posse usque ad lumen earum cum sit diffinite in corpore suo, et extra corpus suum non videatur aliquid posse pertingere.

Adhuc autem si detur, quod superius miscetur luminibus, cum hæc lumina sint formæ mundi, non videtur ex his luminibus aliquid distinctum in ipso fieri et determinatum : et ideo licet clarioris efficiatur intellectus, non tamen ex hoc aliquam accipit notitiam determinatam.

Hæ autem et hujusmodi quæstiones moventur ab imperitis ignorantibus naturas formarum mundi : sicut enim forma materiæ ambit et illuminat totam materiam in qua est, et totum quod est in materia, proportionatur unicuique parti materiæ, ita forma mundi ambit et illuminat totam materiam ordinis sibi subjecti, et unicuique proportionaliter lumen suum ubique præsens impartitur. Sed in hoc est differentia, quod forma materiæ corporis est actus, et partes ejus sunt actus partium corporis : sed in-

telligentia non est alicujus corporis actus, sed substantia separata per esse et opera : et per hoc potentior est ad movendum, sicut et nauta distinctus est a navi, nihil recipiens a navi, sed gubernationis motus ponens in navi. Omnis enim motus est ab aliquo primo immobili : sed nos de hoc loquemur in libro de *Principiis motuum animalium*. Hic autem hoc sufficit, quod intelligentia per substantiam separata, lumen diffundit et ingerit per totum orbem sibi subjectum, sicut anima per corpus suum, et hoc lumen ubique præsens proportionaliter efficitur in his quæ se extendunt ad ipsum. Et hoc est quod dicit magnus Dionysius, quod « lumen extendit se per omnes vultus, et fit in intellectu intellectualiter, et in anima animaliter, et in corpore naturaliter secundum uniuscujusque propriam analogiam : sicut et lumen animæ differenter participatur a membris secundum uniuscujusque analogiam. » Intellectus igitur extendens se invenit lumen ubique præsens, et informatur et imbuitur illo et clarificatur ad pulchritudinem cælestem. Et hoc est quod dicunt Philosophi intelligentiam ubique esse, non referentes hoc ad præsentiam substantiæ, sed luminis expansi per totum : et hoc etiam modo animæ excellentium virorum plura ambiunt quam corpora propria, quando animæ eorum formis mundi applicantur : et ideo aliquando obediunt eis transmutationes exteriorum, sicut obediunt formis mundi : et hi sunt de quibus, sicut Philosophi dicunt, quod operantur mirabilia in conversionibus hominum et naturarum. Et per hæc igitur patet solutio quæstionis primæ.

Secundæ autem quæstionis solutio est, quod illud lumen cujuscumque sit intelligentiæ, sive etiam sit divinum, est lumen activum et formativum omnium eorum quæ sunt ordinis inferioris : et ideo semper extendit se ad rerum naturas determinatas, sicut lumen artis se extendit ad materiam. Propter quod etiam quando informat intellectum, extendit eum ad

rerum naturas determinatas : et ideo cognoscit in ipso lumine per quem modum rebus immittitur, et dat esse rebus, ad quam notitiam non extenditur nisi ut actualiter ad res in ipso lumine convertatur, et habebit naturam, omnium secundum quod sunt notiora. Et multi viri illustres in hoc lumine ordinem rerum naturarum percipiunt in ordine istius luminis, et prædicunt : et quidam imperiti credunt eos vera non dixisse aliquando, cum ea quæ prædicunt, non eveniunt, non intendentes quod hoc quod non evenit, non sit ex defectus ordinis qui est in lumine movente et agente ad hoc quod deveniret, sed potius ex contraria dispositione materiæ. Hujusmodi autem ordinis præscientiam quidam excellentiores Philosophi vocaverunt *prophetiam* : et quia somnium est præfiguratio quædam hujus ordinis in imaginationibus et figurativis obumbrantibus claritatem talis ordinis intellectualis, ideo vocaverunt somnium casum a prophetia vel prophetiæ lapsum. Ex his ergo et hujusmodi solutio patet inductorum.

CAPUT XII.

De reductione animæ in esse divinum secundum ultimum statum perfectionis ejus.

Est autem hoc quoddam omnibus mirabilibus mirabilius, et omnibus bonis melius, advertere de bonitate et largitate causæ primæ in reducendo ad se animam

hominis. Cum in omni natura nihil sit propter vilius, formæ quæ fluunt continue in materiam ex luminibus causæ primæ et intelligentiarum, melius multo existentes in causa prima et in luminibus intelligentiarum quam in materia, nulla ratione fluunt in materiam propter esse quod habent in materia, licet materia appetat eas sicut divinum et bonum, sicut diximus in libro de *Physico auditu*. Nec potest hoc dici, quod fluunt ad hoc quod illæ formæ quæ mundi dicuntur, largitatem suæ fontalitates ostendant : quia in rebus vilioribus consumere substantiam non est magnificæ largitatis. Oportet igitur quod ad hoc fluunt, ut esse divinum aliquod et operationes divinas perficiant. Esse autem divinum et operationem non perficiunt nisi a materia separata : et scimus quod non separantur nisi ab anima humana perfecta separatione : oportet igitur, quod per separantem a materia intellectum ad esse divinum reducuntur. Hujusmodi autem reductio non fit per intellectum mundi : quia illarum intellectus habet eas separatas in esse et operatione divina : fiet ergo necessario per intellectum hominis qui ad hoc habet vires et organa, ut a materia accipiat formas divinas.

Secundum autem omnia quæ inducta sunt, forma non est sufficienter facta divina per hoc quod efficitur intellectus qui dicitur in effectu vel adeptus : sed divina fit per intellectum assimilantem, et eum qui vocatur divinus : igitur sic reducta confert esse divinum et operationem divinam : substantia autem habens esse divinum et operationem, non indiget aliquo : ergo anima sic reducta de sensibilibus et materia corporum, non indiget, eo quod materialia et instrumentalia organa non accepit secundum naturam nisi ad hoc ut ad esse divinum reduceretur : stat igitur substantiata et formata in esse divino in esse perfecta : et hoc vocaverunt Philosophi caducum alterius et immortalis vitæ, per quam vere probatur animæ humanæ immortalitas. Quod au-

tem diximus eam indigere sensibilibus et corpore, intelligendum est de indigentia relata ad intellectus perfectionem. Sic igitur concluditur ultima perfectio animæ secundum intellectum.

Est autem alia ejus perfectio secundum virtutem et virtutis felicitatem, de qua perscrutati sumus in *Ethicis*: consequenter autem in his quæ hic determinata sunt, oportet quærere hic de natura omnis animæ et immortalitate, de principiis motuum animalium: quia per hoc scitur qualiter unitur corpori: et hoc quidem faciemus in aliis duobus libris qui immediate post hunc sunt ordinandi¹. Per illum enim scitur qualiter ani-

ma subjectatur ad vitam æternam, cum reducitur ad primum, quod est necesse esse et omnium causa: ita penetretur lumine ejus mirabili et causali, quod nihil amplius novit requirere, sed stans in seipsa manet in illa.

De intellectu vero intelligentiarum quo cognoscunt suam essentiam et suæ essentiæ primam causam, et sint necessario duarum naturarum, et non simplicis naturæ secundum intellectum, et quæ sint et quot, volo a nobis hic relinquatur: altissimum enim est hujusmodi negotium, et *primæ philosophiæ* egens inquisitione. Et sic est finis secundi libri de *Intellectu et intelligibili*.

¹ Quasi per omnia sequentes ordinem editionis Lugdunensis, jam suis locis inseruimus

tractatus de *Motibus animalium* et de *Natura et origine animæ*.

INDEX

Librorum, Tractatum et Caputum in Libris de Intellectu et Intelligibili.

LIBER I.

TRACTATUS I.

De natura intellectus.

- CAP. I. De quo est intentio, et quis dicendorum ordo? 477
- II. In hoc demonstratur quod omne cognitivum animalium causatum est ex alio quodam cognitivo. 478

- III. Qualiter vegetabile et intelligibile imperfectum fluunt ab intellectivo primo et perfecto? 480
- IV. Quob ab intelligentia natura cognitiva sit causata, sicut dicit Plato. 481
- V. Unde provenit generum animæ diversitas, et vegetabile scilicet, et sensibile, et intellectivum? 483
- VI. Utrum intellectualitas animæ sit materia, vel ex fluxu a causa prima? 486
- VII. Utrum natura intellectualis sit universalis vel particularis secundum actum: quia non est dubium, quin sit universalis secundum aptitudinem, cum sit forma. 487
- VIII. In quo summatim colligitur natura intellectualis animæ. 489

TRACTATUS II.

De per se intelligibili.

CAP.	I. Quod nihil intelligitur nisi universale.	490
	II. Utrum universale sit in solo intellectu, an etiam in re extra?	492
	III. De solutione dubiorum quæ oriuntur ex prædeterminatis.	494
	IV. De falsitate opinionis dicentis omnem formam esse ubique et semper.	495
	V. De confutatione erroris Platonis circa determinata.	496

TRACTATUS III.

De comparatione intellectus ad intelligibile.

CAP.	I. Qualiter intelligibile est in intellectu?	498
	II. De diversitate intelligibilium in genere.	499
	III. De diversitate intellectuum tam secundum se, quam secundum intelligibilia, quam etiam secundum facultatem intelligentium accepta.	501

LIBER II.

TRACTATUS UNICUS.

De perfectione naturali intellectus.

CAP.	I. Unde habet forma, quod sit in anima intellectuali ?	503	bilis sit potentia, et ut tabula rasa, et ut locus et ut species intelligibile ?	508
	II. Quare formæ fluunt ab intelligentia secundum quod ipsa forma mundi est? et ex hoc habetur quod fiunt in anima.	505	V. De intellectu formali, et qualiter per ipsum perficiatur intellectus possibilis ?	510
	III. Qualiter intellectus agens in anima est sicut lux et sicut ars, et ideo est perfectus agens perfectiones ?	506	VI. De intellectu in effectu, et qualiter possibilis in effectu perficitur ?	512
	IV. Qualiter intellectus possi-		VII. De intellectu principiorum et instrumentorum per quæ intellectus possibilis efficitur in actu.	513
			VIII. De intellectu adepto, qualiter in eo anima perficitur, et per studium invenit seipsum ?	514
			IX. De intellectu assimilativo, et qualiter anima perficitur in illo ?	516
			X. De sanctitate intellectus et de creatione quadruplici.	518
			XI. De modo per quem anima humana per intellectum applicabilis est lumini intelligentiarum.	519
			XII. De reductione animæ in esse divinum secundum ultimum statum perfectionis ejus.	520



D. ALBERTI MAGNI

RATISBONENSIS EPISCOPI, ORDINIS PRÆDICATORUM,
PARVA NATURALIA.

LIBER DE NATURA LOCORUM.

TRACTATUS I

DE LONGITUDINE ET LATITUDINE LOCI PER DISTANTIAM AB ORBE.

CAPUT I.

Quod naturam loci scire oportet in scientia naturali, et quod peccant qui de hoc non quærent.

De natura locorum tractaturi quæ

provenit ex habitudine loci ad cœlum, primo faciemus mentionem de his quæ in *Physicis* determinata sunt ¹. In his enim probatum est, quod locus est generationis principium activum, ut quidam putant. Cujus causa est, quia omne locatum se habet ad locum suum sicut materia ad formam : et quia superiora ad inferiora se habent sicut formæ ad materias suas, sicut in libro de *Cœlo et Mundo* diximus ², oportet quod superiora semper sint loca inferiorum : et ideo principium formationis inferiorum ex superioribus influitur eis sicut ex principiis activis.

Hæc autem et alia ratio est : quia transmutatio omnis contenti est per continens : locus autem continens est : et ideo

Prima ratio
Quod locus
habeat virtutem
activam in locatum.

Secunda ratio.

¹ IV Physic. tract. 1, cap. 1.

² IV de Cœlo et Mundo, tract. 11, cap. 7.

principium ex ipso est transmutationis ejus quod continet : putrescunt namque ea quæ putrescunt et conservantur conservata per virtutem continentium corporum, sicut probari habet in IV *Meteororum*¹ : et ideo locum habere virtutem activam in locato non est ambiguum.

Tertia ratio.

Amplius autem omnia corpora rectarum dimensionum moventur ad loca sua sicut ad generationis ipsorum principium aliquod, et sicut ad principium conservationis ipsorum aliquod. Ideo oportet scire naturam locorum et causam diversitatis ipsorum. Hanc enim naturam videmus in parvo mundo qui est quodlibet animatum. Cibum enim in animato moveri videmus ad quodlibet membrum sicut ad locum proprium in quo formam et esse accipit membri a virtute quæ est in membro ad quod movetur : nec umquam ante valet cibus operationem suam perficere proprie, nisi sit perfecte virtutem membri ad quod movetur, adeptus, cujus perfectionis principium est membrum. Et similiter est absque dubio in quolibet corpore quod movetur ad locum secundum naturam.

Natura locorum diversa in parvo mundo perpenditur.

Quarta ratio.

Propter quod etiam a Peripateticis probatoribus locus inter principia naturæ enumeratur. Dixerunt etiam propter eandem causam loci naturam esse mirabilem. Et præcipue propter hoc : quia cum motor primus nobilitatem suam largiatur omni ei quod formatur ad esse, absque dubio non largitur distantia esse vel formam, nisi per quod sibi est propinquius : est autem propinquius continens quam contentum : et sic per locum continentem largitur locato et esse et formam. Est autem etiam hujusmodi simile in dialecticis et probabilibus, in quibus illatio et confirmatio conclusionis est ex loco propter similitudinem quæ sumitur ex loco naturali, et habitudinem ipsius

Locus in dialecticis sumitur ex similitudine ad locum naturalem.

ad locatum, sicut diximus. Cum autem nullus omnino locus (proprie sumptus ut locus) sit mobilis, oportet ipsum esse omnino absque indigentia naturali : eo quod omnis motus physicus rectus est per indigentiam, cum omnino sit sequestratus ab omni indigentia privationis et materiæ, oportet ipsum esse in ratione alicujus divini et optimi, ad quod et propter quod est motus, et in quo accipitur esse rei et salus ejusdem.

Testificatur etiam ad hoc, quod videmus omnia corpora quæ diu sunt extra locum suæ generationis, eo quod elongata sunt a principio suæ conservationis et sui esse (et hoc non tantum modo videmus in hominibus et aliis animalibus, sed etiam in plantis quæ multum in diversa loca transferuntur) est similiter lapides propriis virtutibus destruuntur, quando diu sunt extra locum suæ generationis : et quamvis forte teneant colorem et figuram per tempus longum propter similitudinem corporum suorum, tamen, ut diximus, virtutem paulatim amittunt : et cum virtus ipsorum sit a tota specie ipsorum, et sit sequela complexionis ipsorum, constat quod etiam nomen speciei non retinet nisi æquivoce : et sunt sicut mortui qui propter desiccationem corporum longo tempore figuram retinuerunt.

Quinta ratio.

Indicant autem hæc omnia quæ extra loca sua non natura, sed vi retinentur. In omnibus enim his inclinatio naturalis invenitur ad locum, qua in loca propria ferantur non prohibita : quod probatur etiam, quia, sicut in *Physicis* dictum est, non indigent motore ad ipsum locum nisi accidentali, quod scilicet removet obstaculum quod retinet locatum infra terminos alienos, et suæ naturæ non congruos.

Sexta ratio.

Ex omnibus his igitur satis liquet, Quod oportet scire na-

¹ IV Meteororum, tract. I, cap. 6 et 7 et ultra.

turam loci
et ejus di-
versitates in
particulari.

quod oportet scire naturam loci, nec sufficit tractatus qui in *Physicis* ¹ habitus est de ipso, eo quod ille non nisi universaliter certificat de ipso : sed oportet nos scire diversitates locorum in particulari, et causas diversitatis ipsorum, et accidentia diversorum locorum : tunc enim perfecte sciemus ea quæ generantur et corrumpuntur in locis. Et sicut non sufficit determinare naturam animalis in communi, et secundum genus, nisi sciatur etiam animalium diversitates in generatione, cibo, et moribus : ita non sufficit universaliter tradere de loco nisi tradatur diversitas locorum, et innotescant accidentia diversorum locorum, et causa accidentium. Propter quod tradentes scientiam naturalem, et non inducentes aliquid de diversitate locorum, peccant : et solatium quærunt suæ imperitiæ, si dicunt non oportere de ipso quærere. Non enim sufficit quod in mathematicis traditum est de hujusmodi diversitate, ubi traditur quæ stellæ, super quæ loca, hoc vel illo modo orientur, vè occidant, utrum scilicet oblique vel recte, et quæ stellarum nec orientur nec occidant, sed semper appareant, vel quæ numquam, et quæ orientur et occidant aliquando : quia licet ex his sciatur situs climatum, non tamen per eadem sufficienter scitur natura locorum et diversitas complexionis eorum. Et ideo sicut in aliis naturis oportet scientiam naturalem usque ad specialia deducere, ita et in locis. Si enim nos considerationem ponimus in mixtis tantum non complexionatis, non sciemus perfecte naturam ipsorum, nisi sciamus omnes istorum differentias in metallis et lapidibus. Simile est de consideratione complexionatorum et animatorum. Oportet igitur, quod etiam sic sit de scientia locorum. Et ideo præcipuos viros in philosophia, sicut fuit

Aristoteles
et Plato tra-
ctaverunt de
natura et
diversitate
locorum.

Aristoteles et Plato, tractasse videmus de hujusmodi : licet libri eorum non integri, sed per partes ad nos venerint.

Sunt autem quidam dicentes locum non conferre nisi ad figuram, et non ad esse locati : eo quod est extrinsecum ambiens undique terminans, et tangens figuram locati : et ideo non oportere tradere dicunt scientiam diversitatis locorum in speciali scientiæ naturalis : eo quod non operatur nisi ad accidens rei naturalis, et non per modum naturæ quæ est intrinsecum principium, sed, sicut dicunt, extrinsecus et per accidens continendo. Et horum errorem facile est refellere per ea quæ dicta sunt.

Error dicentium locum non conferre ad esse locati, sed tantum ad ejus figuram.

Cum enim a cælo sit omnis virtus factiva et operativa, nec derivetur hæc virtus in extremum nisi per medium : medium autem est corpus locans, sicut ostendimus supra : oportet quod virtus rei faciens et terminans sit in loco : locus igitur ad esse operatur.

Amplius autem figura continens est esse et speciem in omnibus generans : qualiter igitur intelligi potest, quod locus operetur ad id quod est consequens, et nihil conferat ad antecedens? licet enim in libro de *Cælo et Mundo* dictum sit, « simplicia corpora habentia motum rectum esse rotunda per accidens, eo scilicet quod locantur in rotundo : » tamen hoc non est verum in compositis quæ secundum naturam differunt propriis figuris, sicut differunt propriis speciebus : et ideo quod est in talibus causa figuræ, est per prius causa speciei sic vel aliter figuratæ. Et etiam ipsa elementa per alium modum dicta natura sunt naturaliter rotunda, sicut nos in scientia *Cæli et Mundi* ostendimus.

Quod est causa figuræ in compositis, est per prius causa speciei in illis.

His igitur de causis, postquam nos de mobilibus ad locum determinavimus, oportuit nos tangere de diversitate natu-

Intentio hujus libri et causa intentionis ac ejus continuatio.

¹ IV *Physic.* tract. 1, cap. 1.

ræ locorum, et de causa diversitatis et de accidentibus, ut perfecta sit doctrina de mobilibus ad locum, quando in speciali scitur locorum diversitas. Et hunc librum per tres distinctiones dividimus. In prima enim ostendemus omnes diversitates ex orbe procedere in omnem loci differentiam. Et in secunda accidentia locorum diversorum. Et in tertia determinabimus particularia loca fluminum et civitatum et montium : hoc enim modo in hac scientia processerunt Aristoteles et Plato.

CAPUT II.

De distinctione locorum, ut sciatur cuius loci hic investigetur diversitas.

Primum autem quod scire convenit, est quod locus dupliciter sumitur. Uno enim modo dicitur locus communiter omne corpus ambiens extrinsecus alterum corpus ratione superficiei continentis et tangentis ipsum. Alio autem modo locus dicitur concavum superficiei ad quod est motus alterius corporis. Primo autem modo nec generabilia nec corruptibilia sunt in loco : omnia autem corpora præter primum corpus habent extra se aliquod ambiens corpus, circa quod circumscribitur quantitas ipsorum. Cum autem hæc corpora quæ nec generantur nec corrumpuntur, tangunt se, non contingunt se nisi per modum mathematicum, quo nec immutat unum eorum alterum, nec immutatur ab ipso : et ideo

talibus non proprie, nec secundum naturam debetur locus : materia enim talium corporum prius habet formam substantialem quæ est indivisibilis et impartibilis, quam habeat quantitatem : et ideo perpetuitatem habent hujusmodi corpora secundum naturam : et forma in ipsis non movetur, nec par se, nec per accidens, sicut ostensum est in libris antehabitis *Cæli et Mundi*, et *Physicorum*, ubi probatur quod corpora talia ad locum non moventur, sicut nec aliquis secundum naturam motus est ipsorum ad formam. Ostendimus enim in VIII *Physicorum*, quod idem est motus ad formam et ad locum : et quod illud quod non movetur ad formam, non movetur ad locum : unde cum etiam talium corporum formæ, separatæ sint substantiæ secundum Peripateticos, non debetur eis locus aliquis secundum naturam suæ essentiæ, sicut debetur formis aliorum corporum. Sed quod sint in loco sic ordinata, debetur eis ex ordine dignitatum suarum, secundum quem ordinem sunt causæ eorum, quæ fiunt in natura : in quo ordine universaliter causans est ultimum ambiens alia. Et ideo oportet quod sit altius in loco secundum distantiam a centro, et claudens in se undique per circuitum alia : quia aliter non ubique per circuitum æqualiter efflueret virtutem ad esse eorum quæ naturaliter sunt. Talia igitur corpora proprie loquendo non locum habent, sed locus sunt corporum aliorum.

Corpora vero simplicia quæ rectum habent motum, et composita ex ipsis secundum naturam locum habent ad quem est motus eorum. Et simplicibus quidem locus debetur per se, compositis autem locus debetur per simplicia : et hæc motus habent ad sua loca naturales, et extra sua loca corrumpuntur : et locus quidem simplicium est simplex, locus autem compositorum est compositus. Simplex enim corpus habet locum in simplici concavo corporis in quo est generatio ipsius, et ad quem est motus ipsius : et a quo si moveatur, festinat ad corruptio-

Formæ corporum celestium non moventur, nec per se, nec per accidens.

Quod non movetur ad formam non movetur ad locum.

Ratio ordinis corporum celestium.

Corpora simplicia potius sunt loca aliorum quam quod habeant locum.

Simplicium corporum est simplex locus, compositorum vero compositus.

nem, sicut in *Physicis* determinavimus. Compositum autem habet locum in composito : et ideo nullum compositum in simplici corpore locari potest : propter quod egregie dicit Aristoteles in libro de *Causis proprietatum elementorum et orbis* sive planetarum, quod si compositum occupetur a simplici, corrumpitur statim : dans exemplum de his animalibus, quæ cadunt ab altissimo, quæ ante mortua sunt quam ad terram deveniant : et ideo corrupta sunt, quia occupata sunt ab aere simplici, et non a casu.

Si compositum occupetur a simplici, corrumpitur, teste Philo-
sopho.

Causa autem hæc est, quia locus et locatum connaturalia sunt : et ideo contrarietas ipsorum corrumpit : corrumpitur enim corpus compositum a continente quando fuerit ei contrarium : propter quod etiam in *Physicis* diximus non quamlibet superficiem esse locum rei naturalem, sed illam quæ est terminus locantis corporis relativa ad distantiam et causam, in quo propria est generatio rei locatæ. In illo enim concavo generatur et conservatur et convalescit, et extra illud in concava superficie habente qualitates contrarias illi, dissolvitur et corrumpitur. Ostendunt autem hæc homines loca sua mutantem secundum contraria climata, qui propter loci inconnaturalitatem infirmantur et destruuntur : et quando redeunt ad loca nativa, recipiunt sanitatem ¹. Quædam autem animalia etiam virtutem generationis amittunt ex loci inconnaturalitate, sicut elephantes extra primum et secundum clima raro generant, nec inveniuntur umquam generasse ultra quartum : et similiter leones qui in sexto et septimo climate nunquam generasse inveniuntur. Magis autem perspicuum hoc est in plantis : eo quod videmus quasdam plantarum in uno loco convalescere, quæ si ad clima proximum transferantur, nulla cultura

convalescere possunt. Ex his autem omnibus manifestum est quorum sit locus proprie, et quod locus per virtutes quas habet in se superficies locans, generationis est principium et conservationis corporis quod locatur in ipso.

CAPUT III.

De diversitate loci et distantia sui ad orbem proveniente.

Est autem loci duplex distinctio. Una quidem causa est distantia sui ab orbe, qui vere locus est omnium secundum naturam locum habentium. Altera autem ex situ et respectu loci ad vias plurimorum. Prima quidem est ex hoc : quia, sicut diximus, aliud corporum est locans tantum, alterum est locatum, et quoddam est locans et locatum secundum naturam. Illud vero quod est locans tantum, est orbis in quo est virtus causativa omnium generatorum et corruptorum, sive sint simplicia, sive sint composita, sicut in ante habitis diximus. Corpus autem locatum est terra pura, quæ est centrum. Locans autem et locatum sunt tria corpora reliqua elementorum. Et partes hujus divisionis manifestæ sunt ad sensum : concavum enim orbi lunæ est lo-

¹ Nota quid faciat loci naturalis mutatio : et ideo recte inquit Porphyrius, quod « patria est

principium generationis sicut et pater. »

cus ignis, et attingit ipsum undique, sicut Peripatetici tradiderunt.

Est autem ratio ad hoc ex motu et subtilitate et caliditate ignis, et levitate et perspicuitate et aliis proprietatibus ignis. *Ex motu* quidem : quoniam sicut in *Cælo et Mundo* dictum est, ignis movetur super omnia absolute elementa. Locus autem qui simpliciter est super omnia tria elementa, concavum est orbis lunæ. *Ex subtilitate* autem : quoniam licet omne corpus secundum rationem divisibile sit in infinitum, tamen materia quatuor elementorum non potest subtiliari amplius quam subtiliata sit sub forma ignis ¹. Est autem locus connaturalis locato, sicut ante diximus. Non potest igitur locari ignis in corpore grossioris superficiæ quam sit ipsum, cum locus formalior sit in omnibus quam locatum. Oportet igitur quod in ultima orbis superficie locetur, eo quod hæc sola formalior est ipso. *Ex ratione vero caliditatis* hoc idem probatur : quia caliditas in summo clarificat et subtiliat. Caliditas autem in summo est propinquissima causæ caliditatis, quæ est motus materiæ superiorum, et vicinitas lucis eorum. Materia igitur vicinissima orbi, calida est in summo : et ideo concavum orbis ultimi proprius locus est eisdem.

Amplius autem hoc ostenditur ex levitatis et simplicitatis diffinitione, quam in *Cælo et Mundo* determinavimus : si enim levitatis comparatæ est moveri super corpora quædam, levitatis simplicis erit moveri super omnia generabilia corpora. Est autem motus ad locum connaturalem et proprium. Locus igitur ignis erit in concavo lunæ super omnia corpora habentia motum rectum. Perspicuus etiam est ignis sicut apparet ex eo quod non tegit nobis corpora quæ sunt super ipsum : et est inter cætera elementa magis perspicuus, eo quod est omnibus sub-

lior et rarior : perspicuum autem in omni corpore est ex convenientia cum perpetuo superius corpori cælesti, sicut dicit Aristoteles in secundo libro de *Anima*. Cum igitur convenientia et generalitas sit inter locum et locatum, et ignis inter elementa magis convenit cum cælo, oportet quod inter elementa ignis in concavo ultimo orbis locetur.

Propter hoc autem et his similia multa videtur et est irrationalis opinio quorundam dicentium nullum superius esse ignem, sed aerem usque ad sidera extendi : et est inconveniens ratio quam ad hoc inducunt dicentes esse inutilem, cum ad mixtionem aliorum faciendam corporum et generationem perficiendam non possit descendere : eo quod secundum naturam semper sit superius : nec videmus animal quod ipsum per violentiam possit inclinare deorsum. Inducunt etiam, quod cum ignis in se lux sit, ut videntur quidam Philosophi dicere, quod deberet videri et apparere, præcipue nocte quando non tegitur radio solis.

Sed ad hoc facile est respondere, quod ignis ad vicariam facit elementorum generationem in contactu aeris ad ipsum, sicut ostendi habet in libro *Peri geneseos*. Ad aliorum autem generationem virtus ejus adducit per radios solis, et quarundam aliarum stellarum, sicut ostendemus in libro *Meteororum* : et quia nos hunc errorem in aliis locis destruximus et in aliis libris adhuc destruemus, convertamus nos nunc ad alia quæ de distinctione locorum dicere intendimus.

Ostendemus autem quod centrum est locus terræ : et centrum illud quod est locus terræ, est mundi centrum, ad quod secundum naturam movetur terra. Hoc enim monstratur multis rationibus : est enim hoc simplex deorsum : et sic grave simpliciter habet moveri ad ipsum sicut ad locum proprium : est enim terra

Quod concavum orbis lunæ sit locus ignis.

Opinio irrationalis quorundam negantium ignem esse super aerem.

Quod centrum sit locus terræ.

¹ Ex quo patet, quod nullum elementum est

rarius igne.

Idem sub-
jecto est
medium
terræ et
medium
mundi.

spissius et inferius secundum naturam : et ratione istius proprietatis debetur ei locus remotior a loco ignis : et sic debetur ei centrum. Licet enim idem subjecto sit medium terræ et medium mundi, non tamen in quantum est medium terræ, est medium mundi, sicut in *Cælo et Mundo* ostendimus. Cum autem determinamus centrum mundi esse locum terræ, non excludimus per hoc quin etiam ultimum concavæ superficiei aquæ sit locus terræ¹. Et licet aqua descendat ad locum terræ, si terra detrahi intelligatur : tamen hoc non facit in ea motum generationis et formæ, sed potius corruptionis et transmutationis ejus in formam terræ sicut et transfertur ad locum ejus.

Loca elementorum
mediorum.

Loca vero media sunt duorum elementorum mediorum, quæ sunt per comparisonem levia, et per comparisonem gravia. Et locus quidem in concavo ignis est aeris, et locus in concavo aeris est aquæ. Sed in his locis elementorum magna est differentia : quia cum locus ignis sit concavum superficiei orbis lunæ usque ad convexum aeris, non est hoc spatium totum æqualiter locus ignis, sed quasi principaliter et per posterius. Cum enim ignis sit ascendere sursum, verissime et principalissime attingit illa pars materiæ formam ignis, quæ usque ad altissimum loci elevatur. Est autem altissimum loci ignis in concavo orbis ultimi. Ergo ibi locatur quod verissime est ignis : quod autem in medio et infimo est ejusdem spatii, non adeo attingit ignis naturam, sed secundum minus. Hoc autem declaratur per hoc quod ignis est clarissimum et subtilissimum corpus specie. Ex utroque enim locorum probatur, quod vera natura ignis est, quæ concavum orbis ubique tangit. Per oppositum autem se habet in terra : quoniam ideo quod terra est simpliciter gravis, et se-

Spatium
quod est in-
ter concavum
superficiei
orbis lunæ usque
ad convexum
aeris, non est
æqualiter
locus ignis.
Quod est
verissime
ignis, locatur
in altissimo
loco ignis, hoc
est, in concavo
orbis lunæ.
Vera terra
est locata
in centro,
et quæ plus
distat ab eo,
minus attingit
veram naturam
terræ.

cundum hoc sub omnibus descendit, erit verissime natura terræ locata in centro : et secundum quod partes terræ plus vel minus elongantur a centro, sic plus vel minus attingunt veram naturam terræ. Accidit autem eidem, quod remotissime sub alia descendit in medio terræ : quia secundum quod locus ignis et terræ contrarii accipiuntur, sunt extrema in quæ sunt motus contrarii, et alteri horum extremorum accidit quod sit medium, per hoc quod ipsum est medium mundi et non medium motus.

In locis autem mediorum elementorum omnino dissimile est : verior enim aer non est qui tangit ignem in sui loci summo, neque qui tangit aquam in infimo sui loci, sed potius qui locatur in medio spatio sui loci. Ignis enim tangens aerem facit ipsum æstuosum siccum, cum de natura sua aer sit calidus et humidus. Similiter et aqua tangens ipsum in infimo facit ipsum nebulosum et incorporatum et grossum, et alienam humiditatem habentem, cum aer de natura sua sit humidi spiritualis. Eodem autem modo nec aqua verissima est quæ tangit aerem, nec illa quæ tangit terram, sed media inter hæc. Tangens enim aerem in summo loci sui dulcis et subtilis est propter aeris admixtionem, et tangens terram in infimo loco sui turbulenta est valde et forte pontica vel salsa propter terrestre quod commixtum est ei, sed media inispida est veram habens aquæ naturam. Hoc autem rationabiliter accidit aquæ et aeri propter hoc quod non simpliciter gravia sunt elementa, neque simpliciter levia : horum enim est moveri ad medium sui loci, et declinare ab extremis secundum naturæ convenientiam. Hæc igitur sub orbe sunt loca simplicium.

Elementa
media non
sunt in
veriori
sui natura
secundum
partem
propinquo-
rem suo
loco, quod
e converso
accidit de
elementis
extremis.

¹ Ex quibus patet, quod locus terræ non est locus aquæ, licet aqua descendat ad locum

terræ, si terra detrahatur.

CAPUT IV.

*De causa virtutis loci qua datur forma
elementi.*

Admirabitur autem forte aliquis unde veniet tanta loco virtus, quod in loco quædam pars universalis materiæ simplicium corporum accipit formam ignis, pars autem aeris, et pars formatur in aquam, et pars in terram : materia enim de se nullum omnino habet locum. Similiter autem materia quæ est sub forma corporum, licet loco circumscribatur, non tamen exigit locum sub determinata loci differentia ad quam est motus secundum locum : sed ratione formæ substantialis determinatæ, quæ in quantum forma substantialis est generabilis corporis, exigitur determinata loci differentia ad quam est motus secundum locum. Videbitur enim alicui fortasse, quod superficies cujus concavum est locans in se locatum, dicitur et aliquid esse corporis locantis et non locati, et ideo habere virtutes corporis locantis : et propter illud debere agere ad formam corporis locantis et non ejus quod locatur in ipso : propter quod videtur concavum ignis in modo elementali non aerem debere producere, sed ignem : et sic nullum elementorum deberet esse nisi ignis solus, qui ex motu et lumine superiorum corporum generatur, et totam materiam elementalem videtur debere convertere in se.

Propter quod etiam quidam Antiquorum dixerunt solum ignem esse primum elementum, et alia per compositionem ipsius et coacervationem partium ignis. Hic autem error est sicut in libro de *Cælo et Mundo* diximus. Et ideo cum Avicenna et quibusdam aliis Philosophis dici oportet, quod locus naturalis qui virtutem habet inducendi formas in materia corporum simplicium, est superficies corporis continentis cum distantia sui ab orbe : hæc enim distantia causat calidum et frigidum, humidum et siccum, quæ sunt virtutes naturales elementorum : hæc enim si nulla sit, ex motu et lumine inducit calidum in summo et subtile et siccum, quæ omnino non sunt nisi formæ ignis. Si autem sit distantia prima, in qua remissa est virtus motus, disgregabitur virtus elementalis contra statum formæ ignis, et inducitur calidum non omnino extrahens, sed spirituale humidum permittens, et causas in materia : et distantia ulterior causabit ampliorum partium materiæ grossitiem, in qua humidum tantum partes materiæ faciet fluere ad invicem : et distantia prima causabit formam aeris : distantia autem secunda formam aquæ : perfecta autem distantia quæ est omnino cum defectu caloris, sed potius habet frigus partes materiæ constringens, causat siccum per omnimodam humidi expressionem, et inducit formas terræ : et hoc ulteriori manifestatione in secundo *Peri geneseos*, et in libro *Meteororum* manifestabitur.

Hæc enim quæ hic inducta sunt de generatione elementorum, non ob aliud inducta sunt, nisi ut sciatur distantia loci ab orbe secundum suas differentias, cum locus causet formas elementorum, et ad locum sub tali vel tali distantia motus est ipsorum. Duo tamen istorum locorum sunt extremi, et duo sunt medii : medium tamen propter facilem elementorum admixtionem a physicis interstitia dicti sunt. Aer quidem superius est æstuosus calidus, et inferius est va-

Error quorundam Antiquorum circa elementum ignis.

Solutio ad mentem Avicennæ.

Quomodo distantia superficiæ locantis ab orbe causas virtutes naturales elementorum ?

Nota difformitatem in partibus aeris et aquæ.

porosus, calidus propter repercussionem radiorum ad terram. In medio autem est frigidus propter privationem utriusque caliditatis. Similiter autem aqua in summo subtilior est et dulcior propter aeris admixtionem, et in infimo turbulenta et salsa propter terræ admixtæ combustionem, et in medio insipida. Sed differentia est in hoc duorum elementorum mediorum, quod aerem in infimo calidum per accidens, hoc est per repercussionem radiorum luminum cœlestium, cum ex vicinitate ad duo elementa frigida frigidus esse deberet : in medio autem est frigidus ultra quam deberet per accidens, hoc est, per frigiditas partes in eo percussas ex vaporibus terræ et aquæ : quæ quando non recipiunt actionem fortem a radiis solis, ad frigiditatem naturalem reducuntur, et infrigidant aerem : et ideo aer in actu calidi et humidi percussus circa medium aeris, non est directe in ipsa media regione spatii sui.

Quomodo differt aer ab aqua in difformitate partium ?

Locus sub determinata distantia a cœlo causat formas elementorum, juxta sententiam Avicennæ et Averrois et Moysis

Virtus causandi huic vel illi loco a cœlo infunditur.

Ex omnibus autem his rationibus patet veram esse sententiam quam tres Philosophi communiter tradiderunt, scilicet Avicenna et Averroes et Moyses Ægyptius, quod scilicet locus sub determinata distantia a cœlo causat formas elementorum : et ideo elementa moventur determinata ad talem determinatam distantiam loci sub orbe propter loci et locati contrarietatem. Virtus autem causandi quæ huic vel illi loco a cœlo infunditur, divina est et optima, quia aliter non esset motus ad locum : non enim motus est ad aliquid, nisi illud sit in ratione divini alicujus et optimi. Est autem perfectissimus omnium motuum motus localis, ut probatum est *Physicis* et in *Cœlo et Mundo* : quare propter ipsum oportet esse aliquid divinissimum et optimum secundum naturam rei. Illud autem divinum quod sic est in loco, propter quod motus est ad ipsum quod a cœlo sibi influitur, quod simpliciter est locus et non locatum, quidam vocant lucem : et ideo dicunt lucem esse firmamentum loci : eo quod mathematice loquentes *basilica*

vocant. Sed si lux accipitur pro eo quod actum lucis habet illuminando, tunc virtus illa nequaquam lux vocari potest : mobile enim localiter non plus movetur ad locum illuminatum quam ad tenebrosus. Si autem lucem vocant omnem virtutem quæ a cœlo influitur in inferioribus mediante natura luminosi, tunc verum est quod dicunt : sed tunc improprie loquentur : multæ enim virtutes a cœlo diffunduntur in inferiora, quæ nequaquam luces vocari possunt, licet forte cum lumine cœlesti descendant, sicut est calidum, et aliquando frigidum, et aliquando humidum, et aliquando siccum, quæ cum radiis stellarum in inferioribus influuntur, et tamen nullum ipsorum nomine lucis proprie vocatur : virtutem tamen illam cœlestem esse constat, quæ format materiam ad speciem : eo quod formæ substantiales nullæ inducuntur nisi a virtute aliquis cœlesti, sicut in *prima philosophia*, Domino concedente, declaravimus.

Quidam autem consueverunt vocare omnem formam et omnem virtutem formativam splendorem intelligentiæ, ex qua sunt formæ : et hoc modo per mathematicam locutionem concedi potest, quod lux sit virtus qua cœlum diffundit virtutem formativam in locum et omnes loci differentias. Quocumque igitur modo vocetur, non magna vis est, dummodo concedatur hanc ipsam virtutem a cœlo in locum diffundi. Sicut enim diximus in principio, quædam sunt locus et locatum, et quædam locatum tantum. Sicut igitur calidum secundum se est causa ejus quod est calefactum tantum, et ejus quod est calefactum et calefaciens, ita oportet necessario quasi ut influxa virtus sit locato tantum, et locato et locanti, ab eo quod est locus tantum : hoc enim est in ratione primi et causæ in genere locati. Hoc autem patet alia ratione : si enim duo inveniuntur composita in uno, et unum inveniatur illorum componentium sine alio, necesse est et reliquum inveniri sine reliquo, sicut in octavo *Physicorum* est de-

Splendor intelligentiæ quid apud quosdam ?

Quod quædam sunt locus tantum, et quædam locata tantum et quædam locus et locatum : et quod ea quæ sunt locus tantum, sint causa localitatis in omnibus aliis.

términatum in his quæ moventur, in quibus motum tantum invenitur sine movente, oportet quod et movens tantum inveniatur sine moto. Invenimus enim aliquod compositum quod est locans et locatum simul, et invenimus aliquod locatum tantum, oportet igitur esse aliquid locans tantum: et sicut in illis id quod est tantum movens, est causa motus in omnibus aliis, ita necesse est quod id quod est locus tantum, sit causa localitatis in omnibus aliis: nullum autem corpus locus est tantum nisi cœlum, sicut patet ex dictis: igitur oportet quod ratio locationis sit in omnibus aliis a cœlo.

Ratio locationis in omnibus aliis a cœlo.

Amplius quæcumque natura invenitur in pluribus participata secundum rationem unam, oportet quod illa sit in aliquo uno primo quod est causa illius naturæ in omnibus aliis, sicut probat Aristoteles in secundo *Metaphysicæ*, et est suum exemplum de omnibus calidis quæ causantur ab uno calido per se quod est ante ea, et est ignis.

Cum igitur natura loci inveniatur in pluribus simul locantibus et locatis, oportet quod sit unum aliud ante ea quod sit locus primus, quod virtutem loci causet in omnibus aliis: et hoc quidem est necessarium de virtute loci secundum quam et motus est ad locum sicut ad formam, et conservans in esse formæ datæ. Hæc igitur ad præsens de loco simplicium dicta sint.

CAPUT V.

De communibus proprietatibus locorum in quibus sunt commixta ex quatuor elementis.

De natura autem locorum in quibus generantur et conservantur composita, multifaria est valde Auctorum traditio. Sed ut a communioribus sit narratio, scire oportet quod (sicut supra diximus) locus omnium compositorum commixtus et compositus est, neque est aliquid compositorum quod habitet id omnino simpliciter. Et ideo in loco generationis eorum tria se contingunt elementa, aer scilicet, aqua, et terra. Ignis autem locus ibi esse non poterat: eo quod est simpliciter levis, et ideo quia non est causans cum sit vehementer activus: dissolveret enim omne compositum: propter quod etiam nihil habitat et movetur in igne, sicut in libro de *Causis proprietatum elementorum* ostendimus. Licet autem quædam compositorum eleventur in aerem sicut aves, tamen ipsorum generatio et habitatio in terra est: et ideo proprie terra est locus ipsorum. Sed aer et aqua sunt loca per quæ est motus ipsorum ad cibum. Cujus causa est perfectio, quia aves leves sunt et carnes earum leviores sunt in genere aliis carnibus: propter quod etiam saniores a peritis medicorum judicantur: et leves autem sunt ex multo aere et spirituali quod est in eis: et ideo locus earum est aeris ut frequenter Pis-

In loco generationis compositorum tria se contingunt elementa, et quare locus ignis ibi esse non potuit?

Utrum locus avium sit aer vel terra?

Locus piscium.

ces autem qui frigidi sunt, materiam habent aquam spissam et pinguescentem et viscosam in genere, et ex tali connaturalitate aquam pro habitatione ab ordinante natura acceperunt. Gressibilia autem gravia sunt et terrestria: propter quod in terra morantur sicut in loco habitationis suæ congruo.

Locus gressibilium.

Si quis autem particulariter velit cognoscere omnes naturas et proprietates particularium locorum in aqua, aere, et terra, sciet quod non est punctum in eis quod non habeat specialem proprietatem a virtute stellarum mediam habitationem commixtorum respicientium¹. Ad quodlibet enim punctum habitationis animalium et plantarum et lapidum variatur circulus horizontis, et ad variationem circuli horizontis totus cœli respectus ad medium habitationis variatur. Qua de causa variantur naturæ et proprietates et mores et actus et species eorum qui in eodem loco sensibili videntur generari. Demum quod ex geminis seminibus et animalibus et brutis et hominibus ex hoc diverso respectu proprietates et mores diversi attribuantur. Et hoc est rationale: quia compertum est cœlum diffundere virtutes formativas in omne quod est: maxime autem diffundit eas per radios emissos a luminibus stellarum: et ideo consequens est, ut quælibet figura radorum et angulus diversas in inferioribus causet virtutes.

Quare una res generata non invenitur per

Cum igitur ex motione horizontis necesse sit mutari totum circulum, et ex mutatione circuli mutetur tota figura radorum, et etiam quodlibet punctum habitabilis unum speciale centrum constituat horizontis, necessario consequitur quodlibet punctum habitationis habere virtutes speciales quibus informatur id quod locatur in ipso. Et hæc est causa quare nulla rerum generatarum invenitur

omnino per omnia similis alteri in proprietatibus. Et hic locus est proprie, de quo dicit Porphyrius, quod est unum de individuantibus: quia, sicut tradit Boetius, impossibile est imaginari vel intelligi ut duorum aliquorum omnino idem sit locus. Et sicut hoc est in totis et perfectis rebus, ita est in partibus rerum etiam: quia sicut locus unius non est alterius in toto, ita nec locus unius partis est locus alterius partis. Convenientia tamen est in locis quæ vicina sunt in proprietatibus communibus: et ideo ea quæ vicine habitant, similes habent complexionem et similia conservantia et similia corrumpentia in contrarium. Similitudo et dissimilitudo locorum et virtutum formativarum, quæ sunt in loco, ex materia per signum maxime deprehendi potest in quodam magnetis genere, qui uno angulo fugit ferrum, et in alio attrahit ipsum. Cum enim unus angulus non differat ab alio per magnum loci spatium, oportet quod vicina valde loca sint aliquando diversarum et contrariarum virtutum. Hæc enim contrarietas non est ex materia, quia materia non est causa virtutis et formæ: oportet igitur quod sit ex loco informato a figuratone radorum stellarum. Et hoc est quod egregie dicit Hermes in libro de *virtutibus universalibus*, quod « constellatio est causans virtutem qualitatum eorum quæ infunduntur in inferioribus, et est formativa ipsorum per qualitates elementorum quæ sunt sicut instrumenta virtutum cœlestium. » Non tantum autem quilibet locus particularis, alterius est proprietatis quam alius, sed etiam quilibet per se successive diversarum efficitur proprietatum: eo quod per ortum et occasum super ipsum, et diversam habitudinem earum ad locum quemlibet necesse est variari proprietates ipsius. Et hæc est

omnia similis alteri in proprietatibus.

Sicut locus unius totius non est locus alterius, ita nec locus unius partis est locus alterius.

Quidam magnes in uno angulo attrahit ferrum, et in alio fugit ipsum

Qualitates elementorum sunt sicut instrumenta virtutum cœlestium.

Quare res generatae

¹ Ex his patet quare variantur naturæ proprietates, mores, actus et species eorum qui in

eodem loco sensibili videntur generari.

mutantur in
suis conti-
nentibus
quandoque
ad melius,
et quando-
que ad pe-
jus?

causa quare mutantur res generatæ ex suis continentibus quandoque in melius, quandoque in pejus: licet hoc juvari et impediri possit aliquando per hoc quod generata profunde in se recipiunt contrarias dispositiones, sicut videmus quorundam corpora non ægrotari in locis infirmis propter fortissimam illorum corporum dispositionem contrariam dispositioni infirmitatis quæ inventa est in loco.

Immutationes autem tales in elementis statim apparent ex modica etiam variatione vel mutatione stellarum, sed in elementatis non adeo cito perpenduntur: et hoc contingit ideo quod elementa parum distant a materia: et ideo facillime recipiunt impressiones omnium agentium in ea: sed elementata quasi victas et terminatas habent suas materias per suas formas, et ideo magis resistunt alterantibus agentibus in ea: tandem tamen necesse est, quod ipsa alterentur et corrumpantur finita periodo sui esse quod habent ex virtutibus circuli cœlestis, sicut melius explanabitur in fine secundi *Peri geneseos*¹.

Hæc enim et his similia sunt quæ notantur circa locum illum in communi: quæ tamen per accidens ex vicinitate montium, vel situ eorum, vel ex vicinitate marium, frequenter impediuntur, et aliquando recipiunt impedimentum per artificium peritorum virorum qui noverunt situs et virtutes stellarum, et impediunt effectus: quia, sicut dicit Ptolemæus in *Quadripartito*, « effectus stellarum impediri possunt per sapientiam peritorum virorum in astris. »

CAPUT VI.

De distinctione terræ per loca habitabilia et non habitabilia.

Est autem duplex habitabilis terræ diversitas ex habitudine comparationis terræ ad cœlum. Una quidem quæ distinguit terram totam in quinque plagas sive zonas, quas ponit Plato et Pythagoras et Homerus et plures alii auctores. Alia autem penes quam climatatum secundum latitudinem ab æquinotiali est distinctio. Et de prima quidem loquemur prius, ostendentes quidquid de hoc tradiderunt Antiqui, et rationabiliter dicta accipiamus in his. Est autem tractatio Pythagoræ et Homeri et præter eos omnium qui in Ægypto philosophati sunt, sed et apud Latinos Ovidii et multorum aliorum, terram totam dividi in quinque zonas cœli, quarum tres ponunt inhabitabiles, et duas tantum habitabiles esse voluerunt, quarum mediam vocant *perustam* sive *torridam*: et hanc dicunt esse partem terræ quæ supponitur spatio quadraginta octo graduum fere quod est inter duos tropicos, inter quos est via solis: declinat enim sol versus Aquilonem versus tropicum æstivalem fere per viginti quatuor gradus, et per tantumdem declinat ad Meridiem versus tropicum

Distinctio terræ inhabitabilis duplex, et quedam in plagas vel zonas, et quedam in climata.

De distinctione terræ habitabilis in plagas primo loquendum hic.

Divisio terræ in quinque plagas ex respectu terræ ad quinque zonas cœli.

Quare elementa facillius recipiunt impressiones stellarum et omnium agentium quam elementata?

¹ Cf. II de Generatione et Corruptione, super tex. com. 57.

Quare torrida plaga reddatur inhabitabilis?

hyemalem. Et quia via solis directe est super spatium illud bis in anno, dicunt quod ibi reflectitur radius ejus in seipsum, propter quod combustivus est, et facit partem illam inhabitabilem ex nimio calore. Dicunt etiam quod mare salissimum spatio illi supponitur, et facit locum magis inhabitabilem, et salissimum esse dicunt propter multum terrestre combustum immixtum eidem. Locum autem ex mari inhabitabilem dicunt : quia reflexio radii in se refricati et clarissimi fit ad littora per circuitum talis maris, quæ reflexio multiplicat calorem in littore, et incendit littus, et facit ipsum habitationi non congruum. Duas autem suppositas regiones inhabitabiles esse dicunt propter frigus : eo quod nimis elongatæ sunt a via solis ad quas radii solis non veniunt nisi oblique valde, et non faciunt angulum in ipsa nisi hebetem et obtusum valde : vel forte contingunt loca illa tantum : et ideo nullius effectus vel parvi valde effectus sunt in locis illis : et ideo mortificans frigus est in locis illis, et humorum locorum illorum congelationes commisceri non possunt ad complexionem vivi alicujus constituendam. Propter quod venti venientes a nostro polo frigidi sunt valde et sicci : eo quod humidum congelatum ejus commisceri non potest.

Venti venientes a nostro polo sunt valde frigidi et sicci.

Quantitas duarum plagarum habitabilium.

Quantitates autem illorum duorum locorum esse dicunt diversimode : quidam enim tradiderunt spatium hoc frigidum a septimo climate totum spatium versus Aquilonem : et tunc oporteret, quod esset spatium illud ab utroque polo versus tropicum utrumque quadraginta duorum graduum : quia latitudo septimi climatis est quadraginta et octo graduum, et tota latitudo quæ est ab æquinoctiali ad alterum polorum, est nonaginta graduum : et ideo de ipsis quadraginta et octo gradibus septimi climatis remanerent quadraginta duo de latitudine regionis inhabitabilis. Cum autem viginti quatuor fere gradus sint inter æquinoctialem et tropicum alterum : remaneret ergo habitabi-

lis circa tropicum versus polum viginti quatuor graduum : et hæc esset latitudo habitabilis inter torridam et frigidam versus quemcumque polorum. Hæc igitur est divisio terræ habitabilis et non habitabilis secundum dicta Antiquorum.

Est autem hujusmodi dubitatio magna de torrida, utrum ipsa sit secundum totum inhabitabilis, sicut Antiqui videntur tradidisse. Videtur autem Pythagoræ, Platoni, et Democrito, et sociis eorum, quod totum hoc spatium sit inhabitabile propter quinque rationes, quarum prima sumitur ex dispersione radii solis super illa loca incidentis. Cum enim omnis radius incidens reflectatur ad parem sive æqualem angulum, oportet necessario, quod radius incidens alicui terræ perpendiculariter in seipsum reflectatur : in seipsum autem reflexus radius causat adustionem, sicut probatur in *Prospectivis*. Cum igitur radius solis cuilibet loco terræ qui est inter duos tropicos bis in anno perpendiculariter incidat, oportet quod adustionem bis in anno perficiat per quam torridam reddit, et non congruam complexionatis et commixtis habitationem

Utrum torrida plaga sit tota inhabitabilis?

Secunda ratio quæ fortior est inter omnes, est quod circulus signorum arcus est, et chordæ ejus parvæ juxta puncta quæ attingunt duos tropicos. Viginti enim gradibus ultimi Geminorum parum distant a viginti gradibus Canceri : et si ducerentur chordæ a gradibus Geminorum ultimis ad gradus Canceri primos sibi mutuo per comparitatem respondententes, essent chordæ breves, quæ subtenduntur arcibus sphericis : eo quod circulus signorum ibi ascendit ab punctum tropici, et descendit ab eodem. Sol ergo quando vadit in gradibus quadraginta dictis, quasi stare videtur in eodem loco, et statu suo continuo exurere terræ habitationem : eo quod sicut una columna radiorum suorum perpendicularitate incidit terræ et exurit eam : reddit igitur eam inhabitabilem. Omni autem eodem modo facit in ultimis viginti gradibus Sagittarii, et viginti primis gradibus Capricorni, quibus accedit et re-

cedit ad tropici punctum hyemalis. Incendit igitur etiam ibi habitationem et reddit inhabitabilem. Duo ergo calidissima loca sunt quæ sunt sub tropicis duobus : sed inter duo calidissima non est temperatum medium. Temperatum enim medium est inter calidissimum et frigidissimum. Sic igitur nec locus qui est sub æquinoctiali, est temperatus : et sic totum spatium quod est inter duos tropicos, est combustum et intemperatum, et habitationi contrarium sive incongruum : quia sicut dicit Aristoteles in libro de

Radix habitationis est æqualitas et temperamentum, teste Aristotele.

Causis proprietatum elementorum, et nos infra explanabimus, radix habitationis est æqualitas et temperamentum. Istæ autem duæ rationes sunt fortiores inter rationes Antiquorum torridam esse supponentium.

Adhuc autem inducunt et tertiam, ibi mare dicentes, cui cum radii solis incidunt et stellarum, divaricantur et ex politione et tersione aquæ et a frigiditate aquæ calor excitatus a radiis solis expellitur ad littora, et comburit, et reddit locum inhabitabilem. Hoc autem mare salissimum esse dicunt propter multum terrestre combustum ei admixtum. Dicunt etiam constare per speculum concavum, cui si radius incidat perpendiculariter, elicitor ignis : quia reflexio radiorum super aquam maris perpendiculariter facta habitationem reddit ignitam et combustam.

Adducunt etiam quartam ex probabilibus conjecturis objicientes, et dicunt quod nos invenimus loca illa, quorum declinatio est parva a tropico æstivo valde calida in æstate, et quasi intolerabilis caloris : et hyems illorum locorum est temperata non habens gelu, sicut sunt loca tertii climatis, cujus latitudo est graduum triginta. Si igitur illa loca sunt tam vehementer calida propter unam æstatem quam habent ex sole appropinquante et incedente super Zenith capitum eorum, probabile esset intolerabilis esse caloris terram cui incidit perpendiculariter bis in anno : et ideo esse inhabitabilem.

Quintam autem asserunt rationem ex

conjecturis dicentes, quod omnis complexionari oportet temperatam esse habitationem : et non esse temperatum, nisi inter duo contraria intemperata : et ideo non esse habitationem aliquam nisi inter inhabitabilem propter frigus in parte una, et inhabitabilem propter calorem in parte alia. Sub utroque autem polorum necesse est esse inhabitabilem propter frigus. Necesse est igitur in medio terræ æquinoctialem esse inhabitabilem propter calorem.

Sunt autem Ptolemæi et Avicennæ rationes in contrarium. Dicunt enim isti, quod nos videmus multos homines oculis nostris qui habitaverunt inter tropicum æstivum et æquinoctialem : et libri Philosophorum de astris ibi degentium venerunt ad nos. India enim et Æthiopia in parte est in illis locis. Et ex hoc constat oportere ibi esse habitationem : multas enim civitates gentis Achim et Indorum et Æthiopum in parte constat nobis in climate illo esse. Secundi autem climatis similiter tota latitudo fere inter æquinoctialem et tropicum æstivum existit : cujus latitudo est viginti quatuor graduum, quanta est declinatio solis ab æquinoctiali circulo secundum Ptolemæum : et sunt in eo multæ civitates nominatæ, quarum habitatores plures venerunt ad nos.

Rationes Ptolemæi et Avicennæ in oppositum.

Est etiam rationabile ibi esse habitationem : cum enim juxta physicorum traditionem sol in obliquo circulo sit causa generationis per excessum, et causa corruptionis per recessum, oportebit ibi potissime esse generationem ubi æqualiter accedit et recedit : est autem hoc sub æquinoctiali : erit igitur ibi potissime generatio et habitatio generatorum.

Amplius accessus solis proximus facit calorem, et recessus facit frigus : est autem medium inter calidum et frigidum temperatum : ergo in medio accessu et recessu loca illa erunt temperata, et sic habitationi congrua.

Amplius stellarum effectus fortissimus est in loco in quo multiplicantur maxime

radii eorum. Hoc autem est in viis planetarum. Cum igitur viæ planetarum sint inter duos tropicos, erit ibi fortior vis stellarum : vis autem stellarum est in generatione : ergo erit in locis illis potissime generatio : non potest autem esse generatio nisi in loco habitationis generatorum : oportet igitur ibi esse habitationem congruam generatis.

Hic autem inducunt etiam ea quæ de imaginibus dicta inveniuntur : hæc enim maxime perfecta sunt in viis planetarum, in locis scilicet quæ directe et perpendiculariter respiciunt. Ex omnibus igitur his rationibus, multis magnis viris qui ante hoc nostrum opus fuerunt videtur, quod locus ubi torrida esse videbatur, sit habitabilis.

Hic assentit opinioni Ptolemæi et Avicennæ, in hoc quod plaga dicta torrida, non sit omnino torrida.

Omnibus autem his rationibus et considerationibus habitis, consentiendum videtur Ptolemæo et Avicennæ, ut dicamus torridam non omnino esse torridam, sed esse habitatam tam in littoribus maris quod ibi est (et mare Indicum vocatur, quod multos habet adamantes in fundo) quam etiam in insulis maris multis quæ ibidem a Philosophis esse describuntur.

Sub tropico æstivo est aliquando delectabilis habitatio, et aliquando laboriosa.

Sed distinguendum est, quoniam sub tropico æstivo propter rationes superius inductas non oportet esse continuam et delectabilem habitationem, sed est aliquando delectabilis, et aliquando laboriosa.

Sub æquinocetiali est continua et delectabilis habitatio.

Sed sub æquinocetiali qui est sub medio regionis illius, quæ torrida vocatur, et continua et delectabilis est habitatio : quia licet radius solis bis in anno ibi reflectatur in seipsum, eo quod illi loco perpendiculariter incidit, non tamen diu figitur in eodem loco : quare circulus solis ibi est extensus, et quasi recte recedit ab æquinocetiali, nec rursum accedit ad ipsum nisi interpositis quatuor signis ad minus : et ideo calor accessus ejus non figitur circa locum unum, et ideo nullum locum incendit : et intervenit magnum tempus inter calorem solis quem facit accedendo, et eum quem facit in secundo accessu : propter quod unus calor alium in loco non invenit : et ideo calor ibi non multiplicatur. Nec est verum quod inter

duo calidissima nullum sit temperatum : quia recessus solis causat frigus ex victoria inferiorum elementorum causatum : et ideo licet frigus non sit ibi in summo, est tamen ibi ut temperans extreme calidum.

Et ideo dixerunt quidam Philosophi locum illum temperatissimum omnium locorum, cui tamen dicto eorum non puto esse consentiendum. Sed dicendum, quod temperatissimum necesse est esse eorum locorum, qui sunt inter duos tropicos, et congruum plus complexionibus eorum qui in regione duorum primorum climatum nascuntur, nisi forte per accidens aliquis ibi locus ex motibus temperetur : sed de hoc accidente dicemus inferius. Sicut autem diximus non esse continue delectabilem habitationem sub tropico æstivo, ita consentimus et non esse continue delectabilem habitationem locis illis in insulis illius maris et in littoribus, sed tempore quo sol perpendiculariter incidit locis illis, aut in subterraneis erit habitatio, vel recedendum ad tempus usquequo sol loca illa respiciat oblique.

Locus temperatissimus non est locus sub æquinocetiali, ut quidam crediderunt.

Et hæc est de locis illis traditio Avicennæ et Ptolemæi in libro de *Divisione locorum habitabilium*. Ad ea autem quæ inducta sunt, facilis est determinatio per ante dicta.

CAPUT VII.

Utrum habitabilis sit quarta terræ quæ est ab æquinoctiali usque in polum Australem ?

Occurrit autem hic quæstio gravis, in qua etiam Reges potentissimi et Philosophi peritissimi ab antiquo laboraverunt : reges quidem experiendo, et Philosophi per investigationem rationis, utrum scilicet aliquid de terra quæ ab æquinoctiali usque ad polum Australem extenditur, habitetur vel possit habitari. Si enim habitari possit, tunc frustra esset nisi habitaretur a plantis, animalibus, et hominibus. Sunt autem multorum magnorum rationes, quod non habitari possit : et inducunt præcipue tres rationes, quarum una est Ptolemæi, quod ad illam partem minor per diametrum solis conversa sit, et non propter vicinitatem corporis solis et ultra tropicum hyemale effectus sit locus inhabitabilis. In tropico enim hyemali qui in Meridie est, tres (ut inquit) occurrunt causæ caloris intolerabilis. Una quarum est rectitudo circuli solis circa tropicum per accessum ejus in Sagittario. Et altera est perpendicularis casus radii ejus super loca illa. Quas duas causas supra explanavimus. Tertia vero causa est vicinitas corporis solis : eo quod minor pars diametri ejus est versus finem Sagittarii : et hæc potissima et causa occurrentis caloris : et ideo locum illum et vicina loca dicunt effici inhabitabilia prop-

Quod quarta terræ quæ est ab æquinoctiali usque ad polum Australem, non sit habitabilis.

ter æstum : et concordant cum hoc fere omnium sententiæ, qui dicunt circulum solis concentricum non esse.

Secunda autem ratio sumetur ab hoc, quod necesse est distribuere sic, quod in aliquo loco congruit habitationi. Scimus enim in polo Septentrionali esse frigus dominans quod superiora elementa conducat in inferiora : et immediate probatum est esse temperamentum per latitudinem septem climatum : igitur necessarius erit locus in quo calor dominetur ex victoria superiorum elementorum in inferiora : et hunc dicunt esse quartam terræ partem, quæ in superiori nostri hemisphærii ab æquinoctiali circulo extenditur usque in polum Australem. Cujus signum dicunt esse, quod amphitrites inveniuntur influere continue ab Aquilone in Meridie : cujus causa alia fingi non potest, nisi quia continua conversione elementorum superiorum in inferiora exaltatur continue in Aquilonem : et per oppositam causam conversionis inferiorum elementorum in superiora deprimitur et minuitur in Meridie versus polum Austri : et ideo ab alto fluit per devexum in depressum.

Tertiam autem suæ sententiæ assertionem adducunt a Regum experimentis : nullus enim umquam Regum describentium orbem, neque aliquis historiographorum, sive Astronomorum, vel aliorum Philosophorum, umquam aliquid scripsit de locis illis, nec umquam aliqui pervenire potuerunt, licet multi in hoc laboraverint : et hoc signum esse dicunt, quod nullus habitet omnino in locis illis : et si nullus habitat, tunc frustra esset habitabilis.

Sed his contrarii sunt plures Philosophorum. Averroes enim in commento super librum quartum *Cæli et Mundi*, dicit et Aristotelis et suam fuisse opinionem, quod loca illa sunt habitabilia, et rationem adducit id necessario probantem, ut mihi videtur : dicit enim inter calidissimum et frigidissimum esse temperamentum : necessario etiam est locus

Opinio Philosophorum contraria præcedenti. Ratio Averrois pro hac opinione.

calidissimus sub tropico hyemali : frigidissimum autem esse necesse est sub polo, eo quod obliquissime locum illum radii solis respiciunt : igitur in medio per æquidistantiam ab utroque locus erit temperatus et congruus habitationi. Negat enim Averroes solem eccentricum circulum in quo moveatur, habere : et ideo tertiam causam caloris sub tropico hyemali dicit esse falsam et nullam : sed potius dicit quartam quæ est ab æquinoctiali circulo usque in polum Australem, esse divisibilem per climata habitabilia, sicut et quarta terræ dividitur Septentrionalis, in qua nos habitamus.

Dictum quorundam Antiquissimorum.

Quidam autem Antiquissimorum propter hoc terram non esse rotundam asserbant, sed potius factam semisphæralem, et nullam omnino terram : sed esse aquas dicebant versus polum Australem, et ideo ad nos nullum pervenisse de habitatione quartæ quæ est ultra æquinoctialem. Dicunt enim illi medium semisphærale Aquilonaris infusum aquis, et ab æquinoctiali in polum non esse nisi aquam, et aerem, et ignem, et non apparere de terra nisi dimidium semisphæralis figuræ ejus, et in illa nos habitare contendunt. Quod quidem dictum quia contra rationem est et improbatum in libro *Cæli et Mundi*, hic transimus, et præcipue quia rationem nullam isti pro se inducunt, nisi quia rumores de habitatione illa quæ est ultra æquinoctialem, certos numquam perceperunt. Hæc autem est sententia in fabula Hesiodi antiquitus lecta.

Alia opinio quæ dicitur fuisse Socratis, non consentiens præcedenti opinioni.

Alii autem his non consentientes dixerunt quidem, quod terra est rotunda, et dixerunt quod quarta terræ quæ est Aquilonaris, est elevata extra locum centricum mundi, et ideo porrigitur super aquas, ut sit congrua habitationi : et tres aliæ quartæ sunt sub aquis, et ideo non est in eis habitatio nisi natantibus tantum : dixerunt autem, quod extra hanc quartam Aquilonarem sunt stellæ Aquilonares quædam. Et in hac sententia dicitur fuisse Socrates. Quia vero de

hac opinione mentio erit in secundo libro de *Causis proprietatum elementorum*, ideo illic differemus disputationem contra ipsam, præcipue quia nos in tertio *Cæli et Mundi* probavimus terram esse directe locatam sub aliis omnibus elementis in medio mundi in quantum est medium mundi : hoc enim satis refellit errorem qui dictus est hic.

Ptolemæus autem in libro de *Dispositione sphaeræ* qui est introductorius *Almagesti*, dicit sub utroque tropico, æstivo scilicet et hyemali, habitare Æthiopes : et confirmat hoc per quemdam poetam, qui nomine dicitur Krices, qui Krices inducit Homerum dicentem : et sunt hæc verba Ptolemæi : « Natura quidem exigit duo genera Æthiopum, quorum unum est sub tropico æstivo, et sunt Æthiopes, qui sequuntur nos : et alterum genus Æthiopum est, qui sunt sub tropico hyemali, qui est tropicus æstivus illis, quorum pedes sunt in directo pedum nostrorum. » Et Krices quidem retulit de Homero versificatore, quod ipse dixit hos Æthiopes in versibus suis, cum dicit : « Et virtus in duobus finibus duas habet divisiones, quarum una est in occasibus horizontis, et altera est apud elevationem. »

Ptolemæus in libro de dispositione sphaeræ ponit dari Æthiopes, qui sunt sub tropico hyemali, quorum pedes sunt in directo pedum nostrorum.

Sunt quidam dicentes deserta arenosa longi spatii jacere inter media, quorum sterilitas transitum prohibet : et ideo dicunt nullum ibi habitare : quia cum genus hominum ab uno disseminatum esse constet, aut ille, ut inquirunt, fuit in quarta Aquilonari, aut in quarta Meridionali. Et si quidem dicatur fuisse in quarta Aquilonari, sicut verum est, tunc ad quartam illam transire non potuit propter deserta adusta longi spatii. Si autem fuit in quarta Meridionali, tunc ad istam quartam transire non potuit. Et nos hoc falsum esse videmus, cum oculis videamus in hac quarta homines habitare.

Ponentes quartam terræ ab æquinoctiali ad polum Australem inhabitabilem.

Nos autem salvo meliori iudicio, dicimus aliquam quartam partem quæ est ultra æquinoctialem ad Meridiem, esse habitabilem secundum naturam et habi-

Opinio propria consentiens Homero et Krices poetæ quantum ad aliquid.

In quo differat a Kricis et Homero?

Hæc pro solutione ad rationes probantes esse habitam quartam illam terræ de qua supra.

tatam, ut putamus. Videtur enim consentiendum Kricis et Homero in hoc quod dicunt naturam exigere duo genera Æthiopum. Sed in hoc quod dicunt, quod Homerus dicit et terram esse latæ superficiei et non rotundæ, non consentimus : quia eam rotundam esse satis probavimus in libro *Cæli et Mundi*. Sed videtur, quod multum sit laboriosa et non continua habitatio sub tropico Capricorni propter causas superinductas : sed spatium quod est post tropicum Capricorni usque ad latitudinem septimiclimatis in Meridie mensurando, hoc est, usque ad latitudinem quadraginta et octo vel quinquaginta graduum habitabile est secundum delectationem et continue, sicut et nostrum, et forte plus quam nostrum : propter hoc quod ibi est superius solis, et cæli vicinitas plus temperat frigius regionum quæ distant ab æquinoctiali per quinquaginta gradus a Meridie, quam faciat in Aquilone : eo quod aux ejus est in Aquilone, et oppositum augis in Meridie.

Quod autem dicitur, regionem illam quæ est in meridie, inter Aquilonem et tropicum Capricorni, esse adustam, hoc manifestum est modo quo supra diximus : sed hoc non prohibet quin aliquando possit habitari, quando scilicet sol est in signis Aquilonaribus : tunc enim est eis hyems : et hoc modo etiam nihil prohibet quin homines quartæ Aquilonaris possint transire ad homines quartæ Meridionalis non impediente exustione solis. Sed quod rumores aliqui ex eis ad nos non pervenerunt, omnino non puto esse verum, cum Homerus jam locutus sit de ipsis, et etiam Lucanus de Arabibus qui in torrida habitant, scribat dicens, quod umbras quas habebant dextras in sua terra, quando se convertebant ad Orientem in Meridie suo venientes in quartam Aquilonarem vide-

bant ire sinistras : et ideo dicit loquens de eis :

Ignotum vobis Arabes venistis in orbem.

Sed quod raro transeunt, causa est una latitudo deserti interjacentis, sicut scribunt historiographi : hoc enim desertum arenosum, et procellas facit in eo ventus, et est vastum et latum, ita quod spatio septimanarum multarum transiri non potest : et ideo propter ariditatem illius contingit, quod parum scimus de habitantibus ibi. Et quod nuntii Regum et exercitus illuc non transierunt. Sic etiam intelligitur quod dicunt Philosophi, quod nullus invenitur scripsisse aliquid de habitatione illa : tamen Philosophi diversa valde scribunt de hoc : et ideo dicimus sicut nobis videtur, non præjudicantes aliter dicentibus. In libro enim *Meteororum* aliquid iterum dicemus de hoc secundum sententias Philosophorum. Sed quidquid ibi dicturi sumus, hoc erit opinionis aliorum¹ : hic autem vere scripsimus opinionem nostram.

Protestatur se scripsisse secundum opinionem aliorum in libro Meteororum.

Legi ego quamdam causam cujusdam Philosophi, quare non sit transitus a quarta Aquilonari per torridam ad quartam meridianam. Dicebat enim sub torrida ex parte meridiei esse montes de lapide qui dicitur *magnes* : et est illud genus magnetis talis naturæ, quod carnes humanas sibi attrahit, sicut noster magnes ferrum : et propter illos non posse transire. Sed hoc impedimentum non utique esse credo, sed forte in aliquo loco. In descriptione autem facta sub Cæsare Augusto, legitur quod nuntios misit Augustus ad reges Ægypti et Æthiopiæ, qui naves et impensas pararent necessarias eis quos miserat ad transeundum : et venientes sub æquinoctiali loca paludosa invenerunt, in quibus nihil diffunditur : et lapidosa quæ nec navibus, nec

¹ Cf. III Meteororum, tract. I, cap. 19.

Alia causa
cui non
assentit.

pedibus poterant transire: et ideo sunt reversi negotio non peracto. Quosdam vidi homines qui causam quare non transeatur, dicunt esse inaccessibleis montes præruptos et desertos. Sed mirum videtur, si undique sunt tam inaccessibleis, ut numquam possint transiri. Unde in omnibus credo his verius esse, quod difficilis sit transitus et non impossibilis: et hoc propter vastam et arenosam eremum, quæ adustione solis sterilis est: et ideo sine longitudinis viatione transiri non potest: et hanc esse causam existimo, quare parva est communicatio hominum ultra æquinocbialem existentium in climatibus Meridionalibus, cum his qui nobiscum habitant in quarta Aquilonari.

CAPUT VIII.

De inhabitabilibus regionibus et terris.

Quantæ sunt
latitudinis
loca inhabi-
tabilia pro-
pter frigus?

His autem habitis, de duabus regionibus inhabitabilibus propter frigus est tractandum. Has autem velambas regiones circa utrumque polum esse constat. Et quantæ sint latitudinis, non est certe probatum. Sed credo quod omnia loca per mensem vel amplius (quando sol est in tropico hyemali) sunt inhabitabilia propter frigus: et similiter loca quæ sunt majoris latitudinis. Et hoc quidem probatur experimentis eorum qui habitant ultra latitudinem quinquaginta et sex graduum, qui tantum frigus in terris eorum in hyeme habent, quod sine pericu-

lo vitæ longe ab igne separari non possunt, et terra neque ibi parum germinat, et hoc quod germinat, non ad perfectam pervenit maturitatem: et ideo omnino inhabitabilis videtur esse locus majoris latitudinis existens. Sed tamen sicut diximus de locis qui sunt sub æquinocbialem et tropicis, scilicet quod quidam sunt non continuæ habitationis et indelectabilis, nec habitari possunt nisi in æstate: propter quod et pisces maris illius videmus tempore frigoris transferre se ad littora versus Meridiem, et in æstate redeunt, eo quod in hyeme intolerabile est eis frigus illorum locorum, quod aliquantulum temperatur in æstate.

Est enim sub polo perpetuum frigus et regio tenebrosa continue: nec umquam apparent ibi stellæ vel sol, cum tamen per dimidium annum sit ibi dies, et per dimidium annum nox. Quod ideo contingit, quia frigus excedens illius regionis continue spissat aerem, et convertit in aquam in modum nebulæ spissæ, continue expanditur ibi aer super aquam. Virtus etiam radiorum stellarum et solis quæ ibi est, parva est: et quamvis multiplicetur ex reverberatione quæ fit ad aquam, tum propter hoc quia aqua polita est, et reflectit id quod ad ipsam pervenire potest de virtute radiorum: tum etiam propter naturalem ipsius frigiditatem, et ex qua repercutiendo multiplicat calorem, tamen cum toto illo non efficitur radius fortis: et ideo elevat vapores aquæ, et nihil consumit de eis: propter quod continue nebulosus et caliginosus est aer illarum regionum: et propter hoc semper sunt ibi tenebræ. Et hoc etiam narrant experimentatores navigantes partes Oceani Aquilonaris partis inhabitabilis: et quando vident tenebras, fugiunt reputantes se ultra navigare non posse: eo quod propter caliginem nebulæ spissæ quæ ibi est, se dirigere non valent: eo quod visus etiam ad proxima loca extra naviculam pererrare non potest: et ideo si intrarent caliginem, ad lumen

Quare regio
quæ est sub
polo, sit
continue te-
nebrosa?

redire nescirent. Propter quod etiam natura illorum locorum non satis nota est, nec certa nobis satis esse potest: quia non venit ad experimentum nisi quod scimus, quod signum extremum dominetur ibidem. Et quia frigus excellens mortificativa est qualitas, ibi pauca vel nulla vivere animalia. Et si forte aliqua ibi appareant aliquando animalia, oportet quod sint magna corpore et multarum carniū, quæ frigus non cito penetret: et oportet, quod non continuam habeant habitationem ibi. Et forte frigus illorum locorum est causa quare ventus Aquilonaris est frigidus apud nos. Sed apud habitantes ultra æquinocbialem, ventus a polo veniens est Meridianus, et apud eos est frigidus et siccus, sicut apud nos ventus Aquilonaris: sed ventus Aquilonaris illis venit a torrida et maribus calidis et locis paludosis: et ideo eis est calidus et humidus, sicut apud nos ventus Meridianus. Propter frigus autem regionum illarum sunt animalia frigida in terris illis corpore multum diminuta, vel penitus nulla, sicut asini et hujusmodi. Aves autem rapaces propter corporum suorum constrictorum et spirituum caliditatem fortissimæ sunt in regionibus illis habitabilibus juxta polum: et animalia quæ ibi sunt, tendunt ad albedinem, sicut ursi, et leones, et hujusmodi. Vegetabilia quæ ibi sunt, aliquantulum convalescunt, ut avena, et hordeum: sed triticum nequaquam ibi convalescere potest: et si aliquando seminatur, degenerat in granum alterius naturæ.

Quare in partibus Aquilonaribus sunt montes alti?

Quare maria regionum Aquilonarium raro sunt navigabilia?

Est tamen in talibus locis distinctio: quia quanto sunt frigidiora in superficie, tanto magis recludunt in se vapores calidos diu in ventre terræ congregatos, et illi frequenter erumpunt in montes altos: propter quod tradunt Philosophi montes altos esse in partibus Aquilonaribus perpetuarum nivium et perpetuæ frigiditatis. Est autem immensa illorum locorum frigiditas, etiam causa quare materia illarum regionum sunt raro navigabilia: quia tempore hyemis congelata sunt glacie so-

lidissima, et tempore æstatis fluit in eis glacies divisa, quæ vel in mari congelata fuit, vel per flumina influit in mare. Alio etiam tempore ventus tempestuosus facit in eis tempestates, in tantum quod propter tempestates navigari non possunt, sicut dicit Albumasar: sol enim non consumit vapores, sed elevando confortatur ventus continue, et procellosum facit mare et innavigabile. Est autem regio illa secundum rationis sententiam aquosa multum, eo quod ibi continue aer ad aquam resolvitur, sicut supra docuimus: et in libro *Meteororum* cum subtiliori consideratione dicturi sumus.

Quare regio sub polo sit multum aquosa?

CAPUT IX.

De longitudine et latitudine locorum habitabilium.

Nunc videndum est de parte mundi quæ continue et delectabiliter habitatur. Sciendum autem, quod pars illa non est rotunda ut quidam eam figurant dividentes mundum in Asiam, Africam, et Europam: sed potius extenditur habitabilis nostra a linea Meridionali versus Aquilonem, sicut diximus supra: et latitudo regionis illius est mensura distantiae ad Aquilonem: et quantitas latitudinis est pars circuli Meridionalis terræ illius, cuius latitudo est accipienda secundum quantitatem qua sol quando est in linea Meridionali, accedit ad Zenith capitum habitantium in terra aliqua: et sic dicitur latior et minus lata regio eorum. Mensura

Pars terræ quæ est habitabilis, et quæ dividitur in Asiam, Africam, et Europam, non est rotunda: ut quidam eam figurant.

autem ista dicitur regionum latitudo a Philosophis : propter hoc quod secundum quantitatem arcus, qui est Meridionalis circuli pars, sol et cæteri planetæ qui præcipue causant naturas et proprietates locorum, moventur in cæli latitudine super loca, aut directe perpendiculariter, aut accedendo versus ipsa. Longitudo autem cujuslibet loci dicitur esse per mensuram ab Oriente in Occidentem acceptam : et quantus est arcus a Zenith capitum versus Orientem totius habitabilis, tanta dicitur esse longitudo loci illius a Philosophis. Cujus causa est, quia sol et cæteri planetæ in hoc arcu moventur, aut super loca illa, aut versus ea, secundum cæli latitudinem quæ est secundum extensionem sex signorum semper apparentium super Orientem.

Et secundum quidem has mensuras longitudinis et latitudinis non est habitatio nostra quæ versus Aquilonem est, rotunda, sed potius conficitur ex quatuor partibus elementorum, quorum duæ sunt æquales et duæ inæquales. Ista autem pars est circuli qui intelligitur extendi a polo in polum per Orientem : et pars illius circuli ab ortu solis quando est in æquinoctiali accepta versus polum Aquilonarem per quinquaginta gradus mensurat habitationem, quæ satis delectabiliter et continue habitatur : et remanent gradus quadraginta, quorum pars omnino inhabitabilis est, et pars habitatur cum labore et non continue. Similis autem pars circuli mensurat nostram habitationem Occidentis et æqualis prædictæ. Sed semicirculus æquinoctialis, qui in superiori hemisphærio est, mensurat eam per centrum et octoginta gradus ab Oriente in Occidentem : quia tanta pars circuli extenditur super medietatem superiorem terræ in qua nos habitamus. Arcus autem similis illi et non æqualis mensurat eam versus Aquilonem ab Oriente in Occiden-

tem. Dico autem illum arcum similem semicirculo æquinoctiali : quia et ipse arcus semicirculus ejus circuli intellectualis qui parallelus est æquinoctiali, distans ab ipso in sphæram versus Aquilonem per quinquaginta gradus inæqualis est : quia æquinoctialis circulus est magnus dividens totam sphæram cæli et terræ in duo æqualia : et parallelus, de quo dictum est, de parvis circulis, unus qui spheram cæli et terræ in duo æqualia dividit. Et secundum istas mensuras habitatio nostra, quæ versus Aquilonem est, longitudinem habet plus quam duplam ad ipsius latitudinem.

Movet autem fortasse aliquem id quod diximus de longitudine terrarum, quod scilicet distantia ab Oriente mundi ipsius est longitudo : omnis enim terra suum habet Orientem, cum terra sit rotunda : et omnis terra distat ab Oriente suo spatium æquali, hoc est, per nonaginta gradus : et sic una terra non est longior quam alia. Sed debet talis homo scire, quod rationibus astrorum, et præcipue per eclipses lunares compertum est nostram habitationem non extendi per totum terræ circum, ita quod habitabilis sit habitatio nostra ab Oriente in Occidentem, et per Occidentem iterum in Orientem : eo quod amphitrites fluat ab Aquilone per Orientis punctum in parte una, et per Occidentis punctum in parte alia in Meridie : et vocatur Oriens et Occidens mundi, ortus et occasus continuari ad amphitritem : et distantia ab illo vocatur terræ longitudo. Et multum variatur natura locorum per distantiam parvam vel magnam longitudinis illius.

Videtur autem alicui inconvenienter esse dictum quod diximus de mensuris locorum : quia nos diximus in libro *Cæli et Mundi*¹, quod latitudo est a dextro ad sinistrum, et longitudo a superiori in inferius : et nos diximus, quod dextrum et

Habitatio nostra habet longitudinem plus quam duplam ad ipsius latitudinem.

Ratio falsa, quod omnes terræ habeant æqualem longitudinem.

¹ Cf. de Cælo et Mundo, tract. 1, cap. 5.

sinistrum cœli sunt Oriens et Occidens, et superius et inferius sunt poli, Meridianus, et Aquilonaris: et sic videbitur, quod longitudo locorum sit a Meridie in Aquilone accipiendo, et latitudo sit ab Oriente in Occidentem per contrarium ejus quod diximus hic.

Quod minor
dimensio ab
Aquilone in
meridiem
variet natu-
ram terrenæ
habitationis
quam ab
Oriente in
Occidentem.

Sed advertendum aliter esse in cœlo et aliter in terra: minor enim dimensio variat naturam terrenæ habitationis ab Aquilone in Meridie acceptam, quam ab Oriente in Occidentem. Radius enim planetarum qui naturas dat locis, angulum et circulum mutat ad parvam quantitatem declinationis suæ ad Aquilonem, ita quod cum sit in æquinoctiali puncto, æquat dies et noctes: et declinans ab eo versus Aquilonem per triginta sex gradus, et facit longiorem diem quam sit dies æquinoctii per unam horam in terra quæ secundum latitudinem sedecim graduum distat ab æquinoctiali circulo, et in terra: cujus latitudo est viginti quatuor graduum et facit diem longiorem per horam et dimidiam: et hoc est clima secundum: et in terra quæ ab æquinoctiali distat per triginta gradus, erit dies longior per duas horas, et constituit tertium clima: et si distat per triginta sex gradus, erit dies longior per duas horas et dimidiam, et sic constituit quartum clima: et si distat per quadraginta et unum gradus, et tertiam partem gradus, vincet longior dies per tres horas integras, et vocatur quintum clima. Et si distat per quadraginta quinque gradus et tertiam gradus, vincet longior dies per tres horas integras et dimidiam, et vocatur sextum clima. Et si distat per quadraginta octo gradus, vincet longior dies diem æquinoctii per quatuor horas integras: et erit clima septimum. Et post istam latitudinem non est locus satis temperatus ad terræ nascentia in nostra habitabili. Secundum totum autem semicirculum qui est ab Oriente in Occidentem est una vis radiis corporum cœlestium in locis æqualiter ab æquinoctiali circulo distantibus, et una mensura dierum et noctium. Et cum major dimen-

sio vocetur longitudo, et minor vocetur latitudo, erit latitudo locorum habitabilium secundum distantiam ab Aquilone in Meridiem acceptam: et longitudo secundum dimensionem accepta ab Oriente in Occidente. Et illius causa est, quia in cœlo est motus localis quem oportet esse secundum latitudinem in omnibus quæ ex se moventur. Iste autem motus non est in terra: et ideo minor in ea dimensio est dimensio quæ vocatur minor in aere: vocatur autem illa *latitudo aræ*, et major dimensio vocatur *longitudo aræ*: et sic congrua sunt nomina superius dimensionibus terræ imposita.

CAPUT X.

De diversitate habitationis in terra habitabili, et de diversitate naturæ locorum.

Est autem sciendum, quod in illis terræ dimensionibus quidam a Philosophis vocantur simul habitantes, et quidam circulariter dicuntur habitantes, quidam autem coalternatione, et quidam vero opposite.

Dicuntur autem simul habitantes, quorum habitatio secundum sensum latitudinis et longitudinis una est, licet secundum rationem sit diversa. Ut autem hoc melius sciatur, sciendum quod horizon circulus est, cujus centrum habitationis cujuslibet et cujus circumferentia tangit undique concavum hemisphærii a polo in polum per puncta duo Orientis et Occiden-

Qui dicuntur
simul habi-
tantes.

Horizon
circulus
quid?

Horizon duplex secundum rationem acceptum et secundum sensum.

Quodlibet terræ punctum habet suum horizonem secundum rationem acceptum.

Horizon licet secundum esse sit mobilis, tamen secundum situm est immobilis.

Sufficiens consideratio de horizonte secundum rationem accepto, pertinet ad astronomiam. Secundum quam distantiam localem communiter variatur horizon?

Secundum quam distantiam localem communiter variatur ortus et occasus stellarum?

Qui dicantur simul habitare secundum sensum?

Qui dicantur circulariter

tis diffusa. Et hic quidem horizon duplex est : unus quidem secundum rationem acceptus, alter secundum sensum. Et secundum rationem quidem quodlibet terræ punctum suum habet horizonem, cujus circumferentia cœlum in prædictis punctis attingit : et ideo cujuslibet puncti habitationis nostræ superius diximus naturam esse diversam. Et hic quidem circulus, licet secundum esse mobilis sit, et moveatur secundum esse cujus est horizon, tamen secundum situm est immobilis, sicut et ipsa puncta Orientis et Occidentis quæ situ manent et secundum esse variantur : et de hoc horizonte non intendimus hic plus dicere quam hoc quod dictum est : quia sufficientior consideratio ipsius pertinet ad astronomiam. Horizon autem sensibilis est, qui finit visum, hoc est, postquam sensibiliter est alius punctum Orientis, et alius Occidentis, et alius Aquilonis, et alius Meridiei : et illius quidem diameter ad plus est millium stadiorum secundum Ptolemæum. Secundum autem verissimam ejus deprehensionem tunc communiter deprehenditur variari, quando semidiameter ejus est quadringentorum vel ad plus quingentorum stadiorum. Et ideo quæcumque civitas vel locus elongatur ab alio per quinquaginta stadia, sensibiliter habent alium ortum et alium occasum stellarum secundum tempus sensibile. Et quicumque locus ab alio removetur secundum latitudinem quingentorum stadiorum, sensibiliter calidior vel frigidior est quam alius : et sic sensibilis est distinctio proprietatum longitudinis et latitudinis locorum, nisi sit impedimentum per accidens aliquod loci ex maribus vel ex montibus : de quo accidente nos infra loquemur.

In omnibus autem his locis simul habitare secundum sensum dicuntur, quorum secundum sensum est una loci in calido et frigido et humido et sicco proprietas ex eadem latitudine loci sensibilis, et quibus sensibiliter est secundum tempus unus ortus solis et occasus.

Circulariter autem habitant, quorum

quidem latitudo cum sit una, longitudo non una et eadem est : isti enim sub uno parallelo circulo habitant, qui est æqualis in circuitu latitudinis ab æquinociali circulo : et ille quidem totus calidus et frigidus est, et humidus et siccus : et dies eorum æquales sunt et noctes : sed eorum ortus et occasus non sunt in uno tempore sensibili, nec eorum venti sunt æquales : quia quorum differunt Oriens et Occidens, horum necesse est esse ventos diversos ad minus Orientales et Occidentales.

Coalterne autem habitare dicuntur, quorum una quidem est longitudo, sed non latitudo eorum est una et eadem : et illi sunt qui sub eadem linea habitant in Meridionali, quibus omnibus est in uno eodem quam tempore sensibili Meridies, quando sol accedit ad Zenith capitum ipsorum in motu diurno : sed tamen non habitant sub eodem parallelo circulo, qui distet æquali latitudine per circuitum habitationis ab æquinociali circulo. Et horum quidem est unus ortus et occasus solis in die : non tamen sol oritur et occidit in eodem gradu : sed non est eis æqualis dies : nec est eis æquale frigus et calidum et humidum et siccum, eo quod non æqualiter dilatantur ab æquinociali circulo.

Opposite autem habitant, quorum est unus parallelus secundum latitudinem eandem, sed non est eis longitudo una, sed potius distant per maximam longitudinem quæ potest esse per circulum : hoc autem est quando elongatur a se per totum semicirculum : tunc enim distant per longitudinem totam diametri, et convertunt contra se pedes invicem, ita quod diameter inferior circuli paralleli per Zenith capitum, et per pedes, et per centrum semicirculum transit : et isti vocantur *antipodes*, et sunt in nostra habitabili, sicut habitantes omnes qui sunt in uno eodemque climate elongati a se per totam longitudinem Orientis ab Occidente nostræ habitabilis. Est autem habitatio talium æqualiter quidem calida et frigida, humida et sicca, propter unam

cohabitantes ?

Qui dicantur coalterne habitare ?

Qui dicantur opposite habitare ?

Qui dicantur antipodes ?

eandemque latitudinem quam habent : non tamen in una hora habent Orientem et Occidentem, sed potius differt ad minus per sex horas ortus istorum ab ortu illorum, et similiter occasus. Cum enim nonaginta gradus sint a centro horizontis uniuscujusque usque ad ortum, oportet quod eorum quorum horizontis centrum est in Occidente, ortus sit ubi est Meridies eorum qui sunt in Oriente : quia medietas centum et octoginta graduum, qui sunt semicirculus, qui est ab Oriente in Occidentem, est nonaginta gradus, qui sunt a circulo Meridiei orientalius usque ad occasum mundi.

CAPUT XI.

De diversitate temperamenti climatum.

In septem climatibus duplex excessus et duplex temperamentum.

Temperatura simpliciter mundi est in climate quarto

De natura autem horum septem climatum intelligendum est, quod duplex est in eis temperamentum, et duplex excessus : est enim excessus in calidissimo et frigidissimo, et sic calidissimum est sub torrida, et frigidissima habitatio est post septimum clima. Et quantum ad hoc per æquidistantiam temperamentum est in climate quarto. Et hanc puto ego esse temperaturam simpliciter mundi, et non quoad complexionem alicujus animalis in singulo. Et ideo potest bene esse, quod clima quartum temperatum sit simpliciter, et non sit temperatum complexioni asini, vel bovis, vel alterius magis calidi vel frigidi quam sit calor vel frigus climatis quarti.

Est autem alia temperatura inter duo Alia temperatura. calidissima, sicut diximus supra, quorum calidissimorum unum est sub tropico æstivo, et alterum sub hyemali : et tunc temperatura erit sub æquinoctiali æqualiter ab utroque distante : et hanc quidem temperaturam Avicenna et quidam alii vocari simpliciter *temperaturam* dicunt, eo quod nullus in mundo locus adeo sit temperatus, sicut locus qui est sub æquinoctiali. Quod ita esse ego non consentio : quia temperatura illa non est inter contraria, sed potius inter duos excessus ejusdem qualitatis, et ideo locus medius, sicut et superius diximus, non esse temperamentum secundum calidum et frigidum, sed potius remissior in calido inter alia duo loca : locus autem medius inter calidissimum et frigidissimum est temperatum frigidum et calidum, et ideo est delectabilis.

Est autem dubitatio quædam de his Dubitatio. quæ dicta sunt, utrum scilicet locus Utrum locus quarti climatis sit temperatissimus? quarti climatis sit temperatus inter habitabilia ? quoniam excedens in frigidissimo, non est clima septimum, sed potius locus inhabitabilis sub aquilonari. Similiter excedens in calidissimo non est locus sub æquinoctiali et citra parum in latitudine primi climatis, sed potius sub tropico, quæ latitudo est semicircularis. Medium igitur per æquidistantiam acceptum inter frigidissimum quod est latitudinis nonaginta graduum, vel parum minus, et inter calidissimum quod est latitudo viginti quatuor graduum, videtur quod est latitudinis amplius quam quadraginta graduum : et hoc est sextum et septimum clima : illa igitur videntur magis temperata quam quartum clima. Cujus etiam indicium videtur esse, quod homines illorum climatum pulcherrimi sunt corpore, et proceræ et pulchræ staturæ, et venusti coloris, cum homines quarti climatis parvi sint et fusci coloris : ubi enim complexio hominis maxime conualescit, illud videtur magis congruere homini ad habitandum. Conualescit autem magis ubi pulchriores

generalius et fortioris et procerioris stature sunt homines; et hoc est in sexto et septimo climate, sicut apparet: locus enim qui magis congruit hominis complexioni, videtur esse temperatior simpliciter, cum homo sit magis æqualis temperatæ complexionis inter alia quæ generantur ex contrariis: eo quod ejus complexio magis accedit ad medium, et recedit ab excellentiis contrariorum. Ad hoc videtur facere quarti climatis calor maximus in æstate, et diminutio pluviarum: si enim esset temperatum simpliciter, ut inquit Philosophi, tantus in eo esset excessus frigoris in hyeme, quantus est excessus caloris in æstate: et oppositum hujus experimur ad sensum: quia excedit in ipso calor æstatis, et non excedit in eo frigus: et secundum has rationes temperatum hyeme videtur esse temperatum clima sextum, in quo nec sentitur excessus caloris in æstate, nec frigoris in hyeme.

Solutio dubitationis.

Ad hæc autem omnia dici convenit, quod in veritate temperamentum simpliciter magis est in actu calidum quam frigidum, eo quod frigidum est qualitas mortificativa: et sic enim secundum excessum est destruens motum generationis et vitæ: et ideo temperamentum non accipitur inter duo extrema, quorum unum sit frigiditatis mortificantis, et aliud caliditatis adurentis: sed potius frigus complexionale tarde movens est in parte una, et calidum minus exsiccans est in parte altera: et quoad hoc a Philosophis est determinatum, quod quartum clima est temperatissimum. Proceritas autem humanorum corporum et carnositas et pulchritudo sunt causata ab humore frigido non habente calidum quod sufficienter moveat, nec habente calidum quod sufficienter sit mobile: sed potius humores talium sunt spissi et quasi congesti: nec consumitur in eis ali-

Ad primam rationem. A quo causentur proceritas, carnositas pulchritudoque humanorum corporum?

quid: et ideo sunt magis ex aliqua maligna frigidæ complexionis, sicut nos in sequenti distinctione ostendemus: bene enim consentimus, quod corpus hominis magis est inter corpora composita temperatum: sed hæc temperatura si bene et subtiliter consideretur, est in quarto climate.

Nec impedit hoc quod obijciunt de calido excedente in æstate, cum frigus non excedit in hyeme: quia jam ostendimus actu calidi sensibilis esse actum vitæ et motum sine quo nihil commisceri nec vivere potest: et ideo ubi est intemperamentum frigoris, non est clima temperatum: sicut nec id quod habet æqualiter frigoris, sed potius id quod habet plus caloris quam frigoris, et non excedit in calore.

Ad secundam rationem.

His habitis, adhuc advertendum est differentem esse naturam istorum climatum in cujuslibet medio et extremis. Est autem hæc differentia diversimode accipienda in diversis¹: quoniam primi climatis extrema regio quæ æquinoctiali subditur, est temperatior quam media regio ipsius: et media regio ipsius est temperatior quam extrema quæ secundum clima attingit. Secundi autem climatis prima linea quæ continua est primo climati, temperatior est quam media, et media temperatior est quam extrema quæ tertio climati continuatur.

In omnibus autem his climatibus extremitates Meridionales calidiores sunt, et Aquilonares sunt frigidiores: medium autem in quolibet eorum habet secundum naturam quoddam illius loci temperamentum: est enim medium in ipsis acceptum sicut in virtute morali: quod enim in moribus uni est parum, alteri est multum: et quod uni est medium, alteri est extremum. Et similiter est in locis secundum climata distinctis: quod

In omnibus autem climatibus extremitates Meridionales sunt calidiores, Aquilonares frigidiores: medium autem habet quoddam temperamentum.

¹ Hic animadvertite quare differens sit natura in medio et extremis cujuslibet climatis, licet

hæc differentia diversimode accipienda sit in diversis.

enim uni est extreme frigidum, alteri est extreme calidum : vel forte plus quam extreme frigidum, secundum diversas operationes climatam ad invicem, et secundum quod generata secundum bonam habitudinem existentia in uno climate, corrumpuntur in alio.

Alia causa diversitatis naturæ climatam.

Est autem et adhuc alia causa diversitatis naturæ climatam : cum enim terra sit figuræ rotundæ, sicut in libro *Cæli et Mundi* ¹ habuimus, stellæ quæ radios suos projiciunt super terram, non projiciunt eos super alterum : quoniam stellæ Aquilonares radiant super climata ultima, et non super prima. Stellæ vero Meridionales radiant super prima, et non super ultima : et cum stellarum illarum lumina sint diversarum naturarum, sicut in libro *Cæli et Mundi* diximus, oportet quod climata irradiata ab ipsis, efficiantur diversarum naturarum.

Est autem eodem modo dissimilis latitudo regionum Aquilonarium, præter hoc solum quod clima primum et secundum illius regionis sunt calidiora quam nostra propter brevitatem diametri solis conversam ad signa Meridionalia, sicut diximus supra.

Et hæc quidem de medietate distinctionis terræ in nostro hemisphærio quantum ad præsentem spectat intentionem sufficienter dicta sunt. De diversitate enim temporum eorum in hyeme et in æstate, et de diversitate umbrarum quæ projiciuntur ab horoscopis ipsarum, astronomiæ proprium erit determinare.

CAPUT XII.

De natura et dispositione inferioris hemisphærii.

Est autem nunc inquirendum de medietate terræ quæ in inferiori hemisphærio est, de qua diversa et pene contraria a diversis Philosophis scribuntur. Communiter enim scribunt et dicunt nullum nostræ habitationis ad illum locum pervenisse : quia omnes illi qui scripserunt de observationibus locorum et astrorum, invenimus in superiori hemisphærio possuisse suas observationes, et præcipue cognoscitur in scriptura quam scribunt de eclipsibus lunaribus. Eclipsis terræ est in omni terra eodem modo, et in uno eodemque tempore : et cum habitantes per longitudinem climatam Philosophi tempus eclipsium notaverunt, non invenimus umquam distantiam unius Philosophi ab alio nisi per duodecim horas æquales : et cum in qualibet hora ascendant quindecim gradus æquinoctialis æquales, constat quod in duodecim horis centum et octogenta gradus ascendant : et hæc est medietas circuli cui tantum medietas terræ subditur : et tunc unus Philosophorum observantium in una regione eclipsim aliquam lunæ non distare ponit ab alio nisi per medietatem terræ :

Communiter ponitur medietatem terræ quæ est in inferiori hemisphærio, esse inhabitabilem.

¹ II de Cælo et Mundo, tract. iii, cap. 7 et 8.

sicut si esset eclipsis habitanti in Oriente in prima hora noctis, eadem esset habitanti in Occidente in duodecima hora ab illa : et in hac deprehenderunt Philosophi quidam in superiori hemisphærio tantum habitare homines, quibus tota fere multitudo Mathematicorum consensit, dicens ibi nullum omnino habitare : quia constat quod major est sphaera aquæ quam terræ : oportet igitur aquam in aliqua parte terram operire ponamus, sicut videmus quod aer operit aquam et terram : cum autem non operiat eam in nostro hemisphærio, videtur eis concedendum esse quod operiat eam in inferiori.

Alia ratio ad idem quæ est Mathematicorum.

Quod aqua cooperiat medietatem terræ quæ est in inferiori hemisphærio.

Cujus tres videntur mihi rationes quæ ab eisdem Philosophis colligi possunt, quarum una sumitur ab ortu orbis. Constat enim quod super inferius hemisphærium stellæ secundum diversum motum ab Occidente oriuntur : vadunt igitur super illos nocte a sinistro cœli, sicut patet ex his quæ in secundo libro *Cœli et Mundi* determinata sunt. Signa autem secundum quæ moventur planetæ, in eis supra ordinem naturalem disponuntur : quia in eis est Piscis post Arietem, et post Piscem Aquarius, et post Aquarium Capricornus, et sic de aliis : et cum naturalis motus planetarum sit secundum ordinem signorum ab Occidente in Oriens, videbitur non esse ordinatus motus cœli ad esse et generationem super illos. Propter quod dixit Pythagoras inferius hemisphærium esse locum pœnarum et tartari, vocans dispositionem orbis super inferius hemisphærium orbem sub quem deprimunt hominem peccata sua : et gemere eos qui ibi sunt sub aquis infinitis.

Dictum Pythagoræ.

Secunda ratio.

Aliam autem rationem inducunt quæ prius dicta est : quoniam dicunt aquam plus quam in quadrupla proportione esse majorem quam sit terra, et ideo non pos-

se contineri sub terræ extremis, sed oportere, quod terram plus medietate cooperiat : quæ quidem totam operire deberet si motus solis et aliarum stellarum eam in parte non exsiccaret.

Tertiam autem inducunt rationem Hesiodi, quod locus ille esset inutilis, cum nullus umquam ibi habitaverit : ab uno enim, ut inquiunt, omnes multiplicati sunt : et hunc aut in illo, aut in isto hemisphærio creatum fuisse. Quod quidem hic creatus sit, experimentum probat : ideo nullos ab ipso generatos dicunt illum descendisse.

Tertia ratio quæ fuit Hesiodi.

Hesiodus tamen dicit etiam terram inferiorem esse latæ figuræ, ut habilis sit ad natandum super aquas : quia latum non facile mergitur. Concordare autem cum ipso videtur Homerus, sicut Krices narrat in libro de *Natura locorum habitatum*.

Concordia Homerici Hesiodo, ut narrat Krices poeta.

Sunt autem alii Philosophi, sicut Albumasar et sui sequaces, dicentes illam terram habitabilem esse, sicut et istam in qua nos habitamus. Cum enim solis radii et stellarum omnes angulos suos describant super eam, oportet quod exsiccet in ea humidum in locis super quæ sunt anguli acuti radiorum, et in loci super quæ radii perpendiculariter incidunt, et humidum generetur in locis aliis quæ longioris latitudinis sunt a via solis : ex talibus autem effectibus locus fit habitabilis. Apparet igitur, ut inquiunt, quod locus inferioris hemisphærii habitabilis sit, sicut iste.

Opinio Albumasar, quod medietas terræ quæ est sub hemisphærio inferiori, sit habitabilis.

Nec obstat quod stellæ oriuntur eis a sinistro : quia sinistrum illud cœli non est acceptum secundum esse, sed secundum situm. Sinistrum enim cœli quod secundum esse accipitur, unum est, et aliquando est in Oriente nostro secundum situm, sicut in libro *Cœli et Mundi*¹ est determinatum. Sed sinistrum secundum situm, hoc est, quoad nos tantum, et hoc nihil

Ad primam rationem in oppositum.

¹ II de Cœlo et Mundo, tract. I, cap.

prohibet quoad nos esse dextrum : et ideo ratio Pythagoræ nulla est omnino. Et quod dicit de ordine signorum, satis eliditur per hoc quod in nostro hemisphærio secundum duos motus cœli duo sunt ordines signorum : ab Occidente enim in Oriens disponuntur ordine naturali secundum motum naturalem planetarum : sed ab Oriente in Occidens secundum motum primi mobilis dispositione præpostera disponuntur : et sic est in hemisphærio inferiorum, quod ab Oriente illius hemisphærii in Occidens illius præpostere disponuntur : sed ad Occidente suo in Oriens suum ordinem habent et dispositionem naturalem.

Ad secundam rationem.

Et quod aqua dicitur occupare majus spatium quam terra (ut elementum quod minus habet de materia quam terra, et spissum minus est) dictum est, non quod ita sit in effectu, sed quod ita est proportione aquæ ad terram. Si enim tantum materiæ aquæ quantum est in aliqua parte terræ, spatio comparatur : erit aqua in majori spatio quam sit terra.

Aqua facile minuitur, et facile augetur, non sic alia elementa.

Quod autem aqua major sit terra in effectu, incertum est, quia multa sunt aquam diminuentia : et cum ipsa sit elementum facilis conversionis in aliud elementum, facile minuitur et facile augetur : et ideo multoties diluvium fit per aquam plus quam aliquod aliud elementum. Si igitur fiat proportio materiæ aquæ ad terram, ex uno pugillo terræ fiunt forte mille pugilli aquæ : et ideo ad hanc proportionem dictum est esse aquam majori spatio quam terra. Si enim in effectu sic esset, aqua non posset limitari littoribus terræ : sed in uno erit supra terram totam. Sunt tamen aliqui qui contendunt aquam esse majorem multa proportione quam terra : sed illi fundant intentionem suam super proportione spissitudinis terræ ad spissitudinem aquæ : et ex tali proportione, cum nota sit eis proprietas terræ, æstimant de quantitate aquæ.

Ad tertiam rationem.

Quod autem ad nos non pervenit aliquis de habitatoribus inferioris hemisphærii, non est ex hoc ut inducunt, quia

nullus ibi habiter : sed potius quantitas Oceani interjacentis undique circa terram per circuitum, quod propter nimiam distantiam locorum suorum transnavigari non potest. Si autem in aliqua parte transnavigatum est, hoc est sub torrida : quia ibi secundum naturam littora ejus sunt magis stricta. Nec sunt audiendi qui fingunt ibi homines habitare non posse, eo quod caderent a terra si ibi habitarent : dicere enim eos cadere qui pedes habent ad nos, vulgaris imperitia est : cum inferius mundi non sit acceptum quoad nos, sed simpliciter, ita quod simpliciter inferius est, et ubique vocatur versus terræ centrum.

Removet falsam rationem quorundam.

Si igitur dictis viris qui valde probati fuerunt in philosophia, consentiamus, tunc dicemus inferius hemisphærium omnino dividi, sicut superius divisum est, et habere regiones inhabitabiles propter frigus, et inhabitabiles propter calorem, et regionem habitabilem distingui per climata, sicut nostra distincta est : et hoc quidem est verum secundum continentiam naturalis dispositionis. Hæc igitur de natura locorum per naturalem dispositionem dicta sunt.

Concludit opinionem Albumasar quam tenet.

CAPUT XIII.

*De diversitate naturæ locorum ex acci-
denti montium, marium, et silva-
rum.*

Mare in ge-
nere aqua-
rum est ca-
lidum.

Loca Meri-
dionalia sita
super ma-
ria, sunt ca-
lidissima et
sicca.

Vina quæ
ibi nascun-
tur, sunt ca-
lidissima et
siccissima,
sicut sunt
vina Cypri.

Loca sita
supra mare
et acceden-
tia ad cli-
mata frigi-
da, sunt
postifera, et
multiplican-
tur in eis
coruscationes
et tonitrua.

Differunt autem locorum proprietates per accidens marium et stagnorum et aliarum aquarum, et per accidens silvarum et montium. Mare enim in genere suo calidum est propter terrestre combustum sibi immixtum, et propter multam radiorum divaricationem super ipsum : et ideo necesse est, quod loca vicina sibi aut sint calida et sicca, aut calida et humida superfluo humore, aut frigida et humida. Loca enim meridionalia sita super maria quasi aduruntur ex reflexione radiorum solis ex multiplicatione luminis ad littus, et illa loca arenosa et calida et sicca sunt : et mare divisum super illa loca etiam ad terrorem solis convertitur in sales, et loca illa facit terrestria ex calido adurente et sicco adusto. Et si vina nascuntur in locis talibus, calidissima sunt et siccissima, ita quod intolerabilem æstum excitant bibentibus ea, sicut sunt vina quæ nascuntur in insula quæ vocatur Cyprus, et in aliis locis similibus.

Loca autem quæ remota sunt a Meridie, et accedunt ad climata frigidiora et temperatiora, sita super mare aliquod, efficiuntur calida et humida nimio humore corrumpente. Locus enim talis plus habet humidi quam calor consumere

possit : et ideo calor multiplicat ipsum et corrumpit : et ideo talia loca frequenter sunt vaporosa et pestiferosa habitantibus ea : et in locis illis sunt multa tonitrua et coruscationes : quare corrumpuntur multum et inficiuntur loca illa, ita quod inducunt gravem mortalitatem in homines et alia animalia : quia aer humidus corrumpitur et efficitur venenosus, et penetrat indigestus ad interiora vitalium, et perimit subito. Talia autem loca etiam paludosa sunt frequenter ex humore diffuso super terram et corrumpente habitationem. Quandocumque enim calidum non est nisi corrumpens humidum, et non vincens ipsum, inducit pestiferas corruptiones. Et ideo talia loca, etiam ea quæ cultura nascuntur in talibus locis, frequenter corrumpunt : quia, sicut diximus supra, locus et locatum connaturalitatem habent multam. In Septentrione autem sunt frigida et humida, et vapores resoluti sunt frigidi et grossi multum infrigidantes loca illa, et aer grossus est ex vapore grosso immixto sibi : et ideo loca illa frigida sunt per naturam : tamen æstates illorum locorum non multum calefiunt, et hyemes eorum non multum frigidantur. Et hoc ideo contingit, quia aer spissus non est multum susceptibilis caliditatis vel frigiditatis de facili : et talia loca, licet non sint pestifera, tamen non sunt sana.

Vicinitas autem multa montium, diversas dat proprietates locis ex situ et altitudine ipsorum. Si enim sint humiles montes, non multum variant naturam locorum : et si sunt alti valde, tunc sunt nivosi frequenter, et tunc aut sunt siti versus Aquilonem claudentes locum, aut versus Meridiem, aut versus Occidentem. Et si quidem sunt ante locum versus Aquilonem, tunc erit locus per naturam calidus : quia reflexio radii (quæ ad montes est) calefacit locum vehementer. Et ideo in talibus montibus vina fortia generantur in latere Meridia-

Quando calidum non vincit humidum, sed illud corrumpit, inducit pestiferas corruptiones.

Loca sita super mare in septentrione sunt frigida et humida : tamen non multum calefiunt in æstate, nec multum infrigidantur in hyeme.

Vicinitas montium aliorum versus Aquilonem, facit loca calida, nisi ex perpetuis nivibus temperentur vel infrigidantur.

no, nisi fuerint multum alti : quia tunc habebunt nives perpetuas, ex quibus aut temperantur, aut infrigidantur loca.

Loca versus Aquilonem habentia montes altos et multos ad meridiem, sunt frigida vehementer et sicca et sana ad habitandum.

Si autem montes sunt ad Meridiem, et locus versus Aquilonem, et sunt alti montes et multi, locus erit frigidus vehementer, tam ex nivibus montium, quam etiam quia detectus est locus vento Aquilonari, et tectus et occultatus a vento Meridionali. Et quia ventus Aquilonaris dissipat nubes, erit locus ille frigidus et siccus et sanus ad habitandum, nisi ex alio accidente prohibeatur.

Loca versus Occidentem habentia montes ex parte Orientis, sunt frigida et humida, non bona ad habitandum.

Si vero montes sunt ex parte Orientis, et locus versus Occidentem, erit locus quoad illud accidens frigidus et humidus habens grossam terrestreitatem impuram : frigidus quidem erit, quia tectus est ab Oriente : et ex vicinitate montium grossam habet humiditatem, quia patulus est vento Occidentali frigido et humido : et erit locus non bonus ad habitandum.

Si vero fuerint montes ad Occidentem, et locus habitationis ad Occidentem, tunc erit locus detectus vento Occidentali, et protectus ab Orientali, et quoad hoc erit frigidus et humidus, turbidum habens aerem, et ideo non multum sanus.

Locus qui est juxta montes nivosos et frigidos, est temperatus congelatus.

Locus autem qui est juxta montes nivosos et frigidos, congelatus est propter nimium frigus : quia ex nive est in eo frigus : et ideo ventus Aquilonaris gelatus est iterum et flat præcipue ex resolutione nivium. Infrigidatur etiam locus post resolutionem nivium.

Locus profundus est malus quomodocumque sit profundus, vel inter montes, vel sicut sunt foveæ magnæ.

Locus autem profundus inter montes conclusus vel alia de causa profundus, sicut sunt foveæ magnæ et profundæ, malus erit : quia semper erit vapore terrestri plenus per quem inficit et inflat corpora, et aer siccus, eo quod non est purus, sed turbidus et spissus, non de facili recipit immutationem frigoris et caloris, nec eventatur. Nec promoveri potest ex duabus causis, quarum una est : quia totus est quasi fovea, in cujus profundum ventus non potest intrare, sed flat in superioribus ejus. Alia causa est,

quia aer ejus est ita turbidus et spissus, quod a parvo moveri non possit, etsi attingerit eum.

E contrario autem est de loco alto non ex montibus, sed ex terræ elevatione, hic optimus est præcipue humanæ vitæ ad habitandum : eo quod est frigidus et siccus non excellenter, sed habet frigiditatem in actu magis quam caliditatem : et ideo aer hujus est purus frequenter : quia frigus reprimit vapores et caligines quæ impurum faciunt aerem, et non habet impuritatem et nebulas nisi post nivium resolutionem : et tunc non multum, quia aerem habet purum valde : ideo in æstate cito calescit, habetque æstatem calidam, et in hyeme cito infrigidatur. Hic enim aer est optimus, qui cito recipit temporis qualitatem, et in tali loco plura elementa mutantur secundum tempora : et ideo est in eis sanitas et longa vita, licet forte vina regionis talis non sint multa nec multum fortia.

Locus altus ex terræ elevatione est optimus habitationis.

Ille aer est optimus, qui cito recipit temporis qualitatem.

Locus autem planus et se habens descender undique, non habet proprietatem naturæ nisi eam quam diximus ex latitudine et longitudine ejus causari.

Locus autem habet accidentia multa ex stagnis vicinis, et aliis aquis, et paludibus et lacubus, quæ sunt in eo : ex vicinitate autem talium inficitur locus, et fit humidus grossa humiditate, et aliquando pestilentiosior in loco ex corruptione lacus et paludum : et fundus talis est frequenter corruptus, quando non est lapidosus, nec purgatur aquis influentibus in ipsum : et de hoc erit sermo in libro *Meteororum*.

Multa accidunt loco ex vicinitate stagnorum, paludum, lacuum, et hujusmodi.

Terræ autem sitæ in medio magnarum silvarum vel juxta silvas, quantum ad hoc semper habent aerem suffocatum et spissum, et multas habent nebulas et turbines : quia fundus silvarum est vaporosus, et vapor ille sub tactu arborum est conclusus et inspissatus : et ideo sapientes antiqui curaverunt loca sua succisione arborum et nemorum. Nocent autem in

Habitationes sitæ juxta silvas, semper habent aerem suffocatum et spissum.

Antiqui curaverunt loca sua succisione

arborum et
re norum.

arboribus præcipue nux et quercus et
cæteræ arbores quæ vel amaritudine sua
inficiunt aerem, vel proceritate sua con-
cludunt eum, et eventari et purificari non
permittunt.

Hæc igitur de distinctione natura-
rum loci sufficiant: quia de locis parti-
cularibus prolixior est sermo: et ex his
versibus habent cognosci quæ dicta sunt.

Qua ex
arboribus
noceant
habitationi-
bus.



TRACTATUS II

DE NATURA LOCATORUM CAUSATA A LOCIS.

CAPUT I.

Quod diversitates elementa faciunt in elementatis.

Superest autem ex his quæ dicta sunt cognoscere et determinare naturam eorum quæ in locis dictis habent generari : et de his nostra intentio est in hac secunda distinctione hujus libri facere tractatum.

Primum autem loquamur de commixtione eorum, quorum natura diversificatur ex latitudine loci vel longitudine simplicibus. Dicamus igitur, quod elementa

quatuor ex locis superius dictis qualitatibus variata, diversas faciunt habere locata in ipsis generationes et naturas : terra enim commixtione sua cum elementis aliis generatis dat retentionem et fixationis permanentiam, et signorum conservationem : et ideo qualitatibus diversificata diversitatem horum effectum facit in generatis.

Similiter et aqua quæ sui humiditate interminabilis est, in se continuat terræ siccum undique influens partibus ejus, et facit ipsam terram producibilem in lineas, et facit recipere figuras decenter et cohærere sibi partes angulorum qui sunt in generatis omnibus : et ideo consequens est, quod si ipsa aqua variatur in suis proprietatibus ex loco, quod generata ex ipsa ex loco multam recipiant diversitatem. Et hæc quidem duo elementa etiam ex loco diversitatem in suo pondere capiunt : propter quod licet in omnibus sint gravia, tamen in quibusdam generatis graviora efficiuntur quam in aliis.

Aer autem eodem modo qui sui commixtione cum aliis facit spiritualitatem in generatis, et materia est spiritus, et

Terra dat mixtis fixationem, permanentiam, et signorum conservationem.

Aqua et terra in quibusdam generatis efficiuntur graviora quam in aliis, et hoc quia ex loco capiunt diversitatem in suo pondere.

motu suo ducit sursum aquam et terram sibi commixtam, et vehit virtutes generatorum, necesse est quod operetur in generatis naturæ diversitatem : quoniam ipsum constat ex loco innumerabiles recipere proprietates et naturas.

Quid faciat
ignisi n
mixto ?

Ignis vero licet nullam ex loco sensibilem recipiat varietatem, tamen quando incorporatus secundum ea quibus incorporatur, diversimode operatur. Equidem in omnibus commixtis ignis facit calorem ad formam terminantem et penetrantem penetratione nutrimenti in eis quæ nutriuntur : et in animalibus sua perfectione facit perforationem ad vias spirituum et virtutum, et motu suo extendit et protendit superius corpora, et multa hujusmodi operatur secundum quæ necesse est variari ejus effectus in his quæ differenter rara et spissa sunt, et differenter calida et frigida, et differenter humida et sicca.

Cum autem hujusmodi naturæ rerum non ex componentibus primo, sed potius ex locis causantur, oportet hic fieri mentionem de ipsis : quia hic de naturis locorum et locatorum secundum quod locata sunt in ipsis, suscipimus facere tractatum. Cum autem omnia quæcumque mixta sunt, in se excellentiam contrariorum mixtorum statim habeant, et sint reducta ad unum actum et complementum medii, oportet intelligere, quod medium illud non est secundum numerum et quantitatem et pondus elementorum quæ in ipso miscentur : quia si ita esset, non haberet mixtum illud ullum locum in tota longitudine et latitudine locorum : eo quod nullum elementorum vinceret in ipso : et oporteret ipsum simul esse et elevatum et oppressum, quod non potest esse secundum naturam. Oportet igitur mixturam fieri secundum proportionem et exigentiam speciei quæ constituitur per mixturam, ita quod in omnibus mixtis abundet terra et aqua : quoniam si ignis et aer abundaret, ita quod tantum haberet locum ignis et aer, oporteret, ipsum esse adeo rarum, quod figuras

Quare oportet in omnibus mixtis abundare elementa gravia ?

propriam non contineret, et quod ipsum esset penetrabile valde : et tunc terra et aqua exiret ab ipso, et dissolveretur mixtura. Et ideo nullum mixtorum locum habet in igne et aere, sed in terra et aqua : quoniam potius si aliquando generetur in loco aeris, sicut lapides et metalla quædam aliquando generantur in nubibus, tamen recipiendo formam mixti statim tendit ad locum terræ, et ibi salvatur et manet. Eadem etiam causa est quare etiam aqua in mixtis dominari non potest : si enim dominaretur aqua in aliquo mixtorum, oporteret tunc esse humidum fluidum : et hoc licet figuras optime reciperet, tamen nullo modo contineret.

Quare nullum mixtum habet locum in igne, aut aere ?
Lapides et metalla quædam aliquando generantur in nubibus.

Quare aqua non potest dominari in mixtis ?

Hac igitur necessitate omnia commixta corpora ad locum terræ moventur, et ibi quiescunt. Propter quod et maximam suæ naturæ recipiunt diversitatem ex terræ longitudine et latitudine et aliis accidentibus ejus. Hujus autem signum est, quod semina non ad magnam distantiam terræ seminata, statim germinant, et aliquando ad aliam speciem convertuntur. Triticum enim in terra majoris latitudine quam quadraginta graduum seminatum raro convalescit : et si exurgat inter duas vel tres seminationes, degenerat in granum ignobile, quod a quibusdam vocatur *siligo*, quod tamen optime in septimo climate convalescere videmus. Econtra autem in terra minoris latitudinis seminata siligo, infra duas vel tres seminationes vel ultra quatuor nobilitatur in triticum. Et similiter est de multis aliis granis. Et licet non sit sic in quibusdam aliis plantis et animalibus, tamen multam et magnam suorum fructuum et seminum recipiunt alterationem ex locorum distantia. Grana enim prædicta vicinarum sunt naturarum et specierum similibus : quod ostendit figura herbæ et calami eorum : et ideo unum alteratur in alterum potentia quæ educitur in actu per nutrimenti et caloris loci similitudinem et congruentiam ad speciem quæ illi loco est connaturalis.

Quare omnia mixta ad locum terræ moventur et ibi quiescunt ?

Nota diversitatem in tritico seminato in diversis locis.

Nota idem de siligine.

Dat causam illarum diversitatum, quare reperiuntur in illis granis, et non in plantis aliis, et animalibus ?

Et ideo ex loco tales seminum fiunt de specie ad speciem transmutationes.

Amplius autem signum ejus est, quod locus cum virtutibus quæ sunt in ipso, dat multam proprietatem locato. Accipimus in plantis quæ eradicantur salvis radicibus et cum multa terra sibi adhærente si ad vicina loca transplantentur, tamdiu languescunt antequam convalescere possint. Cujus causa non est nisi dissimilitudo loci unius ad alium locum, quamvis sit eidem vicinus: et ideo oportet plantam virtutibus illius loci in quem transplantatur, assimilari paulatim antequam convalescat. Et hoc significat etiam

Nullum punctum terræ habet easdem virtutes cum alio.

nullum punctum terræ habere easdem virtutes cum alio, et nihil omnino habere easdem virtutes omnes quas habet alterum. Et virtutes (quas habet quodlibet) continue mutantur sub circuli variatione qui primo facit et generat locata per virtutes quas influit unicuique loco.

Propter quod etiam sapientes Philosophi circulum uniuscujusque loci diligenter considerant primo: deinde præcipiunt considerare virtutes locorum quasi stellas secundas, et ex his duobus conjunctis prognosticant de natura rei generatæ: stellæ enim per alium, et non immediate influunt virtutes: sed utuntur ad fluxum virtutum suarum duplici medio, quorum unum est radius, secundum locum continentem: et per hæc duo veniunt ad naturam rei generatæ quam formant et terminant virtutes influxæ. Variatio autem situs stellarum est variatio figuræ quam describunt radii super circulum horizontalis: et hæc est causa variationis virtutum locorum et eorum quæ generantur in locis: et ideo necesse est scire has variationes physicum naturalem.

Vocat virtutes locorum quasi secundas stellas.

Stellæ influunt virtutes suas duplici medio, scilicet radio et loco continente.

CAPUT II.

De duodecim modis quibus perficitur commixtio elementorum in locis habitabilibus.

Cum autem sint duæ causæ et vitæ generatarum rerum in locis diversis, una scilicet terminans quæ est calor, et altera quasi materiam dans quæ est humidum seminale: sed quod hæc duo ex locis variantur, sic necesse est esse variata locata ipsis. Frigidum quippe mortificativum est per se: et ideo oportet ipsum esse victum in omni re quæ habet esse et vitam per mixturam. Victum autem non deservit nisi continendo, et constare faciendo humidum per calorem terminatum. Siccum autem mixtura sua tenet humidum ne defluat. Sed hoc quod terminat ad formam humidum essenziale, hic solum dat rei proprium et naturale augmentum. Calor autem informatus virtutibus cœlestibus format et terminat ad esse et dat vivere. Propter quod si sciverimus ex loco varietatem calidi et humidi, sciemus universaliter (secundum quod competit huic scientiæ) naturas corporum generatorum quas habent ex locis. Habitationis autem nostræ cum sint climata septem, necesse est esse septem media secundum locum, et quatuordecim excellentias, et sic viginti et uno modis variari corporum natura ex locis habitabilibus quæ per latitudinem solum distinguuntur.

Calidum et humidum sunt duæ causæ vitæ, quibus ex loco variatis variantur et locata.

Quomodo rigidum non facit ad vitam nisi prout vincitur, et quomodo ut victum facit ad eam?

Calor informatus virtutibus cœlestibus est ille qui terminat humidum essenziale ad formam et esse.

Quot modis variantur corporum naturæ ex locis solum secundum latitudinem distinctis?

Ut autem hoc melius intelligatur, dicimus duas esse cujuslibet rei compositæ ex contrariis mixtiones : unam quidem quæ est secundum proportionem speciei suæ, et alteram quam habet ex loco in quo est perfecta ejus generatio. Illam vero quæ est ad speciem, habet communem cum omnibus suæ speciei individuis, sicut dicitur unam mixtionem esse contrariorum in homine, et aliam in asino, et aliam in leone, et sic de aliis. Et hæc quidem in specie considerata una est. Sed si consideretur secundum esse individui designati in specie, tam multiplex est, sicut est numerus individuorum. Est autem in uno individuo multiplex variatio secundum quod proportionatur individuum ad individuum, quod est melioris compositionis in specie sua, et secundum quod comparatur individuum ad dispositiones in quibus debet esse secundum propriam compositionem, et secundum quod comparatur ad dispositiones in quibus est secundum tempus et locum et cœtera accidentia quæ impressiones suas relinquuntur in ipso. De his autem compositionibus sigillatim tractare pertinet ad librum de *Numeris*, et ad scientiam libri de *Vegetabilibus*, et ad scientiam libri de *Animalibus*. Sed hic tantum considerabimus causas variantes quæ accidunt ex locis. Sicut autem diximus, hæc varietates sunt viginti et una. Cum enim sint climata septem, quæ usque ad intolerabile frigus distinguuntur, erit unumquodque secundum tria variatum, hoc est, secundum extrema et secundum medium, sicut variatur circulus sensibilis secundum tria puncta, Aquilonis, Austri, et secundum centrum.

Causæ varietatis quæ est ex locis habitabilibus, sunt viginti et una.

Oportet autem aliam locati proprietatem esse in circumferentiæ parte (quæ majoris latitudinis est) quam sit in centro vel alia parte circumferentiæ, quæ minoris latitudinis est. Est enim quilibet circulorum sensibilium qui in communi est horizon climatis quodam suæ regionis versum cujus absque dubio omnis alia figura radiorum est super circumferentiæ

partes, et alia super centrum : propter quod locata circumferentiæ in partibus et in centro, diversa erunt media compositarum, et diversæ componentium qualitates. Et hoc licet secundum rei veritatem et secundum rationis convenientiam sit innumerabilibus modis in climate primo, tamen sensibilis variatio non causat nisi res diffusas tantum. Cum autem quilibet horizon sic tripliciter varietur per quadraginta vel quinquaginta stadia, sicut supra digessimus, fiunt intra unam habitabilem unus et viginti modi componentium, quibus elementa diversimode conveniunt in mixtis cujuslibet speciei quæ est in climatibus.

Est autem extra hos modos compositio in his locis, quæ propter frigus, aut non continue et non delectabiliter, aut etiam omnino sunt inhabitabilia. In his enim oportet esse humidum spissum, et quasi congelatum, et spiritus parum habens : et hoc habet duas secundum omnem modum quo sentiri potest notabiliter unum locum esse superiorem quam alium, quousque veniatur ad illam quæ postrema est in latitudinem.

Sic autem est etiam in aliis regionibus intolerabiliter calidis, excepto hoc quod calidum minus et compositioni et vivere et esse repugnat quam frigidum : calidum enim fortasse movens humidum, aqueum, terreum, siccum, non tantum dissolvit et consumit, sed etiam commiscet faciendo unum elevari vaporabiliter in aliud : et cum commixta sunt humidum et terreum, viscositate sua retinent calidum in se, et spirituale aereum : et sic etiam in calidis regionibus perficitur commixtio. Quod non contingit in frigidissimis : quia frigus excellens sistit et abscindit modum evaporationis et comprimit humidum aquæ in se, et terreum comprimit, ita quod exprimit ex se humidum si quod in se habet, et sic remanet status simplicium, et impeditur commixtio. Et si est ibi conversio elementorum superiorum ad inferiora, hoc facit frigiditas vincens : et non est qualitas

Calidum minus repugnat compositioni et ipsi vivere quam frigidum.

Quomodo frigiditas impedit commixtionem ?

Frigiditas
potius con-
vertit mix-
ta ad ma-
teriam quam
perficiat in
eis mixtu-
ram.

quæ facit mixturam, cum unum non faciat transire in aliud, sed potius impediendo mixturam (per hoc quod impedit subtilitatem et ingrossat corpora) et convertit inferiora elementa : et cum illa sint corporum compositorum materia, potius ea quæ commixta sunt convertit ad materiam, quam perficiat aliquam in eis mixturam. Et ideo aliqua generari possunt in torrida. In terra autem inhabitabili nihil penitus generatur, nisi forte sit lapis aliquis qui dominio frigoris constringitur, sive sit terreus, sive aqueus, sicut crystallus. Dictæ autem commixtiones licet sint, ut dictum est, numeratæ in extremis et in medio, si tamen absolute medium dicatur, quod simpliciter ab extremis magis discedit, est in istis commixtionibus, sicut in præcedenti distinctione habitum est, simpliciter medio modo commixtum quod in medio quarti climatis, et post in primo climate (quod est in extrema linea) venimus, est in medio : et post hoc illud quod est in medio, et excedens in calido id quod est generatum sub linea tropici æstivi, qui est circulus finis Geminorum et principium Cancri, et in tertio climate erit magis temperatum, quod in quarto climate est vicinius : et talis consideratio est in aliis. Si autem natura utriusque climatis in se consideratur, absque dubio est in eo accipere extrema et medium secundum modum qui dictus est : et tunc medium verius habet naturam commixtionis illius climatis cujus est medium quam extrema.

Ex his autem colligitur, quod commixtio quæ est generans in septimo climate, est in medio excellenter frigida generatis in quarto climate, et his quæ sunt ante quartum clima, quæ sunt minoris latitudinis quam ipsum : et si transferantur illuc, corrumpuntur in ipso. E converso quæ sunt in medio climate quarto vel alio quod est ante ipsum in excessu frigoris, erunt in climate sexto vel septimo : et si illuc transferantur, locus inducit eis corruptionem. Sicut au-

tem dictum est de commixtis in una habitabili, sic intelligendum est de alia : quia de similibus idem est iudicium : et eodem modo de inhabitabilibus tam propter frigus quam propter orbem est intelligendum.

CAPUT III.

De diversitate accidentium eorum quæ generantur secundum determinatas diversitates.

Ex superius autem habitis, facile cognoscitur de generatis in locis determinatis secundum dictos modos. Videmus enim ea quæ in locis calidissimis nascuntur, esse calidissima et nimia siccitate rugosa, sicut grana piperis, et nigra multum propter ipsorum caliditatem, sicut sunt Æthiopes, quorum primum semen generationis calidum est, et matrix mulierum calida et sicca, et decoquit semen conceptum decoctione fortissima, et nigrescunt corpora eorum propter corporis adustionem : educit enim calidum ipsorum humidum subtile, et adurit terrestre grossum quod permanet, et generat nigredinem : et terrestria membra quæ sunt in eis, sicut ossa, fiunt albisima, sicut apparet in dentibus eorum. Et caro eorum sanguine infusa est, sicut sunt carbones accensi, sicut apparet in linguis et faucibus eorum quando ora aperiuntur. Et habent ora prominentia propter calidum acuens os eorum, et oculos eorum ex calore ac venas et panniculos habent

Causa nigredinis Æthiopum.

Quare habent dentes albos ?

Quare habent ora prominentia ?

Quare eorum corpora sunt agilia et levia, et quare sunt timidi cordis ?

Quare naturaliter non timent febres ?

Quare cito senescunt ?

In trigesimo anno sunt senes deficientes.

Quare plus abundant cholera rubra et nigra, quam aliis humoribus ?

Quare facile pariunt Æthiopes, licet non de facili concipiant ?

Præcipui Mathematici et magici fuerunt in India.

Qui sunt in climate quod est sub Cancro, sunt leves corpore, et fatui mente, et nigerrimi.

rubentes. Et quia corpora eorum sunt calidissimo aere circumdata, necesse est, quod sint porosa et sicca : eo quod evaporat continue ex eis humidum : propter quod sunt levia et agilia corpora eorum. Et quia cum humore etiam educuntur spiritus eorum, ideo efficiuntur corda eorum timida et frigida multum paucos humores habentia. Propter quod naturaliter febres non timent multum, eo quod natura sibi conscia est, quod non est materia multa in eis humoris corrupti. Et hi tales citissime senescunt propter naturalis virtutis defectum, quæ cum spiritu evaporat, ita quod ætas eorum est triginta annorum : et tunc sunt senes et deficientes : et quia corpora rara habent, evaporat humidum propter loci calorem, ut diximus, et remanet terrestre combustum siccum : quod si leve est et ebulliens, facit choleram rubeam : et si est adustum innaturale, tunc facit choleram nigram : et his duobus humoribus præcipue abundant corpora Æthiopum plus quam phlegmate et melancholia naturali. Quia vero corpora calida calore loci semper laxa sunt et rara, et ideo membra partus mulierum laxa sunt et mollia valde : propter quod facile pariunt mulieres eorum, licet propter siccitatem et debilitatem matricis earum non de facili concipiant. Operationibus autem animalibus qui sunt sub æquinociali, vigent propter subtilitatem spirituum, et plus in inveniendis propter calidum movens et acumen spirituum eorum. Cujus signum est : quia præcipui Philosophi in India fuerunt, et præcipue in mathematicis et magicis propter fortitudinem stellarum super climata illa super quæ perpendiculares radios projiciunt planetæ. Hoc tamen est in climate primo sub æquinociali, et non sub secundo quod est sub Cancro, propter caloris intemperantiam quam supra ostendimus : quia Æthiopes nigerrimi leves quidem sunt corpore, et fatui mente propter defectum et evaporationem spirituum animalis. Siccitas autem et caliditas etiam est in causa, quare pili eorum sunt pauci

et crispi ad modum granorum sinapis. Licet autem hujusmodi nigri aliquando nascantur in aliis climatibus, sicut in quarto et quinto, tamen nigredinem accipiunt a primis generantibus qui complexionati sunt in climatibus primo et secundo, et paulatim alterantur ad albedinem quando ad alia climata transferuntur.

E converso autem Gothi et Daci ex parte Occidentis, et Sclavi ex parte Orientis; nati in fine alicujus climatis et ultra sunt albi propter frigus complexionale ipsorum : et quia corpora eorum porosa non sunt, et locus eorum est frigidus et constringens corpora eorum, remanet humidum multum in eis. Et hoc auget corpora eorum et facit ea carnosa et phlegmatica : quia cum vapor in loco digestionis generatus, evaporare non possit propter corporis et pororum constrictionem, reflectitur ad stomachum, et facit in eo humorem aqueum, sicut in olla fervente reflectitur fumus ad operculum, et convertitur in aquam, et distillat in ollam ex qua fumus est elevatus : et efficiuntur corpora eorum spissa : et ideo ventres eorum sunt calidi, et digestio bona in eis, et corpora solida. Propter quod constricta sunt membra partus mulierum eorum et duræ carnis : et ideo difficulter pariunt, et multæ ex eis in partu periclitantur propter corporum eorum scissuram. Et quia frigus constringit meatus et venas, et tunc cum hoc exprimit id quod est in eis de sanguine, ideo mulieres Aquilonares raro emundantur a sanguine menstruo, et frequenter sanguinem emittunt de naribus : propter quod eas raro concipere pronuntiaverunt Philosophi.

Sed hujus nos videmus instantiam in mulieribus Germanicis, quæ multum concipiunt fere ultra omnes mulieres, et difficillime pariunt, et raro a menstruis emundantur plures earum. Quod absque dubio ideo contingit, quia frigus loci et constrictio corporum eorum impedit evaporationem spirituum et humoris : propter quod virtus earum fortis semper manet, et illa facit eas concipere mul-

Quare Gothi, Daci et Sclavi sunt albi ?

Quare sunt magnorum corporum ?

Quare ventres eorum calidi, digestio bona, et corpora solida ?

Quare mulieres aquilonares raro emundantur a sanguine menstruo ?

tum : et quando non perfecte sunt emundatæ a menstruis. Et hæc etiam causa est, quare corpora earum calida sunt vehementer : et ideo sunt audaces, quia calor semper abundat sanguine et spiritu. Propter quod (quasi natura sibi conscia) multum timent febres, quarum in eis magis in humoribus est abundantia : et non ita timent vulnera : eo quod natura prodiga est sanguinis in eis, cujus multam habent abundantiam. Et sunt pili eorum multi et plani et non crispi. Operationes autem eorum animales non vigent propter spissitudinem corporum eorum : est enim humor in eis piger, et spiritus non obedit motui et receptioni formarum animalium. Sunt igitur tales hebetes et stolidi : nec hoc fit ex studii exercitio, sed quando moventur, multum durant et efficiuntur multo meliores post exercitium. Hujus autem signum est, quod communitas populi Mediolanensis semper studet circa leges et studia liberalia et artes, de quibus non multum curat populus Dacus et Sclavorum.

Propter quod jam quartum clima et vicinum sibi quintum laudabilia sunt, quæ media sunt inter istas excellentias, habentia laudabiles utriusque gentis proprietates medias, secundum quod unicuique facile est indagare qui scit medium constitui ab extremis. Est autem istorum longa ætas et operationes tam naturales quam animales laudabilissimæ, et mores boni, et studia laudabilia, nisi ex consuetudine ducantur ad prava. Mores autem Aquilonarium lupini sunt propter cordium eorum calorem. Leves autem sunt nimis Meridionales. Medii autem inter hos facile colunt justitiam, et fidem servant, et pacem amplectuntur, et hominum diligunt societatem. Propter quod Vitruvius architectus dicit diutius permansisse regnum Romanorum quam alia regna : quia ut medium expositum fuit inter Meridionales qui acumine ingenii et rationis multa machinantur, et inter Aquilonares qui ferocitate attentant temere, habentes contra Aquilonares au-

daciam, et contra Meridionales studium senatus et sapientiam : et sic per eadem obvians utrisque per quæ tam isti quam illi regnum Romanum labefacere quærebant.

CAPUT IV.

De accidentibus generatorum ex diversitate accidentium locorum.

Sicut autem quidam locorum per accidens differant ex montibus, vel maribus, vel nemoribus, vel paludibus, vel aliis accidentibus, sicut supra digestum est : ita differunt etiam ea quæ in eis nascuntur et corrumpuntur. Nati enim in locis lapidosis planis frigidis et siccis, fortissimi sunt et ossei in membris, juncturas habentes valde opertas, et sunt statura proceri, diligentes bellum, durantes in bello, et habentes membra nodosa, et sunt morum indomabilium, et sunt saxei homines, et proportionabiliter sunt alia quæ nascuntur in terris eorum. Si autem sunt loca humida et frigida, sunt nati in loco illo pulchrarum facierum, planas lineas in faciebus habentes, et juncturas habent valde occultas, et sunt carnei multum et pingues, et non multum longi, et laxatur frequenter venter eorum, et sunt audaces propter fumum cordis multum : sed cito laxantur in labore, et ideo non sunt acres in bellis : albi sive flavi multum in colore existentes, et sunt in concupiscentiis fœminarum propter calorem ventris eorum et humorem :

Quare corpora earum calida et quare sunt audaces ?

Quare multum timent febres, et non ita vulnera ?

Quare habent pilos planos : et quare non vigent in animalibus operationibus. Quare Gothi, Daci et Sclavi sunt hebetes et stolidi ?

Quartum et quintum clima sunt laudabiliora aliis.

Nota de incolis quarti et quinti climatis.

Mores Aquilonarium sunt lupini : Meridionalium autem sunt leves.

Dubium Vitruvii.

Dispositiones nascentium in locis lapidosis planis frigidis et siccis.

Dispositiones nascentium in locis humidis et frigidis.

quæ duo faciunt ventositatem fœminalem, quæ facit rigescere membra genitalia. In locis autem calidis et siccis habitantes sunt, sicut Meridionales, sibi proportionati in calore et siccitate. Et habitantes in locis calidis et humidis, sicut homines quarti climatis, in quantum sibi proportionantur. Sed habitantes in montibus frequenter nodosa et strumosa habent colla et guttura propter aquam talem in eis phlegmaticam, superfluitatem generantem.

Habitantes in montibus frequenter habent colla et guttura strumosa.

Et habitantes in eo loco qui detectus est ad Oriens, et tectus est ad alias mundi partes, optime habitant quando non fuerint multum Aquilonares, vel multum Meridionales : quia super illos statim oritur sol, et ventum purum movet super eos, et radii solis temperant frigus ejus, et subtiliant aerem ejus : et ideo domus eorum fenestras magnas et amplas debent habere versus Orientem, quæ statim mane diluculo sunt aperiendæ.

Habitantes in locis detectis ad Oriens et tectis ad alias mundi partes optime habitant.

Sed e contra habitantes in locis detectis ad Occidentem et clausis ad alias mundi partes male habitant : et fenestras in domibus eorum non sunt faciendæ versus Occidentem, sed claudendæ multum : quia sol occidens recedit ab eis subito, et non subtiliat aerem eorum : et ventus fortis præcipue de nocte venit super eos : eo quod sol occidens impuritatem aeris et nebularum propellit ad horizontem hemisphærii quod relinquit : et illa sic expulsa facit aerem turbulentum et ventum malum et nocivum.

Habitantes in locis detectis ad Occidentem et clausis ad alias mundi partes, male habitant.

Hi vero qui detecti sunt ad Meridiem et non ad alias mundi plagas, sunt qui male habitant propter ventum turbulentum calidum humidum pestilentum : et quia pori illorum aperti sunt propter calorem Meridianum, talibus utendum est vestitu, ne ventus ad medullas eorum penetret : et obstruendæ sunt eis domus à Meridie forti obstructione.

Qui habitant loca detecta ad Meridiem et non ad aliam partem, male habitant.

Qui autem deteguntur ad Aquilonem obstructis aliis mundi partibus, sunt homines duræ carnis valde et glandulosæ,

Natura habitantium loca detecta ad Aquilonem.

et spermata eorum sunt efficacia valde ad filiorum generationem, et corpora eorum non faciliter mutantur ab accidentibus extrinsecis, et sunt illi quos acumina medicinarum et præcipue scamonea minime laxant, eo quod in corpora eorum minime possunt penetrare. Econtra autem multum laxant eos qui sunt in Meridie tales medicinæ, eo quod laxas et molles habent carnes.

Quod autem diximus de hominibus, probabiliter est in aliis animalibus et plantis et lapidibus : eo quod omnia in loco generata, a locis (sicut sæpe diximus) contrahunt naturales proprietates. Cujus signum est, quod ursi in locis frigidis et humidis, et lepores in locis multum humidis et multum frigidis et siccis sunt albi coloris, cum in aliis climatibus tendant ad nigredinem, vel sunt flavi coloris.

Non solum homines, sed bruta, plantæ, et lapides contrahunt naturales proprietates a locis.

In quibus locis ursi et lepores sunt albi coloris.

Est autem in omnibus dictis generatis advertendum, quod ea quæ dicta sunt, virtutem habent secundum calorem vel frigus et siccitatem et humiditatem generaliter in loco diffusa. Si enim contingit in quocumque climate calido frigiditatem ad locum unum congregari et ibi aliquid generari, hoc erit frigidissimum, plus habens frigiditatis quam si generatum esset in loco frigido : quia, sicut diximus in libro *Meteororum*, frigiditas per expulsionem ad locum unum congregata, multiplex est ad frigiditatem in loco frigido generaliter expansam et diffusam. Similiter autem est de caliditate si ipsam expelli in loco frigido contingat : tunc enim generatum in illo loco in quem expellitur dicta caliditas, calidissimum erit et calidius, eo quod generatur in climate calido, sicut patet in cicuta aquatica quæ calidior est quam alia : eo quod frigus expansam omnem in circuitu caliditatem in loco generationis ejus expellit.

Quomodo contingat frigidus generari in climate calido quam in frigido et econtra calidius in frigido quam in calido ?

Cicuta aquatica calidior est quam alia.

Tales igitur locatum habet ex loco proprietates et naturas : similes autem his ex dictis cognosci poterunt.

TRACTATUS III

IN QUO EST COSMOGRAPHIA.

CAPUT I.

De descriptione quartæ Orientalis nostræ habitabilis.

Aristoteles ubi tractat de *natura longitudinis et latitudinis locorum et locatorum* qui ad nos non pervenit integer, ponit orbis quamdam descriptionem, in qua nominat flumina et maria et regiones et quasdam (licet paucas) civitates : quod licet artificiosum non multum sit, tamen ne in aliquo deesse his qui nostra dicta legere cupiunt, videamur, nos brevem orbis mappam huic operi adju-

mus, in qua primo nostram describemus habitabilem, ostendentes maria ejus, et montes nominatos, et flumina famosiora, et distinctiones et limitationes nostræ habitabilis : deinde etiam tangemus terminos latitudinum septem lineis notabilibus, quæ climata discernant, ut ex illis natura et proprietas loci cujuslibet ostendatur. Nec tangemus nomina civitatum nisi paucarum : quia nomina illa mutata sunt, et civitates antiquitus nominatæ sunt destructæ in magna parte, et novæ civitates in aliis partibus sunt ædificatæ.

Volumus autem in hac descriptione præcipue imitari descriptionem quæ facta est ab Augusto Cæsare, qui primus mandavit ut totus orbis describeretur, licet aliqui ante ipsum Imperatores hoc attentaverint, tamen ipse descriptionem perfeci fecit per quatuor partes habitabiles mittens legatos, qui orbem metirentur et describerent, cujus Orientales partes descripsit Nerodosus quidam Philosophus, Septentrionales autem Theodorus alius Philosophus, Policletus autem sapiens Meridionales descripit partes, Occidentales autem per itineraria sua

Intentio propria in hoc tertio tractatu.

Quare ut in pluribus omittit nomina civitatum ?

Quam velit orbis descriptionem imitari ?

Qui descripserint partes orbis mandato Augusti Cæsaris.

Romani sciverunt : eo quod in Occidente præcipue erant dominia et viæ eorum.

Quanto tempore completa fuerit totius orbis descriptio?

Facta est autem totius orbis descriptio in annis triginta tribus : et omnis mundi continentia, quæ tunc erat, perlata est ad Senatum. Posterius autem aucta est multum et crevit habitatio : et ideo multæ sunt civitates magnæ, quæ tunc non erant.

Errant dicentes habitationem orbis esse rotundam.

Incipientes igitur breviter describere orbem, repetimus ea quæ dicta sunt, quod errant omnes illi qui habitationem orbis rotundam esse contendunt. Et licet Aristoteles formaverit eam in circulo, non fecit hoc ideo quod velit habitationem rotundam, sed ut in ea signet quatuor puncta Orientis, et Occidentis, et Aquilonis, et Meridiei. Et ideo quando nos describimus partem Meridianam, non intelligimus illam quæ continetur ad polum Meridianum, sed illam quæ incipit ab æquinociali contra circulum Meridianum, qui est medium nostræ habitationis, quasi dividat omnia climata per medium inter Orientem et Occidentem. Per occidentem autem intelligimus continuatam ad mare Oceanum Occidentale. Per Orientem autem partem illi oppositam quæ in Orientalem Oceanum est porrecta. Per Aquilonem autem non intelligimus terram quæ ad polum arcticum continuatur, sed potius terram versus Aquilonem, quæ habitabilis est et tolerabilis frigoris : et hæc habitatio quadrangula est inter quatuor arcus, ut diximus supra, descripta et per medium divisa per arcum circuli Meridiani : et hujus quidem hæc est figura. Descriptionem autem quam inducimus, et figuram non ponemus, sed continue narrabimus situm orbis, ostendentes quidem in qua parte et quo ordine situm est : et tunc quilibet etiam per se figuram habitationis potest imaginari.

Prima orbis divisio in tres partes.

Dicamus igitur primam esse habitationis divisionem in tres partes, Asiam, Africam, et Europam, quamvis Africa hominibus malam præstet habitationem propter eremos et venenatas bestias et

accensa loca quæ sunt in ea, propter quod etiam eam quidam Europæ conjunxerunt, et in duas tantum partes mundum debere dividi contendunt. Hæ tamen tres partes simul junctæ in quatuor quartas nostram habitationem dividunt, scilicet in quartam Orientalem, et Occidentalem, et duas reliquas, quæ sunt Aquilonaris, et Meridionalis : et harum quartarum nos scribemus habitationem.

Quidam conjunxerunt Africam Europæ.

Orbis diviso in quatuor quartas.

Quot maria montes et flumina habeat totus orbis nostræ habitationis?

Tradunt autem prædicti viri, quod omnis orbis nostræ habitationis habet mediterranea maria triginta, et montana quinquaginta et flumina famosa septem. Provincias autem et gentes infra in loco suo nominabimus.

Ex maribus autem his Orientalis quarta ab Oceano usque ad medium nostræ habitationis habet maria octo, et montes septem, et flumina magna viginti duo. Mare autem primum ab Oriente, est quod dicitur Caspium, deinde Persicum. Tertio autem mare quod vocatur Tyberiadis vel Tybericum, quarto mare Aspulthenos, quinto mare Rubrum, sexto mare Arabicum quod dicunt sinum Arabicum, septimo mare Caphartium, et octavo Mare mortuum, quod est in Pentapoli regione.

Quartæ Orientalis quot sint maria et quæ?

Famosi autem montes regionis ejusdem sunt primus Caucasus, secundus Armenus, tertius Camestres, quartus Sina, quintus mons Hediam, sextus Libanus, qui est in Phœnice regione, septimus Caspius vocatur.

Montes famosi ejusdem quartæ quot sint et qui?

Flumina autem sua quæ fluunt in ipsa, licet non orientur in ipsa, Thetidis, Exoas, Sigoco, Enges, Camestres, Sigodus, Itaspes, Euphrates, Armodius, Carmanta, Carchatiæ, Fura, Crisorchos, Tigris, Alibrata, Adropagiter, Alimalius, Pactolus, Crises, Eleuceri, Adonis, Jordanis. Horum autem fluviorum ortus et fluxus, et ubi merguntur, infra descriperunt cosmographi supra memorari.

Flumina ejusdem quartæ.

Fluvius igitur Thetides nascitur ex tribus fontibus in campis Sireicis : et cum illi tres omnes in unum conveniunt, unus efficitur fluvius Terriodus dictus, et fluit

per milliaria octingenta quadraginta duo, et tunc cadit in mare Caspium.

Fluvius autem Exos nascitur de monte Taroste, et non longe ab ipso in quinque alveos dividitur : et omnes trans-eunt per Caucasum montem, qui locus Sollicantus vocatur : et postea fundunt se omnes isti alvei in flumen quod vocatur Ganges : hic vero eos accipiens fluit in milliaria sexcenta viginti sex, et postea mergitur in Oceanum Orientalem in loco ubi est insula, quæ vocatur *insula solis*.

Caucasus
mons aliter
Sollicantus
dicitur.

Ortus fluvii
Sigocon.

Fluvius vero Sigocon nascitur de monte Caucaso, et geminatur, et facit coronam circa montem Neomatum, et occurrit ei ex una parte ejusdem montis alius fluvius qui vocatur Neficasenes : et juxta quinque flumina quæ dicta sunt, occurrit ei fluvius Sempates : et propter quinque flumina torret et rapide transit, ita ut nec illorum aqua, nec istius supervenientis misceri videatur : et omnes iter suum urgentes ad dictam coronam revertuntur, unde sparsi videbantur : et tunc ad unum revertuntur : et ante eos non longe vadit Ganges, cui adjungitur ille qui quinque habet capita, et alius qui ea relinquit. Sigocon autem fluvius in alia parte Caucasi montis natus dividitur primo in octo, et exinde unus collectus in octo divisionibus occurrit ei Ganges et suscipit ipsum : propter quod Ganges ex pluribus fluviis colligitur, qui in superiori parte Sigocon vocatur. Collecti autem omnes isti in Gangem fluvium, fluit Ganges longe in quartam Occidentalis habitationis per milliaria undecies quadraginta tria, et ibi mergitur in Occidentalem Oceanum juxta insulam Sylophantiam.

Ganges ex
pluribus flu-
viis colligi-
tur.

Fluvius vero Itaspes nascitur in campis Indorum ex tribus fagibus parvis : et quando simul collectus est, inundat per totam Indorum regionem currens milliaria sexcenta et tredecim, et ibidem mergit se Oceano Orientali.

Fluvius Euphrates similiter in campis Indorum nascitur, et discurrens per om-

nem provinciam, currit etiam extra versus Syriam milliaria sexcenta duodecim, et mergitur in Oceano Orientali sub Insula quæ *Theron* vocatur.

Fluvius Armodius in Æthiopia nascitur in campis Commagene : currit autem milliaria sexcenta quadraginta octo et recipitur in sinum Persicum.

Fluvius Susa in provincia media nascitur, super quem erat Susis civitas : et primo dividitur in duo, et deinde colligitur in unum, et currit milliaria quingenta quatuor, et descendit idem in sinum Persicum.

Fluvius Crisortas nascitur in campis Assyriæ de monte Caucaso, et vicinatur ei Tigris fluvius.

Tigris etiam ipse de monte Caucaso nascitur, et est quasi violenta ejus nati-vitas : natus enim æstivis temporibus sub humo de superioribus Æthiopiæ videtur currere : et hoc probat cespitis viriditas in loco cursus sui, cum alibi sint arida loca : et ideo latere videtur ibi, et subito oritur : propter quod ortus ejus non certe comprehenditur, eo quod de obscuritate terræ promat. Isti autem ambo fluvii includunt oppidum quod Cordumena vocatur : post ipsum in unum reducti faciunt coronam maximam, ita ut oppida plura intercludant, scilicet Ethiphon, et Seleuciam : evertunt autem simul millia octingenta octoginta tria, et merguntur in sinum Persicum juxta oppidum quod vocatur Euge.

Nativitas
Tigris fluvii
est quasi
violenta.

Fluvius Alibostra nascitur ex monte Lysto, currit autem milliaria septingenta viginti septem, et mergitur in Orientalem Oceanum.

Flumina tria quæ omnia dicuntur Hitrophatæ, ex campis Indiæ nascuntur, et currunt milliaria ducenta duo, et festinanter recipiuntur in Oceano Orientali.

Fluvius Angis nascitur de monte Armeno, transiensque per montem Caucasum ad Mesopotamiam pergit : et in illa provincia alius ei jungitur fluvius nomine Picrolus, qui dicitur ex ipso monte Caucaso nasci : et unus fluvius Parthas trans-

cuntes eorum cursus multas congregat aquas : et ibi etiam hoc ipsum flumen Euphratis nomen accipit, et exinde se diffundens currit milliaria octingenta, et mergitur in sinum Persicum.

Fluvius Cases nascitur in campis Syriae, et peragrans omnes ejus civitates currit milliaria sexcenta et triginta, et recondit se in Egeo mari in insula Cypri.

Fluvius Adonis nascitur prope Tyberiadem, et currit milliaria octingenta octoginta tria et late diffusum ad mare Adapticum excipit contra insulam Cretam.

Fluvius Jordanis sub Libano nascitur monte, et circumpergit ad locum Tyberiadem, de quo exiens, suo cursu currit ad Sintopolim, quam secans mediam, et exiens diffunditur in Mare mortuum. Iste igitur est cursus fluminum Orientalium superius enumeratorum.

Insulae famosae quae sunt in hac quarta Orientali, quae et quot sint ?

Ptolemæus fecit observationes astrorum in Rhodis insula.

Habet autem hæc quarta famosas insulas novem, quæ sunt istæ, Hypopodes prima, Calbane secunda, Hylephane tertia, Theros quarta, Cypros quinta, Rhoddes sexta (et in hac insula Ptolemæus fecit observationes astrorum), Cytheas septima, Creta octava, Carpatus nona.

Hæc eadem quarta habet famosas provincias decem : quarum ista sunt nomina, Persis, India, Isauria, Adonis, quæ a fluvio sic vocatur, Phœnice, Mesopotamia, Sina, Palestina, Media, Syria.

Provinciae famosae quae sunt in eadem quarta.

Civitates autem famosas habet sexaginta sex, quæ sic vocantur, Bizantium quæ est Constantinopolis, Babylonia Egypti, Jerusalem, Antiochia : et hæc quatuor sunt principales. Aliæ autem Suthia, Seres magnum, Thesaboicha, Tiriddes Sagoton a fluvio sic vocata, Poliboca, Alexandriopolis, Adlenice, Zolce, Place, Tarsis, Taloni, Cropites, Tarmeniæ, Obferachia, Ethergutæ, Fasogadæ, Ariduum tarti, Stinothei, Cumidease, Salphania, Caldaea, Erthiodomo, Ananatheï, Sabei, Machæ, Persipolis, Anasauge, Susiani, Persis, Sirici, Aduopæ, Cacha, Nilibi, Arnei, Alexandria, Commagenæ, Palmita, Damason, Joramis, Cliopolis, Appamea, Dapon, Laodinæ, Biblas, Binthos, Mopsi,

Civitates famosae ejusdem quartæ quæ et quot ?

Napanion, Suvæ, Thea, Anamarithes, Sebastes, Amphipoli, Foreamum, Cosmum, Coptis, Mithylenæ, Lansachu, Lignido, Corinthus. Hæc autem civitates antiquitus sic vocabantur quando fuerunt Græcis primo, et post Romanis subjectæ. Postea autem quando a Sarracenis occupatæ sunt, plurimæ earum fractæ sunt, et aliæ ædificatæ aliorum nominum, et quibusdam etiam earum nomina sunt mutata.

Hæc autem quarta quinquaginta tres diversitates gentium dicitur habuisse antiquitus sic vocatas, Persas, Græcos, Scythos, Androphagorum, Isauros, Bessi, Sarraceni, Radii, Hisquicti, Cumi, Siciuschani, Dornicæ, Passitæ, Parosum, Anartacæ, Celemi, Carasini, Massagetæ, Paropaoson, Ani, Daciani, Thaumadæ, Spicentes, Vanea, Atogan, Atiani, Oretes, Androsi, Arabi, Sichei, Cæi, Armodiæ, Lichioparagi, Perei, Idumæi, Icomia, Cartiguici, Octissi, Usippi, Guadi, Accæi, Andæi, Pausiones, Anifates, Allabrages, Allaudes, Ruptenii, Tarchoni a quibus Teutonicos venisse putant, Cebii, Antequini, Cenomanni, Discensos, Nehorbi. Harum autem gentium nomina multa mutata sunt, aut ex bellis, aut depopulationibus terrarum, aut forte propter novas sectas, et religiones nomina mutaverunt.

Quot gentium diversitates habuerit hæc quarta ?

Hæc igitur de descriptione quartæ Orientalis dicta sunt.

CAPUT II.

*De descriptione quartæ Occidentalis no-
stræ habitabilis.*

Quarta autem quæ continuatur Oceano ex parte Occidentali, continet maria undecim, insulas sedecim, provincias viginti duas, oppida centum et viginti octo, flumina quatuordecim, gentes quadraginta quatuor.

Quot et quæ sint maria quæ sunt in quartâ Occidentali?

Maria autem sunt hæc, Tyrrenum, Adriaticum, Orchardum, Gaditanum: item et huic pertinent maria Ionium et Egæum, mare Laddates, Tyles, Erani, mare ad columnas Herculis, et mare quod dicitur Fretum.

Quæ et quot insulæ sunt in quartâ Occidentali?

Nomina autem insularum sunt ista, Hyrceo, Menenia, Britannia minor, Ebiso in Balearis minor, Corsica, Orchades, Illyricum, Loxicum in geonici constricti, Aristonæ, Eoria, Marthianæ, Juliæ, Sinum gaulo. Forte autem istorum nomen mulatum est propter causas supra dictas.

Qui et quos montes sunt in quartâ Occidentali?

Montes autem ejus famosi sic vocantur, Menus, Alpes quæ plurimæ sunt inter Lombardiam et Teutonium, Apenninus, Balearis, Cirthimi montes, Albanus, Pyrenæus qui Italiam ¹ ab Hispanis dividit, Marsos, Tiburnes, Cimmus, Soracte, Olympus, Octavus, Tantaus, Fida. Præter hos autem sunt alii multi qui apud gen-

tes habitantur et nominantur quæ vicinæ sunt eis.

Hæc autem quarta habet provincias sic dictas, Italiam quæ includit provincias Calabriam, Apuleiam, Romanam, Emiliam sive Tusciam, Lombardiam. Habet etiam Hispaniam quæ habet plura regna et provincias: habet etiam Beticam, Lusitaniam, Galathiam, Aquitaniam, Germaniam, Britanniam, Galliam Belgicam, bracatam, Galliam togatam, Galliam cisalpinam ubi nunc Burgundia, Suevi, et Bavari: Galliam transalpinam, Pannonica cum Hungaria simul attinentibus Citros, Cerunam, Ombriam, Picenum, Liburniam, Dalmatiam, Illyricum, Noricum, Venetias ubi nunc civitas Venetiarum cum adjacente provincia est. Emilia autem quæ pars Italiæ est etiam ejus provincia quæ a Venetibus dicitur: habet etiam Sanagallias cum linonibus omnibus Sabinis, Campaniam, Bruchies, Lucaniam, Apuliam quæ non est pars Italiæ, Calabriam, et Adriam.

Provinciæ hujus quartæ Occidentalis quæ et quod sign

Famosæ autem civitates in Augusti descriptione habent Faventiam, Aquilegiam, Arelatum, Mediolanum, Taurinum, Armotum, Galpani, Calpis, Spalis sive Expalis, secunda Calpis, Cordubam, Beroles, Toletum, Bracharum, Lucasam Augustam Hispaniæ civitatem vocatam Colibriam, Cæsaream Augustam, Terrachonam, Imbianis, Tutigiam, Octaviam quæ nunc deleta est et redacta ad parvam villam juxta quam est civitas quæ Leodium vocatur, Agripiam quæ nunc Colonia vocatur, in qua et istud volumen compilatum est, Treverim, Smirnum, Sterones, Augustudunum, Augustanomectum, Augusta Taverinorum, Lugdunum, Mangetia, Vienna, Massiliam, Allenium, Veronam, Taurinum, Vincentiam, Doronam loco cujus Mondusium exstat, Enemomona modo videtur Feltrum et Beiboria, Patavi quæ nunc Padua vocatur, in qua mul-

Famosæ civitates hujus quartæ Occidentalis.

Hic liber Coloniam compilatus fuit ab Alberto.

Patavii multum tempore viguit studium lit-

¹ Forte melius *Galliam*.

terarum. to tempore viguit studium litterarum, Vercellis, Laude, Mutina, Jador, Salona, Britansium, Hycaysas, Vicacomum forte Signidunum, Narsia, Sisia quæ nunc Arsisia vocatur, Armetum, Bogutione, Argentoratum, Carmacum, Sabana, Patamonem, Bonantum, Argentinam, Saromacum, Nemausum, Corocordores, Amamberes, Santonas, Angonis, Menapum, Metas, Betos, Nepe, Sucricolletto, Florencassi, Foroscen, Sermi, Foro orbium populi, Foro Cornelii, Foro Flaminii, Foro novo, Foro subverte, Spoletinum, Narnia, Interaminia, Ruphinis, Aretium, Preneste, Cumulo, Canum, Corobellitas, Terracina, Anoum, Hostia, Fundis, Fornas, Veturnas, Capua, Neapolis, Ardea, Cumas, Acrepas, Nola Claudii, Beneventum, Etas, Erdonas, Ausidena, Salmona, Venast, Lucesia, Futona, Arphos, Cropinos, Lipros, Tarentum, Odusium, Canisium, Marcellianum.

Civitates quæ post descriptionem Augusti factæ sunt vel saltem mutarunt nomina ex earum immutatione.

Parisius civitas Philosophorum.

Sunt autem de his civitatibus multæ deletæ meo tempore : aut quia nobiliores in locum earum constructæ sicut Brundisium et Salernum in Apulia, Bononia, Fagentia, Bergomum, Janua, Papia, Alexandria, Regium, Tridentum, Brixia in Lombardia, Pisa, Luca, Pistorium, Florentia, Sene, Perusium, Parisius, Tuderum in Tuscia, quæ vel postea factæ sunt, vel nomina earum sunt mutata. Altisiodorum, Parisius quæ est civitas Philosophorum, Rotomagum, Senone, Taceremis, Turonis, et alia multa in Gallia, Constantia, Basilea, Argentina, Vormatia, Moguntia, Herbipolis, Augusta, Radispona, Vienna, Salaunga, Patavia, Ephordia, Alvetast, Madebung, Bernamunda, Monasterium Assuenich, Padembruna, Lubeche, Tragetum, et multæ aliæ in Alamania et Germania, et aliæ innumere civitates terrarum, quæ non magna habent ædificia, et in descriptione Augusti ideo non ponuntur, quia tunc non fuerunt : et multæ quas ponit, modo vel non exstant omnino, vel ad parvas villas reductæ sunt : et ideo in diligenti civita-

tum positione et ordine non est magna vis facienda.

Flumina vero quartæ istius sunt sic vocata, Bethis, Tagus super quod est Talem et rotæ artificum Arsa-cellis Philosophi, ubi etiam idem Philosophus astrorum fecit observationes et tabulas in imo, Hyberas, Arar, Rhodanus, Garona, Piadamin, Danubius, Drans, Suavis, Thrimon, Tiberis. Hæc sunt flumina, quæ Antiqui reputabant in hac quarta famosiora : eo quod tunc forte melioribus ædificiis decorata videbantur.

Flumina quartæ Occidentale.

Rotæ artificum Arsa-cellis Philosophi.

Nascitur autem fluvius Bethis in campis Hispaniæ currens quadringenta quinque milliaria, et recipitur in Oceano Occidentali.

Ortus Bethis fluvii. Ortus Tagi.

Fluvius Tagi item nascitur in campis Hispaniæ, currens trecenta et duo milliaria, et mergitur in Oceano Occidentali.

Fluvius Minius nascitur juxta Pirichum, et vertitur curvo fluxu quasi in rotunditatem, ut Brigantium oppidum metricinum includat : currit autem milliaria trecenta decem, et mergitur in Oceanum Occidentalem.

Ortus Minii.

Fluvius Hyberus sub radicibus nascitur montis Pyrenæi, currens milliaria ducenta quatuor infundit se in Oceanum Occidentalem.

Ortus Hyberii.

Fluvius Arar nascitur apud Aviten, fluit autem post se cauda quædam juxta ortum suum, quæ cum ipso postea unum effecta, currit in mare, et egreditur versus Arelatum. Sed hic fluvius quem Pichorcium diximus in superiora ortus sui aliud accipit nomen præter Pichorcium : nam in provincia Germania fluvius Remin dicitur, alibi autem Bicornius, alibi autem fluvius Arar vocatur. Iste fluvius itaque tribus nominibus vocatur cum sit unus et dimidius : ducitur autem a mari Pictavensi idemque ad mare Tyrrenum contra insulas Baleares : ejus autem medietas habet aculeum per tortuosum Licuno ubi nascitur. Videtur autem currere ab aqua in aquam octingenta quinquaginta duo milliaria usque ad mare Tyrrenum.

Ortus Araris.

Ortus Pichorcii.

Damnat de-
scriptionem
Augusti.

Et hæc dicta sunt secundum Augusti descriptionem quam in parte oculata fide videmus veram non esse : quia Rhenus qui per Germaniam vadit, ab Alpibus nascitur, et currens per Germaniam porrigit se ad aquas multorum fluviorum, Nechtari scilicet, et Nich, Motile, et Mosi, et aliorum plurimorum, et mergitur in mare Anglicum versus Aquilonem. Dicit Augustus, quod fluvius Rhodanus nascitur in medio campo Gallorum, et occurrit ei Bicornius supra dictus cursu et incessu qui dicti sunt. Fluvius autem nascitur in campis Galliarum, et influit Oceano Occidentali, et videtur iste fluvius esse Sentana.

Ortus Rhodani.

Ortus Garonis.

Fluvius Garona nascitur in campis Aquitaniæ, et currens milliaria ducenta septem mergitur in Oceano Occidentali.

Ortus Bicornii.

Fluvius Bicornius nascitur in campis Germaniæ, qui est Rhenus, de cujus ortu et mensura dictum est.

Ortus Danubii.

Fluvius Danubius nascitur ex Alpibus Suaviæ provinciæ, et procedens colligit aquas multas, quarum maximæ sunt, Nides, et Littus, et Henus : geminatur et ipse et Dyaus includunt intra se Pannoniorum civitates plurimas, hoc est, Attinetum Petroennem, Tarmontum, et Stuarin, et reddunt ad unum qui fuerant duo, et per longum adunati currunt et faciunt rotunditatem in qua est oppidum Peuce : et ex ipso fluviali circulo septem crines fluminum procedunt infundentes se in pontum juxta Constantinopolim. Constat igitur Danubium exeuntem ex Alpibus edere Dicaram : sed cum effunditur per crines supra scriptos, currit milliaria sexcenta.

Ortus fluvii Suavis.

Fluvius Suavis nascitur in Orichode monte Alpium : currens autem in campis in modicam rotunditatem concludit se in unum, et in suo circuitu vadit per Aviten oppidum et sigidinium Coloniam, et mergit se in Danubium ad Lechumune oppidum : et omnes simul in pontum merguntur : et tunc vocatur fluvius iste Suavis : videtur autem quod Danubius et Dyaus et Mangus et Suavis simul in pontum mergantur.

Ortus Tri-
mi.

Ortus Tiberis.

Fluvius autem Trimum in campis Germaniæ nascitur, et diffluit Egæum mare. Fluvio Tiberis principatum dat non magnitudo fluminis, sed procul dubio urbis Romanæ. Nascitur autem ex monte Apennino, currit milliaria quadraginta, venit Romam, et facit insulam in loco ubi *duo pontes* appellantur : post unus effectus vadit per pontem Lipidi qui abusive *Lipitheus* vocatur, transiens juxta Boaticem quem causatum dicunt grandibus undis, naves et mediterraneas fert de Utria vel Sabinis, venit ad urbem Romanam, quæ nunc dicitur beati Petri Apostoli. Inter Ostiensem autem portam, quæ vocatur porta beati Pauli, et viam Portuensem, quæ nunc dicitur sancti Felicis martyris, urbem egreditur. Hic igitur tunc forum Philippi quod prædium Misa vocatur, geminatur, et facit insulam inter portam Urbis et Ostiensem civitatem, in qua populus Romanus cum urbis præfecto vel consule ad castra celebranda egrediebatur celebritate jucunda. Insula vero quam facit inter urbis portum et civitatem Ostiam, tantæ viriditatis amœnitatisque est, ut neque æstivis mensibus, neque hyemalibus pasturæ mirabiles herbas germinare desinat : ita autem vernali tempore rosa et cæteris floribus adimpletur, ut præ nimietate sui odoris et floris insula ipsa almæ *Veneris insula* nuncupatur.

Hæc sunt flumina quæ in Occidentali quarta esse dixit Augustus : tacuit autem magnos fluvios, Padum, Atexim, et Breticam in Lombardia fluentes, quorum quidem Padus venit ab Oriente versus Occidentem, et similiter Bretica, Atexis autem ab Aquilone versus Meridiem. Tacuit autem Albiam Saxonie fluvium, et Viseran, quæ ambo veniunt a Meridie Aquilonis Oceanum, sicut tacuit multos alios fluvios aliarum terrarum.

Habet etiam hæc quarta gentos quæ antiquitus sic vocatæ sunt : continet enim Gotos, Cratos, Herculos, Sarmatas, Mathomanos, Longobardos, Succaos, Allemanos, qui Alemano maximo stagno quod ante radices Alpium effundi-

Flumina hujus quartæ, de quibus non fit mentio in descriptione Augusti.

Gentes hujus quartæ occidentalis.

tur, per cujus medium Rhenus transit, a quo etiam multitudinem suæ aquæ accipit, sic vocantur, sed modo Suevorum nomen censetur : Francos Orientales, in quorum terra Herbipolis est principalis civitas, Allanos Tesaluntas gentes novem, populum Narbonensem, quem similiter gentes novem, Miletum Armariarum, Romanum populum, Motatos, Amisibarios, Lagionos, Brugundiones Gipedai, Armoloas, Marianos, Ordimastas, Serapadolos, Otonos, Giptos, Hirmos, qui nunc Ungari vocantur, Satariolos, Reges Asiades, quorum terra Estivia vocatur, Varcos, Turchos, Bastornes, Capithimos, Senatium populum Romanum, gentem græceram.

Gentes quæ
posterius
supervenerunt.

Gentibus autem his posteris temporibus aliæ gentes supervenerunt, et eis nomen et terram a favore impudenti : sic enim Saxones supervenerunt Noringis et Sclavis : Sclavos quidem ab Oriente Tiringes ad Occidentem expulerunt et in medio se extenderunt. Ex eisdem Saxonibus quidam Britannia majoris supervenientes, illis expulsis ibi residerunt, et insulam Angliam vocaverunt a villis, quæ *Engolæ* adhuc hodie vocantur, a quibus primi prates eorum fuerunt exorti. Similiter postea quidam Pigami cum Alamanis eruperunt et occupaverunt partes Gallia ultra Rhenum, et sedent in eis, et sunt Flamingi et Barbantini : civitates extruxerunt et oppida multa quæ nominare est longum et inutile ad philosophiam.

CAPUT III.

De descriptione quartæ Septentrionalis nostræ habitabilis.

Quarta item Septentrionalis habet maria novem, insulas viginti duas, montes novem, provincias duodecim, oppida sive civitates quinquaginta, flumina decem et novem, gentes viginti novem.

Maria autem ejus sunt hæc, Hicilium, Pontum, mare Meotis, Bosphores, mare Feres, Cimortum, mare Tertium, Propontidis, Jusfolati. Nomina autem insularum sunt hæc : habet enim Cielades cum aliis duabus adjacentibus, Hebebo-ga, Delos, Hyppopades, Rhodos, Cypros, idem Cypros partios : aliæ autem non nominantur. Nec inconveniens reputetur si eisdem nominibus insulæ superius sunt nominatæ : quia æquivocatio est in causa in nominibus istis.

Maria quartæ septentrionalis quæ et quot insulæ ejusdem quartæ?

Habet autem montes, Hyperboreum, Rapheum, Iffanum, Caucasum, Henium, Taurum pro quadam parte, Germaniam montuosam minorem, Euodii, Ethna, Caumastes, Grichus.

Montes ejusdem quartæ.

Provinciae autem magis nominatæ inter illas sunt, Macedonia, Achaia, Asia minor, Ithia, Galatia, Pastiglonia, Bythina, Lydia, Pamphylia, Cappadocia, Tranam, Armenia minor : hæ enim omnes directe sunt ad Aquilonem non ad Occidentem vel Orientem. Dacia enim et Gotia et Sclavia et Livonia et hujusmodi terræ ad Aquilonem sunt versus Occiden-

Provinciae ejusdem quartæ.

tem. Similiter autem et Hibernia et Scotia et Gualia et Illaudia et finitimæ ejus regiones, quæ nuper inhabitari cœperunt.

Oppida ejusdem quartæ.

Oppida vero ejus sunt Eraclia Sardica, Pelia, Tesabonica, Phyridos, Calcedonia, Nichomedia, Acrios Gumani quæ incertis sedibus vagantur, Tarses, Pepriapolis, Olymphis, Tibaria, Aragata, Frimi, Stuteria, Sciridæ, Alexandricinus, Cicidus, Etrinesaxes ramidos, Ephesos, Cretica, Calliasse, Sexoos, Aquecidos, Niu, Troja, Helidos Troas, Antheron, Nitia, Tarisa, Fotis, Crita, Deleis, Bertoccon, Acarverna, Dicatium, Athenæ quæ fuit tunc civitas Philosophorum, Bitote, Istion, Arche, Techeas, Maleon, Cancautria, Philopolis, Helipolis, Thebæ, et hujusmodi aliæ multæ, quæ postmodum conditæ sunt.

Athenæ civitas Philosophorum.

Flumina ejusdem quartæ.

Flumina vero sunt ista, Tanais, Beristron, Meotidem, Nais, Thesimon, Fasi, Cebestem Timanum, Galdum, Spiramos, Persium, Macholum Alfeum, Tutotas, Fudatum, Ermnam, Menandiam Sirrum, Aldrabulam. Hæc sunt flumina Septentrionalis quartæ.

Ortus Tanais fluvii.

Fluvius autem Tanais nascitur de monte Hyperboreo contra scissea in monte Sirdo. Fluit autem milliaria sexcenta quinquaginta quatuor. Fluvius Beristenas item nascitur de monte Hyperboreo, et influit in Pontum sicut et prior. Fluvius Nais nascitur de monte Tarro, et influit in mare Ponticum, sicut et Meroiden. Fluvius Thesimon nascitur de monte Caucasio, et egreditur in mare Ponticum. Fluvius Fasis nascitur in monte sub monte Caucasio, et vadit in mare Ponticum. Fluvius Cebesten nascitur in monte Tauro, et fluit in mare Tyrrenum, ubi est insula Rhodos. Fluvius Cinctus nascitur de monte Tauro, et fluit in mare Adriaticum contra insulam Cypros. Fluvius Persius nascitur de monte Ida Macedoniae provinciae, et fluit in mare Egæum. Fluvius Athesaudas nascitur in campis Cypri, mergitur autem in mare Cortivum. Fluvius Alpheus nascitur in campis

Achaia, et fluit in mare Tyrrenum. Fluvius Curotas nascitur in campis Phrygiae, et fluit in mare Hellespontum. Idem creditur facere Rudacus. Fluvius Heriminas nascitur in campis Asiaticis, et divisus currit quasi duo, et recollectus in unum influit in mare Cicladum. Fluvius Sirrus nascitur in campis Pamphiliae, et per anfractus tortuosos influit in mare Podos insulae. Fluvius Asdrubela nascitur de monte Bodica, et influit in mare Capsum irrumpens in mare Caucasum. Flumina autem alia sunt innumera, pertranseo brevilitatis causa.

Hujus autem gentes antiquitas sunt vocatae sic Scithæ, Nabobæ, Staostenæ: habet Madeos et Sargomathes, Euthicas, Euthecos, Colcos, Fasis, Barbaros albos, Ignoes, Rosmores, Rodores, Gansibos, Sinicos, Leuforicos, Manes, Sufulentas, Ticeicum, Denicas, Fascias, Seres, item Medos, Anarticos, Tenavigi, Massagetas: et harum gentium plurimæ deletæ sunt hoc tempore, et aliæ loco earum intraverunt.

Gentes ejusdem quartæ.

CAPUT IV.

De descriptione quartæ Meridionalis nostræ habitabilis.

Quarta autem meridiana non satis nota et nobis in toto propter causam quam super diximus, quæ tamen sicut ad notitiam Augusti et Senatus Romani pervenire potuerunt, erant maria duo, insulae decem et septem, montes sex, provinciae

duodecim, civitates quadraginta septem, flumina duo, gentes autem plurimæ.

Maria quartæ Meridionalis.

Maria autem sunt mare Cafortium, et mare Tyrrhenum.

Insulæ ejusdem quartæ.

Insulæ vero sunt Sicilia, Pontia, Carpatos, Pantatorsa, Sardinia, Corsica, Ganor, Cichoberinon, Girbe.

Montes ejusdem quartæ.

Montes autem sunt Piramos, Peronice, Pareus, Feræus, Atlas, Cornosia.

Provinciæ ejusdem quartæ.

Provincias vero habet has, Ægyptum, Æthiopiam, Africam minorem, Zetaliæm Zeugi, Numidiam, Libyam, Pentapolim, Tripolim, Mauritaniam, Cæsaream secundam, Sintefossen.

Oppida et civitates ejusdem quartæ.

Habet autem oppida et civitates, Arabiam, Suciolios, terram Thebas, Thebais, Beronice, Arnocon, Tolemaudis, Cirene, Sibeneli, Narnecæ, Sabrata, Leptis magna, Talepas, Dispresum, Tenis, Tapsas, Lepsis minor, Hadeunctum, Meapolis meridiana, Dippeis, Carthaginem, Uticam, Hipponem, Zaritum, Tubarchachia, Hippone, Regum, Nisitadem, Callisoldis, Quinquagentiani, Ruslitora, Timpora, Cæsarea, Tartenas, Portus magnus, Experides, Ballos, Lambus, Picens Obaba, Sulilis, Assulis, Samoregiam, Susibet, Suffecula, Cilio, Cebeptis Capsea medea, Cenellis, Maduros, Tirbur, Sicuvium, Cuidia, Calamia, Constantina, Militum, Rannigode, Lirbese, Sitsi, Maga, Sabi Tabusucia, Bida.

Fluvii ejusdem quartæ. Ortus Nili.

Hæc eadem quarta duos habet fluvios, Nilum scilicet, et Bragandam. Nilus autem qui et *Hion* appellatur, de secretionibus promit de terra, quæ est sub æquinoctiali, sed in Ceordia et in Æthiopia videtur et facit locum magnum, qui in circulo stagnat centum quinquaginta tria millaria. Et exiens de lacu provenit ad cataractas interiores consumens millia quadringenta septuaginta quatuor. Fluvius Gabrada est provinciæ fluvius magnus et nobilis et unicus, qui a quibusdam cosmographis sine causa inter fluvios mundi principales non ponitur.

Gentes hujus quartæ innumerabiles.

Hæc etiam quarta habet gentes innumerabiles, quæ numero vix colligi possent : quia perscrutari non possunt pro-

pter vastos eremos interjacentes : sed a provinciis supra nominatis quædam vocantur circa Aquilonem existentes, aliæ multo plures ignorantur. Hæc igitur ut in pluribus est orbis descriptio facta a Senatu Romano et Augusto Cæsare.

CAPUT V.

De limitationibus trium principalium terræ partium nostræ habitabilis.

Orbis autem descriptio quoad provinciarum antiquarum limitationem (prout supra memoratis Philosophis placuit) talis erat. Dicebant enim orbem nostræ habitabilis in tria dividi, Asiam scilicet, Africam, et Europam : quamvis quibusdam placuerit tantum duas orbis partes esse, quia Africam Europæ censuerunt esse adjacendam, eo quod nec latitudinem debitam habeat, nec delectabilem habitationem propter eremos multos, et venenosa, et montruosa animalia quibus est plena, quæ aerem inficientia non permittunt homines habitare in ea. Absque tamen illorum præjudicio dividemus orbem in tria, ostendentes uniuscujusque partis limitationes et partes.

Asia igitur tribus partibus circumdata per totam Ciani plagam Orientis extenditur. Hæc occasus versus Africam dimittit sub Ægypto, et finit mare nostrum quod generaliter *magnum* dicimus.

Initium Europæ incipit sub plaga septentrionali, a flumine Tanai qua Riphea montis ardua Sarmatico adverso Oceano

Quibusdam placuit duas tantum esse orbis partes: quia Africam Europæ adjunxerunt.

Limites Asiæ.

Limites Europæ.

Tanai fluvium fundunt, qui præteriens Aras attitias Alexandri magni Macedonis in Cobastorum finibus positus Meotidas auget paludes, quarum immensa inundatio juxta Theodosiam urbem Euxinum pontum late ingreditur. Huic juxta Constantinopolim longo mittuntur angustiae donec eas mare nostrum accipiat : cujus Europæ in Hispalis finis est Occidentalis Oceanus apud Gades insulam, ubi Hercules sunt columnæ, et Tyrrheni maris faucibus Oceani æstus immittitur.

Limites
Africæ.

Africæ autem principium est a finibus Ægypti urbisque Alexandria, ubi Parethomo civitas sita est, super hoc mare Magnum quod omnes plagas terrasque medias influit. Unde per loca quæ raboro Aonos vocant jam procul a castris Alexandri magni super locum Thale arci : deinde juxta superiores fines avascicam missam in transversum per Æthiopianam desertam meridianum contingit Oceanum cernuus : qui Africæ ipse est qui Europæ, hoc est, Fauces gaditani : ultimus autem finis est mons Atlas, et insulæ quas *fortunatas* vocant. Sic igitur breviter limites trium principalium terræ partium diximus : sed ut sufficiens sit doctrina, limites partium earundem et provinciarum referemus breviter ut possumus.

CAPUT VI.

De limitationibus partium Asiæ.

Asia a media fronte in Oceano habet ostia fluminis Gangis, a sinistra promontorium Taliganum, cui subjacet ad cupum insula Theprobatia, ex quo Oceanus Indicus incipit vocari. A dextra vero habet Cumini montis jugum, ubi Caucasus fecit. Ad promontorium autem ejus est Samaria et Judæa quæ Aquiloni subjacet ad ostia fluminis Cicogardis, ex quo Oceanus Stricus appellatur. In his finibus provincia Indiæ est, quæ habet ab oriente flumen Indum, quod a quibusdam mare Rubrum dicitur. A Septentrione vero montem Caucasum. Reliqua autem ejus (ut dictum est) Indico terminantur Oceano, quæ habet multas gentes. Habitat autem plus aliis insula Theprobatia. A flumine enim modo quod est ab oriente usque ad flumen Tigrim et Caucasum regiones sunt, Raratoa, Syria, Persida, et Media, et est terra montuosa et aspera.

Hæc autem a septentrione habet montem Caucasum, a Meridie mare Rubrum et sinum Persicum. In medio autem sui habet flumina principalia Idaspim et Arium. In his autem licet multæ gentes habitent, terra tamen generaliter Perchia vocatur, quæ tamen aliquando a quibusdam Media dicitur. A flumine Tigris usque ad Euphratem Mesopotamia est incipiens a Septentrione inter montem Taurum et Caucasum, cui a meridie succedit,

et ab aquilone quidem dictum est Chaldaea, et tandem Arabia, et Eudomoni inter Syrum et Persicum et Syrum Arabicum angusto terrae tractu versus orientem extenditur sinum, et in his tractibus gentes habet plurimas.

Item a flumine Euphrate quod est ab oriente jam dicta usque ad mare nostrum quod est ab occasu quod Mare Magnum dicitur: deinde a Septentrione et Euphrate a civitate Dacus Euphrates qui in finibus Cappadociae situs est non procul a loco ubi Euphrates nascitur usque ad Aegyptum et extremum sinum Arabicum, qui est a Meridie longo et angusto sulco saxis inclusus usque ad Rubrum mare, id est, ab Oceano versus occasus ad Magnum Mare tota terra generali nomine Syria vocatur: cujus maxime provinciae contra Togena et Phoenices et Palestina absque Saracenis et Nanaceis, quorum gentes sunt duodecim vel amplius.

In capite autem Syriae Cappadocia est quae habet ab Oriente Armeniam, ab Aquilone vero Tymistanos campos et mare Cumuentum, ab occasu autem Asiam minorem, a Meridie autem Taurum montem cui subjacet Cilicia et Isauria usque ad sinum Cilicum, qui spectat ad insulam Cyprum. Alia vero quae minor dicitur, absque Orientali parte usque ad Cappadociam Syriamque protenditur undique circumdata mari.

A Septentrione quidem ponto Cassuno: ab occasu autem Propontide et Hellesponto, a meridie vero mari nostro ibi est mons Olympus. In hoc Aegyptus superior est, in qua est Nilus, qui de littore incipientis maris Rubri videtur erumpere in loco qui dicitur mons Soliportum: deinde diu ad occasum perfluens facit insulam Tudem nomine in medio sui novissime a septentrione tempestuosus actus crementis plagam Aegypti rigat. Hunc aliquando cosmographi non longe ab Atlante monte dicunt surgere et statim terrae immergi: et inde interjecto brevi spatium latissimo lacu inundans in Ocea-

num orientalem per Aethiopiae deserta prolabitur. Rursus autem reflexus a sinistra ad Aegyptum descendit, quod quidem verum esse hujusmodi fluvium manifestum et magnum qui tali ortu tali cursu sit ut Nilus intelligitur: nam et monstra gignit, cujus prope fontem Barbari dominantur, et vocant eum Talum. Hic autem fluvius in regione gentium illarum quae dicuntur Lybia Aegyptia, non longe ab illo fluvio qui a littore maris Rubri prorumpere diximus, assumitur ab immenso lacu, nisi forte dicatur eructare in eis meatu occulto in alveo ejus qui ab Oriente descendit. Aegyptus autem inferior habet Syriam ab Occidente et Palestinam, sed ab occasu habet Lybiam, a Septentrione autem habet mare Tyrrhenum, a Meridie vero montem qui Clamay vocatur. Aegyptus vero superior in orientem per longum extenditur, qui est a septentrione sinus Arabicus, et a Meridie Oceanus: ab occasu enim ex inferiore inceptit Aegyptus, et ab oriente mari Rubro terminatur, ubi morantur diversarum gentium nationes. Sic ergo Asia describitur in parte Meridiana.

Ab oriente vero et septentrione sic dimensa est ab Antiquis. Mons Caucasus inter Colchos, qui sunt super Thimericum mare et inter Albanos, qui sunt ad mare Caspium, prius attollitur, cujus quidem usque ad ultimum orientem invenitur jugum: sed multa sunt nomina ejusdem. Sunt enim qui hoc jugum Tauri montem credi volunt: quia revera Parchoatas mons Armeniae inter Taurum et Caucasum medius continuare Caucasum cum Tauro aestimatur: sed hoc ita non esse ostendit fluvius Euphrates qui a radice montis Parchoatas recte montis effusus et in Meridiem tendens ipse ad sinistram Taurum excludit ad extrema. Item ipse Caucasus inter Colchos et Albanos ubi et portas habet, mons dicitur a portis Caspii usque ad fontem Tigridis fluminis inter Armeniam et Hiberiam montes Aratriauri dicuntur. A fonte autem Tigridis usque ad civitatem inter

Massagetæ et Parthos mons est Anorbagmos. Acharis autem civitatem usque ad oppidum Kripi, inter Siceades et Bactrianos mons est Melanius, ubi Armonium nascitur in quo proximum jugum *parrago* dicitur ab oppido inter Krispi usque ad vicum Fassi inter Classa et Carachas et Parthenas et Ispensos et Stoannos, ubi Ganges fluvius oritur, quem quidam Padum vocant ad Caupos et Caucasi partes quæ sunt a meridie, gentes plurimæ inhabitant: sed generaliter in regione proxima Libani in ulteriore nominatur circa mare et montem Caspium Asiæ partis Orientalis.

CAPUT VII.

De limitationibus partium Europæ.

Nunc ad limitationem Europæ deductentes stilum, primum nostram Italiam inducimus quæ nobilior est cæteris partibus Europæ.

Incipit enim Europa a montibus Kyphæis a flumine Canai meatisque paludibus quæ sunt ad orientem per littus septentrionalis oceani usque in Galliam Belgicam et flumen Rhenum quod est ab occasu. Deinde usque ad Danubium quem et Histrum vocant, qui est a meridie in orientem directus, sicut Ponto suscipitur: huic ab oriente Alovía, Rhutenia, Prurénia, Livonia est: deinde Kria et Gothia, deinde versus meridiem Germania et Allemania, in qua licet multæ gentes sint, tamen plurimam partem Suevi te-

nant. Residua autem quæ sunt a Danubio usque ad Mare Magnum, Messia ab Oriente habet ostia, flumen Danubium: et ab Euro etiam a meridie mare Dapiam, ab austro Dalmatiam, ab occasu Bistriam, a septentrione item primum Danubium fluxum qui de Bavaria et Austria illuc transit: a cirtio autem habet Pannoniam. Messia igitur antiquitus fuit, quæ nunc Ungaria dicitur. Tertia autem habet ab oriente Portidis sinum et civitatem Constantiniani, quæ prius Bizantium dicta est, quæ et Zanchus, a septentrione habet Dalmatiam, et ibi habet sinum extremum Ponti, ab occasu Africo Macedoniam, a borea tertiam, ab euro Europam et Macedonicum sinum, a meridie Achaiam et Egeum mare, et favonio montes, qui in angustiis Adriaticus sinus est, qui montes sunt contra Apuliam atque Brundisium: habet autem ab occasu Dalmatiam, a cirtio Dardaniam, a septentrione Ethosiam. Achaia undique prope modum cincta est mare: nam ab oriente habet Mortuum mare, ab Europa mare Creticum, a meridie Ionium, ab austro et occasu habet Cephaliam et Casiopiam insulas, a septentrione sinum Corinthum, ab aquilone angustum terræ dorsum qui Macedoniæ conjungitur, vel potius Arcticum, qui locus *Isthmos* vocatur, ubi est Corinthus. Hic sunt in arctico non longe Athenarum civitas, et aliæ quædam civitates Græcorum. Dalmatia autem habet ab oriente Macedoniam, ab aquilone Dardaniam, a septentrione Astam, ab occasu Hystriam et sinum Lubernicum et Insulas Lubernicas. Pannonia autem Noritus et Rena habent ab oriente Messiam, a meridie Histriam, ab africo Alpes aspeninas, ab occasu Galliam Belgicam, a cirtio fontem Danubii, et limites qui inter Galliam et Germaniam, dirimit, a septentrione habet Danubium et Germaniam. Italiæ situs tenditur a cirtio in Euum, et habet ab africo Tyrrhenum mare, a borea Adriaticum sinum maris. Continentia terræ contigua est ubi Alpium obicibus angitur, qui a Gallico mari su-

per Liguricum exsurgunt. Hic incipiunt Narbonensium fines, deinde Gallia Retia : sed se dividunt in sinum Hibernicum.

Gallia Belgica ab oriente habet limitem fluminis Rheni, et Germaniam, ab euro Alpes Appenitias, a meridie provinciam Narbonensem, ab occasu Oceanum Britannicum et insulam, quæ nunc Anglia vocatur. Gallia Lugdunensis ducta est per longum et angustum inflexa. Aquitaniam enim provinciam semicingit : ab oriente aut habet Galliam Belgicam, et a meridie provinciam Narbonensem in parte ubi Arelas civitas sita est, ubi mari Gallico Rhodanus fluvius influit. Narbonensis provincia pars est Galliarum, habet ab oriente Alpes Captias, ab occidente Hispaniam, a cirtio Aquitaniam, a septentrione Lugdunensem Galliam, a meridie mare Gallicum, quod est inter Sardiniam et insulas Baleares : habet etiam in fronte qua Rhodanus in mare exit in suas decadas. Aquitania provincia obliquo cursu Liguris fluminis, qui ex plurima parte terminus ejus in orbem agit tur. Hæc actio Oceanum habet qui sinus Aquitanicus vocatur, ab occasu Hispanias, a septentrione et oriente Lugdunensem, a septentrione et meridie Narbonensem provinciam contingit.

Tota autem terra quam nunc describemus, est figuræ trigonæ, circumfusa Oceano mari quantum ad nostram habitabilem, qui conus ex arcibus et non ex rectis lineis componitur, licet areae angulorum non tendant omnino in conum. Hujus autem figuræ trigonæ areae angulus prior respicit orientem habens a dextris provinciam Aquitaniam, et ingreditur a dextris Baleari cirtio mari Narbonensium sinibus coarctatus. Secundus autem angulus incedit ubi Regitentia civitas sita est, et altissimam terram Galatiæ, et inter villas, quæ memoria non sunt dignæ, dirigitur ad insulam Britanniae. Tertius angulus est quo Gades insula in Africam tendit, et Atlantem montem interjecto simul prospicit.

In hac area Hispania minor incipit ab

orientem ex Pyræneis Alpibus a parte septentrionali usque ad Cataços ad Turchos atque per varticos directa, et Orientanos quos habet in occasu. Post in occasu Magni Maris littore Carthago terminatur. Hispania minor habet ab oriente Barutos Celtiores et Orientanos, a Septentrione autem Oceanum, a meridie Gaditanum Oceanum fretum : inde in mare quod Tyrrhenum vocatur, emittitur.

Et quoniam Oceanus habet insulas plures quarum principaliores sunt Britannia, sive Hibernia, Anglia, bonum est de situ earum aliquid dicere breviter. Britannia igitur sive Anglia Oceani insula per boream in longum extenditur, habetque a meridie Gallos : cujus proximum littus meantibus civitas apparet quæ ab aliquibus Euparticus vocabatur : unde has partium antierius quæ in Flandria sunt, prospectant in austro, ubi sunt Vapri Bachobi. Hæc insula longe fluit per millaria octingenta, et in lato ducenta : unde autem in oriente quod patet, Ortodas insulas habet, ut dicitur, triginta duas, quarum plures desertæ sunt, et plures inhabitantur : et est ibi frigus et tenebræ sunt, in quibus dicitur quod una est inhabitabilior omnibus aliis, quæ dicitur insula Thule, quæ multum distat ab aliis, et vix ab hominibus est visa.

Hibernia autem insula inter Britanniam et Hispaniam longiorem ab Africo inde per situs porrigitur, cujus partes priores intentæ tam Tabrico Oceano, Britanniam Galliae civitatem ab africo sunt in terminum occurrentem spatioso intervallo procul exspectat ab eo præcipue promontorio ubi stellæ fluminis ostium est, ubi Aburri et Lucca consistunt : et etiam prior Britanniae spatio angustior cæli solis tempore magis utilis Astorum gentibus colitur : huic et Monamia insula proxima eidem, et ipsa spatio non parvo solum habet commodum, et communiter Astorum gentibus habitatur, et in his Europæ fines terminantur.

CAPUT VIII.

De limitationibus partium Africæ.

Africa est quam in tertia parte quidam auctores consueverunt accipere, non quidem spatio mensuræ, sed circulationis ratione. Ab Oceano enim in Oceanum porrigitur in meridie veniens magis præfocatur Africæ limite, et angustiores claudit partem. Hinc est quod etiam aliqui, quamvis eam longitudinem habere existiment, tamen multo angustiores intellexerunt, ut verecundum dicerent tantæ angustiae etiam partem mundi dare, sed in Europam eam judicaverunt reputandam, hoc est, ut non eam similem duabus dicerent, sed de duabus uni subjectam. Hæc etiam pars ardorem solis venenoque deformis plus habet eremi quam montes.

Africa igitur per omnia situ et populis aliis duobus esse certissimum est : quia et quantitate sui minus habet spatii, et cœli inclementia populi deserti : cujus descriptio per provincias et gentes hæc est. Libia Comaica, quæ post Ægyptum in parte Africæ prima est a civitate Parthenio et Catabi : Tinon in secundo mari usque ad aras Philenorum extenditur usque ad Oceanum meridianum. Hæc habet gentes, Lybiam, Æthiopiam, et Garamantum, ubi est ab oriente Ægyptus, a septentrione Libicum, ab occasu Syrtes majores et trogodiae quæ habent contra insulam Calipso a meridie Eucupi-

dium Oceanum Tripolim provincia quæ subitanea vel regia Ogorum, ubi Leptis civitas magna est, quæ Zeuges per Africæ limitem vocantur : habent ab Oriente aras Philenorum inter Stroas majores et Tracoditas, a septentrione habent mare Siculum vel potius Adriaticum et Syrtes minores, ab occasu autem Bichantium usque ad locum Salinarum, a meridie vero Barbaros et Gentiles, Vamutas et Garamantos usque ad Oceanum Æthiopicum pertingentes. Zeuges autem prius non minus loci cognomentum, sed potius provincia fuit, sicut in hodiernum diem a prudentibus cosmographis accipitur. Bichantius autem est ubi ejus Metropolis civitas Erametus nomine sita est. Zeuges autem ubi Carthago civitas sita est, Numidia autem vocatur ubi Hippos regio, et Ruffigadæ sunt civitates, et habent ab Oriente silices minores et locum Salinarum, a septentrione autem mare nostrum quod spectat ad occasum Sardiniam et Siciliam, et ab occasu habet Maontamiam, Simphosiam a meridie montem fugacem, et post eos Æthiopum gentes pertingentes usque ad Oceanum. Simphosis autem et Cadinensis Maontamiæ sunt, quæ habent ab oriente Numidiam, et a septentrione Mare Magnum quod nostrum vocatur : quia et Italiam contingit ab occasu aiunt flumen Maula, et a Meridie montem Afrisim, qui dividit inter unam terram et arenas eremi jacentes usque ad Oceanum in quibus aberrant grandes Æthiopi. Tini Mauritaniae Africæ ultima est totius : hæc habet ab oriente flumen Malveam, et a septentrione mare nostrum usque ad sinum Gaditanium, quod inter Habene et Cappis duobus promontoriis coarctatur, ab occidente autem habet Atlantem montem et Oceanum Atlanticum, sub Africo autem Espium montem, a meridie vero gentes Aulolum, quas nunc Glandes nominant, usque ad Espium contingentes Oceanum. Hæc autem dicta sunt de situ Africæ et terminis ejus.

CAPUT IX.

De limitationibus insularum, quæ sunt inter Hellespontum mare et Oceanum.

Deinceps autem insularum quæ in mare sunt loca et spatia et nomina exponentur.

Insula Cyprus habet ab oriente mare Syricum, quod constrictum sinum vocatur, ab occidente autem mare Pamphili- cum Auloem Cilicia, et a meridie sine fine pelago cingitur, cujus spatium in longo tenet milliaria centum triginta quinque, in lato vero milliaria centum viginti quinque.

Insula Creta finitur ab Oriente Campano mari, ab occasu autem et septentrione mare Cretico, a meridie autem mari Ligurico, quod et Adriaticum vocatur: habet autem in longo centum viginti septem, in latitudine autem sexaginta.

Insulæ autem Circiades quarum ab oriente, prima est Rhodes, a septentrione Renades, a meridie Carpathos, ab occasu Cathera, ab occidente finiuntur littoribus Asiæ, ab oriente mari Icano, a septentrione vero mari Egeo, a Meridie mari Carpathio. Sunt autem omnes insulæ Ciclades numero quinquaginta tres. Tenent autem hæ insulæ a septentrione

ad meridiem milliaria quingenta et nonaginta.

Insula vero Sicilia tria habet promontoria: unum quod dicitur Polurum et Aspicum ad anglonem Messana civitas proxima est. Secundum promontorium est Pachinum sub quo civitas Syracusana sita est, et dirigitur in occasum: hæc habet a Poluro in Pachinum milliaria centum quadraginta novem, a Pachino in Lilybeum habet milliaria centum septuaginta quatuor: hæc ab oriente cingitur mari Adriatico, a meridie vero Africo, quod est contra Subcortaneos et Surcos minores, ab occidente et septentrione habet mare Tyrrenum, et a borea usque in subsolanum fretum habet Adriaticum, quod dividit inter aurimentationes Syriæ et Italiæ briachios. His igitur finibus Sicilia continetur.

Insula vero Sardinia habet contra meridiem Numidiam Kralicanosi. Sardia etiam suo freto spatio millium viginti a Corsica dividitur, quam Corsicam habet a septentrione versus Albinensos: nam spatio in longum tenet millia ducenta et triginta.

Hæc habet ab oriente et a borea Tyrrenum mare, quod spectat ad portum urbis Romæ, ab occasu habet mare Sardum, et ab africo insulas Baleares longe positas, a meridie vero Numidicum sinum, a septentrione autem Corsicam insulam.

Insula Corsica multis promontoriis angustata est: hæc habet ab oriente Tyrrenum mare et portum Romanum, a meridie Sardiniam, et ab occasu insulas Baleares, a cirtio vero et septentrione Ligustium: tenet autem in longo milliaria centum quadraginta, in lato vero milliaria sex et viginti.

Insulæ Baleares sunt duæ: major et minor, quibus insunt bina oppida, minus quidem¹, majus Trasacona, versus sep-

¹ Deest nomen in editione Lugdunensi, sed forte est Portus Magonis (Mahon) quæ condita

est a Carthaginensibus in minori insula quæ nunc vocatur *Minorque*.

tentrionem quidem habet contra se majores insulas Boses, ab oriente vero Sardiniam, ab aquilone vero mare Gallicum, a meridie vero Africae Mauritaniam, cui pelagus ab occasu Hibernicum spectat.

Hæ sunt insulæ ab Hellesponto usque ad Oceanum per totum altum pelagus famosæ, quæ intellectu et magnitudine celebres habentur.



INDEX

Tractatum et Caputum in libro de Natura Locorum.

TRACTATUS I.

*De longitudine et latitudine loci per distantiam
ab orbe.*

CAP.	I. Quod naturam loci scire oportet in scientia naturali, et quod peccant qui de hoc non quærunt.	527
	II. De distinctione locorum, ut sciatur cujus loci hic investigetur diversitas.	530
	III. De diversitate loci ex distantia sui ad orbem proveniente.	531
	IV. De causa virtutis loci quæ datur forma elementi.	534

V. De communibus proprietatibus locorum in quibus sunt commixta ex quatuor elementis.	536
VI. De distinctione terræ per loca habitabilia et non habitabilia.	538
VII. Utrum habitabilis sit quarta terræ quæ est ab æquinoctiali usque in polum Australem?	542
VIII. De inhabitalibus regionibus et terris.	545
IX. De longitudine et latitudine locorum habitabilium.	546
X. De diversitate habitationis in terra habitabili, et de diversitate naturæ locorum.	548
XI. De diversitate temperamenti climatum.	550
XII. De natura et dispositione inferioris hemisphærii.	552
XIII. De diversitate naturæ locorum ex accidenti montium, marium, et sylvarum.	555

TRACTATUS II.

De natura locatorum causata a locis.

CAP.	I. Quod diversitates elementa faciunt in elementatis.	558
	II. De duodecim modis quibus perficitur commixtio elementorum in locis habitabilibus.	560
	III. De diversitate accidentium eorum quæ generantur secundum determinatas diversitates.	562
	IV. De accidentibus generatorum ex diversitate accidentium locorum.	564

TRACTATUS III.

In quo est cosmographia.

CAP.	I. De descriptione quartæ Orientalis nostræ habitabilis.	566
	II. De descriptione quartæ Occidentalis nostræ habitabilis.	570
	III. De descriptione quartæ Septentrionalis nostræ habitabilis.	573
	IV. De descriptione quartæ Meridionalis nostræ habitabilis.	574
	V. De limitationibus trium principalium terræ partium nostræ habitabilis.	575
	VI. De limitationibus partium Asiæ.	576
	VII. De limitationibus partium Europæ.	578
	VIII. De limitationibus partium Africæ.	580
	IX. De limitationibus insularum, quæ sunt inter Hellespontum mare et Oceanum.	581

D. ALBERTI MAGNI,

RATISBONENSIS EPISCOPI, ORDINIS PRÆDICATORUM,

PARVA NATURALIA.

DE CAUSIS

ET PROPRIETATIBUS ELEMENTORUM

LIBER PRIMUS

TRACTATUS I

DE PROPRIETATIBUS ELEMENTORUM IN COMMUNI.

CAPUT I.

Quæ libri intentio, et de proprietatibus elementorum quæ sunt grave et leve? ex quo elicitur error eorum qui dixerunt ignem elementum non esse.

Quoniam autem complevimus jam communiter ea quæ de *Natura locorum* et

distinctione dicenda sunt in physicis, superesse videtur nobis, ut proprietates elementorum, quas ex orbe et locis habent exponamus. Et in hoc opere sequentes Aristotelem archidoctorem philosophiæ, duos libros particulares inducimus, in quibus complebimus hanc scientiam: in quorum primo proprietates elementorum naturales declarabimus, et in secundo docebimus accidentales quæ aliquando elementorum inducunt corruptionem, ita quod non a specie corrumpuntur, sed corrumpuntur eorum qualitates.

Dicamus ergo, quod postquam præmissus est a nobis sermo doctrinalis physicus de *Cælo et Mundo*, et determinavimus de illo sufficienter, eo quod mo-

bilis circularis, et mobilis recti naturas et passiones ibi induximus, videtur adhuc nobis aliquid de scientia mobilium illorum remanere, quod est de proprietatibus et passionibus eorum. Et ideo inducimus hunc librum, ut determine- mus omnes proprietates elementorum tam in alto positorum, ut est elementum quintum, quam in loco inferiori, ut sunt elementa quatuor. Modus enim noster est constrictus et brevis, ita tamen quod sit sufficiens ad notitiam proprietatum quatuor elementorum. Tangemus autem dicta Antiquorum circa hanc materiam, ut certior sit doctrina nostra. Et quæcumque dicemus de elementis, verificabimus per signa visibilia et sensibilia; quandocumque enim sensitivi congruunt, electissima sunt in physicis. Oportet enim nos omnem proprietatem elementorum agnoscere antequam loquamur de transmutatione corporum, generatione, corruptione, et alteratione, et augmentis: quia elementa sunt illarum transmutationum principia. Et nisi bene elementorum naturæ et accidentia sciantur, ignorabuntur eorum omnium naturæ quæ causantur ab ipsis.

Ex his autem quæ in libro *Cæli et Mundi*¹ diximus, constat duorum generum esse elementa. Est enim quoddam elementum primum corporum efficiens et nno ingrediens compositionem per substantiam et esse, sed influens omnibus tam compositis quam simplicibus suas virtutes. Et hoc dicitur quintum elementum divisum ab omnibus aliis, habens cum elemento similitudinem: quia ipsum est faciens compositionem et immixtum composito per virtutem.

Alia autem elementa quæ materialiter sunt ingredientia compositum, et sunt primæ corporum materiæ sunt quatuor quæ notata sunt nobis ex dictis pluries in præcedentibus libris. Horum autem

quoddam est leve simpliciter, et quoddam est grave simpliciter, et quædam sunt graviora aliis, et leviora aliis. Terra enim frigida et sicca existens gravior est inter omnia elementa, non habens gravitatem comparatam tantum, sed gravitatem simpliciter. Gravius in elementis post terram est aqua quæ est frigida et humida. Quod autem gravius est post hæc duo, est aer qui calidus et humidus est. Ignis autem non habet gravitatem omnino, sed ascendit super omnia.

Et si dicatur hæc tria elementa sequi in gravitate minori quam ipsa sint, comparatio est abusiva, nisi distinguatur duplex ignis: ignis enim qui est in materia propria, et ignis qui est in materia aliena non per se igni assimilata. Et primus quidem nihil omnino habet gravitatis. Secundus autem habet gravitatis aliquid, quæ tamen non venit ad actum descendendi inferius, propterea quod vincitur a formis ignis materia talis.

Quia terra vero facta est gravior elementorum, ideo est inferior in loco. Et quia ignis factus levior elementorum, ideo est altior eorum in loco. Duo autem media quæ sunt aer et aqua, medium sortita sunt locum. Hæc omnia expedita sunt in libris tertio et quarto *Cæli et Mundi*.

Fuerunt autem quidam priorem Philosophorum non consentientes in numerum elementorum qui dictus est. Dicebant enim ignem non esse elementum: eo quod ipsum non videtur primum corporum, sed ante se secundum naturam habere aliud. Dicunt enim ipsum generari per motum cælestis corporis ex elemento alio quod est aer. Ratiocinati enim sunt dicentes nullum esse corpus elementum quod est ex alio generatum, quoniam elementum est primum ex quo alia generantur. Ignis autem qui levior est omnibus eorum quæ sunt in

Ignis duplex.

Quatuor elementa.

¹ III de Cælo et Mundo, tract. II, cap. 1.

loco, non potest nisi ex confricatione aeris ad cœlum ex motu cœli. Sicut enim diximus in libro *Cœli et Mundi*, caliditas ignis causatur ex confricatione ex motu cœli inter genera duo, quorum unum est aer qui est materia ignis, et alterum cœli motus quod est efficiens et inducens formam. Exemplum autem hujus inducunt dicentes resudationem humoris naturæ non esse elementum : eo quod sit calore radiorum solis et humore terræ quasi materia. Propter quod ignis non videtur esse primum corporum efficientium vel materialium. Et cum non sint plura corpora, non videtur ignis esse elementum, cum elementum ab omnibus esse supponatur primum genus corporis efficientis, et secundum genus corporis materialis.

Est autem necessarium contradicere his ex eis quæ supponunt. Dicunt enim quod aer est corpus pertingens ad cœlum, et quod ipse est inter sphæras cœlorum, et quod non mutatur in ignem nisi per motum cœli. Si igitur hæc vera sunt quæ dicuntur esse, necesse est quod dicant multos esse ignes. Generabitur enim unus ignis inter orbem Lunæ et orbem Mercurii, alius inter orbem Mercurii et orbem Veneris, et alius inter orbem Veneris et orbem Solis, et alius inter Solis orbem et orbem Martis, et adhuc alius inter orbem Martis, et Jovis, et inter orbem Jovis et Saturni generabitur ignis ex simili causa quam dicunt quæ est fricatio orbis ad aerem, vel fricatio orbis ab orbem. Maximus autem horum ignium erit ille qui est inter orbem Saturni et sphæram stellarum fixatum : eo quod sphæra stellarum fixarum major est omnibus inferioribus sphæris, et plura habet in se corpora quæ stellæ dicuntur, cum quælibet inferiorum orbium non habeat nisi corpus unum. Igitur secundum dicta id corpus quod im-

plet inter sphæras, erit corpus igneum generatum ex aere qui illic est ex confricatione cujuslibet sphære ad inferiorem consphæram suam : et quidam jam concesserunt Philosophi qui de secta Platonis et Democriti sunt et quorundam aliorum inducentium simile, ex hoc quod inducunt ignem generari ex hoc quod ferrum colliditur ad lapidem : ferrum, inquam, quod est sicut focile formatum, est *focile* vocatum.

Amplius inducunt autem simile in arboribus quæ sicca sunt in montibus ubi liberum accessum habet aer, aut in desertis planis undique patentibus vento et spisse consitis. Cum enim super illos procellose et tempestuose forti sufflatione flat ventus, ex confricatione earum ad invicem egreditur ignis consumens arbores, præcipue in tempore sicco et in regione sicca in qua arbores non superfluo abundant humido exstinguente, aut in quibus est humidum oleaginum et unctuosum, sicut est in abiete et pinu.

Adhuc autem adducunt de fossoriis quibus aliquando descenditibus obijcitur lapis durus ex diverso : et tunc emicat ignis. Horum autem similia adduci possunt multa : eo quod plurima tam in physicis quam in artibus reperiantur.

Sed nos non oportet ad horum sermonem multum esse sollicitos. Quia hæc determinavimus in libro *Cœli et Mundi*¹, ubi ostendimus hoc corpus non esse susceptibile peregrinarum impressionum et extraneorum : nam in materia cœli non generantur qualitates quæ in aliis corporibus generantur. Nec est ibi talis violentia et confricatio, cum motus cœli non sit contra naturam cœli, sed secundum naturam, licet primum movens sit intelligentia : aerem autem illuc non pertinere, nec illuc ascendere, eo quod natura super omnia ascendit, cum non sit simpliciter levis, sicut patet ex ultima

¹ I de Cœlo et Mundo, tract. 1, cap. 6.

parte libri *Cæli et Mundi*¹. Nec est conveniens ratio concludens non esse id elementum quod ex alio generatur. Simplicium enim quodlibet generatur ex alio per circulum. Sed si ex aliquo generetur, quod secundum formam esset posterius ipso, et maneret in generato secundum virtutem, et esset primum, tunc non esset elementum quod sic ex alio generetur. Horum autem nihil verum est in generatione ignis : ignis enim ex aere ponatur generari, sicut in libro *Peri geneseos*² determinatum est, elementorum generatio ex invicem est circularis. Sed tamen quia nihil salvatur generatione in generato nisi materia, ideo est simplex quod generatur, sicut et generatur ex simplici : et utrumque est elementum, licet unum tempore sit in tali generatione. Nec est verum quod dicunt ex aere generari ignem per confricationem : aer enim non ascendit ad locum ignis, etiamsi ignis intelligatur removeri a loco suo. Et ideo primum corpus quod generatur, est in concavitate cæli, non est ex aere, sed potius ignis erit ibi primum quod productum est in materia elementali, sicut diximus in libro *Cæli et Mundi*, et in libro de *Natura locorum*.

CAPUT II.

De proprietatibus elementorum in motis corporibus.

Ne autem amplius evagemur circa quæstiones de numero ab Antiquis factas, cum nos hic de talibus non intendamus, sed potius de elementi proprietatibus, ad propositum redeamus tangentes quascumque elementum habet proprietates in composito quod ex elementis est constitutum.

Dicamus ergo omnium animalium et quorumcumque compositorum corporum esse compositionem ex quatuor corporibus quæ elementa vocantur, quæ sunt materia : omnia composita corpora sunt commixta per ista quatuor prima, et sunt operationes elementorum in compositis quas determinavimus in libro de *Natura locorum*. Sed tamen corpora quædam magis recedunt ab elementis in operationibus suis, et quædam minus recedunt ab eis. Quæ autem minus recedunt ab eis, sunt lapides et mineræ. In his enim expresse elementorum videmus operationes : propter quod immediate componentur ex elementis. Plus autem his recedunt plantæ in quibus imperfecte animæ videmus operationes. Et ideo talia

¹ IV de Cælo et Mundo, tract. II, cap. 5.

² II de Generatione et Corruptione, tract. III, cap. 10 et 11.

corpora sequentur elementorum operationes, licet non immediate componantur ex his. Sed oportet fieri contemperationem in semine et succo, vel ejus quod est loco seminis vel humoris seminalis, in quo est spiritus pullulare faciens plantam. Animalium autem corpora recedunt maxime, et ideo non generantur ex elementis proxime : sed oportet elementa commisceri in humores, et ex humoribus constitui animalium corpora. Humores enim licet sint actu humidi omnes, propter quod et humores vocantur, sunt tamen virtutem obtinentes cujuslibet elementi. Invenitur enim commixtio in qua dominatur cholera citrina, quæ est calida et sicca sequens proprietates ignis. Et invenitur alia in qua dominatur sanguis, qui est calidus et humidus, sequens proprietates aeris. Invenitur etiam alia quæ est ex phlegmate, sequens proprietates aquæ in eo quod est frigida et humida. Et invenitur alia quæ est ex cholera nigra, quæ melancholia vocatur, quæ est frigida et sicca, virtutes habens terræ. Humorum autem istorum generationem et diversitatem habet determinare medicus. Nos enim hic non intendimus nisi elementorum compositorum invenire proprietatem.

Dicemus autem in sequentibus libris naturalibus, quod composita ex his quatuor materiis, non habent eas æqualiter secundum proportionem arithmeticam, sed potius geometricam proportionem. Quia sanguinis vel humoris qui est in loco sanguinis, necesse est esse plus in quolibet corpore animato. Hæ tamen quatuor materiæ in corporibus commixtis accipiunt corruptionem et additionem innaturalem ultra quam debitum est corpori. Et aliquando naturalem diminutionem et resolutionem ab harmonia quæ debetur speciei vel individuo cujuslibet animati. Et hæ mutationes fiunt cum materia, et non in quantitate sola. Fit autem distemperantia harmoniæ, aliquando sine materia in qualitate sola, quando mutantur aut a caliditate ad frigiditatem su-

perfluam, aut e converso, aut a siccitate naturali ad humiditatem superfluam, aut e converso, ex humiditate naturali ad siccitatem superfluam, quamvis nulla materia corrupta sit in animalis corpore. Propter quod etiam sapientes medicorum in ægritudinibus considerant, utrum causetur ex humore corrupto cum materia, vel ex qualitate humorum intensa vel remissa absque materia corrupta humoris. Et si est ægritudo ex materia corrupta, dicunt evacuanda et dant evacuantia : quoniam humores corruptos oportet educi ne putrescant corpora. Si autem causantur ex qualitate sola ex corruptione materiæ humoris, dant alterativa sola, et non evacuativa sola : quoniam corpora ab humore corrupto evacuari malum est et nocivum. Cum igitur additur unum componentium elementorum in corpore commixto ultra mensuram proportionis secundum quam exigit ad constituendum corpus in specie vel in individuo, tunc generatur nocumentum in corpore constituto. Simile autem accidit nocumentum cum minuitur, et non est tantum de eo in corpore quantum inesse deberet.

Amplius autem si contingeret unum elementorum occupare id quod compositum est ex omnibus, induceret interitum et dissolutionem : quoniam locus in quo salvatur compositum, compositus est, sicut in præcedenti libro ostendimus.

Similiter autem si contingeret compositum privari omnino uno elementorum, non posset in esse permanere tale compositum, sed dissolveretur. Si enim aliquod animalium omnino privaretur aere, non duraret. Propter quod natura piscibus et cæteris aquaticis membra paravit in quibus spiritum continent aereum : quia sine aere nec est nec nutritur spiritus in corpore hominis vel alicujus alterius commixti. Per spiritus enim operantes fit commixtio, et virtutes commixtorum spiritibus discurrunt et diffunduntur. Actione autem ignis perforatio fit ad vias spirituum perficiendas. Dixi-

mus autem de his quantum ad hanc intentionem pertinet satis in libro de *Natura locorum*.

Cadens ab
alto quomo-
do non col-
liditur?

Similiter autem si aliquod animalium aer similiter occuparet, qui non esset commixtus aliquantulum, moreretur. Et hujus signum est, quod videmus, quod ea quæ cadunt ab altissimo ubi plurimus est aer, videntur mortua, non ex casu, sed potius antequam perveniant ad terram. Experimentum autem hujus est duplex. Unum quidem quod observatur in arte scandendi : quoniam si cadens ab alto extrudatur a linea casus, non colliditur, non tantum quantum potest collidi ex loco in quo recepit expulsionem. Si enim aliquis aliquando cadat, et ei alius obviet per tres cubitos antequam ad terram descendat, et eum manu extra lineam extrusverso ejiciat, non colliditur cadens, nisi quantum potuit collidi ex casu trium cubitorum. Si autem ab altissimo cadat, et extrudatur a linea casus, tamen invenietur mortuus : et ideo constat quod non ex casu mortuus est, sed quia a simplici aere fuerat occupatus. Aliud est experimentum, quod cadavera eorum inveniantur cum signis mortis, non ex collisione, quia forte ex casu non tumescunt vel non sanguinant : neque cætera signa habent collisionis humorum. Hac de causa etiam in montes altissimos Philosophi ascendentes, spongias aquis intinctas ante nares secum portaverunt, ut per has spiratus grossior esset aer. Causa autem hujus profecto est : quia purus aer statim facile ad calorem et frigus immutatur. Et ideo spiratus aer purus frigiditatem non retinet, sed statim calescit in corpore, aut et motu et calore pulmonis. Propter quod ad cor veniens, incendit cor et interficit : aer autem grossior retinet magis frigus extrinsecum : et hoc a calore corporis et motu pulmonis non removetur ab eo : et ideo veniens ad cor, refrigerat ipsum, et nutrit vitam et conservat eam in animali.

Si autem sunt animalia et spirantia,

illa sunt frigida per naturam, et contrarietate loci superioris ad inferiorem corumpuntur, sicut pisces moriuntur extra aquam. Similiter autem fit cum aliquod commixtorum humorum occupatur ab igne : quia ignis est vehementissimæ actionis, et ideo educitur cito inhærens humidum : propter quod discontinuatur terrestris pars compositi, et corrumpitur id quod ex elementis erat compositum. Fit autem similiter in occupatis ab aqua pura : licet enim pisces vivant in aquis, non tamen salvantur et nutriuntur aqua simplici, sed commixta et composita, sicut nos in libris de *Animalibus* ostendimus. Eademque autem ratio est etiam de terra simplici, in qua putrescunt composita omnia quæ secundum naturam dissolvuntur. Et ideo verum non est quod quidam Antiquorum tradiderunt quatuor in simplicibus vivere elementis, Salamandram quidem in igne, et Talpam in terra, et Alech de aqua simplici, et piscem qui *Sturio* vocatur, de aere. Nec oportet nos contra istam quærere rationem : cum constat ex eisdem generari et nutrirî omne corpus quod est : et cum quodlibet istorum commixtum sit ex quatuor, oportet etiam quod ex commixto et non ex simplici nutriantur. Diximus autem de his in libro de *Nutrimen- to animatorum*. Invenimus igitur quædam habitare in aquis, sicut reptilia maris et pisces. Aqua enim commixta fit eis quasi temperamentum, et locus tranquillus propter hoc quod sunt frigida et humida. Et ideo habitant in ea, et moriuntur cum egrediuntur ex ipsa. Nullum autem invenitur habitare in igne, quamvis commixtum ponamus ignem, sicut est ignis in terrestri substantia, propter nimiam caliditatis suæ actionem et consumptivam naturam.

CAPUT III.

De proprietatibus elementorum in compositis secundum virtutes quas habent ad motum, quæ sunt gravitas et levitas.

Consequens est autem ut determinemus proprietates elementorum quas habent in mixtis corporibus secundum potentias et virtutes, quibus ad motum localem ordinantur, præcipue vero hic motus est in corporibus mineralibus et plantis quæ non habent motum qui sit ab anima, sed habent motum elementi dominantis in ipsis.

Quæritur enim de his, quare quædam eorum natant super aquam, et quædam submerguntur sub ipsa : cum in eis omnibus communiter dominantur elementa gravia inferiora? Causam autem nullam necessariam hic assignabimus : eo quod nos de particularium natura hic non facimus tractatum et inquisitionem. Dicamus ergo, quod causa submersionis est, quod vincit in composito pars terræ, non materiæ in materia tantum, sed etiam in qualitate quæ terminat compositum ad formam et speciem. Sicut autem omnia talia quæ terrea, et constant et coagulantur per frigidum exprimens humidum in ipsis diffusum, sicut sunt lapides et metalla quæ sunt ferrum et æs. Licet enim illa liquabilia sint in calido, et ideo in eis dominari videatur aqua, tamen subtile terreum vincit in ipsis, a frigido

universa coagulantur. Propter quod frigus comprimit poros eorum, ita quod non intercipitur in eis aer. Et ideo pondere terræ in eis vincente merguntur sub aquis.

Simile autem est in his in quibus dominatur aqua tam propter materiam, quam propter terminantem frigiditatem. Hæc enim poros non habent, aut minores strictiores habent quam sint aeris spatia. Et ideo necesse est quod mergantur : quia licet sint aquea, tamen commixta non essent si nihil haberent terræ : et ideo graviora sunt aquis in piscibus, et merguntur sub ipsis. Secus autem est si aliqua istarum sint exusta per ignis incendium. In his enim violentia ignis educitur inhærens humido, et viæ ejus remanent aere plenæ. Propterea multos habent et manifestos poros qui aerem in se claudunt : propter quæ natantia inveniuntur, sicut lapides combusti porosi et duri, et sicut pumex. Ex eisdem autem patet quare ligna natant exceptis paucis : porosum enim est lignum et aereum, licet vincat in ipso terræ natura. Calor enim naturalis dividit ipsum, ut per ipsum discurrat nutrimentum : et exhalante calore naturali et secum educente humidum, remanet rarum et porosum. Cujus signum est, quod magis natantia inveniuntur arida quam viridia : et ea quæ non natant, sicut ebenus, et quæcumque nigra solida et sine poris inveniuntur.

Quod autem omnibus mirabilius esse videtur, est de quibusdam quæ merguntur, et tamen unctuosam habent humiditatem, sicut ebenus quando raditur. Rasure enim ejus pinguis est et unctuosa et inflammativa, et tamen mergitur ebenus sub aqua : cum unctuosorum non sit mergi, sicut parum infra dicemus. Sed hæc ratio hujus est, quia pro certo talium unctuositas est valde pauca et terrestris multa : et constrictio pororum ex vi terrenæ frigiditatis est fortis, et tunc extincta unctuositas mergitur cum terrestri quod vincit super eam. Quando autem e con-

Causa submersionis.

tra fit, quod vincit pars ignis et aeris, natat. Quæ victoria numquam est in compositis, et secundum materiam in omnibus compositis vincunt elementa inferiora, sicut non in in secundo *Peri geneleos* ostendimus. Omnia enim mineralia et plantas et animalia videmus vinci terra et aqua secundum materiam. Est igitur hæc victoria secundum operationes qualitatis ad speciem et formam terminantis. Caliditas enim complens raram et porosam facit substantiam in qua actu existens aer facit natate corpora.

Carnes altium sunt saniores cæteris.

Similis autem est causa, quare volatilia natant et volant super aerem. Sunt enim, ut in genere dicatur, carnes altium leves : propter quod etiam a medicis saniores judicantur. Ex levitate autem habent aptitudinem volandi : et sunt aereæ carnes et calidæ. Ostendit autem hoc multitudo pennæ et plumæ : eo quod pennæ aereæ sunt et raræ et leves. Cum enim penna et recenter nata in avibus quando sunt juvenes, plena est humore aqueo et sanioso : propter quod gravis est et non apta ad volandum. Cum autem calor naturalis et aeris continens calorem eduxerit humidum aqueum, remanet terrestre leve et aere plenum, quod maturatione caloris induratur, ne sit curvabile de facili : et tunc efficitur instrumentum volandi, et elevat avem super aerem. Non volant autem animalia gravium carnum, in quibus non est vincens humiditas aerea : sed aut gradiuntur super terram, aut repunt. Similiter autem et aves aquaticæ quæ frigidarum et gravium carnum sunt, paucas habent pennas, et sunt tardi et non longi volatus. Signum autem eorum quæ dicta sunt, sunt olea et adipēs : quæ omnia natant super aquam propter humiditatem aeream quæ pingue vincit in eis : propter quam causam etiam comesta talia supernatant, et fastidium inducunt et nauseam, nisi aliquo comesto detegantur et deprimantur, sicut caseo acuto, vel aliquo alio hujusmodi. Caliditas enim quæ est in talibus, elevativa est eorum,

et præcipue quando conjuncta est humiditati : quia tunc inviscatur humiditati quasi inseparabiliter : nec elevari potest, nisi secum elevet humidum. Quando autem est caliditas sine humiditate, adhuc evolat quod elevat : sed tunc recedit cito relinquens sicca quibus fuerit incorporata : et tunc illa separata a caliditate tendunt inferius : propter quod calida sicca non sentiuntur super natantia, quemadmodum calida et humida, sed secantur partes superiores per quas evolat siccum calidum acutum quod habet motum ignis et proprietatem.

Est autem hujus et alia causa. Calida enim et humida vaporantia sunt : eo quod calidum resolvit, et humidum præstat resolutionis materiam : propter quod inflativa sunt, et ex inflatione ad superiora pelluntur. Hæc igitur causa est supernatationis. Similiter autem in oppositis horum in quibus terrena frigiditas dominatur, quod non enatant, sicut lignum ebenum, et buxus, et ilex antiqua : in omnibus enim his præcipue quando in aqua aliquando jacuerit, pori obstringuntur : et ideo terrestreitas seclusa ab aere manet in eis, et ideo merguntur.

CAPUT IV.

De confutatione erroris eorum qui dixerunt frigiditatem esse naturalem elementis, et caliditatem accidentalem.

Determinatis autem his, necessarium est nobis inquirere, utrum qualitates elementorum quæ sunt propriæ eis, sive secundum se sint simplicia, sive sint mixta in compositis, sive sint propria et essentialia elementis, ita quod causent ea, an sint accidentia ingredientia super ea, et possibilis sint elementa esse elementa sine eis, et præcipue de esse frigoris et caloris hæc inquisitio est, an sint radices, hoc est, principium elementorum, an sint accidentia eorum? De hac enim materia multi priorum Philosophorum locuti sunt, qui nos in philosophia antecesserunt. Democritus enim et Plato, et qui sequuntur utrosque, eo quod in sermonibus physicis in parte cum utroque conveniunt, et dixerunt frigiditatem esse radicem et principium essentialia elementis : caliditatem autem esse generatam aliunde, et esse accidens elementale, et non principium. Rationem autem probationis acceperunt a ligno : quoniam videtur quod id quod elemento convenit secundum se et per intrinseca sibi, est essentialia. Accidentale autem quod causatur ab extrinseco. Caliditas autem non inest elementis quæ nos tangunt secundum se, quia tunc semper esset in eis : sed potius accidit eis ex accessu solis ad Ze-

nith capitum nostrorum. Quando enim sol declinat a nostra habitabili in orbe suo declivi a dextra motus in sinistram ad partem Meridiei, tunc si sit frigus superfluum super nos ex ipsa natura, ut inquirunt, elementorum, quam sol non vincit cum declinat a nobis : vocant enim dextram, dextram declivis circuli solis partem quæ est ab Ariete in Libram : eo quod tunc sol ascendit, et movens est ad genituram omne quod est : sed amittit vires, sicut in sinistra, quando est in signis meridionalibus a Libra in Arietem. Et hoc est quantum ad nostram habitabilem, et non simpliciter.

Similiter autem loca quæ sunt longinqua ad latus poti Aquilonaris quæ multum distant a linea æqualitatis diei et noctis quæ est circulus æquinoctialis, sunt multum frigida, ita quod quædam eorum sunt inhabitalia propter frigus. Loca autem propinqua eidem lineæ quæ sunt inter Zenith capitum nostrorum, calida sunt propter directum aspectum solis. Et hæc omnia patent ex his quæ in præcedentibus libris determinata sunt. Talis autem aeris et elementorum mutatio ex directo respectu solis et obliquo perficitur sensu. Videtur ergo caliditas ex accessu solis generari et recessu : frigiditas autem ex ipsis elementis produci videtur. Videtur ergo caliditas esse accidentalis, et frigiditas essentialis elementis : et est fundamentum rationis eorum, quod caliditas generatur ex motu et directo respectu solis. Frigiditas autem sine his elementis quiescentibus invenitur.

Dicamus ergo, quod bene opinati sunt dicendo radium generare calorem et accessum solis similiter : quia hæc per sensum cum esse inveniuntur. In hoc enim sermone nobiscum conveniuntur, sed in sententia differunt a nobis : quia nos dicimus caliditatem esse naturalem quibusdam elementis, sicut frigiditas est naturalis qualitas elementis quibusdam : visus enim testatur terram esse frigidam et siccam, quæ, inquam, terra propinquior est nobis inter elementa. In his

enim duabus qualitatibus sentis terram etiam ad tactum. Aqua autem frigida est et humida et propinqua nobis procul dubio. Hæc igitur duo elementa sunt propinqua nobis, et sunt frigida essentialiter. Duo autem sunt elementa calida propter radium solis, sed ex seipsis. Quod autem apparet hic frigiditas juxta nos in aere, nec tangere quando recedit sol a nobis, hoc non est propter hoc, quia aer sit essentialiter frigidus : sed quia duo elementa propinqua nobis frigida infrigidant eum. Licet autem talis excessus frigoris sive caloris ex accessu et recessu solis, hæc tamen ambæ qualitates sunt essentielles elementis duobus, sicut diximus. Bene igitur contingit aliquid agere formam aliquam in physicis, quod agens est accidentale : quod tamen illa forma inducta naturale est, et est in omni passivo quod naturaliter est receptivum illius formæ, quemadmodum ignis recipit caliditatem. Et hoc determinavimus in *Physicis*¹, ubi diximus quod agens semper est extrinsecum, et tamen partiens naturaliter suscipit formam quando potentia est in ipso. Unde quamvis caliditas a motu generetur, tamen est naturalis materiæ ignis.

Utrum autem hujus qualitates primæ quæ sunt calidum et frigidum, humidum et siccum, sint formæ substantiales elementorum, vel propriæ passionis eorum, in libro *Peri geneseos*² determinatum est. Quia nos hic de substantiis elementorum non agimus nisi tantum de proprietatibus eorum. Cum autem excessus fiat caloris et frigoris circa locum nostræ habitationis ex accessu et recessu solis, erit habitatio continua vel habitabilis et delectabilis, cujus principium est radix æqualitas et temperamentum primarum qualitatium. Cum enim connaturalitatem habeant locus et locatum, erunt illæ qualitates principium loci, quæ sunt principium locati. In omnibus autem corpori-

bus animalium et plantarum principium est et radix æqualitas inter excessum et diminutionem, quod vocatur *temperamentum*. In hac enim æqualitate sanitas est his quæ commixta sunt ex contrariis : per egressum autem a temperamento ad extremitatem : excessu aut calidi aut frigidi aut sicci fiunt in animalibus ægritudines et nocumenta pernicioosa, sicut diximus superius.

Certum est igitur ex his quæ dicta sunt, quod esse frigoris causatur ex propinquitate duorum elementorum frigidorum. Esse autem caloris in elementis est naturale duobus, quæ non appropinquant nobis uno tempore plus quam in aliquo alio ; sed esse caloris et frigoris circa nostram habitabilem causatur ex accessu et recessu solis et aliorum planetarum in circulo obliquo, et est principium generationis et esse et vitæ per æqualitatem temperamenti, et per excessum causatur nocumentum et ægritudo.

¹ VII Physic. tract. II, cap. 3 et 4.

² II de Generatione et Corruptione, tract. II, cap. 17.

CAPUT V.

De proprietatibus elementorum in se et in compositis quæ causantur ex locorum diversitate.

Habent tamen elementa tam in se quam in commixtis quasdam proprietates naturales sibi ex loco. Ad has sciendas oportet nos dicere proprietates locorum terræ et littorum et marium et ramorum montium, et accidentia quæ generantur in habitationibus illorum locorum, et naturas hominum in locis illis conversantium. Licet enim hæc jam dixerimus in libro de *Natura locorum*¹, tamen oportet et hic etiam tangere ad complementum doctrinæ de proprietatibus elementorum.

Clima primum.

Dico igitur, quod inhabitatores climatis primi, quod est propinquissimum circulo æquinoctiali, qui dicitur linea æqualitatis, eo quod æquat noctem diei quando sol tangit ipsum, propter assiduam fixationem radii solaris super capita ipsorum acquirunt superfluam caliditatem et superfluam siccitatem : et minuetur in eis frigiditas et humiditas. Et ideo semen illorum virorum ex calidis est cibus, et in calore magno maturatur in corpore : et cum cadit in matricem mulieris, est matrix calida et decoquit ipsum magna decoctione. Et ideo corpora natorum commu-

nicant omnia in nigredine intensa et crispitudine capillorum. Decoquit enim aqua quæ semen viri est in matrice calida et sicca : et commiscetur ei sanguis menstruus, et coagulatur, et fit admodum frusticuli carnis, et deinde formatur et figuratur per membra. Et ex præcepto et jussu divino fit in eo anima rationalis, quæ non ex materia educitur, sed ab extrinseco causatur et datur, sicut nos in scientia divina ostendemus. Causa autem istius nigredinis et crispitudinis capillorum est, quia sol perpendiculariter vadit super eos bis in anno semel ascendens ab Ariete ad Cancrum, et semel descendens a Cancro ad Libram. In quibus enim signis movetur sol super eundem locum. Sunt autem comparia signa, Aries et Virgo, Taurus et Leo, et Gemini et Cancer. Sol igitur duobus signis comparibus super eundem locum movetur : ergo est super capita eorum qui habitant inter tropicum æstivum et æquinoctialem : propter quod duas habent æstates calidissimas : quia, sicut diximus, bis pertransit casus lapidis super capita eorum, hoc est, lineam perpendiculariter ductam a centro solis super capita eorum : hoc enim vocatur *casus lapidis* : eo quod lapis et quodlibet simpliciter grave, cadit inferius perpendiculariter, ac si duos angulos rectos describat super superficiem terræ per centrum terræ intelligi ductam : pertransit enim sol semel casum lapidis quando ascendit a linea æqualitatis, quando caput Arietis tangit ad initium Cancri. Secundo autem ascendendo quando redit ex ultima parte declinationis suæ ad Septentrionem, quæ ultima pars est, ubi initium Cancri tangit tropicum æstivum redeundo ad initium Libræ, quod attingit æquinoctialem lineam ex opposito capitis Arietis, pertransit eundem casum lapides super capita eorum : et sic fit eis bis in anno fortissimus color. Tales autem transitus su-

Quare Æthiopes sunt nigri ?

¹ De Natura locorum, tract. i. cap. 2 et 3.

per capita eorum faciunt etiam aliæ stellæ velociter currentes quæ dicuntur pleiades et luna : omnibus enim his communicatio est cum operatione solis propter mutationem luminis a sole. Eadem autem de causa nigri et crispi et sicci sunt illi qui de India et de civitate Jamma et Zindi et Æthiopes universi. In omnibus his apparet ingredo caloris et crispitudo in capillis eorum.

Clima septimum.

In his autem qui habitant clima septimum quod propinquum est polo Aquilonari et a via solis et aliorum planetarum propter causam oppositam oppositæ accidunt qualitates. Omnes enim frigidi sunt, et loca eorum cito infrigidantur : et ideo sunt matricæ mulierum frigidæ et humidæ : et ideo accidit his albedo et subalbedo vehemens, sicut accidit Sclavis, et Parthis, et Dacis, et Teutonicis, et Anglicis, et talibus hujusmodi nationibus quæ habitant versus littus Oceanum Septentrionalis : omnes enim illi talis sunt formæ qualis dicta est.

Qui habitant climata mediocria, commixtos ex albedine et nigredine habent colores. Variantur autem istæ locorum dispositiones etiam ex accidentibus locorum quæ sunt profunditas, et littora maris, et montes, et cætera hujusmodi. Sic ergo oportet illud quod fuit nostræ inceptions in proprietatibus elementorum ex locis : in littoribus autem maris invenimus calorem quamvis littora non sint propinqua materiæ solis : et si sunt juxta viam solis, tunc multiplicatur calor in eis in littore super alia loca ejusdem latitudinis. Et hujus causa est, quia quando sonat reverberatur super aquam maris latam et

expansam, multiplicatur calor ex reflexione radiorum : et hic calor aquæ frigiditate ad littora propellitur : et ideo littora calefiunt, nisi propter aliud accidens remittatur calor locorum. Ideoque forte in littoribus sunt multoties montes excelsi attingentes usque ad frigus aeris qui patet vento Septentrionali, et sunt clausi ad Meridiem. Cum enim sint montes vaporosi, continuo generatur ros et pluvia de montibus illis qui flatu Septentrionali congelant in glacies et nives perpetuas : et ideo refrigescit littus tale montuosum. Ubi autem hoc accidens non est, ibi calida sunt littora propter dictam causam.

Signum autem hujus est, quod si immittatur aqua frigida in vitro bene mundo et decenter rotundo, sicut sunt urinaria, et objiciatur directe radio et oculo solis, multiplicatur calor ex reflexione radii super vitrum, et multum ille calor repellitur ab aquæ frigiditate post vitrum : et si sit ibi pannus bene mundus et siccus et aliquantulum adustus, incendetur et elicietur ex eo ignis. Et non accidit hoc si immittatur in vitrum aqua calida : eo quod calidum non repellitur et congregat, sed potius attrahit et rarificat : et ideo debilitat calorem generatum ex reflexione radiorum. Congregatio enim caloris ab oppositum vitrum est propter fugam ejus a frigiditate aquæ. Ideo calor et frigus sunt contraria, et unum fugat aliud.

De proprietate autem locorum nos per certitudinem diximus in libro de *Natura locorum* : et ideo hi ea non repetimus, sed ad alia transimus.



TRACTATUS II

DE PROPRIETATIBUS ELEMENTORUM IN SPECIALI.

CAPUT I.

De nobilitate elementi nobilis, quod cælum non sonat.

Quia ergo diximus proprietates elementorum quæ communiter accidunt eis tam in se, quando simplicia sunt, quam in compositis, ideo nunc ad perfectionem doctrinæ inducemus cujuslibet elementi proprietates naturales in speciali, inci-

pientes primo ab elemento primo nobili quod est cælum, de quo quidam dixerunt ex sapientibus physiologis, quod recipit impressiones peregrinas, sicut aliud elementum. Et ideo dixerunt, quod motu suo cum fricatione sui cum alio corpore, sive aliud sit sui generis, sicut quando sphaera tangit sphaeram, sive sit alterius generis, sicut quando sphaera tangit ignem vel aerem quem dicunt ascendere usque ad cælum, excitat stridorem et sonum harmoniæ magnæ : quem tamem non sentimus a silentio discernendo et aliis sonis propter consuetudinem audiendi ipsum a nativitate. Similia enim sibi et connaturalia non sentit sonus, sicut tactus qui non sentit calorem naturalem, sed potius ea quæ discernuntur a sensu, sunt excellentia ipsum et sibi dissimilia. Quia igitur consuetum generale est simile naturæ, ideo dicunt auditum acquiescere huic sono et non sentire eum.

De hac autem quæstione in libro de *Cælo et Mundo*¹ fecimus inquisitionem :

¹ I de Cælo et Mundo, tract. I, cap. 9.

sed quia hic proprietates elementi nobilis quas habet per comparisonem suam ad elementa, determinare suscepimus : ideo oportet etiam hic loqui de ista aliter quam de cœlo et mundo, et asseremus demonstrationem vehementis certificationis vel satisficientis vel sufficienter ostendentis falsitatem hujus quæstionis ex compositione cœli ad terram. Illæ autem rationes quæ in *Cœlo et Mundo* adductæ sunt, ex ipsa cœli natura sumptæ fuerunt. Cum igitur demonstrationem ex cœli compositione hic induxerimus ad elementa et ad locum habitationis, est propria huic intentioni, et ideo certior et manifestior.

Dicamus igitur sumentes positiones eorum, quod ipsi posuere necessario sonare cœlum ex motu confricationis, et quod huic sono acquievit auditus animalium : et discernere non potest eum propter consuetudinem, ut diximus prius. Si igitur verum est quod dicunt, tunc sensus animalium posset acquiescere sono æquali illi et majori et minori. Oportet enim has in cœli sono esse differentias : quia nos experimur quod quando sonans est propinquius auditui, tunc moratur et intenditur sonus. Et si idem sonans sit remotum ab auditu, tunc minoratur, et remittitur sonus : et si est in media distantia inter has duas distantias, proximam videlicet et remotissimam, tunc medio modo percipitur sonus. Quod autem cœlum ad nos in hac triplici distantia se habeat, invenimus per sensibiles figuras geometricas : et ideo visus testificatur illud. Corpora enim quæ sunt in alto quæ sunt cœlestia, appropinquant aliquando plus ad nos, et elongantur aliquando plus a nobis. Et non potest ad hoc dici, quod habitatio nostra sit insensibilis respectu magnitudinis cœli, sicut punctum respectu circumferentiæ : et ideo non sit perceptibile, quod stellæ quandoque plus approximantur, quandoque plus elongantur : quia hoc quod dicitur terram habere vicem puncti respectu magnitudinis cœli, non est dictum

nisi quantum ad ortum et occasum signorum et quantitatis hemisphærii : quia videlicet sex signa semper sunt super terram, et sex sub terra : quod non esset si terra quantum ad hoc sensibilem haberet quantitatem : sed terra habet quantitatem notabilem comparatam ad orbis planetarum : propter quod diametro planetæ videntur majores et minores secundum quod plus aut minus accedunt ad visus nostros : quod non esset si altitudo planetarum sensibilem differentiam et distantiam in comparatione ad terram non haberet.

His itaque suppositis, dicimus quod cæteris partibus existentibus, sol et stellæ planetæ et luna propinquiores sunt capitibus nostris, quando sunt super nostram habitabilem in Septentrione, quam quando oblique respiciunt nostram habitabilem quando sunt in Meridie. Adhuc autem dico, quod licet aliquis sonus consuetus sit, tamen major et minor illo non est consuetus : et ideo est perceptibilis. Quando igitur homo nascitur, et consuevit audire sonum cœli, ut dicit adversarius, et ideo non percipit ipsum, oportet quod major sit sonus stellarum quando sunt in Aquilonaribus signis, et minor quando sunt in Meridionalibus : et hæc differentia cum non sit consueta, debet percipi ab homine. Amplius autem suppono quod planetæ deferantur in extrinsecis circulis, erit aliquando longior pars diametri super Zenith capitis : et tunc stella altius et longius distat a capite, et debet sonare minus. Aliquando autem brevior pars diametri erit super capita : et tunc stella erit super capita, et tunc stella depressior est et minus distat, et debet sonare plus : et differentia perceptibilis erit. Adhuc autem debet esse major sonus unius stellæ quam alterius : eo quod est propinquior et velocioris motus quam alia. Et tunc luna eo quod magis inter corpora cœlestia appropinquat terræ, et velocius movetur transeundo signa Aquilonaria et Meridionalia in viginti oc-

to diebus, debet notabilem in sonando differentia habere ad stellas alias.

Sicut autem diximus de planetis quæ moventur eccentricis, ita possibile est ut inveniamus longiorem et breviorē distantiam in stellis fixis : quia licet non causetur ab eccentrico tamen causatur ex hoc quod oblique vel recte stella respicit Zenith capitum nostrorum. Et secundum hoc stella cum est in Oriente vel Occidente, longius distat a capitibus nostris, quam quando est in Meridionali linea super Zenith capitum nostrorum. Et secundum hoc iterum omnis stella debet habere differentiam in sonando. Idem autem erit in sole qui major est omnibus planetis et stellis, et ideo magis omnibus secundum eos sonabit. Si enim faciunt necessario ex motu suo, absque dubio magis sonabit quando est in Meridie super Zenith capitum nostrorum, et minus quando est in ortu suo vel in occasu oblique respiciens capita nostra secundum idem tempus : eo quod in ortu et occasu longior est linea, quæ est inter solem et capita nostra, quam sit linea quæ est inter solem et Zenith quando est in Meridie.

Ex omnibus autem quæ hic nunc dicta sunt, manifestum est et planum non sonare corpora superiora. Si enim bene intelligantur quæ dicta sunt de suppositionibus præmissis, destructus est sermo eorum qui dicunt stellas sonare cum volvuntur in circuitu.

Inducamus enim ad hoc figuram geometricam visibiliter demonstrantem et rationabiliter, quod non potest esse verum quod dicunt. Revolvam enim circulum signantem quantitatem totius terræ super centrum, et describam locum habitationis nostræ in convexo circuli terræ quem signabo super punctum B : deinde revolvam circulum alium sive eccentricum sive concentricum quocumque modo voluero qui sit circulus solis in uno die signans motum ejus ab Oriente per Meridiem in Occidens, et signabo tria puncta in circulo illo : ortum qui debet fieri

per G, et occasum per A, et punctum Meridiei quando est super Zenith capitum nostrorum per punctum D. Deinde continuabo per rectas lineas inter puncta du-cendo lineam A G quæ sit diameter circuli, et transit per centrum ortus circuli quod est E : producam etiam lineam A B et lineam D B, quæ sunt lineæ notantes distantiam quæ est inter solem et Zenith capitum nostrorum, quando sol est in Occidente vel in Occasu. Protraham etiam a centro lineam E B, quæ linea est medietas diametri terræ, et continuabo eandem lineam continue producendo usque ad punctum D. Et tunc linea D B erit quantitas longitudinis solis a Zenith capitum nostrorum, quando sol est in Meridie super capita nostra. Hujus autem figuræ istud est schema. Isto schemate sic disposito, constanter pronuntio quod ex quo est major cæteris stellis, et propinquior nobis quam sint quædam ex eis quæ planetæ dicuntur, quod ipse sonum fortiorem facit quam aliæ stellæ : et quod sonus est major in Meridie, quando est super capita nostra, quam sit in ortu vel occasu : eo quod manifestum est nobis lineas G B et A B esse longiores quam sit linea B D. Et has differentias sonandi sol debet quolibet die manifestare in auribus nostris. Id autem quod videmus et experimur, testatur contrarium illius.

Eodem autem modo cæteræ stellæ faciunt sonum majorem et minorem : et tunc puncto G et A quæ sunt ortus et occasus minus sonabunt, eo quod longius distant a nobis quam in puncto D quando sunt super capita nostra : et propinquius distant a nobis : et oportet hoc percipi in auditu. Contrarium autem hujus est ratio mathematica per inductam figuram. Jam enim præmissimus ea quæ necessaria sunt ad figuræ descriptionem. Dicimus enim quod linea A B et linea G B sunt æqualiter per quartum theorema primi Euclidis : quod sic dicit, quod omnium duorum triangulorum cujus duo latera unius sunt æqualia duobus lateribus alte-

rius, et angulus angulo, erit quoque basis basi æqualis, et reliqui anguli reliquis angulis : et tunc triangulus toti triangulo erit æqualis. Constat enim duas lineas GM et EA esse æquales per hoc quod sunt ab eodem centro ad eandem circumferentiam : et earum utraque est semidiameter ejusdem circuli : linea autem EB quæ refertur ad utrumque triangulum GEB videlicet et EBA , est æqualis sibi : ergo duo latera trianguli GEB sunt æqualia duobus lateribus trianguli EBA . Angulus etiam BEA qui est super centrum, et ex utraque sui parte facit angulum rectum : omnis enim omni recto est æqualis. Ergo per theorema ex Euclide inductum, basis BA trianguli EBA est æqualis basi GB trianguli GEB : et hoc est quod diximus, quod duæ lineæ GB et BA sunt æquales.

Hoc habito, dicimus lineam GB longiorem esse quam sit linea GE . Hoc autem ostendimus per ultimum theorema primi Euclidis quod dicit sic : In omni triangulo rectangulo, quadratum quod describitur a latere trianguli, recto angulo opposito in seipsum ducto, æquum est duobus quadratis quæ a duobus lateribus reliquis ejusdem trianguli in se ductis describuntur. Est enim orthogonius triangulus GEB . Et cum rectus angulus est angulus GEB , latus autem illi oppositum est linea GB . Ergo si ista in se ducantur, quadratum ejus est æquale duobus quadratis duarum linearum GE et EB . Ergo quadratum ejus majus est quadrato solius lineæ GE in se ductæ. Sed si quadratum est majus quadrato, tunc etiam radix est major radice. Radix autem est linea GB . Ergo linea GE major est quam linea GB . Et hoc est quod volumus demonstrare.

Hoc habito, dicimus lineas GD et ED esse æquales, eo quod sunt ab eodem centro ad eandem circumferentiam. Cum igitur linea GB sit longior quam linea GE , erit etiam longior quam linea ED . Si linea ED est longior quam linea BD , sit pars lineæ totius ED : ergo

linea GB quæ longior est quam linea ED erit multo longior quam linea BD . Sed linea BG est distantia inter nos et solem quando est in Meridie. Ergo multo major est distantia inter nos et solem quando est in Oriente, quam quando est in Meridie.

Similis autem modus est demonstrationis ad hoc ut ostendamus majorem esse distantiam solis a nobis quando est in Occasu, quam quando est in Meridie : ergo fortius sonabit in Meridie sensibilter, quam quando est in Oriente vel Occidente. Hoc autem falsum est. Ergo relinquitur falsum esse solem vel stellam aliquam vel cælum sonare : et hoc est quod volumus demonstrare.

CAPUT II.

De opinione quæ dixit mare transmutari de loco ad locum.

Quia autem in cælo non sunt proprietates præter eas quæ in *Cælo et Mundo* tactæ sunt, loquamur de proprietatibus elementorum per ordinem.

Tangamus autem primo proprietates aquæ, eo quod illæ sunt magis communes et notæ inter proprietates elementorum. Sunt autem in communi tria quærenda, quorum primum est, an mare permutetur de loco ad locum secundum aliquam cælestium permutationem? Secundum autem erit de influxu et refluxu maris. Tertium autem de causa diluvii

aquæ, sive sit universale, sive sit particulare.

Et deinde quæremus de proprietatibus aeris, et etiam de proprietatibus ignis, et adjungemus de proprietatibus ultimo quæcumque in communi secundum hanc intentionem sunt inquirenda.

Aristotelis autem littera non continet inter hoc nisi primum in his quæ ad nos pervenerunt de libro ejus. Et certum est alia deficere, et non esse ad nos delata : quoniam absque dubio alia quæ enumeravimus ex principiis determinatis in hoc libro habent determinari. Causantur enim vel oriuntur hæ proprietates elementorum in se consideratæ, vel ex orbis motu factæ in elementis. Et cum ea quæ dicta sunt ex orbis motu fiunt in elementis, habent ista determinari hic : propter quod vitium oportet esse ex diminutione primi libri Aristotelis qui de *Causis proprietatum elementorum* intitulatur.

Primum
quesitum.

Primum autem horum incipientes dicimus, quod quidam Physiologorum magnam habentes auctoritatem inter alios, dixerunt quod mare tam Mediterraneum quam Oceanum mutatur de loco ad locum : et motus ille principietur a motu spheræ cælestis quæ causat motum maris de loco ad locum. Sumunt autem probationem dicti sui a signo effectus quem dicunt esse effectivum transmutationis maris, qui effectus est montes et colles et valles. Capita enim altissimorum montium et profunditates vallium dicunt esse causata ex hoc quod unda maris terram in unam partem referet : et ibi facta est vallis : et addiderunt in altera parte, et ibi facta est altitudo montium. Terra autem commixta aquis maris facta est lutum conglutinosum, et ex illo facta est primo talem humiditatem extrahens. Secundo autem algido respersum humidum comprimente factus est lapis. Et ideo montes sunt lapidosi, ut dicunt. Cum autem montes sint in mul-

tis locis, mare dicunt permutari de loco ad locum. Et cum hujusmodi mutationis causa non sit inventa in inferioribus, oportet quod sit causata ab aliquo motu spheræ cælestis.

Attulit autem quidam eorum signum ad hoc ab eventu qui evenit sibi. Cum enim foderet puteum, et pervenisset ad locum argillosum, in profundo reperiit ibi gubernaculum magnæ navis, et scire se dixit per hoc, quia mare aliquando fuit in loco illo : licet hoc non esset in hominum recordatione : quia non permutatur mare de loco ad locum, nisi per sæcula multorum longa hominum sibi succedentium, ita quod longitudo illa comprehenditur memoriis hominum.

Cujus etiam alia causa est brevitæ vite hominum : multæ enim sunt causæ oblivionis quæ tanguntur in prima parte *Timæi* Platonis : supervenit enim gens genti, et delet eam, et incendia vastant et libros gestorum antiquorum, et diluvia ignis et aquæ destruunt memorias quæ possunt ex scripto esse, ita quod mutationes istæ quæ non sunt nisi post multa sæcula, non sunt in recordatione.

Hæc igitur est ratio Antiquorum de mutatione maris, et de causa mutationis ejus : et videtur hæc esse opinio Platonis in *Timæo*.

Diximus autem objicientes contra hoc quod dicunt, quod ipsi diminuti sunt ex dictis suis : quoniam si necesse est ut mare permutetur de loco ad locum, ita quod loca marina efficiuntur aliquando et loca profunda efficiantur receptacula marium, et loca marium relinquuntur, et remanent concavitates et canales profundi et montes alti juxta illos canales, et causatur ex orbe : tunc oportet quod causatur in genere ex uno duorum motuum orbis, vel ab utroque ipsorum.

Duplex enim est orbis motus in genere, ut in secundo *Cæli et Mundi* ¹ diximus, quorum unus est ab Oriente in Oc-

¹ II de Cælo et Mundo, tract. II, cap. 4.

cidens super polos circuli æquinoctialis, et est motus diurnus, quem habent omnia quæ sunt in cœlo infra diem naturalem semel, qui vocatur *motus aplanæ*. Secundus autem est a tropico æstivo in tropicum hyemalem super polos circuli signorum, qui est ab Aquilone in Meridiem, quem habent omnes stellæ, licet tardius et velocius moveantur illo motu. Sive ergo permutatio maris causetur ab altero istorum duorum motuum, sive ab utroque, debuissent attulisse per hoc demonstrationem et observationes per figuras geometricas linearum ad visum pertractarum, ex quibus probarent quod dicebant. Et quidem hoc non faciunt, sed simplici confessione confitentur, quod omnia quæ sunt in terra et in inferioribus, fiunt per motum superiorum corporum : eo quod est elementum mobile, quod solum ex se perpetuo cursu currit ex corporibus. Et ideo est agens omnia accidentia materiæ inferioris, quæ quidem effectus plurimos inducunt, sicut dicunt quod diluvium quod fuit sub Pyrrha et Deucalione in terra, non fuit nisi propter conjunctionem magnam septem planetarum in signo Piscium, in quo est vel fuit inundatio aquarum, et ventus pestilens qui interfecit gentes in terra universaliter. Hadremoth fuit propter conjunctionem magnam planetarum in signo quod est signum aereum causans aeris corruptiones. Pestilentia autem quæ fuit in terra Jammæ quæ est regio Indorum, causa fuit eorundem planetarum in signo terrestri Virginis, quæ terræ corruptiones causat et producit.

Similiter autem dicunt de aliis effectibus qui sunt in conjunctione stellarum, de quibus nos inferius faciemus mentionem : nam perfecta eorum scientia ad librum pertinet de *majoribus accidentibus mundi*, qui astronomiæ subalternatur.

Inducunt etiam id quod videmus solem operari calorem in inferioribus, et lunam videmus multa corpora transmutare, quia imprægnationes et tempora nativitatum

et maturationes rerum, et perfectiones eorum et augmenta eorum quæ augentur. Similiter autem et excessiones fluminum præcipue lunæ sequuntur cursum et dispositionem et quantitatem.

Similiter autem dicunt, quod luna quando die vel nocte oritur super horizonte regionis alicujus, facit fluxum maris, in tantum quod redundant flumina ingredientia mare in locis illis, et refluit contra ritum suum : cum autem mediat cœlum regionis illius quod est quando contingit Zenith capitum ipsorum, et tunc influit mare et flumina non redundant, sed fluunt fluxu naturali in mare : cumque luna occidit ab horizonte illius regionis, iterum incipit exire aqua maris, et redundare incipiunt flumina usque dum luna tangit cardinem hemisphærii inferioris : et hoc est quando est in inferiori hemisphærio in puncto opposito ad Zenith capitum, incipit aqua iterum diminui, sicut inceperat augeri quando est in ortu : et taliter inveniuntur extensiones et remissiones maris sequi orbem lunæ sensu visibili.

Similiter autem planetæ alii communicant soli in oppositionibus suis : trahunt enim lumine et calore suo in Meridie, quando declinat ad signa meridionalia. Et hoc percipitur, quia cum Nilus veniat a Meridie in Ægyptum, plus inundans Nilus est quando sunt planetæ in Meridie circa Capricornum, quam quando non sunt ibi. Inundatio enim Nili aliquando est major, aliquando est minor secundum hoc quod plus de stellis vagis est in Meridie vel minus. Et quædam stellæ, sicut Venus et Luna, plus faciunt inundationes quam aliæ sicciore eis : quando enim est sol in Septentrione et stellæ vagæ sunt in Meridie, tunc propter caliditatem trahunt multum humorem : absceunt enim pluviam in Meridie, et minoratur inundatio Nili. Quando autem est sol in Meridie et planetæ cum eo, tunc pluviam fiunt propter calorem, et multum trahit humidum : et tunc magna fit Nili inundatio. Nilus enim sole existente in Can-

Nota causam inundationis Nili.

ero semel inundat. Et quando sol est sub Capricorno iterum inundat, et egrediens alveum suum irrigat sata Ægyptiorum. Et hujus causam nos inferius tangemus.

Similiter autem in complemento lunæ: eo quod tunc multum lumen solis trahens humores, multiplicantur extensiones fluctuum et extensiones maris: et fit inundatio vehementior quam quando non est plena propter causam quam diximus. Et hæc quidem ad sensum sunt manifesta.

Stellæ sunt causa sterilitatis et ubertatis.

Inveniuntur autem etiam stellæ esse causa annorum sterilitatis et ubertatis, quando ascendunt diversimode in climata septem, in tantum quod sapientes astrorum tradunt, quod quando conjunguntur duæ stellæ quæ propter tarditatem sui motus graves dicuntur, scilicet Saturnus et Jupiter in uno puncto signi alicujus in cælo, quod tunc accidit mortalitas et depopulatio, ita quod regna evacuantur. Et hoc fieri consuevit, quando conjungunt permutationem triplicitatis ad triplicitatem.

Nota de duodecim signis.

Habent enim signa zodiaci quæ sunt duodecim, quatuor simplicitates, hoc est, quatuor ternarios signorum quæ sunt unius complexionis, sicut signa ignea et calida et sicca sunt Aries, Leo, Sagittarius. Signa autem terrea frigida et sicca sunt Taurus, Virgo, et Capricornus. Aquea autem sunt frigida et humida Cancer, Scorpio, et Pisces. Et signa aerea calida et humida sunt Gemini, Libra, et Aquarius. Et probatum est, quod duæ stellæ Saturni et Jovis vicibus duodecim conjunguntur per medium motum suum in una triplicitate antequam in alio signo conjungantur. Conjunguntur autem in duodecim annis semel minus octava parte unius anni: et est conjunctio eorum super arcum qui est in novum signum a primâ conjunctione cum oppositione duorum graduum et dimidii: duodecies autem duo gradus et dimidium faciunt triginta gradus: et ideo decima tertia conjunctio eorum est extra

triplicitatem in decimum signum. Nonum enim signum a quo signo accepto in zodiaco, est ejusdem triplicitatis cum ipso: sed decimum est alterius: duodecies autem viginti sunt ducenti et quadraginta anni, et ideo per ducentos et quadraginta annos de viginti in viginti conjunguntur semper in triplicitate una. Quando autem permulant triplicitatem, tunc dicunt Astronomi quod virtus infunditur in inferioribus ex cælo: et delentur antiquæ habitationes et incipiunt novæ, sicut bene probatur in libro de *magnis accidentibus mundi*. Multa autem præterimus de effectibus superiorum propter usitacionem prolixitatis. Ex his enim sufficit probare, quod ea quæ sunt in inferioribus, causantur a superiorum motibus. Videtur ergo a simili, quod permutatio maris causetur a motibus superiorum.

CAPUT III.

De improbatione opinionis quæ dicit mare transmutari de loco ad locum.

Nos autem e contrario opposites dicimus, quod si mare permutaretur de loco ad locum, absque dubio tunc permutatio ejus causaretur ab aliquo motuum superiorum: sed nos ponimus quod de loco ad locum continue non permutatur: et ideo non causatur hoc quod non est ab aliquo motuum superiorum.

Si enim permutaretur, aut sequeretur in permutatione sua orbem lunæ quæ movetur per signa et perficit in viginti et

octo diebus : et sic permutaretur mare de loco ad locum in quibuslibet viginti et octo diebus : et tunc omnino destrueretur agricultura, quia mare infunderetur aquis antequam redigi posset ad cultum. Similiter autem et generatio propter nimium humidum destrueretur in terra.

Aut diceretur fieri propter motum Mercurii vel Veneris qui semper æquales circulos habent, qui complentur fere in decem mensibus : et tunc mare in quibuslibet decem mensibus permutaretur de loco ad locum.

Aut accideret ex permutatione Solis, et tunc contingeret in omni anno semel : quia Sol per annum complet circum suum.

Aut causa istius est motus Jovis, et ejus permutatio quam facit in duodecim annis : et tunc mare permutaretur de loco ad locum per totum circum terræ in quibuslibet duodecim annis.

Aut causa ejus est motus Saturni per circum : et tunc accidit illud in omnibus triginta annis.

Aut causatur ex conjunctione simplicium duarum stellarum gravium, quæ sunt Saturnus et Jupiter : et tunc accidit in quibuslibet viginti annis : quoniam in quibuslibet viginti annis semel in uno signo conjunguntur, scilicet Saturnus et Jupiter, sicut diximus superius. Aut causatur illud ex conjunctione Saturni et Jovis cum permutatione triplicitatis. Et tunc fiet illud accidens, in quibuslibet ducentis et quadraginta annis, sicut superius explanavimus.

Aut continget hoc propter motum quem ponunt Auctores Altasimer, hoc est, imaginum signorum, qui dicunt in superioribus accessionibus et recessionibus capitis Arietis et Libræ : dicunt enim, quod caput Arietis recedit ab æquinoctiali aliquando in Meridiem, et aliquando in Aquilonem super circum cujus diametrum Antiqui dixerunt esse quindecim graduum, quorum septem sunt in motu accessionis ad nos ab æquinoctiali versus Septentrionem, et octo sunt in

motu recessionis a nobis versus Meridiem : et secundum eos centrum ipsius circuli parvi super quem movetur caput Arietis, non est in æquinoctiali, sed juxta æquinoctialem in Meridie ad dimidium graduum. Sed nunc melius verificavit hunc motum Thebit Benome, et dixit accessionem et recessionem esse æquales, et ponunt centrum in æquinoctiali, et semidiametrum esse novem graduum fere, et motum illius circuli esse in octoginta annis per gradum unum. Et huic concordat Albategni et peritiores Astronomorum : sed Ptolemæus non fecit mentionem de motu illo : et tunc deberet hic a cæteris perfici in sexcentis et quadraginta annis. In tanto ergo tempore mare deberet pertransire per omnia loca terræ. Et hoc non est verum : quia multa loca ædificata sunt a duobus vel tribus millibus annorum, et numquam fuit ibi mare.

Aut causatur illud ex motu stellarum fixarum quæ deprehensæ sunt moveri in omnibus centum annis gradu uno, et perficiunt totum circum in triginta sex millibus annis. Et tunc in centum annis deberet mare relinquere unum gradum de terra, et in centum aliis iterum alium gradum, donec perambulet totum circum terræ, sicut perambulant stellæ circum cœli : et hic est ultimus et tardior motus, cui innituntur Auctores Aschisca, qui faciunt imagines secundum cursus astrorum, et invenimus mare sequi motum illum : quia nos ratione geometrica invenimus per mensuras cosmometricæ, quod tota terræ rotunditas non habet nisi viginti quatuor millia milliarum : et illam revolutionem terræ deberet mare complere in triginta sex millibus annis : ergo in centum annis aliquid deberet transire de spatio notabiliter, ita quod appropinquaret civitatibus quæ sunt super mare plus et plus, sicut ad civitatem Aim et ad civitatem Medenam, et ad civitatem quæ vocatur Merondimbe, et ad Venetias et ad Pisas, et ad Januam, et ad alias maritimas civitates :

vel deberet paulatim recedere ab eis. Similiter autem deberet fieri in civitatibus Alepila et Gnamen quæ sunt super mare Jammæ. Et similiter in Ægypto et in Alexandria quæ sunt super mare Rubrum magis Occidentale quod Arabes vocant Scemi. Similiter autem juxta Romam et Byzantium et Constantinopolim fieri deberet, et juxta alias multas civitates quas longum est rememorari. Nos autem non vidimus accidere simile in mari de appropinquatione et recessu : nec pervenit ad nos de præterito in chronicis eorum qui scripserunt gesta regum et mutationes terrarum : nec umquam aliquis Philosophorum sapientium qui locuti sunt de natura maris et pluviarum, scripsit aliquid simile de accessu et recessu maris ad civitatem aliquam, nisi sicut est hodie. Si autem aliquis objiciat de recessu maris Anglici, quod est pars Oceani a civitate quæ olim Tuag Octavia dicebatur, in qua oculis vidimus quod recessit mare per spatium magnum in paucis temporibus, et continue recedit ab oppido Flandriæ quod dicitur Burig, dicemus quod iste recessus non est continuus neque causatur ex orbe, sed fit per accidens. Si enim esset ex orbe, oporteret quod esset in omni mari tam Oceano quam Mediterraneo : nunc autem fit per accidens, quia videlicet multiplicantur aggeres in portum, et exaltantur ab undis maris : et per illos mare obstruit sibi viam accedendi ad civitates illas, et retrahitur. Et signum hujus est, quia mare in terris illis cohibetur ab alveo suo per exaltationem aggerum in littoribus suis : et capiunt homines illius patriæ multam terram sic a se mare propellentes. Et ideo iste recessus a locis illis non est naturalis, sed per accidens.

Ad hoc autem forte objiciet aliquis ex his quæ in *Meteoris*⁴ determinata sunt, ubi ostendetur quod Ægyptus ali-

quando fuit sub aquis, et quod non est pars terræ, quod aliquando fuit humida, et aliquando sicca. Si enim hæc vera sunt, tunc videtur mare permutare de loco ad locum super circulum terræ : sed ex illo quod in libro *Meteororum* dictum est, non habetur permutatio maris, sed potius ex aliis causis loca aliquando humescunt et aliquando exsiccantur, quæ sunt causæ diluviorum particularium vel universalium, de quibus nos inferius loquemur.

Quod autem dicunt de montibus et de vallibus, quod ipsi sunt causati ex procellis maris, in sequenti libro ostendemus esse falsum : et causas montium et vallium determinabimus in libro sequenti, et in parte in libro *Meteororum*.

Et quod dicunt de fodiente puteum qui remum invenit, dicendum ibi remum ab antiquo fuisse repositum : et terram congestam fuisse super eum, et frigiditate terræ a putredine terræ fuisse conservatum : aut fuisse ibi mare aliquando, et per accidentalem causam a loco illo recessisse : quia et nos in Colonia vidimus altissimas fieri foveas, et in fundo illarum inventa sunt paramenta mirabilis schematis et decoris, quæ constat ibi homines antiquitus fecisse, et congestam fuisse terram super ea post ruinas ædificiorum.

Jam ergo planum est per ea quæ diximus in *Physicis*, quod destructa est intentio ejus qui dixit mare permutari de loco ad locum terræ : et satis evidenter apparet error eorum qui existimant id determinare de loco maris, pertinere ad scientiam libri *Meteororum*.

⁴ II Meteororum, tract. II, cap. 17.

CAPUT IV.

Et est DIGRESSIO declarans quæ prænotanda sunt ad sciendum accessum et recessum maris.

Tractantes de accessu et recessu maris, necesse est nos præmittere quæcumque faciunt ad scientiam ipsius.

1. Unum autem horum est quod licet omnes planetæ communiter habeant in inferioribus effectum, tamen sol et luna præcipui planetæ sunt, quorum proprietates et virtutes sequuntur inferiora propter tres causas: quarum prima est quantitas luminis ipsorum. Alii quidem planetæ lucentia quædam corpora sunt, et motu et lumine movent inferiora, sed radios et umbras notabiles non emittunt super inferiora: luminaria autem quæ sunt sol et luna, et motu et lumine et radiis movent: et ideo etiam umbras faciunt quando aliquod corporum opacorum objicitur radiis eorum: et ideo impressio eorum fortissima est in inferioribus.

Causa prima.

Causa secunda.
Luna est minor omnibus planetis.
Luna vocatur regina cæli et quare?

Alia autem causa est locatio eorum inter planetas: quoniam luna licet sit quantitate minor omnibus planetis præter unum, tamen vicinior est inferioribus, et appropinquat magis naturis eorum, et ideo permutat ea: et numerantur propter hoc *critici dies* secundum lunam: et vocatur regina cæli, quia regit humiditates corporum inferiorum: et ideo metalla et

plantæ et animalium membra præcipue oculi in quorum compositione abundat aquæ natura, recipiunt maximas alterationes et augmenta et diminutiones secundum lunam. Sol autem medius planetarum a Deo glorioso positus est tamquam cor quod vires undique ministrat: et licet longinquior sit quibusdam planetis, tamen quantitate et lumine major est omnibus eis. Et ideo fortissime movet corpora inferiorum et transmutat.

Nota de sole.

Tertia autem causa est proprietates et virtutes qualitatum horum luminarium specialiter: luna enim eo quod proprietatis est aqueæ, ex connaturalitate habet cuncta movere in quibus aqua et terra dominatur. Sol autem ex eo quod sit fons caloris vivifici, facit ebullire hos humores: eo quod humidus naturaliter trahat et vaporet ad calorem se elevantem: propter quod antiqui dixerunt Ægyptii, quod sol attraheret humidum ad omnium corporum cælestium nutrimentum. Hoc ergo est unum quod nos præsupponere oportet.

Causa tertia

2. Secundum autem, quod magna diversitas est in fluminibus et in maribus: et inventum est mare stans quod nec accedit umquam, nec recedit: et inventum est mare quod ab initio lunæ usque ad plenilunium accedit: et a plenilunio quod interlunium vocatur a quibusdam, quod Arabes vocant *Almuhac*, usque ad perfectum lunæ defectum recedit, faciens in uno mense tantum unum accessum et unum recessum. Quædam autem maria accedunt omni die bis et recedunt bis. Stat enim mare Pisanum, nec accedit nec recedit: mare autem quod est sinus Persicus, et mare Indiæ, et maria omnium insularum quæ sunt inter hæc, similiter autem mare quod inter Constantinopolim et Venetias, et in Aquilone Gumphus Oceani qui est inter Angliam et Flandriam et Germaniam, et omnia his similia maria accedunt et recedunt bis in die naturali, et differunt in fortitudine accessionis et recessionis.

Diversitas magna fluminum et marium.

Mare Pisanum.

3. Tertium autem quod prænotandum est, hoc est quod non sit accessio et recessio in mari nisi quando luna tangit circulum aliquem hemisphærii illius maris quod est accedens et recedens. Sunt autem quatuor arcus duorum circulorum hemisphærii, quos cum tangit luna, statim varietas incipit in mari: duo enim circuli hemisphærii sunt horizon unus, et Meridianus alter. Habet autem horizon duos arcus: unum versus punctum Orientis, et alterum versus punctum Occidentis. Similiter autem et Meridianus habet duos arcus: unum quidem in medio cœli super Zenith capitis regionis, et vocatur arcus ille angulus medii cœli: alterum autem habet directe sub pedibus regionis ex opposito Zenith capitis, et vocatur angulus mediæ noctis et angulus mediæ terræ. Cum autem luna attingit hemisphærii angulum Orientis in regione aliqua in qua est mare, incipit accedere mare: et cum attingit luna arcum qui est ad angulum medii cœli, incipit mare recedere. Cum autem iterum attingit luna arcum qui est ad angulum Orientis, incipit accedere mare: et cum venit ad arcum anguli mediæ terræ, tunc incipit recedere.

4. Quartum autem quod præmittere debemus, sequitur ex isto: cum enim terra rotunda sit et luna moveatur in rotundo circulo, sequitur necessario quod anguli hemisphærii maris et regionis unius, non sunt anguli hemisphærii et regionis alterius: et si regiones illæ distant ab invicem in altum, sæpe fit, quod si tempore accessionis et recessionis maris computentur, quod eadem hora qua accedit mare in regione una, recedit in alia: et quod tempus initii accessionis in regione una, est tempus initii recessionis in alia: vel quod initium recessionis in regione una, est medium recessionis vel finis ejus in alia: et aliis infinitis modis hoc necesse est variari: et hoc fit propter diversitatem Orientis et Occidentis, et anguli medii cœli, et anguli mediæ no-

Terra est rotunda.

ctis in regionibus diversis, præcipue secundum longitudinem terrarum: quia illa necessario variat omnes angulos dictos plus quam latitudo regionum.

5. Quintum autem fere simile est huic, videlicet quod necessarium est quod variat et accessum maris in profunditate maris longe a littoribus et in littoribus ipsis: quia si est quantitas quingentorum stadiorum quibus sensibilibus variet circulos et angulos hemisphærii, necesse est quod accessus maris citius sentiat in profundo maris versus Orientem quam in littore: sed tamen non sentitur in profundo maris nisi secundum elevationem maris de profundo, quod vocant nautæ marinarii *tumorem maris*: elevatur enim aqua a luna tunc de profundo, et intumescit et facit procellas aliquando periculosas navigantibus, ita quod belluæ marinæ elevantur ad maris superficiem. Sed aqua illa elevata superfunditur alii aquæ maris, nec habet in profundo alium accessum et recessum in littoribus, et superfluit littoribus et influit super terram extra littus suam.

6. Sextum est, quod propter eandem causam necesse est variari influxum et refluxum maris in duobus littoribus ejus multum distantibus: quorum unum est ad Orientem, et alterum ad Occidentem.

7. Septimum autem est, quod aliquando tumor est in mari, qui est principium accessus et recessus: et tamen in littore non percipitur recessus et accessus aliquis: eo quod littora sunt lata valde ante aquæ profunditatem, et non sunt profunda nec multam aquam habentia: et tunc non percipitur accessus per exitum aquæ super littora: sed tamen per majorem profunditatem in littoribus, quia sufficiunt littora aquam continere eis superfusam a tumore maris.

8. Octavum autem quod prænosci oportet, est quod signum præcedens tumorem maris et accessum ejus sunt venti qui sunt:

si validi sunt, significant valde fore accessum maris : et si sunt debiles, signant accessum fore debilem : et quando cessant venti, signum est recessus maris. Hæc igitur sunt quæ sunt præmittenda.

CAPUT V.

Et est DIGRESSIO declarans vel ostendens veram causam accessionis maris in communi, et excludens errores qui sunt circa hæc.

Prælibatis autem his, causam accessum marium et diversitatem ejus necessarium est determinare. Dicimus igitur causam accessum et recessum ejus concurrere ex tribus sic convenientibus, quorum unum est ex dispositione aquæ quæ accedit et recedit. Secundum autem ex dispositione loci cum quo accedit et recedit. Tertium autem est ex situ lunæ moventis aquam recedentem et accedentem.

Et dispositio quidem aquæ maris est, quod est spissa, et salsa, terrestritati admixta, stans in loco uno tempore longo : et ideo fœtida et multa est simul secundum profundum et latum : et per hoc quidem quod est ipsa spissa fortiter et diu tenet vaporem in se generatum, et ex salsedine habet calorem naturalem, quod facit ut facilius in profundo ejus vapor elevetur, et quod ipse est terrestris, confert ad grossitiem et spissitudinem illius vaporis qui elevatur in ea de profundo ejus, et quod est ipsa stans non mota facit ad hoc

quod permaneat in ea calor solis qui corrumpit aquas ejus et in salsedinem vertit et fœtorem. Quia autem multa est simul, facit ebullire diu eam cum movet eam vapor antequam egrediatur ex ipsa paulatim vapor inclusus in ea, qui facit eam duos motus habere : quorum unus est de profundo ejus ad superficiem, et vocatur ebullitio et fervor maris. Secundus est superfusio qui motus est in superficie ejus, quando aqua superfunditur alii aquæ sibi vicinæ : et tunc fœtor ejus exspirat cum vapore subtili. Propter quod unum de prognosticis per quod cognoscunt illi qui sunt in profundo maris, quod aqua maris in proximo bulliet, est fœtor ejus qui respargi incipit cum vapore subtili qui primo resolvitur ex ipso antequam moveatur. Et secundum est ventus qui incipit quando vapor incipit grossior esse et fortior : et tunc statim ebulliet mare post illud : et per illa eadem cognoscunt habitantes in littore maris, quod in proximo accedet et effundetur aqua super littus suum.

Causa autem quæ est quod loca, quæ sunt receptacula et quasi conchæ marium, sicca, dura, longa, et montibus ut in pluribus circumdata, et quod montes et scopuli multi sunt in ipso mari in diversis locis : talia enim congregant vaporem ventosum fortem et tenent eum : quia ex duritie loci habent loca soliditatem vaporis : mollia enim cito exspirant et vaporem generatum in se non continent, sed paulatim secundum quod generatur in eis, emittunt eum : eo quod per se omni tempore sunt aperta. Solida autem loca non aperiuntur nisi aliquo cœlesti corpore ea violenter quasi movente : et tunc aperiuntur in impetu, et emittunt simul in se vaporem retentum et collectum. Ex hoc autem quod sunt longa, multiplicatur et coarctatur in eis calor : et ex hoc quod super montibus et collibus immixta apta receptacula sunt vaporum, et sunt generativa vaporis grossi multi : propter quod aquæ stantes in montibus semper videntur crispantibus undis

moveri propter motum vaporis a fundo elevati, qui movet aquam.

Tertia autem causa est quæ convenire debet cum his, est lunæ situs. Cum enim luna tangit circulum hemisphærii, primo tunc movens est præsentia corporis et luminis sui, et non completur ascensio ejus donec attingat circulum Meridiei ejusdem hemisphærii : et quando est præsentia ejus in gradu qui est inter punctum Orientis et Meridiani, tunc præsentia luminis directo radio attingit Occidens, et confert eis vires sui luminis, ita quod omnes gradus per quos ascendit ab angulo Orientis usque ad angulum medii cœli, immittit radium per vires suas omni gradu sibi opposito in quarta per quam ascendit ab angulo Occidentis ad angulum mediæ terræ : et ideo quarta Occidentalis movet mare, sicut movet quarta Orientalis. Et hæc causa est ex parte lunæ moventis : quia movet bis mare ad accessum, hoc est, cum ascendit ab Oriente ad medium cœlum : et cum descendit ab Occidente ad angulum mediæ terræ. Cum autem est recedens ab angulo cœli derelinquens punctum Meridiei, tunc diminuitur virtus ejus super hemisphærium maris, et reflectuntur radii ejus qui dirigebantur in profundum maris ad superficiem ejus, et non movet locum maris : sed aquas respiciunt obliquo respectu : et exspirat vapor qui ejicit aquam a loco suo : et tunc non per lunam, sed per naturam propriam revertitur aqua ad locum suum : et hæc vocatur *recessio maris*. Eadem causa est quare revertitur quando luna recedit ab angulo mediæ terræ : quoniam radii ejus ab angulo illo non figuntur super mare : sed secant aquam ejus oblique, et non diriguntur ad fundum ejus : et jam secundo resolutus est vapor elevans eam quando luna fuit in puncto Orientis : et ideo tunc iterum revertitur aqua ad locum suum per motum naturalem. Mirabilis autem est effectus lunæ in humido elemento : quoniam de longinquo trahit et movet eam, sicut magnes ferrum : eo quod ipsa est prima causa humidi aquei,

sicut diximus in libro *Cœli et Mundi*, per hoc quod ipsa est quasi secundus sol, ex hoc quod lumen accepit a sole, facit vaporare verum qui est in profundo maris.

Et hoc contingit ex tribus causis, quarum una est jam dicta, quod lumen lunæ est acceptum a sole, et sua caliditate subtiliat vaporem grossum in mari stantem, qui subtiliatus quærit dilatari, et extrudit aquam de profundo. Secunda causa est ipsa natura lunæ quæ movet elementum humidum : et ideo quando occurrit ei aqua, motu suo calefit, et movet vaporem, qui quærens resolvi, dilatatur et extrudit aquam. Tertia causa est situs lunæ in circulo hemisphærii : tunc enim ascendit a quarta Orientis : et ideo elevatur cum ipsa aqua : et extruditur virtute ejus, et in gradu occidentali facit similiter : propter hoc quod illæ quartæ sunt similium virtutum : propter causam quam diximus. Hæc ergo sunt causæ accessus et recessus maris in summa.

Hujus autem signa quod quando luna diutius manet super terram quam sub terra, prolixius tunc fit tempus accessionis et recessionis primarum quam secundarum : et quando e converso diutius manet sub terra quam super terram, tunc fit e converso si plus tardat in quarta Orientali quam Occidentali, tunc tempus accessionis primæ est prolixius quam tempus accessionis secundæ : et simile iudicium est de tempore accessionis comparato ad tempus recessionis.

Accipitur autem ex alio signo probatio ejus, quod videlicet accipiet tempus secundum motum lunæ in deferente circulo : quando enim plenum est, oritur super hemisphærium tempore casus solis, et sequitur eam motus aquæ. Quando autem cecidit plenitudine per tredecim gradus, qui sunt motus lunæ in una die, tunc post ortum solis in sequenti fere per unam horam sortitur super hemisphærium : et tunc sequitur motus aquæ lunam in alia hora quam in die præcedenti. Propterea dicunt Astronomi, quod qui vult scire quantum est tempus accessionis et recessus,

sionis maris, primum verificare debet gradum in quo ascendit luna super hemisphærium : et accipere debet oppositum illi per diametrum, et habebit gradum in quo cecidit luna : et videre quot sunt gradus in medio, et computare debet quoslibet quindecim gradus pro una hora, et quot horas invenerit tempus, erit tempus accessionis et recessionis simul sumptum. Si autem illud in duo dividerit, tunc habebit per se tempus accessionis. Idem autem modus est inveniendi tempus accessionis et recessionis secundæ, præter hoc solum quod verificatur gradus in quo linea cecidit : et accipitur oppositus gradus illius in Oriente : et tunc enumeratur gradus arcus qui est ab Occidente in Orientem, et sicut prius.

Objectio. Sunt autem quidam prædictis objicientes id quod invenitur. Invenitur enim in aquis dulcibus sicut in civitate Arabum, quæ vocatur Albastrach, et in aquis civitatis quæ dicitur Azim, et multorum aliorum locorum aquis, quæ loca sicca sunt in pede maris. Nos autem his respondentibus dicimus, quod aquæ dulces subtiles sunt, et vaporem venti non retinent in seipsis : et nec accedunt, nec recedunt, præcipue cum fluunt sicut faciunt flumina : quia tunc motus facit eas subtiliores : loca autem prædicta aquarum sunt receptacula multorum fluminum in se fluentium, quæ impetu suo a civitatibus prædictis propellunt aquam salsam, et omnino remanet dulcis in littoribus dictarum civitatum : continuantur tamen ad aquam salsam, eo quod loca illa sunt pedes maris : et ideo accedente mari impelluntur et accedunt per accidens, et recedente eo videntur recedere. Et similiter huic accidit in puteis qui sunt juxta mare, qui ex redundancy aquæ crescunt mari accedente, et ex diminutione maris decrescunt mari recedente. Ex dictis etiam patet quare mare accedens effundit aquam calidam foetidam, et recedens retrahit aquam frigidam et minus foetentem. Cum enim accedit, exspirat cum ea vapor inclusus qui calidus est et corruptus : et ideo illud

vocatur a nautis *æstus maris et fœtor*. Cum autem revertitur, tunc aqua dilatata super littora refrigerata est : et ideo frigidior est et minus fortis.

Hæc igitur causa est accessus et recessus aquæ maris.

CAPUT VI.

Et est DIGRESSIO declarans quot et quæ confortant accessiones maris.

Non videtur autem esse prætereundum, quin dicamus aliquid de confortantibus accessionem et recessionem maris : licet enim illa perfecte non sciantur nisi per astronomiam quæ notificat cursum lunæ et stellarum, tamen in communi pertinent ea ad naturalem. Licet autem multa sint numero, tamen quinque sunt quæ majorem habent virtutem hoc faciendi. Quorum primum est distantia lunæ a sole. Secundum autem est propinquitas lunæ ad mare. Tertium autem est accessus vel recessus ejus a Zenith capitum eorum quæ sunt juxta mare. Quartum autem est quantitas temporis præsentis ejus et solis super terram vel sub terra. Quintum autem est adjutorium ejus a cæteris stellis. Et hæc quinque sunt confortantia et debilitantia accessum vel recessum maris ex virtute cœlesti tantum. Unum autem est præter hoc, quod est flatus venti, qui talis potest esse qui confortat recessum super accessum. Præter ista autem sunt causæ accidentales et particulares confortantes accessum vel recessum vel utrum-

Quinque sunt confortantia et debilitantia accessum et recessum maris.

que, de quibus in fine istius capituli, faciemus mentionem.

Prima
causa.

Dico ergo de prima causa, quod distantia luminis a sole facit quantitatem luminis in luna. Unde quando luna est cum sole in eodem loco zodiaci, tunc conjuncta virtute movent lumina : et ideo tunc quantum ad hoc cæteris causis paribus existentibus confortantibus accessum aquæ super recessum ejus. Quando autem recedit luna, tunc est parum luminis solis in luna, et non habet sibi conjunctum solem : et ideo tunc debilitatur quousque fiat luna dimidia : et tunc distat per quartam cœli partem a sole : et tunc confortabitur lumen ejus : et confortatur etiam accessus maris, et recessus debilitatur. Cum autem luna cadit a plenilunio, incipit debilitari accessus donec iterum luna sit dimidia : et tunc parum confortatur propter angulum lunæ qui est rectus. Quarta enim pars circuli subtenditur angulo recto super centrum existenti : et tunc iterum debilitatur donec efficitur cum sole, tamen crescente lumine in luna, semper est fortior accessus maris quam decrescente lumine ejus. Et inde est, quod invenitur mare quod accedit per dimidium mensem, et recedit per alium dimidium mensem ut stans non accedens : quia aqua ejus est spissa, et non potest moveri nisi lumine crescente in luna, et non lumine decrescente. Omnis enim virtus crescens potentior est ad operandum quam eadem in eadem quantitate decrescens.

Secunda
causa.

Secunda autem causa est, ut diximus, propinquitas lunæ ad mare : habet enim luna eccentricum se deferentem et epicyclum, sicut et alii quinque planetæ : et ideo quando descendit in utroque descendit versus terram : et est fortior motus ejus in mari quam quando ascendit : et si descendit ad brevior partem diametri in eccentrico, et ascendit in epicyclo, adhuc confortatur motus ejus, licet non sit adeo fortis, sicut fuit quando in utroque circulorum descendit : et contingit ideo, quia omne movens aliquid

movet ipsum fortius quando est propinquum, quam quando est remotum ab ipso : luna autem mari propinquior est quando descendit ad brevior partem diametri circuli sui quam quando est ascendens ad longior partem diametri partem.

Tertia autem causa est accessus et recessus lunæ a Zenith capitum eorum, qui sunt juxta mare quod accedit vel recedit : quia quando accedit luna ad Zenith capitum eorum, tunc radii ejus directius veniunt ad fundum maris : et ideo fortius movent. Quando autem recedit a Zenith eorum, tunc radii ejus oblique sparguntur supra superficiem aquæ maris et secant convexum maris : et ideo tunc minus movent : propter quod tunc confortatur accessus quando luna accedit a Zenith capitum, et debilitatur recessus : et quando recedit a Zenith capitum, tunc fit e converso quoad hoc si cætera sunt paria.

Tertia
causa.

Quarta causa confortans accessum est quantitas temporis præsentiae ejus super terram cum sole : fit enim aliquando accessus in die, et aliquando fit accessus in nocte. Considerandum ergo, utrum dies sit longior nocte, vel e converso nox longior sit die : et si quidem dies longior fuerit nocte, quod fit quando sol est in signis Aquilonaribus, et confortabitur accessio diei super accessionem noctis, præcipue si etiam luna diutius est super terram quam sub terra. Et est in hoc magna differentia : quia tempus quo dies prolongatur super noctem est duplex, in quorum uno crescit dies, in altero autem decrescit : et diebus crescentibus accessio diurna fortior quam sit diebus descendantibus : et ideo cæteris paribus fortior est diurna accessio a solstitio æstivo usque ad æquinoctium hyemale. In utroque tamen tempore fortior est accessio diei quam noctis : sed in duobus æquinoctiis, eo quod sol tunc est æquali tempore super terram et sub terra, et æquales sunt accessiones diei accessionibus noctis. Sed ab æquinoctio hyemali

Quarta
causa.

usque ad solstitium hyemale, quia in illo crescunt noctes super dies, confortatur accessio noctis super accessionem diei quæ est a solstitio hyemali usque ad æquinoctium æstivum, eo quod tunc decrescunt noctes : cum tamen omnes accessiones nocturnæ amborum istorum temporum fortiores sunt quam diurnæ eorundem temporum. Fit autem hoc præcipue quando luna diu est super terram cum sole : et ideo si luna ascendit in fine Geminorum, vel in principio Cancri super mare aliquod, confortatur multum accessio ipsius : eo quod nullum signum habet tam magnum circulum super terram sicut illa quæ diximus : propter quod dies eorum longiores sunt. E converso autem fit quando est in fine Sagittari, vel in principio Capricorni : eo quod illorum circulorum maximus sub terra, et longior nox ipsorum.

Quinta
causa.

Quinta causa est confortatio lunæ ex tribus, scilicet ex loco et ex stellis fixis significantibus effusionem aquæ, et ex planetis quibusdam paucioribus vel pluribus : quoniam quando luna fuerit in signis aquaticis, et præcipue in Piscibus vel in Aquarii fine, confortabitur effectus ejus ex loco cœli in quo est. Si autem fuerint ibi stellæ fixæ significantes inundationem aquarum, sicut sunt stellæ quatuor quæ sunt juxta effusionem aquæ, vel sicut sunt Pleiades et aliæ stellæ vehementer humidæ, tunc magis adhuc confortatur effectus lunæ supra maris accessionem. Sed si luna in loco illo descendit ad breviorum partem diametri, et alii planetæ duo vel tres vel quatuor vel quinque vel omnes sex juncti fuerint ei in signo humido et stellis vehementer humidis : et sic tunc planetæ etiam omnes, vel possibiles ex eis fuerint etiam descendentes ad brevitatem diametrorum suorum, erit accessus intolerabilis et diu durans, et forte per plures dies durabit, et submerget forte loca vicina, nisi impediatur per accidens propter loca concava in quibus recipitur mare exiens, vel propter aliud aliquod accidens.

Istis igitur causis sic determinatis, considerandum est si plures eorum conveniant in uno mari vel pauciores : secundum hoc judicandum est de accessu maris et recessu.

Causa autem quæ præter has in inferioribus est ventus adjuvans aut impediens accessum maris. Diximus superius quod in profundo maris elevatur ventus qui facit mare ebullire : et ille non devenit ad littus maris nisi raro valde : sed ventus validus qui flat in littore maris, est elevatus de terra, et est aliquis duodecim ventorum de quibus in libro *Meteororum* determinavimus : et si ille validus est, et venit ab eadem parte unde venit accessus maris, hoc est, ab Oriente, tunc impellet mare tumens ante se, et confortabit accessum maris. Si autem venit ab Occidente contra accessum maris, repellet aquam, et accessum maris impedit : et in aliis ventis est similiter. Mare autem accedit secundum motum lunæ ab Oriente, et secundum motum ejus ab Occidente quando occidit luna ab hemisphærio nostro : et ideo sunt duo accessus ejus, ut diximus. Et ideo considerandum est de vento valido, utrum sit flans ab eadem parte accessus vel recessus, sicut docuimus. Crescit autem accessus vel recessus aliquando per accidens, et similiter decrescit, hoc est, ex sirtibus vel scyllis vel insulis vel latis receptaculis quæ sibi objiciuntur, vel ex fluminibus aliquando. Quando enim accedit mare, frangitur impetus ejus ex sirtibus et insulis et collibus qui sunt intra mare, qui colles *apricantia* vocantur, et apud Græcos dicuntur *scyllæ* : et quando impetus ejus est confractus, modesta, et contracta effusione effunditur super littus et recedit. Similiter autem aliquando retinetur locis latis, et diffunditur dilatatum in illis : et tunc iterum minus impetuose et minori quantitate effunditur super littus : aliquando autem infunditur aquis fluentibus, et facit flumina redundare, et retinet aquas et instagnat eas, et cum illis omnibus aquis postea redit ad mare :

Causæ
accidentales

et tunc impetuosior est reditus et majoris aquæ quam fuerit accessus. Aliquando autem littus est convexum : et illa convexitas potest esse duobus modis versus mare videlicet, aut versus terram : et si est convexum littus versus mare, semper impetus maris accedentis constringit ad gibbum littorum : et ideo semper modesto fluxu venit mare terræ illius. Quando autem planum est versus mare, et convexum versus terram, tunc accedit mare cum duplici impetu : quoniam unum impetum habet ex impulsu proprio, et secundum habet ex casu de convexo. Quoniam autem habet convexum ad utramque partem quando quasi quidam mons longus est sub aqua in littore, et in illo mari constringitur impetus proprius maris quando accedit, et remanet impetus secundus qui est casu exuberantis maris ultra convexum illud. Simile autem videndum est de accessu maris. Quando enim confortatur accessus, tunc debilitatur recessus, et e converso : et quando prolongatur tempus unius eorum, tunc breviatur alterum eorum ut in pluribus, nisi impediatur per accidens aliquod, sicut diximus.

Igitur hæ sunt causæ confortantes vel debilitantes accessum vel recessum maris, et quædam aliæ quæ in astronomicis sunt tractandæ.

CAPUT VII.

Et est DIGRESSIO declarans et destruens tres sectas erroris circa accessiones maris.

Quærent autem nonnulli physiologorum qui lunam non dixerunt esse causam accessus maris, et fuerunt duæ sectæ illorum. Temporibus enim paucis ante nos quidam Arabs in Hispania Arabica, cujus nomen est Alpatiatius, qui dixit totum cælum moveri motore unico primo, cujus motus pertingit in omne quod est : et ille quidem motus circumagit ignem perfectâ circulatione et aerem : aquam autem non movet ad perfectionem circuli, sed ad semicirculum cuilibet terræ accedit, et tunc recedit proprio pondere.

Alia autem secta dicebat, quod in aere exspirat ex seipsa, et non ex virtute alicujus motus cœlestis. Et dum spirat, elevatur et effunditur super littora sua : et dum exspiraverit, tunc redit ad alveum suum. Dixerunt autem signum hujus esse, quia spiritus multi nascuntur in humidis corporibus et calidis. Cum autem mare sit magnæ quantitatis valde, et sit humidum, impossibile est quod calor solis et naturalis calor maris non generet in eo multos spiritus ventosos, qui tumescere et spirare et guttuare faciunt mare.

Sed improbatio dicti Alpatiatii est, quod si mare movetur ad motum primi qui movet motum diurnum, non deberet

mare moveri nisi uno modo ab Oriente secundum motum diurnum : et cum terra sit rotunda, non esset causa quare magis rediret aqua ab uno puncto quam a puncto altero circuli maris vel terræ : et tunc mare compleret circulum super terram : et tunc omni die destrueretur agricultura, sicut diximus superius contra eos qui dicebant mare moveri secundum motum diurnum orbis. Cum igitur nos multas diversitates motus maris invenimus, et multos modos reditus ejus, sicut patet ex supra scriptis, clarum est aquam maris in accessum et recessum non sequi motum primi motoris qui est diurnus. Dimittamus autem nunc dicta Alpatiatii : quia cum naturaliter voluit loqui, erravit, et in errorem suum induxit multos alios se sequentes, sicut in parte ostendimus in secundo *Cœli et Mundi*.

Contra secundam autem sectam est, quod si moveretur mare, quia spirat naturaliter, sicut alia in quibus generantur venti et vapores spirituales : et tunc debet fieri accessus ejus et recessus per unum modum semper : quia opera naturæ sunt uno modo : quia causa eorum uno modo se habet. Nos autem in mari hoc non invenimus, sicut patet ex dictis.

Amplius si mare spirat, absque eo quod moveatur a luna, tamen non movetur nisi a luna a fundo et spirat semper : et sic oportet ut habeat locum majorem semper : et sic numquam revertitur : quia ex quo spirat, ex seipso semper spirabit, et semper ebullit : et nos hoc non invenimus, quia non videmus redire mare : tunc sufficit ei locus suus : et non est in eo aliquis spiritus, qui tunc expellat ipsum de loco suo.

Amplius autem est, quia natura aquæ est ut vadat inferius ad terram. Si ergo elevatur ex spiritu quando exspiraverit, descendet inferius tantum, et spirando elevabitur sursum tantum : et tamen ejus contrarium videmus, quod sequitur motum lunæ, ad hoc quod posito aliquo ponitur, et destructo destruitur : et hoc

causatur ab ipso. Sic autem videmus semper accessum maris poni et fieri quando luna tangit circulum hemisphærii : videbitur igitur causari ex motu lunæ. Si quis autem dixerit, quod ideo non causatur ex luna, quia si esset ex luna, deberet fieri in fluminibus et in fontibus et stagnis omnibus, dicemus quod non est eadem dispositio aquæ in omnibus his, quemadmodum diximus superius : mare enim est sicut totum, et flumina et fontes et stagna sicut partes : et non eadem operatio in toto et in partibus, quoniam totum colligit virtutes plurimas quas partes non habent : flumina enim subtilis aquæ sunt et dulcis et mobilis et frigidæ propter causas quas diximus supra : stagna etiam subtiliantur fontibus apertis vel occultis qui influunt in ea : et cum sint pauçæ aquæ, sufficiunt fontes dare eis subtilitatem. Et hoc non potest esse in maribus, in quibus est multitudo aquæ magnæ : et ideo maria influunt et refluent et non aliæ aquæ : aquæ enim omnes aliquid accipiunt imitationis a luna quando ascenderit super eas, licet hoc sit insensibile.

Hoc autem maxime videmus in humido aqueo complexionali, quod est naturale animalibus et plantis et mineris. Nam cum fuerit luna crescens in lumine suo per primam partem mensis, videmus in corporibus animalium præcipue hominum humorem abundare in superficie corporis, de profundo ebullientem ad exteriora : et cutem esse magis plenam, et juncturas membrorum magis occultas, et esse venas magis tectas et profundatas, et cibum sumptum magis impinguare quam in alia parte mensis quando luna decrescit lumine. Et hæc omnia magis videmus fieri quando luna est in die super terram, quam quando est sub terra : et præcipue fiunt hæc quando elevatur ab Oriente usque ad medium cœli, et minus quam quando cadit ab angulo Meridiei : propter quod sapientes medicorum volentes impinguare aliquos, id est, confortare, maxime observant tempora quæ

diximus in infirmis : unde maxime attenditur motus lunæ : et secundum eum critica dies numeratur. Et vidimus multos qui infirmati sunt luna crescente : et quando luna erat super terram elevata ab Oriente ad medium cœli, quod evaserunt de magnis infirmitatibus : eo quod natura tunc erat fortis, et humidum complexionale : et movebatur tunc motu nutritivo corporis. Alios autem vidimus de minoribus infirmitatibus mori : quia inceperunt infirmari luna decrescente, et non existente super terram, et præcipue si luna recedens ab angulo mediæ terræ in inferiori hemisphærio.

Similiter autem humida nascentia plurimam in animalium recipiunt varietatem secundum lunæ motum, quemadmodum diximus : augentur enim et mutarantur vel putrescunt ad prædictos lunæ motus, ita quod si animal habeat apostema, et de nocte jaceat sub radiis lunæ deficientis, præcipue quando luna est in calido sicco cœli, forte moritur animal ex parvo apostemate : quoniam tunc luna maturat, sed putrefacit et corrumpit.

Crescunt autem etiam tunc humida in matricibus fœminarum animalibus, quando luna crescit, et sunt humida vigorosa plena spiritu vivifico quando luna crescit ait ab horizonte, ita quod tunc et facile concipiunt, et facilius filios masculos concipiunt quam alio tempore. Et est partus ille vigorosior quam alio tempore conceptus, et præcipue si augetur virtus lunæ ex quinque illis causis quas superius diximus. Et si sunt ova in ventribus avium nata in temporibus illis, erit albugo eorum multa et vigorosa : quia albugo est radicale humidum, ex quo corpus avis fit, et vitellum præparatur in cibum.

Similiter autem multa animalium aquaticorum invenimus, quæ latent in latibulis, et sunt debilia luna decrescente, et non pascuntur tunc : quoniam calor eorum est debilis. Luna autem crescente egrediuntur et pascuntur, et plura illo-

rum non pascuntur nisi hora quando luna ab horizonte elevatur ad medium cœli : et alio tempore redeunt ad latibula, et non quærunt pastum. Illa enim sunt frigida valde viscosam habentia humiditatem, quæ a calore naturali ad motum et desiderium cibi resolvi non potest, nisi quando luna confortata movetur et moverit ea. Videtur autem in cancris fluvialibus, quod pleni sunt luna aucta, et deficiunt et macri sunt quando luna est diminuta et decrescens. Venenosa etiam animalia quorum humidum venenum est et morsus venenosus, pejorem habent morsum luna crescente et confortata in lumine, et ascendente a circulo hemisphærii, quam aliis temporibus : humidum enim venenosum est eis naturale humidum : et tunc est vigorosum et multum : et ideo plus inficit ea quæ mordentur.

Idem autem signum est in plantis : quia plantæ luna aucta in lumine et elevata a circulo hemisphærii per modicum cultum convalescunt, et citius aliis crescunt, et producunt fructum. Et quæ in oppositis temporibus plantantur, vel forte exsiccantur, vel non de facili et cito convalescunt. Saporosiores etiam sunt fructus et herbæ quando luna crescit et ascendit ab hemisphærio circuli, quam sint temporibus aliis. Et hoc ita ad sensum constat, quod non tantum modo sapientes, sed communitas agricolarum hoc confitetur.

Hi etiam in transmutatione metallorum et lapidum operantur, quos *alchymistas* vocamus, temporibus incrementi lunæ : et confortante et ascendente ea a circulo hemisphærii, puriora producunt metalla, et puriores perficiunt lapides, et magis figuntur spiritus et certius operantur, et præcipue quando sunt bene periti non præcipitantes opera sua, sed exspectantes opportuna tempora, quando opus adjuvatur virtute cœlesti.

His autem omnia similia inducere longum esset : hæc enim quæ de singulis rerum generibus induximus, satis suffi-

cienter sunt ad nostræ probationis intentionem.

CAPUT VIII.

Et est DIGRESSIO declarans diversitatem marium in accedendo et recedendo.

Omnibus autem habitis quæ de causa accessus et recessus marium dicenda videbantur, nunc complentes quæ de hac materia dicere intendimus, inducemus diversitatem marium et recessum.

Tria genera marium.

Dicimus autem tria genera marium esse in communi, et unum quidem genus est, in quo nulla causa est accessionis et recessionis. Alterum autem in quo est quidem accessus et recessus aliqua causa, sed tamen non apparet in eo accessio et recessio. Tertium autem genus est in quo est causa accessus. Nec ipse motus accessionis ex una vel pluribus de tribus causis esse, est necessarium : quarum prima est, quia aquæ alicujus maris paucæ quæ recipiunt augmentationem in hyeme ex pluviis, et decrementum in æstate, et recipiunt augmentum ex inundantibus aquis : et illa maria habent naturam stagnorum : et aqua eorum non multum erit salsa, et est subtilis : et ideo non colligit in se flumen et vaporem qui facit ventum expellentem aquam : et non accedunt maria illa nec recedunt : talia enim sunt quasi quædam stagna obviantia mari : et propter latitudinem eorum et exiguam profunditatem non sentitur in eis accessus maris : eo quod prius disparet ante-

quam redundet in aquis marium talium. Secunda autem causa est, quod forte adeo longæ sunt a via planetarum, et quod luna numquam figit in eis radios suos, sed transeunt aquæ rotunditatem. Et ideo non est mirum si tale mare non accedit, nec recedit. Tertia causa est, quia forte terra maris in fundo et ripis est rara mollis, quæ non continuat in se vaporem generatum, sed paulatim emittit eum : et tunc iterum, ut superius diximus, mare nec accedit nec recedit.

Maria autem in quibus quidem est causa accessionis et recessionis, et tamen nec accedunt, nec recedunt, sunt tamen in hac passione propter tres causas, quarum una est, quod lunæ ascensio a circulo hemisphæri non respicit nisi unum littorum ejus : eo quod magnum nimis esset spatium inter unum littus et aliud, et luna movet non nisi unam partem aquæ, et illa superfunditur alii, et non generantur iidem accessus et recessus, sed potius ventus est crispatio undarum, sicut est in mari Pisano. Alia causa est, quod quando luna, quamvis fuerit in directo aliquorum marium, non tamen habet littora demissa et insulas quibus superfundatur, sed constringitur accessus ad altitudinem littoris : et non percipitur nisi forte in hoc quod mare percutit littus una hora plus quam alia. Tertia causa est fluxus maris : aliquod enim mare fluit, et cum movetur a luna, spirat, et statim defluit antequam ex spiritu extra locum possit extrudi : et ideo non recolligitur ut simul accedat, sed defluit pars ejus post partem : et non sentitur accessus ejus.

Maria autem in quibus sentitur accessus et recessus, sunt quæ habent aquas spissas, et fundum solidum et littora solida, et frequenter montuosa, et habent alicubi littora depressa plana et lata super quam planitiem superfundatur aqua : et ab eis liberum reditum habeat mare, sicut superius diximus, sicut mare Indicum et Persicum, quod est inter Constantinopolim et Venetias : et mare quod est Gumphus Oceani in Aquilone, juxta

Maria in quibus non est accessus nec recessus.

Mare Pisenum.

Maria in quibus sentitur accessus et recessus.

Mare Indicum et Persicum.

quod habitamus nos. Quod autem omnibus his mirabilius est, scribitur et dicitur a marinariis de mari Persico et de mari Indiæ. Dicunt enim, quod illa duo maria ad invicem continuantur, et tamen habent insulam magnam in qua disjunguntur : et sunt proprietates eorum mirabiles.

Mare Persicum quando est navigabile ?

Nam mare Persicum bene tranquillum navigabile est ab introitu solis ad initium Piscis usque dum ingreditur initium Virginis : et hunc incipit spumare et nubilum esse, et unde ejus elevari continue usque dum egreditur sol initium Piscis : sed tamen maxima ejus elevatio et fumus et tempestas est quando sol est in Sagittario in fine, et in initio Capricorni : et tunc multi navigantes in eo periclitantur : est tamen semper navigabile : et ita similiter est de Mari Magno Oceani, et de maribus omnibus quæ sunt apud nos in septimo climate. Mare autem Indiæ proprietatem habet oppositam istis maribus : nam ipsum est tranquillum per totum tempus quo sol movetur ab initio Virginis usque ad initium Piscis : et summa ejus tranquillitas est, quando sol est in fine Sagittarii, et in principio Cancri. A principio autem Arietis usque ad principium Virginis est tempestuosum, et maxime tempestuosum, quando sol est in fine Geminorum et in principio Cancri, et tunc mare Persicum maxime est tranquillum : et quod auget admirationem vehementer, est quod hæc duo maria habent continuas aquas : et licet utrumque sit innavigabile in oppositis temporibus, tamen Indicum mare omnino efficitur innavigabile et tenebrosum, quando sol est in Geminis et in Cancro. Persicum autem difficulter est navigabile et cum periculo et non omnino tenebrosum, quando sol est in Sagittario et Capricorno.

Mare Indiæ quando est navigabile ?

Et hoc quidem plures narrant Philosophi naturales et Astronomi, sicut Albumasar, et quidam alii : tamen causam non reddunt nisi universalem valde, dicentes hoc esse ex sole : eo quod sol non solum, sed luna mirabiles habet effectus in movendo aquam maris. Sed hoc non

sufficit : oportet enim naturalem scire causas proprias et veras. Et ideo dicendum mare Indicum esse aquæ spissæ magis quam Persicum : et hoc ideo est, quia ipsum est magis ad Meridiem, et fervor solis commiscet ipsum cum terrestreitate multa, et extrahit ex eo humidum subtile, et remanet grossum terrestre per modum fæcis : et hoc calido diminuto moveri non potest : et ideo sole declinante ad Meridiem quando est in principio Virginis, non movetur et non exspirat, et est status illius tranquillitatis, quando sol remotissimus in Meridie : et hoc est quando est in Sagittario et in Capricorno : tunc enim residet aqua ipsius, et non potest ipsum movere ad spirandum. Quando autem sol incipit ascendere super ipsum a Meridie, et appropinquerit ei versus æquinoctialem in signo Piscis, tunc movet aquam ejus : et spiritus ejus grossus non egreditur per partes subtiles, sed potius per nebulas obscuras : eo quod multus est et spissus : et ideo est obscurum valde et est status tempestatis ejus, quando hoc maxime potest perficere : et hoc est quando est maxime calidus ascendens super ipsum in Sagittario et in Cancro. Mare autem Persicum subtilis aquæ est, et subtilis spiritus : et ille egreditur paulatim sole existente in signis Aquilonaribus : et ideo mare Persicum tunc est tranquillum. Quando autem sol est in signis hyemalibus in Meridie, tunc frigiditate densatur spiritus, et egrediens obscurus et fortis facit tempestatem. Quod autem mare Indicum efficitur omnino innavigabile in æstate, ideo est, quia vapor ejus spissus quando calefit, multum retinet calorem propter materiæ suæ terrestreitatem et spissitudinem : et ideo non sedatur, sed fortissime et continue turbat mare : et hoc non facit spiritus maris Persici, sicut patet omni scienti naturas vaporum terrestrium, quos nos in libro *Meteororum* determinavimus.

Ratio quare mare Indicum aliquando est innavigabile.

Non autem prætereundum est de mari Mortuo, et de mari quod est in Æthiopia, et vocatur a quibusdam mare Indi-

cum, eo quod ejus in una parte gum-
phum quemdam continuatur, quod neu-
trum illorum accedit vel recedit : cum ta-
men luna et sol orientur et occident su-
per maria illa. Et hujus causa est, quia
aqua utriusque eorum marium spississima
est, quam lumen solis penetrare non pot-
est : nec vapores ejus subtiliantur ita
quod bulliat : et ideo stat neque acce-
dens, neque recedens. Et hujus signum
est, quod nihil omnino vivit in maribus
illis, nec aliquid prope juxta ea germinat,
nec bene navigabilia sunt propter aquæ
spissitudinem et corruptionem. Corpora
etiam quæ in aliis maribus merguntur,
natant in istis propter spissitudinem suæ
aquæ. In cæteris autem maribus est idem
judicium.

Hæc ergo de accessu et recessu maris
dicta sunt quantum ad hanc spectat in-
tentionem : in judiciis enim astrorum
quædam illi scientiæ propria remanent
dicenda, de quibus, Domino concedente,
in mathematicis scientiis determinabi-
mus.

CAPUT IX.

*Et est DIGRESSIO declarans causam
diluviorem aquæ.*

Nunc videndum est de causa diluvii.
Dicemus autem in diluvio causas natura-
les.

Oportet autem scire, quod diluviorum
apud Auctores quoddam dicitur univer-
sale, et quoddam dicitur particulare.

Causarum etiam diluvii quædam est uni-
versalis, et quædam minus universalis,
et quædam particularis. Universale enim
fuit quod totam submersit habitabilem,
sicut factum fuit sub Noe, ut meminit
Moyses, quod idem puto esse quod fa-
ctum fuit sub Deucalione et Pyrrha, ut
testantur poetæ Græci et Latini. Particu-
lare autem fuit sæpius quod unam forte
terram aut submersit aut infudit ad tem-
pus, licet non submergeret in toto. Cau-
sa autem universalis diluvii est, in qua
conveniunt omnia simul et cœlestia et
terrestria causantia inundationem aquæ.
Causa vero minus universalis est, in qua
quædam cœlestium conveniunt, et quæ-
dam terrestrium. Causa vero particularis
est, in qua conveniunt aut quædam cœ-
lestia sola, aut quædam terrestria sola.
Antiqui autem theologizantes hoc non
ignoraverunt : et ideo dixerunt, quod Ju-
piter volens inducere diluvium, Neptu-
num fratrem suum habuit adiutorem :
volentes per hoc dicere, quod non ex Jo-
ve, hoc est, ex cœlesti virtute sola dilu-
vium, sed etiam ex Neptuno qui virtute
inferiorem significat, quæ movet ali-
quando aquas ab inferiori terræ ad su-
periora. Dicuntur enim Jupiter et Nep-
tunus fratres, eo quod ab eadem con-
stellatione innascitur vis superior quæ in
aquas convertit vapores et aerem, et vis
inferior de terra ebullire facit aquas ad
terræ superficiem : propter quod Jupiter
descendisse in terras dicitur, et vidisse
habitantium in terra malitiam.

Sunt autem quidam qui hæc omnia
divinæ dispositioni attribuunt, et aiunt
non debere nos de his rebus quærere
aliam causam nisi voluntatem Dei. Quod
nos in parte consentimus : quia dicimus
hæc nutu Dei mundum gubernantis fieri
ad vindictam maleficii hominum. Nos ta-
men dicimus hoc Deum facere propter
causam naturalem, cujus primus motor
est ipse, qui cuncta dat moveri. Causas
autem suæ voluntatis non quærimus nos :
sed quærimus causas naturales, quæ sunt
sicut instrumenta quædam per quæ sua

Diluvium
universale
et particu-
lare.

Causa uni-
versalis di-
luvii.

Causa par-
ticularis di-
luvii.

voluntas in talibus producit ad effectum.

Quorundam autem Arabum sententia est, hujusmodi prodigia in terra fieri ab imaginatione intelligentiæ quæ movet spheram lunæ, et non ipsa luna vel aliqua stella. Dicunt enim, quod sicut corpus hominis habet se ad animam, ita tota corporalis vel materia generabilium et corruptibilium se habet ad motorem lunæ : eo quod ille proximus motor est talis materiæ : et ideo sicut imaginata forma aliqua, parat se corpus nostrum ex obedientia quam habet ad animam ad hoc quod induat eam, ita modo tota materia generabilium et corruptibilium ad induendum omnem formam quam imaginatur motor lunæ : et quia hujus motoris virtutem et imaginationem sequitur sic materia generabilium, dicunt ipsam intelligentiam quæ movet orbem lunæ, a Platone dictam fuisse *animam mundi*, et amborum horum esse vocatam Deum, quia omnia implet.

Quidam autem alii dicunt non esse hujusmodi causam, sed potius superiorum exorbitationem. *Exorbitatio* autem est apud eos, quod planetæ post longam circuitionem elevant axem qui Meguar spheræ dicitur, et aliquando deprimunt. Quando autem deprimunt, tunc aqua efficitur altior quam terra : et ideo inundant super terram, et mergunt eam. Et hæc etiam secundum quosdam Platonicos et Ægyptios dicta sunt : omnes autem sententias quæ a diversis dictæ sunt prosequi inutile esset.

Hæc enim quæ dicta sunt a physicis secundum aliquam rationem dicta sunt : quod enim motor lunæ per imaginationem sit causa prodigii hujus quod dicitur diluvium aquæ, aliquam videtur habere veritatem : quoniam licet motor lunæ non per imaginationem, sed per scientiam lunam moveat, tamen hæc scientia ordinat et regit cursum lunæ et impressiones quæ in materia fiunt generabilium, et obedit ei materia. Sed solum hic dicere causam non habet ratio-

nem, et est illa causa communis et hujus prodigii et aliorum. Scimus autem per ea quæ in II *Physicorum* dicta sunt, causam communem et universalem non esse propriam et particularem, nisi fiat propria per aliquod sibi oppositum : et hoc proprium debuit ab istis in natura determinari. Non autem sufficit scire in universali, sed quærimus scire unumquodque secundum quod in propria natura se habet : hoc enim optimum et perfectum est genus sciendi.

Nec potest dici motorem lunæ esse vanum in imaginatione, quemadmodum nos superius diximus : quoniam si ita esset, inordinatus esset motus ejus : et ad hoc sequeretur, quod omnino nihil ordinatum in inferioribus remaneret. Qui autem inordinationem et aberrationem diluvii posuerunt in elevatione et depressione geucar spheræ, non retulerunt hoc ad orbem primum, cujus geucar, sicut est centrum immobile est, sed tantum ad orbem lunæ quæ aliquando descendit, et aliquando ascendit : et tunc quia centrum circuli ascendere et descendere necesse est, necessarium etiam est ut poli descendant et ascendant : his autem descendantibus et ascendentibus necesse est descendere et ascendere geucar spheræ lunæ : quod tamen non fit errore, sed ad cursum ordinatum ad intelligentiam : sed dicitur aberratio ab Antiquis, ideo quia non æqualiter semper se habet ad centrum et meguar mundi, sed inæqualiter.

Hæc igitur tamquam obscure et imperfecte dicta relinquentes, dicimus supra tractatum esse quod diluvii quod fuit in terra, causam fuisse conjunctionem quæ fuit in signo Piscis. Oportet ergo scire, quod conjunctiones planetarum sunt multæ. Quandoque enim omnes planetæ conjunguntur simul in uno signo et in uno gradu signi, et in eodem minuto, hoc est, sexagesima parte gradus : aliquando autem conjunguntur pauciores, sive sex, sive quinque, sive quatuor, sive tres, sive duo : et hoc fit multis mo-

dis et varietatibus : et sunt tot quot modis diversificari contingit planetas per numerum et conjunctionem : et est, sicut dicimus, quod senariæ conjunctiones sunt septem. Possunt enim omnes conjungi præter Saturnum, et possunt omnes conjungi præter Jovem, et possunt omnes item conjungi præter Martem, item præter Solem, aut præter Venerem, aut præter Mercurium, aut præter Lunam. Septenaria autem conjunctio non est nisi uno modo, quando omnes conveniunt, sicut etiam multis modis fit quinary conjunctio, ita quod Ptolemæus dicit numerum harum conjunctionum esse centum et viginti, quas leve est invenire secundum modum qui jam dictus est de senaria conjunctione : sed quia hoc non est utile, ideo præterimus.

Ulterius autem notandum est, quod quando duo planetæ vel plures conjunguntur, dupliciter possunt convenire : aut enim ita conveniunt, quod inferior tegit et eclipsat superiorem, aut ita quod juxta se stant quasi stent omnes qui conjungi dicuntur super unam lineam Meridionalis circuli : et hoc fit quandoquidem in eadem longitudine supra ab Oriente et ab Occidente : sed non sunt in eadem latitudine a circulo æquinotiali. Et quandoquidem primo modo conveniunt, tunc vocatur conjunctio non vera. Dicitur autem conjunctio vera, quia cum stellæ sint luminaria imbibentia sibi lumen quod ad eas dirigitur, tunc inferior imbibit sibi lumen usque ad centrum suum, et informat ipsum sua virtute. Et hujus simile videre possumus in corpore humano, ubi unum membrum transmittit alii ipsum et humorem, et tamen membrum recipiens informat illa secundum suam naturam et virtutem : quemadmodum cerebrum spiritum et humorem sibi a corde et hepate missum informat ad virtutem et operationem animalem : et testiculi spiritum et humorem sibi missum informant ad virtutem generativam et formativam speciei : et ita facit quilibet planeta qui recipit lumen

ab alio : et hoc cognoscimus in luna quæ recipit lumen a sole, et format ipsum ad virtutem suam ut fit frigidum et humidum, cum in sole sit calidum et siccum temperate.

Ad hoc autem notandum, sicut diximus superius, quod duæ stellæ quæ sunt universaliores in mundo et fortiores : eo quod sunt superiores, aliquando conjunctæ permutant triplicitatem in qua prius fuerant : aliquando autem conjunguntur in eadem triplicitate in qua prius fuerant conjunctæ. Cum autem permutant triplicitatem, tunc efficiuntur in movendo quasi novæ : et significat illa conjunctio magna accidentia et prodigia magna : et mutationes generalis status elementorum et mundi. Cujus causam debet dicere naturalis Astronomus, quia scit astronomiam. Et ideo dicit Philosophus, quod astronomia est altera pars philosophiæ, et Ptolemæus dicit, quod iudex elector et observator astrorum errabit si non sit Philosophus. Est autem profecto hæc causa. Cum enim sciamus jam per ea quæ in *Cælo et Mundo* dicta sunt, causam esse universaliter, et figuras et formationes esse in cælo, et cælum quod motori propinquius est, esse universaliter in causando illud, oportet quod id quod universaliter est in superiori, denominetur per inferiora : et id quod primo determinat ad figuram et speciem, est circulus stellatus. Prima autem ad contemplationem ducentia, sunt Saturnus et Jupiter : eo quod unum movet frigidum et siccum, et alter calidum et humidum : et cum ista conveniunt tripliciter cum ea triplicitate signi ex qua confortari habet et influentiam accipere, oportet quod per illas duas stellas toti mundo dispositio infundatur. Permutatio autem triplicitatis dicit permutationem priorum qualitatum elementorum universaliter. Oportet igitur, quod cum istæ duæ stellæ permutant triplicitatem totius mundi quoad inferiora mutatio sentiatur.

His ergo sic prælibatis, dico quod causa universalis diluvii componitur ex

Causa universalis diluvii componitur ex

quatuor
causis.

quatuor causis. Quarum una est conjunctio septenaria vera planetarum. Secunda est, quod fuerunt omnes vel plures eorum in inferiori parte suorum circulo-
rum. Tertia est, quod talis fuerit conjunctio quæ incepit in signo Aquarii juxta septem stellas, quæ dicuntur *hydria aquarii*, et a quibusdam vocatur *effusor aquæ* : quia de illis aptum est, quod specialem effectum prodigiosum habent in movendo aquas : et cum ibi incepit quod est transiens in signum Piscis quod est triplicitatis aqueæ, et maximam habet virtutem in illa triplicitate plus quam Cancer vel Scorpius, et quod fuerit permutatio triplicitatis in illa conjunctione : tunc enim oportuit ut triplicitas quæ regnabat ante in hoc mundo esset aerea, ut aer humore et convertibilitate juvat ad multitudinem aquarum. Dico autem conjunctionem aliquam incipere in uno signo, et perfici in alio, quando centra epiciclorum vel ipsi epicicli ad se accedunt prius in uno signo, et ipsi planetæ conveniunt paulatim in alio. Quarta autem causa est et ultima, quod luna fuerit confortata viribus suis hora conjunctionis super quod ipsa ascenderet a circulo hemisphærii, et ipsa conjunctio directe fuerit super aquas, et quod fuerit in hora et die et lunæ : tunc enim absque dubio luna habuit in se quiddam luminis fuit in omnibus planetis, et movet toto illo lumine secundum naturam lunæ : et ideo non tunc paulatim processit aqua, sed quasi exivit ad eum de intimis terræ visceribus. Causa autem alia fuit in inferioribus illis quidem et ipsa : quoniam oportuit tunc propter motum aquæ vapores esse plurimos in aere, et in ipso vincere vim lunæ : et ideo fusæ sunt pluvie quæ et vapores et aeris pluviam in aquam convertunt : et hæc est una pars causâ inferioris. Secunda autem fuit ut essent multi vapores in terra spissi et fortes, qui ex terra solida in aquas erumpabant et de abyssis aquas dejecerunt de sedibus Neptuni fratris Jovis qui in aere dominatur.

Et hoc est quod poetæ Græci et Latini cantant carminibus fabulosis : quibus tamen Plato subesse asserit veritatem in *Timæo*. Quod enim contra Lycaonem Jupiter conventum Deorum convocat, nihil aliud fuit nisi conjunctio quæ facta fuit planetarum et stellarum fixarum in signo et gradu uno, in quo primum corpus movens fuit de natura aquæ quod fuit constellatio Piscis, et ultimum quod est luna, fuit de natura aquæ : et ideo necesse fuit quod et media lumen suum ad eandem naturam haberet conversum. Quod autem dicunt super eos deos tenuisse locum digniorem in aulam, et populares deos alia quæ sortiri poterant loca tenere, ideo dictum est, quia cœlestia corpora superiora sunt in causando prodigia talia, et eorum virtus quasi sententia prima : et inferiores causæ faciunt quod attribuitur eis a cœlestibus, quæ virtutes inferiores vocantur. Populus deorum et successio domus Lycaonis nihil aliud fuit nisi immissio luminis stellarum in signis Piscis, et in luna : quia stella dicitur combusta, quando est sub radiis alterius, et maxime solis. Ultra autem processit in facinus hominum et habitantium terram in diluvii inundatione, sicut dictum est.

Hæc igitur est causa universalis diluvii, quod quidem universale maxime fuit : diminutio autem istorum quæ ad hoc concurrunt, facit causam diluvii particularis : et erit minus diluvium secundum quod pauciores causæ et minus fortes convenient : aliquando enim solus ventus terræ motus facit diluvium particulare : aliquando est enim ibi vapor : et sunt aliqua virtutum cœlestium, sicut diximus : et leve est hæc omnia scire ex prædictis. Inventio autem temporis diluvii et quantitatis, et locus determinatus sciri non possunt nisi ex scientia motus astrorum. Hæc igitur de proprietatibus aquæ dicta sunt.

CAPUT X.

Et est DIGRESSIO declarans proprietates aeris quæ dictæ sunt ab Antiquis.

Post hoc autem de proprietatibus aeris est dicendum, et præcipue determinandum est de motibus ejus, utrum ipse accedat vel recedat quemadmodum mare, et utrum inundat aliquando. Non enim videtur idem non accedere et recedere aerem ex alicujus stellæ proprietate, cum ipse sit magis mobilis quam aqua, et sit simplex : et conveniens sit simplex quod vicinius sit stellis, magis moveri a stellis quam illud quod est remotius ab eis.

Sed econtra esse videtur, quod nos illum motum non sentimus, neque experimur. Si enim talis motus esset, tunc oporteret quod sentiretur quemadmodum sentitur ventus : non autem sentitur.

Propterea mentitur absque dubio Alpatiatius, qui aerem plus quam aquam dicit circulariter moveri omni die : cum enim mobilior sit, a quo sumitur circulatio ejus, si circulariter moveretur ? non enim tantum putandum aerem moveri a corporibus cælestibus, sed movent eum orbis quinque planetarum, qui sunt Saturnus, Jupiter, Mars, Mercurius, Venus. Et quia stellæ illæ plurimorum sunt motuum, ideo multus est motus aeris et varius : quia tredecim stellæ præter Solem et Lunam, in eis habent motuum varietates.

Quatuor autem Antiqui de aere dixe-

re, quorum unum est, quod ipse medius sit inter cælum et terram communicans utriusque accipiendo a terra fumos et vapores et referens cælo idem alimentum : quod Ægyptii dixerunt, et Seneca eos in hoc est secutus : stellarum vires autem accipit a cælo et defert terræ. Et primum quidem horum falsum esse jam in *Cælo et Mundo* probatum est. Secundum autem verum est, quod quidem stellarum vires defert ad terram : quoniam vis extremi non venit in extremum nisi per medium : et ideo oportet quod mediante igne et aere omnis stellarum vis ad terram deveniat. Quod autem medius sit, ita quod tangat et distinguat utrumque extremorum, sicut intendit Seneca dicere, non est verum : quod ipse tamen opinatus est sequens Ægyptios qui dixerunt ignem alium non esse nisi ex quo sunt corpora cælestia : et non est id quod est inter unam sphaeram et aliam, sicut dixerunt Antiqui. Est autem multum de his dictum in libro *Cæli et Mundi*, ubi probatum est cælum nullum esse quatuor elementorum.

Secundum autem est, quod ipse sit fortissimus omnium elementorum : eo quod videtur ipsum cum spiritu dejicere turres et ripas, et cum tonitruo scindens ligna : et simile hujus dicebant, quod videbant minuta semina in parietibus saxeis paulatim penetrare lapides et scindere : et ideo dicebant non esse mirum si aer spiritualis etiam magnum corpus scindit et dejicit. Est autem in hoc deceptio, qui revera aer facilius alteratur quam aliquod aliorum elementorum : et ideo de facili frangitur in sonis et vocibus, et de facili grossatur et subtiliatur. Quod autem dejicit et scindit, ideo est quia est vehiculum virtutis percutientis, sicut est vehiculum in corpore virtus naturalis spiritus naturalis impellentis aerem. Et de hoc determinandum in *Meteoris* est¹, ubi de tonitruo habitus est tractatus.

¹ III Meteororum, trac. III, cap. 4.

Tertium autem est quod dicunt de aere, quod omnibus quæ augentur, naturalia præbeat incrementa : vident enim terram in hortis non consumi nec minui quantumcumque sit fertilis herbarum et arborum : et magnis sylvis, incrementa dantur ex eodem modo se habente terra et aqua, ut dicunt. Et hoc etiam est falsum omnino, quia augmentum fit de nutrimento : probatum est autem in anterioribus libris *Peri geneseos* et de *Anima*, et de aliis, quod nihil compositum nutritur simplici, sicut nihil componitur ex simplici : et ostendunt opera rusticorum qui commiscent aquam stercorei quando rigare volunt plantas. Secundum autem dicta non oporteret rigari plantas per pluvias, nec oporteret cibari animalia : quoniam aer et vegetaret et augetet singula eorum usque ad statum.

Quartum autem quod Antiqui dicebant de aere, est quod esset spiritus deorum. Dicebant quippe aerem continuum esse usque ad cælum, et aerem esse id quod distinguit inter sphæram et sphæram : et ideo virtutes cœlestes, cœlestes deos vocabant. Dicebant primo influi aeri sicut vehiculum quo veherentur in omne quod est : et dixerunt ex ipso attrahi deos, et animas in omne quod animatur et vivit, et dicebatur esse sententia quæ inventa est in carminibus Orphei. Et hoc aliquid habet veritatis, quæ tamen in fabulis permixta est. Non enim est verum quod aer pertingat ad cælum, sicut superius est habitum, et etiam in secundo hujus voluminis habetur : sed virtutes cœlestes transportantur per aerem in radiis stellarum quæ discurrunt per aerem, et conjunguntur inferioribus radiis, cum in his virtutibus efficaciores sunt quam ipse aer.

De aeris autem divisione per raritatem, et de aeris motibus et vaporibus et fulgoribus et aliis quæ in aere generantur, nobis scientia fuit specialis, et consideratio in libro *Meteororum*. Hæc igitur de aeris proprietatibus dicta sunt.

CAPUT XI.

Et est DIGRESSIO declarans proprietates ignis, quas habet in loco suo, et extra locum suum egrediens.

Consequenter autem nos loquemur de igne et de proprietatibus ejus, de quo nos tria determinare oportet, quorum primum est, qualis sit ignis in sua sphæra. Secundum autem est, per quam salvatur natura ignis extra suum locum, cum non conveniat alicui alii elemento. Et tertium erit de motibus ejus, et de diluvio ignis quod tangit Plato in *Timæo*.

Dicimus igitur ignem in suo loco esse subtilissimum corporum elementorum specie, et ob hoc etiam levissimum et in hoc loco qui simpliciter est sursum, locum autem illum sibi attribuunt Philosophi, eo quod naturalis est ei : quia motus et lumen sunt dissolventia corpora et subtiliantia : propter quod materia elementaris in majori subtilitate et raritate esse non potest quam sub forma ignis : est autem et calidissimus, eo quod motus et lumen generativa sunt caloris : et propter hoc calor factus est ignis naturalis : et est calor in eo in ultimo : et ideo extinctivus est totius humidi : propter quod calor convenit igni essentialius quam siccitas, quoniam siccitas causatur a calore qui est in igne. Propter siccitatem autem ejus quidam dixerunt ipsum non esse continuum, sed ex atomis trigonis et rotundis : quoniam non dixerunt esse

continuum nisi quod est humidum, cum humidum faciat partes fluere ad invicem : et ita fit causa continuationis : ignis autem cum non habeat humidum, non est continuus. Et hujus signum dicunt esse, quod est perspicuum corpus, asserentes corpus continuum non esse perspicuum, sed potius omne tale terminare visum : addiderunt quod ignis in atomis descendit in aerem, et operatur in eo lumen : et hoc est quod aerem illuminat. Et Auctores istorum dictorum fuerunt primi Democritus et Leucippus, de quorum sententia in primo *Peri geneleos*¹ latius dissertum est. Sed quantum ad præsentem spectat interemptionem, sciendum est humidum causam esse continuationis in mixtis, et non in simplicibus : est enim continuum secundum esse mobile antequam sit humidum : propter quod etiam corpus cœli continuum est, et non humidum : et ideo humor non est causa continuationis in omnibus. Et ideo peccant secundum consequens qui humidum universaliter causam continuationis esse dicunt : eo quod viderent ipsum esse causam continuationis in mixtis. Nec propter hoc est perspicuum, quod ipsum non sit continuum : quia in humida perspicua esse videmus, sicut apparet in aere et in aqua et in crystallo et in multis aliis : et ideo dictum hoc est erroneum.

Humidum, est causa continuationis in mixtis tantum.

Ignis non lucet in propria sphaera.

Ignis autem in sphaera propria non lucet : ad hoc probandum in aliis locis adduximus rationes : sed quod hic sufficit ad probandum, illud est quod dicunt Alexander et Avicenna, quod si luceret, regeret et occultaret omne corpus quod est post ipsum, sicut facit omne quod lucet : cum autem nullum corporum tegat eorum quæ sunt super ipsum, constat ipsum in suo loco non lucere. Sunt quidam qui lucere ipsum judicant in sphaera sua, afferentes probationem ad hoc ex albedine galaxiæ quæ *lactea via* nomen habet, per

quam ad aulam Jovis convenit, ut dicit Ovidius : sed illi deridendi sunt, quia galaxia ab omnibus Auctoribus et Astronomis dicitur esse pars cœli stellati quam numquam attingit ignis : et distat ab ipso multo plus quam ignis distet a terra. Et ideo mirum est de fatuitate hominum, qui dicunt id esse lumen ignis : et quod tamen lumen ignis non resplendeat in terra. Quod autem dicunt poetæ esse iter deorum ad aulam Jovis, ideo dictum est, quia domus Jovis est Sagittarius, in quo via lactea præcipue diffunditur : et ideo tales ignari sunt naturarum qui hoc dicunt. De hoc autem in *Metaphysicis* fuit tractandum. Hoc igitur est unum eorum quæ de igne hic sunt dicenda.

Secundum autem est, quod ignem invenimus convalescere in radicibus terræ, in ventribus montium et in terra contineri in materia cremabili, quod non convenit alicui alii elemento : aqua enim in nulla materia nisi sit clausa in vase extra locum suum continetur : sed neque aer, neque terra : sed deserentes id quod conjunctum est eis, ruunt in præceps et festinant ad loca sua. Ignem autem invenimus moveri deorsum sequendo quasdam materias, et exardescere in eis, et non separari ab eis propter loci contrarietatem donec consumpta sit materia cremabilis in eis : propter quod quidam Philosophorum dixerunt ignem elementum non esse, sed ex motu non in loco uno, sed in omni loco generari. Hoc autem falsum est : et errorem eorum in alimētis determinavimus. Causa autem quare ignis sequitur quasdam materias extra locum suum, ideo est, quia illa sunt homogenia igni, et sunt habentia proprietatem loci ignis : et ideo moventur ad ipsum : in ipsis est enim ignis propter calidum congregativus homogeniorum sibi : et ideo tamdiu attrahit homogenium, quamdiu sunt illa sibi connaturalia ut

¹ I de Generatione et Corruptione, tract. i. cap. 8.

locus : et ideo dividit ea et penetrat ipsa extrahendo subtile sibi homogenium. Est autem causa istius ejusdem etiam vehementia actionis suæ quæ adhæret rebus cremabilibus inseparabiliter : alia autem elementa qualitates non habent per quas attrahant sibi corpora et faciant ea sibi homogenia : quapropter remanent sibi contraria : et ideo semper fugiunt ab eis, et redeunt ad loca sua naturalia.

De lapide
Anast.

Quod autem mirabile valde est, quod est lapis quidam albus cujus nomen est *Anast*, qui trahit ignem ex maxima longitudine, et sequitur eum ignis, et inflammatur in ipso : et faciunt cum illo deceptores sacerdotes lampades ad aras, quas per seipsas dicunt accendi, ut sic deludant populum simplicem. Sequitur autem ignis *Anast* album ubicumque fuerit oppositus ei, sive superius, sive inferius, sive a dextris, sive a sinistris : et ideo pro certo est, quod lapis ille spirat quasi spiritu sulphuris, quo spiritu sic ignis ad locum attrahitur, nec tantum attrahitur, sed etiam movetur ignis ad ipsum sicut ad rem in qua est : locus enim naturalis secundum aliquid est sicut magnes est locus generationis ferri. Et est differentia inter materias tales et locum : quoniam in loco res generatur et continetur : et ideo moventur naturalia ad loca sua sicut ad sua principia generantia et continentia ea materia : materia autem istæ sunt generantes, sed non continent per modum certum scribentium, sed retinentes per modum fruendum et ministrantium quasi alimentum. Hæ igitur et aliæ hujusmodi sunt proprietates.

Quod autem dicitur tres esse species ignis, carbonem videlicet, et flammam, et lucem, non est dictum nisi de igne extra locum suum existente : quia in loco suo nihil horum est nisi dicatur lux esse, non ab actu lucendi, sed a natura ejus quod est luminosum esse : hoc enim est perspicuum condensatum : et hoc non differt materia a non condensato, sed in accidente : diximus autem de hoc alibi.

CAPUT XII.

Et est DIGRESSIO declarans motum et diluuium ignis.

Dicamus autem deinceps de tertio quod quærimus de igne, videlicet de motu et de diluuium ignis. Fertur autem a Philosophis ignem a sole moveri, et sequi ipsum solis radios. Sicut enim luna humidum aquæ movet, ita sol habet movere ignem, et quinque residui habent movere aerem : propter quod in aere multos motus esse dicunt propter varietatem motuum quinque planetarum : in aqua autem unum, et in igne unum. Est autem iste motus virtutis potius quam substantiæ : quia cum sol ordinatum cursum habeat, nec varietur ex ephiptico vel diversa latitudine, eo quod in motu tenet ephipticam quæ medium est Zodiaci. Non possunt autem esse in igne motus diversi propter hoc solum quod radiis et in radiis solis ignis proprietas in terras diffunditur plus et minus secundum quod sol ascendit ad Aquilonarem in Zodiaco, vel descendit in Meridie eodem : et secundum quod proportionaliter recto radio incidit terris, vel oblique, et secundum quod est in inferiori parte circuli, magis calefacit quam in superiori, ubi longior est pars diametri : et secundum quod est in loco arcto sphaeræ circuli signorum, vel distat ab illo : his enim modis, sicut diximus in libro de *Natura*

*locorum*¹; sol magis fervet super unam regionem quam super aliam.

Quod sunt quatuor modi in summa quos sol solus habet, scilicet accessus ad Zenith caput, et rectitudo anguli, universaliter loquendo quantitas anguli secundum quam radius ejus incidit terræ, et arcitudo sphæræ, sicut est sub tropicis, in quibus diu manet sol circa locum eundem : et depressio solis ad terram ex brevitate diametri ex loco in quo est sol, habet adjutorium caloris a superiori per stellas fixas calidas aliquando sub quibus est, sicut quando est in Leone, et juvatur a stella quæ dicitur *canicula* : et aliquando habet adjutorium per planetas, et maxime per Martem, cujus maxima est caliditas et siccitas. Licet autem Mars calidior sit quam Sol, non tamen attribuitur illi movere ignem, sed Soli : et hoc dicunt contingere ex magnitudine corporis solis : et quia magis est propinquius ad ignem : et ideo fortius movet ipsum quam Mars. Jupiter autem etiam coadjuvat, sed incendere intemperate sicut est incendium Martis non est Jovis. Habet præterea sol lumen a se, quod non habet Mars, sicut in secundo libro hujus scientiæ habebitur. Lumen autem calidum est esse secundum effectum : et si aliquando humefaciat, hoc non habet in quantum est lumen, sed in quantum est lumen istius corporis vel illius in quo ad humorem faciendum informatur. Sol igitur propter causas quæ dictæ sunt, movere habet ignem : et hoc Antiquis fuit absconditum : quia propter causas quas sol habet ad ignem movendum, et sequitur cursum solis, dividunt quatuor equos, Pyroun, Eoum, et Æthon, et Phlegon. Duas autem rotas assignaverunt curru propter circulum deferentem solem, qui est eccentricus, et propter ascensum ejus et descensum ad longiorem partem diametri et brevioram. Licet

enim uterque istorum motuum sit in circulo eodem, non tamen sol habet unicam virtutem ex his duobus, sed duas : quia currens secundum signa diversimode respicit Zenith caput, et descendens et ascendens ad augem et oppositum augis exaltantur et deprimuntur : tam equi autem quam rotæ faciunt incendium, propter quod juste soli datur movere ignem. Splendor enim calefacit et calefaciendo inflammat usque ad medullas : et tunc tepefacit in se novans humidum per vapores extractos a medullis rerum : hoc enim secundum ordinem superius enumeratum sonant equi solis. Movendo autem ignem, ut diximus, impossibile est ut moveat eum ut corporaliter descendat deorsum : quoniam ignis simpliciter levis est, et illius est super omnia ferri et locari : et ideo si corporaliter descenderet, hoc esset omnino contra naturam : sed movet eum ut diffundatur calor ejus in radiis. Propter quod Philosophi quidam dixerunt, quod radii solis sunt calidiores aliis, eo quod transeunt per ignem : licet non sit sufficiens dictum eorum : quia etiam radii lunæ transeunt per ignem, sed tamen non sunt calidi, sed frigidi et humidi, sicut diximus superius. Dicatur igitur, quod sicut sol calidus est et siccus per effectum, et non informatio caloris, ita radii hoc habent in effectu : et ideo ipsorum est movere ignem generando ignem in his in quibus generatur ignis in inferioribus. Et iste modus est qui traditus est a Philosophis, quod ignis in radiis solis descendit ad locum generationis. Sic ergo dictum est qualiter est solem movere ignem.

Diluvium autem ignis est, quando excitatus ignis a lumine solis exsiccatur et incendit climata calida. Et hoc aliquando accidit universali causa, et aliquando causa quæ est secundum partem : et est diluvium ignis aliquando universale in

Quid sit diluvium ignis?

¹ De Natura locorum, tract. 1, cap. 3.

terris, et aliquando particulare, sicut diximus de diluvio aquæ. Causam autem universalem diluvii Antiqui non secundum veritatem sciverunt. Dicit enim Plato, quod exorbitatio solis et planetarum fuit causa diluvii ignis, et inducit fabulam de Phaetonte, quam Ovidius a Græcis sumptam Latinam fecit¹: et dicit, quod licet videatur esse fabula, tamen est res vera: et sunt hæc ejus verba: « Denique enim illa etiam fama quæ nobis quoque comparata est, Phaentem quondam solis filium affectantem officium patris currus ascendisse luciferos, nec servatis solemnibus irrigationis orbis, exurisse terram, et ipsam flammis cœlestibus conflagrasse, fabulosa quidem putatur, sed res vera est: fit enim longo intervallo mundi circuituibus exorbitatio, quam inflammationis vastitas sequatur necesse est. » Hæc autem verba quidam Antiquorum exponendo dixerunt solem ab orbita solita recedere, et etiam axem solis longa circuitione consumi, et tunc deprimi currum solis, et terris approximare, et ideo terras exurere. Alii autem Atlantem qui axem cœli portat, aliquando dicunt remittere axem inferius, et aliquando porrigere superius: et exinde provenire terris vel immensos calores vel immoderata frigora.

Hæ autem opiniones sunt fere omnes falsæ: quoniam compertum est solem numquam relinquere viam quæ est inter utrumque tropicum, nec plus declinare ad unum polorum quam ad alium. Diversitas autem ascendendi superius et inferius quæ in aliis planetis est per epicyclum, nulla est omnino in sole sicut per verissimas observationes astrorum compertum est. Diversitas autem quæ est per eccentricum, ordinata est, et sol diversitate illa movetur omni anno: nec unquam solis circulatio aliqua pervenit ad Phaentem, qui inter coronam Adriacæ

et Scorpionem micat. Illa ergo exorbitatio quam fabulose signat, quod sol egressus sit Zodiacum usque ad Austrum Phaentis, nulla ratione potest esse vera: sed hoc finxerunt Antiqui quando nesciverunt causas caloris igniti quas aliquando facit sol. Si egressus esset currus solis extra Zodiacum ad Aquilonem quantum est Phaeton, et fecisset circuitum, revera non attigisset Scorpionem, exivisset Zodiacum versus Aquilonem, nec totum circuitum ad Aquilonem perfecisset: et si tunc etiam exorbitasset in ascensu et descensu ad terram, revera totam partem Aquilonarem destruxisset. Et ideo non reddiderunt Ægyptii causam in fabula Phaentis quæ sunt revera causa incendii. Sed potius finxerunt unam quam existimaverunt: multa enim Ægyptii erronee scripserunt in astris. Dixerunt enim, quod sol aliquando multum descendit, ita quod lunam videtur tangere quando multum saturatus est humore Oceani: et aliquando multum ascendit usque ad Saturnum, quando egressit et relevavit se ab humore: et aliquando stat super terram per diem unum vel duos, licet hoc raro accidat. Et ideo celebrant sacra Solis simplicis, et Solis duplatis, et Solis triplatis: et hoc expressit fabulam et non rei veritatem causæ secundum quod postea comperta est.

Quod autem dicunt mundi axem consumi, non intellexerunt hoc quod secundum veritatem ita sit: quia quem axis qui *mequar sphaeræ* vocatur, linea sit intelligibilis quæ non potest consumi, sed potius propter paulatinum ascensum solis super lineam, et paulatinam depressionem ejus super lineam axis mundi: et cum sic deprimitur et elevatur, tunc dicunt axem uri. Ex hoc etiam est quod dicunt Atlantem aliquando porrigere sursum, et aliquando deprimere deorsum, secundum philosophiam mentientes et

¹ Cf. II Metamorph. Ovidii.

experiments modum cursus solis. Licet autem hæc omnia fabulosa sint et aliquid habeant veritatis, tamen quia Philosophi non est per hunc modum loqui sed proprie, ideo dimittantur, et veritas sicut est explanetur.

Dico autem incendii esse causam congregatam ex septem, hoc est, ex aggregatione Solis et Martis et Jovis, et ex loco congregationis, ut videlicet sit in Cancro intra cor Leonis et Canem, et ex diametro Solis et Martis, ut videlicet uterque et etiam Jupiter sint in inferiori parte orbium suorum : et istud quod dixi de Cancro, intelligo non de spatio Cancri, sed de imagine. Imago autem Cancri in celo brevis est valde, et non longe distat ab ipso cor Leonis in parte una, et quædam stella rubea quæ est in Geminis, et est de natura et virtute Martis in parte altera, et canicula est proprie in parte tertia ad Meridiem aliquantulum. Ex ipso autem loco licet imago sit aquea, tamen est parvarum stellarum : quia et obscurum non multum impedit et promovet in altera parte plus quam sol, ubi diu figit radios circa idem punctum terræ propter spheræ arcitudinem quæ maxima causa est incendiorum.

Præterea si sol sit tunc in inferiori parte diametri circuli sui, proximus erit terris, et alii planetæ similiter calidi, et operabitur incendium non impediente natura Cancri. Est insuper imago brevis, cui statim conjungit imago Leoni, et Leo ingerit ei vires suas : eo quod in ipso est calor in statu summo triplicitatis igneæ. Est autem quartum, quod sol et planetæ calidi non sunt impediti a stellis frigidis, sicut a Saturno et Luna et Venere, et præcipue a Saturno. Quintum est, quod hæc conjunctio sit cum permutatione triplicitatis Saturni et Jovis : tunc enim magna accidentia producit. Licet autem forte omnes septem conjuncti sint, tamen si tres dictæ habuerint vires, omnes alias in proprietates suas convertent : et hoc erit si aliæ stellæ frigidæ sunt in superiori parte augium suarum, istæ autem

in inferiori : quia tunc licet Saturnus sit altior Jove, Jupiter tamen majoris est quantitatis, et Sol, quam aliquis aliorum. Contingit autem istud rarissime : et ideo rarissime incendii fit diluvium : et hoc est quod vocaverunt Antiqui *longam exorbitationem*. Auges enim planetarum movetur in centum annis uno gradu præter augem lunæ : et ideo diu currit orbis antequam exorbitet ut convenient tres auges planetarum calidorum : et hanc veram diluvii ignis causam existimo. Nullam enim habet diluvium istud in inferioribus causam sicut habuit diluvium aquæ : quia inferiora elementa non possunt movere ignem, neque vapor est materia, sed potius contrarius igni : sed vincuntur in toto a superioribus elementis inferiora, et destruitur vapor. Et hoc est quod dixit aliquis : quia malo fine usus fuit in illo quod Phaeton mundum incendit : quia incendendo lumine ignis illuminavit astringendo et consumendo : vapores forte ex igne elevari possent si illi essent in pingui et viscosa materia valde et igniti : et illi convertuntur in candelas et trabes ardentes et assub et hujusmodi, per quos totus mundus fere ignis videtur : et hoc est quod poetæ dicere voluerunt pervenisse favillam incendii mundi usque ad Phaetontem.

Solvitur autem istud incendium ex duobus, quorum unum est solis eclipsis, et alterum est effectus Jovis et Martis : eclipsis enim solis non fit nisi per lunæ interpositionem : et ideo radios calidissimos separat a terra : et tamen fervor remittitur, et incipiunt fumare aquæ et vapores mittere in aere, qui temperatur partibus frigidis ab aqua et terra in eum descendentibus. Et hoc est quod cantatur fabulose patrem Phaetontis, qui Sol est, doluisse de morte filii, et subtraxisse lumen per unum diem, non quod die una duret eclipsis, sed effectus suus durat in obscuritate nubium per diem ut frequenter. Et nemo miretur quod dicemus eclipsim solvere incendium, cum eclipsim parum duret : quantumcumque autem pu-

rum limpidissimum lumen solis separetur a regione aliqua, impossibile est quod non alterentur in frigidis omnia corpora illius regionis : et ideo Astronomi dicunt, quod effectus eclipsis duret per plures annos quam sint horæ eclipsis : sed scire tempus illud ad scientiam astrorum pertinet.

Primum autem in quo se manifestat alteritas incendii, est in infimo terræ : quia cum per incendium aquæ diminutæ sint, et terra et superficies in pulverem, apparet quod vapor valide de profundis terræ elevetur in superiora, qui elevatus involvitur in vapore aqueo, et propter nimium calorem se elevantem incenditur, et facit maximas corruptiones et tonitrua, in quibus Jupiter præstat vaporem terreum fortem, et Mars immittit incendium : et cum dissipatur et cum comprimitur vapor, cadit fulgur, et resolvitur id quod exterius est vaporis aquei in rorem et pluviam : et tunc mitigatur incendium. Et quia terra ministrat illius vaporis materiam, propter quod dixerunt terram post sacro ore clamorem dedisse ad Jovem qui movet vaporem, ut salvaret si quid esset residui, ne totum combureretur : et Jupiter accepit filium, et interfecit fulgurando Phaetontem, ignes compescendo ignibus, eo quod ignes fulguris inclusi in humido aqueo, fiunt quod distillat post illos, et exstinguit incensa in terra et aere. Hæc quæ dicta sunt, dicere habemus philosophice de diluvio ignis.

CAPUT XIII.

Et est DIGRESSIO declarans unde fit restitutio post diluvium.

Est autem altercatio magna inter Avicennam et Averroem in suis libellis de diluviis istis, quid sit reparans terras et animalia quæ sunt in ipsis postquam per diluvium aquæ et ignis mortificata sunt et extincta.

Dicit enim Avicenna virtutes stellarum commixtas viribus elementorum omnia formare et perficere, et non indigere femina nisi propter locum. Et ideo dicit matricem non exigi ad generationem nisi propter bonum esse, ut scilicet formetur melius : et quia est raro perfectus locus generationis alicujus in elementis propter repentinas mutationes elementorum, ideo providit natura locum certum quod est matrix fœminarum : sed nihilominus sæpe contingit locum generationis cujuslibet animalis aliquando esse contemperatum in elementis : et tunc stellas asserunt producere illius animalis speciem cujus semen est in elementis contemperatum.

Opinio Avicennæ.

Hujus autem signa introducit plurima, quorum unum est, quod nos videmus mulieres generari in aliquo loco ex terra, et postea per coitum multiplicari.

Aliud autem, quod nos videmus serpentes magnos generari ex capillis, et præcipue ex capillis mulierum, eo quod humidiores et longiores sint quam ca-

pilli virorum secundum naturam : et generati sic postea per coitum multiplicant, et format in eis vis stellarum marem et fœminam ac si de posteritate sit ei sollicitudo.

Tertium est et quod in his quædam quæ efficacius probant, quod nos videmus figuram capitis unius animalis generari in matrice alterius, cum matrix ipsum deberet corrumpere etiamsi ibi positum esset ab aliquo, sicut nos videmus quosdam monstruosos partus, de quibus nos diximus in secundo *Physicorum* nostrorum¹, et plura in libro animalium disseremus : non enim potest aliquis hic dicere hoc esse propter seminum commixtionem, ita quod species una animalis projiciat fœtum in matricem fœminæ quæ non est suæ speciei : quia licet hoc contingat in vicinis speciebus, sicut in asino, et equo, vel forte in cane, et vulpe, et hujusmodi, in distantibus nullo modo contingere potest, sicut est homo, vel vacca, vel pecus : cum tamen vident sæpe Philosophi partus, sicut alicubi introduximus. Constat igitur virtutem stellarum formare ex virtutis formativæ fortitudine, quod influunt in partus tales.

Quartum autem est, quod in observationibus astrorum compertum est quasdam stellas impedire figurationem hominis, quantumcumque sit semen efficax et matrix ad concipiendum bene disposita, sicut sunt quædam stellæ in signo Arietis monstruosos operantes partus, sicut sæpe compertum est, et aliqua de talibus monstris facta sunt apud nos et ad nostram notitiam pervenerunt.

Ex omnibus his et hujusmodi aliis probat Avicenna per stellas posse produci primas substantias cujuslibet animalis, et tunc per coitum multiplicari. Hoc autem etiam fabula videtur dicere quæ est de Pyrrha et Deucalione. Magna enim mater, cujus ossa jacere retrorsum jussa

sunt, terra est, et ossa et lapides, in quibus prima terræ commixtio apparet cum humore, et coagulati sunt, primo quidem calido et sicco humidum et fluidum extrahente, deinde autem frigido et humido vaporosum in ipsis comprimente. Propter quod et gelidi sunt, et volebant dicere quod commixtionem primarum qualitatum et elementorum posteritas post tergum eorum relinqueret cum virtute stellarum, qui per Pyrrham et Deucalionem moventem movens intelligitur. Hoc autem et Plato intellexisse videtur, ubi dicit Deum deorum sementem fecisse universi esse, et stellis tradidisse ad incorporandum et exsequendum.

Istæ igitur sunt rationes et similes his moventes Avicennam ad hoc quod dixit omnem habitationem ex stellarum viribus cum commixtione elementorum posse reparari.

Contra hoc autem iniiit multipliciter Opinio Averrois. Averroes et multis rationibus persuadens animalia quæ multæ sunt diversitatis in membris, et perfecta vocantur, ex solis stellis et elementis reparari non posse.

Et una suarum rationum est, quod talium animalium generatio est difficilis : et ideo indigens loco in quo projiciatur semen et calescat.

Alia ratio autem est : quia si ita esset, hoc sæpe fieret : eo quod sæpe tales fiunt constellationes. Non autem sæpe percipitur talis generatio : quin potius nunquam percepta est ab aliquo Philosophorum vel hominum, qui diceret se ita factum esse vel aliquod animalium perfectorum.

Tertia autem ratio est, quia cum natura procedit per viam compendii, esset melius ut sine fœminarum et masculorum commixtione hoc modo multiplicarentur animalia, quam per concubitus maris et fœminæ : et non fit hoc.

Adhuc autem objicitur, quod secun-

¹ II Physic. tract. III, cap. 3.

dum hoc nulla esset ratio generationis univoçæ : esset enim æquivoca generatio ante univoçam : et secundum hoc univoçum reduceretur ad æquivocum. Et hoc est contrarium rationi, quod nullo modo potest esse æquivocum quin prius sit univoçum ad quod reducatur, quod oportet univoçum esse ante æquivocum. Talia et his similia inducit Averroes improbens dictum Avicennæ.

Quid veritas habeant opiniones Avicennæ et Averrois ?

Videtur autem mihi, quod utrique secundum aliquid consentiendum sit : quoniam absque dubio in vegetabilium multiplicatione sufficiunt stellæ moventes ad mixtionem elementorum et informantes commixtum ad speciem hanc vel illam. Similiter autem in generatione animalium similium in corpore, sicut sunt serpentes, et vermes, et pisces. Videmus enim quosdam lacus novos fieri, in quibus generantur perse pisces, et vermium multa genera. Et hoc ostendunt animalia nata ex putrefactione, quæ generans univoçum nullo modo habent.

Similiter autem consentiendum videtur stellam posse ad productionem animalium non multum dissimilium, sicut sunt mures, et vespertiones, et quidquid est hujusmodi in animalium generibus : licet enim hujusmodi instrumenta habeant motus, sicut alas et crura, tamen brevia habent et non multum differentia. Sed in perfectorum animalium generatione, sicut leo, bos, homo, nulla videtur sufficere ratio.

Anima rationalis non educitur de materia.

Et quod in homine non sufficiat, constat : quia anima rationalis non educitur de materia, sed datur a datore primo secundum Philosophos : et ideo primæ hypostases hominis a Deo creatæ et formatæ sunt absque omni ambiguitate, quod et in aliis perfectis animalibus et multum dissimilibus dicit Joannes Damascenus.

Averroes autem dicit universale diluvium numquam fore, quod non sit evasio aliqua neque effugium. Unde etiam dicitur in *Timæo* Platonis, quod Nilus et inundatio Nili ab incendio defendit Ægy-

ptum : et a diluvio particulari defendunt altissimi montes : et ideo ab his animalibus quæ remanent, alia disseminantur.

Quod autem de stellis dicitur, illud esse dicit Averroes in animalibus similibus, et in animalibus dissimilibus non dicit esse verum. Quod si figura forte imprimatur a stella alicui corpori vel animali, istud non convalescit ad vitam, sed est mortuum. Lapidés enim figurati figura hominis vel effigie inveniuntur : et similiter monstra quæ non convalescunt : quoniam tamen virtute stellarum fieri est necesse.

Licet hoc autem modo consentiendum utroque istorum Philosophorum, in parte tamen oportet propter hoc quod dicatur univoçam generationem debere præcedere æquivocam. Scimus enim, quod stellæ sunt æquivoca generantia : et tamen sunt prima generantia : quia non generantur in quantum sunt æquivoca, sed potius in quantum conveniunt : formativa enim vis quæ est intrinseca semini, semper est conveniens speciei, et præcedit actum sicut forma confusa et permixta materiei formam distinctam et existentem in actu : et quantum ad eam fit generatio ex convenienti : et de hoc in *Physicis* quædam sunt determinata, et ampliora in libro *Metaphysicæ* dicta sunt.

Per hæc autem quæ dicta sunt, satis patet, quod secundum proprietates istius scientiæ dicendum erit de diluviis aquæ et ignis.

CAPUT XIV.

Et est DIGRESSIO declarans proprietates terræ.

De proprietatibus vero terræ multa in libro de *Natura locorum*¹ sunt dicta, nec remanent in communi dicenda nisi pauca, quod videlicet terra est elementum quod non habet aliquod motum locale virtute stellarum, quemadmodum habent cætera elementa. Et hoc est ideo quia ipsa est ultimum immobile, nec potest participare movere propter distantiam a nobilitate causæ primæ, sicut determinatum est in secundo de *Cælo et Mundo* : sed quia centrum est terra totius mundi, necesse est quod in ipsa uniantur omnes radii orbis stellati cujus ipsa est centrum. Propter quod etiam secundum naturam habet moveri ab ipsa sphæra fixarum stellarum in figuris stellarum fixarum : et quia orbis ille multarum est imaginum, propter hoc terra susceptibilis est multarum figurarum, quæ figuræ variantur ex figura imaginum, et ex modo diversitatis radiorum qui variantur ex ortu et occasu stellarum super terram.

Causa prima multarum figurarum in terra.

Et ideo est, quod terra profert tam multiformes varietates, quod non facit aliquod aliud elementorum in quo radii cœlestes ad unum punctum non colli-

guntur : in nullo enim puncto omnes lineæ ad circumferentiam venientes uniuntur nisi in centro : et ideo radii qui sunt quasi lineæ cœlestis luminis effectum suum fere totum habent in terra quæ est centrum sensibile orbis.

Hujusmodi est etiam alia causa : quia videlicet nullum est elementorum quod reflectat radios omnino nisi terra : aqua enim reflectit aliquo modo, sed non omnino : quia transeunt in profundum aquæ. Terra autem omnino terminat eos in superficie sua, et reflectit eos : radius enim cum non sit in sua virtute nisi ut reflectitur, non potest producere figuras specierum, nisi in terra in qua radii ejus reflectuntur et multiplicantur.

Secunda causa

Adhuc autem humidum receptibile est formarum, sed non retentivum. Siccum autem ut ignis non quiescit ad formas suscipiendas, sed evadit sua mobilitate. Relinquitur igitur, quod siccum immobile sit retentivum figurarum : non autem est receptivum de facili. Et frigida est terra influxa aquis ut mollificetur ad formas et figuras suscipiendas et retinendas.

Adhuc autem humidum fluidum cum suscipit, alterantibus se non resistit : sed terrenum siccum duritia tenet, eo quod naturalem potentiam habet ad non cedendum tangenti et alteranti, cujus molle humidum habet in potentia : et ideo si debent manere formæ datæ per naturam, oportet quod siccum terreum sit recipiens ea sicut subjectum : cui proprie et per se primo a natura imprimuntur. Est autem terra elementum non faciens diluvium neque vaporans per seipsum sine dubio : oportet enim ad minus tantum habere humidum quod sufficiat ad continuationem, et sine hoc redigeretur in pulverem, et non vaporaret, sicut neque cinis : et ideo diluvium habere non potest. *Magna* etiam *mater* dicitur terra propter

Terra, quare dicitur magna mater?

¹ De Natura locorum, tract. 1, cap. 6.

abundantiam terrenæ materiæ in omni composito : quia semina omnium ipsa concipit in seipsa. Necesse est enim, sicut superius diximus, quod in ultimo immobili vis omnium moventium congrege-

tur:etideo in terra est sementotiusnaturæ.

Quod autem consequatur quælibet pars terræ ex longitudine ab Oriente et latitudine ab Aquilone, in libro de *Natura locorum* diximus.



DE CAUSIS ET PROPRIETATUM ELEMENTORUM LIBER SECUNDUS.

TRACTATUS I

DE HIS QUÆ PRÆMITTENDA SUNT DE CÆLO ET SITU TERRÆ.

CAPUT I.

De elementis cælum componentibus.

Nos in hoc secundo libro de *causis proprietatum elementorum* intendimus quæcumque sunt proprietates alterantes naturam elementi explanantes, quæ a quibusdam, licet improprie corruptiones elementorum vocantur : nam calor et fri-

gus possunt accidere elementis præter naturam ipsorum absque hoc quod propter hoc substantia eorum corrumpatur. Qualitates ergo naturales elementorum quas aliquando requirunt explanare intendentes, non inducemus nisi qualitates simplices, quæ nullam faciunt elementi mixtionem, aut non faciunt illam quæ trahat elementum extra substantiam et naturam suam. De mixtione enim in alio libro loquemur : hic autem qualitates quæ ex loco vel ex movente aliquo corpore cælesti exponemus. Hic autem bene facere non possumus, nisi prius consideremus quasdam qualitates elementi nobilis quod est corpus cæleste, manifestantes secundum quas et quot virtutes in genere movet elementa inferiora : ex hoc enim etiam quæ in primo libro dicta sunt, facilius intelliguntur.

Dico igitur, quod necessarium est, quod orbis totius natura aut simplex est, nihil in se habens nisi homogenia quæ

unius formæ et unius dispositionis et virtutis sunt, sicut quælibet pars ignis est ignis, aut est naturæ compositæ habens in se diversa secundum formam et dispositionem. Nos autem videmus oculis nostris, quod orbis non est naturæ unius et unius formæ et dispositionis : quoniam sunt in ipso et spheræ diversæ et partes diversæ : quarum una non est stellata, et altera non suscipit lumen non habens : et talis diversitas formarum et dispositionum non est in eo quod naturæ simplicis et homogenium. Supponimus igitur orbem totum esse compositum ex partibus diversis in forma, et vocemus illas partes *componentia orbem* : quoniam sunt prima secundum rationem componentium orbis rationem. Homogenium enim est, aut heterogenium secundum rationem, et est elementum componens ipsum : et si resolvatur secundum intellectum idem quod est heterogenium in homogenia resolvetur : quod si illa non contingat ulterius resolvere in alia corpora secundum formam, erunt illa vocata elementa illius heterogenii corporis. In cælo autem homogenia ad aliam secundum formam non possunt resolvi : erunt illa ergo quotquot sunt elementa prima orbis ex quibus secundum rationem componitur : quæ ratio est resolutio compositi in simplicia, licet secundum esse non componatur : eo quod est ingenerabile et incorruptibile, sicut alibi ostendimus. Illa ergo elementa sunt unum, aut sunt duo, aut sunt tria, aut sunt plura secundum aliquem numerum determinatum : quoniam nihil componitur ex infinitis quod finitum est, sicut ostendimus in *Physicis* ¹, et in primo de *Cælo et Mundo*.

Dicamus igitur, quod si nos prima componentia orbem quæ elementa vocantur, investigare volumus, dicemus quod substantia per se lucens alia est se-

cundum formam ab illa quæ non per se, sed per aliud lucens efficitur. Adhuc autem utraque istarum est alia ab illa quæ nullo modo illuminatur ad hoc quod luceat. Istæ enim variationes tres sunt in omni spheræ : et illa compositio ex his tribus est primorum elementorum orbis.

Nos autem dicimus ex his quæ in *Cælo et Mundo* probavimus, quod substantia corporis solis secundum hoc alia est a substantia corporis stellarum et lunæ secundum formam et dispositionem : cujus probatio est, quia cum sol dictus sit, eo quod solus luceat, habens lumen ex se. Luna autem et cæteræ stellæ non habent lumen ex se, nisi quod eis sit acquisitum ex sole, sicut ostendimus in aliis locis libri *Cæli et Mundi* ². Licet autem stellæ omnes recipiant lumen a sole, est tamen in eis magna diversitas : quoniam luna magis est de natura terræ : et ideo apparet in ea umbra, quod non fit in aliis stellis : quia stellæ non figurantur figuris lunæ in luminis receptione, propterea quia super solem sunt positæ. Et ideo superficies una est, et ad solem et ad nos conversa quæ semper est illuminata. In Venere autem et Mercurio, quæ stellæ sunt secundum plerosque sub sole, propter hoc non contingit, quod nec sunt in viis quæ directe vadant sub sole : et quia soli sunt propinquæ et a nobis remotæ : si enim essent in via quæ directe vadit ad solem, eclipsarent aliquando solem, quod numquam contingere potest. Adhuc autem quod prope solem sunt, statim replentur lumine solis : et quia remotiores sunt a nobis, sunt priora luminaria quam luna : et ideo per totam suam substantiam lumine penetrantur a sua superficie in superficiem per centrum corporum suorum. Et ideo in quacumque parte attingit in luna propter suam naturalem opacitatem et terrestreitatem : hæc enim licet lumen in profundo sui reci-

Sol quare
sol dicitur ?

¹ III *Physic.* tract. II, cap. 10.

² I de *Cælo et Mundo*, tract. III, cap. 6.

piat; tamen non penetratur lumine : sed profundatur in ipsa usque ad medium centrum ipsius. Et in hoc concordant excellentes in philosophia viri Aristoteles et Ptolemæus, et Avicenna, et Messalach, et plures aliorum. Hæc igitur duo elementa sunt diversarum formarum, quæ in primis componentibus cælum inveniuntur.

Apparet igitur manifeste, quod substantia orbis corporis stellarum et lunæ, alia est a substantia corporis solis : sicut enim candela speculum illuminat per substantiam luminis quod est in ea, et hoc recipit speculum per substantiam et formam et perspicui terminati quod est in eo, et est illa substantia candelæ, sicut oportet aliam esse substantiam solis illuminantis et lunæ et stellarum quæ illuminantur, in qua tamen similitudine hoc dicere est : quia speculum non accipit lumen nisi in superficie diaphani polito quod exstinctum est et terminatum non traducens visum : sed stellæ et luna recipiunt lumen in sui profunditate, sicut ostendimus in secundo *Cæli et Mundi*. Ex dictis igitur manifestum est aliam esse substantiam solis, et aliam lunæ, et aliam stellarum.

Ex simili autem ratione probatur, quod substantia orbis non stellata est alterius substantiæ secundum formam quam sint stellæ et luna : quoniam quamvis pars non stellata illustretur a stellis et luna, ipsa tamen non retinet in se lumen sicut luminare, sed recipit ipsum sicut aer et quodlibet aliud diaphanum per quod transit lumen, et non remanet in ipso : propter quod stella tegit et occultat quod post eam est, sicut luna quæ tegit solem aliquando et stellas frequenter. Pars autem orbis non stellata nihil tegit eorum quæ post ipsam sunt, sed visus transit per ipsam, sicut per aerem vel aliud diaphanum : aliter enim oporteret quod nullam sphaerarum superiorum videremus, sed tantum sphaeram lunæ, quod oculis experimur esse falsum. Est igitur alterius substantiæ pars orbis non stellata

a luna et stellis secundum formam et proprietatem. Et per eandem rationem probatur eadem pars non stellata esse alia secundum substantiam a sole, quando sol per se lucet et tegit id quod post se est et terminat visum.

Per ista igitur principia et inquisitionem, manifestum est totum orbem esse trium substantiarum primarum, quæ quia prima componentia sunt, vocantur elementa tria quæ componunt orbem, sicut similia membra componunt ea quæ sunt dissimilia : et sol est in ista compositione per se substantia, et luna cum stellis substantia per se, et pars orbis quæ non est stellata est substantia per se, et habet orbis partes posteriores quæ specie differunt, sicut diximus in secundo *Cæli et Mundi*. Sed istæ tres substantiæ sunt primæ secundum naturam in orbe, et ideo elementa vocantur. Si autem communis natura nominamus orbem secundum quam est substantia ingenerabilis et incorruptibilis, non existens in potentia nisi ad motum localem, tunc omnia hæc tria quoad hoc erunt unius substantiæ et naturæ in communi : et si illa dicatur elementum, tunc orbis erit totum elementum unum quod quintum dicitur distinctum ab aliis quatuor. Quia licet orbis non immisceatur elementatis per substantiam et esse, tamen agendo commixtionem ipse est primum agens cujus virtus non est in eis quæ commiscantur : et quoad ad hoc convenit ei elementi definitio, quod est ipse primum in positione : et si resolvatur elementatum non in substantias commixtas, sed in virtutes quas habet mixtum, erit in eo inventa virtus primi orbis.

Sic igitur distinguendo ab elementis quatuor orbem, vocatur elementum quintum : quia differt ab eis natura suæ formæ et in genere suæ materiæ et potentiæ : quod qualiter sit, in fine *Physicorum* est explanatum. Nos enim non dicimus levem eum esse simpliciter, ita quod sit ignis : nec gravem simpliciter, ita quod sit terra : et constat per se cuili-

bet, quod non est levis ex comparatione ut sunt media elementa. Si enim esset ex aliquo horum elementorum, vel aliquod ipsorum, esset generabile vel corruptibile, ita quod hoc totum aut secundum partem cadens sub generatione et corruptione: et hoc non est inventum in eo: sed potius creator summus cœli et terræ dominus posuit eum, ut per motum suum sit causa generationis et corruptionis, sicut nos in fine secundi *Peri geneleos* ostendimus. Tantum igitur dictum sit de numero elementorum orbis.

CAPUT II.

De infinitate mundi.

Quantitatem autem corporum cœlestium scire non possumus hic in libro isto: quoniam quantitas ipsorum scitur ex quantitate diametrorum ipsorum: et hoc in astronomia investigabitur, ubi etiam determinari debet proportio stellarum ad invicem: quoniam omnes habent reduci ad sex quantitates. Et ibidem determinabitur quantitas revolutionis uniuscujusque orbis, et quanta sit egressio linearum ejus a centro mundi: et inducentur super hoc syllogismi certi et demonstrativi descripti lineis visibilibus. Jam autem nihil aliud volumus exponere de orbem nisi quod diximus de primis componentibus ipsum.

Quia igitur jam diximus quod volumus dicere de natura orbis, tunc contradicamus his qui dixerunt orbem infinitum secundum ultima. Jam enim ostendimus in *Cœlo et Mundo*¹, quod quatuor elementa, scilicet terra, aqua, aer, et ignis, sunt finita secundum ultima: habet enim unumquodque eorum extremitatem ultimam in loco deorsum circa terram: et hoc patet ad sensum. Quidquid autem naturalium corporum habet extremitatem unam, habet et secundam qua finitur in altera sua parte. Videmus autem terram terminatam esse superficie finita in convexo, et aerem et aquam videmus terminari superficiebus finitis in concavo. Ergo quodlibet corporum istorum finitur etiam in altera parte in concavo vel in convexo: quia aliter esset imperfectum: vel nihil sociaretur ei in loco, sed occuparet usque in infinitum. Quidquid autem clauditur inter duas extremitates, quarum una est concava, et altera rotunda, sive convexa, est finitum. Ergo hæc elementa sunt finita: et cœlum cujus concavum videmus esse finitum. Dicit autem adversarius cœlum non esse finitum, neque elementa esse finita: et hoc esse est impossibile quod non convenit esse in corpore naturali.

Amplius autem quæramus ab eis, utrum elementum quintum sit motum, vel quietum? Non autem potest dici quod sit quietum: quia hoc est contra sensum, et contra ea quæ probata sunt in *Physicis* et in libro *Cœli et Mundi*: sed est motum motu circulationis, et revolubilis vocatur: talis autem motus est super medium quod est centrum, et super duos polos, polum scilicet Meridianum, et polum Septentrionalem. Oportet igitur concavum suum perficere in quodam tempore circulationem circa centrum. Sed quando concavum perficit unam circulationem, tunc etiam circulationem majorem circa idem centrum perficit conve-

¹ III de Cœlo et Mundo, tract. II, cap. 2.

xum. Ergo in eodem tempore perficitur utriusque circulatio. Quod autem in quodam tempore finito perficitur circulatio, est finitum. Ergo tam cœli convexum quam concavum est finitum : et hoc sequitur ex hoc quod est ei medium centrum : hoc enim clarum est per sensum. Oportet enim tunc, quod sit ei concavum et convexum revolutum circa illud, quæ sunt ejus extremitates. Omne enim quod habet duas extremitates, oportet quod sit locatum et finitum per locum. Cœlum autem ultimum licet sit locus omnium, tamen refertur ad locum per hoc quod movetur secundum locum finitum, sicut diximus in fine sexti *Physicorum*. Planum igitur est mundum habere medium : et omni ei cui est medium quod est centrum, sunt duæ extremitates concavi et convexi : omne autem cui sunt duæ extremitates, est habens finem : et omne id cui est extremitas una, eidem etiam est extremitas alia : patet ergo ex dictis, quod mundus est finitus : et per consequens manifestus est error ejus qui mundum dixit esse infinitum.

Licet autem hoc probaverimus in libro *Cœli et Mundi*, tamen oportuit nos brevem ejus hîc probationem inducere : quoniam si mundus esset infinitus, non esset aliqua proprietas causata in uno elemento ab alio : quia infinitum nec agit, nec patitur, sicut alibi probatum est.

CAPUT III.

De improbatione erroris eorum qui dixerunt terram esse magis in Meridie quam in Aquilone.

Deinde oportet nos quærere de terra, utrum ipsa sit in centro hujus corporis ? Dixerunt enim quidam Antiquorum, quod latus terræ Meridianum est elevatum, et latus Septentrionale depressum a centro et contractum, ita quod pars Meridiana est propinquior polo Meridionali, et pars Aquilonaris est longior quam sit diameter : et pars lineæ quæ est intra polum ex parte Meridiei, sit major quam semidiameter sphaeræ. Et signum hujus dicunt esse auctoritatem Antiquorum.

Dixerunt enim quod aliquis regum Antiquorum cui fuit sollicitudo de bono communitatis, voluit facere alveum profundum continuantem inter duo maria, mare Rubrum videlicet, quod est mare Ægypti, et mare expansum sive Magnum, quod est mare terræ Romanorum, et Arabice vocatur mare Sceny : ut esset per illud canale navigatio continua ex terra Romanorum in terram Aidrantho, et ad terram Jamen quæ est Indiæ, et e converso ex parte Jamen terra illarum ad terram Romanorum : et transierint naves continue ad mare Persicum quod continuatur ad duas insulas quæ vocantur Daldi et Alcausæ, et ad terras quæ sunt illic : et esset per illud multum allevatum studium negotiationis. Cum autem hoc cogitaret perficere rex, quidam

geometer prohibuit eum: et conveniunt sapientes in hoc quod prohibitio ejus fuit propria et conveniens: quia dixerunt per instrumentum illum sapientem accepisse altitudinem maris Rubri quod est ad Meridiem, et etiam altitudinem maris Magni quod est ad Aquilonem. Accepit autem per quantitatem diametri quæ fuit inter superficiem maris et aliquod corpus cœleste: quia si ipse accepisset profunditatem maris nihil operatus fuisset ad propositum: quia ex hoc quod unum mare est altius alio secundum profunditatem, non causatur hoc quod unum fluat in aliud totum: sed quia si fundum unius maris et aqua elevatur super fundum et aquam alterius, tunc altius fluit in id quod est inferius si non habeat obstaculum. Quia ergo inventum est per considerationem mare Rubrum elevari super mare Magnum per quadraginta stadia secundum quod stadium ponitur esse octingentorum cubitorum, fuit fundus maris Rubri multo altior fundo maris Magni. Et ideo fluxisset mare Rubrum totum in mare Magnum, et submersisset civitates quæ sunt super littora maris Magni ab utroque littore et fuisset submersa Alexandria, et Damath, et Tunis, et Alpharme, et Creta insula, et Corsica et Majorica, et Sardinia, et aliæ insulæ maris Magni, quæ sunt circiter quadraginta septem insulæ: et sic submersio fuisset bonarum regionum. Postquam igitur ille sapiens exposuit regi tantum nocumentum, cessavit ab intentione sua. Hac igitur freti auctoritate dicunt esse altiorem terram in Meridie quam in Aquilone.

Contradicamus autem his sermone certo et sermone geometrico dicentes, quod si alveus fossus esset de mari Rubro in Magnum mare, exiret tantum de aqua ex mari Rubro quod inundaret super littora maris Magni, ut dicit adversarius: sed alveus fossus a rege non fuisset latior et profundior alveo Nilii, quod tamen veniens a Meridie intra in mare Magnum, et influxit in ipsum mul-

tis annis, et multis etiam millibus annorum. Quæramus ergo an Nilus ex tot annis addidit mari, et præcipue quando magnificatur et inundat quando sol est in Capricorno, an quando incipit recedere a Meridie et venire in Aquilonem? Constat autem, quod dicere non possunt, quin magnam in mari Magno fecerit additionem, et multo majorem quam fecisset canale quod voluit fodere rex. Si ergo verum esset quod dicit adversarius, destructæ essent multæ insularum superius nominatarum.

Amplius autem cum ex parte Orientis et Meridiei ex Oceano continente mare Magnum ingrediantur plurimæ aquæ, et similiter ex parte Occidentis, deberet magna submersio diu cecidisse in mari Magno: nihil autem talium umquam vidimus. Manifestum est igitur, quod contrarium dicti adversarii, quod confirmavit per magnum sapientem qui mensuravit terram, est verum.

In hac autem opinione non fuerunt nisi habitatores Ægyptii et regionem per quas fluit Nilus: et causa fuit erroris, quod viderunt quod aqua omnis fluit ad declinationem: quia Nilum viderunt venientem a Meridie in Aquilonem, et putaverunt partem Meridiei esse altam, et partem Aquilonis esse declivem: et hoc fuit signum fallax: quia secundum hoc etiam pars Aquilonaris esset alta, et Meridionalis pars esset declivis. Secundum hoc enim habitantes super ripam Tigridis et Euphratis, qui sunt venientes ab Aquilone in Meridie et cadunt in mare Persicum, deberent dicere partem Aquilonis esse elevatam, et partem Meridie esse depressam. Exitus enim Tigridis de monte Armeniæ ad Aquilonem, et exitus Euphratis est ex terra Abbassar quæ est in India: et casus eorum est mare Persicum. Simile igitur ejus quod docuerunt accidere in Magno mari, oporteret quod accideret in mari Persico ex fluxu Tigridis et Euphratis, et multitudine aquæ eorum. Numquam autem hoc accidit. Quare autem maria non redundant ex introitu multo-

rum fluminum, diximus in libro *Meteororum*¹.

Ex dictis igitur satis manifestum est, quod error est dicere terram esse elevatam in parte una, et depressam et contractam esse in parte altera. Est enim

centrum mundi, sicut probatum est in libro de *Cælo et Mundo*², et continetur secundum æqualitatem in medio existens ex omni parte æqualiter aerem cum superficie aquæ convèxa et superficie ignis concava.

¹ II Meteororum, tract. III, cap. 11.

² II de Cælo et Mundo, tract. III, cap. 11.



TRACTATUS II

DE CORRUPTIONIBUS ELEMENTORUM.

CAPUT I.

De corruptione aeris ex vapore inferiorum.

Postquam autem præmisimus quæcumque sunt necessaria ad elementorum corruptionem sciendam, tractemus nunc de elementorum corruptione. Quatuor enim elementa corrumpuntur secundum suas qualitates quæ sunt terra, aqua, et aer, et ignis. Sentimus enim aliquando corruptionem in illis: aer enim aliquando plus quam debet, infrigidatur, et aliquando plus quam debet, calefit: aliquando autem plus quam natura exigit, humecta-

tur: et aliquando exsiccatur plus quam oportet. Similiter autem et aqua plus quam debet infrigidatur et calefit. Accidit autem aquæ aliquando dulcedo, et aliquando amaritudo, et salsedo, et hujusmodi. Sed de his non tractabimus hic, eo quod non accidunt aquæ simplici, sed commixtæ cum aliis elementis. Terra autem et plus quam debet, infrigidatur et calefit, et alias recipit corruptiones. De omnibus autem tractandum est, ut sciatur causa illarum corruptionum. Quia autem ignis non recipit corruptionem aliquam, eo quod caliditate intensiva omnem consumit corruptionem: et ideo dimisso igne qui est elementum supremum in loco, et primum de aere dicamus.

Corrumpitur autem aer dupliciter: Aer dupliciter corrumpitur. aliquando videlicet ex inferiori invenenante et corrumpente ipsum: aliquando autem ex superiori corpore aliquo cœlesti corrumpente ipsum. Ex inferiori quidem, sicut ex spiritu animalium venenosorum, cui corruptioni similis est quæ est ex vapore venenoso, vel ex cadavere, vel ex palude, vel ex aliquo alio resoluto, cujus unum intellectum subjiciemus ad intellectum omnium aliorum. In diebus enim

Philippi regis Macedoniae, qui vocabatur Philippus audens, et fuit Philosophus, et praecipue Astronomus, et erat pater Alexandri magni, fuit via inter duos montes Armeniae minoris, quae diu erat salubriter a multis transeuntibus frequentata: subito autem accidit ex veneno aeris nullum posse transire per viam illam, quin in monte exspiraret et caderet mortuus. Philippo autem interrogante causam a sapientibus, causam reddere nesciverunt, donec vocatus fuit Socrates qui regem fecit erigere aedificium altum ad montium aequalitatem: et fecit Socrates speculum de chalybe planum, non convexum, neque concavum, sed plana superficie bene politum et bene mundum, ut plene ad planum speculum ab omni loco montium fieret reflexio, quod non posset fieri ad convexum, quoniam non fit reflexio ad convexum nisi a distantia et oppositione determinata. Ad planum autem ab omni loco subtus scilicet et ex opposito fit reflexio: et exsultant in eo res secundum propriam ipsarum quantitatem. Speculum autem illud planum loco montis opposuit, et in eo vidit duos dracones, unum in uno monte, et alium in alio monte, magnos secundum genus suum. Est enim serpens cubitalis qui *draco* vocatur, et habet morsum et venenum mortiferum: quod si fuissent dracones maximi, sicut quidam fingunt, quod dracones sunt majora animalia quae inveniuntur, bene vidisset eos Socrates sine speculo. Hi autem dracones aperuerunt ora contra se invicem, et infererunt aerem in medio ex vapore ventris sui, qui egrediebatur ex orificiis eorum: et dum sic contemplaretur, quidam equites ignari periculi transeuntes ceciderunt de bestiis mortui ex veneno diffuso in aere. Et ex hoc scivit, quod infectio causabatur ex vapore resoluta de ventribus draconum: et hoc festinanter regi nuntiavit. Praecipit autem rex, quod quidam tecto ore et naribus et omnibus poris per quae poterat attrahi aer infectus, exiret, et interficeret dracones: quibus

interfectis salvatus est locus, ita quod amplius non accidit in eo quod acciderat: et miratus est rex de industria et sapientia Socratis. Corruptio autem aeris illa fuit ex vapore resoluta ex draconibus.

Sicut etiam inficitur aqua ex corruptione jusquiami, quando projicitur in lacunis vel fluminibus. Quando enim putrescere incipit jusquiamus, tunc inficit aquam: et oppilativa efficitur, ita quod pisces et alia animalia aquatica nituntur exire de aquis, et errant in aquis quasi sint ebrii. Hoc tamen in aere plus accidit: quia aer propter naturalem calorem suum plus corrumpitur quam aqua, quae frigiditate sua restringit aliquantulum, et non sinit ita cito et vehementer putrescere. Haec autem herba triplicis coloris esse consuevit in radice: haec est nigra, rubra, et alba. Et flos niger quasi respersus est sanguineo colore. Flos autem rubrae citrinus est, et flos albae est albus. Et nigra est quae effectum habet: quia, ut dicitur, efficaciter operatur: et post haec rubea. Alba autem forte hoc non facit, nisi sit multa quantitas ipsius: est enim frigida vehementer et sicca, et est venenum et destruit rationem et memoriam, et facit praefocationes vehementes. De hac herba dicitur, quod quando radix ejus in cinere calido et ferventi involvitur, tunc fumus in alto levatur, qui si venerit ad pullos in alto sub tecto residentes, cadunt ac si sint mortui, qui postea convalescunt.

Jusquiamum inficit aquam.

Et oportet scire, quod haec corruptio aeris multo longius dispargitur quam possit extendi vapor resolutus: qui non extenditur multum, eo quod fumus non potest tantum rarefieri: sed odor et corruptio cum odore ad longinquas partes inficit aerem: si enim camphora in aqua distemperetur, forte sentitur odor ejus in aqua ad latitudinem trecentorum cubitorum, cum tamen substantia camphorae per trecentos cubitos extendi non possit, quamvis ad raritatem ignis materia illa forte perveniret.

Alia est causa corruptionis quæ de cadaveribus resolvitur per foetorem : vincuntur aliquando aves per quingentas leucas sensisse, et illuc advenisse : ut ibi infra quingentarum leucarum spatium ante numquam visæ sint : propter multitudinem cadaverum quæ in terra illa post cædem quamdam ceciderunt ex hominibus et equis : ad quod spatium nulla evaporatio fumalis posset extendi etiamsi ad ignis raritatem (ut diximus) perveniret. Sed oportet scire quod odorifera et foetida dupliciter inficiunt, scilicet ex substantia evaporativa et fumosa, et ex foetore qualitativo. Et primo quidem modo incipiunt de prope, et forti infectione. Secundo modo inficiunt alterando solum et longe multum in locis, ubi numquam fuit aliquid de fumali evaporatione ipsorum. Sicut autem diximus de jusquiamo corrumpente aquas, ita etiam operatur linum, licet minor sit lini quam jusquiami. Et propter hoc etiam moriuntur pisces in lacunis parvis quando putrescit in eis linum. Hæc autem corruptio in aere longius spargitur, et abundat præcipue in Africa, sicut diximus in libro de *Natura locorum*. Ex his igitur et similibus sunt corruptiones aeris creatæ ex inferiori.

Linum corrumpit aquas.

Corrumpitur autem aer aliquando ex causa cælesti. Conjunctio enim duarum præcipue stellarum, quæ sunt Jupiter et Mars, cum aliis coadjuvantibus in signo Geminorum, quod est triplicis aereæ, faciunt ventos pestilentes, et aeres corruptos, qui subito necant multitudinem hominum et animalium : sicut ventus fuit qui in Dremoth interfecit exercitum unum subito. Jupiter enim cum calidus et humidus sit in natura, habet elevare ventos et vapores, et præcipue in signo Geminorum, quod est signum calidum et humidum in ultimo statu naturæ aeris. Mars autem cum sit intemperate calidus et siccus, ignit vapores elevatos : et incipiunt per aerem multiplicari fulgura et scintillationes et pestiferi vapores et ignes,

et veneno peracuto inficiunt aerem : et ideo inducunt frequenter pestilentias.

Aliis etiam de causis similibus accidit aeri superflua siccitas, quæ acuit humores generatos in hominibus : et ideo habitatoribus illius aeris accidunt ægritudines pravæ et pestilentia mortifera. Prius enim inficit aer corruptus quam cibus corruptus vel potus, sicut dicunt sapientes medicorum : eo quod aer corruptus non alteratus transit ad pulmonem et ad cor, et per poros occultos in corpus totum. Cibus autem et potus ad interiora vitalia non pertingunt, nisi alterata per decoctiones et digestiones.

Hæc igitur de corruptionibus aeris dicta sunt a nobis.

CAPUT II.

De corruptione aquæ per calorem thermarum.

Quoniam autem præmissus sermo de corruptionibus aeris habitus est, tunc consequens est, ut de proprietate qua corrumpitur aqua secundum qualitatem dicamus : quoniam de saporibus ejus aliquid erit dicendum. Loquamur igitur de causa thermarum physice : hoc enim ad nos pertinere videtur : eo quod antiqui naturales de eis loqui tentaverunt. Dicemus autem terminantes in universali quantum sufficit huic inceptio, quoniam thermæ singulæ proprias habent passiones et accidentia, de quibus lon-

gum esse dicere : nec hoc pertinet ad hoc negotium : quia non accedit aquis in quantum calidum tantum, sed in quantum sunt sulphure permixtæ, vel aliquo alio hujusmodi.

Primo autem oportet scire, quod *thermæ* in Græco idem sonat quod *calida* in Latino. Et ideo hic suscepimus dicere quare quædam aquæ calidæ de terra egrediuntur. Milesius autem qui Romæ fecit observationes astrorum, et fuit de antiquis Italicis Philosophis, conatus est dicere causam in qua multi sunt secuti eum. Dixit autem, quod causa caloris thermarum est, quod vapor et ventus includuntur in concavitatibus terræ, qui vapores calidi sunt, sicut apparet in hyeme : quia illi calefaciunt aquas fontium et puteorum : ergo tales vapores in aquatilibus locis magis calidi sunt quam in aliis : et in concavitatibus a superficie terræ solida reflectuntur in aquas et calefaciunt eas : et ideo calidæ egrediuntur. Nos autem contra hoc dicimus dictum Milesii esse inconueniens : quoniam vapor ille in aquas reflexas est localis et finitus et aquæ permixtus : quod autem aquæ permixtum est, egreditur cum aqua : ergo finibilis est vapor ille : et tunc deficit calor in aqua. Videmus autem non deficere calorem in aqua. Ergo ex tali causa fuit causatus : et tunc Milesii dictum non habet veritatem.

Remphilus. Remphilus autem quidam Philosophus causam contrariam Milesio visus est dicere, in qua etiam multi crediderunt ei. Dixit enim terram in loco thermarum subtus esse raram, et non conjunctarum partium, et non mollis in fundo, sed duri corticis in superficie : quia aliter retinere calorem non posset. Solis autem radios dixit continue terram perurere : et hanc adustionem in visceribus terræ congregari et adunari dixit in locis raris et mollibus quæ duras habent superficies. Et ideo in locis illis aquas quæ forte manant, caleferi et emanare calidas. Nos ratione geometrica utentes contra hæc dicimus, quod sol tantum declinat in cir-

culo declivi a quolibet loco in quantum accedit ad ipsum, sicut patet consideranti quantitatem declinationis solis in Meridie et in Aquilone æqualiter per lineas umbræ ipsius solis in instrumentis geometriæ. Ergo si calefacit aliquem locum in æstate, eundem refrigerabit et in hyeme. Si ergo propter calorem solis in terra congregatum aqua calefit a calore loci, tunc vel in toto diminuetur, vel in toto deficit calor ille in hyeme. Et nos contra illum invenimus : quia aquas thermarum æqualiter invenimus calidas in temporibus quatuor, hyemis videlicet, et autumnii, et veris, et æstatis, et forte in hyeme sunt intensioris caliditatis quam in æstate. Ergo sermo Remphili est inconueniens et falsus.

Democritus autem dixit quod causa caliditatis hujus aquæ est, quia in montibus per quos transeunt istæ aquæ, sunt magni montes calcis : et calx habet poros non rectos, sed tortuosos in quibus diu retinet ignem, cui cum superfunditur aqua, transiens per calorem, illa sonat quasi exstinguatur ignis in ea et calefit aqua : et ideo egreditur aqua calida ad superficiem terræ. Et quod sonus exstinctionis non auditur, hoc ideo est, quia in ventre terræ est, et exterius audiri non potest. Ignis autem qui est in ventre terræ, ibi secundum Democritum generatur ex confricatione vaporum et venti ad materiam sulphuris vel anast albi, et comburit lapides montis in calcem : et hæc est una causa generationis calcis sub terra, sicut dicebat Democritus.

Alia autem causa est, quod calor solis in terra unctiosa et glutinosa aliquando per frigidum circumstans comprimitur in ventrem montis : et tunc comburit eam in calcem, et aliquando in carbones saxeos : quoniam si vincit in toto humiditatem et extrahit eam, tunc convertitur in calcem. Si autem non in toto vincit, sed dividit tantum et adurit, tunc vertit in carbones : et quales sunt carbones qui inveniuntur juxta civitatem Laodicensem

in magna quantitate. Hæc igitur est causa quam assignavit Democritus.

Contra Democritum.

Huic autem sermoni contrarium videtur esse. Calx non calefit nisi alterata assata igne calido, et posita in ipso diu : et tunc caliditas locata in ea egreditur et facit aquam calidam quando superinfunditur ei, et finitur caliditas illa post modicum tempus in quo potest exstingui ignis qui est locatus in calce : et tunc deberet finiri caliditas aquæ. Et hoc nos non videmus, sed potius invenimus eam caloris esse perpetui.

Adhuc autem licet nos dixerimus qualiter ignis devenit in montem quem comburit in calcem, quod Democritus non dixit : et ideo non ostendit qualiter ad calcem quæ est in ventre montis, pervenit ignis. Sic ergo error et insufficientia sequitur ex sermone Democriti.

Opinio Doctoris.

Quia autem jam per ante dicta manifestatur falsitas quorundam Antiquorum in causa thermarum, volumus nunc dicere sermonem qui rectus est et applicabilis intellectui ad comprehendendum.

Dicamus igitur, quod aqua illa currit super mineras sulphuris incensas : et propter id calefit et egreditur calida. Signum autem hujusmodi est, quod odor sulphuris semper invenitur in aqua thermarum : et aliquando invenitur etiam in ea sapor sulphuris ex sulphure aquæ mixto. Sulphur enim de facili accenditur sub terra vel vapore vel ex motu vaporis terrei : sicut generatur ignis in nube vel ex motu et confricatione venti ingressi per concava aliqua in terram : vel etiam ex hoc quod comprimitur calor qui impressus est terræ a radiis solis ad unum locum per circumstans frigus : et tunc inflammat mineras in illo loco inventas, sicut diximus superius, et tunc calescit ignis in materia sulphuris, et materiam unctuosam, et aquam manantem per ipsam calefacit : et ideo caliditas egreditur.

Nota experimentum de sulphure.

Si enim carbo candelæ accensæ et exstinctæ recipiatur antequam in toto mortificetur ignis, et sulphur tenuiter desuper informetur et pulverizetur, flammam dat

sulphur. Similiter autem fiet si gluten per motum luti cum naphtha et sulphur dispergatur : et intingatur in eo licinium et accendatur, comburitur quasi inextinguibiliter : est enim naphtha quoddam genus bituminis in Persia inventum quod magnæ est adhærentiæ, et habet glutinosam et viscosam pinguedinem, et est sicut amurca olei : et quando commiscetur cum sulphure, fit inflammabile : cujus ignis adhæret miro modo ei super quod projicitur : et non potest exstingui nisi totum simul operiatur. Alius est modus exstinguendi, ut dicitur, et est per projectionem urinæ super ipsum. Aqua autem non exstinguit ipsum de facili : quia aqua non intrat ipsum, nec adhæret ei propter pinguedinem : et talis est materia per quam transit aqua thermarum calida. Qualiter autem ignis generetur in ipsa, in sequenti capitulo ostenditur : quia una causa est accensionis in materia illa, et in materia Vulcani.

Sed movet forte aliquem quare illa materia non consumitur ab igne, et sic aqua refrigescat ? Sed hujus causa est in aliquo loco regeneratio continua materiæ. Sulphur enim et naphtha facilius sunt generationis in loco minerali : et compertum est aquam pluvie descendente sub monte, et fundamenta thermarum statim in naturam sulphuris et naphthæ converti : et cum sic continue regeneretur accessus, in ea non exstinguitur.

Et est advertendum, quod circa loca talia, quod sæpe locus unde emanat aqua illa, ita profundæ est voraginis, quod si immittantur longissima ligna, ea in se trahit infra parvum tempus, ita quod videri non possint : quod procul dubio facit calor qui ad se trahit ea quæ tangit : et ideo ligna talia absorbentur. Et hujus signum est, quia circa foramen ebullitionis hujusmodi aquæ fit stagnum parvum de eadem aqua : et longum gracile quod bene possit capi a foramine in stagno illo, trahit ipsum in foramen, et absorbet ipsum. Si autem aliquando frigida

aqua facere inveniatur, contingit hoc quod aqua remouet dum trahit ipsum ad foramen nisi infigatur in foramen : et si mergitur lignum et absorbetur a foramine, hoc contingit ideo, quia foramen est amplum et rectum usque ad terræ concavitatem unde manat aqua : et aqua non est tanta, quod possit ponderositatem ligni portare, neque spiritus expellens aquam de foramine est fortis : et tunc paulatim mergitur.

Objicitur autem ad hoc, quod multi mirantur, quod frequenter inveniuntur duo foramina prope iuxta se posita, quorum unum eoumit aquam frigidam, et alterum calidam : et causa hujus est, quia licet foramina exteriora sint propinqua, tamen interiora quæ sunt thesauri aquarum, distant a se inuicem : et ideo contraria in frigore et calore est aqua quæ egreditur in hyeme etiam quando pori terræ per frigus sunt constricti, et nihil potest evaporare de calore aquæ. Inuenitur aqua thermarum in hyeme calidior quam in æstate, licet semper habeat calorem et in hyeme et in æstate : et ideo etiam quando bene operitur, longe ducitur calida : quia de calore sibi impresso tunc quasi evaporare potest. Est autem hæc aqua desiccans uehementer propter sulphur quod in ea est : et ideo scabiosi et epileptici aliquando intrant in ea, et conuenit eis ad sanitatem recuperandam.

CAPUT III.

De causa Vulcani.

Similis autem causa est Vulcani qui est in monte Siciliae, qui uocatur Etna, et est semper mare Magnum quod Arabes mare Sceny uocant. Est similis illi Vulcanus in multis locis : fuit enim unus in provincia Seruit, qui ex igne quem super eum pastores fecerunt, multis arsit annis, et postea est exstinctus, sicut Etna fere temporibus nostris est exstinctus. Similiter etiam iuxta Leodum mons ardens, in cuius rimas quando pluuia distillat, eleuatur ex eo fumus sicut ex fornace, et omnes ardent : ex eadem causa, nisi quod illi qui sunt iuxta mare, facilius ardent et diutius : causa enim materialis est terra sulphurea et permixta cum unctuosa naphtha, et efficiens est uapor commotus in terra et exire non potens : et quia per os terræ et foramina obstruit aqua maris, ideo citius accenditur iuxta mare quam alibi : et tamdiu ardet, quamdiu non est consumpta materia : et forte ardet ad multos annos, uel in perpetuum, si materia continue regenerari contingat. Et quia in quibusdam lapidibus multa naphtha imbibita est, quando combusti sunt, remanent multum porosi et leues, et natant super aquas, sicut facit pumex. Tantum ergo dictum sit de causa thermarum et Vulcani : ex quo etiam constat non ueras esse causas quas dixerunt Milesius et Remphilus Philosophus et Democritus.

CAPUT IV.

De improbatione erroris eorum qui dixerunt montes et valles non causari e cavatione aquarum.

Hinc autem de proprietatibus terræ erit dicendum quantum sufficit huic inceptioni. Multa enim de his dicta sunt in libro de *Natura locorum*¹ et latitudine eorum : sed hic tantum proprietatem illam quam figura terræ videtur recipere, oportet nos explanare. Et hæc est causa montium et vallium.

Dixerunt autem quidam antiquissimorum Philosophorum, quod causa montium et vallium non fuit nisi commotio aquarum. Terra enim, inquiunt, in principio suæ compositionis fuit rotunda levis superficiei super corpora cælestia, non habens aliquos montes vel valles : sed mare et diluvia fecerunt montes : mare enim quod non semper stat uno loco, sed mutatur de loco ad locum, ut inquiunt, cavaret loca rara et mollia : et quod erasit et alluvione abstraxit, addit locis aliis. Et ideo loca rara cavata sunt facta loca fluviorum et marium : et factæ sunt foveæ et valles. Loca autem quibus facta est additio, facta sunt montes. Similiter autem aqua diluvii per motum undarum alluvione cavavit, et fecit foveas et

valles, et abrasum addidit aliis locis : et ibi facti sunt montes. Qui autem sic dicunt, in idem consentiunt cum eis qui confitentur mare mutari secundum motum aliquem sphaeræ cælestis : et his jam contradiximus in libro superiori hujus scientiæ, et improbavimus opiniones eorum ibi : et ideo disputationem illam non dicamus hic. Sed illis contradicere volumus ad propriam positionem ipsorum per rationes fundatas super signa sensibilia, et super geometricas demonstrationes.

Dicamus igitur, quod si aqua cavavit terram, aut hoc fecit aqua pluviae descendens ab aere, aut hoc fecit aqua stans super superficiem terræ. Si autem hoc dicatur fecisse pluvia : et cum dicatur a principio suæ compositionis et creationis fuisse rotunda in qua nec fuit mons, nec vallis, oportuit secundum istos, quod tota esset versa sub aquis et inducta aquis per totam superficiem in circuitu, sicut indumento æqualiter undique se operiente. Si ergo tunc pluvia descendit super terram, illa pluvia cecidit super aquam superficiem, et non in superficiem terræ. Oportet ergo quod opinio eorum fuerit sic quod putaverunt, quod hæc aqua ab aere super aquam distillans non cessaverat perforare et cavare terram parum et parum donec fecerit montes et valles : et hoc penitus est irrationabile, cum illa aqua pluviae non tetigerit terram, nec moverit eam, sed superficiem tantum. Si autem dixerint quod aqua pluviae non fecit hoc, sed potius terra a principio suæ creationis fuit rotunda et levis, sicut diximus : et per mensuram aliquam temporis steterit aqua super eam æqualiter in circuitu operiens eam, et tandem post aliquod tempus movit aquam, et excitavit undas, et ex illis cavata est terra, et fecerunt undæ illæ quiddam ejus profundum quod est vallis, et quiddam ejus gib-

¹ De Natura locorum, tract. II, cap. 9.

bosum quod est mons : tunc sequitur ex illo dicto inconueniens cuius contrarium demonstratur.

Contra Antiquos de opinione montium.

Dicemus enim contra hoc sermonem necessarium, cui testificatur visus : ventus enim non nisi ex vapore sicco : et ideo etiam sedatur ventus per humorem pluvia. Si ergo tunc terra tota fuit cooperta aquis, quomodo potuit eleuari fortis vapor siccus, cum et humor aquae prohibuerit eum, et frigiditas aquae constrinxerit eam terram, ut non sineret eam vaporare multum? Amplius autem cum aqua fuit velamen terrae in circuitu, quomodo potuit esse ut esset vento motus aliquis fortis? si enim esset in rerum natura, sicut esse putaverunt, absque dubio nullus esset motus omnino. Sic ergo patet quod a principio creationis suae terra cavata est vallibus, et elevata in montibus, et falsificata est opinio adversariorum, et destructa est sententia eorum qui putaverunt contrarium hujus.

CAPUT V.

Et est DIGRESSIO declarans causas essentielles et causas accidentales montium.

Hujus autem quod hic quaeritur de generatione montium et vallium, veritas est, quod montes et valles ex duabus causis generantur, quarum una est universalis, et quasi essentialis : et alia particularis est, quae accidit aliquando et in aliquo loco.

Duabus causis montes generantur.

Causa universalis et

Causa autem universalis et essentialis

est, quod montes nascuntur ex terræmotu ubi superficies terra solida est et compacta et scindi non potest : tunc enim ventus fortiter multiplicatus et agitatus elevat locum illum in sublime, et facit montes : et quia terræmotus frequenter habet naturam juxta mare et juxta aquas claudentes aliquos poros terræ, ne evaporet vapor terreus in visceribus terræ clausus, ideo juxta mare et juxta aquas frequentissime nascuntur altissimi montes. Quia vero locus concavus sub monte, aquarum multarum est receptivus, ideo loca montuosa frequentissime sunt loca fundentia plurimos fontes, et exprimentia stagna magna. Et quia superficies elevata non fit solida non divisibilis, nisi ex luto glutinoso et unctuosum, quod absque dubio adducit affluens illis locis aqua, ideo in locis montuosis sunt lapides grandes et multi, quorum generatio est ex tali luto et ex calore loci qui caloris est congregativus, sive ille vapor generetur ex motu vaporis terrei, sive generetur ex radiis solis. Hujus signum est, quod partes animalium aquaticorum et forte instrumentorum navium inveniuntur in lapidibus montium in concavo montis, quæ sine dubio aqua cum luto unctuosum involuto illuc adduxit, et conservantur a frigore lapidis et siccitate, ne in toto putrescant. Signum autem hujusmodi vehemens est in lapidibus Parisiensibus, in quibus frequentissime inveniuntur rotundæ conchæ lunatis contextæ. Istam igitur dicimus montium esse causam essentialem : et ubi tollimus id quod sic elevatur, causatur vallis. Montes autem antiqui, quos fortis calor coagulavit in lapidem, superius exsiccantur, ita quod scinduntur et cadunt per partes, nisi pedes habeant largos super quos contracta sint superiora et sustentata jaceant quasi super columnas et muros.

essentialis montium.

Causa autem accidentalis montium est ut frequenter duplex : et una quidem est alluvio maris præcipue : quia aliæ aquæ alluvionem magnam facere non possunt : tollit enim mare aut undis aut accessu

Causa accidentalis montium prima.

aut recessu multam terram, et addit eam super aliam, et generat montem in partem unam, et vallem in partem aliam : et ad hoc operatur id quod in præcedenti opinione inductum est, quod terra rara et mollis et rasilis est : et ideo in ea frequenter sunt valles, et juxta montes ubi durior est et tenacior et radi non potest.

Causa accidentalis secundæ.

Alia autem causa accidentalis est in terra arenosa lata et ventosa. In illa enim frequenter venti congregant arenas de uno loco et projiciunt eas super alium locum : et tunc fit ibi mons parvus vel magnus secundum quantitatem illius arenæ : et si contingat ibi infundi humiditatem viscosam, hoc fiet propter virtutem mineralem quæ in arenis coagulabitur in lapidem : et per illam incipient sibi cohærere arenæ, ita quod erunt quasi lapis unus. Si autem non sit ibi talis humiditas, remanebunt ibi arenæ distinctæ non cohærentes sibi, nisi forte in superficie per radices herbarum ibidem generatarum.

Hæc igitur de causa montium et vallium dicta sint : quoniam in libro *Mineralium* oportuit nos plura dicere ad ista valentia, et similiter in libro *Meteororum*.

CAPUT VI.

De locis quæ sunt super littora marium.

Quia autem jam pervenimus ad intentionem de *causis proprietatum elementorum* inquisitionem, quæ est per causam breviter explanatam in illis, et ostendimus dicta quorundam antiquorum sapientium Philosophorum convenientia non esse, tunc relinquitur dicere in singulari et speciali de locis terræ, quæ sit natura eorum, et quæ sit natura marium omnium quæ divisa sunt in terra, et de exitu fluviorum et fluxu eorum, et quæ sit natura civitatum et locorum et regionum ex longitudine et latitudine, et quæ sit locorum natura quam habent per accidens ex hoc quod sunt super littora marium, vel super effusiones fluviorum, ut distinguatur natura unius loci ab alia, quæ sufficit intentioni præsentis. Et hoc est ut quilibet legens ea quæ hic dicuntur, intelligat expresse errorem eorum qui dixerunt se scire naturas rerum, et præcipue de elementis, ut ejus qui dixit quod terra movetur, non quiescit, sicut dixit Pythagoras : et ut destruat error ejus qui dixit mare et flumina moveri de loco ad locum secundum motum sphaeræ, et dixit quod iste transitus marium et fluminum causatur non ab uno singulari motu alicujus corporis cœlestis, sed causatur a motu universali omnium cœlestium.

Causa autem per quam scitur quare

mare est salsum, et flumina etiam sunt salsa, determinari non habet hic, sed in libro *Meteororum*¹.

Cognitio autem naturæ locorum et civitatum quæ est ex longitudine et latitudine eorum ad invicem, et quot pedibus distat unus locus per longitudinem et latitudinem ab alio, jam determinavimus in libro de *Natura locorum*², causata a longitudine et latitudine eorum : pedum enim distantia scitur ex numero milliariorum et leucarum : et ostendimus in libro alio secundum quot milliaria et leucas variatur horizon sensibilis unius loci ab horizonte alterius loci. Horizontem autem sensibilem cujuslibet loci diximus esse diversum ab horizonte alterius loci. Quæstionem autem quam jam prius in hoc capitulo in unum convertimus ad destruendum breviter sermonem ejus qui dixit, quod terra movetur et non quiescit. Cum enim movetur, oportet quod mare et flumina quæ sunt super eam, continue etiam moveantur. Sequitur ergo ex hoc quod omnes aquæ montium et fluviorum permisceantur : et secundum hoc oportet, ut omnes aquæ salsæ sint si salsum vincit in eis ex permixtione aquarum salsa- rum, sicut cum dulcibus : aut erunt omnes dulces si ex earum permixtione vincat in eis dulcedo. Oportet etiam, ut jamdiu in præteritis temporibus, ut ex motu terra esset resoluta a sua figura : quoniam nos videmus oculis quod non tota simul movetur. Si ergo mutantur partes, et tunc divideretur pars a parte, et destrueretur figura ipsius : et hoc sequitur ex dicto ejus qui dixit terram elevari in Meridie, et deprimi in Aquilone : quoniam si terra elevatur in Meridie, tunc est extra locum suum naturalem, et violenter quiescit ibi : et pars Aquilonaris tendet naturaliter ad locum suum, et separabitur a parte Meridionali : et sic dividetur una medietas terræ ab altera, et neutra habebit figu-

ram sphæricam, sed utraque erit sicut semicirculus : et si movetur, tunc aquæ permiscentur : et tunc vincet unus sapor in aquis qui est illius aquæ quæ dominetur in mixtam : et tunc omnes aquæ erunt salsæ, aut omnes erunt dulces, aut sulphuris, aut arsenici saporis : nihil autem horum experimur secundum sensum.

Et si forte aliquis dicat, quod licet modo non sint permixtæ, tamen aliquando fuerunt permixtæ, et iterum adhuc permixtæ erunt. Dicemus, quod debuisset aliquis in præterito aliquid significasse de tali mixtura aquarum : quia talis mixtura mirabilis esset, de qua multi mirarentur et inquirerent ac scriberent causas ipsius : et quia sufficienter de his volumus describere quædam loca marium et fluviorum antiquorum figura visibili, ex cujus dispositione et ordine confutetur omnis falsitas, quæ dicit ex motu terræ maria et flumina permisceri in unum et confundi.

Circumducam ergo circulum Oceani quod *amphitrites* vocatur, et continet totam sphæram terræ a polo in polum per punctum Orientis et punctum Occidentis manando, et protraham ex amphitrite inter Meridiem et Orientem gumphum, hoc est, membrum quoddam maris quod est mediterraneum mare, quod vocatur Syn, quod Indicum mare est : et si ulterius protrahatur, tunc est quod vocatur Arabice Alebilam, quod nos vocamus sinum Persicum : quia ista duo maria continuantur, et in hunc sinum Persicum intrant Tigris et Euphrates ab Aquilonari parte venientes, sicut diximus superius. Exitus autem Euphratis est ex montanis Aquilonaribus Armeniæ majoris, et exitus Tigridis est ex campis Indiæ Aquilonaribus. Ex prædicto autem mari quod continuatur Persico, egreditur adhuc unus gumphus quod secundus gumphus ejus est : et hoc est mare Rubrum versus Me-

¹ II Meteororum, tract. III, cap. 15.

² De Natura locorum, tract. I, cap. 9.

ridiem magis quam Persicum et juxta Ægyptum. Ex mari autem continente sphæram terræ quod Oceanus et amphitrites dicitur, ex parte Occidentis egreditur magnus gumphus valde, qui dicitur Arabice Sceny, et apud nos vocatur mare Magnum sive terra Italiæ: venit autem ante montes Pyreneos per totam longitudinem Italiæ, quæ vocatur terra Romanorum: et reflectitur ab altera parte juxta illud latus Italiæ contra Orientem et Aquilonem, ubi est Constantinopolis in uno littore, et Venetiæ juxta aliud littus, et diffunditur contra forum Julii et Aquilegiam et partes illas: et propterea dicitur illud mare continuum cum terra Romanorum, et egreditur ex Oceano continentem sphæram terræ. Gumphus iterum qui arabice vocatur Edyl, et dicitur scindere terram Romanorum, quæ est Italia: et hoc mare non est aliud nisi reflexio ejusdem quod prius dictum est, quod reflectitur versus latus, quod est versus Occidentem et Aquilonem terræ Romanorum. Ex amphitrite autem quod est mare continens sphæram terræ, egreditur gumphus quidam qui vocatur arabice Deilim, cujus extremitas venit ad partem Meridiei, quæ est terra Corisceni arabice dicta. Et hoc est mare quod tangit Angliam et Daciam et juxta Teutoniam venit usque Liveniam, et ibi in circuitu curvatur ad Meridiem inter Orientem videlicet et Meridiem. Hæc autem maria quæ principalia Meridionalia sunt, ab antiquo semper distincta fuisse sunt inventa et numquam permixta. Euphratis autem exitus, sicut diximus, est de monte Aquilonari et Armeniæ, et descendit ad terram Orientalem Arabum, quæ Bogdes vocatur. Et exitus Tigridis est ex terra Aquilonaris Indiæ, quæ est in directo terræ Romanorum versus Orientem, et confluit cum Euphrate sub loco qui dicitur Bogdes: et tunc cadunt per siccum. Similiter Nilus egreditur de Æthiopia, et fluit versus Ægyptum, et in mare Magnum cadit sub Alexandria. Geon autem egreditur de monte qui ara-

bice dicitur Rasim, et est in India Meridiana, et reflectitur et cadit in Oceanum versus Orientem.

Volo autem istas regiones et loca ostendere in figura. Ponam ergo punctum a quod sit locus maris Indici, quod dicitur Syn: et ponam punctum b signum Indiæ, quæ est super mare illud. Et ponam punctum c signare locum et habitationem Persiæ. Et ponamus punctum y habitationem terræ quæ dicitur arabice Lyhybos. Et ponam punctum r quod significet mare magnum, quod Sceny vocatur arabice. Et punctum d quod signare dicam locum qui dicitur Irach, et punctum f dicam stare pro Romanorum terra sive Italia. Et punctum t dicam signare Hispaniam. Et puncta g d dicam stare pro Æthiopia. Et duo puncta m n dicam representare duo loca Lurasath et Alehufoy arabice, quæ dicta sunt ad Occidentem versus locum qui dicitur Bogdes. Diximus enim esse locum inter Tigridem et Euphratem, ubi confluunt. Et ponam quod punctum n significet Constantinopolim quæ Byzantium olim dicta est: et hujus descriptionis hæc est figura. Nos autem dimisimus notationem multorum marium et fluminum et civitatum: quia ad nostram intentionem probandam, quod videlicet terra non movetur, sed loca ejus manent distincta et quod nec flumina, nec maria permiscentur, sunt sufficientia de his quæ induximus.

Non ergo necesse est nobis, ut hic immoremur talibus: quia jam omnia talia loca nominavimus in libro *longitudinis et latitudinis locorum*, et distinximus ibi naturas locorum et divisionem et civitatum ab invicem secundum longitudinis et latitudinis quantitatem, et determinavimus flumina et montes, quantum potuimus studendo brevitati. Quia igitur omnia secuti sumus, quæ de causis proprietatum elementorum voluimus, tempus est ut de *Generatione et Corruptione* corporum determinemus. Ex quo enim determinavimus de mobili simpliciter in libro *Physicorum*, et de mobili secundum locum

in libro *Cæli et Mundi*, et ex quo diximus habitudinem mobilis recti ad mobile circulariter in libro *de longitudine et latitudine locorum*¹, et nunc in isto libro determinavimus proprietates simplicium corporum, quæ causantur in eis ex hoc

quod diversimode se habent ad invicem, exigit divisio quam in principio naturarum nostrarum diximus, ut de *Generatione et corruptione* generabilium et corruptibilium, Deo auxiliante, disseramus².

¹ Cf. librum de Natura locorum.

² Hunc tractatum de Generatione et Corrup-

tione jam edidimus in tomo IV (pp. 345-476) novæ editionis nostræ.



INDEX

*Librorum, Tractatum et Capitum in libris de Causis
et Proprietatibus Elementorum.*

LIBER I.

TRACTATUS I.

De proprietatibus elementorum in communi.

CAP. I. Quæ libri intentio, et de proprietatibus elementorum quæ sunt grave et leve ? ex quo elicitur error eorum qui dixerunt ignem elementum non esse. 585

II. De proprietatibus elementorum in motis corporibus. 588
III. De proprietatibus elementorum in compositis secundum virtutes quas habent ad motum, quæ sunt gravitas et levitas. 591
IV. De confutatione erroris eorum qui dixerunt frigiditatem esse naturalem elementis, et caliditatem accidentalem. 593
V. De proprietatibus elementorum in se et in compositis quæ causantur ex locorum diversitate. 595

TRACTATUS II.

De proprietatibus elementorum in speciali.

- | | | | |
|------|------|---|-----|
| | | sam accessionis maris in
communi, et excludens
errores qui sunt circa
hæc. | 608 |
| | | VI. Et est DIGRESSIO declarans
quot et quæ confortant
accessiones maris. | 610 |
| | | VII. Et est DIGRESSIO declarans
et destruens tres sectas
erroris circa accessiones
maris. | 613 |
| | | VIII. Et est DIGRESSIO declarans
diversitatem marium in
accedendo et receden-
do. | 616 |
| | | IX. Et est DIGRESSIO declarans
causam diluviorum aquæ. | 618 |
| | | X. Et est DIGRESSIO declarans
proprietates aeris quæ
dictæ sunt ab Anti-
quis. | 622 |
| | | XI. Et est DIGRESSIO declarans
proprietates ignis, quas
habet in loco suo, et
extra locum suum egre-
diens. | 623 |
| | | XII. Et est DIGRESSIO declarans
motum et diluvium
ignis. | 625 |
| | | XIII. Et est DIGRESSIO declarans
unde fit restitutio post di-
luvium? | 629 |
| | | XIV. Et est DIGRESSIO declarans
proprietates terræ. | 632 |
| CAP. | I. | De nobilitate elementi no-
bilis, quod cælum non
sonat. | 597 |
| | II. | De opinione quæ dixit
mare transmutari de loco
ad locum. | 600 |
| | III. | De improbatione opinio-
nis quæ dicit mare trans-
mutari de loco ad lo-
cum. | 603 |
| | IV. | Et est DIGRESSIO declarans
quæ prænotanda sunt
ad sciendum accessum
et recessum maris. | 606 |
| | V. | Et est DIGRESSIO declarans
vel ostendens veram cau- | |

LIBER II.

TRACTATUS I.

*De his quæ præmittenda sunt de cælo et situ
terræ.*

CAP.	I. De elementis cælum com- ponentibus.	635
	II. De infinitate mundi.	638
	III. De improbatione erroris eorum qui dixerunt ter- ram esse magis in Meridie quam in Aqi- lone.	639

TRACTATUS II.

De corruptionibus elementorum.

CAP.	I. De corruptione aeris ex vapore inferiorum.	642
	II. De corruptione aquæ per calorem thermarum.	644
	III. De causa Vulcani.	647
	IV. De improbatione erroris eorum qui dixerunt montes et valles non causari e cavatione aqua- rum.	648
	V. Et est DIGRESSIO declarans causas essentielles et causas accidentales mon- tium.	649
	VI. De locis quæ sunt super littora marium.	650

D. ALBERTI MAGNI

RATISBONENSIS EPISCOPI, ORDINIS PRÆDICATORUM,
PARVA NATURALIA.

LIBER

DE PASSIONIBUS AERIS,

SIVE

DE VAPORUM IMPRESSIONIBUS.

PASSIONES AERIS quæ a Philosophis *impressiones vaporum* in alto vel in imo generatorum dicuntur, breviter annotabo divisione et diffinitione, causa et loco, significatione atque colore, cuncta quæ ex vapore duplici, scilicet terrestri et aqueo generantur in alto vel in imo, brevi demonstratione complectens : et traditione ista diversitates opinionum quibus diversificati sunt Philosophi, refutans : nec probatione eorum nec demonstrationibus ejus quod intendo, insistam : sed ipsa scientia, quæ quia est, et quid est, sit ad præsens lector contentus.

1. De materia passionum aeris.

Quod aer non sit vaporabilis.

SCIENDUM igitur vaporem omnem esse ab aqua vel a terra. Aer enim vaporabilis non est. Aut enim rarificatur ultra id

quod est suæ naturæ, et tunc statim est ignis. Aut inspissatur amplius : et tunc non est vapor : quia vapor generatur per subtiliationem vel rarefactionem, sed tunc efficitur aqua, vel terra. Hic duplex igitur vapor causa est materialis omnium eorum quæ in alto vel in imo generantur.

Causa materialis omnium quæ generantur in alio.

Et distinguemus eum sic, quod aut est impressio ex vapore sicco tantum, aut ex humido tantum, aut ex utroque.

2. De quatuor locis generationis impressionum.

Quot sunt loca generationis impressionum et quæ?

Loca igitur generationis sunt quatuor, scilicet superior regio, quæ ex vicinitate ad ignem proprio nomine a Philosophis *æstus* vocatur : et media zona sive regio quæ vocatur *locus frigoris* : et inferior pars aeris non longe super terram habens aliquid coloris, et aliquid frigoris, et venter terræ.

De caliditate et frigiditate illorum locorum

Superior autem pars aeris pura et rara propter vicinum ignem calida est vehementer : et propter radios stellarum et luminum ipsarum quæ sibi sunt viciniora : ideo illa est causa inflammationis per se.

Inferior autem cum sit circa terram, et super eam habens quidem ex se frigus propter aquam et terram, calidum autem ex repercussione sive reflexione sive refractione radiorum ad solidum planum terræ et aquæ, efficitur illa non inflammans : sed quasi spirans vaporem sui natura quidem coercens ne comburatur vel incendatur, ex reflexione autem radiorum evocata spirans ex se vaporem.

Regio autem aeris per æque distantiam quidem ab his duabus sumpta, est frigida valde propter causam oppositam. Nec habet calorem ex vicino igne, nec ex radiorum refractione : eo quod radii non reflectuntur ad transparens, sive pervium, aut diaphanum, sed tantum ad solidum planum, et plus si fuerit tersum, ut est aquæ superficies, vel speculum, vel aliud quid politum et planum.

Regio autem quæ est inter mediam istam quæ dicta est, et locum habitationis terræ, quantum est de se temperate est frigida aliquid suscipiens ab utraque distinctione. Per accidens autem est ipsa intemperate frigida, secundum quod vincitur ab inferiori in quibusdam temporibus :

et intemperate calida, secundum quod vincitur a superiori in quibusdam aliis temporibus.

Sic igitur determinatum est de materia in communi et loco.

3. De causa efficiente vaporum.

CAUSA autem vaporem efficiens in speciali est multiplex, sed in communi nisi duplex, scilicet calor, et frigus.

Causæ omnes vaporis sunt calor et frigus.

4. De calore.

CALIDUM autem duplex est, scilicet solis elevando omnem vaporem, et loci calidum disgregando vel inflammando elevatum. Dico autem calidum solis esse prout sufficit nunc proposito nostro duplex, scilicet adurens, et evocans. *Adurens* autem est duabus de causis, quarum una est directa suppositio, vel fere directa sole existente in signis æstivalibus, præcipue circa tropicum æstivalem, ut sunt Gemini, Cancer, Leo, Virgo. Tunc enim radii sui in directo suppositis regionibus incidunt in illas ad modum perpendiculari cadentis de centro Solis, et restringuntur in seipsos, et efficiuntur infiniti, et conducunt in terra calorem adurentem. Et tunc nihil spirat in locis illis de terra, sed totum aduritur antequam eleveur. In locis autem vicinis quæ per latitudinem magis accedunt ad Aquilonem, quanto plus recedunt a via solis, tanto plus oblique recipiunt, et anguli radiorum magis ampliantur : et minor proinde fit calor et minus ardens et magis evocans spiramen evaporationis. Et sic secundum latitudinem omnium climatum a via Solis vel æquinoctialis facile est accipere proportionem caloris plus vel minus adurentis.

Calidum solis duplex, scilicet adurens, et evocans.

Calor adurens non generat vapores.

5. De frigore.

FRIGUS etiam duplex : est enim frigus

Frigus duplex, scilicet

et constringens, et temperatum.

constringens plus potens constringere quam sol elevare vel evocare. Et hoc impedit omnem evaporationem constringens poros terræ et superficiem aquæ, et ut radius solis incidens in eam, non possit attrahere.

Primum impedit evaporationem, non autem secundum.

Est etiam frigus *temperatum* continens quidem solem ne incendat, sed non prohibet ne evocet. Et hujus item causa est latitudo regionum a via solis et motus solis secundum latitudinem ab æquinoctiali in Meridionalem plagam : tunc enim sole existente circa tropicum hyemalem, scilicet in Sagittario, Capricorno, Aquario, valde removetur a climatibus variis. Et ideo radii sui non nisi valde oblique respiciunt habitationem illorum climatum : quapropter vincit frigus in locis illis, et abscinditur a vapore ex constrictione superficialium terræ et aquæ.

Hoc igitur dictum est de causis efficientibus vapores.

6. De his quæ generantur ex vapore sicco.

Ex illis ergo divisionibus vaporum locorum et causarum determinabo omne quod in alto vel in imo habet generari. Et dividam primo sic. Aut generatur ex vapore sicco tantum, aut ex humido tantum, ut ex utroque. Si sicco tantum, tunc materia omnis talis impressionis erit vapor terræ. Cum autem terra sit elementum solidum frigidum per naturam, et siccum ingressum in se calorem continet fortius, quia solidum : et incenditur facilius, quia siccum efficitur acutius et magis penetrativum, quia siccum non retunditur de facili. Et ideo istum talem vaporem divido per tria loca secundum calidius et minus calidum.

Materia cuiuslibet impressionis generatæ a vapore sicco tantum, est vapor.

Undecim impressiones causatæ ex vapore sicco.

Vapor vehementer calidus et siccus facit quinque impressiones

Et causantur ex eo ad minus undecim impressiones apparentes in aere. Et de aliis si quæ apparebunt, erit simile iudicium. Si enim vehementer est calidus et siccus, pertinet parvas regiones aeris, scilicet inferiorem et mediam : eo quod

frigus illarum non potest convertere ipsum, et transibit ad aliam regionem quæ dicitur æstus, et ibi facit impressiones quinque. in suprema regione aeris.

a. De igne perpendiculari.

Aut enim in omnibus æqualiter est subtilis bene tenuis aptus inflammatione ex calore loci, aut inæqualiter. Si inæqualiter : aut ergo habet inferius multas partes terrestres dilatibiles, aut non, sed paucas. Si multa terrestria habet inferius, tunc ibi de necessitate dilatabitur. Terrestris autem abundans repugnat elevationi ad æqualitatem aliarum partium, et calidum interius ingerens vel ingressum rarificando dilatatur, et partem plus calidam continue plus et plus protendit in acumen, et efficit ipsum sicut columnam pyramidis, et propter longinquitatem videbitur de superiori esse dimissum sicut perpendicularum quod inferius habet massam, et continue usque in sublime chordam. Hoc igitur sic accensum ab æstu loci dicitur a Philosophis *ignis perpendicularis*.

b. De lancea ignea.

SI AUTEM est inæqualiter tenuis et subtilis et subtus non habens multa terrestria, quæ dilatari queant per causam dictam : tunc iterum eadem causa inflammabitur, et vocatur *lancea* propter longum subtile quod prætenditur in figura, et stat erectum, acumen habens supra, sicut et ignis perpendicularis.

c. De candela accensa.

SI AUTEM est æqualiter subtilis bene tenuis æqualiter aptus inflammationi, tunc etiam æqualiter ascendet in omnibus partibus : aut igitur est æqualiter disgregabilis calore in omnem partem di-

mensionis : et sic efficit latum, et videtur quasi rotundum natans in superficie aeris. Et illud vulgo vocatur *candela accensa* : licet enim latum sit in superficie : tamen videtur rotundum et sphaericum propter longinquitatem nostri visus.

d. De assub.

AUT EST æqualiter subtilis, sed non est extensibilis nisi in partem unam propter parvitatem materiæ, sicut corium quod cum extenditur ad partem unam, contrahitur in aliam : et tunc vapor ille succensus dicitur *assub ascendens*.

e. De duplici assub.

AUT EST æqualiter subtilis, sed non bene continuus, nec adhærens sibi, sed una pars ejus aliquantulum distans ab alia : et tunc videbitur assub ascendere post assub, sicut si evolarent scintillæ de fornace. Et hæc quinque conveniunt in hoc quod omnia evolant sursum in ignem, et nihil eorum descendit deorsum. Si autem vapor est non vehementer calidus et siccus, tunc non potest penetrare mediam regionem aeris quæ frigidissima est, et tunc causantur iterum quinque de vapore illo.

Vapor non vehementer calidus et siccus causat quinque impressiones.

f. De diverso igne qui apparet in aere dupliciter.

AUT ENIM vapor ille calidus et siccus est bene continuus, cujus partes fortiter conjacent : aut est disgregatus. Si disgregatus, tunc propter calorem quem habet quando in aere inferiori occurrit ei frigida nubes fugienda, confricat partem ad partem, et ex confricatione inflammatur : et quia disgregatæ sunt partes, videtur diversis ignis : et quia fugit nubem frigidam tangentem, id videtur dis-

gregatum egredi, sicut stupa exsufflaretur de canna.

g. De stella cadente longa.

SI AUTEM est vapor bene continuus et expellitur a frigida nube tangente, tunc aut est compactus vapor conglobatus et fortis, aut est modicus non bene compactus : si non bene compactus nec multus, tunc cadit continue, sed non dividitur, et propter continuum casum videtur quasi stella cadens longa quæ relinquit vestigium casus post se, et vocatur a Philosophis *candela accendens candelam* continue per descensum.

h. De stella perdita quæ quandoque recipit tres diversitates, quandoque stat per moram in aere sola.

SI AUTEM est multa materia conglobata, tunc accipit tres diversitates a diversis quæ sibi occurrunt in aere. Si enim nihil obviat, tunc accenditur confricatione suiipsius, et stabit aliquamdiu in aere : et hoc dicunt discurrentes nocte esse lumen præcedens eos.

i. De assub descendente quæ stella cadens dicitur.

SI AUTEM aliquid occurrit ei in aere, aut hoc est de super expellens ipsum inferius : et hoc vocatur a vulgo *stella cadens*, a Philosophis *assub descendens*.

k. De stella fumigante, quæ quandoque apparet velut draco volans, quandoque velut serpens incurvans.

AUT FRIGIDA nubes est ad latus unum, et calida ad aliud : et tunc propter convenientiam ad calidum attrahitur ad illud, et ibi incenditur post primam partem :

aut fumat antequam incendatur, et dilatatur in medio et incurvatur propter incensionem partis unius et extinctionem alterius versus humidum frigidum. Et hæc efficitur velut draco volans : quia anterior pars accensa videtur quasi spiramen draconis. Media autem incurvata per quod attrahitur a prima, incurvat se ut serpens, et volat semper ad illud latum ubi circumstat illud latum calidum : eo quod simile attrahit simile, et contrarium expellit contrarium.

1. De assub quandoque apparente, quandoque non, qui tertius assub dicitur.

SI AUTEM vapor siccus tenuis inflammabilis medio modo, tunc pertingit ad regionem mediam, et non penetrat ipsam, tunc generatur tertius assub : quia ille cum frigore loci expellitur : et quia multæ nubes sub eo sunt, ideo incendens nube occultatur et penetrans nubem in trina apparet, et vocatur a Philosophis *assub quandoque apparens, quandoque non.*

Hæc sint dicta de generatione vaporum siccorum habentium impressiones in locis tribus sublimibus. Sic igitur patet numerus undecim impressionum, quæ omnes in sublimi generantur a vapore sicco.

7. De his quæ generantur ex vapore humido.

NUNC AUTEM transeundum est ad ea quæ generantur a vapore humido tantum, sicut ros, pruina, pluvia, nix, grando, stillæ, sive guttæ magnæ, quæ quandoque cadunt in æstate. Sciendum autem, quod vapor humidus cum sit aqueus, non est inflammabilis propter hoc quod in duabus qualitatibus igni contrariatur, scilicet in frigido potentia, et humido potentia, licet in actu sit calidus et siccus temperate. Et ad hujusmodi scientiam

præexigitur ut sciatur quid est convertens et convertere vaporem in aquam, et quid constringens est et constringere vaporem in glaciem.

8. Quod inspissare vaporem seu nubem, et in aquam redigere sit per frigus, et disgregare per calidum, congelare vero per idem frigus invalescens atque constringens.

CONVERTERE igitur vaporem est inspissando ad materiam aquæ redigere. Cum autem frigoris sit inspissare sicut calidi disgregare, patet quod omnis conversio vaporis fit per frigus. Congelatio autem fit per idem frigus confortatum et constringens aquam quæ conversa est.

Item notandum, quod aliqua nubes est conversa in partibus suis, quæ scilicet est aqua facta. Et aliqua est in via conversionis, quæ scilicet est in aqua frigida. In his igitur est expressius loquendum, propterea quia sæpius veniunt in tractatum.

Dico, quod omnium eorum quæ generantur ex vapore humido, nihil est inflammabile. Item quia aqua est elementum magis tenue quam terra, propter hoc calor solis attrahens tales vapores, non multum retinetur ab ipsis vaporibus, sed est exhalabilis per frigus constringens vaporem ipsum. Et ideo nullus vaporum multum pergat per regionem frigoris ad regionem æstus, sed elevatur plus et plus in regionem frigoris excellentis vel temperati, secundum quod sunt calidiores vel minus calidi.

9. De grandine.

SI ERGO sit vapor humidus et calidus valde, erit ille vapor valde rarus ascendens usque ad regionem frigoris. Cum autem sit rarus, frigus circumstans in loco penetrabit profundum ejus undique : eo quod rarum in omnibus partibus in-

Quare vapor
humidus
non est in-
flamabi-
lis.

gressum dat frigori. Cum ergo ingreditur frigus, et simul egreditur calor, frigus incipit convertere et coarctare et inspissare conversas partes vaporis. Et quia forte est frigus, incipit velociter pars fluere ad partem : et quia frigus est valde dominans, constringit aquam conversam, et generat inde grandinem magnam et parvam vel perviam, secundum quod est frigus magis vel minus potens super vaporem ipsum.

a. De signis et eorum proprietatibus, et quare grando cadit in tempore fructuum?

HUJUS SIGNA duo sunt, quorum unum est quod grando non cadit nisi in temporibus calidis, et præcipue tempore fructuum : quia tunc incipit adurens et exsiccans calor multum accendens vaporem, et alte elevans in medium frigus. Et ex hoc vapor rarus undique circumpositus frigore, dat ingressum frigori, et fortissime constringitur, sicut aqua calefacta exposita sub dio in hyeme plus congelatur quam frigida posita in eodem loco, et aqua calida magis rara magis ingressum dat frigori.

b. Quare grando non est directe rotunda?

ALIUD SIGNUM est, quod grando non directe rotunda, sed quasi in forma lentis circumposita guttis congelatis. Hoc enim accidit, quia cum vapor esset expansus, inchoatum frigus contrahens magis traxit de materia in lateribus, quam a superiori vel in superiori parte. Et cum esset magnum, congelavit partem antequam alia flueret ad eam, et adhæsit ei sicut gutta congelata.

c. Quare grando est liquescens et non sicca?

SI AUTEM invenitur quandoque grando rotunda, hoc est per accidens : et eadem de causa qua etiam semper est liquescens et non sicca : quia quando cadit a regione frigoris, transit per inferiorem aerem, qui ex reverberatione radiorum a terra et aqua et permixtione vaporum est temperate calidus : et ideo ex motu et caliditate illius aeris liquescit extrinsecus, et invenitur cadens liquida.

Quare grando quandoque invenitur rotunda, et quare semper liquescit?

10. *De nive et ejus signis.*

NIX AUTEM quoad tempus e contrario se habet grandini : in quibusdam vero (ut quoad materiam) conveniunt. Generatur enim ex vapore calido, non tamen sicut grando.

a. De signis futuræ nivis.

ET HUJUS signum est prognosticatio rusticorum, qui in hyeme, quando remittitur frigus, exspectant nivem, nisi sint nubes obscuræ. Aliud signum est quod observavi, et non inveni falsum : quia vapor nivis futuræ lucidus est et pallens, et videtur multus : et hoc est signum raritatis ipsius.

b. Quod nix quandoque stat in aere diu.

ITEM DIU stat in aere quandoque per octo dies, et hoc est signum caloris : sed non elevatur nisi tempore hyemis, quia sol tunc debilis est : et ideo adjutorio lunæ vel alterius stellæ vel plurium non sufficit elevare, et non sufficit adeo incendere et calefacere sicut in æstate fit. Hinc ergo accidit, quod vapor nivis non pertingit usque ad regionem frigoris, sed

Quare aqua calefacta, plus congelatur quam frigida?

remanet citra regionem intemperate frigidam, frigidæ tamen regioni magis vicinus quam terræ : et ideo quia non est adeo forte frigus super ipsum, nec adeo rarus vapor, ut det undique ingressum frigori, contingit quod vapor nivis simul convertitur et congelatur, et non ante convertitur, et postea congelatur.

c. Quare nix cadit lata quandoque?

ET QUIA IN conversione est diffusus vaporabiliter, sicut carminata lana, ideo nix cadit lata, sicut si essent partes lanæ super se.

d. Quare vapor nivis congelatur?

QUIA VERO frigus non fuit forte super ipsum, ideo in ipso egressu caloris debiliter ex ipso congelatur.

e. Quare nix cadit mollis?

ET QUIA ipse calor egrediens aliquantulum resolvit id quod debiliter congelatum est, ideo nix cadit mollis, facile comprehensibilis : quod non esset, si esset omnino glacies, sicut grando. Hoc autem locus inferior ideo in æstate facere non potest, quia tunc refluxu radiorum minus calidus est congelationi : sed nix sufficit conversioni, sicut accidit in pluviis, ut statim dicemus.

11. De granulis cadentibus in Martio vel Aprili.

EX HIS duabus causis concluditur causa granulorum quæ cadere consueverunt in Martio vel in Aprili in nostris climatibus, scilicet sexto, et septimo, et ultra in parte octavi quæ plus distant a via solis quam alia. Videmus enim granula rotunda rara et frequenter habentia for-

mam ciceris. Et hæc generantur ex causa mixta ex utraque istarum, scilicet ex vapore magis calido, et magis elevato quam nix, sed minus quam grando, et quasi in termino duorum numeratorum.

a. Quare granula habent raritatem nivis interius sed non mollitiem, exterius vero comparationem grandinis?

ET IDEO ista interius habent raritatem nivis, sed non mollitiem : eo quod frigus magis vincit super eam : exterius autem tendit in grandinis compactionem : cum autem convertitur aliquantulum vapor ille ex gravitate, subtus dilatatur, et frigus attrahit de magis calido subtili : et ideo efficitur acutum.

b. De signo hujusmodi.

ET HOC signum est, quod frequenter hæc mediis temporibus generantur, scilicet in vere et in principio veris, magis quam post medium ipsius : generantur enim frequenter sole existente in Piscibus, et in principio Arietis.

12. De pluvia.

VAPOR item aqueus ut frequenter non est rarus subtilis et calidus, sed potius humidus grossus fumosus : et ideo ille alte non ascendit ad regionem magni frigoris, sed remanet in inferiori, cujus frigus sufficit conversioni, sed non congelationi, nisi per accidens : et ideo talis vapor redditur aqua pluens.

a. Quare guttæ pluvix cadunt quandoque glaciatae?

DICO AUTEM *per accidens*, quia ex frigore accidentali existente in aere ipsæ

guttæ pluviae antequam veniant ad terram, congelantur, et cadunt glacies.

b. De guttis quæ splendent in æstate cadentes.

IN ÆSTATE vero quia (cum calor fortior est, impetuose elevat vaporem spissum) non conglutinat : quia divisus in partes grossas elevatur parum, si partes frigidæ inventæ in aere dividuntur, stant ibi cum nube aliqua habente aliquid frigoris, et alibi aliud. Et ideo frigus illud sic fugiens tangit partes grossi vaporis stantis in aere, et subito convertit eas : et inde guttæ magnæ cadentes in æstate sine vento videntur per solis lumen transire sicut parvæ candelæ, et sunt calidæ multum humectantes.

c. De signis hujusmodi.

Quare in aquis pluvialibus sit vis constipativa ventris?

QUOD AUTEM hæc sit generatio pluviae et guttarum, signum est : quia in aquis pluvialibus, eo quod calidum evaporativum non est ab eis remotum in toto, manet vis constipativa ventris : aqua enim pluvialis constipat ventrem et valet dissintericis.

13. De rore.

CONSEQUENTER videtur nobis tangere causam roris qui habet aliquid simile cum pluvia, et pruinae quæ habet aliquid simile cum nive. Generatio igitur roris est ex vapore grossiori quam pluvia, et minus calido : eo quod habet aliquid terrestre admixtum, et ideo non elevatur nisi parum : et non fit in tempore magni caumatis, nec in tempore magni frigoris : et fit ejus conversio juxta terram, etiam quandoque ad altitudinem unius cubiti, vel palmi, vel turris, vel hujusmodi.

a. De duplici conversione hujus vaporis, et quare a sole cito consumitur?

FIT ENIM conversio hujus vaporis duplex, scilicet per se, et per accidens. Per se fit frigore aeris in nocte, quando non est reflexio luminis in ipso a sole. Et ideo quia parvi humoris est, cito consumitur a sole.

b. Quare fit ros sub mensa dum sero cœnatur in gramine?

ALIA EST conversio ipsius ex revolutione multi vaporis in seipsum ad aliquid reflectens ipsum, sicut in olla cooperta reflexus fumus generat aquam, et sicut in instrumento quo fit aqua rosea. Unde cum cœnatur in gramine in sero crepusculo vespertino, fit roratio sub mensa ad reflexionem vaporis ad mensam.

14. De pruina.

PRUINA AUTEM fit ex vapore ejusdem naturæ, sed frigus depressum in aere terræ vicino, congelat ipsum convertendo, sicut diximus de nive : quia vero frigus magis densatur in quibusdam corporibus solidis, sicut sunt ligna et lapides, et ideo frigus egrediens ab illis et tangens vaporem circumstantem convertendo constringit ipsum, et facit ipsum circa se stare.

a. Quare flatus condensatur ad vestes et congelatur?

QUOD autem hoc sit verum, signum satis patet in spiraminibus in hyeme ad vestem vel ad pilos, quod spiramen humidius est in hyeme quam in æstate propter generationem phlegmatis, cujus generatio proprie est in hyeme. Grossus

igitur vapor spiratus convertendo congelatur, et circumstat pilis et vestibus ut pruina.

b. De causa duritiei et rigoris, qui est super nivem.

DURITIEI AUTEM et rigoris pruinae super nivem, causa est ista : quia densum frigus circa terram ex condensatione ipsius in corporibus terrestribus expellit velociter calidum a vapore : et ideo licet in ipsa conversione congeletur, fit tamen rigidum, eo quod nihil manens de calore elevante ipsum manet quod resolvendo mollificet ipsum.

c. De rore dulci qui postea efficitur albus super arborum folia ut farina, et quare ex eo nascuntur animata?

FIT AUTEM quaedam roris generatio plus a pastoribus quam a Philosophis inventa, cujus descensum ego ipse a pastoribus edere frequenter et diligenter observavi. Est autem vapor admodum spissus, quasi olei fumus, vel tepidarii, vel adipis, generatus ex trium commixtione elementorum, scilicet terrae, aquae, et aeris, et calidus ignis est in eo digerens : et ideo efficitur ex eo humiditas unctuosa dulcis ad modum mellis : et quando cadit super vegetabilia, primum efficiuntur quasi melle perfusa, postea autem evaporante humido subtili aereo remanet grossum terrestre. Et quia bene permixtum et digestum erat, videtur sicut farina molendini volatilis respersa super folia arborum, olerum et herbarum. Ex siccitate autem sua folia incurvat, quandoque contrahit ea, quandoque etiam evaporante calido ex ipso ad superficiem secum trahit et humidum.

d. Causa quare de tali rore generantur vermes.

ET QUIA ex frigore aeris generatur pellicula exterius, ideo inclusus aer convertitur ad ipsum sensibilem animale, et generantur inde vermes et muscae parvae.

e. De prognosticationibus circa hujusmodi.

ET PROGNOSTICANTUR pastores in his duo accidentia ut frequenter et quandoque tertium. Duorum primorum unum est ovium et aliorum pecorum interitus, sed praecipue ovium. Hujus autem rei duas causas mihi assignaverunt : quarum una est, quia ex nimia dulcedine tantum inde comedunt animalia, quod fel eorum ex multa cholera augmentatur, ita quod scinditur, et fel per intestina diffundens scindit ea, et moriuntur. Alia causa est, quod nimis avide sumendo dulce, oppilatur hepar, et multum nutrimentum attractum ab ipso non potest ulterius dirigi ad membra propter repletionem venarum, et ideo putrescit in hepate : et generantur inde sanguisugae, et repletur totum hepar : et utrumque jam oculis conspeximus.

Prognosticum de interitu ovium et aliorum pecorum.

Haec autem rudibus dicta sint de generatis ex vapore humido et sublimi.

15. De quodam inflammabili attrahente quod subito et tempestuose descendit, et quandoque suaviter.

IN UTRISQUE autem praehabitis, scilicet generatis ex vapore sicco, inflammabile est unum attrahens quod non est praetermittendum, scilicet quod quandoque subito et tempestuose descendit, et quandoque suaviter cadit. Et hujus duplex est causa, quarum una est frigus expellens

calidum sibi contrarium, sicut accidit in assub cadente, et dracone qui movetur ad latus non directe inferius. Est enim vapor æqualiter levis et gravis curvans se propter dubium motum, et inflammatus confricatione quantum ad unum latus pellit frigus obvians, et ad alterum attrahit calidum consimile. Assub autem cadit ex impulsu sui contrarii, et inclinatur se ad unam plagam mundi. Dicunt marinarii, quod ventus sublimis flat ad istam partem : et puto esse verum. Alia autem causa est fortissima expulsio ex duplici impellente, quorum unum est frigus loci, ut dictum est.

a. De signis circa hujusmodi.

ET HUIUS signum est quando effunditur ignis in aquam raram : fit enim ibi impulsio subita et impetuosa unius ab alio. Aliud est vapor siccus expellens humidum, vel e converso.

b. Quod pluvia tempestuosa fit vento præcedente.

ET IDEO tempestuosa pluvia semper fit vento præcedente, et involvente et inspissante membrum.

Et hæc dicta sufficiant de generatis in alto ex vapore sicco inflammato, et de vapore humido non inflammato.

16. De ventis, et primo de materiali causa ipsorum.

DICAM NUNC omnes ventos, et causam ventorum materialelem et efficientem, et locum generationis eorum.

Ventus fit ex vapore sicco terrestri materialiter : efficitur autem a calore solis hunc vaporem elevante, et non consumente.

a. De signis circa hujusmodi.

ET HUIUS signum est, quod venti fortes præcipue sunt in autumno, sole existente circa æquinoctium hyemale : quia tunc sol comburendo exsiccat elementa : et ideo vapor tunc elevatus magis est siccus et terreus : et ideo in autumno dominatur complexio terræ, scilicet frigida et sicca.

b. De loco generationis ventorum, et qualiter generantur ?

LOCUS AUTEM generationis est circa mediam regionem, quæ est maximi frigoris : ascendit enim illuc vapor terreus : et cum sit per naturam gravis et frigidus, obviat ei frigus loci, et inspissat et gravat ipsum, et facit descendere aliquantulum. Calor autem solis in ipso etiam non est de facili separabilis ab ipso : quia magis confortatur in sicco terrestri quam in vapore humido : et ideo iterum relevat ipsum, et inde fit involuta impulsio aeris quæ ventus vocatur.

Involuta impulsio aeris ventus dicitur.

c. Quare perflat a latere, non de sursum ?

SIC ERGO determinata causa materiali et efficiente et loco venti in communi, opto magis transire ad speciem, ut sciatur quare ventus venit semper a lateribus nostris, et non descendit impetu flatus sui de sublimi quemadmodum pluvia.

Dico igitur, quod ventus et locus generationis venti secundum quod flare incipit, est in extremis terræ, et super ipsam. Causa autem hujus est, quod reflexio radorum in extremis debilis est, et in medio est fortis. Et hoc propter angulum radii qui in extremis est contingentiæ angulus : in medio autem est rectus et acutus vel obtusus. Cum igitur

causa efficiens venti sit calor debilis et evocans tantum, ideo confortatur materia venti in extremis terræ nostræ habitabilis, et non directe super ipsam.

porem aqueum magis proprie dicunt vocari vaporem proprio nomine.

d. De causa discontinua venti.

CAUSA AUTEM quare stat discontinue, scilicet cum flat unus, et cessat ad horam, vel flat debiliter, est quia in vapore illo frigus loci et natura vaporis superiorem partem ipsius deprimit valde vehementer : et cum latissimus vapor sit inspissatus a frigore, multum agit aerem, et dat flatum, donec descendat conversio frigoris ad extremitates ipsius super inferiorem partem, deinde resurgit calor ex radio circa terram, interim calido suo elevante ipsum et subministrante ei materiam ex elevatione pluris vaporis in ipsum : et ideo confortatus iterum dat ascendendo alium flatum fortem. Oportet enim nos esse edoctos, quoniam vapor terreus numquam ascendit æqualiter in omnibus partibus : quia in eo sunt oppositæ virtutes valde, scilicet levis, et gravis, et non æqualiter subtiliabilis propter duritiem sicci vaporis : et ideo ascendit sicut pellis extenta ab inferiori ad superius, cujus latitudo versa est ad nos.

Vapor terreus numquam ascendit æqualiter.

e. De causa quare unus ventus est fortior alio.

HIS VISIS, facile est videre qualiter unus flatus fortior est alio, et quis eorum. Cum enim superior extremitas inspissata frigore loci descendat et spissum fortius expellat aerem quam rarum, fortior erit flatus descensionis quam ascensionis. Istam autem ascensionem et descensionem vocant Philosophi motum tortuosum terrestris vaporis, sicut etiam vocant ipsum vaporem magis proprie fumum, propter sui terrestritatem et va-

Vapor terreus a Philosophis dicitur tumus, et vapor aqueus magis proprie dicitur vapor.

f. De materiali motu et sono venti.

HOC AUTEM necessarium est scire, quod aer est elementum omni obediens impressioni facile, cujus motus fit ad omnem partem natura sui. Signum hujus est projectio sagittarum, in qua levi impulsu violento motu fortissime impellitur aer, et inundat pars impellens partem usque quod cessat vis violentiæ. Si ergo tam parvum impellens tam fortem dat sibi motum, non est mirandum si fumus latissimus dat flatus hujusmodi. Hæc est etiam causa soni venti ad modum undarum constringentium sese, eo quod una inundatio prævenit aliam, et effundit se super eam.

Aer facile obedit omni impressioni.

g. De triplici causa abscissionis ventorum.

EX HIS de plano patere potest triplex causa abscissionis ventorum, scilicet intensum frigus, et intensum calor : et hæc abscondunt simpliciter, et pluvia sequens : et hæc abscondit similiter. Frigus quidem intensum non permittit aperiri terram ut elevetur fumus. Calor autem intensus comburit fumum, sed pluvia ex hoc quod infrigidat aerem, generat vaporem, ita quod tantum descendit, quod subito non potest elevari debili calido, et similiter humefacit terram, et superficiem partes (per quas exivit fumus) obstruit, et ideo præscinditur materia adaugens ventum.

Quare frigus intensum et similiter calor ac pluvia sequens abscondunt ventum ?

h. Quare cessat ventus post magnas pluvias ?

ET QUIA quidquid continue non generatur, cito deficit, ideo cessat ventus post magnas pluvias.

i. Quare post multas pluvias resurgit ventus ?

SED QUIA cessante pluvia iterum resurgit calidum in aere et in terra exsiccando et elevando vaporem et fumum, ideo ut frequenter post aliquam horam vel aliquos dies resurgit ventus, nisi sit pluvia valde longa quæ post multam frigiditatem faciat victoriam in fumo venti.

k. Quare vapor ventorum non convertitur ut pluatur terra sicut aqua ?

EX HIS etiam liquet quare vapor ventorum non convertitur ut cadat super nos terra pluens, sicut convertitur vapor aquæ et cadit super nos aqua. Et hujusmodi secundum supra dicta duæ causæ sunt, quarum una est et principalior materia venti, quæ est sicca et non bene continuabilis, sed tantum habens aliquid naturæ hujusmodi quod est continuum, sed disparet ad modum laconiorum.

Alia causa est, quia vapor venti non natat super eos, sed dirigitur ad extrema habitationis nostræ, vel convexi arcus unius terræ : quia terra rotunda est, et ventus quandoque est in terra una et non in alia, et tunc vapor, licet non sit simpliciter in extremo, est tamen in convexo arcus terræ in qua flat.

l. De numero ventorum simplicium et aliorum, et qualiter a Philosophis nominentur.

HIS visis, ponam ventos omnes et loca generationis eorum et impressiones singulorum de hoc quod efficiunt in nostra habitabili.

Sunt igitur quatuor simplices qui nascuntur versus quatuor angulos solis supra nostrum horizontem, distincti se-

Venti simplices quatuor.

cundum Aristotelem, scilicet Septentrio, Meridies, Subsolanus, Favonius.

Inter quoslibet autem duos sunt alii duo, et sic sunt octo medii. Inter Septentrionem et Subsolanum sunt Aquilo propinquior Septentrionali, et Vulturinus propinquior Subsolano. Inter Subsolanum et Meridianum Eurus est propinquior Subsolano, et Notus propinquior Meridionali sive Austro. Inter Austrum et Favonium duo, Africus propinquior Austro, et Zephyrus propinquior Favonio. Inter Favonium et Septentrionalem duo, Cirtius propinquior Favonio, et Corus propinquior Septentrionali. Duos etiam præter hos ponunt quidam flatus incertos et vagos qui non sunt determinati ab istis, sed potius ex eisdem locis generantur, ita scilicet, quod elevatio vaporis magna est quasi continua modo hic, modo ibi.

Venti medii octo.

m. De proprietate cujusque, et quod Orientalis ventus est magni flatus, expellens pluvias : Occidentalis autem parvi flatus, et ducit pluvias.

SUPEREST autem determinare quare unus istorum sit majoris flatus et paucæ pluviae et frigidæ auræ : alter autem levis flatus et multæ pluviae et corrumpentis auræ. Duo autem sunt multorum flatuum frequentium, et non fortium : unus quidem abscindens pluvias, scilicet Orientalis sive Subsolanus, alter autem conducens pluvias, scilicet Occidentalis.

n. De Aquilone et accidentibus suis.

DICO ERGO, quod Aquilo fortissimi flatus est et abscindit pluvias, et depurat aerem : et hæc omnia causantur a frigore sui vaporis, qui (quia densat vaporem et venit a loco frigoris, qui est juxta arcticum) ideo frigidus est ventus.

p. De causa sanitatis hyemali tempore.

ET QUIA frigus claudit poros terræ et continet superficies aquæ ut vaporare non possint, ideo depurat aerem abscindendo materiam pluvix: et eadem ratione claudit poros corporum nostrorum, ne immutentur ab exteriori egressu in nos vaporabiliter: et ex hoc continetur intra nos calor naturalis et fortificatur, et efficitur homo sanus.

q. De signis hujusmodi.

CUJUS SIGNA ponam duo, quorum unum est quod Hippocrates dicit in hyeme ventres calidiores esse quam in æstate: cujus quidem eadem est causa.

Aliud est quod habemus ex artificio Jacob, qui virgas excorticatas per loca hinc inde posuit in canalibus, quando primum oves commiscebant se simul. Et hoc (sicut infra probabitur) est quando flat Aquilo: eo quod ille continet vel constringit poros in generationibus et seminibus, ne evaporet spiritus et debilitetur conceptus.

r. De Meridionali et de causis morborum et pluviarum.

DICIT ARISTOTELES in libro de *Animalibus*, quod pastores quando volunt quod oves generent masculos, faciunt ascensiones ovium versus Aquilonem tempore venti Aquilonaris.

Hic etiam ventus dicitur a Philosophis flare recte, id est, directe, non motu elevationis, et depressionis in fine flatus: et hujus causa est, quia flatus ejus inundat ab Aquilone in Meridiem: et quanto plus venit in Meridiem, tanto plus accedit ad calidum: propter quod rarificatur vapor et subtiliatur, et non deprimitur, nec curvatur,

s. De Meridionali, et de causis morborum et pluviarum in æstate.

MERIDIONALIS autem propositis de causis habet accidentia opposita: quia enim calidus est vapor et a loco calido, ideo educit morbos: evaporat enim naturale calidum, et subintrat calidum aeris: ideo corpus turbatur et corrumpitur. Quia vero conducit vapores, ideo multiplicat pluvias. Flat autem tortuose: quia flatus ejus est unum flare tortuose a Meridie ad Aquilonem: et ideo inundans vaporem invenit frigus Aquilonis, et ideo inspissatur, et per consequens in fine suo curvatur et intorquet flatum. Quod autem dictum est unum flare tortuose, alium directe, habet quandoque impedimentum per accidens, sicut dicit Aristoteles, quod juxta torridum flat Aquilo tortuose, et hoc contingit propter recurationem inundantis vaporis ad aquosum, ad quosdam montes altissimos ibidem existentes: ita e converso propter loca calida transiens incipit dirigi in datum.

t. Quomodo pestilentus ventus maxime Auster fit sanus alicubi?

EADEM de causa in nostris climatibus sexto et septimo Auster non adducit morbos: eo quod antequam ad nos veniat, infrigidatur nivibus montium et aeris nostri vapore frigido, et non adeo aperit poros corporis, quod multum noceat sanitati.

u. Quod Aquilo plus regnat in vere quam in autumnno.

TEMPUS autem flatus Aquilonis est in vere plus et in autumnno minus. Et primi quidem temporis causa est: quia frigore vapores multi conclusi congregati sunt in terra, qui tepiditate veris evocantur et fa-

ciunt ventos, et præcipue in Aquilone, ubi magis est de frigore, et tenuis calor qui consumere non potest. In autumno autem terra desiccatur calore solis : et ideo tenuis calor de facili evocat vapores, eo quod non est constricta : et cum egreditur vapor, siccus est valde, et ventus altus in aere flare incipit. Et ideo proverbium vulgi est, quod venti alti flant in autumno.

Venti alti
flant in au-
tun no.

v. De Subsolanano.

SUBSOLANUS est ventus siccus calidus abscindens pluvias, sed non tantum ut Aquilo : eo quod ipse est de vapore sequente solem qui siccus est : et motus etiam firmamenti juvat adhuc : quia idem est motus venti illius quod motus diurnus : et ideo dissolvitur vapor et exsiccat.

x. De Favonio et mediis.

FAVONIUS autem propter causam oppositam adducit pluvias. De mediis autem secundum istorum naturam natura eorum mixta est intelligenda.

y. De diversis horis ventorum, et de hujus causa varietatis.

ITEM notandum, quod mane ut frequenter ante diluculum est ventus, et quandoque est de die et cessat nocte, et quandoque e converso. Hujus autem causa hæc est : in mane immittuntur radii solis, vapore frigiditate noctis compresso in Oriente : et ideo elevat ipsum, et ipse iterum frigiditate loci descendit, et ideo facit ventum, qui quandoque cessat sole vincente, quandoque confortatur quando sol non sufficit vincere, sed sufficit elevando depressioni continue repugnare. Vapor igitur frigidus deprimatur nocte et elevatur die et ventat.

Ergo vapor calidior vincitur die et aliquantulum frigore noctis deprimitur, et proprio calore iterum elevatur, et ideo ventat nocte.

Hæc determinata sint de generatis ex vapore simplici humido vel sicco et in alto loco.

z. Qui venti mane, qui sero regnant et medio die, et qui ab arcto veniant ?

Sunt Subsolanus, Vulturinus, et Eurus eoi. Cirtius occasum Zephyrusque Favonius afflant : Atque die medio Notus, Africus et Auster. Proveniunt Aquilo, Boreas, et Corus ab arcto.

17. De causis impressionum compositi vaporis.

DEINCEPS erit nostra intentio tangere primo causas impressionum compositi vaporis sicci et humidi, vel sicci cum sicco, vel humidi cum lumine solis, et sicci cum lumine stellarum : quia tunc habebimus quæ generantur ex vapore in alto.

Prima autem compositio est vaporis sicci cum frigido non commixtis vaporibus, sed distinctis, quæ compositio causat tonitrua et coruscationes.

Secundo dabimus causam super terræmotum, qui causatur ex vapore sicco non commixto cum sicco, sed concluso in elemento sicco solido quod est terra.

Tertio dabimus causam de vento turbini qui causatur a vento sicco objiciente alio vento opposito.

Et in fine curabimus videre colores nubium et nebularum, et cometam, et galaxiam : et tunc perveniemus ad omnia quæ generantur ex vapore in alto.

18. *De tonitruo et materia ejus, et de signo et loco ejus.*

Dico ergo, quod materia tonitruum alia est, et alius est locus ut vas generationis ejus. Materia autem est vapor siccus valde et calidus : ille enim de facili totus incenditur. Cujus signum (licet turpe, tamen conveniens) est in ventositatibus ventris, quæ quia siccae et sunt terrestres, ideo emissæ si modicum tanguntur ab igne, statim inflammantur et crepitant. Locus autem est nubes aquosa concava : elevantur enim forti calore solis ambo simul vapores.

a. *De causa coruscationis et soni tonitruum ex sequentibus patet.*

Cum autem vapor terrestris non sit adeo dilatabilis ut aqueus constringitur in medio sui, et alius expanditur circa ipsum sicut tentorium : et quia exterior est humidus, interior siccus, interior siccus fugit contrarium in profundum nubis exterioris, exterior autem a frigiditate loci etiam contrahitur, et amplius interiorem exagitat : et interior agitated confricat partem ad partem et ad latera exterioris : et ex ipso motu et confricatione contingit ipsum igni. Ignis autem expellitur a suo contrario : et vis ignis scindit nubem aquosam, et in scissura illa accidit coruscatio et sonus, quæ simul sunt tempore, sed non simul deprehenduntur : quia visus velocior est quam auditus : et hæc est sententia Aristotelis.

b. *De tribus modis soni tonitruum et egressionis vaporis unius ab alio.*

OBSERVANDUM tamen est, quod tribus modis fit sonus in tonitruo, sicut probari potest suo tempore, et tribus modis egressio vaporis unius ab alio. Et ita sex hic no-

tanda sunt : fit enim quandoque egressio violenta per expressionem unius ab altero, quemadmodum dicit Aristoteles.

Quandoque autem non fit ita, sed, vapor paulatim scindens nubem suam in qua est evolans, invenit aliam nubem siccam constrictam et spissam, et impingit in illam, et ex collisione facit sonum, quandoque cum coruscatione, et quando scilicet sonus colliditur.

c. *De coruscatione alba non faciente sonum.*

TERTIO AUTEM modo egreditur vapor parvus rarus et inflammatus ex nube tenui, et non multum aquosa : et tunc videtur ille ignis sicut alba flamma per multum fumum, et non facit sonum in propria nube, sed obviat ei alia nubes valde aquosa et spissa : et ideo quia debilis est, flamma exstinguitur in illa aquosa nube sinsiniendo potius quam sonando, sicut sinsinit ferrum candens in aqua.

d. *Quare ante tonitrua sunt venti validi et fortes ?*

TRIPLICITER etiam egreditur a propria nube, scilicet ante inflammationem, et in ipsa inflammatione, et post inflammationem.

Ante quidem quando incipit comprimi in profundum acumen sui, eo quod siccus est et penetrat nubem et egreditur ad aerem, et commovet ipsum fortiter, vel debiliter secundum diversitatem suæ virtutis : et hæc est causa quare ante tonitrua sunt venti validi et fortes.

e. *Quare coruscatio fit quandoque sine vento et sono ?*

IN IPSA autem inflammatione quandoque uterque est rarus et debilis : et tunc quia non invenit resistens, egreditur etiam sine sono vel vento qui pervenit ad audi-

tum nostrum, sicut in æstate accidit in parvis coruscationibus.

f. Quare sit sonus sine coruscatione ?

POSTQUAM AUTEM inflammatus est, et tunc pulsando latam nubem facit sonum : sed antequam pertranseat, exstinguitur, et tunc auditur sonus sine coruscatione.

Istæ autem diversitates a paucis notatæ sunt, sed omnes inveniuntur per experimentum si quis observaverit auras in æstate.

g. De nubibus et quatuor coloribus suis.

EST AUTEM nubes ut frequenter quadruplicis dispositionis quæ continet forte tonitruum, scilicet nigra, rubea, viridis, et alba aliquantum.

h. De nigra, et quare ipsa nubes nigra dat forte tonitruum ?

NIGRA QUIDEM est nubes spissa propriori frigore : et ideo non dat locum radiis ut penetrando albam faciant ipsam : et ideo spissa fortiter comprimit vaporem, et ignit, et dat forte tonitruum, si vapor intrinsecus fuerit multus et spissus.

i. De rubea, et quare dat fortiozem ictum frequenter ?

RUBEA AUTEM ex nigra est nube de se valde spissa : sed vapor ignitus jam resultat per ipsam : et ideo illa fortiozem dat ictum frequenter quam nigra.

k. De viridi, et quare sit periculosa et valde timenda ?

VIRENS AUTEM cum nigredine et rubore parvo est pessima omnium nubium, et

timenda, si directa sit super civitatem aliquam : quia illa habet multum ignem propter ruborem, et multam materiam vaporis propter nigredinem, et multam habet aquam propter nitorem : et ideo ibi fit pugna fortissima calidi cum frigido, et humidi cum sicco. Item ut frequenter illa emittit fulmina majorum lapidum qui dejiciunt turres, et incendunt domos et homines.

l. De alba, et quare non sit ita periculosa sicut viridis ?

ALBAM AUTEM non oportet timere, quia parum habet de utraque materia : et ideo si flamma ejus cadit super ædificia, statim exstinguuntur antequam incendat ea, nisi sint valde sicca et cremabilia.

m. De coruscatione et triplici colore.

VALDE AUTEM observandi sunt colores coruscationum, qui ut multum, sunt triplices, scilicet rubeus clarus, et albus flammeus, et rufus quasi vinosus.

n. Quare rubeus clarus color est timendus ?

PRIMUS AUTEM creatur a vapore non multum sicco : humidum ejus dat ei colorem rubeum, sicut est flamma viridium lignorum, et est timendus color ille : quia humidam continet materiam, quæ non spargitur, et ideo facilius et fortius incendit.

o. Quare albus flammeus non est ita periculosus ut primus, quia non lædit nisi cremabilia ?

FLAMMÆ AUTEM albæ color, est vaporis valde sicci, sicut est flamma siccorum lignorum : et ideo spargitur, et non lædit,

nisi cremabilia, sicut stupam, et hujusmodi.

Scindit autem ex impulsu, et incendit ex inflammatione.

p. Quare rufus color est pernotabilis ?

RUFUS AUTEM color pernotabilis est, eo quod ille est vaporis conglutinari valde terrestri, et multum frequenter scindit simul et incendit.

q. Quod quinque modis cadit coruscatio in inferiora, et primo de Telo coruscationis primi modi.

CASUS AUTEM ejus super inferiora est quintuplex de nube vel fere : quorum modus est, quod cadit vapor inflammatus rufus de nube viridi : et hic generat lapidem qui vocatur *Telum tonitruum*, hoc modo vaporabilis commixtio terrestris vaporis incenditur.

r. Qualiter lapis tonitruum est acutus ?

ET CUM TANGIT viridem nubem quæ est, jam conversione ad aquam conglutinatur, sicut farina in pastam. Fortissima autem incensio obviat, ita quod humore nubis non exstinguitur : et sicut conglutinatur vapor, fit humidus : et ideo in inferiori parte acuitur lapis ubi primo incipit distalbare vapor, et est grossus in parte alia : et hic lapis scindit et incendit quidquid invenit.

s. De coruscatione secundi modi etiam periculosa quæ plus scindit ligna quam lapides.

SECUNDUS modus est ejusdem vaporis, quando minus est conglutinatus, et in nube minus aquosa : et tunc non continuatur, sed incensus egreditur impetu, et scindit iterum et incendit : sed non scindit nisi ligna, et non lapides nisi raro.

t. De tertio modo coruscationis quæ similiter est periculosa, et quare non apparet vulnus talis passionis alicubi cum hominem interficit ?

TERTIUS modus est vaporis rubei clari, qui numquam facit lapidem, sed sua flamma cum non superatur a vapore : et hic numquam scindit nisi compacta corpora quæ sunt magnæ quantitatis : etiam hic interficit homines, et apparet in eis odor combustionis, et non videtur vulnus, quia cum sit subtilis, subintrat sine vulnere.

u. Quare tertius modus coruscationis comminuit aurum in bursa non lædens eam, perforat gladium et non vaginam ?

ET SI INVENIT aurum in bursa, comminuit aurum, et non lædit bursam : quia bursa ei rarum dat locum introitus de facili, aurum autem ut compactum resistit : et ideo comminuitur quandoque in partes, quandoque in pulverem. Et hoc modo accidit temporibus nostris, quod perforavit gladium cujusdam, et non læsit vaginam, et lapidem parvum etiam comminuit.

v. De alio modo coruscationis rubæ quæ plus nocet vineis, et quare magis vineis coopertis foliis multum plus nocet quam minus coopertis ?

ALIUS MODUS est ejusdem vaporis magis rari ex minus aquea nube egredientis, et ille subintrat et non lædit dividendo, nec aperte incendendo : sed est coruscatio rubea valde nociva. Et illa nocet vineis, sicut dixerunt mihi vinitores, et præcipue botris illis qui multis foliis sunt cooperti : et tamen per aliud foramen projicit coruscatio illuc vaporem cum radio

suo, eo quod illæ uvæ læsæ evaporare non possunt.

x. Quare radius coruscationis tumefacit vultum, et oculos ejus qui aspicit in eam excæcat ?

ET CORUSCATIO non tantum novica est corporibus cum directe cadit, sed etiam suus radius est nocivus ei quem tangit, quia corrumpit ipsum : eo quod hoc sit de natura hujus vaporis. Unde de hac causa quidam inspicientes in coruscationem hanc, inflati sunt in facie, et quidam excæcati in oculis.

y. De quarto modo coruscationis albæ, quæ quinque diversimode facit, et de causis hujusmodi.

QUARTUS modus est vaporis albi, qui egreditur in flamma sicca non coadunata, et ideo spargitur in aere : sed tamen egreditur magno impetu propter nubem profundam quæ est aquosa multum.

z. Quare caro ubi percutit, apparet alba, nec tamen apparent signa combustionis ?

ET ideo scindit et scindendo exstinguitur, ita quod ea quæ scindit, videntur alba, et non apparent in eis signa combustionis, et quandoque interficit quando bene fortis est impulsus.

aa. Quare Telum non lædit ubi percutit, sed eum qui stat a longe ?

ET QUANDOQUE propter sui disgregationem percutit in loco uno, et non lædit socium suum juxta eum stantem, et percutit eum qui stat remote.

bb. Quare reflectitur ab uno pariete et accedit ad alium ?

QUANDOQUE etiam reflexus a pariete uno, progreditur ad alium, et percutit illum.

cc. Quare vestem comburendo consumit, nec ardet talis coruscatio ?

ET QUANDO est debilior quandoque consumit vestem, et exstinguitur, et cessat ejus violentia, et non lædit hominem : et talis casus accidit mihi.

dd. De quinto modo coruscationis, et quare non nocet iste ?

QUINTUS modus est egressus ejusdem vaporis ex nube debilitata : et ille omnino nihil nocet : quia statim ad tactum aeris exstinguitur et retunditur, in quo cessat similiter incendium ejus et violentia impulsus.

ee. De tempore tonitrui, et in quibus regionibus plus ?

SED hoc adverteudum est, proprium tempus tonitrui aliud est in frigidis regionibus, scilicet in climate quinto, et sexto, et septimo : aliud in calidis, scilicet in quarto, tertio, et secundo, et primo. In regionibus enim frigidis raro tonat fortiter, nisi sole accedente ad tropicum æstivalem, qui est in capite Cancræ : eo quod tunc fortis existens simul elevat vaporem terræ et aquæ : ex quibus junctis causatur tonitruum. In aliis autem, scilicet calidis, generantur tonitrua in æquinociali, hoc est, sole existente in capite Arietis et Libræ. Quando enim est in Cancro, incendit vaporem quem elevat ipsum.

Nec est contrarium quod supra dixi- Solvit apparentem

contradictionem.

mus, scilicet quod sol in æstate abscindit comburendo vapores. Hoc enim verum est de vaporibus debilibus. Sed cum fortis est, calor non potest consumere vaporem grossum, sed elevat ut magnus ignis elevat ligna incensa, et facit ea volare per aerem.

ff. Quare si tonat in hyeme; plus erunt venti in initio veris et forte per totum annum?

UNDE OBSERVAVERUNT rustici quod verum esse expertus sum duobus annis, scilicet quando audiuntur in signis hyemalibus tonitrua, quod tunc in initio veris et forte per totum annum plus ventabit quam in alio anno. Hujus causa est, quia significat multam materiam esse in aere, quæ non de facili abscinditur etiam per totum annum.

Hæc igitur de tonitruo dicta sufficiant.

19. *De terræmotu, et de ejus causa materiali et efficiente, et de loco ejus.*

TERRÆMOTUS autem causam materiale[m] habet vaporem siccum ac grossum valde et terrestrem. Efficientem autem habet calorem solis penetrantem in profundum in ventrem terræ. Locum autem habet terram oppilatam in superficie.

Redeo igitur et distinguo hæc tria incipiendo a loco.

a. Quare terra (quæ locus est terræmotus) oppilatur tribus de causis?

LOCUS Igitur oppilatus est tribus de causis. Aut quia est non arenosus, mari tamen vicinus, ita quod fluxus et refluxus sint ad terminos ipsius : et sic oppilatur locus humido maris, et concluditur vapor : quia non potest exhalare, quia humidum repletivum est pororum.

Aut quia oppilantur pori pluviis multis continuis replentibus poros.

Aut quia terra solida est et saxosa continua saxo. In his enim excitatur vapor calore solis, et non potest exire propter oppilatos poros in superficie. Ideo multiplicantur in ventre terræ. Materia autem cum sit terrestris vapor, dividitur per multum et parum, et pariter per grossum et subtile, et calidum ustivum, et frigidum temperativum.

Ex his autem duobus, scilicet loco et materia concludam tempus egressionis et effectum ejus.

b. De tempore terræmotus.

TEMPUS egressus ejus ut frequenter est tempus æquinoctii : quia tunc multiplicatur materia ventorum, et in terra, et extra. Et ea multiplicata scinditur terra et egreditur.

c. Quare magnus et frequens fit terræmotus quandoque?

VIDIMUS tamen magnum terræmotum durantem multo tempore in Lombardia, qui fuit circa tropicum hyemale[m]. Hoc accidit ex eo quod materia fuit multa, et profunde in terra, et pori illo tempore valde oppilati erant, ita quod non potuit evaporare paulatim : ideo movit sæpe. Erat autem vapor calidus valde et diffusus per latitudinem totius provinciæ : et quia erat calidus ut frequenter quievit in die : quia tunc subtiliatur a sole, ita quod movere non poterat terram : de nocte autem frigore noctis inspissabatur, ita quod tunc movere potuit. Et ideo præcipue mediis noctibus veniebat, et duravit sic fere per dies quadraginta.

d. De horis terræmotus, et de causis horarum ejus.

TEMPORE etiam diurno est magis in mane et in meridie, quam in alio tempore diei, et magis in nocte quam in die, nisi aliter veniat per accidens. Quando enim vapor est calidus, ut frequenter tunc nimis subtiliatur in die a calore solis, ut dictum est. Et ideo in die quiescit ut plurimum, et inspissatus multo frigore noctis movet in nocte. Si autem sit frigidus paucus, tunc stat in nocte : et quia paucus est primo respectu solis in mane subtiliatur et movet. Si autem est frigidus et multus spissusque, tunc non subtiliatur ad movendum nisi sole confortato super ipsum in Meridie.

e. De causa parvi terræmotus.

EGRESSUS autem ejus quando est paucus subtilis, et terræ pori laxi sunt, est sine sono, et non inducit nisi parvum terræ tremorem.

f. De causa sibili qui provenit ex terræmotu.

SI AUTEM est subtilis parvus et terræ pori constricti, tunc inducit cum parvo tremore sibilum quemdam.

g. De distinctione causarum quorundam accidentium terræmotus.

SI VERO EST multus spissus et terræ pori constricti, aut est tunc frigus non adurens, aut calidum adurens. Item aut est vapor unius venti principalis, vel duorum oppositorum, sicut Aquilonis et Austri, aut Subsolanii et Favonii. Item aut in loco aquæ, aut ubi non sunt aquæ.

h. De elevatione terræ propter magnum terræmotum.

SI EST MINUS frigidus in loco non aquoso et multus, et pori terræ oppilati, elevabit terram, ita quod videbitur mons vel collis : et si non projicit ad alium locum ex impetu, tunc iterum residet egresso vapore in toto vel in parte.

i. Quare quandoque absorbentur aquæ, ita quod per horam non apparent propter terræmotum ?

SI AUTEM est frigidus multus in loco oppilato ubi sunt aquæ, tunc (aquæ si sint in superficie elevationis) absorbebit eas ad tempus donec resideat quod elevatum est. Et ex hac causa accidit quod pro miraculo habitum est in partibus nostris in Neccaro, in loco qui dicitur Lauffen. Ibi enim absorptus fuit Neccarus fere ad unam leucam per unum diem, et non sentiebatur motio aquæ supra et infra illam leucam : eo quod in loco terræmotus absorbebatur, et egrediebatur post : et iterum residente fundo manavit ut prius. Et ego eodem tempore superveniens vidi factum istud ex terræmotu.

Reddit causam unius quod apud quosdam credebatur esse miraculum.

k. Quare terra projicitur foras quandoque ex terræmotu ?

SI AUTEM aqua fuerit in profundo, tunc projicit terram, et facit eam apparere.

l. Quare sufflatur ex terra propter terræmotum quandoque cinis terræ combustæ, et destruuntur civitates ?

SI AUTEM est vapor siccus adustivus et in loco oppilato non aquoso, tunc egrediens exsufflat multum cinerem combu-

stæ terræ, ita quod quandoque operit civitates vicinas et destruit eas. Quandoque etiam tam iste quam præcedens projiciunt terram vel cinerem in fluvium et operiunt, ita quod videntur ipsum absorbere. Et quandoque etiam destruendo fluvios in una parte, cogunt aperire in alia.

m. De particulari diluvio quod accidit propter terræmotum quandoque.

SI AUTEM est vapor oppositus alii, quandoque accidit hoc (quod est valde incautum) quoniam tunc facit profundas voragines terræ, et quandoque unus movet aquam venientem a parte una, et alius venientem ab alia: et inducunt ex concursu diluvium particulare, præcipue quando obstruunt ostia fluviorum ad fluxum consuetum.

n. De signis præcedentibus et sequentibus terræmotum.

SIGNA AUTEM præcedentia terræmotum, sunt frigus, et sonus ex motu subterraneo.

Sequentia autem sunt caligo, et tenebræ circa solem vel stellas, propter dispositionem nubium.

Et hæc de terræmotu dicta sufficiant.

20. De turbine qui eradicat arbores, levat pulverem, et facit girgillum.

SEQUITUR nunc videre de vento turbine, et de illo determinare facile est secundum prædicta: quia non causatur nisi ex ventis ex opposito contra se venientibus, quorum uterque æquipollens est alii.

Effectus autem est ejus quandoque elevatio pulveris, et quandoque eradicatio arborum, secundum quod fortiores sunt, vel debiliores: quandoque autem unus debilior est altero, cum resistentia tamen aliqua: et tunc cedit, et per totam viam flatu unius superelevatur pulvis involute secundum circulum. Fit etiam quandoque turbo per accidens a vento uno tantum quando repercutitur ad parietem aliquem versus flatum suum.

Ex subsequentibus rubrica patet.

RESTAT DICERE causas generatorum ex vapore, qui conjungitur cum lumine solis et lune et stellarum, sicut est iris, et circuli solis et lunæ, et cometæ, et colores nubium et nebularum et galaxia, etc.

21. De iride et unde causatur?

SCIENDUM quod iris secundum Aristotelem causatur ex radio solis redeunte ad vaporem contractum nubibus, sicut radius refulgens in aqua relucet ad parietem. Oportet autem nubem habere et quietem. Ex quiete enim partes confluent cum sint similes, et sic exterior superficies plana fit, et levis ad recipiendum radiorum impressionem: et sic radius relucet ad vaporem, sicut luminosum relucet ad speculum sibi simile contra faciem alicujus. Cujus signum ponit Aristoteles in libro *Meteororum* ¹, dicens quod viri cujusdam debilitatus fuit visus: et dum iret, vidit ante se idolum suum, quod coram facie ambulabat.

Vide III Meteoror. in principio capit. de iride.

a. De forma iridis, et quare quandoque fit major.

ET LICET SOL cujus imago est iris, sit rotundus : quia tamen longe altior est nubibus, frigidior partem nubis tangens, imprimit ei formam actualem. Unde quanto sol est ortui vel occasui propinquior, tanto in parte opposita apparet arcus major.

b. Unde causantur colores iridis?

COLORES autem iridis causantur ex eo quod nubes irradiata a sole partes quasdam habet alteriores, et alias demissiores, et quasdam grossiores quam ut solem transmittant, et alias subtiliores quam ut solem excludant. Hæc inæqualitas alterutris lucem umbramque permiscet, et illam mirabilem arcus speciem representat.

c. De quantitate colorum iridis et ipsorum qualitate.

SUNT AUTEM colores secundum Aristotelem tres, aut quatuor, scilicet vinosus, scilicet rubeus extrinsecus super gibbositatem arcus. Post quem sequitur viridis, et deinde albus : et sub illo citrinus : et non possunt pictores colorem facere similem iridi, et præcipue colorem compositum medium inter intrinsecum et extrinsecum.

d. Quod iris a quatuor elementis quatuor recipit colores secundum quosdam.

QUIDAM AUTEM dicunt irim habere quatuor colores principales ex quatuor elementis, ex quibus dicunt etiam nubem compositam, ab igne rubeum, ab aere

purpureum, ab aqua glaucum, a terra propter herbas et arbores viridem.

e. Quid significet iris secundum diversa tempora apparitionis suæ?

ARCUS ISTE in diversis temporibus diversa significat. In meridie enim apprensus ortus, magnam vim aquarum esse in aere quæ in meridie possunt dominari. Si vero circa occasum solis fulserit, tonabit et leviter pluet. Si ab oriente vel circa surrexerit, serenitatem promittit.

f. Qua hora diei potest iris in hyeme, et qua in æstate oriri, et quæ sit causa hujusmodi?

DE ARCU Aristoteles ait post autumnale æquinoctium qualibet hora diei arcum posse fieri. In æstate vero non nisi incipiente aut inclinato jam die. Cujus rei istam reddit causam. In æstate sol circa Meridiem calidissimus nubes exurit, ita quod suam imaginem imprimere non potest, sed in matutino tempore aut vergens in occasum (quia minus calet) sustineri potest, et suam in eis imaginem imprimere. Item cum sol non soleat facere arcum nisi oppositus his nubibus, in quibus facit cum dies breviores sunt, semper nubes est oblique opposita soli : et ideo qualibet parte diei, etiam cum est altissimus, potest nubibus imprimere suam imaginem. Temporibus vero æstivis, supra verticem nostrum fertur : et ideo tunc media die directe inspicit nubes, nec eis suam imaginem imprimit.

De iride dicit Isidorus in libro *Etymologiarum* : « Arcus cœlestis dictus est a similitudine curvati arcus. Iris habet proprium nomen, et dicitur iris quasi aeris, id est, quod per aerem ad terram descendat. Hic autem a sole resplendet dum canæ nubes ex adverso radium solis accipiunt, et arcus speciem fundunt, cui varios colores illa dant tres. Nam

aqua tenuis, aer lucidus, et nubes caligans. Irradiata ista varios dant colores, etc. »

22. *De circulis solis et aliarum stellarum apparentibus circumquaque unde causantur?*

CIRCULUS vero videtur quandoque circa solem, sive corona, causatur ex vapore humido ascendente et multiplicato in aere ultra ipsum vaporem, aut in illo : deinde autem reflectitur illud lumen ab aere rediens super illum vaporem ascendens, et sic videtur circulus sine corona in circuitu solis.

a. *Quod circulus qui est circa solem et lunam et stellas, non longe est a terra, licet videatur tangere illum et illas.*

LICET AUTEM circulus iste videatur solem tangere, non longe tamen a terra fit ista effigies, sed visus noster imbecillitate deceptus putat ipsum esse circa solem : et similiter accidit in lua, et in aliis stellis habentibus lumen.

b. *Quare circulus iste non ita frequenter apparet circa solem ut circa lunam et stellas?*

HI CIRCULI nocte circa lunam et alias circa frequentius apparent : circa solem vero in die rarius : propter fortitudinem caloris ipsius vapores resolventis.

c. *De signis prædictorum circularum.*

CIRCULI ISTI si dilapsi æqualiter in se ipsos evanuerint, signant aeris tranquillitatem. Si autem in unam partem quasi rupti cesserint, ventum a parte illa flare significant. Si pluribus locis rupti fue-

rint, tempestatem in mari nautæ expectent.

23. *Quare sol plus minusve rubet?*

VIDETUR ETIAM quandoque color solis esse parvæ aut vehementioris rubedinis : quod contingit ex fumo multo ex vapore ascendente ad ipsum, sicut ex fumo ascendente de lignis viridibus conjuncto cum lumine ignis.

24. *De cometis, id est, stellis quæ videntur habere comas.*

COMETÆ SUNT stellæ habentes comas : quod fit propter aerem inflammatum contentum a stellis sive planetis, scilicet Saturno, Jove, et Marte, Mercurio, et Venere. Iste enim planetæ propter velocitatem motuum ipsorum igniunt aerem qui est in circuitu eorum : et sic propter aerem inflammatum contentum a stellis prædictis conjuncto lumine eorum cum ea, videntur stellæ illæ comatæ.

25. *De coloribus nubium, unde causantur, et primo de colore albo.*

COLORES VERO nubium sive nebularum causantur ex adjunctione luminis cum ipsis, secundum quod magis vel minus sunt diaphanæ. Unde dicit Averroes : « Necessè est ut fiat color ex admixtione corporis lucidi cum diaphano. » Color igitur albus causatur ex adjunctione luminis clari cum ea, si fuerit ipsa nubes multæ diaphaneitatis.

a. *De colore nigro.*

COLOR VERO niger causatur in nube ex adjunctione luminis cum ea, si fuerit minimæ diaphaneitatis.

b. De mediis coloribus inter album et nigrum.

Color albus
et niger sunt
elementa
colorum.

MEDII AUTEM COLORES diversificantur inter album et nigrum secundum diversitatem istorum duorum, scilicet corporis lucidi, et corporis diaphani, secundum magis et minus. Et ideo sicut dicit Averroes, « color albus et niger sunt elementa colorum. »

c. De rubedine serotina et matutina et signis suis.

RUBEDO VERO serotina causatur in nube ex spissitudine ipsius propter adustionem caloris solis, et ob hoc minus diaphanæ: cui dum jungitur lumen solis, efficit in ea rubeum colorem. Unde est etiam signum futuræ serenitatis.

Matutina vero rubedo causatur in nube ex spissitudine ejus propter vapores humidos ascendentes: quibus dum con-

jungitur lumen solis, efficit colorem rubeum sive vinosum, sicut contingit in fumo resoluta de lignis viridibus conjuncto cum lumine solis. Unde est etiam signum pluriæ futuræ.

26. De Galaxia.

DICIT ARISTOTELES, quod ignis purus propinquus orbi est inflammatus et lucidus, et in locis galaxiæ sunt parvæ stellæ multæ spissæ et magnæ propinque luminosæ. Ex conjunctione igitur luminis stellarum sibi invicem suscipientium etiam splendorem insuper adjuncto lumine ignis puri et inflammati videtur lumen oblongum, quod Philosophi *galaxiam* dixerunt. Et quia stellæ prædictæ fixæ sunt in cælo, propter hoc galaxia videtur in uno loco orbis non recedens ab eo.

Et hæc dicta ad præsens sufficiant de generatis ex vapore qui jungitur cum lumine solis et lunæ et aliarum stellarum.



INDEX

Rerum quæ in libro de Passionibus aeris continentur.

1.	De materia passionum aeris.	659	7.	De his quæ generantur ex vapore humido.	663
2.	De quatuor locis generationis impressionum.	660	8.	Quod inspissare vaporem seu nubem, et in aquam redigere sit per frigus, et disgregare per calidum, congelare vero per idem frigus invalescens atque constringens.	663
3.	De causa efficiente vaporum.	660	9.	De grandine.	663
4.	De calore.	660	a.	De signis et eorum proprietatibus, et quare grando cadit in tempore fructuum?	664
5.	De frigore.	660	b.	Quare grando non est directe rotunda?	664
6.	De his quæ generantur ex vapore sicco.	661	c.	Quare grando est liquescens et non sicca?	664
a.	De igne perpendiculari.	661	10.	De nive et ejus signis.	664
b.	De lancea ignea.	661	a.	De signis futuræ nivis.	664
c.	De candela accensa.	661	b.	Quod nix quandoque stat in aere diu.	664
d.	De assub.	662	c.	Quare nix cadit lata quandoque?	665
e.	De duplici assub.	662	d.	Quare vapor nivis congelatur?	665
f.	De diverso igne qui apparet in aere dupliciter.	662	e.	Quare nix cadit mollis?	665
g.	De stella cadente longa.	662	11.	De granulis cadentibus in Martio vel Aprili.	665
h.	De stella perdita quæ quandoque recipit tres diversitates, quandoque stat per moram in aere sola.	662	a.	Quare granula habent raritatem nivis interius sed	
i.	De assub descendente quæ stella cadens dicitur.	662			
k.	De stella fumigante, quæ quandoque apparet velut draco volans, quandoque velut serpent incurvans.	662			
l.	De assub quandoque apparente, quandoque non, qui tertius assub dicitur.	663			

- non mollitiem, exterius
vero comparationem gran-
dinis? 665
- b. De signo hujusmodi. 665
12. De pluvia. 665
- a. Quare guttæ pluviae cadunt
quandoque glaciatae? 665
- b. De guttis quæ splendent in
æstate cadentes. 666
- c. De signis hujusmodi. 666
13. De rore. 666
- a. De duplici conversione hujus
vaporis, et quare a sole ci-
to consumitur? 666
- b. Quare fit ros sub mensa dum
sero cœnatur in grami-
ne? 666
14. De pruina. 666
- a. Quare flatus condensatur
ad vestes et congela-
tur? 666
- b. De causa duritiei et rigo-
ris, qui est super ni-
vem. 667
- c. De rore dulci qui postea
efficitur albus super arbo-
rum folia ut farina, et
quare ex eo nascuntur ani-
mata? 667
- d. De causa quare de tali rore
generantur vermes? 667
- e. De prognosticationibus circa
hujusmodi. 667
15. De quodam inflammabili
atrahente quod subito
et tempestuose descen-
dit, et quandoque suavi-
ter. 667
- a. De signis circa hujusmo-
di. 668
- b. Quod pluvia tempestuosa fit
vento præcedente. 668
16. De ventis, et primo de mate-
riali causa ipsorum. 668
- a. De signis circa hujusmo-
di. 668
- b. De loco generationis vento-
rum, et qualiter generan-
tur? 668
- c. Quare perflat a latere, non
de sursum? 668
- d. De causa discontinua venti. 669
- e. De causa quare unus ventus
est fortior alio. 669
- f. De materiali motu et sono
venti. 669
- g. De triplici causa abscissio-
nis ventorum. 669
- h. Quare cessat ventus post
magnas pluvias? 669
- i. Quare post multas pluvias
resurgit ventus? 670
- k. Quare vapor ventorum non
convertitur ut pluat terra
sicut aqua? 670
- l. De numero ventorum sim-
plicium et aliorum, et qua-
liter a Philosophis nomi-
nentur. 670
- m. De proprietate cujusque, et
quod Orientalis ventus est
magni flatus, expellens
pluvias: Occidentalis au-
tem parvi flatus, et ducit
pluvias. 670
- n. De aquilone et accidentibus
suis. 670
- p. De causa sanitatis hyemali
tempore. 671
- q. De signis hujusmodi. 671
- r. De Meridionali, et de cau-
sis morborum et pluvia-
rum. 671
- s. De Meridionali, et de causis
morborum et pluviarum
in æstate. 671
- t. Quomodo pestilentus ventus
maxime Auster fit sanus
alicubi? 671
- u. Quod Aquilo plus regnat in
vere quam in autumnò. 671
- v. De Subsolano. 672
- x. De Favonio et mediis. 672
- y. De diversis horis ventorum,
et de hujus causa varieta-
tis. 672
- z. Qui venti mane, qui sero
regnant et medio die,
et qui ab arcto ve-
niant? 672
17. De causis impressionum
compositi vaporis. 672
18. De tonitruo et materia ejus,
et de signo et loco ejus. 673
- a. De causa coruscationis et
soni tonitruï ex sequenti-
bus patet. 673

- b.* De tribus modis soni tonitruum et egressionis vaporis unius ab alio. 673
- c.* De coruscatione alba non faciente sonum. 673
- d.* Quare ante tonitrua sunt venti validi et fortes? 673
- e.* Quare coruscatio fit quandoque sine vento et sono? 673
- f.* Quare sit sonus sine coruscatione? 674
- g.* De nubibus et quatuor coloribus suis. 674
- h.* De nigra, et quare ipsa nubes nigra dat forte tonitruum? 674
- i.* De rubea, et quare dat fortiorem ictum frequenter? 674
- k.* De viridi, et quare sit periculosa et valde timenda? 674
- l.* De alba, et quare non sit ita periculosa sicut viridis? 674
- m.* De causatione et triplici colore. 674
- n.* Quare rubeus clarus color est timendus? 674
- o.* Quare albus flammeus non est ita periculosus ut primus, quia non lædit nisi cremabilia. 674
- p.* Quare rufus color est pernotabilis? 675
- q.* Quod quinque modis cadit coruscatio in inferiora, et primo de Telo coruscationis primi modi. 675
- r.* Qualiter lapis tonitruum est acutus? 675
- s.* De coruscatione secundi modi etiam periculosa quæ plus scindit ligna quam lapides. 675
- t.* De tertio modo coruscationis quæ similiter est periculosa, et quare non apparet vulnus talis passionis alicubi cum hominem interficit? 675
- u.* Quare tertius modus coruscationis comminuit aurum in bursa non lædens eam, perforat gladium et non vaginam? 675
- v.* De alio modo coruscationis rubeæ quæ plus nocet vineis, et quare magis vineis coopertis foliis multum plus nocet quam minus coopertis? 675
- x.* Quare radius coruscationis tumefacit vultum, et oculos ejus qui aspicit in eam excæcat? 676
- y.* De quarto modo coruscationis albæ, quæ quinque diversimode facit, et de causis hujusmodi. 676
- z.* Quare caro ubi percutitur, apparet alba, nec tamen apparent signa combustionis? 676
- aa.* Quare Telum non lædit ubi percutitur, sed eum qui stat a longe? 676
- bb.* Quare reflectitur ab uno pariete et accedit ad alium? 676
- cc.* Quare vestem comburendo consumit, nec ardet talis coruscatio? 676
- dd.* De quinto modo coruscationis, et quare non nocet iste? 676
- ee.* De tempore tonitruum, et in quibus regionibus plus? 676
- ff.* Quare si tonat in hyeme, plus erunt venti in initio veris et forte per totum annum? 677
49. De terræmotu, et de ejus causa materiali et efficiente, et de loco ejus. 677
- a.* Quare terra (quæ locus est terræmotus) oppilatur tribus de causis? 677
- b.* De tempore terræmotus. 677
- c.* Quare magnus et frequens fit terræmotus quandoque? 677
- d.* De horis terræmotus, et de causis horarum ejus. 678
- e.* De causa parvi terræmotus. 678
- f.* De causa sibili qui provenit ex terræmotu. 678
- g.* De distinctione causarum quorundam accidentium terræmotus. 678
- h.* De elevatione terræ propter magnum terræmotum. 678
- i.* Quare quandoque absorben-

- tur aquæ, ita quod per horam non apparent propter terræmotum? 678
- k. Quare terra projicitur foras quandoque ex terræmotu? 678
- l. Quare sufflatur ex terra propter terræmotum quandoque cinis terræ combustæ, et destruuntur civitates? 678
- m. De particulari diluvio quod accidit propter terræmotum quandoque. 679
- n. De signis præcedentibus et sequentibus terræmotum. 679
20. De turbine qui eradicat arbores, levat pulverem, et facit girgillum. 679
- Ex subsequentibus rubrica patet. 679
21. De iride et unde causatur? 679
- a. De forma iridis, et quare quandoque fit major? 680
- b. Unde causantur colores iridis? 680
- c. De quantitate colorum iridis et ipsorum qualitate. 680
- d. Quod iris a quatuor elementis quatuor recipit colores secundum quosdam. 680
- e. Quid significet iris secundum diversa tempora apparitionis suæ? 680
- f. Qua hora diei potest iris in hyeme, et qua in æstate oriri, et quæ sit causa hujusmodi? 680
22. De circulis solis et aliarum stellarum apparentibus circumquamque undecausantur. 681
- a. Quod circulus qui est circa solem et lunam et stellas, non longe est a terra, licet videatur tangere illum et illas. 681
- b. Quare circulus iste non ita frequenter apparet circa solem ut circa lunam et stellas? 681
- c. De signis prædicatorum circolorum. 681
23. Quare sol plus minusve rubet? 681
24. De cometis, id est, stellis quæ videntur habere comas. 681
25. De coloribus nubium, unde causantur, et primo de colore albo. 681
- a. De colore nigro. 681
- b. De mediis coloribus inter album et nigrum. 682
- c. De rubedine serotina et matutina et signis suis. 682
26. De Galaxia. 682

INDEX

Operum B. Alberti Magni quæ vulgo PARVA NATURALIA nuncupantur et in volumine nono continentur.

Liber de Sensu et Sensato. 1

TRACTATUS I.	1
TRACTATUS II. — De Generatione sensibilium.	38
TRACTATUS III. — In quo tractantur dubia communia quæ sunt circa sensata.	73
Index tractatum et capitum.	95

Liber de Memoria et Reminiscentia. 97

TRACTATUS I. — De Memoria.	97
TRACTATUS II. — De Reminiscentia.	107
Index tractatum et capitum.	119

Liber I de Somno et Vigilia. 121

TRACTATUS I. — Cui conveniat somnus?	121
TRACTATUS II. — Secundum quid, et propter quam causam sequitur somnus?	137

Liber II de Somno et Vigilia. 157

TRACTATUS I.	157
TRACTATUS II. — Quid sit et qualiter fiat somnium?	169

Liber III de Somno et Vigilia. 177

TRACTATUS I. — Quod sit aliqua divinatio, et quid sit?	177
TRACTATUS II. — De causis somniorum in nobis.	197
Index librorum, tractatum et capitum.	209

Liber I de Spiritu et Respiratione. 213

TRACTATUS I. — De Spiritu secundum se.	213
TRACTATUS II. — De differentiis spiritus.	231

Liber II de Spiritu et Respiratione, qui est de spirantibus ipsis secundum quod spirantia sunt. 241

TRACTATUS I. — De Spiritum intus habentibus.	241
TRACTATUS II. — De inspirantibus et respirantibus.	246
Index librorum, tractatum et capitum.	253

Liber I de Motibus Animalium. 257

- TRACTATUS I. — De eo unde anima habet movere hunc motum? 257
 TRACTATUS II. — De primo organo motus. 269

Liber II de Motibus Animalium. 283

- TRACTATUS I. — De ipsis motibus et proprietatibus ipsorum. 283
 TRACTATUS II. — De dispositione eorum quæ moventur motu processivo. 293
 Index librorum, tractatum et capitum. 301

Liber de Ætate, sive de Juventute et Senectute. 305

- TRACTATUS I. — De ætate in commune, et differentiis ejus. 305
 TRACTATUS II. — De consequentibus ætatem. 306
 Index tractatum et capitum. 321

Liber de Nutrimento et Nutribili. 323

- TRACTATUS I. — De nutrimento et nutrito per se. 323
 TRACTATUS II. — De nutrimento et nutrito. 336
 Index tractatum et capitum. 343

Liber de Morte et Vita.	345
TRACTATUS I.	345
TRACTATUS II. — De causis longioris vitæ et brevioris.	350
Index tractatum et capitum.	373
<hr/>	
Liber de Natura et Origine Animæ.	375
TRACTATUS I.— De natura animæ in corpore.	375
TRACTATUS II. — De natura animæ non conjuncta corpori secundum quod ipsa est in se, resoluta corpore post mortem.	397
Index tractatum et capitum.	435
<hr/>	
Libellus de Unitate intellectus contra Averroem.	437
Index capitum.	475
<hr/>	
Liber I de Intellectu et Intelligibili.	477
TRACTATUS I. — De natura intellectus.	477
TRACTATUS II. — De per se intelligibili.	490
TRACTATUS III. — De comparatione intellectus ad intelligibile.	498

Liber II de Intellectu et Intelligibili. 503

TRACTATUS UNICUS. — De perfectione naturali intellectus. 503
 Index librorum, tractatum et capitum. 523

Liber de Natura Locorum. 527

TRACTATUS I. — De longitudine et latitudine loci per distantiam ab orbe. 527
 TRACTATUS II. — De natura locorum causata a locis. 538
 TRACTATUS III. — In quo est cosmographia. 566
 Index tractatum et capitum. 583

Liber I de causis et proprietatibus elementorum. 585

TRACTATUS I. — De proprietatibus elementorum in communi. 585
 TRACTATUS II. — De proprietatibus elementorum in speciali. 597

Liber II de causis et proprietatibus elementorum. 635

TRACTATUS I. — De his quæ præmittenda sunt de cœlo et situ terræ. 635
 TRACTATUS II. — De corruptionibus elementorum. 642
 Index librorum, tractatum et capitum. 655

Liber de Passionibus aeris, sive de vaporum impressionibus

659

Index paragraphorum.

683

